DI'LL DAN' NSA'A YEL NBAN

El Nuevo Testamento en el zapoteco de Yalálag



El Nuevo Testamento en el zapoteco de Yalálag

La Liga Bíblica 5C primera edición 2000 [zpu] La Liga Bíblica versión electrónica 2009

Publicado por

© La Liga Bíblica 2000

Se permite copiar, distribuir y comunicar públicamente esta obra bajo las siguientes condiciones:

- Reconocimiento. Reconozca a la Liga Bíblica los derechos que tiene en la impresión o distribución de esta obra, deslindándola de responsabilidad alguna por cualquier uso que se le de a la presente publicación.
- No comercial. No puede utilizar esta obra para fines lucrativos.
- Sin obras modificadas. No se puede alterar, transformar o generar una obra a partir de ésta.

ACLARACIONES SOBRE EL ALFABETO ZAPOTECO DE YALÁLAG

La mayoría de las letras con las cuales se escribe el idioma zapoteco son las mismas letras con las que se escribe el español, pero algunas representan sonidos un poco distintos. Además, ha sido necesario añadir otras letras para simbolizar algunos sonidos del zapoteco que no se encuentran en español.

La letra j se usa para escribir palabas como jsio cebolla, yej piedra.

La letra **11** se usa para escribir palabras como **11a** dia, **yell** pueblo.

La letra **nn** se usa para escribir palabras como **nna**' *ahora*, **be'nne** *persona*.

La letra **r** se usa para escribir palabras como **ra'pe** sombrero, **llir** comal.

La letra **x** se usa para escribir palabras como **xa**' *mi papá*, **bexe** *tomate*.

La letra xh se usa para escribir palabras como xhid gato, yoxh arena.

Las vocales sencillas, **a**, **e**, **i**, **o**, se usan para escribir palabras como **ga** *nueve*, **de** *ceniza*, **yi** *hinchazón*, **to** *uno*.

Las vocales cortadas, a', e', i', o', se usan para escribir palabras como ga' verde, lle' cántaro, yi' lumbre, yo' casa.

Las vocales quebradas **a'a**, **e'e**, **i'i**, **o'o**, se usan para escribir palabras como **ga'a** *canasto*, **ze'e** *pared*, **zi'i** *pesado*, **cho'o** *vámonos*.

Índice

de los libros del Nuevo Testamento

San Mateo	1
San Marcos	63
San Lucas	100
San Juan	161
Hechos	207
Romanos	263
1 Corintios	289
2 Corintios	315
Gálatas	331
Efesios	341
Filipenses	350
Colosenses	356
1 Tesalonicenses	362
2 Tesalonicenses	368
1 Timoteo	371
2 Timoteo	379
Tito	385
Filemón	389
Hebreos	391
Santiago	412
1 Pedro	419
2 Pedro	427
1 Juan	432
2 Juan	439
3 Juan	441
Judas	443
Apocalinsis	446

DI'LL WEN DAN' BZOJ SAN MATEO

Xozxta'o Jesucriston'

(Lc. 3:23-38)

Ganni nyoj ra be'nn ka' gok xozxta'o Jesucriston', be'nnen' gok Xhi'nn dialla David, na' Daviden' goke' xhi'nn dialla Abraham.

- ² Abraham na' goke' xa Isaac, na' Isaaken' goke' xa Jacob,
 - na' Jacoben' goke' xa Judá ren yezikre bi'che' ka'.
- ³ Na' Judán' ren Tamar na', gok ake' xaxhna' Fares ren Zara.
 - Na' Fares na' goke' xa Esrom, na' Esrom na' goke' xa Aram.
- 4 Na' Aram na' goke' xa Aminadab, na' Aminadab na' goke' xa Naasón,
- na' Naasón na' goke' xa Salmón.
- ⁵ Salmón na', ren Rahab gok ake' xaxhna' Booz.
 - Na' Booz na', ren Rut gok ake' xaxhna' Obed.
 - Na' Obed na' goke' xa Isaí.
- ⁶ Na' Isaín' goke' xa rey David, na' rey Daviden' goke' xa Salomón.
 - Na' xhna' Salomón na' goke' xho'r Urías.
- ⁷ Na' Salomón na' goke' xa Roboam, na' Roboam na' goke' xa Abías,

na' Abías na' goke' xa Asa.

8 Na' Asa na' goke' xa Josafat, na' Josafat na' goke' xa Joram, na' Joram na' goke' xa Uzías.

⁹ Uzíasen' goke' xa Jotam, na' Jotam na' goke' xa Acaz, na' Acazen' goke' xa Ezequías.

Na'll Ezequíasen' goke' xa Manasés, na' Manasésen' goke' xa Amón,

na' Amón na' goke' xa Josías.

¹¹ Josíasen' goke' xa Jeconías ren yela' bi'che' ka' bni't,

ka llan' bche'e be'nn Babilonia ka' be'nn Israel ka'.

- ¹² Bde gok ka', na'll gorje Salatiel xhi'nn Jeconías.
 - Na' Salatielen' goke' xa Zorobabel.
- ¹³ Na' Zorobabelen' goke' xa Abiud, na' Abiud na' goke' xa Eliaquim.

Na' Eliaquim na' goke' xa Azor.

- ¹⁴ Na' Azor na' goke' xa Sadoc, na' Sadoc na' goke' xa Aquim,
 - na' Aquim na' goke' xa Eliud.
- ¹⁵ Na' Eliud na' goke' xa Eleazar, na' Eleazar na' goke' xa Matán.
- Na' Matán na' goke' xa Jacob.
- 16 Na'll Jacoben' goke' xa José be'nnen' gok xhyio María.

San Mateo 1, 2

Na' María na' gok xhna' Jesús be'nnen' nzi'i Cristo, lle'nen nen be'nn brej Diosen' sorén yel llnebia' ke'en lli'o. ¹⁷ Na' bzorao kan' blla'a xhi'nn dialla da Abraham na', bllinte kan' blla'a xhi'nn dialla da David, za'a chda' (14) kwen dialla ke'e ka', na' xhi'nn dialla da Daviden' bllinte ka lla be'x ake' be'nn Israel ka', bche'e ake' leake' Babilonian', blla'a ye chda' kwen dialla ke'e ka'. Kana' bllinte ka llan' gorje Criston', blla'a ye chda' kwen dialla ke'e ka'.

Kan' gok ka gorj Jesucriston' (Lc. 2:1-7)

¹⁸Kin' gok kan' gorj Jesucriston'. Marían' ba nak di'll si'i Josén' le'e wchayna'a ake'. Bixha ka gokbe'e Josén', ba noa' Marían' bda'o kone Spíritu ke Diosen'. ¹⁹Na' Josén' be'nnen' ba nak di'll si'i Marían', goke' be'nn wen rao Dios. Na'll bene' xhbab cha' kwej yichje' Marían' llillize, na' bi wsie' Marían' zdo'. ²⁰Nna llonte' xhbab ka', bdekze bichgal ke'e, kate to angl be'nn bse'l Xanllo Dios, broe'rawe' le'e rao bichgal ke'en, na'll lle'e le'e:

—José, rwe' gorjo' rao dialla ke rey David. Bi llebo' si'o Marían' xho'ro', ka nak bida'on so na', bida'o ke Spíritu ke Diosen'. ²¹Na' bida'on so na' gakbe' to bida'o byio, na' wsi'o rabe' Jesús, le Lebe'n yeka'be' do'l ke be'nn yell kebe' ka'.

²²Gok yeolol da ka' nench gok kan' bne Diosen', kan' bzoj to be'nn be'e xti'lle'n kana', bne'e:

²³ To no'r we'o no'r nna napchi'i kwine', we'e to bida'o byio. Na' kat sobe' na', wsi'i akebe' Emanuel. Na' Emanuelen' lle'nen nen: Diosen' zorenkze' lli'o.

²⁴Na'll babando Josén', bayoll bnere' yeren', bene' kan' goll angl ke Diosen' le'e, na'll jaxie' Marían' rille'. ²⁵Na' bi bzorene' le'e ka to be'nn zo ren xho're', to bzoaze' le'e bdape' le'e bara'nne, bllinte lla bzo bida'o byio ke'en. Na' bsie'be' Jesús.

Be'nn si'n ka' nzi'i magos jara'nn ake' Jesúsen'

2 Ka llan' llnebia' rey Herodes, gorj Jesúsen' gan' nzi'i Belén, to yell gan' nbane Judea. Na' Jerusalén na' bllin to chop be'nn si'n be'nn nzi'i magos, za'k ake' do gan' llra' willre. ²Na' bnnab akre' be'nn rao yell ka', lle ake' leake':

—¿Gann rey ke be'nn Israel ka', be'nnen' ne ake' ba bra'? Nnézeto' ba gorje', le bre'to' berj ke'en gan' llra' willre, na'llen' za'to' zadye'raotoe'.

³Ka bene rey Herodesen' ka', to bitkra'n gokre', leska' yeolol be'nn Jerusalén ka'. ⁴Na'll batop reyen' yeolol bxoz wnebia' ke be'nn Israel ka', na' leska' yeolol be'nn ka' llsedre ke ley dan' bzoj da Moisésen'. Na' bnnabre' leake', garen' ne ake' garj Criston'. ⁵Na'll goll be'nn ka' Herodesen':

—Belén na' garje' gan' nbane Judea, le ka'n llia dan' bzoj to be'nn be'e xti'll Diosen' kana':

⁶ Ka nak yell Belén gan' lla'a dialla ke da Judán', naksen yell da za'ke rao yell wnebia' ka' zjalli' gan' nbane Judean'. Le to be'nn Belén na' gake'

be'nn wnebia',

3 San Mateo 2

na' Le'e gake' be'nn braon' rao yeololte be'nn Israel, le leake'n nak be'nn kia'.

⁷Na'll goxh Herodesen' be'nn si'n ka' nzi'i magos llillize nench jake' rawe'n, na'll bnnabre' leake' batya'nnen' bre'e akre' bra' berjen'. ⁸Na'll bse'le' leake' Belén na', lle'e leake':

—Lechejchk, lelljawiá, lelljadirj bida'on to lloa'. Na' kate yellélerebe'n, yeddixjwe're nada', nench na' cha'a llje'rawabe'.

⁹Bayoll bene be'nn si'n ka' nzi'i magos kan' goll reyen' leake'n, na'll bro' ake' nez. Na'll berj dan' bre'e akre' gan' llra' willen', zejen le' yebán' lliaraon rao ake'n, bllinten yo' gan' zo bida'o na', na' jasén. ¹⁰Na'll llawé be'nn si'n ka' kwis ka bre'e akre' berjen' da vobre. ¹¹Na'll ka bllin ake' yo' gan' zo bida'on ren xhna'be' Marían', na'll bche'k xhib ake', ben akebe' xhen. Na'll bsarj ake' dan' no'x ake'n, na' brej ake' ya cha'o dan' nzi'i oro, na' yare, na' to da la' xhix da nzi'i mirra, na' be'e ake'n kebe'. 12 Na' ka nna ni't be'nn si'n ka' Belén na', bdixjwe' Diosen' leake' rao bichgale, bill yedé ake' gan' zo Herodesen'. Na'll baka'a ake' ye to nez yobre, ballín akte! rall ake!.

Bxhonnj ake' jake' Egipto

¹³Na' ka ba zayej be'nn si'n ka', to angl ke Xanllo Dios broe'rawe' Josén' rao bichgale, na' lle'e le'e:

—Byas, bche'e bida'on ren xhna'be'n, lelljak gan' nzi'i Egipto, na' ganna' sore, na' kate netella', kana'll wak wayedre, le Herodes na' llayirjebe' nench gotebe'. ¹⁴Na'll le byaste Josén', bche'e bida'on ren xhna'be', na' zjake' Egipton'. ¹⁵Na'll bzo ake' Egipto na'ze chak bllin lla got Herodesen', na' ka' gok kan' bne Diosen' dan' bzoj to be'nn be'e xti'll Diosen' kana', bne'e: "Gan' nzi'i Egipto na', bayaxha' xhi'nna'n."

Herodes na' bse'le' be'nn waka'a ya ake nench lljet ake' bida'o byio ake

16 Na'll ka gokbe'e rey Herodes kan' bene be'nn si'n ka' le'e, ka nak bill badé ake' gan' zoe'n, na'll goklle'e kwis. Na' bse'le' be'nn waka'a ya ke'e ka' nench jet ake' yeolol bida'o byio zerao bi de chop ize, le ka't byi bsa'ke nak bida'on llayirje'. Na' jet ake' bi ka' gorj ak Belén na', na' yezikre yell da'o ka' nechj Belén na'. 17 Na' dan' bet ake' bida'o ka', bzoa di'll kan' bzoj da Jeremías, be'nnen' be'e xti'll Diosen' kana' llian:

18 Nente chi'i be'nn Ramá, ka llasbell ake' ni't ake' yel wan. No'r ka' nake xhi'nn dialla da Raquel llaya'chra'll ake', llak akre' ke xhi'nn ake' da'o ka',

na' bi lle'n akre' no yeyoe' leake' yel llxhenra'lle, le ba wasa't akbe'n.

¹⁹Ka bde got Herodesen', to be'nn nak angl ke Xanllo Dios broe'rawe' Josén' rao bichgale ka nna zoe' Egipton', na' lle'e le'e:

²⁰—Nna' byas bache'e bida'on ren xhna'be' na', na' lelljayak Israel na'. Ba got be'nn ka' llayirj bida'on nench yeso'tebe'.

²¹Na'll bayas Josén', bache'e bida'on na' ren xhna'be', na' jayake'

San Mateo 2, 3 4

yell ke ake' Israelen'. ²²Bixha ka bene Josén' ba zo Arquelaon' llnebie' roraz da xe'e Herodes na', na'll bllebe' wayeje' do gan' nbane Judea. Na'll bdixjwe' Diosen' le'e rao bichgale, bi llaya'le' lljayake' Judean', na' lljayake' gan' nzi'i Galilea na'le. ²³Na' ke len na' ballín ake' Nazareten', na' jazó ake' ganna'. Na' ka' bzoa di'll kan' bzoj be'nn ka' be'e xti'll Diosen' kana', bne ake': "Wsi'i ake' Le'e be'nn Nazaret."

Juan be'nnen' bchoa nis bdixjwe're' Di'll Wen ke Diosen'

(Mr. 1:1-8; Lc. 3:1-9, 15-17; Jn.1:19-28)

Bde zan iz, kate Juan be'nnen' bchoa nisen' byeje' latj dachen' do gan' nbane Judea. ²Na'll bllin be'nn ka' gan' zoe'n, na' bdixjwe're' leake', lle'e leake':

—Lewayate ke da xhinnj ba benre, le ba bllin lla nnebia' Dios be'nnen' zo yebán'.

³Ke Juan na' bzoj da Isaías be'nnen' be'e xti'll Diosen' kana', na' bne'e:

Be'nnen' nne zillj latj dachen', ne'e:

"iLegón xhnid, legoncha'o nez gan' te Xanllon',

lewsarj yichjra'llda'ore ka llon to be'nn llsarj to nez li!"

⁴Na' xha Juan na' goken de yich xha camello, na' bchej lloa' le'en to yid, na' bdawe' bichsoa ren blli'nda'o ke beser yi'xe. ⁵Be'nn lla'a yell Jerusalén na', na' be'nn lla'a yeolol yell ka' gan' nbane Judea, na' leska' be'nn ka' zjalla'a yell ka' nechj yeo Jordán na', baza'a ake' jak ake' gan' zo Juan na'. ⁶Na' bxoarap ake' bi da xhinnj ka' non ake'n, na'll bchoa Juan na' leake' nis lo yeo Jordán na'.

⁷Leska' jak zan be'nn Israel ka' be'nn ka' nzi'i fariseo, na' be'nn ka' nzi'i saduceo. Jake' nench bchoa Juan na' leake' nis. Na' ka bre'e Juan na' leake'n, na'll lle'e leake':

-iRe' nakre be'nn zban be'nn wxhiye'e, llonre ka bele! ¿No bzejnie' re', wak warare rao dan' wse'l Diosen' katen' gone' yel koxchis ke be'nnachen'? 8Cha' rennere ba bavátere ke da xhinnien' nonre na', llaya'l gonre da wen nench gakbe'e be'nne ba balla'a yichjra'llda'ore. ⁹Bi gonzre xhbab nnere: "Xhi'nn dia lla Abraham neto'." Yej ka' ni't nga, wakte gon Diosen' wayaken xhi'nn dialla Abraham, 10 Leska! ba no!xte! banchen' xhnid, yeolol yay da bi llbia daxhix wen, wchoye' do roe, gaken waye da wzeye'. 11 Nada' da li llchoa' re' nis cha' wayátere ke da xhinnjen' nonre, zan za za're ye to be'nne gone' nench cho' Spíritu ke Diosen' lo yichjra'llda'oren', da llon ka llon yi'. Na' be'nnen' za za'a ko'llra' za'klle' ka nada', ni jeze da yela' xhere'n bi gak gona'. 12 Katen' yede'n, gone' ka llon be'nn kate llsoe' trigo, llazie' trigon', na' llzeye' yixh bebe ken. Le'e nape' to yi' da bi wayorkze.

Jesúsen' blloe' nis

(Mr. 1:9-11; Lc. 3:21-22)

¹³Na' bza'a Jesúsen' gan' nbane Galilea, na' byeje' gan' zo Juan na' lloa' yeo Jordán na', nench choe' nis. ¹⁴Na' Juan na' bi go'nre' wchoe' Jesúsen' nis, lle'e Le'e: —Nadra'n llaya'l wchoa'o nis, na' rwe'ro' za'zo' wchoa' rwe' nis.

¹⁵Na'll lle Jesúsen' Juan na':

5

—Bchoa nada' nis. Da na'n llaya'l gonllo nench gak yeolol dan' ne Diosen' gak.

Na'tell bcheb Juan na' bchoe' Le'e nis. ¹⁶Na' ka bayoll blloa Jesúsen' nis, na'll balloje' lo nisen', le byarjte yebán' gan' llia Diosen', na' bre're' Spíritu ke Diosen', betjen ka to plom da'o, bllinen jasorenen Le'e. ¹⁷Na' ben akre' bnne Diosen' be'nnen' zo yebán', bne'e:

—Be'nn nin' nak xhi'nna' nllie'ra', llawera' llayazra'lla' kwis.

Gokra'll daxi'on wko'yelen Jesúsen' gone' da xhinnj

(Mr. 1:12-13; Lc. 4:1-13)

A Na' Spíritu ke Diosen' benen nench byej Jesúsen' latj dachen' gan' gokra'll daxi'on wko'yelen Le'e gone' da xhinnj.

²Na' bi bdaokze' rao choa (40) lla choa yere, na' ka bde choa lla na', bdone'. ³Na' jabi'y daxi'on gan' ze Jesúsen', llen Le'e:

—Cha' rennro' nako' dogarje Xhi'nn Dios, benchk yej ki yeyak aken yet xtir.

⁴Na'll lle Jesúsen' len:

—Nyoj xti'll Diosen': "Kere toze yet xtir dan' gaollo na', llonn yel nban ke lli'o be'nnach, renkze di'll dan' ll-lloj lloa' Diosen' nbanrenllo."

⁵Na'll bche'e daxi'on Le'e Jerusalén na', gan' nak yell ke Dios. Na' bche'n Le'e yichjo yoda'o gan' nak zeraoze sibe, ⁶na'll llen Le'e:

—Cha' rennro' nako' dogarje Xhi'nn Dios, bxhi'tchek ganni, Iljasote'o lle'le, le nyoj xti'll Diosen': Diosen' wse'le' be'nn ka' nak angl ke'e gakrén ake' rwe', na' go'x ake' rwe' nench ke lljache'o yej.

⁷Na'll lle Jesúsen' len:

—Leska' nyoj xti'll Diosen': "Bi llaya'l nnabro' Diosen' cha' rennre' kan' ne'en."

⁸Da yobre bche'e daxi'on Le'e to rao ya' da nak sib kwis, na' broe'n Le'e yeolol yell da zjalli' doxhen yellrio, na' ren yel za'k yel nbaraz ke ka'. ⁹Na' gollen Le'e da yobre:

—Yeolol da ki llre'ro' ganni, gona'n rallna'o cha' rwe' wche'k xhibo' rawa', na' gono' nada' xhen.

10 Na'll lle Jesúsen' len:

—Bayej ka'le, daxi'o, nyojkze le' xti'll Diosen': "Llaya'l gonlira'llo' Dios, na' toze Le'en we'ra'o."

¹¹Na'll bakwas daxi'on ka'le, na' le bllinte angl ke Diosen' jakrén ake' Le'e.

Jesúsen' bzorawe' bdixjwe're' Di'll Wen ke Diosen' do gan' nbane Judean'

(Mr. 1:14-15; Lc. 4:14-15)

¹²Na' baza'a Jesúsen' gan' nbane Judean', na' bayeje' gan' nbane Galilea, ka benre' ba yo' Juan na' lo rill ya. ¹³Na' bze'e yell Nazareten', jasoe' yellen' nzi'i Capernaum, dan' lli' lloa' nisda'on awllo gan' nzi'i Zabulón, na' gan' nzi'i Neftalí. ¹⁴Na' gok kan' bne da Isaías be'nn be'e xti'll Diosen' kana', ka bzoje' dan' llia:

¹⁵ Ka nak gan' ne Galilean' gan' lla'a zan be'nn bi nak be'nn Israel,

gan' nzi'i Zabulón, na' Neftalí gan' nban akre' lloa' nisda'o ye chla' yeo Jordán na', San Mateo 4, 5

¹⁶ nchole yichjra'llda'o be'nn ka' lla'a ganna'.

Bixha Diosen' bse'le' to beni' xhen lo yichjra'llda'o be'nn ka',

gok ake' ka be'nn wat, na' Diosen' ba bache'e lo yichjra'llda'o ake'n.

¹⁷Kana' bzorao Jesúsen' bdixjwe're', na' bne'e:

—Lewayate ke da xhinnj ba benre, le ba zo rez nnebia' Dios be'nnen' zo yebán'.

Jesúsen' goxhe' tap be'nn wxhen bel

(Mr. 1:16-20; Lc. 5:1-11)

¹⁸ Jesúsen' zeje' lloa' nisda'o ke Galilea, ka bre're' chop be'nn wxhen bel nzi'i Simón Pedro, na' ren bi'che' Andrés, llza'l ake' yixj dan' zenrén ake' bel ka' lo nisen'. ¹⁹ Na'll lle'e leake':

—Ledá gonre nada' txhen, na' gona' nench re' wtopre be'nne, na' yelloj ake' rao da xhinnj ke ake' ka'.

²⁰Na'll le bsanra'llte yixj bel ke ake'n, jannao ake' Jesúsen'.

²¹Na' Jesúsen' bze'e ye ra't, na' bre're' Jacobo xhi'nn Zebedeo, na' ren bi'che' Juan, yo' ake' to lo barco ren xa ake'n, llayoncha'o ake' yixj ke ake'n. Na' leska' goxh Jesúsen' leake', lljannao ake' Le'e. ²²Na'll le ben akte' barcon' rallna'a xa ake'n, na' jannao ake' Jesúsen'.

Jesúsen' broe' bsedre' be'nn zan (Lc. 6:17-19)

²³ Jesúsen' byeje' yeolol yell ka' zjalli' do gan' nbane Galilea, broe' bsedre' be'nn ka' zjalla'a toto yoda'o ke be'nn Israel ka'. Na' bdixjwe're' Di'll Wen na', kan' nnebia' Diosen'. Na' bayone' be'nn ka' llak biteze yillwe'. 24 Na' doxhente yellrio gan' nbane Siria bllirj di'llen', yeolol ke da wen ka' bene'n. Na' be'nn Siria ka' jwa'a ake' yeolol be'nn we'e ka' rawe'n, be'nn llak biteze yillwe', be'nn lley llra, be'nn yo' daxi'o yichjra'llda'o ake' ren be'nn llak xhgot, na' be'nn bi dá nia'na'a ak, na' bayone' leake'. ²⁵Na' zan be'nne bnao Le'e, be'nn lla'a gan' nbane Galilea, na' ren be'nn yell ka' nzi'i Decápolis, na' be'nn za'k Jerusalén, na' be'nn za'k yezikre yell da'o ka' zjalli' do Judea, na' be'nn za'k do chla' yeo Jordán.

Di'll dan' bzejnie' Jesúsen' to rao ya' (Lc. 6:20-23)

5 Ka bre'e Jesúsen' be'nn zan ba ndop rao ya'n, na' bllie' na'ze, na' be'nn ka' non Le'e txhen na', jabi'y ake' gan' llie'n. ²Na'll bzorawe' bzejnie're' leake', bne'e:

³—Nbaraz ke be'nn ka' llakbe'e akre' yallj akre' gakrén Diosen' leake', le leake'n nak Diosen' txhen be'nn llnebia'.

⁴'Nbaraz ke be'nn ka' llakya'ch akre', le leake'n we'e Diosen' yel llxhenra'll ke ake'.

⁵'Nbaraz ke be'nn ka' llexjra'll ake', le leake'n gon Diosen' rallna'a ake' doxhen dan' bchebe' gone' ke ake'.

6'Nbaraz ke be'nn ka' llon ka be'nn llbil don, nench gak ake' be'nn wen rao Diosen', le Dios na'n gon kan' zera'll ake'n.

⁷'Nbaraz ke be'nn ka' llaya'chra'll ake' be'nne, ka'kze gon Diosen' ke leake' yeya'chra'lle' leake'.

⁸'Nbaraz ke be'nn ka' ba bayib lo ra'llda'o ake', le leake'n yere'e akre' Diosen'. 7 San Mateo 5

⁹'Nbaraz ke be'nn ka' llabeklli ake' be'nn dile, le Diosen' waza'kre' leake' ka xhi'nne'.

10'Nbaraz ke be'nn ka' cha' llallayrao ake', na' llsa'kzi' ake' leake' ni ke da wen na' llon ake' rao Diosen', leake'n gak Diosen' txhen be'nnen' llnebia'n.

11'Nbaraz ke re' cha' dan' llonlira'llre nada'n zi'chi'll be'nne re', na' wsa'kzi' ake' re', chirjla'll ake' di'll wenra'll keré. ¹²Leyewé lesó nbaraz, le Dios na'kze gone' da wen keré kate yellinre gan' llie'n. Kan' llon aksre' re' na', ka'kze ben xozxta'o ake' ka' ren be'nn ka' be'e xti'll Diosen' kana'.

Nakllo ka ze'de na' ka beni' rao yellrion'

(Mr. 9:50; Lc. 14:34-35)

13'Re' nakre ka ze'de rao be'nn ka' lla'a yellrion'. Ze'den' naken wen, bixha cha' ze'd na' ba bde ke bill naken zna', ¿akxha gonllon nench yeyaken zna' da yobre? Billbi de gónellon, na' cho'nnllon wrej wchekw be'nn len.

14'Na' re' nakre ka beni' da llseni' ke yeolol be'nne. Na' nakre ka to yell da lli' to rao ya', na' yeololte be'nne llre'e akre'n. ¹⁵Notno wa'l to da wseni', na' si'ze' to da wdo'se'n, zan wze'en sibe nench wseni'n ke yeolol be'nn lla'a lo yo'. ¹⁶Na' ka nak re' llaya'l soteze sore gonre da wen nench re'e be'nne, na' ka' we'rao ake' Xallo Dios be'nn zo yebá.

Jesúsen' broe' bsedre' kan' llia le' leyen'

¹⁷'Bi gákere cha' nada' za'a walana' ley dan' bzoj da Moisésen', na' dan' bzoj yezikre be'nn ka' be'e xti'll Diosen' kana'. Za'a nench gok kan' llia yeolol xti'll Diosen' dan' bzoj be'nn ka'. 18 Da likzen' te ke yellrio ni, ren da ka' llre'llo le' yebá na', na' nia', ni ra't dan' nyoj le' ley na', bi gak yeranen, gaktelle yeolol dan' nllia Diosen' bia'a gak. 19 Ke len na' notezre cha' bi gonre kan' llian na', la'kze cha' naken le zerao da da'o, na' leska' cha' wroe're be'nn yobre bi chejle' ke leyen', bi nakre be'nn brao ke gan' llia Diosen' llnebie'. Na' notezre cha' gonre kon kan' llian na', lekze ka' cha' wroe're be'nn yobre gon ake' kan' nen na', Dios be'nnen' zo yebá na' llnebie', nne'e nakrenre be'nn brao. 20 Nia' re', cha' bi wcha'a yichjra'llda'oren' nench gakllen wen rao Diosen', kerke kan' nak ke be'nn fariseo ka', na' be'nn ka' llsedre ke ley dan' bzoj da Moisésen', bi yellinre yebá gan' llia Diosen' llnebie'.

Da xhinnjen' llonllo cha' llaklla'a lwelljllo

(Lc.12:57-59)

21 'Bakze nnézere kan' bzejnie' da Moisésen' be'nn ka' blla'a kana', bne'e: "Nono gotre. Na' cha' no gote lwellj be'nnache, koxchis ka' wchoy ake' akre gon ake' ke'e."
22 Na' nada' llepa' re', cha' llaklla're lwellj be'nnachre, Diosen' gone' yel koxchis keré. Na' noteze' cha' zi'chi'll lwellje', llaya'l gon be'nn ka' llnebia'n yel koxchis ke ake'. Na' noteze' cha' lla'd di'll lwellje', wase'l Diosen' le'e lo yi' gabil.

²³'Na' cha' kat zere lo yoda'on nench we're bi dan' lle'nere we're we'raore Diosen', na' lljadinra'llre San Mateo 5 8

bdilrenre to be'nn lwelljre, ²⁴na'ze llaya'le wkwa'nnre choll dan' no'xre, na'll lljaye'xhenre be'nnen'. Yeyoll na' wak lljwa're dan' llaya'l we're Diosen'.

²⁵'Kate to be'nne gawe' xhia keré rao koxchis, chak yo're nez na', lewiá akre ko're xhnneze, na' yezorenre' wen nench bi lljwe'e re' yora'o. Cha' bi bro're xhnneze rao nezen' zejren', ka llinre rao koxchisen', gone' re' rao na'a xa'y ka', na' ko' ake' re' lo rill ya. ²⁶Di'll li llepa' re', kere wabeje' re' cha' bi chixhjre doxhen dan' llba'yre.

Jesúsen' bzejnie're' be'nn ka' bi gak wzoa xto ake'

²⁷'Ba bre'kzere ley dan' bzoj da Moisésen' nen: "Bi tarenre no'r yobre be'nn bi nak no'r keré." ²⁸Na' nada' llepa' re', noteze be'nne cha' llwie' to no're, na' llzera'lle' le'e, ba llonkze' da xhinnjen' lo ra'llda'we', rebze ba llonkze' ka be'nn ka' llzoa xto ake'.

²⁹'Na' cha' yejraore cha'wen' llonen nench gonre da xhinnje, wenre chenak kwejre yejraoren' na' lljacho'nnren, kerke da gonre da xhinnjen'. Wenre chenak kweyi' to yejraoren', kerke da kweyi' doxhenre lo yi' gabilen' ni ke len. ³⁰Na' cha' na'ren' cha'wen' lle'nen xoben re' gonre da xhinnje, wenre chenak wchoyren na' lljacho'nnren, kerke da gonre da xhinnjen'. Wenre chenak kweyi' to na'ren', kerke da kweyi' doxhenre lo yi' gabilen' ni ke len.

Be'nn ka' nchayna'a bi llaya'l yera'a ake'

(Mt. 19:9; Mr. 10:11-12; Lc. 16:18)

³¹'Lekze nnézere ley dan' bzoj da Moisésen' nen: "Noteze be'nn yera'a ren no'r ke'e, llaya'l chas to da we'e di'll bara' ake'n." ³²Na' nada' llepa' re' noteze be'nn llara'rene' no'r ke'en, na' cha' bibi do'l de ke no'ren' darene' be'nn yobre, rao da nxhollen' llzoe' le'e, llone' nench sorén no'ren' ye to be'nn bi nak xhyiwe'. Na' noteze be'nn yechayna'rene' to no're be'nn bara'a ren be'nn ke'e, rebze da xhinnjen' gonkze' ka dan' llonkze be'nnen' darén xho'r be'nne.

Jesúsen' bzejnie're' llaya'l we'llo di'll li

³³'Na' leska' ba nnézkzere ka dan' bzejnie' da Moisésen' da xozxta'ollo ka' kan' golle' leake': "Góntere cha' bi dan' bchebre gonre rao Xanllo Diosen'." 34 Na' nada' nia' re', bi wa'lrizre Diosen' nere: "Yebá na' llzoa' di'll lin' lloa'a", kat bi da gonre, le yebá na'n zo Diosen' llnebie'. ³⁵Na' bi nnerizre: "Yellrio nin' llzoa'n di'll lin' lloa'a", le vellrion' ke Dios na'kzen'. Na' bi nnere: "Jerusalén na' llzoa'n di'll lin' lloa'a", le naken yell ke Dios be'nn nake le zerawe be'nne llnebia'. ³⁶Na' bi nnere: "Yichja' ni llzoa'n di'll lin' lloa'a", le bi gak gonre nench vich vichjren' yevaken da lliche o cha' yeyaken da gasje. ³⁷Kat nnere waken, waksen na'; na' cha' nere bi gaken, bi gaksen na'. Le billre di'll da nnere nench cheile' ake! ke re! bi naken wen.

Bi gaklla'llo be'nn llwie lli'o

(Lc. 6:29-30)

³⁸'Nnézere ley dan' bzoj da Moisésen' nen: "Cha' to be'nn gone' zi' yejraoren', wak wayonre 9 San Mateo 5, 6

zi' yejrawe'n, na' cha' to be'nne wxo'pe' to layren', wakse yexo'pre to laye'n." ³⁹Na' nada' nia' re': Bi wllonre wsa'kzi' be'nne re'. Cha' to be'nne kape' xa'yre, lewzé da ye chla'n kape'n. ⁴⁰Cha' to be'nne llakyollrene' re', na' lle'nre' wke'e xhare, lewe'e latje wka'rente' xhadon kerén'. ⁴¹Na' cha' to be'nn gone' bien chejrenre' wa're no yoa' ke'en do achj hor, lechejrene' lewa'n chop ka ton ne'e na'. ⁴²Na' cha' bi dan' llnnabe be'nne re', cha' naken zi da we're, lewe'n; lekwej cha' bi dan' llnnabe' kweire'.

Llaya'l llie'llo be'nn la'kze llwiere' lli'o

(Lc. 6:27-28, 32-36)

43'Na' lekze ba nnézere ley kerén' llian: "Llaya'l llie're be'nn lwelljre, na' wiere be'nn llwie re'." 44 Na' nada' nia' re', llaya'l llie're be'nnen' llwie re', na' llaya'le nnabre rao Dios gak wen ke no be'nne zi'chi'll re'. Legón wen ke be'nne llwie re', levelwill Dios nench gak wen ke no be'nn llsa'kzi' re'. 45 Cha' ka' gonre, llroe'kzere nakre xhi'nn Dios be'nnen' llia yebá. Le Le'en llone' llra' will nench llseni'n ke be'nn wen ak, na' ren ke be'nn wen da xhinnj ak. Na' leska' llone' llak yejw ke be'nn wen ren ke be'nn wen da xhinni ak. 46 Na' cha' re' llie're chraoze be'nne llie' re', na' bi llie're be'nn yobre, ¿bixha da wen gon Diosen' kerén'? Le ka'kze llon be'nn wachixhi ka'. 47 Na' cha' no bi'ch lwelljre ka'ze llwapre lliox, ¿llákere cha' wen na' llonre ka'? Bi naken wen ka', le ka'n llon be'nn ka' bi nombia' Dios. 48 Zan llaya'l gakre

be'nn wen be'nn cha'o kon noteze be'nne, kan' nak Xallo Dios be'nn zo yebá nake' be'nn wen be'nn cha'o.

Jesúsen' bzejnie're' akren' llaya'l gonllo dan' llazra'll Diosen'

'Kat gonre to da wen, bi gonren nench re'e be'nn ka' re', na' yeyoe'rao ake' re'. Cha' ka' llonre, bibi da wen gon Xallo Diosen' keré. ²Ke len na' kat we're be'nne cha' bi da yalljre', bi we'ren nench nneze be'nn ka'. Le ka'kzen' llon be'nn chop rao ka', lloe' ake' bi da lloe' ake' do lo yoda'o, na' do tnez nench nneze be'nn ake, na' llavoe'rao ake' leake'. Da li nia' re', kone ka' llaxhj dan' llon ake', na' Diosen' bibi da wen de gone' ke ake' chet ka'. ³Zan re', cha' bi da we're to be'nne, lewe'n llillize. ⁴Lewe'n ga bi gakbe'e be'nne, na' bi yeyoe'rao ake' re', na'll Xallo Dios be'nnen' llre'e yeolol da ka' llonllon', gone' nench gak wen keré.

Jesúsen' broe' bsedre' akren' gonllo yelwill-llo Dios

(Lc. 11:2-4)

5'Kat yelwillre Diosen', bi gonre kan' llon be'nn chop rao ka', llawé akre' sellá ake' yelwill ake' Diosen' lo yoda'o ke ake'n, na' do skin do tnez, nench re'e be'nne kan' llon ake'n. Da li nia' re', ba bxhi'te raxhj be'nn ka' rao yellrio na'ze. 6Zan re' katen' yelwillre Diosen', leyeyo' lo yo' keré to wrazre, leyesejte gan' yo'ren', na'll we'renre Xallo Diosen' di'll, la'kze bi llre'lloe', zorenkze' lli'o, Lekze'n llwie' yeolol dan' llnnabren', na' gone' da wen keré.

San Mateo 6 10

⁷'Na' kat yelwillre Diosen', bi we're toz ka di'll we're kan' llon be'nn ka' bi nombia' Diosen'. Le leake'n llak akre' cha' di'll zan na' lloe' ake' na'zen', si'te Diosen' xti'll ake'n. ⁸Bi gonre kan' llon ake'n, le Xallo Diosen', ka za nnábtere, ba nnéztere' bin' yálljere na'. ⁹Kin' yelwillre Diosen':

Xa, rwe' llia'o yebá, nak la'y ra'on.

Yedchga yel llnebia' ko'on. Gakchga kan' lle'nro' rao yellrion' kan' llak yebá na'.

¹¹ Dan' gaoto' tlla tlla bennchgan nna'.

¹² Na' bazi'xhen keto' kan' llon neto', llazi'xhento' ke be'nne biteze da llon akre' neto'.

¹³ Na' bi wsanra'llo' neto' yexjto' rao da xhinnjen',

bkwas brekyi'll neto' rao da xhinnjen'.

Le rwe'n llnebia'o, na' napo' yel wak, nako' be'nn za'k xhen zejlikane.

Ka'n gakchga.

¹⁴'Na' cha' llazi'xhenre ke lwellj be'nnachre biteze da llon akre' re', Xallo Dios be'nnen' zo yebá, leska' yezi'xhene' yeolol da xhinnj keré. ¹⁵Na' cha' re' bi llazi'xhen ke lwelljre, leska'kze bi yezi'xhenkze Xallo Diosen' keré.

Jesúsen' bzejnie're' akre gonllo was

16'Kat gonre was, bi gon lloa'raoren' ka be'nn zoya'che, kan' llon be'nn chop rao ka'. Llon ake' nench re'e be'nn cha' bi dan' llon ake', na' wayoe'rao be'nn leake'. Da li nia' re', ba bxhi'te raxhj be'nn ka' rao yellrio na'ze. 17 Zan re', kat gonre wasen', lewapa' yichjraore, lechib lloa'raore. ¹⁸Ka'n gonre nench ke gakbe'e be'nne cha' wasen' nonre, le toze Xallo Dios na'n llaya'l gakbe're', le Le'en zorene' re', la'kze cha' bi llre'lloe'. Xallo Dios na'n llre're' yeolol da llonren', na' gone' da wen keré.

Yel wnia' da de yebá

(Lc. 12:33-34)

¹⁹'Bi ko'cha'ore da nak yel wnia' rao yellrio ni, le weyi'n. Le balen le llteteba', na' ye balen llbia re, na' leska' llaz be'nn wan, na' kwan ake'n. ²⁰Zan Dios na' lewxenra'lle' nench gonne' da wen da cha'o keré da bi te ke, kat yellinre yebá gan' zoe'n, naken da bi wteba', ni ke kwiaze re, ni be'nn wan bi gak kwanen. ²¹Le gan' ngo'cha'ore dan' llazra'llre na'n, ganna'n zokze yichira'llda'oren'.

Beni' ke yichjra'llda'ollo

(Lc. 11:34-36)

²²'Yejraore llian naken ka to beni' nench re're. Cha' bibi llaken, llre'kzere kwasro. ²³Zan cha' yejraoren' bi naken wen, doxhenre ncholen chet ka'. Na' chet ka' beni' ke Dios dan' nere zorén re' naken xchole, xchol kwisen' nak yichjra'llda'ore chet ka'.

Diosen' na' yel wnia'

(Lc. 16:13)

²⁴'Nono gak gon llin ren chopre xane' to chi'ze, le cha' ka' gone', wiere' to xan llin na', na' llie're' be'nnen' ye to; na' gone' llin ke toe' do yichj do ra'lle', na' ke be'nnen' ye to, gone'n kaze ra'lle'. Ka'kze ke re' bi gak gonre xchin Diosen', na' waráltere gonre llin, sera'llre gakre be'nn wnia'.

Diosen' llap llwie' xhi'nne' ka' (Lc. 12:22-31)

25'Ke len na' llepa' re', bi kwek yichjre chraoze bi da ye'j gaore chak nbanre, leska' bi kwek yichjre chraoze ke xhara'nre. Le za'kll yel nban kerén' ker ka yel waon'. Lekze ka' kwerp kerén', za'kllen ker ka xhara'nren'. ²⁶Lewiá ke ba ka' zo xir llasdá rao lla, ni ke llaz llarap akzba', na' ni da' xhoa' ke akba' bi zo, na' Xallo Dios be'nnen' zo yebá na' llwaokzeba'. ¿Kere za'kllre ker ka ba ka' zo xiren'? ²⁷Na' ni tore kere wak yesdón kwinre ye tchit, cha' kwe' yichjzre gakre be'nn tonne.

²⁸'Na' ¿bixchen lli' yichjzre kwis ke xhara'nre? Lewiá ke yej da'o zjalla'a lyi'xe, llazocha'o aksen la'kze bibi llin llon aken. ni ke llab akzen yere. ²⁹Da li nia' re', rey Salomón na', goke' ra'll wen kwis, na' ni ka' bi ballinkze xhara'ne'n katk yel nbaraz ke yej da'o ka'. 30 Diosen' none' nbaraz da zjadé lyi'xe la'kze to chop llaze so aken, na' llzey ake'n. Bixha re', ¿bi llákere gonlle Diosen' wen keré cha' re' nxenra'llre'? 31 Ke len na' bi kwe' yichjre ke bi dan' yálljere, nere: "¿Bi ye'j gaollo, na' bi gakllo?" 32 Ke nak be'nn ka' bi nxenra'll Dios, kon lloe'la'll ake' llayirj ake' da ki. Zan lli'o, nnézkze Xallo Dios be'nnen' zo yebá na' bin' yálljello. 33 Llaya'le kwe' yichjre, na' wzenayre ke Diosen' nench nnebie' yichjra'llda'ore, na' gakre

be'nn wen rawe'n. Na' yeolol da ka' yálljeren', Dios na'kze gonne'n. ³⁴Bi kwe' yichjre bi gak wxe willje, le dekze latj wxe, kwe' yichjllo da za za'a. Le tlla tlla nsa'kzen da zed ke.

Bi llaya'l wchoybia'llo ke be'nne (Lc. 6:37-38, 41-42)

'Bi wlliayi'llre be'nne, nench ke wlliayi'll Diosen' re'. ²Kon kan' llonre llchoybia're ke be'nne, ka'kze gon Diosen' wchoybie' keré. Na' kan' llónere be'nne, ka' gonkze Diosen' ke re'. ³¿Bixchen llwiazo' beb da'on yo' lo rao be'nn bi'cho'n, na' bi llwia'o beb xhen na', yo' lo rao rwe'? 4¿Bixchen yezo' bibi'cho'n: "Anchk wabejkera' beb da'on vo' lo rao'n?" ¿Bixha dan' yo' lo rao rwe'? ⁵iBe'nn chop rao! Zga'tek babej beb xhen na', yo' lo rao rwe', na'llen' yere'ro' kwasro, na' gak wabejo' yixh beben' yo' lo rao be'nn bi'cho'n.

6'Na' bi we'rentezre xti'll Diosen' be'nn ka' bi llazra'll len na', nxholl gon akre' re' znia ka llon be'kw wxhoxhjtinba' be'nne. Bi gonre ka be'nn wza'lze' da cha'o ak rao kuch ak, nxholl wrejchekw akba'n.

Kan' llaya'l nnábello Diosen'

(Lc. 11:9-13; 6:31)

⁷'Lewnnab, cha' bi wnnabre, gonnkze Diosen' len; lechirj, cha' bi chirjre, wllelkzen; lewse'kw, na' wyarjkze cho're. ⁸Le noteze be'nne bi da llnnabe', wzi'kze'n; na' be'nn llyirje', wllelkzere'n; na' be'nn llnne'e, llsarj akse' ke'e.

9'Ka' re', cha' xhi'nnre nnábebe'
re' to yet xtir, kere we'rebe' to yej.
10 Na' cha' nnábebe' re' to bel gaobe',

San Mateo 7 12

kere lloe'rebe' to bele znia. ¹¹La'kze naktere be'nn wen da xhinnj ak, nnézkzere lloe're xhi'nnre ka' to da wen. Na' bixha Xallo Diosen' zo yebá na', gonlle' wen ke be'nn llnnabe Le'e bi dan' yalljre'.

12'Na' yeolol dan' lle'nere gon be'nnach keré, ka'kze llaya'le gonre ke ake', le ka'n llak ka nyoj le' leyen', na' dan' bzoj be'nn ka' be'e xti'll Diosen' kana'.

Nez da yellín yebá naken ka to nez ncho'pe

(Lc. 13:24)

¹³'Lecho'o nez dan' nak cho'pze, le da ra'y nak nez dan' lljasán be'nn ka' gan' kweyi' ake'. Na' be'nn zan lljak nez ra'yen'. ¹⁴Le cho'pze nak nezen' dan' lljasán lli'o gan' de yel nban zejlikanen', na' to chopze be'nn ake za'k akre' lljake' nez cho'pen'.

Dan' llon be'nn ka' gakbe'llo kan' nak ake'n

(Lc.6:43-44)

¹⁵'Llaya'l wiare nench ke chejle're xti'll be'nn wenra'll ka', be'nn ka' ne lloe' ake' xti'll Dios, non ake' ka xhi'r maxh da'o, na' loere nak ake' ka be'kw yi'o, ba llao xhi'r da'o ka'. ¹⁶Ka nak da llbia toto yay nnézello bi yayen'. Ka nak yay ye'chen' bi llbian uvas, na' ni yay yixen' bi llbian higo. Ka'n llaya'l gakbe're ke be'nn ka' ziye'e re', kat re're bi dan' llon ake' na'. 17 Yay dan' nak yay wen na', daxhix wenkze llbian. Na' yay dan' bi nak wen na', lekze daxhix bi nak wen kwian. 18Le bi gak to yay xhix wen kwiazen daxhix bi nak wen, leska' yayen'

bi nak wen na', bi gak kwiarizen daxhix wen. ¹⁹Yeololte yay da bi llbia daxhix wen, llchoy xane len na' llzeye'n. ²⁰Na' ka nak dan' llon toto be'nne, nnézello cha' nake' be'nn wen o cha' nake' be'nn wen da xhinnj.

Kere yeolol be'nne yelline latj ke Xanllo Diosen'

(Lc. 13:25-27)

21'Kere yeolol be'nn ka' llalwill nada'n, ne ake': "Xanto', Xanto'", yellín yebán' gan' llia Diosen' llnebie'. Kon be'nne gon kan' lle'ne Xa' Dios be'nne llia yebá na', leakze' yellín gan' llie' na'. 22 Kat llin lla gona' yel koxchis ke be'nn ka', be'nn zan ye ake' nada': "Xanto', ba be'to' xti'llo'n, na' kone ra'on, babejto' daxi'o ka' zjalla'a yichjra'llda'o be'nne, na' leska' kone ra'o na', bento' da zan yel wak ake." 23 Na' kana' yep ake': "Bi nombia' re', ka'le lelljayak, re' be'nn wen da xhinnje."

Ka nak ke chop ran yo'

(Lc. 6:47-49; Mr. 1:22)

²⁴'Be'nnen' llzenay xti'lla'n, na' llone' kan' nia' na', llone' ka to ke be'nn si'n be'nn ben rill, na' bxie' ranen' to rao yej war. ²⁵Na' ka gok yejsi'o xhen, na' bda to be' war, na' blloj yeo da xhen bayechjte gan' zo rille'n. Na' bi bzoen wzalen len, le lli' ranen to rao yej war. ²⁶Na' be'nn llenre' xti'lla' ni, na' bi llone' kan' nia' na', llone' rebze ka to be'nn bi bwia gan' gon rille'n, na' bene'n to rao yoxh. ²⁷Ka gok yejsi'o xhen na', blloj yeon' bayechjten gan' zo yo' ke'en, na' bda be', na' bzoen bzalen len blleyi'tekazen.

San Mateo 7, 8

²⁸Na' ka bayoll be'e Jesúsen' di'll ka', na'll llabane be'nn ka' lla'a na', kan' broe' bsedre' leake'n. ²⁹Le kan' bzejnie're'n, nakbie'kze nape' yel llnebia', kere bzejnie're' kan' llzejnie' be'nn ka' llsedre ke ley dan' bzoj da Moisésen'.

Jesúsen' bayone' to be'nn llen yillwe' dan' ne lepra

(Mr. 1:40-45; Lc. 5:12-16)

Be'nn zan zanao Jesúsen' kan' bayetje' rao ya'n. ²Na' to be'nn llak yillwe' dan' ne lepra jabi'ye' rawe'n, na' bche'k xhibe', na'll lle'e Le'e:

—Xana', cha' lle'nro', wakse waka'o yillwe' kia' ni.

³Na'll le blite na'a Jesúsen' bdane' le'e, lle'e le'e:

—Lle'nkzra', bayak.

Na'll le bayakte ka nak yillwe'n llake'n. ⁴Na'll lle Jesúsen' le'e:

—Notno ye'o ka'. Byej jawiá bxozen' nench re're' ba bayako'. Na' be'e dan' llaya'l we'we' dan' bne da Moisésen' ka', nench na' yeyako' yall rao ley na'. Ka' ben nench yeolol be'nne nnez akre' ba bayako'.

Jesúsen' bayone' to be'nn wen llin ke to xan waka'a ya ka'

(Lc. 7:1-10)

⁵Ka bllin Jesúsen' gan' nzi'i Capernaum, le bllinte to xan be'nn waka'a ya be'nn Roma, jatile' Le'e, na' go'tyoere' Le'e, ⁶lle'e Le'e:

—Xanto', be'nn wen llin kia'n de'e rilla'n llake' yillwe', nat nia'ne'e, na' ll-llayrawe' kwis.

⁷Na'll lle Jesúsen' le'e:

-Sa'rena' rwe' yeyone'.

⁸Na' xan waka'a yan' lle'e Le'e:

—Xanto', bi naka' be'nn za'k sa'reno' nada' rilla'n, ganniteze bnne, na' wayakte be'nn wen llin kia'n. ⁹Nada' zo be'nn llnebia' nada', na' lekze ni't be'nn waka'a ya kia' llnebia' ake'. Kate llepa' toe': "Byej", na' llejte', na' kate llepa' ye toe': "Da", na' le lledte', na' kate llepa' be'nn wen llin kia'n: "Da ni gono'", na' le llonte'n.

¹⁰Na' ka bene Jesúsen' xti'll xan waka'a yan', na'll babanre', na'll lle'e be'nn ka' nao Le'en:

—Da lin' nia' re', ni to be'nn Israel bi nna gonlira'll ake' nada' ka be'nn ni. ¹¹Na' ni nia' re', be'nn zan be'nn za'k doxhen yellrio, lljalle'rén ake' txhen xozxta'ollo Abraham na', Isaaken' ren Jacoben' gan' llia Diosen' llnebie'. ¹²Zan ka nak be'nn ka' llaya'l so ren Diosen' chenake, leake'n yese'le' lo gabil gan' nake xchole, yesbell ake' to gaoxoxj lay ake'.

¹³Na'll lle Jesúsen' xan waka'a ya ka':

—Ba gok wayejo', ba bayakte be'nn wen llin ko'on kon kan' benlira'llo'n ba gok.

Na' le bayakte be'nn wen llin ke xan waka'a ya ka'.

Jesúsen' bayone' xhna' no'r ke Pedron'

(Mr. 1:29-31; Lc. 4:38-39)

¹⁴Na'll byej Jesúsen' rill Pedron', na' bre're' xhna' no'r ke Pedron' de'e yoe' da la res. ¹⁵Jesúsen' bdane' ta'k be'nn we'en, le ballachte da lan'. Na'll le bayaste no'ren' bsinie' da bdao ake'.

Jesúsen' bayone' be'nn zan

(Mr. 1:32-34; Lc. 4:40-41)

¹⁶Na' betj lle' na', bllin be'nn zan gan' zo Jesúsen', na' nche'e San Mateo 8 14

ake' be'nn zan be'nn yo' daxi'o yichjra'llda'o ake'. Na'll to bnneze Jesúsen', le ballojte daxi'o ka', na' leska' bayone' yeolol be'nn llak billre yillwe' da'o. ¹⁷Ka'n bene' nench gok kan' llia xti'll Diosen' dan' bzoj da Isaíasen' kana', nen: "Le'en yeke'e yel ll-llayrao kello, na' yeke'e yeolol yillwe' kellon'."

Kan' goll Jesúsen' be'nn ka' gokra'll gon Le'e txhen

(Lc. 9:57-62)

¹⁸ Jesúsen' bre're' ba bllin be'nn zan nechj ake' Le'e, na'll golle' be'nn ka' non Le'e txhen na' nench la'y ake' ye chla're nisda'on. ¹⁹ Na' blloj to be'nn llsedre ke ley dan' bzoj da Moisésen', le jabi'yte' rao Jesúsen' lle'e Le'e:

—Maestro, wza'rena' rwe' kon gateze chejo'.

²⁰Na'll lle Jesúsen' Le'e:

—Be'z ka' zo ga llallín akba' lltas akba', na' ba ka' zo xir dá rao lla, llia xo'nn akba', zan nada', naka' Be'nnach, bitbi zo ga yezi'ra'lla'.

²¹Na'll blloj ye to be'nn zejrén Jesúsen' txhen, na' lle'e Le'e:

—Xana', zga'tek benn latj wkwa'cha' xa'n kate gate', na'll nnawa' rwe'.

²²Na'll lle Jesúsen' le'e:

—Da nnao nada', bkwa'nn be'nn wat ka', wkwa'chze lwellj be'nn wat ka'.

Jesúsen' brekllie' to be' xhen lo nisda'on

(Mr. 4:35-41; Lc. 8:22-25)

²³Na'll Jesúsen', le byo'te' lo barcon' ren be'nn ka' non Le'e txhen na'. ²⁴Na't ka zejen lo nisen', bzorao dá to be' xhen, na' ren nisda'on bzorao yitjen, na' ba llayoll nis lo barcon', na' ba tas Jesúsen'. ²⁵Na'll basbán ake' Le'e, lle ake' Le'e:

—iXanto', basrá lli'o, ba llbeyi'llo! ²⁶Na'll lle Jesúsen' leake':

—¿Bixchen llebrizre? ¿Bi llonlira'llre nada'?

Na'll byase' balwille' be'n ren nisda'on, na'll le blle'lliten. ²⁷Na' be'nn ka' non Jesúsen' txhen na', babán akre' kan' bene'n. Na'll lle lwelli ake':

—¿Noxha be'nnen' lla? Rente kaze be', na' ren nisda'o na' llzenayen ke'e.

Chop be'nn Gadara yo' ake' daxi'o

(Mr. 5:1-20; Lc.8:26-39)

²⁸Na' balline' ye chla' nisda'on gan' lli' rall be'nn Gadara ka'. Na' jatil chop be'nne Le'e, be'nn yo' daxi'o yichjra'llda'o ake'. Be'nn ki ba zo aktekze' latj gan' lljakwa'ch ake' be'nn wat ka', na' ba llraydo ake' kon no lldeze ganna', nollno llakse te do tnezen'. ²⁹Na'll besia' ake', lle ake' Jesúsen':

—¿Bi de ko'o kone neto'? Rwe' Xhi'nn Dios dogarje. ¿Za'o zadsa'kzi'o neto', rencha' bi nna llin lla keto' yellayraoto'?

³⁰Na' kwitze llasdá zan kuch ak, llao akba'. ³¹Na'll go'tyoe daxi'o ka' Jesúsen', lle aken Le'e:

—Cha' ka' yebejo' neto' yichjra'llda'o be'nn ki, benn latj wayejto' gan' zjalla'a kuch ka'.

³²Na'll lle Jesúsen' leaken:

—Wakse, lewayej.

Na'll balloj aken yichjra'llda'o be'nn ka', na' zjayakdon gan' lla'a kuch ka'. Na'll bayetjnninn kuch ka' le' ya' gan' lla'a akba'n, na' jalla'a akba' lo nisda'on, na' got akba' we'j akba' nis.

³³Na' be'nn ka' llap kuch ka', bre'e akre' kan' goken, baxhonnj ake', na' jayell ake' be'nn rao yell ka' kan' goken, na' kan' ba bayak be'nn ka' byo' daxi'on. ³⁴Na'll yeolol be'nn ka' lla'a yellen' jatil ake' Jesúsen', na'll ka bre'e akre' Le'en, go'tyoe akre' Le'e waze'e rall aken'.

Jesúsen' bayone' to be'nne bi dá nia'ne'e

(Mr. 2:1-12; Lc. 5:17-26)

Jesúsen' bayoe' lo barcon', bala'ye' ye chla're nisda'on, na' balline' rao ralle'. ²Na' bllin txhonnj be'nn nlen ake' to be'nn, bi dá nia'ne'e, nxoa ake' le'e to rao bray. Ka gokbe'e Jesúsen' kan' nxenra'll ake' Le'e, na'll lle'e be'nn we'en:

—Bawé xhi'nna', ni llazi'xhena' ke da xhinnj ko'o ka'.

³Na'll bale be'nn ka' llsedre ke ley dan' bzoj da Moisésen', ben akre' kan' goll Jesúsen' be'nn we'en, bza'ra'll ake' to lo yichjra'llda'o ake', na'll bne ake': "Be'nn ni llkadie' ke Diosen' ne'e ka'." ⁴Jesúsen' gokbe're' ka dan' za'ra'll be'nn ka', na'll golle' leake':

—¿Bixchen llza'ra'llrizre da xhinnj lo ra'llda'ore? ⁵Llákere bi napa' yel llnebia' na' yepe!: "Ni llazi'xhena' da xhinnj ko'on." ¿Bixha cha' yepe!: "Bayas na' bayej"? ⁶Nada' naka' Be'nn Gorj Radj Be'nnach wroe'ra' re', na' zoa' yellrio ni, napa' yel llnebia' nench yezi'xhena' da xhinnj ke be'nnachen'.

Na'll golle' be'nn xhinnjen':

—Bayas, bayoa' gan' bxhoa'o, na' bayej rillo'.

⁷Na'll bayas be'nnen' zayeje' rille'. ⁸Na' be'nn ka' bre'e kan' goken blleb ake' kwis, na'll be'rao ake' Diosen' kan' bene' be'e yel wak ke'en Jesúsen'.

Ka gok brej Jesúsen' Mateon'

(Mr. 2:13-17; Lc. 5:27-32)

⁹Ka bde Jesúsen' gan' lli' Mateon' llchixhje' dan' llaya'l wayej yell gan' llnebia' leake'n, na' bre'e Jesúsen' le'en, na'll lle'e le'e:

-Da nnao nada'.

Na'll bzolla'a Mateon' zejrene' Le'e.

10 Ka goken bllin Jesúsen' rill Mateon', na' lli' ake' llao ake' txhen ren ye zan be'nn wachixhj ak, na' ren yela' be'nn wen da xhinnje, na' renkze be'nn ka' non Le'e txhen na'.

11 Ka bre'e be'nn fariseo ka' lli' ren Jesúsen' leake' txhen, na'll lle ake' be'nn ka' non Le'e txhen na':

—¿Bixchen be'nnen' llroe' llsede re'n llaorene' txhen be'nn wachixhj ka', na' ren be'nn wen da xhinnj ka'?

¹²Na' ka bene Jesúsen' xti'll ake'n, na'll lle'e leake':

—Be'nn bibi yillwe' llake, bi yalljre' be'nn wen rmell, zan be'nnen' llak yillwe'n, le'en yalljre' be'nn wen rmellen'. ¹³Lelljased bi zej xti'll Diosen' dan' nyoj: "Lle'nra' yeya'chra'llre be'nne, kere kon gotre bayi'x gákere nada' nxenra'llre." Kere za'a zadyexha' be'nn wen aken', zan za'a zadwia' be'nn wayatre ke da xhinnj ba ben ake'.

San Mateo 9 16

Jesúsen' bzejnie're' bixchen bi llon be'nn ka' non Le'e txhen na' was

(Mr. 2:18-22; Lc. 5:33-39)

¹⁴Na'll be'nn ka' nao Juan be'nnen' bchoa nis, jabi'y ake' rao Jesúsen', lle ake' Le'e:

—¿Bixchen bi llon be'nn ka' was be'nn ka' nao rwe'n, na't neto' llonto' was, leska' be'nn fariseo ka' llon ake' was?

¹⁵Na'll lle Jesúsen' leake':

—¿Bixha wak so be'nn ak yel wan, be'nn llon ake' yexh ga llak yel wachayna'a chak lli'rén wachayna'n leake'? Bi gak sorene' leake' yel wan. Zan wllin lla waga'a be'nn byion', kana'llen' gon ake' was.

Di'll kob ke Jesúsen' bi gak wchixrenllon da ka' nao be'nn gor ka'

16'Gaga zo be'nne gonrene' llin ra'll kobe, yede'en xhe'e gore, le ra'll koben', yebe'n kat chiben, na' wche'zen xhe'e goren', yezikre yarj gan' nlle'zen. 17 Na' leska' nono zo be'nn ka'cha'orize' xis uva koben' to lo blloy yid gore, le xis uva koben' wche'zen blloy yid goren', na' llopten kweyi'. Zan ka'cha'we' xis uva koben' lo blloy yid kobe, nench bi kweyi' xis uvan', na' ka' llopten bi kweyi'.

Jesúsen' basbane' xhi'nn Jairo na' bayak ye to no're bdan xhe'en

(Mr. 5:21-43; Lc. 8:40-56)

¹⁸Nna lloe'te Jesúsen' di'll na', bllindokze to be'nn wnebia', bche'k xhibe' rao Jesúsen', lle'e Le'e:

—Le bayollte got to xhi'nna' no're. Cho'do na' wxoa nao'n yichjbe' nench yebanbe'. ¹⁹Na'll bzolla'a Jesúsen' ren be'nn ka' non Le'e txhen na', na' byejrén ake' be'nn wnebia'n. ²⁰Na' ka zjake' na'n, bnao to no're leake', ba gok chllinn (12) iz llzoe' wa'a, na' bene' bien jabi'ye' awllo ko'll Jesúsen', jatane' xhe'en. ²¹Le kan' bza'ra'lle' to lo ra'llda'we', bne'e: "Kon cha' ba bdana' xhe'en, wayaksa'n." ²²Na' bayechj Jesúsen' bwie' no'ren', na'll lle'e le'e:

—Bendipra'llo' xhi'nna'. Ba bayakso' dan' llonlira'llo' nada'.

Na' le bayakte no'ren'.

²³Ka bllin Jesúsen' rill be'nn wnebia'n, na' bre're' ba zjalla'a be'nn zan, llon ake' txhen, na' llasbell ake', na' ba lla'a be'nn llkwell bllej. ²⁴Na'll lle'e leake':

—Lelljayak. Kere got bida'o no'r nin', taszbe'n.

Na'll be'nn ka' lltitj akre' Le'e.

²⁵Na'll bayoll bachache' yeolol
be'nn ka', na'll byoe' be'xe' ta'k
bida'o waten', na'll le bayástebe'.

²⁶Na' yel waken' bene'n goslas
di'llen' yeolol yell ka' zjalli' do na'.

Jesúsen' bayone' chop be'nn lchole

²⁷Na' ka badé Jesúsen', bnaodo chop be'nn lchol Le'e, na' besia' ake' zillje, goll ake' Le'e:

—iRwe'n nako' xhi'nn dialla da rey David, baya'chra'll neto'!

²⁸Na' ka bayo' Jesúsen' lo yo'n, na' byo' be'nn lchol ka', na'll lle Jesúsen' leake':

—¿Llonlira'llre nada' gak gona' nench yere're?

Na'll lle ake' Le'e:

-Awa' xanto', llejle'to'.

²⁹Na'll bdan Jesúsen' yej rao ake'n, lle'e leake': —Yere'chgare kon kan' nxenra'llre nada'.

³⁰Na'll le bayakte yej rao ake'n, bare'e aktere'. Na'll goll Jesúsen' leake':

—Bi we're di'll kan' gok bayak yejraoren'.

³¹Bixha kate baza'a ake' na', jadá ake' doxhen gan' nzi'i Galilea, lloe' ake' di'll ka dan' ben Jesúsen' ke ake'n.

Jesúsen' bayone' to be'nn blloje

³²Na' ka ballach be'nn ka', le bllinte be'nn yob akre', nche'e ake' ye to be'nn blloje yo' daxi'o yichjra'llda'we'n. ³³Na'll Jesúsen' le babejte' daxi'on, le bannete be'nnen'. Na' be'nn zan bre'e kan' goken, na'll babán akre' kwis, na'll ne ake':

—Lli'o be'nn Israel, da nellen' bre'llo yel waken' nak ka'.

³⁴Na' be'nn fariseo ka' ne ake':

—Xan daxi'o ka'n llakrenen le'e, nench llabeje' daxi'on zjayo' yichjra'llda'o be'nn ka'.

Jesúsen' llaya'chra'lle' be'nn ka'

³⁵Jesúsen' jate'e toto yell, na' toto yell da'o zjalli' do na', jazejnie're' be'nn Israel ka' lo yoda'o ke ake'n, na' bdixjwe're' leake' Di'll Wen kan' nnebia' Diosen', na' bayone' be'nn ka' llak biteze yillwe', na' biteze da llak ke ake'. ³⁶Na' ka bre're' ba bllay be'nn zan, na' baya'chra'lle' leake'. Ka gokbe're' llakllejla'll ake', akre gon ake', na' nono llra' gakrén leake' ka dan' llallayrao ake'n. Ni't ake' ka xhi'r da'o, ba nono llra' gap leakba'. ³⁷Na'll lle'e be'nn ka' non Le'e txhen na':

—Da li nia' re', ka be'nn gon wrapen' gonllo, da xhen llin na' de, na' to chopze be'nn wrap ka' nak. ³⁸Lennabe Dios be'nnen' nak xan llin na', wse'le' yezikre be'nn wen llin rao llin na'.

Jesúsen' breje' postl ka' ben Le'e txhen

(Mr. 3:13-19; Lc. 6:12-16)

10 Jesúsen' btope' be'nn chllinn ka' non Le'e txhen, na' be'e leake' yel wak nench wabej ake' daxi'o zjayo' lo yichjra'llda'o be'nne, na' wayón ake' biteze yillwe' da llak ake'.

²Ki re be'nn chllinn ka': Simón lekze le'en re'e Pedron', be'nnen' gok be'nn nell, na' Andrés bi'ch Pedro na', na' Jacobo ren Juan xhi'nn Zebedeo, ³na' Felipe, na' Bartolomé, na' Tomás, na' Mateo be'nnen' gok wachixhje, na' Jacobo xhi'nn Alfeo, na' Lebeo be'nnen' goll akse' Tadeo, ⁴na' Simón be'nnen' ben txhen be'nn ka' nzi'i cananistas, na' ren Judas Iscariote be'nnen' ben Jesúsen' rallna'a be'nn ka' llwie Le'e na'.

Jesúsen' bse'le' be'nn chllinn ka' jatixjwe' akre' xti'lle'n

(Mr. 6:7-13; Lc. 9:1-6)

⁵Jesúsen' bse'le' be'nn chllinn ka', jatixjwe' akre' xti'lle'n, lle'e leake':

—Bi chejre rall be'nn ka' bi nak be'nn Israel, leska' bi chejre yell ka' zjalli' Samaria. ⁶Lelljak gan' lla'a be'nn Israel ka', le leake'n nak ake' ka xhi'r da'o ba bnit. ⁷Lelljak lelljatixjwe' ba zo rez llin lla nnebia' Dios be'nnen' zo yebá. ⁸Lewayón be'nn llak bi yillwe', na' lewayón San Mateo 10 18

be'nn ka' llak yillwe' dan' ne lepra, leyesbán be'nn wat ak, na' leyebej daxi'o ka' yo' lo yichjra'llda'o be'nne. Bibi bchixhj Diosen' re', benne' re' yel wak ke'en nench gonre da ki, ke len na' legakrén be'nne, na' bi wchixhjre.

⁹'Na' bi wa're mell da nak oro, na' mell plat na' mell kobr chak ko're nez. ¹⁰Na' bi go'xre bzod, na' bi go'xre ye to xhare, ni ye to xher-re, ni xhis da wchi'chre, le ka nak re' nakre be'nn wen llin ke Dios, llaya'lkze gonn ake' re' da ye'j gaore, gan' llse'la' re'n.

¹¹'Na' gateze yell ga llinre, zga'tek lennab cha' zo to be'nn wen, be'nn vewere wrebe re' rille'n. Na' cha' ba brebe' re' rille'n, ganna'ze lesó. Kat sa'llre chejre ga yobre, kana'll yeza're. ¹²Na' kat llinre rill to be'nne, lewape lliox, na' lennab so ake' wen. 13 Na' cha' zjani't be'nn nak yichira'llda'o ake'n wen, gak ka dan' nnabren', na' so ake' wen. Na' cha' nono llra' be'nn nak yichjra'llda'o ake'n wen, na' bi gak ka dan' nnabren'. 14 Na' cha' zo ga bi wreb ake' re', na' bi wzenay ake' keré, leyelloj yo'n o yell gan' bllinre, na' levebibte yo bichte llia lo labre. ¹⁵Da xhinni xhen na', ben be'nn Sodoma ka' ren be'nn Gomorra ka' kana', zan ni llepa' re', kat llin lla gak yel koxchis ke yeolol be'nne, kana' be'nn ka' bi breb re' rille'n. da xhenll gak ke be'nn ka' kerke kan' gok ke be'nne Sodoma ka', ren Gomorra kal.

Gak da sa'kzi'llo

¹⁶'Nada' wse'la' re' ka llse'le' xhi'r da'o radj be'kw yi'o, lesó xhnid

ka llon to bele, na' maxhze legón ka llon to byinn da'o. 17 Legap kwinre rao be'nn ka' llwie re'n. Zjani't be'nn gon ake' re' rao na'a be'nn wnebia' ka', nench bi gon bi ne akre' re'. 18 Na' lekze ka' dan' llonlira'llre nada' na', zjani't be'nn wche'e re' do rao rey, do rao nollre be'nn llnebia' nench we'rén akre' xti'lla'n, leska' rao be'nn ka' bi nak be'nn Israel. 19 Na' kat go'x ake' re', wche'e ake' re' rao be'nn ka', bi we'la'llre akre nnere yelli're xti'll ake'n. Rawe gan' zere na'kze wzejnie' Diosen' re', akren' nnere. ²⁰Le kere re'n nnere, Spíritu ke Xallo Dios na'kzen' gonnen bixhan' llava'l nnere.

²¹'Kana' bale be'nnache, yeyechj ake' gon ake' no bi'ch gorj ake' rao na'a be'nne, na' yeso'te leake', na' ni't be'nn gon ake' xhi'nn ake' ka', rao na'a be'nn yeso'tebe', na' zjani't be'nne gon ake' xaxhna' ake' ka', rao na'a be'nne yeso'te leake'. 22 Na' ka veololze be'nn wie akre' re', dan' llonlira'llre nada', na' noteze be'nn se war wxenra'lle' nada' llinte lla gate', le'en yerá. ²³Cha' be'nn lla'a to yell lloje yeraye re', lelljazó ga yobre. Da li nia' re', bi nna wayoll tare yell ka' gan' nbane be'nn Israel ka', kat yeda' nada' da yobre Be'nn Gorj Radj Be'nnach.

²⁴'Kat to be'nn za wsede, bi nello naklle' be'nn braoll ka be'nnen' llsede le'en, na' to be'nn wen llin bi nello naklle' braoll ka xane'n.
²⁵Kon llaya'le yewé be'nnen' llseden', cha' yedo'lre' gake' kan' llon be'nnen' broe' le'e na', na' llaya'le yewé be'nn wen llin na', cha' yedo'lre' gake' ka xane' na'.

Na' nada' naka' xanre, na' be'nn ka' llwie nada'n, llasné ake' llona' txhen Beelzebú, dan' nak xan yeolol daxi'o ak, wasné aklle' ke re' nakre nada' txhen.

Non' llaya'l llebllo

(Lc. 12:2-9)

²⁶'Bi llebre be'nn biteze da gon akre' re', le bibi de da nga'che da nello bi wroe'rawe, na' bi de da nello nono yenneze len. ²⁷Da zan da broe'ra' re' gan' nga'chre, lennén gan' lla'a be'nn zan. Na' yeolol da ka' ba béneren', lechixjwe'n, legón ka to be'nn ze yichjo llosie'. ²⁸Bi llaya'le llebre be'nn ka' got re'n. Bitbi gak gon akre' yichjra'llda'ore. Zan llaya'le llebre Diosen', le Le'en nape' yel llnebia', wlleyie' kwerp kerén' ren yichjra'llda'oren' lo yi' gabilen'.

²⁹'Nnézello byinn da'o ka' bibi za'k aktekba', na' Xallo Diosen' llakbe're' kate llbeyi' toba'. ³⁰Rente yich yichjre ka' nrab Diosen'. ³¹Na'llen' nia' bi llebre, za'kll re' kerke txhonnj byinn da'o ka'.

Be'nn wchebe' nawe' Jesúsen'

(Lc. 12:8-9)

32'Na' noteze be'nne cha' wchebe' nnawe' nada', lekze ka' nada' wacheba' rao Xa' Diosen' llia yebá, yepe' nak be'nnen' nada' txhen. ³³Na' noteze' cha' lloe'rene' be'nnach di'll, na' bi llchebe' cha' nombie' nada', lekze ka' nada' we'rena' Xa' be'nn zo yebá di'll, yepe' bi nombia' be'nnen'.

Gak ake' chopre ni ke Jesúsen'

(Lc. 12:51-53; 14:26-27)

³⁴'Bi gákere beda' nench nni't ren lwellj be'nn ka' wen na'. Bi nni't ake' wen, le yesdil ake'. ³⁵Ni ke dan' ba beda' na', yesdile be'nn byio ren xa ake', na' no'ren' kone xhne'e, na' no'ren' yedil ren xhorille le'e. ³⁶Do lo yo' rill ake' na'ze lla'a be'nn wie lwellj ake'.

37'Na' noteze be'nne cha' llakllre' xe'e na' xhne'en ka nada', bi sa'ke' gone' nada' txhen. Leska' cha' llakllre' xhi'nne', ka nada' bi sa'ke' gone' nada' txhen. 38 Na' be'nn bi wsanra'll kwine' na' nawe' nada', na' gone' ka to be'nn noa' cruz ke'e, bibi za'ke' gone' nada' txhen cha' ka'. 39 Be'nnen' llon bien yesrá yel nban ke kwine' yellrio ni, le'en wnite'n, zan be'nnen' llnit yel nban ke'en ni kia' nada', le'en ga't yel nban zejlikane ke'e.

Da nbaraz da de yebán'

(Mr. 9:41)

40'Noteze be'nn llrebe re' nadkza'n llrebe', na' be'nn llreb nada' renkze Dios be'nnen' bse'l nada'n llrebe'.

41 Na' noteze be'nne wrebe' be'nn lloe' xti'll Diosen', ka da nbarazen' si'i be'nnen' lloe' xti'll Diosen', ka' lekzen sie'. Na' be'nnen' wrebe to be'nn wen, ni ke dan' wrebe' be'nnen' nak be'nn wen na', ka dan' nbarazen' si'i be'nn wen na', ka' lekzen sie'.

42 Na' noteze be'nne we'e la txhi'yze nis ye'j be'nn llonlira'll nada', ni ke dan' be'e ake' be'nnen' nxenra'll nada' nis we'je', da li nia' re', bi nnitrao ka nake dan' ben ake'n.

Juan be'nnen' bchoa nis bse'le' be'nn ka' nak le'e txhen gan' zo Jesúsen'

(Lc. 7:18-35)

Ka bayoll bzejnie' Jesúsen' be'nn chllinn ka' non Le'e

San Mateo 11 20

txhen na', baze'e ganna', na' byeje' yell ka' zjalli' do na', jaroe' jasedre' xti'll Diosen' be'nn ka' zjalla'a ganna'.

²Bixha Juan be'nnen' bchoa nis, ba yoe' lo rill yan'. Benre' di'll, ka yeolol dan' llon Criston'. Na'll bse'l Juan na' chop be'nn ka' non le'e txhen na', gan' zo Jesúsen', ³Jannab akre' Le'e:

—¿Rwe'n nako' be'nnen' bexhto' wse'l Diosen', cha' ye to be'nn yobren' kwexhto!?

⁴Na'll lle Jesúsen' leake':

—Lelljayak, na' lelljayell Juan na' doxhen dan' ba bre're na', na' da ka' ba bénere na'. ⁵Be'nn lchol llare'e akre', be'nn xhinnj lladá ake', be'nn llak yillwe' dan' ne lepra llayak ake', be'nn kwell ba llayén akre', na' be'nn wat ba babán ake', na' be'nn ya'ch da'o ka' llzenay ake' Di'll Wen ke Diosen'. ⁶iNbaraz ke be'nnen' bi llakganre', na' yezikre llejle' kia'!

⁷Na' ka ba zjayak be'nn ka' bse'l Juan na', na'll be'rén Jesúsen' be'nn ka' ndopen' xti'll Juan na', lle'e leake':

—¿No be'nnen' jawiare latj dachen'? ¿To be'nn nak ka yia da zo lle' da le llta be'? ⁸¿Akre nake' kan' jawiare? ¿Nake' ra'll cha'o? Ka be'nn ka' zjanak ra'll cha'o, zo ake' yo' wen kwis, ka no rill be'nn wnebia'. ⁹¿Noxhan' jawiakzre cha'? ¿To be'nn lloe' xti'll Diosen'? Da li lloe' xti'll Diosen', na' ni yepa' re', za'klle' ka noteze be'nn lloe' xti'll Diosen', llian:

> Nada' Dios, wse'la' to be'nn kwiarawe' rao', we'e xti'llo'n

nench yewe' xhnneze gan' te'o na'.

¹¹Da li nia' re', nollre no be'nnach nna chas, be'nn nakll be'nn brao ka Juan na', be'nnen' bchoa be'nne nis. Na' nna' noteze be'nn llzenay ke Dios, nench nnebia' Diosen' yichjra'llda'we'n, la'kze nake' be'nne le zeraoze be'nne bibi za'ke, gaklle' be'nn braoll ka Juan na'.

12 'Kan' bzorao Juan na' bdixjwe're' xti'll Diosen', na' bchoe' be'nne nis bllinte nna', be'nn zan llon ake'n ga zerao za'k akre', nench yedo'l akre' yel llnebia' ke Diosen'. 13 Kana'ten' bzoraon bllinte kan' bra' Juan na', ley dan' bzoj da Moisésen', na' dan' bzoj be'nn ka' be'e xti'll Diosen', bzejnie'n lli'o ka nak yel llnebia' ke Diosen'. ¹⁴Na' xti'll Diosen' dan' nyoj llian yed ye to be'nn yedyén kan' ben Elías, be'nnen' be'e xti'll Diosen' kana'. Ka' llian ke Juan na', kon cha' chejle're. 15 Re' zo nayre, lewzenay xti'lla' ni.

16'¿Notek ka wsa'kra' re' lla'a nna' lla? Wsa'kra' re' ka bida'o ak zjalla'a lao ya'a, na' lle lwellj akbe': ¹⁷"Ba bkwellto' bllej, na' bi bya're, na' ba belto' da llon nya'chraz, na' ni ke bllellzre." 18 Juan be'nnen' bchoa nis, bi we'j bdaocha'we' ka lle'j llao nollre be'nne, na' bnere ke'e: "Daxi'o vo' be'nnen'." ¹⁹Na' ka nak nada' Be'nnen' Gorj Radj Be'nnach, na' llre're lle'j llawa' kwasro, na' nere kia': "Le lle'j llaoxen be'nnen', na' llone' txhen be'nn wachixhi ka', ren yezikre be'nn wen da xhinnj ka'." Zan zjalla'a akse be'nn llzenay ke Diosen'. Leake'n llroe' akre' kan' nak yel si'n ke Diosen'.

Da gak ke be'nn ka' bi llzenay ke Diosen'

(Lc. 10:13-15)

²⁰Na'll be'e Jesúsen' xti'll be'nn ka' lla'a yell ka', gan' bene' zan da yebán akre'n, na' bdile' leake' dan' bi llayat akre' ke da xhinnjen' non ake'n, na'll bne'e:

²¹—iNya'chraz ke re' be'nn Corazín! iNa' nya'chraz ke re' be'nn Betsaida! Chenake broe'ra' be'nn ka' ni't yell ka' nzi'i Tiro, na' Sidón yel wak kia'n ka dan' ba broe'ra' re', batna' ba bayechi ake' banao ake' Diosen' chenake, na' llak ake' to ra'll gasj da nak ze'ch, na' llwazj kwin ake' no de da llroe'n ba bayat akre' chenake. ²²Na' nia' re', kate llin lla gak yel koxchis ke yeolol be'nne, da xhenll yellayraore kerke be'nn Tiro, na' be'nn Sidón ka'. ²³Na' re' be'nn Capernaum, llákere ba zekzre yebá, ga lle'le gor waza'le' re', ga yellayraore. Chenak bena' da yebane be'nn ka' blla'a gan' nzi'i Sodoman' kan' ba bena' raore ni. bayat akre' xto'l ake'n chenake, na' bi blleyi' yell ke ake'n chenake. 24 Nia' re', gakll keré ye ra't ka ke be'nn Sodoma ka', katen' llin lla gak yel koxchis ke yeolol be'nn ka'.

Be'nn ka' gonlira'll Jesúsen' nni't ake' nbaraz

(Lc. 10:21-22)

²⁵Na'll balwill Jesúsen' Diosen', bne'e:

—Lloe'rawa' rwe' Dios Xa, rwe'n llnebia'o yebá na' yellrion', bkwa'cho' da ki, bi byejnie' be'nn si'n ka' len, na' broe'ro'n be'nn ya'ch be'nn nak nexjra'lle. ²⁶Beno' ka' Xa, le ka'n gokra'llo' rwe'.

²⁷Na' golle' be'nn ka' lla'a na': -Yeololte da de, Xa'n ba bene'n rallna', na' nono nombia' Xhi'nne'n, toz Xa' na'n nombie' Le'e, na' nono nombia' Xa'n, toz nada' nak Xhi'nne' nombie', na' kon no llbeja' nada' llroe're' kan' nak Xa'n. 28 Ledá gan' zia' ni, yeololtere ba lljaxa'kra'lle, na' noa're dan' nak ka to yoa' zi'. Na' nada' gonna' ka yezi'ra'llre. ²⁹Legón nada' txhen, lewsed kan' nia' ni, le nada' naka' be'nn xate be'nn nexjra'lle, na' ka' yezi'ra'll yichira'llda'oren'. 30 Dan' nia' gonre na', bi naken bni', naken ka to yoa' da bi naktek zi!.

Be'nn ka' non Jesúsen' txhen blechj ake' dao ke trigo to lla nba'nne

(Mr. 2:23-28; Lc. 6:1-5)

12 To lla nba'nn ke be'nn Israel ka' bde Jesúsen' ren be'nn ka' non Le'e txhen to rao yellrio ga de trigo. Na' bdon be'nn ka' non Le'e txhen na', na' bzorao ll-lechj ake' dao ke trigon', na' bdao ake'n. ²Na' bre'e be'nn fariseo ka' kan' ben ake'n, na' lle ake' Jesúsen':

—¿Bixchen llon be'nn ka' llin, be'nn ka' non rwe' txhen na', llon ake' to da bi llaya'l gonllo lla nba'nne?

³Na'll lle Jesúsen' leake':

—¿Bi nna golre kan' ben da rey Daviden' to lla ka bdon ake' ren be'nn lwellje' ka'? ⁴Byoe' gan' nak rill Diosen', na' bdawe' yet xtir dan' nak la'y da bi llaya'l gao be'nn bi nak bxoz, na' leska' bdaorén be'nn ka' zej ren Le'e txhen na' len. ⁵¿Leska' bi nna golre le' ley dan' bzoj da Moisésen' gan' llian, bxoz ka' bi llazi'ra'll ake' lo yoda'o San Mateo 12 22

braon' lla ka' nak lla nba'nne?
Na' nono ll-lliayi'll leake' dan'
llon ake' llin na'. ⁶Ni llepa' re',
nada' zoa' ganni za'klla' ye ra't
ka yoda'o braon'. ⁷Xti'll Dios dan'
nyoj nen: "Lle'nra' yeya'chra'llre
be'nne kerke da gotzre no bayi'x,
gákere nada'n lloe'raore." Chenak
llejnie're kan' naken na', bi wxoare
do'l ko'll be'nn bibi do'l nape. ⁸Nia'
re', nada'n naka' Be'nn Gorj Radj
Be'nnach, naka' xan llan' llapre
bara'nne.

Jesúsen' bayone' to be'nn nxho'n chla' ne'e

(Mr. 3:1-6; Lc. 6:6-11)

⁹ Jesúsen' baze'e ganna', na' byoe' to lo yoda'o ke be'nn Israel ka'. ¹⁰Na' lo yoda'o na', zo to be'nn nxho'n chla' ne'e, na'll lle be'nn fariseo ka' Jesúsen':

—¿De latj wayonllo be'nn xhinnj to lla nba'nne?

Lle ake' Le'e ka' nench kone len wlliayi'll ake' Le'e.

¹¹Na'll lle Jesúsen' leake':

—Bixha cha' re' nni't xhi'r da'o keré, na' cha' toba' lljacho'ba' to lo yell zitj lla nba'nne, ¿wsanra'llreba', bi yebejreba' rao lla na'? ¹²Ke len na' nia', dekze latj gakrenllo be'nne, llan' nak lla llapllo bara'nne, le za'klle to be'nne kerke to xhi'r da'o.

¹³Na'll lle'e be'nnen' nxho'n ta'ke'n:

—Bli na'on.

Na' le blite na'a be'nnen', bayakten wen ka dan' ye chla'. ¹⁴Na'll ka ballach be'nn fariseo ka' yoda'on, na' llayirjla'll ake' akre ka gon ake' got ake' Jesúsen'.

Dan' bzoj da Isaíasen' ke Jesúsen'

¹⁵Ka gokbe'e Jesúsen' ka', na' babe'yi'lle' bayeje' ga yobre. Be'nn zan jannao Le'e, na'll bayone' yeolol be'nn ka' llak yillwe'. ¹⁶Na'll go'tyoere' leake', bi we'rén ake' be'nn di'll non' bayón leake'. ¹⁷Bene' ka' nench bzoa xti'll Diosen' dan' bzoj da Isaíasen', kan' bne'e:

¹⁸ Be'nn nin' nake' be'nn wen llin kia', be'nn breja', na' be'nn nllie'ra'.

Na' llawera' dan' llone'n. Na' nada' wse'la' Spíritu kia'n sorenteze sorenen Le'e.

Na' chixjwe're' yeolol be'nn ka' zjalla'a doxhen yellrio da nak da li llazra'lla' gon ake'.

¹⁹ Na' bi gakyollrene' be'nn ka', ni ke gosia'ze',

nono yene ka nak chie' do tnez ka'.

²⁰ Bi wzo'ye da nak lle'ne. Bi wasore' to yi' da'o, da za bzorao lla'le,

llinte lla gone' gak kon ka da zjazé lilla rao yellrio ni.

²¹ Na' be'nn lla'a yeolol yell, so ake' kwexh ake' Le'e.

Bne ake' ke Jesúsen' babeje' daxi'o kone yel wak ke daxi'on

(Mr. 3:19-30; Lc. 11:14-23; 12:10)

²²Na' zo to be'nne lchole, na' nakte' blloje, yo'nyaz daxi'o yichjra'llda'we', na'll jwa'a ake' le'e rao Jesúsen'. Na' babeje' daxi'on yoe'n, na'll le bare'tere', na' le bannete'. ²³Na'll yeolol be'nn ka' bre'e kan' bene'n, babán akre' kwis. Na'll lle lwellj ake': 23 San Mateo 12

—¿Kere be'nn nin' bezllo yede' rao dialla ke rey Daviden' lla?

²⁴Na' ka bene be'nn fariseo ka' di'll ki, na'll ne ake':

—Bitbi yel wak nap be'nnen'. Xan daxi'o ka' nzi'i Beelzebú na'n llakrén le'e, llabeje' daxi'o ka' yo' yichjra'llda'o be'nne.

²⁵Na' ka gokbe'e Jesúsen' kan' za'ra'll lo ra'llda'o be'nn fariseo ka', na'll lle'e leake':

—Yeololte da llnebia' cha' gaken chopre, kweyi'n, na' leska' to yell o to yo' rill be'nnen', cha' gaken chopre, bi sibian. 26 Leska' cha' daxi'on yebejen ye to daxi'o yo' yichira'llda'o be'nne, weyi' vel llnebia' ken, le kwinzen ba lladilrenen. ²⁷Na' cha' re' nere xan daxi'o ka' llakrén nada' llabeja' daxi'on, cha' naken kan' nere na', ¿noxha llakrén be'nn ka' nao re'n nench yebej ake' daxi'o ka' yo' vichira'llda'o be'nne? Na' dan' llon ake' na', llroe'n re' bi naken kan' nere na'. ²⁸Zan ke nak nada', Spíritu ke Dios na'n llonnen nada' yel wak nench llabeja' daxi'o ka', na' ka dan' llona' na', llroe'n re' ba bllin lla nnebia' Diosen'.

²⁹ ¿Akre gak cho' to be'nn wan lo yo' ke to be'nn war nench sie' bi da de ke'e, cha' bi wcheje' le'e? Zan ka'n gone', na'll gak sie' bi da de ke be'nnen' lo yo' rille'n.

30 'Be'nn bi llone' nada' txhen, llwiere' nada'n. Na' be'nn bi llakrene' nench wzenay be'nn ka' kia', yezikre llone' nench nono wzenaykze kia'.

³¹'Ke len na' llepa' re', yeolol da xhinnj da llon be'nnach, na' yeolol di'll ya', dan' llach lloa' ake'n, Dios na' yezi'xhene' ke ake', zan nollre be'nne, cha' nne'e ke Spíritu ke Diosen', ni ke yezi'xhenze Diosen' ke'e. ³²Na' cha' no be'nne llnne'e kia' nada', naka' Be'nn Gorj Radj Be'nnach, wazi'xhenkze Diosen' ke'e; zan cha' no be'nne nne'e ke Spíritu ke Diosen', kbatlle yezi'xhen Diosen' ke'e, ni nna' ni batteze.

Di'llen' we'llo na' llroe'n bi dan' yo' lo ra'llda'ollo

(Lc. 6:43-45)

33'Ka nak no yay xhix ka', dan' nak yay wen na', daxhix wenkze llbian, na' yay dan' bi nak yay wen lekze daxhix bi nak wen Ilbian. Na' ka' llnnézello akren' nake dan' llbia toto yay ka', na' llnnézello kan' nak yayen'. ³⁴iKan' nakse re', nakre be'nn zban, be'nn wxhiye'e, llonre ka bele! Bibi di'll wen gak we're ka nak yo' da xhinnjen' lo ra'llda'ore. Le yeololte di'llen' ll-lloj lloa'llon' da za'kze lo ra'llda'ollo na'n. 35 To be'nn wen lloe'kze' di'll wen, le kon kan' nake lo ra'llda'we' na'n lloe' di'llen'; na' to be'nn wen da xhinnj lloe' di'll da ke za'ke, le ka'n nakse ra'llda'we'n. ³⁶Na' ni nia' re', kate llin lla gon Diosen' yel koxchis ke yeolol be'nne, kana' yeolol be'nne wadé ake' yeolol di'll dan' ba be'e ake' da bibi za'ke. ³⁷Na' kone di'll dan' we're, Dios na' choyrawe' keré cha' napre do'le, na' cha' bibi do'l napre.

Be'nn ka' bi llzenay ke Diosen' bnnab ake' gon Jesúsen' yel wak

(Mr. 8:12; Lc. 11:29-32)

³⁸Na' be'nn ka' llsedre ke ley dan' bzoj da Moisésen', na' be'nn fariseo ka' lle ake' Jesúsen': —Maestro, lle'neto' gono' to yel wak da re'teto' nench nnézeto' cha' da lin' bse'l Diosen' rwe'.

³⁹Na'll goll Jesúsen' leake':

—Re' yo' da xhinnj lo ra'llda'ore, na' ba bsanra'llre Dios. Na' llnnabre gona' ye to yel wak da re'tere, zan bi gona' ka dan' llnnabren', zeraoze ka dan' broe' Diosen' re', ka dan' benrene' da Jonás, be'nnen' be'e xti'll Diosen' kana'. 40 Jonásen' byoe' lo le' bel xhen na' chonn lla chonn vere. Na' ka'kze nada'. Be'nn Gori Radj Be'nnach gata', na' choa' lo ban' chonn lla chonn yere. 41 Na' kat llin lla gon Diosen' vel koxchis ke yeolol be'nne, kana' be'nn Nínive ka' wabanrén ake' be'nn ki lla'a nna', na' wchovbia' ake' ke ake', le leake'n, ka ben akre' xti'll da Jonásen', bayat akre' ke da xhinni ke ake'n, na' nada' za'ktella' kerke Jonásen'. 42 Na' lekze lla na' kat gon Diosen' yel koxchis ke yeolol be'nne, no'ren' bnebia' yellen' re Sabá, wabanrene' txhen be'nn ki lla'a nna', na' wchoybie' ke ake', le le'en zi't kwis bede' badzenaye' yel si'n ke da Salomón na', na' nada' za'ktella' kerke Salomón na'.

Daxi'on lljallo'n da yobre lo yichjra'llda'o be'nne

(Lc. 11:24-26)

43'Kate to daxi'o llallojen yichjra'llda'o be'nnen', na' dan llayirjen ga lljacho'n ga yobre. Na' cha' bi ll-llelen to latj ga yezi'ra'llen, 44 na'll nnen: "Waya'chka' lljawia' gan' balloja'n, cha' gak lljalloa' da yobre." Na'll llayejen lljawian gan' zo be'nnen', na' kate re'ren ra'llda'o be'nnen', naken ka to yo' da nxhi nloa, na' ndachen. ⁴⁵Na'll lljatopen ye gall daxi'o da llonll ka len, na'll yella'a aken txhen lo ra'llda'o be'nnen'. Na' cha' ka' ba ben ake'n, na'll yezikre gakll ke be'nnen', kere kan' gok ke'e kana'. Na' ka' ya'nnkzen' gak ke be'nn wen da xhinnj ka', lla'a nna' lla.

Xhna' Jesúsen' ren bi'che' ka' bllin ake' gan' zoe'n

(Mr. 3:31-35; Lc. 8:19-21)

⁴⁶Nna lloe'te Jesúsen' di'll ren be'nn ka', ka bllin xhne'e ren bi'che' ka', na' gokra'll ake' we'rén ake' Le'e di'lle. ⁴⁷Na' to be'nn ze ren ganna' golle' Jesúsen':

—Xhna'o ren be'nn bi'cho' ka' ze akte' ko'lle na', lle'n akre' we'rén ake' rwe' di'lle.

⁴⁸Na'll lle Jesúsen' le'e:

—¿Noxhan' nak xhna', na' noxha nak bi'ch lwellja'?

⁴⁹Na'll bli ne'en gan' lla'a be'nn ka' nak Le'e txhen na', na'll bne'e:

—Be'nn kin' nak xhna', na' bi'ch lwellja'. ⁵⁰Le noteze be'nne llone kan' llazra'll Xa' Dios be'nnen' zo yebá na', le'en nak be'nn bi'cha', be'nn zana' na' xhna'.

Jesúsen' bsa'krebre' ka llon to be'nn goz go'nne

(Mr. 4:1-9; Lc. 8:4-8)

Rao lla na', bza'a Jesúsen' yo' gan' zoe' na' jachie' lloa' nisda'on. ²Na'll bdop be'nn zan kwis gan' llie'n, na'll byepe' lo barcon' jachie'. Yeolol be'nn ka' bdopen' zellá ake' lloa' nisda'on ga nak yo bill. ³Na'll da zan da broe' bsedre' leake' bsa'krebre' bi da ka', bne'e:

25 San Mateo 13

—To be'nn wen llin jeze' nbaz, ⁴na' ka zeje' llose' nbazen', ra't dan' llaze' na', je'ten lloa' nez, na' byinn ka' llasdá le' yebán' betj akba' jatao akba'n. 5Na' ye ra'ten' jacha'n ga nake rao yej ga lli' chde'jze yo, na' da na', byob bra'n le ra'tze yo lli' gan' je'ten na'. ⁶Na' ka bra' will na', bzeyen len, na' byechen le bi nyintek roe zitj. ⁷Ye ra'ten' jago'nnen ga nak lo yay ye'che, ka blli'o yay ye'chen', na' benen len roe. ⁸Na' ye ra'ten' jago'nnen ga nak yo cha'o, na' bra' aken, na' balen bllia to gayoa (100) weje toton, na' ye balen bllian wyon (60) weje, na' ye balen chi lloa (30) weje. ⁹Re' zo nayre, lewzenay ka'n nia'n.

Jesúsen' be'e di'll bixchen bsa'krebre' bi da ka' kan' bzejnie're' leake'

(Mr. 4:10-12; Lc. 8:9-10)

10 Na'll be'nn ka' non Jesúsen' txhen jabi'y ake' awllo, lle ake' Le'e: —¿Bixchen llsa'krebro' bi da ka' katen' llroe' llsedro' be'nne?

¹¹Na'll lle Jesúsen' leake':

—Nono nna nneze kan' nak yel llnebia' ke Diosen', zan nna' ba llone' nench re' ba llonlira'llre nnézeren. Zan be'nn yobre bi wroe' Diosen' leake'. ¹²Le noteze be'nn llzenay xti'll Diosen' wzejnie'lle Diosen' leake', nench chanll dan' chejnie' akre'n, na' noteze be'nne bi llzenay, da da'on ba nnez akre' ra'ten, yeka'a Diosen' len. ¹³Ke len na' llroe' llsedra' be'nn ki kone da ka' llsa'krebra', le llre'e aktere' dan' llona'n, na' bi llakbe'e akre' bi zejen na', llen aktere' xti'lla'n, na' bi llejnie' akre'n. ¹⁴Ke len na' be'nn ki ba llzoa ake' di'll kan' bzoj da Isaíasen', kan' bne'e:

Da li yénere, na' bi chejnie're akre zejen da'n yéneren'. Na' re'tere, na' bi wayakbe're bi zejen dan' llre're na'.

¹⁵ Nak ake' be'nn bi llzenay, ba natkze yichjra'llda'o be'nn ki.

Bi llen akre' kwasro, na' nchod rao ake'n, le bill lle'n akre' re'e akre' kone rao ake' na', na' yen akre' kone nay ake' na', na' chejnie' akre' lo ra'llda'o ake' na', na' yeyat akre', na'll gak yebej ake' lo da xhinnjen'.

16'Na' re' nakre nada' txhen, nbaraz keré dan' llwiare da ka' llona'n, na' llzenayre xti'lla'n, na' llejle're. 17 Da li nia' re', zan be'nn ka' be'e xti'll Diosen' kana', na' zan be'nn ka' yezikre bzenay ke Diosen' kana', gokra'll ake' kwis re'e akre' dan' llre're nna', na' bill go'le re'e akre'n. Na' gokra'll ake' kwis yen akre' dan' llénere na', na' leska' bill go'le yen akre'n.

Jesúsen' bzejnie're' ke dan' bsa'krebre' ke be'nn gozen'

(Mr. 4:13-20; Lc. 8:11-15)

18'Lewzenay ke, kin' chejnie'llo di'll ke be'nn wen llin na', jez nbazen'. 19 Noteze be'nn llene xti'll Diosen' dan' llzejnie' ke yel llnebia' ke'en, na' cha' bi llejnie're'n, le llinte daxi'on llabejen len lo ra'llda'we'n; na' nake' ka nbaz dan' je't lloa' nezen'. 20 Na' nbaz dan' jacha'a gan' nak lo yejen', na' bi bdin roe, naken ka be'nn ka' le llawete xti'll Diosen' kat llen akre'n, 21 leake'n nak ka da bi nyin roe zitj, chollze llejle' ake' ke xti'll Diosen', na' kat bi da da'o llak ke ake', na'

San Mateo 13 26

kat llwie be'nne leake' dan' llzenay ake' xti'll Diosen', le llbej yichj akte' xti'lle'n. 22 Na' nbaz dan' jago'nn gan' nak lo yay ye'che dan' bi blli'o na', zejen ka be'nn ka' ba bene xti'll Diosen', na' da zed ka' da de rao yellrio ni, na' yel wnia' dan' ziye'e lli'o, bi lloe'n latje yega'nn xti'll Diosen' lo ra'llda'we'n, na' nak ake' ka nbaz dan' bibi llbia. ²³Na' nbaz dan' jago'nn rao yo cha'o na', zejen ka be'nnen' llene xti'll Diosen', na' llejnie're'n na' llzenaye'n. Nak ake' ka dan' bllia to gayoa (100) weje, na' ye balen bllia wyon (60) weje, na' ye balen chi lloa (30) weje.

Jesúsen' be'e di'll ke nbaz dan' nzi'i trigo ren yay yi'xe

²⁴Na'll be'rén Jesúsen' be'nn ka' ye to di'll, lle'e leake':

—Yel llnebia' ke Dios be'nnen' zo yebán' llonen rebze ka gok ke to be'nnen' jez nbaz wen rao yellrio ke'en. ²⁵Na' do llere ka tas ake'. byej to be'nn llwie le'e, na' jaza'le' nbaz yi'x gan' ba naz be'nnen' trigon', bayoll na' na'll baze'e. ²⁶Na' to chi'ze bra' nbaz yi'xen' ren trigon', na' ka bzorao trigon' llbian. ²⁷Na' gokbe'e be'nn wen llin ke xan yellrion', na'll jayake' jayell ake' xan ake'n: "Ke be'nne, ¿kere nbaz wen ke trigon' gozo' rao yellrio ko'on? ¿Bixchen nchixzen vi'xe da bibi llbia?" ²⁸Na'll lle xan ake'n leake': "To be'nn llwie nada'n jen ka'." Na'll lle be'nn wen llin ka' le'e: "¿Akxha gonto'? ¿Wla'llto' yi'xen'?" 29 Na' lle'e leake': "Bi wla'llren nench ke wla'llrentere trigo na'. 30 Waljezen na' chi'o akllen txhen. Na' kat llin lla yezi're

dan' gozre na', kana' nia' zga'tek yi'x na', la'llre gonren to bnok weje, na' cheyen, na'telle yetopre trigon' wlla'cha'oren."

Yel llnebia' ke Diosen' naken ka nbaz ke mostaz

(Mr. 4:30-32; Lc. 13:18-19)

³¹Na'll be'e di'll kan' nak yel llnebia' ke Diosen', bne'e:

—Yel llnebia' ke Dios be'nnen' zo yebán' rebze naken ka to nbaz ke mostaz, ka dan' goz to be'nn rao yellrio ke'en. ³²La'kze nbaz ke mostazen' nakllen da da'o ka nbaz ka' yela', na' kate llra'n na', leren ll-lli'oll ka billre yay, llakllen to yay xhenlle, na'll lljallia no xo'nn byinn da'o ka' rao xho'ze na'.

Yel llnebia' ke Diosen' naken ka kwa binn

(Lc. 13:20-21)

³³Na'll bsa'krebe Jesúsen' ye to da vobre, lle'e leake':

—Yel llnebia' ke Dios be'nnen' zo yebán', naken ka kwa binn da bxhi'i to no're, na' bchixe'n trob yezj, na' baslli'on kwa ke yet xtir na'.

Kan' ben Jesúsen' bsa'krebre' bi da ka'

(Mr. 4:33-34)

³⁴Yeolol da ki broe' bsede Jesúsen' rao be'nn zan ka' bzenay ke'en gan' ze'e na'. Broe' bsedre' leake', bsa'krebre' bi da ka', bibi bzejnie're' leake' billre. ³⁵Bene' ka' nench gok kan' bzoj be'nn ka' be'e xti'll Diosen' kana':

Wroe' wsed akre', wsa'krebra' bi da ka',

na' yep ake' da nono nna nneze, da nga'ch ka bxhete yellrio.

Jesúsen' bzejnie're' bi zeje di'llen' be'e ke nbaz yi'x ren ke nbaz trigon'

³⁶Bayoll broe' bsedre' be'nn ka' zjalla'a na', base'l Jesúsen' leake' lljayake'. Na' byoe' lo yo' gan' zo ake' na', na'll jabi'y be'nn ka' non Le'e txhen na', awllo kwite'n lle ake' Le'e:

—Bzejnie'cheke neto' akre zeje di'llen' be'on ke trigon' ren nbaz yi'x na'.

37 Na'll lle'e leake':

-Kin' naken: ka nada' Be'nnen' Gorj Radj Be'nnach, naka' ka be'nnen' goz nbaz wen na'. 38 Na' doxhente yellrio ni, naken ka latj gan' goze' trigo na'. Na' be'nn ka' llzenav ke Diosen' nak ake' ka nbaz wen na'. Na' be'nn ka' nxenra'll daxi'on leake'n nak ka nbaz yi'x na'. 39 Daxi'on naken be'nnen' goz nbaz yi'x na'. Na' llan' gak yel koxchis ke yeolol be'nn ka' naken ka llan' llon ake' wrape, na' angl ka' nak ake' ka be'nn ka' llon wrapen'. 40 Na' kan' llatop ake' yi'x ka', na' llzey aken', ka'n gak ke be'nn ka' llnnerén daxi'on kat llin lla gak yel koxchis ke yeolol be'nne. 41 Nada', Be'nnen' Gorj Radj Be'nnach wse'la' angl kia' ka' kat llin lla na', nench yetop ake' yeolol be'nn ka', llko'yele be'nne yobre gon ake' da xhinni, na' yezikre be'nn llon da xhinnj. 42 Na' yese'le' leake' lo yi' gabil ga cha'a ake' ke chnare chey ake', ganna' kwell ake', to gaoxoxj lay ake'. 43 Kana'llen' Xallo Diosen' gone' nench be'nn ka' llon da wen na', nni'trén ake' Le'e txhen, le leake'n nak xhi'nne', na' yeyak ake' ka beni' ke will kat vellín ake' yebá gan'

llia Diosen' llnebie'. Re' zo nayre lewzenay xti'lla'n.

Yel llnebia' ke Diosen' naken ka mell xhen da nga'ch

⁴⁴'Na' Yel llnebia' ke Dios be'nnen' zo yebán' naken ka to mell xhen da nga'che to rao yellrio. Na' to be'nne ballelre'n, na'll bakwa'che'n da yobre lekze rao yellrio na'kze, na' llawere' kwis zayeje', na'll jaye'te yeolol bi da de ke'e nench bazie' yellrio gan' nga'ch mellen'.

Yel llnebia' ke Diosen' naken ka to be'nn llyirj yej cha'o

45'Na' yel llnebia' ke Dios be'nnen' zo yebán' llonen ka ke to be'nn dá llo't biteze, na' de'e yirje' yej cha'o dan' nzi'i perla. 46 Na' kat ll-llelre' to yej cha'o da za'k, na' llayo'te' yeolol bi da de ke'e nench waya'we' yej cha'on.

Yel llnebia' ke Diosen' naken ka yixj wxhen bel

⁴⁷'Na' yel llnebia' ke Dios be'nnen' zo yebán' za'krebren ka to yixj bel. Na' bal be'nn wxhen bel ka' bza'l ake' yixj ke ake'n lo nisda'on, na' bxhenen zan kwen ba lla'a lo nisda'on. ⁴⁸Na' ka ba balla'n na', babej ake'n lloa' nisda'on, na'll llabé akeba', na' ba nak wen, llalla'a akeba' lo llom. Na' ba ka' bi nak wen na', llo'nn akeba'. 49 Kan' gak katen' llin lla, te ke yellrio ni. Angl ka' yebej ake' be'nn wen da xhinnj ka' zjarén radi be'nn ka' nake be'nn wen rao Diosen'. 50 Na'll waza'le' leake' lo yi' gabil gan' lljallell ake' ga zeraoze to gaoxoxj lay ake' yel llallayrao ke ake'.

Xti'll Dios dan' byoj kana' ren dan' llzejnie' Jesúsen'

⁵¹ Jesúsen' lle'e leake':

—¿Zyejnie're yeolol da ki ba broe'ra' re'n?

Na'll lle ake' Le'e:

- -Zyejnie'kzeto'n.
 - 52 Na'll lle'e leake':
- —Noteze be'nne cha' llak llroe' llsedre' ley ke Diosen' dan' byoj kana', na' cha' llzenaykze' kan' llroe' llsedra' ke yel llnebia' ke Diosen', na'llen' nake' ka to xan yo' be'nne nape' yeolol da za'ke da yalljre' llonrene' llin, balen nak da kobe, na' balen nak da gore.

Jesúsen' balline' Nazaret

(Mr. 6:1-6; Lc. 4:16-30)

53 Ka bayoll be'e Jesúsen' di'll ki, na'll baze'e. 54 Na' bayeje' ralle'n, na' jaroe' jasedre' be'nn wrall ke'e ka' lo yoda'o ke ake'n. Na' babán akre' kwis ke di'llen' lloe'n, na' lle lwellj ake':

—¿Ga jasede' yel si'n na'? ¿Na' gaxha jaxie' yel wak ki llone'?

55 ¿Kere le'en xhi'nn be'nn wencha'o yayen', na' xhne'en re'e María? Na' bi'che' ka' re Jacobo, José, Simón na' Judas.

56 Na' lekze ni't zane' ka' rall-llo ni. ¿Akxha llaken lloe' di'll ki, na' llakte' llone' yel wak ki?

⁵⁷Na' bi gokra'll ake' chejle' ake' ke'e, na'll lle'e leake':

—Yeololze be'nne lloe'rao ake' be'nn lloe' xti'll Dios, zan ka nak be'nn wrall ke'e ka', na' be'nn lo yo' ke'e bi llap ake' le'e bara'nne.

⁵⁸Na'll to chopze yel wak bene' Nazareten' le nono byejle' ke'e.

Kan' gok bet ake' Juan be'nnen' bchoa nis

(Mr. 6:14-29; Lc. 9:7-9)

14 Ka llan' llnebia' be'nnen' re Herodesen' gan' nbane Galilean' benre' di'll kan' llze ke Jesúsen'. ²Na'll golle' be'nn wen llin ke'e ka':

—Be'nn nin' Juan be'nnen' bchoa nis babane' radj be'nn wat ka', na'llen' llak llone' yel wak ki.

³Bne Herodesen' ka' le le'en golle' be'nn ka' be'x ake' Juan na', na' bchej ake' nia'ne'e, na' bro' ake' le'e lo rill yan'. Bene' ka', xto'l Herodías be'nnen' nak xho'r bi'che' be'nnen' re Felipe. ⁴Le goll Juan na' le'e:

—Bi llaya'le soreno' xho'r bi'cho'n. ⁵Herodes na', gokra'lle' gote' Juan na', na' bi bayaxhjre', bllebe' be'nn ka', le be'nn zan be'nn yell llejle' ake' ke Juan na', lloe' xti'll Dios. ⁶Na' ka btil Herodesen' iz, ben ake' lnni, na'll xhi'nn Herodíasen' bi no're bllojbe' bya'be' rao be'nn zan ka'. Na'll bayazra'll Herodesen' kwis kan' bya' bi no'r we'on. ⁷Na'll bzoe' Diosen' wie' bi da gone' ke'e, cha' bi we'e bi no'r we'on kon biteze nnábebe' le'e. ⁸Na'll bko'yele xhna'be'n lebe' nench yebe' Herodesen':

—Yichj Juan be'nnen' llchoa nis na', bennen ganni, na' wllia'on to lo ye'nn nllirje.

⁹Na' reyen' gokre' kwis kan' goll bi no'r we'on le'en, le ba bzoe' Diosen' rao be'nn zan ka' we'ebe' kon biteze da nnábebe' le'e, na'llen' benchaze' dan' bnnabbe'n. ¹⁰Na'll golle' be'nn ka' wchoy ake' yen Juan na', lo rill ya gan' yoe'n. ¹¹Na' 29 San Mateo 14

bllia ake' yichje'n to lo ye'nn nllirje, na' be'e ake'n bi no'r we'on, na' jaye'be'n xhna'be'.

¹²Na'll be'nn ka' non Juan na' txhen jaxhi'i ake' kwerp ke'en, na' jakwa'ch ake'n. Na'telle jayake' gan' zo Jesúsen' jayell ake' Le'e kan' goken.

Jesúsen' bwawe' ga'y mir be'nne

(Mr. 6:30-44; Lc. 9:10-17; Jn.6:1-14)

13 Ka bene Jesúsen' kan' gok ke da Juan na', na'll le baza'te', bayoe' to lo barco zayeje' to latj dach ga nollno lljannao Le'e. Bixha be'nn ka' zjalla'a yell ka' zjalli' lloa' nisda'on, ka bnnez akre' ka', na'll bza'a ake' rall ake'n zjak kon nia' ake' jatil ake' Jesúsen'. 14 Ka ballín Jesúsen' lloa' nisda'on, bre're' lla'a be'nn zan, na'll baya'chra'lle' leake'. Na' bayone' be'nn we'e ke ake' ka'. 15 Na'll ka ba llen will, jak be'nn ka' non Le'e txhen rawe'n, lle ake' le'e:

—Zello to latj ga bibi de, na' ba nak ba wlle'. Base'lchaz be'nn ki nench lljayake' yell da'o ka' lli' awlloze lljadirj ake' da ye'j gao ake'.

¹⁶Na'll lle Jesúsen' leake':

—Bi llaya'l lljayake' ka'ze, re' lewe'e ake' da gao ake'.

¹⁷Na'll lle ake' Le'e:

—Ga'yze yet xtir kellon' de, na' ye chop belya'.

¹⁸Na'll lle'e leake':

—Lelljaxi'n ganni.

¹⁹Na' le gollte' be'nn ka' blle' ake' rao yi'xen'. Le bxhi'te' yet xtir ga'y ka' ren belya' ka' ye chope, na' le bwiate' le' yebáre be'e yel llioxken ke Dios, na'll bxhoxhjen be'e be'nn ka' non Le'e txhen na', nench bdislas ake'n bdao be'nn ka'.

²⁰Yeolole' bdao berj aktere'. Bayoll na' batop ake' dan' baga'nnen, na' goken ye chllinn llom da ka' baga'nnen da goxhj ka'. ²¹Na' be'nn ka' bdaon' nak ake' ka do ga'y mir be'nne byio, llakze kere no'r ka' ren bida'o ka'.

Jesúsen' bze'e rao nisda'on

(Mr. 6:45-52; Jn.6:16-21)

²²Bayoll na', le gollte' be'nn ka' non Le'e txhen na', wlla'a ake' lo barcon' nench kwiarao ake' wla'y ake' ye chla're nisda'on, chak baga'nn Le'en, base'le' be'nn zan ka' zjayake'. ²³Bayoll base'le' be'nn ka', bayepe' to rao ya' ga balwille' Diosen' to wraze, na' ka golen', toze' ze'e rao ya'n. 24 Na' barcon' dan' zjalla'a be'nn ka' bse'len, ba zjazén ka do kllol nisda'on, le zebraz lllli'y nisen' len, llas lljata' nisda'on, ka naken dá be'n zban. ²⁵Na' ka do bal-llen bayeti Jesúsen' ya'n, na'll zeje' gan' zjak be'nn ka' non Le'e txhen na', na' zeje' kon nie' to rao nisda'oze. ²⁶Na' ka bre'e akre' Le'en, le blleb ake', besia' ake' ka zeje' rao nisda'on. Na'll ne ake':

—iDa ya'jen' llre'llo!

²⁷Na'll le balwillte Jesúsen' leake', bne'e:

—iLeyewé, nada'n, bi llebre! ²⁸Na'll le gollte Pedron' Le'e:

—Xanto', cha' rennro' rwe'n, bne yeda' gan' ze'o rao nisen'.

²⁹Na'll lle Jesúsen' le'e:

—Da cha'.

Na' le bllojte Pedron' lo barcon' zejze' gan' ze Jesúsen' rao nisda'on. ³⁰Bixha ka bre're' dá be'n res, na' bllebe' na' bzorao llaze' lo nisen'. Na'll besie' lle'e Jesúsen':

- -iXana', basrá nada'!
- ³¹Na' le bzete ta'k Jesúsen' bayo'xe' le'e, na'll lle'e le'e:
- —¿Bixchen bi benlira'llo', na' gokganro' nada'?
- ³²Na' kate bayo' Jesúsen' ren Pedron' lo barcon', le blle'llite be'n. ³³Be'nn ka' zjalla'a lo barcon' bche'k xhib ake' rao Jesúsen' ben ake' Le'e xhen, ne ake':
 - -Dogarjkze Xhi'nn Dios rwe'.

Jesúsen' bayone' be'nn zan gan' nzi'i Genesaret

(Mr. 6:53-56)

³⁴Bayoll na' bla'y ake' nisda'on, na'll bllin ake' gan' nzi'i Genesaret.
³⁵Kate bayombia' be'nn Genesaret ka' Jesúsen', bdislas ake' di'llen' yeolol yell da'o ka' zjalli' awlloze nench bnnez akere' ba bllin Jesúsen' rall ake'n. Na' be'nn ka' lla'a yell ka', bche'e ake' yeolol be'nn we'e ka' rawe'n. ³⁶Na' go'tyoe akre' Le'e we'e latj go'x ake' la ra'tze xhnie' xhe'en, na' yeolol be'nn ka' be'x len le bayak akte'.

Di'll zban ll-lloj lloa'llon' ll-llonen gak ra'llda'ollon' yall rao Dios

(Mr. 7:1-23)

- Bal be'nn fariseo ka', na' be'nn ka' llsedre ke ley dan' bzoj da Moisésen' bza'a ake' Jerusalén na', bllin ake' gan' zo Jesúsen', llnnab akre' Le'e:
- ²—¿Bixchen bi llon be'nn ka' non rwe' txhen kan' ben xozxta'ollo ka', bi llna'a ake' weltze toto kwe' ake' gao ake'?
 - ³Na'll lle Jesúsen' leake':
- —Leska' re', ¿bixchen bi ngo' yichjre gonre kan' ne Diosen'

llaya'l gonllo, na' llonre xhen ka dan' ben be'nn gor ka' ba bde? ⁴Diosen' ba bne'e kan' gonllon', dan' bne'e: "Legap bara'nn xaxhna're", na' "Noteze be'nne cha' yellie' di'll xaxhne'e llaya'l gate'." 5Na' re' llákere wak to be'nn ye'e xaxhne'e: "Bitbi de gonna' gakrena' rwe', yeolol da de kia' ba bia'a Diosen' len." ⁶Na'll nere billbi llaya'l we'e xaxhne'en cha' ka'. Dan' nere ka', llbekre ka'le dan' ne Diosen', na' naore llonre ka dan' ben be'nn gor ka' ba bde kana'. ⁷Re' be'nn chop rao ba llonya'nnre kan' bzoj da Isaíasen' keré, gan' nen:

- 8 Be'nn ki llon ake' nada' xhen kon lloa' ake' naze', kere lloe'rao ake' nada' do yichj do ra'll ake'n.
- ⁹ Bibi za'k dan' lloe'rao ake' nada'n,

ka nak llroe' llsed akre' da bayirjla'll be'nnachzen'.

¹⁰Na'll goxhe' be'nn ka' ndop ganna', na' lle'e leake':

—Lewzenay dan' yepa' re' ni, na' lechejnie'n. ¹¹Kere da lle'j llao be'nnachen' llonen le'e gake' be'nn wen da xhinnj rao Diosen'. Di'll dan' ll-lloj lloe' na', len na' llon le'e bi gake' yall rao Diosen'.

¹²Na'll jabi'y be'nn ka' awllo, be'nn ka' non Le'e txhen na', lle ake' Le'e:

- —¿Zakbe'ro' goklla'a be'nn fariseo ka', kan' ben akre' xti'llo'n?
 - ¹³Na'll lle Jesúsen' leake':
- —Wllin lla kate Xa' be'nnen' llia yebá na', gone' ka llon to be'nn kat ll-la'lle' no yay da bi goze'. ¹⁴Waljechaze be'nn fariseo ka', le ka to be'nn lcholen' nak ake', le to

be'nn lchol kere wak ko'rene' nez ye to lwellj lchole, wa lljabix ake' do lo broj chet ka'.

15 Na'll lle Pedron' Le'e:

—Bzejnie'cheke neto' akxha zejen kan' bne'o na'.

16 Na'll lle'e leake':

—¿Rente re¹ bi nna chejnie¹re ka da ki ba bnia' ni? 17 ¿Bi llejnie're yeolol dan' lle'j llao be'nnache llo'n lo le'e, na' ll-llin lla lladen? ¹⁸Zan yeolol di'll da lloe' be'nnach, lo ra'llda'we'n ll-llojen. Na' cha' naken no di'll zban, len na' llonen nench ra'llda'we'n bi naken yall rao Diosen'. 19 Le lo ra'llda'o ake' na'n llarjla'll ake' llon ake' da xhinnj, na' llaso'te be'nne, na' llzoa xto ake', na' llzorén lwellj ake' la'kze bi nchayna'a ake', na' llban ake', na' llyirjla'll ake' xti'll lwellj ake', na' llasnné ake' ke be'nne. ²⁰Da kin' ll-llonen nench bi gak be'nne yall rao Dios, kere dan' bi llna'a ake' kat gao ake' na'n.

To no'r bi nak be'nn Israel benlira'lle' Jesúsen'

(Mr. 7:24-30)

²¹Baza'a Jesúsen' ganna', na' bayeje' do gan' lli' yell ka' nzi'i Tiro ren Sidón. ²²Na' to no'r be'nn yellen' nzi'i Canaán be'nn bi nake be'nn Israel, bze'e ralle'n, na' blline' gan' zo Jesúsen', na' jatile' Le'e, na'll besie' lle'e Le'e:

—iXana', rwe' nako' xhi'nn dialla da rey David, baya'chra'llchga nada'! To xhi'nna' no'ren' yo' daxi'o yichjra'llda'obe', nna'stek ll-llayraobe'.

²³Na' Jesúsen' bi be'la'lle' ke no'ren'. Na' be'nn ka' non Le'e txhen na', zjake' awllo, go'tyoe akre' Jesúsen' lle ake' Le'e:

—Balli'i no'ren', le llakia llone' nawe' lli'o.

²⁴Na'll lle'e leake':

—Diosen' bse'le' nada' nench llakrena' be'nn Israel ka', le leake'n nak ake' ka xhi'r da'o ba llaklleila'lle.

²⁵Na'll zej no'ren' jache'k xhibe' rao Jesúsen', na' lle'e Le'e:

—iXana', gokrenchga nada'!

²⁶Na'll lle Jesúsen' le'e:

—Bi naken wen yeka'rizllo yel wao ke xhi'nnllo ka', na' we'rizllo be'kw gaoba'n.

²⁷Na'll lle no'ren' Le'e:

—La'kze naken ka', Xana', be'kw ka' wak yetopba' bla'a da'o ka', llexj xhan gan' llbe' xanba' llawe'.

²⁸Na'll bayechj Jesúsen' lle'e le'e:
—iDa xhen gore nxenra'llo', no're!
Gakchga kan' lle'nro'n.

Na'll le bayakte xhi'nn no'ren'.

Jesúsen' bayone' be'nn zan

²⁹Baza'a Jesúsen' ganna', na' byeje' nez dan' llde awlloze lloa' nisda'o Galilea na', na'll byepe' to rao ya' jachie'. 30 Na' be'nn zan bllin rao ya'n gan' lli' Jesúsen', nche'e ake' no be'nn nxhinnje, be'nn bi llak sa'a, be'nn lchole ake, na' be'nn blloj ake, na' be'nn bi zo nia'na'a, na' ren be'nn llak wde wdere yillwe', na' bni't ake' leake' xhnia' Jesúsen', na'll bayone' yeololte'. 31 Na'll babane be'nn ka' kwis ka bre'e akre' banné be'nn blloj ka', na' bayak be'nn ka' bi zjazó nia'na'a, na' badá be'nn xhinnj ka', na' bare'e be'nn lchol ka'. Na'll bzorao lloe'xhen ake' Dios ke be'nn Israel ka'.

Jesúsen' bwawe' tap mir be'nne

(Mr. 8:1-10)

³²Jesúsen' le goxhte' be'nn ka' non Le'e txhen na', lle'e leake':

—Wa llaya'chra'lla' be'nn ki, le ba gok chonn lla lla'rén ake' nada' ganni, na' bibi de da gao ake'. Na' bi lle'nra' yesán ake' ka'ze, le kere ba bdao ake'n, nench ke chaz ake' da xchol do tnez.

33 Na'll lle ake' Le'e:

—Gan' zollo ni naken to latj dach, ga bibi dekze chras. ¿Ga llélello da gao yeolol be'nn ki?

34 Na'll lle Jesúsen' leake':

—¿Balxha yet xtir de keré? Na'll lle ake' Le'e:

—Gallze yet xtir da'o de, na' ye to chop belya' da'o. 35 Na'll golle' be'nn zan ka' kwe' ake' rao yon'. ³⁶Na'll be'xe' gall yet xtir ka', na' ren belya' da'o ka', na'll be'e yel llioxken ke Dios, na'll bxhoxhje'n be'e be'nn ka' non Le'e txhen na', na' bdislas ake'n rao yeolol be'nn ka' lla'a na'. ³⁷Yeolol akte' bdao berj aktere'. Bayoll na' batop ake' da ka' baga'nne, na' bayaken ye gall llom. 38 Na' be'nn ka' bdaon' nak ake' ka do tap mir be'nn byio, llakze kere no'r ka' ren bida'o ka'. ³⁹Na' bayoll na', base'le' be'nn zan ka' zjayak ake', na' le bayo'te' to lo barco, na' zayeje' yell ka' gan' nbane Magdala.

Bnnab ake' gon Jesúsen' to yel wak da re'e akre'

(Mr. 8:11-13; Lc. 12:54-56)

Le jabi'yte bal be'nn fariseo ka', na' ren be'nn saduceo ka' gan' ze Jesúsen', gokra'll ake'

kwej ake' Le'e di'll, nench na' ga't da wakw ake' Le'e xhia chole. Na' bnnab ake' gone' to yel wak da re'e akre' da za'a yebá. ²Na'll lle Jesúsen' leake':

-Kat llwiare le' yebán' do ba wlle', na'll nere: "Walla'a wxe, le ba llaxhná le' yebán'." 3Na' kate llre're llazé bej xhna le' yebán' kat lleni', na'll nere: "Wak yejw zay, le ba ze bej xhna le' yebán'." Be'nn chop rao ake, re' nnézkzere cha' wak yejw zay, na' cha' wak ze'ye katen' llre're akre nak le' yebán', na' bi llayakbe're bi zejen da ka' llon Diosen' ka llan' ba zollo nna'. ⁴Re' yo' da xhinnj lo ra'llda'ore, na' ba bsanra'llre Diosen'. Na' llnnabre gona' ye to yel wak da re'tere, zan bi gona' ka dan' llnnabren', zeraoze ka dan' broe' Diosen' re', ka dan' benrene' da Jonás, be'nnen' be'e xti'll Diosen' kana'.

Na'll bayoll bne'e ka', baze'e gan' ze ake'n.

Dan' llzejnie' be'nn fariseo ka' naken ka kwa binn

(Mr. 8:14-21)

⁵Na'll ka ballín ake' ye chla're nisda'o Galilean', be'nn ka' non Le'e txhen na', bi jadinra'll ake' yeyo'x ake' yet xtir da gao ake'. ⁶Na'll lle Jesúsen' leake':

—Lewiaya'nn ke kwa binn ke be'nn fariseo ka', na' ke be'nn saduceo ka'.

⁷Na'll lle lwellj ake':

—Dan' bibi yet xtir no'xllo na'n, na'llen' ne'e ka'.

⁸Jesúsen' gokbe're' ka di'llen' lloe'rén lwellj ake'n, na'll lle'e leake':

—¿Bixchen llakrizere dan¹ bi no'xre yet xtir na'? ¿Bi llonlira'llre nada' napa' yel wak wawa' re'? 9 ¿Bi nna chejnie'ren? ¿Bi lljadinra'llre kan' bwawa' ga'y mir be'nne kone ga'yze yet xtir da'o? Na' lekze, ¿bi za'ra'llre ye bale llomen' baga'nn dan' batopren'? 10 Leska' ¿bi zara'llre bwawa' ye tap mir be'nne, kone gallze yet xtir da'o? ¿Za'ra'llre ye bale llom da goxhi batopre da baga'nne? 11 ¿Bixchen llákere dan' bi no'xre yet xtir na'n, llepa' re' ka', lewiaya'nn kan' nak kwa binn ke be'nn fariseo ka', na' ke be'nn saduceo ka'?

12 Na'll bayakbe'e akre', kere be'e di'll ke kwa dan' llonrén ake' llin dan' llaslli'o yet xtir na', be'e di'llen' ka', nench ke gakchixe lo yichjra'llda'o ake'n ka nak dan' llroe' llsed be'nn fariseo ka' ren be'nn saduceo ka'.

Pedron' bne'e Jesúsen' nake' Cristo be'nnen' bse'l Diosen' llnebie'

(Mr. 8:27-30; Lc. 9:18-21)

¹³Ka bllin Jesúsen' ren be'nn ka' non Le'e txhen, gan' nzi'i Cesarea de Filipo, na'll golle' leake':

—¿Bixha llasné be'nn ka' noxha nada'?

¹⁴Na'll lle ake' Le'e:

—Bal ake' ne ake' nako' da Juan be'nnen' bchoa nis. Na' ye bale' ne ake' da Elías rwe', be'nnen' be'e xti'll Dios kana'. Na' ye bal ake' ne ake' da Jeremíasen', na' ye bale' ne, kon to be'nn ka' be'e xti'll Diosen' kana'ten'.

¹⁵Na'll lle'e leake':

—¿Bixha re!? ¿No nere naka!?

16 Na'll Simón Pedron! lle!e Le!e:

—Rwe'n nako' Cristo be'nnen' brej Diosen' nnebie', na' nako' dogarje Xhi'nn Dios be'nn zo ke chnare.

¹⁷Na'll lle Jesúsen' le'e:

—Simón, xhi'nn Jonás, nbaraz ko'o rwe' dan' bne'o ka', notno be'nnach bzejnie' rwe' kan' bne'on. Toze Xa' be'nnen' llia yebá, Le'en bzejnie're' rwe'. 18 Na' nada' nia', rwe'n re'o Pedro, na' ra'o na', lle'nen nen to yej war. Ka to be'nn llon yo' llbie' da nak yej war, nench gonrene'n llin kat kweke' ran yo' ke'en, ka'kzen' llbeja' rwe' gono' xchina', gako' be'nn lliarao lljatopo' be'nn gon ake' nada' txhen. Ni ke bi deze gon yel wak ke yel goten', nench gonen leake' gan. ¹⁹Na' gona' rallna'o yel llnebia' dan' za'a yebá. Yeololte da wchejo' rao yellrion', llejten yebá, na' yeololte da yesello' rao yellrion', wayellten yebá.

²⁰Na'll lle'e leake' nono ye ake' cha' Le'en nake' Criston'.

Jesúsen' bzorao llyixjwe're' gate' (Mr. 8:31-9:1; Lc. 9:22-27)

²¹Kana' bzorao Jesúsen' bzejnie're' be'nn ka' non Le'e txhen na', llaya'l cheje' Jerusalén na'. Na' ne'e be'nn gor brao ka', na' bxoz wnebia' ka', na' be'nn ka' llsedre ke ley dan' bzoj da Moisésen' wsa'kzi' ake' Le'e, na' yeso'te Le'e, na' yeyónn lla na', yebane' radj be'nn wat ka'. ²²Na'll bche'e Pedron' Le'e ga yobre to wraze, na'll bzorao lloe'rene' Le'e di'll, bdile' Le'e, lle'e Le'e:

—Xana', Dios gakrene' rwe' bi gak ko'o ka di'llen' lloe'o ganni.

²³Na' Jesúsen' bayechje' bwie' Pedron', na'll lle'e le'e:

—iKwas ka'le, daxi'o! Llko'yelro' nada' nench bi gona' kan' nllia

Diosen' bia'a gona'n, kere xhbab ke Diosen' nsa'o, xhbab ke be'nnachen' nsa'o.

²⁴Na'll lle Jesúsen' be'nn ka' non Le'e txhen na':

-Noteze be'nn cha' lle'nre' gake' nada' txhen, llaya'l wsanra'll kwine'. na' gone' ka to be'nn noa' cruz ke'e, na' nnawe' nada'. ²⁵Noteze be'nn lle'nre' yesrá yel nban ke kwine' yellrio ni, wnite'n, na' noteze wnit yel nban ke'en ni kia' nada', le'en ga't yel nban zejlikane ke'e. 26 ¿Bixha za'ken na', cha' to be'nne gone' gan doxhente da de rao yellrio, na' kweyie', bi ga't yel nban zejlikane ke'e? ¿Bi kone ga'we' yel nban na'? ²⁷Nada' Be'nnen' Gorj Radj Be'nnach kat yeda' da yobre yellrio ni nsa'a yel za'k xhen ke Xa' Diosen', na' wchia' angl kia' ka', kana' gona' ke toto be'nnach so ake' nbaraz o cha' wsa'kzi' ake'. kon da ben totoe'. ²⁸Da li nia' re', balre lla're ganni bi nna gatre, kat llin lla re're nada' yedrena' yel llnebia' kia'n, nada' Be'nn Gorj Radj Belnnach.

Jesúsen' goke' ka to beni' (Mr. 9:2-13; Lc. 9:28-36)

17 Bde gok xop lla bche'e Jesúsen' Pedron' ren Jacobo, na' ren Juan, bi'ch Jacobo na', na' zre akze' jake' to rao ya' sibe. ²Na' llwia akte' kat blla'a yichjrao Jesúsen', gok llaktit kwis lloa'rawe'n kan' nak will na', na' xhara'ne'n goken llich kwis, goken ka beni'. ³Rawe na' bre'e akre' da Moisés ren da Elías lloe'rén ake' Jesúsen' di'lle. ⁴Na'll lle Pedron' Jesúsen':

—Xanto', le wen zollo ganni. Cha' lle'nro', na' gonto' chonn yo', to ko'o, na' to ke Moisés, na' ye to ke Elías na'.

⁵Nna lloe'te Pedron' di'll ka', kat byechjze to bej llaktit leake', na' lo bej na' ben akre' bne Diosen': "Be'nn nin' nak xhi'nna' nllie'ra' llayazra'lla', llawera' kwis ke'e. Ke Le'en wzenayre."

⁶Ka bene be'nn ka' nche'e Jesúsen' ka', to blleb akze', na' byal ake' slloa're rao yon'. ⁷Na'll jabi'y Jesúsen' jaxoa ne'en yichj ake', na' lle'e leake':

—Lewayas. Bi llebre.

⁸Na' ka balis yichj ake'n, nollno llra' ye toze Jesúsen' ze'e.

⁹Bayoll na', ka llayetj ake' le' ya' na', lle Jesúsen' leake':

—Ka nak dan' bre're ni, bi we're di'll ka'. Kat nada' Be'nn Gorj Radj Be'nnach yebana' radj be'nn wat ka', kana'll wak we're di'll ka'.

¹⁰Na'll be'nn ka' non Le'e txhen na', lle ake' Le'e:

—¿Bixchen be'nn ka' llsedre ke ley dan' bzoj da Moisésen', lle ake' neto' zga'tek da Elías be'nn bzo kana'n llaya'l yede' da yobre?

¹¹Na'll lle Jesúsen' leake':

—Da likzen' zga'tek da Elías na'n yede', na'll yeyoncha'we' yeololte. ¹²Zan ni llepa' re', ba bedkze Elíasen', na' nono bayombia' cha' le'en, na' ben akre' le'e ka lle'n akre'; na' ka'kzen' wsa'kzi' ake' nada' Be'nnen' Gorj Radj Be'nnach.

¹³Na'll gokbe'e be'nn ka' non Le'e txhen na', lloe' di'll ke da Juan be'nnen' bchoa be'nne nis.

Jesúsen' bayone' to bida'o llen xhgot

(Mr. 9:14-29 ; Lc. 9:37-43)

¹⁴Na' ka bllin ake' gan' lla'a be'nn zan kwis, to be'nn jatile' Jesúsen', jache'k xhibe' rawe'n, na' lle'e Le'e: 15—Xanto', baya'chra'llchga xhi'nna' ni, le llazbe' xhgot, na' llallayraobe', na' da zan ras ba byalbe' do lo yi' leska' lo nis. 16 Na' ba badwa'be' rao be'nn ko'o ka' non rwe' txhen na', na' bi gok ake' yeyón akebe'.

¹⁷Na'll lle Jesúsen' leake':

—iRe', be'nn bi llonlira'lle, na' llonre ka nen keré! ¿Ye art serena' re'? Lla ledá wa'a bida'on ni.

¹⁸Na'll Jesúsen' bdile' daxi'on, na' ballojen lo yichjra'llda'o bida'on. Na'll le bayaktebe'.

¹⁹Bayoll gok ka', na'll jak be'nn ka' non Le'e txhen na' awllo, goll ake' Le'e:

—¿Bixchen bi gokto' yebejto' daxi'on?

²⁰Na'll lle Jesúsen' leake':

—Bi gokre yebejren le bi byejle're ke Diosen' wak gone' yellojen. Da li nia' re', chenak dan' llejle'ren' naken ka to nak nbaz ke mostaz, na' yere ya' ni: "Bakwas ganni, na' jazó ganna'te", na'll gakte kan' neren'. Gaga de da bi gak gonre kon cha' llejle're ke Diosen'. ²¹Nench sa'ke yebejre daxi'o ka', ka da ka' babeja' yichjra'llda'o bida'on, llaya'l gonre was, na' yelwilltezre Diosen'.

Jesúsen' bdixjwe're' da yobre gate'

(Mr. 9:30-32; Lc. 9:43-45)

²²Na'll ka zayej Jesúsen' Galilea na', ren be'nn ka' non Le'e txhen na', golle' leake':

—Nada' Be'nnen' Gorj Radj Be'nnach, dekz de gaka' rallna'a be'nne ka' llwie nada', ²³got ake' nada', na' yeyoll got ake' nada' na' yeyónn lla yebana' radj be'nn wat ka'. Na' gokya'che be'nn ke'e ka', ka ben akre' xti'lle'n.

Llaya'l chixhj ake' ke yoda'o braon'

²⁴Ka ballín ake' Capernaum na', jak be'nn ka' llchixhj ke gaxt ke yoda'o braon' rao Pedron', na' goll ake' le'e:

—¿Bi yixhj maestro kerén¹ da llaya¹l chixhje¹ ke yoda¹o brao ni?

²⁵Na'll lle Pedron' leake':

—Llyixhjkze'n.

Na'll Pedron' kan' byoe' lo yo'n, le gollte Jesúsen' le'e:

—¿Akre llakro' Simón? Ka nak be'nn wnebia' ka' zjalla'a yellrio ni, ¿noxhan' llakro' llchixhj ake'? ¿Be'nn wrall ke ake'n o cha' be'nn zi'ten'?

²⁶Na'll lle Pedron' Le'e:

—Be'nn zi'ten' llchixhj ake'. Na'll lle Jesúsen' le'e:

—Na' lli'o naktello be'nn wrall ke ake' bi llaya'l chixhjllo ke yoda'on. ²⁷Zan nench nono bi nne kello, byej lloa' nisda'on, na' bza'l yixj ko'on, na' bel nellen' seno' na', lo lloa'ba' na' llelro' to mell. Na' yeyo'xo'n, na' lljatixhjo' ke lloptello.

Gokyoll be'nn ka' non Jesúsen' txhen nore nakll be'nn brao

(Mr. 9:33-37; Lc. 9:46-48)

18 Na'll jak be'nn ka' non Jesúsen' txhen jabi'y ake' kwite'n, lle ake' Le'e:

—¿Nore neto' gakllto' be'nn brao kat gon Dios be'nnen' llia yebán' nnebia'o?

²Na'll goxh Jesúsen' to bida'o, na' bze'ebe' kllol ake'n. ³Na'll lle'e leake':

—Da li nia' re', notezre cha' bi wcha'a yichjra'llda'ore, na' wayakre

San Mateo 18 36

ka to bida'o, kbat gakre Diosen' txhen be'nnen' llnebia'n. ⁴Noteze be'nne cha' yeyake' ka bida'o ni, na' waxhexjra'lle' rao Diosen', na'llen' gake' be'nn brao ke Diosen' be'nnen' llnebia'. ⁵Na' noteze be'nne gonre' bida'o ak wen ka bida'o ni, dan' llonlira'llbe' nada', nadkza'n llonre' wen.

Llaya'l wiallo ke wlli'yllo be'nne gone' da xhinnje

(Mr. 9:42-48; Lc. 17:1-2)

6'Noteze be'nne gone' bix to bida'o ki nxenra'll nada' gonbe' da xhinnj, nakteren wen na', wchej ake' yene' to yej yiche, na' wza'l ake' le'e lo nisda'o, kerke da gone' nench gon to bida'o ki da xhinnj. ⁷Nya'chraz naken ke be'nnach dan' de da zan yellrio ni, da llko'yelen be'nnachen' gon ake' da xhinnj, zan nya'chraz ke be'nn llko'yele' be'nne nench gone' da xhinnje.

⁸'Ke len na', cha' nia'na'ren' llxhoben re', gonre da xhinnj, wenre chenak wchoyren, kerke da gonre da xhinnjen'. Wenre yellinre gan' de yel nban na', yallje chla' ta'kre, na' nlloy chla' nia're, kerke da yeyejre lo yi' gabilen' nya'tezre. ⁹Na' cha' yejraoren' llxhoben re', gonre da xhinnj, wenre chenak kwejre raoren' kerke da gonre da xhinnjen'. Wenre yellinre gan' de yel nban na', yallje chla' yejraoren', kerke yeyejre lo yi' gabilen' zo chop la'te yejraoren'.

Jesúsen' bsa'krebre' ka gok ke xhi'r da'o ba gokllejla'lle

(Lc. 15:3-7)

¹⁰'Lewiachga bi gónere bida'o ki nxenra'll nada' kaze. Ni nia'

re', angl ka' llap aksebe', na' ni't akse' llwia ake' rao Xa' Diosen' llia yebán'. ¹¹Le nada' Be'nn Gorj Radj Be'nnach, za'a nench wasra'a be'nn ka' ba nbeyi'.

12 '¿Akxha gákere? Cha' zo to be'nn nape to gayoa (100) xhi'r da'o, na' cha' nnit toba', ¿bi wkwa'nne' ba tapralj twalj ka' (99), na' lljadirje' bada'on bnit do radj ya'n? 13 Da li nia' re, kat yellélereba'n, yewere' kwis ba balleleba', kerke ba tapralj twalj ka', nna ni't na'. 14 Ka'kzen' naken ke bida'o ki. Xallo Dios be'nnen' llia yebá na', bi lle'nre' kweyi' ni tobe'.

Akre llaya'l gonllo yezi'xhenllo ke be'nn bi'chllo

(Lc. 17:3)

¹⁵'Cha' to be'nn lwellire gone' to da xhinni keré, lechej lellje'rene' di'll llopzre. Na' cha' wayakbe're' da xhinnjen' bene', na' wzenaye' keré, ba bayono' be'nn bi'cho'n gan na', chet ka'. 16 Na' cha' bi llejle' di'llen' llje'renre'n, wenre lewche'e ye to chop be'nn lwelljre nench na' re'e akre' ba go'tyoere be'nnen' yecha'a yel kan' llon ke'en. 17 Na' cha' bi wzenaykze' keré, na' lewe'e di'll kan' llone'n rao yeololre kan' nakre lldop ll-llayre lloe'raore Diosen'. Na' cha' bi wzenaykze' ke yeololre, bill gonre' txhen. Wenre legone' ka to be'nn bi nxenra'll Dios, ka no be'nn wachixhje be'nn llon da xhinnj.

¹⁸'Da li nia' re', yeololte da wchejre rao yellrio, wllejten yebá, na' yeololte da yesellre rao yellrion', wayellten yebá.

¹⁹'Na' da yobre nia' re', cha' ntil chopre rao yellrio ni, na' gonre toze di'll bi dan' nnábere Diosen', Xa' Dios be'nnen' zo yebán' gonnkze' dan' nnáberen'. ²⁰Le gan' nllay chop chonnre llonre nada' xhen, ganna' zorenkza' re' txhen.

²¹Na'll jabi'y Pedron' lle'e Jesúsen':

—Xanto', bixha cha' to be'nn lwellja' bi da gone' kia' da wlleyi' nada', ¿bale ras llaya'l yezi'xhena' ke'e? ¿Zerao gall ras?

²²Na'll lle Jesúsen' le'e:

—Kere nia' zerao gall ras yezi'xhen ke lwelljren', ni nia' re' wyon chi (70) ras de gall ras wejen', yezi'xhenre'.

Jesúsen' be'e di'll ke to be'nn bi bxhi'xhene' da llba'y be'nn lwellje' ke'e

²³'Yel llnebia' ke Dios be'nnen' llia yebán' za'kreben ka ben to be'nn wnebia', na' llba'y be'nn wen llin ke'e ka' xhmelle', na' gokra'lle' we'rene' leake' di'll arken' llba'y ake' ke'e. 24 Ka bzorao llwie' arken' llba'v totoe', na' bllin be'nn nell be'nnen' nak be'nn wen llin ke'en llba'ye' chi mir mell dan' nzi'i talento, na' naken mell xhen kwis. ²⁵Na' be'nn na' bibi xhmelle' de da yeyixhje'n. Na'll be'nn wnebia'n golle' be'nn wen llin ke'e ka' llje't ake' le'e ren xho're' na', na' ren xhi'nne' ka', na' ren yeolol da zjadé ke ake' nench yeyaxhi dan' llba'y ake'n. 26 Na'll bche'k xhib be'nn wen llin ke'en rawe', go'tyoere' le'e lle'e le'e: "Xana', bdapchga yel llxhenra'll kia', wayonnkza' doxhente dan' llba'ya' ko'on." ²⁷Na'll baya'chra'll be'nn wnebia'n le'e, bazi'xhene' dan' llba'ye' ke'en,

na'll bsane' le'e. 28 Bixha ka balloje' rill xane' na', le balláytere' ye to be'nn lwellje', be'nn llba'y ke'e ra'te. Na'll le be'xte' le'e, be'xe' yene', lle'e le'e: "Bayónn dan' llba'yo' kia'n nna'steke." ²⁹Na'll be'nn lwellje'n leska' le bche'kte xhibe' rawe', lle'e le'e: "Bdapchga yel llxhenra'll kia', wayonnkza' doxhen dan' llba'ya' ko'on." 30 Bixha le'en bi bxhi'xhene' ke be'nn lwellje'n, le gollte' be'nn ka' go'x ake' le'e ko' ake' le'e rill ya, na' golle' be'nn ka' bi yebej ake' le'e cha' bi nna yeyixhje' ke'en dan' llba'ye'n. 31 Na'll be'nn wen llin ka' yela', ka bre'e akre' kan' benre' be'nnen', na' gok akre' kwis. Na'll byej ake' rao xan ake'n, jell ake' le'e kan' benre' be'nn lwellje'n. ³²Na'll goxh be'nn wnebia'n le'e da yobre, na'll lle'e le'e: "iBe'nn wen da xhinni kwis nakkazo!! Nada! bazi'xhena' ko'o doxhente dan' llba'yo' kia'n, le go'tyoero' nada' yezi'xhena'n ko'on. 33 ¿Bixchen bi baya'chra'llo' be'nn lwelljo'n llba'y ko'on kan' bena' nada' baya'chra'lla' rwe'?" ³⁴Na'll goklla'a be'nn wnebia'n kwis, na'll golle' be'nn ka' bro' ake' le'e lo rill ya ga yellayrawe', na' bi yellojkze' cha' bi nna wayixhje' doxhen dan' llba'ye'n.

³⁵Na'll goll Jesúsen' be'nn ka' non Le'e txhen na':

—Kan' gon Xa' be'nnen' llia yebán' keré, cha' bi llazi'xhenre ke lwelljre do yichj do ra'llre biteze da gon akre' re'.

Jesúsen' broe're' bi naken wen wsan xho'r xhyio be'nne

(Mr. 10:1-12; Lc. 16:18)

Bayoll bne Jesúsen' yeolol da ki, na'll baze'e gan'

San Mateo 19 38

nbane Galilean', na' bala'ye' ye chla're yeo Jordán na', byeje' gan' nbane Judea. ²Na'll be'nn zan zanao Le'e, na' bayone' be'nn we'e ak.

³Na'll bale be'nn fariseo ka' jake' gan' zoe' na', gokra'll ake' kwej ake' Le'e di'll nench na' ga't da wakw ake' Le'e xhia chole, na'll lle ake' Le'e:

—¿Wak yera'a to be'nn ren no'r ke'en, be'nn nchayna'rene', cha' bi llazra'lle' kan' llon no'r ke'en?

⁴Na'll lle'e leake':

—¿Bi nna wrabre kan' nyoj xti'll Diosen!? Llian kan' bxhe yellrion!, na' ben Diosen' be'nn nelle to be'nn byio na' ye to no're. ⁵Na'll bne'e: "Be'nn byio na', wsanra'll xaxhne'e nench sorene' no'r ke'e na', na' llop ake' gak ake' ka toze be'nne." ⁶Na' ka' bill nak ake' chope', ba nak ake' toz be'nne. Ke len na' be'nn ba bko'd Dios bi gak yela'a be'nnach leake'.

⁷Na'll goll ake' Le'e:

—Cha' ka' naken cha', ¿bixchen bne da Moisésen', kat to be'nne yera'rén no'r ke'en, llaya'l chas to yich da we'e no'r ke'en nench we'n di'll ba bara'a ake'n?

⁸Na'll lle Jesúsen' leake':

—Benn da Moisésen' latj yera'rén no'r kerén', le llwie' yel kan' nak yichjra'llda'o war keré na'n, na'llen' bne'e ka'. Le kan' ben Diosen' be'nn nell ka', bi nnello gokra'lle' yera'a ake'. ⁹Na' nada' llepa' re', noteze be'nn llara'rene' no'r ke'en, na' cha' bibi do'l de ke no'ren' darene' be'nn yobre, na' llchayna'rene' ye to no'r yobre, rebze llone' ka be'nn llzoa xto. Na' noteze be'nn byio

yechayna'rene' no're be'nn bsanra'll be'nn ke'en, rebze da xhinnjen' llonkze' ka dan' llonkze be'nnen' darén xho'r be'nne.

¹⁰Na'll be'nn ka' non Jesúsen' txhen lle ake' Le'e:

—Cha' ka' naken ke be'nn byio ren no'r ke'en, wenkre chenak bi wchayna'a akse'.

¹¹Na'll lle'e leake':

—Kere yeolol be'nne chejnie' da ni, toze be'nn ka' ba bzejnie' Diosen' bi zejen na'. ¹²Zjani't be'nn ka', ka llarj akte' bi lle'n akre' wchayna'a ake'. Na' ni't ye bal be'nn llaga'nn ka'ze, ni ke be'nn yobre. Leska' ni't ye bal be'nn bi llchayna'a ake', lle'n akre' gon ake' xchin Diosen' be'nnen' zo yebá llnebie'. Lewzenay ka dan' ba bnia'n cha' Diosen' ba bene' chejnie're.

Jesúsen' benla'ye' bida'o ak

(Mr. 10:13-16; Lc. 18:15-17)

¹³Na'll jwa'a ake' bida'o ak rao Jesúsen' nench wxoa ne'en yichj akbe', na' nnabe' rao Dios gakrene' leakbe'. Bixha be'nn ka' non Le'e txhen na', bdil ake' be'nn ka' nche'e bida'o ka'. ¹⁴Na'll lle Jesúsen' leake':

—Lewe'e latj yed bida'o ka' rawa' ni, bi wllonre, le be'nn ka' nak ka bida'o kin', leake'n nak Diosen' txhen be'nnen' llnebia'.

¹⁵Na'll bayoll bxoa ne'en yichj bida'o ka', benla'ye leakbe', na'll baze'e.

Be'nn we'o nak be'nn wnia'

(Mr. 10:17-31; Lc. 18:18-30)

¹⁶Na' bllin to be'nn we'o gan' zo Jesúsen', na' lle'e Le'e: —Maestro, rwe' nako' be'nn wen, ¿Bi da wen llaya'l gona' nench ga't yel nban zejlikane kia'?

¹⁷Na'll lle Jesúsen' le'e:

—¿Bixchen lle'o nada' be'nn wen? Toze be'nn wen na' zo, Le'en nak Dios. Cha' lle'nro' ga't yel nban zejlikane ko'o, llaya'l gono' kan' ne Diosen'.

¹⁸Na'll bne'e:

-¿Bixha da ka'?

Na' Jesúsen' golle' le'e:

—Bi goto' be'nne, bi tareno' xho'r be'nne, na' bi kwano', bi chirjo' di'll wenra'll ke lwelljo'. ¹⁹Bdap bara'nn xaxhna'o, na' bllie' be'nn lwelljo' kan' nllie're kwino'.

²⁰Na'll lle be'nn we'on Jesúsen':

—Yeololte da ki ba bena', ka nna naka' bida'ote. ¿Bixha nna yallj gona' nna'?

²¹Na'll goll Jesúsen' le'e:

—Cha' lle'nro' gako' kan' lle'ne Diosen', jaye't yeolol da de ko'o, na' mell dan' go'to'n na', be'en be'nn ya'ch, na'll ga't yel wnia' ko'o yebá, na'tell yedo' nnao' nada'.

²²Na' ka bene be'nn wnia'n kan' goll Jesúsen' le'en, gokre' kwis, zayeje' le yel wnia' xhen na' nape'.

²³Na'll lle Jesúsen' be'nn ka' non Le'e txhen na':

—Da li llepa' re', bni' kwis naken ke to be'nn wnia', we'e latj nnebia' Diosen' yichjra'llda'we'. ²⁴Ni yepa' re' da yobre, sétere te to bayi'xe ban' nzi'i camello lo nay ye'chich, kerke to be'nn wnia' we'e latj nnebia' Diosen' yichjra'llda'we'n.

²⁵Na'll be'nn ke'e ka' non Le'e txhen na', llabán akre' kan' bne'en, na' lle ake' Le'e:

-¿Noxha yerakzen' cha'?

²⁶Jesúsen' bwie' leake', na'll golle' leake':

—Be'nnachen' bi gak gone'n, zan Dios na' wak gone' yeololte.

²⁷Na'll lle Pedron' Le'e:

—Neto' ba bsanra'llto' yeolol da de keto' nench naoto' rwe'. ¿Bixha da wen ga't keto' nna' cha'?

²⁸Na'll goll Jesúsen' leake':

—Da li nia' re', nada' Be'nnen' Gorj Radj Be'nnach, kat yekob Diosen' yellrio ni, na' nada' kwia' nnebia' kan' llnebia' Dios be'nnen' llia vebán'. Na' re' chllinn na'. kwe're kwita'n nnebia're, na' gonre yel koxchis ke chllinn kwen be'nn ka' nak be'nn Israel. 29 Na' noteze be'nne ba bsanra'll rille', bi'che'. zane', xaxhne'e, xho're', xhi'nne', na' yellrio ke'e dan' llzenaye' kia'n, Diosen' wayoe' le'e ka do to gayoa (100) ras, ka yeolol da ka' bsanra'lle' na'. Na' leska' ga't yel nban zejlikane ke'e. ³⁰Na' be'nn zan, nak ake' ka be'nn lliarao nna', wllin lla kat yeyak ake' ka be'nn za'a xhante, na' be'nn ka' nak ake' ka be'nn za'a xhante nna', leake'n yeyak ake' ka helnn lliarao

Jesúsen' be'e di'll ke be'nn wen llin ak

Jesúsen' bne'e:
—Yel llnebia' ke Diosen' llia yebán' llsa'krebra'n ka ke to be'nn nape' to yellrio ga naze' lba uvas. Na' bze'e rillen' to tzir da'o byeje' jatirje' be'nn wen llin gon ake' llin rao yellrio ke'en lla na'.

Na' bga'nnrene' di'll be'nn wen llin ka', to denario chixhje' totoe', kon ka llak tlla llin. Na'll bse'le' leake' gan' de llin na'. ³Na' ka do

San Mateo 20 40

lladá ga, byeje' gan' llak ya'an, na' bre're' nna lla'll be'nn bi de xchin. ⁴Na' lle'e leake': "Lechejrén gan' naza' lba uvas kia'n, lelljén llin, na' wyixhjkza' re' ka llaya'le." Na'll jak be'nn ka'. ⁵Da yobre byeje' ka do wawill, na' ka do lladá chonne. Bre're' nna lla'll be'nne bibi llin de ke ake', na'll bse'le' leake' nench lljen ake' llin gan' naze' lba uvas ke'en. ⁶Na' ka do lladá ga'y tlle'lre byeje' da yobre, na' bre'llre' nna ni'tll be'nne bibi llin llon ake'. Na'll lle'e leake': "¿Bixchen bi byeire llin?" ⁷Na'll lle ake' le'e: "Notno bne neto' lljento' llin." Na'll lle'e leake': "Lechejrén cha', lelljén llin gan' naza' lba uyas kia'n. Na' chixhjkza' re' ka llaya'lkze." Na'll jak be'nn ka'. ⁸Na' ka gol na', xan lba uvas na', lle'e be'nn wen llin brao ke'en: "Bayaxh be'nn wen llin ka' nench chixhj akoe', be'nn ka' bra' kan' ba llayoll llin na', sorao' chixhjo', na'tellre chixhjo' be'nn ka' bra' da nelle." ⁹Na'll bzorao be'nn wen llin braon' yixhje' zga'tek be'nn ka' bllin lladá ga'ye ba wlle'n, bdixhje' leake' twej denario totoe'. ¹⁰Na' ka bzorao bdixhie' be'nn ka' bzorao tzir na', na' llak akre' cha' chixhjlle' leake' da xhenllen'. Na' tozkze ka bdixhje' yeolol akte'. ¹¹Na' ka bayoll bxhi'i raxhj be'nn ka', bzorao tzir na', goklla'a ake', bi byazra'll ake' kan' ben xan llin na', na' bchachrén ake' le'e, ¹²Ne ake': "Do lla bllayrao neto' rao ze'yen' bento' llin ko'on, na' rebze ka bdixhio' neto' ren be'nn ka' ben llin to hor wejze." 13 Na' xan llin na' golle' toe': "Be'nn nllie'ra', bitbi da xhinnj llona' keré. ¿Kere bnetello

to denario chixhja' re'? ¹⁴Ba bxhi'i raxhjo', wak wayejo', lle'nra' wa'a be'nn ki kon kan' ba benna' rwe', la'kze bra' ake' ba wlle'. ¹⁵Nada' gona' kon ka lle'nra' ren da de kia'. ¿Cha' llakxhe'ro' dan' naka' be'nn wen na'?"

¹⁶Kan' naken na', be'nn zan nak ake' ka be'nn lliarao, na' wllin lla kat yeyak ake' ka be'nn za'a xhante, na' be'nn ka' nak ake' ka be'nn za'a xhante nna', leake'n yeyak ake' ka be'nn lliarao. Le be'nn zan na' llayaxhe', na' txhonnjze'n llalloj.

Da yobre bdixjwe' Jesúsen' gate'

(Mr. 10:32-34; Lc.18:31-34)

¹⁷Ka bza'a Jesúsen' cheje' Jerusalén na', na' breje' kere be'nn chllinn ka' non Le'e txhen na', na'll golle' leake':

18—Nna' ba zejllo Jerusalén na', gan' gon ake' nada' rao na'a bxoz wnebia' ka', na' ren be'nn ka' llsedre ke ley dan' bzoj da Moisésen', na' wchoy ake' kia' gata', nada' naka' Be'nn Gorj Radj Be'nnach. 19 Na' gon ake' nada' rao na'a be'nn bi nak be'nn Israel nench wtitj akre' nada', na' chintat ake' nada', na' got ake' nada', wda'a ake' nada' le' yay cruz, na' yeyónn lla na', yebana' radj be'nn wat ka'.

Xhna' Jacobo na' Juan na' bnnabe' kwe' xhi'nne' ka' kwit Jesúsen' katen' nnebie' na'

(Mr. 10:35-45)

20 Na'll byej xhi'nn Zebedeo be'nn ka' nzi'i Jacobo ren Juan, na' ren xhna' ake' na', na' bche'k xhib xhna' ake'n rao Jesúsen'. Na' lle'e Le'e:

—Llnnabra' rwe' to okré.

- ²¹Na'll goll Jesúsen' le'e:
- —¿Bixha okrén' lle'nro' gona'? Na'll lle'e Le'e:
- —Lle'nra' llopte xhi'nna' ki, kwe' akbe' chla' weje kwito'n kate llin lla nnebia'on.
- ²²Jesúsen' lle'e Jacobon' ren Juan na':
- —Re' ni ke nnézzere ka dan' llnnabren'. ¿Wchoyra'llre tere yel zi' yel ya' ka dan' tia' nada', gak keré kan' gak kia' na'?

Na'll lle ake' Le'e:

- -Wzoekzeto!.
- ²³Na'll lle Jesúsen' leake':
- —Da likze tere yel zi' yel ya' ka dan' tia' nada', na' gak keré kan' gak kia'n, zan bi naken rallna' nnia' noxhan' kwe' kwita'n kat llin lla nnebia' na', be'nn ka' ba brej Xa' Dios na'n, leake'n gak kwe' ake' kwita'n.
- ²⁴Na'll ka bene be'nn ye chi ke'e ka', kan' bne be'nn ka' chop na', goklla'a ake' leake'. ²⁵Na'll goxh Jesúsen' yeolole', na' lle'e leake':
- -Ba nnézkzere be'nnen' llnebia' toto yell, llon ake' wzenay be'nn ka' nak rallna'a ake', na' be'nn ka' nak be'nn brao llnebia' ake' leake'. ²⁶Zan bi naken ka' ke re'. cha' notezre lle'nere gakre be'nn brao, llaya'l wxhexjra'llre gakrenre lwellire. ²⁷Na' cha' notezre lle'nere gakre be'nn lliarao, zga'tek llaya'le gakre ka to be'nn wen llin ke be'nn lwellire. ²⁸Ka nakzen kia' nada', Be'nn Gorj Radj Be'nnach, kere za'a nench wzenia'na'a be'nne nada'n, za'a nench wzenia'na' be'nnach, na' llsanra'll kwina' got ake' nada' ni ke xto'l be'nnach.

Jesúsen' bayone' rao chop be'nn lchol

(Mr. 10:46-52; Lc.18:35-43)

²⁹ Na' ka baza'a ake' yell Jericón' be'nn zan ba nao Le'e. ³⁰ Na' chop be'nn lchol zjalli' lloa' nez gan' zayeje' na', na'll ka gokbe'e akre' ba zayej Jesúsen' gan' zjalli' ake'n, na'll besia' ake' ne ake':

- —iXanto', rwe'n nako' xhi'nn dialla rey David! iBaya'chra'llchga neto'!
- ³¹Na' be'nn zan ka' zanao Le'en bdil ake' leake' nench kwe' ake' llize. Na' leake'n yezikre bnne ake' zilljlle:
- —iXanto', rwe' nako' xhi'nn dialla rey David! iBaya'chra'llchga neto'!
- ³²Na'll brexh Jesúsen', na' goxhe' leake' jake' rawe'n, na'll lle'e leake':
- —¿Bixhan' lle'nere gona' ke re'?
- ³³Na'll lle ake' Le'e:
- -Xanto', lle'neto' yere'to'.
- ³⁴Jesúsen' baya'chra'lle' leake', na' bdane' yejrao ake'n, na'll le bare'e aktere', na'll bnao ake' Le'e.

Jesúsen' byoe' Jerusalén

(Mr. 11:1-11; Lc. 19:28-40; Jn.12:12-19)

- **21** Ka ba ll-llin ake' Jerusalén na', na' byej ake' yell dan' nzi'i Betfagé, gan' zo ya' gan' nzi'i Ya' Olivos. Na'll bse'l Jesúsen' chop be'nn ka' non Le'e txhen na', ²lle'e leake':
- —Lechej yell dan' lli' kwite ka'le, na' kat llinre na', na' re're to burr no're da'ba' yay, na' rente to xhi'nnba'. Na' lewsell akba', na' lewche'e akba' ganni. ³Na' chet ka' no bi ye re', na' leyé ake': "Xanto'

San Mateo 21 42

na'n yalljre' leakba'. Kat yeyoll na' le yedsán aktetoba'."

⁴Gok da ki nench bzoa di'll kan' bzoj be'nnen' be'e xti'll Dios kana', bne'e:

⁵ Goll be'nn ka' ni't gan' nzi'i Sión na':

"Lewiakero', ba za'a rey kerén', be'nn maxh da'o nake', na' llie' ko'll to burr da'o. xhi'nn bayi'x ban' lloa' yoa'." ⁶Na'll byej be'nn ka' yell da'on, na' ben ake' kan' goll Jesúsen' leake'. ⁷Na'll bache'e ake' burren' rente xhi'nnba' da'on gan' ze Jesúsen', na'll bxoa no xha ake' ko'llba'n, na'll bllia Jesúsen' ko'llba'n. 8Be'nn zan kwis ben ake' Jesúsen' xhen, na' bchiri no xha ake' tnezen', nench brej burren' len, na' ye bale' bchoy ake' no xho'z yay, na' bni't ake'n tnezen'. ⁹Na' be'nn ka' lliarao, ren be'nn ka' nao ko'llre, llosia' ake' ne ake':

—iBe'nn za'k be'nn ni, nake' xhi'nn dialla rey David! iNak la'y be'nnen' za'a ganni, be'nn bse'l Xanllo Dios! iDowe'rao Diosen'!

¹⁰Na' ka byo' Jesúsen' Jerusalén na', yeolol be'nn ka' lla'a yellen' llabán akre', na'll ne ake':

- —¿Noxha be'nnen' bra' ni lla?

 11 Na'll be'nn ka' za'rén Jesúsen',
 balli'i ake' xti'll ake'n, goll ake'
 leake':
- —Be'nn nin' Jesús, be'nn za'a yell Nazaret gan' nbane Galilea, na' lloe' xti'll Dios.

Jesúsen' bachache' be'nn ka' llon ya'a lia' yoda'o braon'

(Mr. 11:15-19; Lc. 19:45-48; Jn.2:13-22)

¹²Jesúsen' byoe' lia' yoda'o braon', na'll bachache' yeolol be'nn ka' llo't, na' be'nn ka' lla'o. Na'll bllixe' gan' nkwa'a be'nn ka' mell dan' llcha'a ake'n, na' bllo'nne' gan' llbe' be'nn ka' llo't plom da'o. ¹³Na'll lle'e leake':

—Nyoj xti'll Diosen': "Rilla'n, naken yo' ga llaya'l yelwill be'nn nada'", na' re' ba nonren ka broj ke be'nn wan.

¹⁴Na'll zjak be'nn lchol ka', na' ren be'nn xhinnj ka' rawe'n, na'll bayone' leake'. ¹⁵Bixha bxoz wnebia' ka', na' ren be'nn ka' llsedre ke ley dan' bzoj da Moisésen', ka bre'e akre' yel wak dan' llon Jesúsen', goklla'a ake' kwis, na' leska' blla'a ake' ka ben akre' besia' bida'o ka' lla'a do lia' yoda'o ne akbe': "iBe'nn za'k be'nn ni, nake' xhi'nn dialla rey David!" ¹⁶Na'll lle ake' Jesúsen':

—¿Zenro' bin' bne bida'o ka'? Jesúsen' ballie' xti'll ake'n, golle' leake!:

—Bénkzera'. ¿Bi nna wrabre kan' nyoj xti'll Diosen'? Nen:

Ba beno' nench xkwi'd ka', ren bda'on nna lla'll, llon akbe' rwe' xhen kwis.

¹⁷Na'll balloje' gan' lla'a be'nn ka', na' baze'e yellen'. Na' lle' na', go'ye' gan' nzi'i Betania.

Jesúsen' bene' de'e yay higon' da bibi llia

(Mr. 11:12-14, 20-26)

¹⁸Na' tzir bateyó, bago' ake' nez zjayake' Jerusalén na' da yobre. Na' bdon Jesúsen'. ¹⁹Na' bre're' to yay higo zon lloa' nezen', na' jawie' cha' llian daxhix. Na' bibi llian, xhla'yzen' llia. Na' golle' yayen':

—Billbi daxhix kwiakzo'.

Na'll le byechte yayen'. ²⁰Na'll babane be'nn ke'e ka' non Le'e

txhen na', ka bre'e akre' kan' goken, na'll ne ake':

—¿Akre goken le byechte kaze yayen¹?

²¹Na'llen' lle Jesúsen' leake':

—Da li nia' re', cha' gonlira'llre Diosen', na' bi gakgánere, wakse gonre kan' bena' na', na' yech yayen', na' lekze wak yere ya' ni: "Kwas ganni, na' jasó lo nisda'o na'le", na' wakse kan' nneren'. ²²Na' cha' gonlira'llre Diosen', biteze da nnábere Diosen' kat yelwillren', gonnkze'n.

Yel llnebia' ke Jesúsen'

(Mr.11:27-33; Lc. 20:1-8)

²³Na'll Jesúsen' byeje' yoda'o braon' da yobre. Na' ka llroe' llsedre' be'nn ka' lla'a na', le jabi'yte bxoz wnebia' ka', na' ren be'nn gor brao ka', llnebia' yell Israelen', bnnab akre' Le'e:

—¿Bi yel llnebia' napo' llono' da ki? ¿No benn yel llnebia'n llono'n?

²⁴Na'll balli'i Jesúsen' xti'll ake'n, lle'e leake':

—Leska' nada' dekze to da nnabra' re'. Cha' yelli're xti'lla'n, na'll nnia' bi yel llnebia'n llona' da ki. ²⁵Lennechk, ¿noxha bse'l da Juan be'nnen' bchoa be'nne nis? ¿Diosen' bse'l le'e, o cha' be'nnachen'?

Na'll lle lwellj ake':

—Cha' yelloe' Diosen' bse'l le'e, na' ye'e lli'o: "¿Bixchen ke byejle're ke'e cha'?" ²⁶Na' bi gak yelloe' be'nnachen' bse'l le'e, le yeololte be'nne lla'a do ganni llejle' ake' Diosen' bse'l da Juan na', be'e xti'lle'n, na' nxholl bi gon akre' lli'o.

²⁷Na'll balli'i ake' xti'lle'n lle ake' Le'e: —Bi nnézeto'.

Na'll lle Jesúsen' leake':

—Leska' nada' bi yepa' re' bi yel llnebia'n llona' da ka'.

Di'll da be'e Jesúsen' ka ben chop xhi'nn be'nne

²⁸Na' Jesúsen' lle'e leake':

—Lewayakbe'chk bi zejen dan' yepa' re' ni: To be'nne bzo chop xhi'nne', na' golle' tobe': "Xhi'nna', lle'nra' chejo' nna' lla, lljeno' llin gan' nazllo lba uvas ka'." ²⁹Na'll llebe' le'e: "Ka'a, bi cha'a." Na' bdere bayátebe', na'll byejbe'. ³⁰Na'll byeje' gan' zo xhi'nne'n ye to, na'll lle'ebe' kan' gollkze' bi bi'chbe' na'. Bi na' le bchebtebe' llebe' le'e: "Wakse, na' cha'a." Na' bi byejbe'. ³¹Lennechk, ¿norbe' bi ki chop ben kan' gokra'll xabe'n?

Na'll lle ake! le'e:

—Bi nell na!.

Na'll lle Jesúsen' leake':

—Ka naksen. Di'll likze nia' re', be'nn wachixhj ka', na' no'r re'e ka', wyobll wzenay ake' ke Diosen' nnebie' lo ra'llda'o ake' kerke re'.

32 Ka nak da Juan be'nnen' bchoa be'nne nis, badsorene' re' ganni, na' bdixjwe're' re' kan' llaya'l gonre.

Na' bi byejle're ke'e. Na' be'nn wachixhj ka', na' ren no're re'e ka' byejle' ake' ke'e. Bixha re', kate gokbe're kan' ben be'nn ka' ba byejle' ake' ke'e, na' bi bayátere da xhinnj kerén' chejle're ke'e.

Jesúsen' be'e di'll ka ben be'nn wen llin be'nn bi llon wen

(Mr. 12:1-12; Lc. 20:9-19)

³³'Lewzenay ke ye to di'll we'rena' re' ni. Bzo to be'nn goze' chkwe'

xhen lba uvas rao yellrio ke'en, na' bzechje'n re'je. Na' bencha'we' to ga wsie' uvas ka'. Na'll bene' ye to da nak sibe ga lljakwa'a be'nn ka' gap ake' lba uvas ka'.

'Na' bkwa'nne' yellrion' rao na'a be'nn yezie' bi dan' we'en na', na'll bze'e zeje' zi'te. ³⁴Ka bllin lla yezi'i ake' dan' goz ake' na', bse'le' be'nn wen llin ke'e ka' gan' lla'a be'nn ka' none' rallna'a lba uvas ka', nench yezi'i ake' ra't ka to dan' llaya'l yezie'n. ³⁵Bixha be'nn ka' nak rao na'a len na', be'x ake' be'nn ka' bse'le'n, toe' bdin ake' yay, ye toe' bet ake', na' ye toe' bchekw ake' le'e yej. ³⁶Na'll bse'l xan ake'n be'nn zanll ka be'nn nell ka', na' lekze ka' ben akre' be'nn ka'.

37'Na'll bse'le' xhi'nnkze', llakre' xhi'nne' na', wap akebe' bara'nne. 38 Bixha be'nn ka' nak rallna'a lba uvas ka', ka bre'e akre' xhi'nne'n, na'll lle lwellj ake': "Be'nn ni yega'nn ren yellrio ke xe'en kat gate'. Lecho'o lljetlloe' nench yega'nnrenllon lli'o." 39 Na'll be'x ake' le'e, babej ake' le'e gan' lla'a lba uvas ka', na'll bet ake' le'e.

⁴⁰Bayoll be'e Jesúsen' di'll ka', bne'e:

—¿Akxha llákere gon xan yellrion' ke be'nn ka', bkwa'nnrene' lba uvas ke'e ka' kat yellinkze kwine'?

41 Na'll balli'i ake' xti'lle'n ne ake':

—Be'nn wen da xhinnj ka' gote',
na' bi yeya'chra'lle' leake', na'
yeyone' yellrion' rallna'a be'nn
yobre be'nn gon wen, yeyoe' ake'
le'e ka to da llaya'le'.

42 Na'll lle Jesúsen' leake':
— ¿Bi nna wrabre kan' nyoj xti'll
Diosen'? Nen:

Yej dan' bi byo'ra'll be'nn wen yo' ka', gonrén ake' llin, len na' ba naken yej skin.
Da nan' ben Xanllo Diosen', na' naken da yebánello kwis.

43 Ke len na' llepa' re', re' bi llzenayre ke Dios, kwej yichje' re', na' kweje' be'nn yobre be'nn wzenay ke'e, nench nnebie' yichjra'llda'o ake'.

44 Ka nak yejen', noteze be'nn yale' rawen wachje', na' chet ka' bix yejen' ko'lle', wchochjten le'e.

⁴⁵Na' ka bene bxoz wnebia' ka', na' ren be'nn fariseo ka' di'llen' be'e Jesúsen', gokbe'e akre' ke leakse'n bne'e ka'. ⁴⁶Na'll gokra'll ake' go'x ake' Le'e, na' blleb ake' bi gone be'nn ka' leake', le be'nn lla'a rao yell na'n, ba byejle' ake' ke'e, nake' be'nn lloe' xti'll Dios.

Jesúsen' bsa'krebre' ka ke to be'nn ben lnni bchayna'a xhi'nne'

Da yobre be'rén Jesúsen' be'nn ka' di'll lle'e leake':

²—Yel llnebia' ke Diosen', llonen rebe ka dan' gok ke be'nn ni. Bzo to be'nn wnebia' bene' gaxt ka bchavna'a xhi'nne'n. ³Na' bllin lla sorao lnnin', na' bse'le' be'nn wen llin ke'e ka', jalwill ake' be'nn ka' bene' yexh chej ake' lnni na', bixha nono gokra'll chej lnni ke'en. ⁴Na'll golle' ye txhonni be'nn wen llin ke'e ka': "Lelljell be'nn ka' ba bena' yexhen' yed ake', ba bsinia' da gaollo. Ba beta' bayi'x ak ba zerao nak ba xhen. Na' ye akre' yed ake' gaollo dan' ba bsinia' na'." ⁵Na' be'nn ka' bene' yexhen' ben ake' kaze. Toe' byeje' jawie' yellrio ke'e, na' ye toe' byeje' jaxinnje' bi

da go'te'. 6Na' ye bal ake' be'x ake' be'nn wen llin ke be'nn wnebia'n, baso'n ake' zi' ke ake', na' bet ake' leake'. ⁷Na'll ka bene be'nn wnebia'n kan' goken, na' goklle'e. Na' bse'le' waka'a ya ke'e ka' jet ake' be'nn ka' baso't be'nn wen llin ke'e ka', na' bzey ake' rall ake'n. ⁸Na'll golle' be'nn wen llin ke'e ka': "Ba bsinia' dan' gaollo rao lnnin', na' ka nak be'nn ka' bena' yexhen' nakbie' bi za'k ake' yed ake'. ⁹Lechej lelljatá yeolol nez, na' leyé yeolol be'nn yellayre yed ake' lnnin'." 10 Na'll byej be'nn wen llin ka' yeolol nez ka', na'll jatop ake' kon yeolol be'nne badil akre', no be'nn wen, na' ren be'nn wen da xhinni, nench balla'a lo yo' gan' llak lnni na'.

11'Bixha ka byo' be'nn wnebia'n jawie' be'nn ka' lla'a na', na' bre're' to be'nne bi nake' ra'll dan' llaya'l gake' rao lnni na'. 12 Na'll lle'e le'e: "Be'nn nllie'ra', ¿akre gok byo' ganni, le bi nako' ra'll dan' llaya'l gako'?" Be'nn na' bibi ballelre' akre ye'e le'e. 13 Na'll goll be'nn wnebia'n be'nn wen llin ke'e ka', wchej ake' nia'ne'e nench yebej ake' le'e, lljalek ake' le'e gan' nak xchol, na' kwelle' gaoxoxj laye'. 14 Le be'nn zan na' llayaxhe', na' txhonnjze'n llalloj.

Dan' llaya'l gaxhj rao be'nn llnebia' (Mr. 12:13-17; Lc. 20:20-26)

¹⁵Na' be'nn fariseo ka' bdop ake', na' llayirj ake' akren' gon ake', nench kwej ake' Jesúsen' di'll da wde' akre', na' gao ake' xhia ke'e. ¹⁶Na' be'nn fariseo ka', bse'l ake' be'nne nak ake' txhen, na' ren ye bale be'nn llon Herodes txhen, nench jell ake' Jesúsen':

—Maestro, nnézeto' zotezo' lloe'o di'll li, na' llzejnie'ro' be'nne dan' llazra'll Diosen' gonllo, na' bi llwia'o cha' bi ne be'nn ka', le kere llwia'o ka nak yichjrao be'nnach. ¹⁷Ke len na' zadnnábeto' rwe'. ¿Naken wen no chixhj da llaya'l chixhjllo rao be'nnen' nak le zeraoze wnebia', be'nnen' llia Roma, cha' bi naken wen?

¹⁸Na' Jesúsen' bayakbe're' ka da xhinnjen' yo' lo yichjra'llda'o ake' na', na'll lle'e leake':

—Re' be'nn chop rao. ¿Bixchen lle'nere wllixre nada' ren xti'lla'n? ¹⁹Lewroe'chek nada' to mell dan' yixhjren'.

Na'll be'e ake' Le'e to mell dan' nzi'i denario. ²⁰Na'll bnnabe Jesúsen' leake':

—¿Noxha raon' da'a le' mell ni? ¿No ran' nyoj le' ni?

²¹Na'll lle ake' Le'e:

—Ke César be'nnen' nak be'nn wnebia'n lli' Roman'.

Na'll lle'e leake!:

—Da nak ke César lewayoe'n le'e; na' da llaya'l we're Dios, lewe'n Dios.

²²Na'll ka ben akre' ka', babán akre' na' bsan ake', na'll zjayake'.

Bnnab ake' akren' gak kat yebán be'nn wat ka'

(Mr. 12:18-27; Lc. 20:27-40)

²³Na' rao lla na', ballín be'nn saduceo ka' gan' zo Jesúsen'. Be'nn ka' ne bi yebán be'nn wat ka', na'll bnnab akre' Jesúsen', lle ake' Le'e:

²⁴—Maestro, da Moisésen' bne'e, cha' to be'nn byio nchayne'e, na'

San Mateo 22 46

cha' gate', na' nono xhi'nne' so, na' no be'nn bi'che' llaya'l yechayne'e ren no'r wazeben', nench nni't xhi'nn dialla ke bi'che'n. 25 Na' radjto' ni bzo be'nn gok gall bi'che', be'nn nellen' bchayne'e, na' gote' nono xhi'nne' bzo. Na'll be'nn wllope na', bachayna'rene' no'r wazeb na'. 26 Na' leska' gote', na' nono xhi'nne' bzo. Na' leska' gok ke be'nn wyonne na', bllinte yeolol be'nn gall ka', toz ka' gok ke ake'. ²⁷Na' bayoll got yeolol be'nn ka', na'll gotrén no'r na'. 28 Na' kat yebán ake' radj be'nn wat ka', ¿noxhare be'nn gall ka' gak xho're le'e? Le yeololte'n bchayna'rén ake' lele.

²⁹Na'll lle Jesúsen' leake':

—Kreren' llonre dan' nere ka', bi nnézere kan' llia xti'll Diosen' dan' nyojen, bi nombia're yel wak ke'en. ³⁰ Katen' yebán be'nn wat ka', billbi wchayna'a gak, le gak ake' ka angl be'nn zjazó yebá. ³¹ Na' ka nak dan' yebán be'nn wat ka', ¿bi nna wrabre da ni, kan' nyoj xti'll Diosen'? Nen: ³² "Nada' naka' Dios ke Abraham, na' Dios ke Isaac, na' Dios ke Jacob." Le Diosen' bi nake' Dios ke be'nn wat, nakse' Dios ke be'nn ban.

³³Be'nn ka' ndopen' babán akre', ka ben akre' di'll dan' bzejnie're' leake'n.

Dan' nakll da brao llaya'l gonllo

(Mr. 12:28-34)

³⁴Ka bnneze be'nn fariseo ka',
bzoalli Jesúsen' be'nn saduceo
ka', na'll badop ake' jake' rawe'n.
³⁵Na' to be'nn nsed ley dan' bzoj da

Moisésen', gokra'lle' kweje' Jesúsen' di'll, na' lle'e Le'e:

36—Maestro, ¿noren' nakll da
brao dan' nllia Diosen' bia'a gonllo?
37 Na'll goll Jesúsen' le'e:

—"Llie'ro' Dios do yichj do ra'llo' ga zeraoze." ³⁸ Da nin' nak da nell da lliarao gonllo. ³⁹ Na' da wllope na', ka rebze naksen ren da nell na': "Llie'ro' be'nn lwelljo', kan' nllie'ro' kwino'." ⁴⁰ Chop da kin' nllia Diosen' bia'a gonllo, no'xe'n doxhen dan' bzoj da Moisésen', na' dan' bzoj be'nn ka' be'e xti'll Diosen' kana'.

¿No nak dialla Criston'?

(Mr. 12:35-37; Lc. 20:41-44)

⁴¹Na' ndop bllay be'nn fariseo ka', na' bnnabe Jesúsen' leake':

42—¿Bi xhbab llonre ke Criston' be'nnen' brej Diosen' yednnebia'n? ¿No xhi'nn dialla nake'?

Na'll lle ake' Le'e:

-Xhi'nn dialla da rey Daviden'.

43 Na'll lle Jesúsen' leake':

—Cha' ka' naken cha', ¿bixchen kan' broe' Spíritu ke Diosen' Daviden', bne'e Cristo na'n nak Xane'? Na'llen' bzoje' bne'e:

44 Xanllo Diosen' golle' Xana'n: "Blle' kwita' ni nnebia'reno' nada',

na'll gona' yeolol be'nn llwie rwe', wxhexj yichj ake' wzenay ake' ko'o."

⁴⁵¿Na' cha' Daviden' golle' le'e "Xana'", akxha gak nnello nak Criston' xhi'nn dialla da rey David?

⁴⁶Na'll nollno gokse yelli'i xti'lle'n. Na' lla na'te, nollno bayaxhjkze billre nnab akre' Jesúsen'.

Jesúsen' golle' be'nn fariseo ka', na' be'nn ka' llsedre ke leyen' de do'l ke ake'

(Mr. 12:38-40; Lc. 11:37-54; 20:45-47)

Jesúsen' bzorawe' be'rene' be'nn ke'e ka' di'll, be'nn ka' non Le'e txhen na', ren be'nn ka' bllay gan' zoe' na', na' bne'e:

²—Be'nn ka' llsedre ke leyen' na', ren be'nn fariseo ka', ba zjalan ake' lati ke da Moisésen'. ³Na' wzenayre kat we'e ake' di'll, kan' ne xti'll Dios na', na' gonre kan' ne ake'n. Zan bi gonre kan' llon leake'n, le bi llon ake' kan' ne ake' na'. ⁴Le ley ke ake'n naken ka to yoa' zi', da nono soe wa'a, len na' lle'n akre' wa'a be'nn yobre len, na' bi llwa'a ake'n leake', na' ni ke llda'ba'y akze' gon ake' kan' ne ake' na'. ⁵Ka nak be'nn ki yeolol dan' llon ake'n, llon ake'n ga re'e be'nne leake', nench gon ake' leake' xhen. Da xhen non ake' yich ka', nchej ake' do na'a ake', do roxhga ake' gan' llia xti'll Diosen'. Na' da tonn xhen non xha ake'n. ⁶Na' llawé akre' lljache' ake' ga lljache' be'nn brao ka', katen' lljake' ga llak no lnni, na' kat llej ake' yoda'o ke ake'n. ⁷Llawé akre' gap be'nne leake' bara'nne kate llallay akre' leake' do lao ya'a. Na' llawé akre' ye be'nne leake': "Rabí, Rabí" (da ni lle'nen nen be'nn llzejnie' be'nne).

⁸ 'Zan re' bi yewere ye be'nne re' Rabí, le toze nada' Criston' naka' be'nn llzejnie' be'nne. Na' yeololre nakre ka bi'ch lwelljre. ⁹ Na' leska' bi yezre' noteze be'nne: "Xa", le toze Dios be'nnen' zo yebán' nak Xallo. ¹⁰ Na' bi yewere cha' ye be'nne re': "Xana!", le toz nada! Criston' naka! ka be'nn lliarao raore. 11 Cha! nol re' nakre be'nn brao, llaya!l wxhexjra'llre gakrén lwelljre. 12 Le noteze be'nne llayone! xhen kwine!, Dios na! gone! sie! to zdo!, na! be'nne llxhexjra'll rawe!, Dios na! gone! gake! xhen.

13'Zan inya'chraz naken keré llroe' llsedre ke leyen', na' re' be'nn fariseo! iNakre be'nn chop rao! Llonre ka'kze be'nn llsej yebá ke Xanllo Diosen'. Na' ni ke lldez re', na' ni ke lloe'zre latj te be'nn yobre.

14'Na' inya'chraz gak keré llsedre ke ley dan' bzoj da Moisésen', na' re' be'nn fariseo! iNakre be'nn chop rao! Llka're no yo' ke no'r wazeb ka', na' da llde're kat llalwillre Diosen', scha llzere lloe're di'll. Wallayraollre kerke nollre be'nn llon da xhinnj.

15'Na' inya'chraz gak keré llsedre ke ley dan' bzoj da Moisésen', na' re' be'nn fariseo! iNakre be'nn chop rao! Llejteze llejre, lljatirjre be'nn zi'te, be'nn gonrén re' txhen; ke chop rasre wallayrao ake', ka nak bazi'i ake' dan' llroe' llsédere na', na' llak aklle' be'nn wen da xhinnj ka re'.

16'iNya'chraz gak keré! iNakre ka be'nn lchol, be'nn llgo' ye to be'nn yobre nez! Nere noteze be'nne cha' ne'e: "Yoda'o braon' llzoa'n, di'll lin' lloa'a", na' nere kere bi zejen kan' bne'en. Zan cha' ne'e: "Yeolol bi da nak de ya cha'o nzi'i oro dan' de lo yoda'on llzoa'n, di'll lin' lloa'a", na'll nere llaya'l gone' kan' bne'en.

17 iRe' nakre' ka to be'nn lchol bi llejnie're! ¿Llákere cha' dan' nak de ya cha'o dan' nzi'i oro, za'kllen

San Mateo 23 48

kerke yoda'o gan' xhoan nak la'yen' na'? 18 Na' leska' nere cha' to be'nn ne'e: "Rao bkoy gan' llxoa ake' dan' lloe'rao ake' Dios llzoa'n, di'll lin' lloa'a", na' nere bi zejen kan' bne'en. Zan cha' ne'e: "Dan' xhoa rao bkov lo voda'o na', llzoa'n, di'll lin' lloa'a", na'llen' nere llaya'l gone' kan' bne'en. 19 iRe' nakre ka be'nn lchole bi llejnie're! ¿Llákere cha' za'kll dan' xhoa rao bkoyen', kerke bkoy ke Diosen' gan' xhoan nak la'yen' na'? 20 Le cha' to be'nne ne'e: "Rao bkoy dan' zo lo yoda'on llzoa'n, di'll lin' lloa'a", renkze dan' xhoa rao bkoy na', ba llzoe' chet kal nele kal. ²¹ Nal chal beinne nele: "Yoda'on llzoa'n, di'll lin' lloa'a", lekze ka' Diosen' llzoe' chet ka', le na'kzen' zo Diosen'. 22 Na' cha' to be'nn ne'e: "Yebán' llzoa'n, di'll lin' lloa'a", Dios na'kzen' llzoe' chet ka', le na'n zo Diosen' llnebie'.

²³'iNya'chraz gak keré llsedre ke ley dan' bzoj da Moisésen', na' re' be'nn fariseo! iNakre be'nn chop rao! La'kze lloe'tere Diosen' ra't wej toto kwen yi'x da llazre, da ka' nzi'i anis, na' comino, na' menta, na' billre yi'xe, na' llsanra'llre, bill llzenayre ke da ka' nak da lliaraoll gonllo, kan' ne xti'll Diosen' gan' nen llaya'l gonre da nak wen rao Dios, na' llaya'l yeya'chra'llre lwelli be'nnachre, na' llaya'l gonre dan' ba bnere gonre. Na' da kin' nakll da llia bia'll gonre, na' bi kwej yichjre bi we're da ka' lloe'kzre Dios na'. ²⁴iNakre ka be'nn lchol, be'nn llgo' ye to be'nn yobre nez! Rebze llonre ka to be'nne llabej bebe da'o riz yo' loe dan' lle'je'n, na' bi llakbe're' cha' lle'je'n, na' llebe' da xhenll.

²⁵'iNya'chraz naken keré llsedre ke ley dan' bzoj da Moisésen', na' re' be'nn fariseo! iNakre be'nn chop rao! Nakre ka ye'nn da to ko'llze llyibe', bi llyibe' loe. Na' llake be'nne re' nakre be'nn wen, rencha' lo yichjra'llda'oren' zera'llre bi da de ke be'nne, na' llawere llaka'ren. ²⁶ iRe' be'nn fariseo, nchol yichjra'llda'ore! Leyeyate da xhinnj kerén', nench gakre be'nn wen. Na'll gakre ka to ye'nn dan' yibe ko'lle ren loe.

²⁷'iNya'chraz naken keré llsedre ke ley dan' bzoj da Moisésen', na' re' be'nn fariseo! iNakre be'nn chop rao! Nakre ka to ba, da none' nbaraz ko'llre, na' loere lla'n llit ke be'nn wat, na' yeolol da bi nak yall. ²⁸ Ka'n llonren', na' llake be'nn re', nakre be'nn wen, rencha' lo ra'llda'oren' nakre be'nn chop rao, na' be'nn wen da xhinnj kwis.

²⁹'iNya'chraz naken keré llsedre ke ley dan' bzoj da Moisésen', na' re' be'nn fariseo! iNakre be'nn chop rao! Lloncha'ore lloa' ba ke be'nn ka' be'e xti'll Dios kana', na' lloncha'ore lloa' ba ke yezikre be'nn gok be'nn wen. 30 Na' nere: "Chenak lli'o ba zollo kan' bzo xozxta'ollo ka', bi benrén aklloe' txhen, got ake' be'nn ka' be'e xti'll Diosen' kana'." ³¹Na' dan' llonren' llroe'n toz ka naksren' kan' gok da xozxta'ore ka', bet be'nn ka' be'e xti'll Diosen' kana'. ³² iLewzeraochaze legón bi ka da zban ka', bill go'le gon da xozxta'ore ka'!

33'iRe' nakre be'nn zban, na' be'nn wxhiye'e, llonre ka bele! ¿Akre gonre nench gak yerare lo yi' gabil, gan' ba nwia Diosen' wase'le' re'? 34 Ke len na', wse'la' be'nn we'rene' re' xti'lla'n, na' no be'nn si'n, na' nollre be'nn wzejnie're re' xti'lla'n. Na' re' gotre bale', wda'a akre' le' yay cruz, na' ye bale' chintatre do lo yoda'o keré na', na' ye bale' wrayre, lljake' gateze yell. 35 Na' dan' gonre ka', gapre do'l ke yel got ke be'nn wen ka', ba got rao yellrio ni, bxhi'zen kan' brarj xchen da Abel, be'nnen' gok be'nn wen rao Dios, na' bayollten ke da Zacarías xhi'nn da Berequías. Le Zacaríasen' bet xozxta'ore ka' le'e radj yoda'o za llinl-llo gan' zo bkoyen'. 36 Di'll li nia' re', re' nbanre nna', ko'llre xhoa yel got ke yeolol be'nn ka' baso't xozxta'ore ka'.

Jesúsen' gokre kwis ni ke be'nn Jerusalén ka'

(Lc. 13:34-35)

37 'Re' be'nn Jerusalén, llotre be'nn ka' ba bse'l Diosen' lladzejnie're re' xti'lle'n, na' ba bchekwre leake' yej. Da zan ras gokra'lla' yetopa' re', ka llon to bellj ba nche'e xhi'nne, llatobba' leakba' lo xirba'n, na' bi gokra'llre. 38 Na' yell kerén' yega'nnchgan ka to dan' nzanra'll. 39 Na' ni llepa' re', bill re're nada' llinte lla nnere': "Nbaraz ba za'a be'nnen' nse'l Xanllo Diosen' ganni nnebie'."

Jesúsen' bdixjwe're' wllin lla yechinnj ake' yoda'o braon'

(Mr. 13:1-2; Lc. 21:5-6)

Na' ka ba llaza'a Jesúsen' yoda'o braon', zayeje' ga yobre, jabi'y be'nn ke'e ka' non Le'e txhen na' gan' ze'en, na' bzorao llroe' akre' Le'e yoda'on katken'

naken na'. ²Na'll balli'i Jesúsen' xti'll ake'n, bne'e:

—¿Llre're katken' naken na'? Da li nia' re', ni to yej ki zjankwa'a ganni, no'x lwellje bi yega'nnen. Yeololen yeyinnj aken.

Kan' gak kat ba zo rez wayoll yellrion'

(Mr. 13:3-23; Lc. 21:7-24; 17:22-24)

³Na' lli' Jesúsen' rao ya' gan' nzi'i Ya' Olivos, jabi'y be'nn ka' non Le'e txhen na' kwite'n, na' lle ake' Le'e:

—Lle'neto' nnézeto' baten' gak da ka'. Na' ¿akre gak nnézeto' katen' ba zo bawze yedo', na' ba rez yeyoll yellrion'?

⁴Na'll balli'i Jesúsen' xti'll ake'n:
—Lewiá kwasro nono siye'e re'.

⁵Le zan be'nne llach yellrio ni,
be'nn ye'ne wlan ake' latj kia' ni,
na' nne ake': "Nada'n Cristo." Na'
be'nn zan gore siye'e ake'. ⁶Na'
sorao yénere llak wdile do gateze,
na' yénere wak wdile, na' bi llebre,
le ka' llaya'lkze gaken. Na' kere le
wayollte yellrion'. ⁷Le til toto yell,
yell xhen ren ye to yell xhen, na'
kwe' yillwe', na' ga't win, na' xo'
do gateze. ⁸Yeolol da ki gaken, na'
naken ka ga zorao yel lley llra.

9'Na' be'nn ka' lla'a gateze yell, wie akre' re' dan' llonlira'llre nada'n, na' gon ake' re' rao na'a be'nn ka' llwie re', na' wsa'kzi' ake' re', na' got ake' re'. ¹⁰Na' kana' be'nn zan be'nn ba llonlira'll ake' nada', kwej yichj ake' bill gonlira'll ake' nada'. Na' leska' wayechj ake' gon lwellj ake' rao na'a be'nn ka' llwie leake'n. ¹¹Na' be'nn zan siye'e ake' ne ake': "Xti'll Diosen' llyixjwe'ra'", nench siye'e ake' be'nn

San Mateo 24 50

zan. ¹²Na' ka naken ba llak da ke nxhia na', be'nn zanll be'nn ka' yeso'n da xhinnjen', na' wsan ake' bill llie' lwellj ake'. ¹³Na' noteze gonzidra'lle, na' bi kwej yichje' dan' llonlira'lle' nada'n llinte gate', le'en yerá. ¹⁴Na' lljak be'nne doxhen yellrion', lljatixjwe' akre' Di'll Wen na', nench nneze be'nnachen' llaya'le wzenaye' ke Dios, nench nnebie' lo ra'llda'o ake'n, na' kate ba bnneze be'nne lla'a do gateze, kana'llen' yeyoll yellrion'.

¹⁵'Daniel be'nnen' bdixjwe're xti'll Diosen' kana', bzoje' ke da zban kwis, dan' wxinnj latjen' gan' llonlira'll-llo Diosen'. Na' kat re're ba bllin dan' gan' zo yoda'o braon' (be'nne llrabe da ni llaya'le chejnie're'n), ¹⁶kana' be'nn lla'a gan' nbane Judea, llaya'l wxhonnj ake' lljake' do ya' da'ore. 17 Na' be'nn dá do yichjo ke'e, bi yeyetje' yetop xchinraze da de lo yo' rille'n. ¹⁸Na' be'nn dá yi'xe, bi yeyeje rille' lljaxhie' xhara'ne. 19 iNya'chraz naken ke no'r ka' nna noa' bda'o. na' no'r ka' llwa'll bda'o lo lla na'! ²⁰Lennabe rao Dios bi wxhonnjre kat llak zay, na' rao lla nba'nne. ²¹Le wa't yel zi' yel ya', ka bi nna ga'ten rao yellrio ni, na' yeyoll na', billbi ga'te ye to ka len. ²²Na' chenak Xanllo Diosen' bi yeza'che' llan' gak ka', nono yerakze; zan waza'che'n, ni ke dan' nllie're' be'nn ka' ba breje' llonlira'll Le'e na!.

²³'Kana' cha' no ye re': "Lewiá, ni zo Criston' be'nnen' brej Diosen' nnebie'", na' "Lewiá, na' zoe'", bi chejle're. ²⁴Le chas be'nn wxhiye'e, be'nn gakra'll ake' wlan ake' latj kia' ni, na' gon ake' ka be'nn lloe' xti'll Dios. Na' gon akte' yel wak da re'e be'nne, na' billre da yebán akre', nench siye'e ake' leake'. Na' rente be'nn ka' ba brej Diosen' nak Xhi'nne', ye'ne be'nn wxhiye'e ka' siye'e ake', cha' gak siye'e ake' leake'. 25 Ba nnézere kan' gaken, le bakze bdixjwe'ra' re' yeolol dan' gaken. 26 Na' cha' no ye re': "Latj dach na' zo Criston'", bi chejle're, na' cha' ye ake' re': "Zot Criston' lo yo' na'", bi chejle're ke ake'. ²⁷Kan' llak kat llep yes llseni'n doxhen le' yebán', lekze ka'n gak kat llin lla yeda' da yobre, nada' Be'nnen' Gorj Radj Be'nnach yeda' da yobre, na' veolol be'nne re'e akre' nada'. ²⁸Ni llonen ka ke be'nnen' ne: "Gan' de ba wat na'n ll-llay chod ka'."

Kan' gak kat yed Jesucriston' da yobre

(Mr. 13:24-37 : Lc. 21:25-33 : 17:26-30, 34-36)

²⁹'Na' kat yeyoll yel llza'kzi' ke be'nnachen', willen' yeyaken xchole, na' beon' bill wseni'n, na' berj ka' ra'll aken le' yebán', na' yeolol da llre'llo le' yebán', gak aken ka llak yellrion' kat llxho'. 30 Kana'll be'nn lla'a yellrion' re'e akre' nada' Be'nnen' Gorj Radj Be'nnach, llia' radi bej ren yel wak xhen kia'n ren yel be'nn za'k kia'n, na' be'nn lla'a gateze yell ka' zjalla'a rao yellrion' kwell ake' kwis. ³¹Na' katen' yeda'n, kwell to trompet zillje, na' llach angl kia' ka', yetop ake' be'nn ka' doxhente yellrio, be'nn ka' ba breja' nak ake' nada' txhen doxhente yellrio, na' ga zeraoze nak zi'te.

³²'Lewzenay ke wsa'krebra'n ka to yay higo: Kate llaga' xhla'yen',

llaga'n la'y lle'ne, ba nnézere ba zo nez yera' yej. ³³Na' leska' kat re're ba llak da ke nxhia, ka'n ba bnia' na', kana'll nnézere ba zo rez yeda' da yobre. ³⁴Da li nia' re', be'nn ka' lla'a nna', nna nban akte' kate sorao gak da ki. ³⁵Ka nak yebán' ren yellrion' wllin lla kat te ke, zan ka nak xti'lla'n kere da te ke ka'zen'.

³⁶'Zan nono nneze bi llan', bi horen' gak ka', ni angl ka' ni't yebá na', ni nada'. Toze Xa' Dios na' nnezre'.

³⁷'Kan' gok ka llan' bzo da Noén', kan' gakse katen' yeda' nada' da yobre, naka' Be'nn Gorj Radi Be'nnach. 38 Le kan' gok kan' za yerabj ake' nisen', kan' bzo da Noén', lla'a ake' lle'j llao ake', na' llchayna'a ake' lloe' ake' yel wachayna'a ke no xhi'nn ake', nna llon akte' ka'n bllin lla byo' da Noén' lo barcon'. 39 Ni ke gokbe'e akzre' bin' gak, ka gokll yejsi'o xhen na', na' babia nisen', kana'll gokbe'e akre'. Lekze ka'n gakze kat yeda' da yobre, kana'llen' yeyakbe'e akre'. 40 Kana'n chop be'nn ni't yi'xe, toe' yezia' na' ye toe' yekwa'nna'. ⁴¹Na' chop no're ze llot ake', toe' yezia' na' ye toe' yekwa'nna'.

⁴²'Ke len na' lesó lekweze, le bi nnézere bi lla ya'nne yeda' da yobre, nada'n naka' Xanre. ⁴³Legón xhbab ke da ni, cha' nneze xan yo'n do bi hor ya'nnen' llin be'nn wan na' rille'n, na' bi taskze' nench bi we'e latj cho' be'nnen' rille'n kwane' xchinraze'. ⁴⁴Ke len na', lesó lekweze batkren' yeda' da yobre, le katen' bi llonre xhbab yeda', kana'n yeda' nada', Be'nnen' Gorj Radj Be'nnach.

Be'nn wen llin bi llon wen (Lc. 12:41-48)

45'Notezre cha' zore rez batteze, nakre ka to be'nn wen llin be'nn nak be'nn si'n, na' be'nn llon da llaya'l gone'. Na' cha' to be'nn wen llin llone' wen kwis, na'll gon xane'n rallne'e rille'n, na' we'e da yesa'o be'nn wen llin ka', kat llaya'l gao ake'. 46 Na' cha' be'nn wen llin ke'en, llonteze' kon kan' goll xane'n le'e, nbaraz soe' kat yellín xane'n. ⁴⁷Di'll li nia' re', xane'n gone' rallne'e yeolol da de ke'e. 48 Zan cha' nake' be'nn wen llin xhawatraz, na' gone' xhbab ne'e: "Ba ll-llere xana'n, bi yeyedze'." 49 Na'll sorawe' tilrene' be'nn lwellje' ka', na' ye'j gaoxene' ren nollre be'nn wazó. ⁵⁰Na'll yellín xane'n to lla bi nnezre', na' yedo'lre' le'e. 51 Na' dan' bi llone' wen na', xane'n chintate' le'e, na' lljazoe' le'e radi be'nn chop rao ka', ganna' lljallell ake' to gaoxoxi lay ake'.

Jesúsen' bsa'krebre' kan' ben chi no'r we'o

Leska' bne Jesúsen':

—Nna' wa'a di'll kan'
gak kat nnebia' Dios, be'nnen' zo
yebán', llonen rebze kan' gok ke
chi no'r we'o. Na' zjano'x ake' twej
da llseni' ke ake', jake' jalexh ake'
yelloj be'nn byion' llchayna'n. ²Na'
ga'y no'r ka' bza'a nak ake' be'nn
llejnie', na' ye ga'ye nak ake' be'nn
xhawatraz. ³No'r xhawatraz ka'
bi be'x ake' lmet ceit da gonrén
ake' llin, kat yebill dan' yoll lo
dan' llseni' ke ake'n. ⁴Na' no'r ka'
llejnie'n, no'x ake' da wseni' ke
ake'n, rente lmet ceit da gonrén

San Mateo 25 52

ake' llin, kat yebill dan' yoll lo dan' llseni' ke ake' na'. ⁵Na't blle wachayna'n, na' no'r ka' brezen' btas ake' chak bez ake'n. 6Na' to be'nn bnne'e zilli, ka do llere lle'e leake': "Ba llalloj wachayna'n, lecho'o lljenrenlloe' txhen." ⁷Ka golle' leake' ka', yeolol no'r ka' bazella', na'll bayoncha'o ake' dan' llseni' ke ake'n. ⁸Na' no'r xhawatraz ka', lle ake' be'nn ye ga'y ka': "¿Bi gonn ra't ceit kerén' neto'? Le ba llabill keto' ni." ⁹Na' no'r ka' lle ake' leake': "Bi gak gonnto'n, le nxholl bi gaken ke yeolol-llo. Zan lelljaxi'n gan' llo'te'n." 10 Bixha no'r xhawatraz ka', jake' jaxi'i ake' ceiten'. Na' chak ziake' na'le, ballín be'nn wachavna'n, na' no'r ka' non xhniden', bayo'rén ake' le'e txhen gan' llak lnnin', na' be'nn wen llin ka' basej akte' yo'n. 11 Ka ballín no'r ka' bi ben xhniden', jazé ake' lloa' vo'n, na' llnne ake' be'nn ka' lla'a lo yo'n: "iBe'nne, bsarje ganni cho'to'!" ¹²Na' le'en lle'e leake': "Di'll li nia'. bi wsaria' cho're le bi nombia' re'."

¹³Na'll lle Jesúsen' be'nn ke'e ka' non Le'e txhen na':

—Kan' llaya'l sore rez baten' yednnebia', le bi nnézere bi llan', na' baten' yeda' yellrio ni da yobre, nada' Be'nn Gorj Radj Be'nnach.

Jesúsen' bsa'krebre' ka ben to be'nn bkwa'nnrene' be'nn wen llin ke'e ka' mell ke'en

¹⁴'Yel llnebia' ke Diosen' be'nnen' zo yebán', llonen ka ke to be'nne byeje' to yell zi'te. Na' llan' bze'e na', goxhe' be'nn wen llin ke'e ka', na' bkwa'nne' rallna'a ake' xhmelle' da nape'. ¹⁵Toe' bkwa'nnrene' le'e

ga'y mellen' nzi'i talento. Na' ye toe' bkwa'nnrene' le'e chop mellen'. Na' be'nnen' ye to bkwa'nnrene' le'e to mellen'. Kon kan' llwie' llon totoe' be'e leake'. Bayoll na' bze'e broe' nez. ¹⁶Na' be'nnen' bkwa'nnrene' ga'y mell na', le bzoraote' llonrene'n llin, na' bene' gan lekze ye ga'yen. ¹⁷Lekze ka' be'nnen' bkwa'nnrene' chop mellen', na' bene'n gan ye chopen. ¹⁸Na' be'nnen' be'e ye to mellen', byeje' jakwa'che' xhmell xane'n ga bche'nne' lo yo.

¹⁹'Gok scha kat ballín xan ake'n. na'll goxhe' leake', nench na' wannabe' dan' bkwa'nne' rallna'a ake'n. 20 Na' bllin be'nn wen llin ke'e be'nnen' bkwa'nnrene' ga'v mellen', na'll lle'e le'e: "Xana', ni de ga'y mellen' benno' nada', na' ba bena' gan ye ga'yen." ²¹Na' xane' na', lle'e le'e: "Ba beno' da wen. Nako' be'nn wen llin wen. ba beno' ka llaya'l gono' kone da da'on bkwa'nnrena' rwe'n. ke len na', gona' rallna'o da xhenlle. Byo' nench soreno' nada' nbaraz." ²²Na'll ka bllin be'nnen' bkwa'nnrene' chop mellen', na'll lle'e le'e: "Xana', ni de da chop mell dan' bkwa'nno'n, na' bena' gan ye chopen." ²³Na'll lle'e le'e: "Da wen beno' nako' be'nn wen llin wen. Ba beno' ka llaya'l gono' kone da da'on bkwa'nnrena' rwe'n. Na' nna' gona' rallna'o da xhenlle, byo' nench soreno' nada' nbaraz." 24 Na' ka bllin be'nnen' bkwa'nnrene' to mellen', na'll lle'e xane'n: "Ni de xhmello'n bkwa'nnreno' nada'n. Nnezra' nako' to be'nn znia, na' llarapo' to ga goz be'nn yobre, na' llatopo' ga goz be'nn yob

akre. ²⁵Ke len na', jache'nna' lo vo, na' bkwa'cha' xhmello'n, le blleba' wnita'n. Ganni de xhmello'n, bazi'n." 26 Na'll lle xane'n le'e: "iBe'nn wen llin ke nxhia, be'nn ria! Nnéztero' llarapa' ga goz be'nn yobre, na' llatopa' ga goz be'nn vobre. 27 Na' cha' nnéztero' ka', ¿bixchen ke brejo' xhmella'n be'nn yobre, nench yezia'n, na' ren yichje da gonen gan?" 28 Na'll golle' be'nn wen llin ka' yela': "Leyeka'a mell dan' bkwa'nnrena' be'nn ni, na' we'rén be'nnen' ba no'x chi mell na'. ²⁹Le noteze be'nn gon wen kone dan' we'e xane'n le'e, na' xane'n we'lle' le'e da xhenlle. Na' noteze be'nne bi llonrene' llin dan' we'e xane'n le'e na', xane'n yeke'e da da'on be'e le'en. 30 Na' ka nak be'nn wen llin ria ni, leyebeje' lewza'le' gan' nak xchole, na' lljachelle' na' gaoxoxi laye'."

Jesúsen' gone' yel koxchis ke yo'y yell

³¹ 'Katen' yeda' da yobre nada'n Be'nnen' Gorj Radj Be'nnach, nsa'a yel za'k xhen kia'n, na' nchia' yeolol angl kia' ka', na' kwia' gapa' yel llnebia' xhen. ³²Na' be'nn ke yeolol yell, yedop ake' rawa'n. Na' kat ba ni't yeolole'n, na' sorao yela' ake', ka llon to be'nn gop xhi're, kat llabeie' to kere xhi'r ka', na' kere chib ka'. 33 Na' be'nn ka' nak ka xhi'r da'o, wni't ake' kwita'n chla' cha'we, na' be'nn ka' nak ka chiv, wni't ake' kwita'n ye chla' rbese. 34 Na' nada' naka' rey yepa' be'nn ka' ni't chla' cha'wen': "Ba ben Xa' Diosen' sore nbaraz, ledá ganni nench nnebia'renre nada', kan' ba

nllia Diosen' bia'a, kan' bxhe yellrio na'te. 35Le ka bdona', bennre da bdawa'; na' wilra' nis, na' bennre da we'ja'; na' ka goka' be'nn zi'te, na' brebre nada' rillre. ³⁶Na' ka bi de xhara'na', na' bennre da goka'; na' ka goka' yillwe', na' badra'nnre nada'; na' ka byoa' rill ya, na' badwiare nada'." 37 Na' be'nn wen ka' ye ake' nada': "Xanto', ¿bat bre'to' rwe' dono', na' bennto' da bdao'? Na' ¿baten' wilro' na' bennto' da we'jo'? 38 Na' ¿baten' goko' ka be'nn zi'te na' brebto' rwe' rillto'? Na' ¿baten' bre'to' rwe' bi de xhara'no' na' bennto' da goko'? ³⁹Na' ¿baten' goko' yillwe' na' byo' rill ya, na' badwiato' rwe'?" 40 Na'll yep ake': "Da li nia' re, ka nak baya'chra'llre be'nn lwelljre ka', le leake'n nak ake' ka bi'cha', ka zana', la'kze bibi za'k akteke' rao be'nnach, nadkza'n baya'chra'llre."

41'Na' be'nn ka' ni't ye chla' rbesre, yep ake': "Lekwas ka'le, ba llia bia'a keré kweyi're, lelljayak lo yi' gabil, dan' bi llayolkze gan' ba nak xhnid ke daxi'on ren angl ke ka'. 42 Le ka bdona', bi bennre da gawa', ka wilra', na' bi bennre da ye'ja'. 43 Ka goka' be'nn zi'te, bi bennre ga tasa'; ka bi de xhara'na', bi bennre da gaka'; ka goka' yillwe', na' ka byoa' rill ya, bi badra'nnre nada'." 44 Na'll nne ake': "Xanto'. ¿baten' bi baya'chra'llto' rwe', ka bdono', na' wilro', na' goko' be'nn zi't, na' bi de xhara'no' na' goko' yillwe', na' byo' rill ya?" 45 Na'll yep ake': "Da li nia' re', dan' bi baya'chra'llre be'nn lwelljre ka', la'kze bibi za'k ake' rao be'nnach, renkze nada'n bi baya'chra'llre."

⁴⁶Na'll sa'kzi' be'nn wen da xhinnj ka' ke chnare, na' be'nn wen ka' so akse' nbaraz ke chnare.

Llayirjla'll ake' akre gon ake' go'x ake' Jesúsen'

(Mr. 14:1-2; Lc. 22:1-2; Jn.11:45-53)

26 Bayoll be'e Jesúsen' di'll ka', golle' be'nn ke'e ka' non Le'e txhen na':

²—Ba nnézere ye chop llazen', llin ga'le lnni Paskw kellon'. Na' kana' gaka' rao na'a be'nn ka', na' wda'a ake' nada' le' yay cruzen', nada' Be'nn Gorj Radj Be'nnach.

³Na'll badop yeolol bxoz wnebia' ka', na' ren be'nn ka' llsedre ke ley dan' bzoj da Moisésen', na' ren be'nn gor brao ka' llnebia' yell Israelen', gan' zo rill bxoz braon', be'nnen' re Caifás. ⁴Llayirjla'll ake' akre gon ake' siye'e ake' Jesúsen', nench go'x ake' Le'e, na' got ake' Le'e. ⁵Na' llasné ake':

—Bi go'xlloe' rao lnni na', nench ke gakbe'e be'nn zan, na' gon ake' dá nne.

To no'r bwazje' ceit xhix yichj Jesúsen' (Mr. 14:3-9 : Jn.12 :1-8)

⁶Na' zo Jesúsen' gan' nzi'i Betania, rill Simón be'nnen' gok yillwe' dan' ne lepra. ⁷Na' chak lli' Jesúsen' llawe' na', bllin to no'r no'xe' to lmet da yoll ceit da la' xhix, na' za'ken da xhen. Na' bwazjtite'n yichj Jesúsen'. ⁸Na' be'nn ka' non Jesúsen' txhen, bre'e akre' kan' ben no'ren', na'll goklla'a ake' bne ake':

—¿Bixchen kon benditjere' ceit xhix ni? ⁹Chenak be'tllon, na' ga't mell xhen chenake, na' we'llon gakrenen be'nn ya'ch. ¹⁰Jesúsen' benre' kan' bne be'nn ka', na'll lle'e leake':

—¿Bixchen nere ka' ke no'ren'? Da wen na' bene' kia' ganni. ¹¹Be'nn ya'ch ka', ni't akse' batteze ni'trén ake' re', zan nada' bill zorena' re' ye scha. ¹²Bwazje' nada' ceit xhixen', nench kat ga'cha'n, ba naktia' xhnid. ¹³Di'll li nia' re', doxhen yellrio do gateze lljatixjwe' be'nn Di'll Wen dan' llzejnie' kia'n, dekz de yene be'nn ka', kan' ben no'r ni, nench lljadinra'll ake' le'e.

Judas bchebe' gone' Jesúsen' rao na'a bxoz wnebia' ka'

(Mr. 14:10-11; Lc. 22:3-6)

¹⁴Na' to be'nn chllinn ka', be'nnen' nzi'i Judas Iscarioten', byeje' jawie' bxoz wnebia' ka'. ¹⁵Na' jelle' leake':

—¿Bi gonnre nada' nench wdia' Jesúsen' rao na're?

Na'll le be'e akte' le'e chilloa (30) mell plat. ¹⁶Na'llen' le bzoraote Judasen' bayirjla'lle' akre gone', wdie' Jesúsen' rao na'a be'nn ka'.

Jesúsen' broe're' kan' gon ake' lljasa'ra'll ake' yel got ke'en

(Mr. 14:12-25; Lc. 22:7-23; Jn.13:21-30; I Cor. 11:23-26)

¹⁷Bllin lla nell lla'l lnni, katen' llao ake' yet xtir dan' bi nchix kwa binn, na' be'nn ka' non Jesúsen' txhen, jake' gan' zoe', na' lle ake' Le'e:

—¿Garen' lle'nro' lljasinia'to' gan' gaollo xche' ke Paskwn'?

¹⁸Na'll lle Jesúsen' leake':

—Lelljak yellen', na' leyé to be'nnen': "Maestron' ne'e, ba rez llin lla gak dan' llaya'l gak ke'en, na' rillo' ni, lle'nre' gaorentoe' xche' lnni Paskwn'."

¹⁹Na'll ben be'nn ka' kan' goll Jesúsen' leake'n, na' jasinia' ake' ke lnni Paskwn'.

²⁰Na' ka ba llen willen', blle'rén Jesúsen' be'nn chllinn ka' non Le'e txhen na', na' bdao ake'. ²¹Ka lli' ake' llao ake' na', lle Jesúsen' leake':

—Di'll li nia' re', to re' wdere nada' rao na'a be'nn ka' llwie nada'.

²²Na'll gokya'ch akre' ga zeraoze, na' bzorao twej twej ake' llnnab akre' Le'e:

—Xanto', ¿nada'n gona' ka'?

23 Na'll lle'e leake':

—To be'nnen' llaorén nada' txhen toze ye'nne, le'en wde nada' rao na'a be'nn ka'. ²⁴Ka nak nada', Be'nn Gorj Radj Be'nnach, ka nyojkze kia'n got ake' nada', zan inya'chraz naken ke be'nnen' gon nada' rallna'a be'nn ka'! Wenre chenak bi bzokze' yellrion'.

²⁵Na' Judas be'nnen' wde Jesúsen' rao na'a be'nn ka', lle'e Le'e:

—Maestro, ¿nada'n wdia' rwe' rao na'a be'nn ka'?

Na'll lle Jesúsen' le'e:

—Awa', rwe'n.

²⁶Na' ka llao ake' na', bxhi'i Jesúsen' to yet xtir na', na' bayoll be'e yel llioxken ke Dios na', bxhoxhje'n, na' be'en be'nn ke'e ka' non Le'e txhen na', na' lle'e leake':

—Lesi'n, legaon, da nin' nake kwerp kia'n.

²⁷Na'll bxhie' to leo da'o gan' yoll xis uva, na'll be'e yel llioxken ke Dios, na' be'en leake', lle'e leake':

—Yeololre, leye'j ra't weje dan' yoll lo leo ni. ²⁸Da nin' xchena', na' larjen ni ke do'l xhia ke be'nnach. Na' larjen nench sorao gak da koben', dan' bcheb Diosen' gone' gakrene' be'nnach. ²⁹Na' nia' re', bill ye'ja' xis uvan', llinte lla kat ba zollo txhen gan' zo Xa' Diosen' llnebie', kana'll yeye'ja'n da yobre.

Jesúsen' bne'e kan' gon Pedron' bi wchebe' cha' nombie' Le'e

(Mr. 14:26-23; Lc. 22:31-34; Jn.13:36-38)

³⁰Bayoll bel ake' ben ake' xhen Diosen', na'll bza'a ake' jake' rao ya' gan' nzi'i Ya' Olivos. ³¹Na' lle Jesúsen' leake':

—Nna' lle', yeololre gakgánere kan' gak kia'n. Le nyojkzen le' xti'll Diosen' llian: "Gota' be'nn gop xhi'ren', na' xhi'r ka' gaslas akba'." ³²Na' kate yesbán Diosen' nada' radj be'nn wat ka', wyobll yellina' nada' Galilean' ka re'.

³³Na'll lle Pedron' Le'e:

—La'kze yeolol be'nn ki wsanra'll ake' rwe', zan nada' bi wsanra'llkza' rwe'.

34 Na' lle Jesúsen' le'e:

—Di'll li kwis nia' rwe', ka za kwellre lekwn' nna' lle', chonn ras ba gok bi wchebo' cha' nombia'o nada'.

35 Na'll Pedron' lle'e Le'e:

—La'kze cha' gatrena' rwe', kbat nnia' bi nombia' rwe'.

Na' lekze ka' goll be'nn ka' yela' Le'e.

Jesúsen' balwille' Diosen' lo re'j gan' nzi'i Getsemaní

(Mr. 14:32-42; Lc. 22:39-46)

³⁶Na'll bllin ake' gan' nzi'i Getsemaní, na' lle Jesúsen' be'nn ka' non Le'e txhen na':

—Gannize lekwe', chak cha'a nada' ganna'te, yelwilla' Diosen'.

³⁷Na'll bche'e Pedron' ren ye chop xhi'nn Zebedeo, bi ka' nzi'i Jacobo San Mateo 26 56

ren Juan. Na' Jesúsen' bzorao llakya'chre' kwis. Na'll billbi wen bzokze'. ³⁸Na'll lle'e leake':

—Lo yichjra'llda'wa' ni, llakya'chra' kwis, llakra' kon gatkza' kateken' llallayrawa' ni. Na' nize leyega'nne, lewnna' ren nada' yere bi tasre.

³⁹Na'll blliarawe' ye ra'te, na'll je'te' rao yon' slloa're, na'll balwille' Diosen', bne'e:

—Xa, cha' wak ten ka'ze, benchga bi sa'kzia', na' bi gak kia' kan' ba zo gak na'. Zan bi llnnaba' gak da nnia' nada', kon ka' ne'o rwe'n gakchga.

⁴⁰Na'll bayeje' gan' zjalli' be'nn ka' chonne, na' jadi're' tas be'nn ka'. Na' lle'e Pedron':

—¿Ni choll da'o bi gok wnna'renre nada' yere? ⁴¹Bi tasre, lewalwill Dios nench ke gon da xhinnjen' re' gan. Nnezra' lo yichjra'llda'oren' lle'nere wnna'renre nada' yere, na' kwerp kerén' bi zoen.

⁴²Na'll bze'e da wllop ras gan' zjalli' ake'n na' jalwille' Diosen', bne'e:

—Xa, cha' gak ten ka'ze, benchga nench bi sa'kzia', na' gakchga kon kan' ne'o rwe'.

⁴³Na'll bayeje' gan' lli' be'nn ka' da yobre, na' jadi're' tas ake' lliacha' bichgalen' ko'll rao ake'n. ⁴⁴Na' bze'e da yobre gan' lli' ake'n jalwille' Dios da wyonn ras, na' bne'e kan' ba bnekze' na'. ⁴⁵Na'll balline' da yobre gan' zjalli' be'nn chonn ka', na'll lle'e leake':

—iLetas, lewazi'ra'll! Ba bllin lla, nada', Be'nn Gorj Radj Be'nnach, gaka' rallna'a be'nn wen da xhinnj ka'. ⁴⁶ iLewayas, lewayo'o! Ba za'a be'nnen' gon nada' rao na'a ake'n.

Kan' gok kan' be'x ake' Jesúsen' (Mr. 14:43-50; Lc. 22:47-53: Jn.18:2-11)

⁴⁷Nna lloe'te Jesúsen' di'll ka', kat bllinkze Judasen', be'nnen' gok txhen ren be'nn chllinn ka'. Na' nche'e be'nn zan kwis zjano'x ake' no yay, no spad, be'nn bse'l bxoz wnebia' ka', na' be'nn gor brao ka' llnebia' yell Israelen'. ⁴⁸Na' Judas be'nnen' bde Le'e rao na'a be'nn ka', golle' leake' akren' gone' wroe're' non' go'x ake', na' bne'e:

—Be'nnen' wno'pa' na', lekze'n Jesúsen', na' le go'xtere'.

⁴⁹Na'll le jabi'yte' kwit Jesúsen', lle'e Le'e:

-Padiox, Maestro.

Na' le bno'pte' Le'e. ⁵⁰Na' Jesúsen' lle'e Le'e:

—Be'nn nllie'ra', ¿bi ken za'o ganni?

Na'll le jabi'yte be'nn zan ka', be'x ake' Jesúsen', na'll le bche'e akte' Le'e.

⁵¹Na' to be'nn nak Jesúsen' txhen, le brejte spad ke'en, bdine'n be'nnen' nak be'nn wen llin ke bxoz braon', bchoyte' chla' naye'. ⁵²Na'll lle Jesúsen' le'e:

—Bago' spad ko'on lo rille, le be'nn gote' be'nn kone spad na', lekze len goten le'e. ⁵³¿Bi nnezro' wakse nnabra' Xa'n, wse'le' angl zan kwis be'nn gakrén nada' chenake? ⁵⁴Zan cha' ka' gona', ¿akxha gak dan' llaya'l gaken dan' nyoj xti'll Diosen' nen kin' gak?

⁵⁵Na'll lle Jesúsen' be'nn ka' zje'x Le'en:

—¿Bixchen nonre nada! ka to be'nn wan, na! za're zadxi're nada! kone spad na! ren yay? Rencha!

yeo lla blle'kza' lo yoda'o braon', bzejnie'ra' be'nne lla'a na', na' bi be'xre nada'. ⁵⁶Na' dan' llak ki, llzoa di'll kan' nyoj xti'll Diosen', dan' bzoj be'nn ka' be'e xti'll Dios kana'.

Na'll yeolol be'nn ke'e ka' non Le'e txhen na', bxhonnj ake' brej yichj ake' Le'e.

Bche'e ake' Jesúsen' gan' gak yel koxchisen'

(Mr. 14:53-65 : Lc. 22:54-55, 63-71 ; Jn.18 :12-14, 19-24)

57 Na' be'nn ka' be'x Jesúsen', bche'e ake' Le'e rao Caifás, be'nnen' nake bxoz brao, gan' ba ndop be'nn gor brao ka' llnebia' yell na', na' ren be'nn ka' llsedre ke ley dan' bzoj da Moisésen'. 58 Na' Pedron' nawe' zi't zi'tre, bllinte' rill bxoz brao na', na' byoe' na' bllie' lia' na'ze ren be'nn ka' llap yoda'o brao na', le gokra'lle' re're' akren' gak ke Jesúsen'.

⁵⁹Na' yeolol bxoz wnebia' ka', na' yezikre be'nn gor brao ka' llnebia' yell na', llayirjla'll ake' bi di'll wenra'llen' wxoa ake' ko'll Jesúsen', nench got be'nn ka' Le'e. ⁶⁰Na' gok scha, bi ballel akere' billre wlliayi'll ake' Le'e, la'kze be'nn zan lla'a lloe' ake' di'll wenra'llen'. Llakte ka'n bllin chop be'nn wxhiye'e ake, bxoa ake' do'l ko'll Jesúsen'. ⁶¹Na' bne ake'

—Be'nn ni bne'e: "Nada' wachinnja' yoda'o brao ke Diosen', na' chonn llaze wayontia'n."

⁶²Na'll bzolla'a bxoz braon', lle'e Jesúsen':

—¿Bibi de nne'o, ka nak dan' lllliayi'll be'nn ki rwe'n? ⁶³Bibi bnekze Jesúsen'. Na'll lle bxoz braon' Le'e:

—Dios na' llzoa', bnne neto', cha' da lin' nako' Cristo be'nnen' nak Xhi'nn Dios.

64 Jesúsen' lle'e le'e:

—Naksen kan' nere, leska' nia' re', wllin lla re're nada', Be'nnen' Gorj Radj Be'nnach, llia' kwit Diosen' be'nnen' nape le zerawe yel wak xhen, na' nnebia'rene', na' re're yetja' le' yebán' radj bejen'.

65 Ka bene bxoz braon' xti'll Jesúsen', le bche'zte xhe'en, nench broe're' da xhinnj kwisen' bne Jesúsen' ka'. Na'll bne'e:

—Nna' ba bénere kan' bnne'e ke Diosen', nna' nollno yálljello gao xhia ke'e. 66 ¿Akxha nere ke'e nna'?

Na'll balli'i be'nn ka' xti'lle'n ne ake':

—Llaya'l gate'.

⁶⁷Na'll blli' ake' xhe'n lloa' rawe'n, na' bra'll ake' Le'e, na' bale' bro' ake' ke xa'ye. ⁶⁸Na'll lle ake' Le'e:

—Cha' rwe'n nako' Cristo, banneya'chk, ¿non' bra'll rwe'?

Pedron' bi bchebe' cha' nombie' Jesúsen'

(Mr. 14:66-72; Lc. 22:56-62; Jn.18:15-18, 25-27)

⁶⁹Na' lli' Pedron' lia're, ka bllinkze to no'r wen llin ke Caifásen', na' golle' le'e:

—Renkze rwe'n nako' Jesúsen' txhen, be'nn Galilea na', ke.

70 Na'll bi bcheb Pedron' rao yeolol be'nn ka' zjalla'a na', cha' nake' Jesúsen' txhen, na'll lle'e no'ren':

—Bi nnezra' bi di'llen' lloe'o.

⁷¹Na'll le llallojte Pedron' lloa' yo'n, ka bre'e ye to no'r wen llin na' le'e, na'll lle'e be'nn ka' lla'a na':

—Renkze be'nn nin' nake' txhen Jesús be'nn Nazareten'.

⁷²Na' da yobre bi bchebe' cha' nake' txhen Jesúsen'. Na'll bne'e:

—Dios na' llzoa', gak bi da gak kia', cha' ziya' dan' nia' bi nombia' be'nnen' ne'o ka'.

⁷³Na'll gokse ye choll, ka zjak be'nn ka' lla'a na', lle ake' Pedron':

—Da lijekzen', nako' be'nn ka' txhen, le nakbie'ze nne'o kan' nne be'nn Galilea ka'.

⁷⁴Na' Pedron' bzorao biteze bne'e, na' leska' bne'e:

—Diosen' gone' ga sa'kzia' cha' ziya' dan' nia' bi nombia' be'nn na'.

Kat le bllellte lekwn'. ⁷⁵Na'll jadinra'll Pedron' kan' goll Jesúsen' le'e: "Ka za kwellre lekwn', chonn ras ba gok bi wchebo' cha' nombia'o nada'." Na'll baze'e, na' jallell-lolje' kwis.

Bche'e ake' Jesúsen' rao Pilaton' (Mr. 15:1; Lc. 23:1-2; Jn.18:28-32)

27 Ka byeni' na', badope yeolol bxoz wnebia' ka', na' be'nn gor wnebia' ka' llnebia' yell Israelen', na' bchoy ake'n got ake' Jesúsen'. ²Na' bchej ake' Le'e, na'll jwa'a ake' Le'e rao be'nnen' llnebia'n nzi'i Poncio Pilato.

Judas na' bayot kwine'

³Judas be'nnen' ben Jesúsen' rao na'a be'nn ka', ka gokbe're' ba bchoybia' ake' ke Jesúsen' got ake' Le'e, na'll bayatre' kwis dan' bene' Le'e rao na'a bxoz wnebia' ka', na' be'nn gor brao ka'. Na'll byeje' rao

ake'n, na' bayoe' leake' chilloa (30) mell platen'. ⁴Na' lle'e leake':

—Da xhinnjen' bena', bena' rallna're to be'nn bibi do'l nape'.

Na'll lle ake' le'e:

—Bibi do'l nap neto' kan' beno'n. ⁵Na'll le bza'lte Judasen' mell ka' lo yoda'o braon', le baza'te' zayeje', na' jaro' do yene' bayot kwine'.

⁶Na'll bxoz wnebia' ka' le batop akte' mellen', na'll lle lwellj ake':

—Bi gak ko'llon' gan' yo' mell ke yoda'on, le naken mell dan' bdixhjllo yega'a yel nban ke to be'nne.

⁷Na'll ben ake' di'll yezi'i ake' to yellrio ke to be'nn wen ye'se ren mell na', na' gaken to latj ga wkwa'ch ake' be'nn zi't ake. ⁸Ke len na' yellrio na', nzi'i Yellrio Llen, na' nna nzi'ten ka' nna' lla. ⁹Kan' gok nench gok kan' bzoj da Jeremías, be'nnen' be'e xti'll Diosen' kana', gan' nen: "Bxhi'i ake' chilloa mell plat, dan' ne be'nn Israel ka', za'k to be'nne. ¹⁰Na' bazi'i ake' yellrio ke to be'nn wen ye'se, kan' bne Xanllo Diosen' nada'."

Blliayi'll ake' Jesúsen' rao Pilaton' (Mr.15:2-5; Lc. 23:3-5; Jn.18:33-38)

¹¹Ka bllin Jesúsen' rao be'nnen' llnebia'n, na'll lle'e Le'e:

—¿Rwe'n nako' rey ke be'nn Israel ka'?

Na'll balli'i Jesúsen' xti'lle'n, bne'e:

—Kan' bnekzo' na' naka'.

¹²Na'll ll-lliayi'll bxoz wnebia' ka' Le'e, ren be'nn gor brao ka' llnebia' na'. Na' bibi bnekze' chras. ¹³Na'll lle Pilaton' Le'e:

—¿Bi llenro' katek xhia zan na', llwakw ake' ko'llo' ni?

¹⁴Na' ni to xti'lle'n bi balli'kze Jesúsen', na'll babane Pilaton' kwis.

Bchoybia' ake' gat Jesúsen'

(Mr. 15:6-20; Lc. 23:13-25; Jn.18:38-19:16)

¹⁵Na' de to da llon be'nn ka', katen' lla'l lnni paskwn', yesán be'nnen' llnebia'n to be'nn yo' rill ya, kat lla'l lnni Paskwn', kon be'nn nnab be'nn yell. ¹⁶Na' lo rill ya na', yo' to be'nne llze ke kwis, nake' be'nn wen da xhinnj, na' re'e Barrabás. ¹⁷Na' lle Pilaton' be'nn ka' ndopen':

—¿Nore be'nn ki lle'nere wasana'? ¿Wasana' Barrabás na', cha' Jesús na', be'nnen' ne ake' nake' Cristo?

¹⁸Le gokbe'e Pilaton' llaxhé' bxoz wnebia' ka' Jesúsen', na'llen' ben ake' Le'e rao ne'en.

¹⁹Na' ka lli' Pilaton' gan' llone' yel koxchis na', le bllinte to rson da bse'l no'r ke'en, lle'e le'e: "Bitbi gonro' be'nnen', le bibi do'l nape'. Le bllayrawa' nche'e, na' rao bichgal kia'n bre'da'ora' Le'e."

²⁰Na' bxoz wnebia' ka', na' be'nn gor brao ka' llnebia' na', ba bko'yel akre' be'nn ka' lla'a na', nench nnab ake' wsane' Barrabás na', na' nnab ake' gat Jesúsen'. ²¹Na'll lle Pilaton' leake' da yobre:

—¿Nore be'nn ki chop lle'nere wasana!?

Na'll ne ake!:

-Barrabás na'.

²²Pilaton' lle'e leake':

—¿Akxha gona' Jesúsen' be'nnen' ne ake' Criston'?

Na' yeolole' bne ake':

—iBde'e le' yay cruz!

²³Na'll lle Pilaton' leake':

-¿Bixha da xhinnj ba bene' na'?

Na'll besia' ake' da yobre ne ake':

-iBde'e le' yay cruz!

²⁴Gokbe'e Pilaton' bikzbi de gone'. Ba lla'a be'nn ka' llakia kwis, na'll bse'le' to be'nn jaxie' nis, bane'e rao be'nn ka' lla'a na', lle'e leake':

—Be'nn ni bibi da xhinnj none'. Bi naken xhba'ya' cha' ba betre', xhba'y re' naken cha' ba betre'.

²⁵Yeolol be'nn zan ka' bne ake':

—Kere bi gon dan' gaken xhba'yto', na' xhba'y no xhi'nnto' ke nake yel got ke be'nn ni.

²⁶Na'll basán Pilaton' Barrabásen' kan' bnnab be'nn ka'. Bayoll na', na'll golle' be'nn waka'a ya ka', bdintat ake' Jesúsen', na'll bene' Le'e rao na'a ake'n, nench wda'a ake' Le'e le' yay cruzen'.

²⁷ Na'll bche'e waka'a ya ka' Le'e lo yo' ke be'nnen' llnebia'n, na' batop ake' yeolol waka'a ya ka'. ²⁸ Na'll bdinn ake' xhara'ne'n, na' bwakw ake' Le'e to ra'll xhna, ka dan' llak rey ka'. ²⁹ Na'll ben ake' to da nak de lba ye'che, na' bliz ake'n yichje'n, na' ne'e cha'wen' bgo'x ake' Le'e to xhis. Na'll bche'k xhib ake' rawe'n, nench btitj akre' Le'e, na' ne ake':

—iSechga ke be'nn wnebia' ke be'nn Israel ka'!

³⁰Na'll blli' ake' Le'e xhe'n, na'll baka'a ake' xhisen' no'xe'n, na'll bdin ake'n yichje'. ³¹Bayoll btitj akre' Le'en, baka'a ake' ra'll xhnan' dan' bwakw ake' Le'en, na'll bawakw ake' Le'e xhakze'. Na'll bche'e ake' Le'e jada'a ake' Le'e le' yay cruz.

Bda'a ake' Jesúsen' le' yay cruz

(Mr. 15:21-32; Lc. 23:26-43; Jn.19:17-27)

³²Na'll ka blloj ake' yell na', le badil akte' to be'nn Cirene re San Mateo 27 60

Simón, na' bchie' akre' le'e we'e cruz ke Jesúsen'.

33 Na' bllin ake' to latj gan' nzi'i Gólgota, lle'nen nen latj ke llit wat. ³⁴Na'll be'e ake' Jesúsen' zo zichi da nchixe to da zla' ye'je'n, na' ka gokbe're' kan' naken na', na' bi we'je'n. 35 Na' ka bayoll bda'a ake' Le'e le' yay cruzen', na'll bditjen ake' xhara'ne'n, llwia ake' nara'chk noren' llaya'l toto ake'. Na' dan' ben ake' ka', bzoa di'll kan' bzoj be'nnen' be'e xti'll Diosen' kana'. bne'e: "Wla'a ake' xhara'ne'n, na' si'i ke ke ake' chitje akre'n." 36 Na'll blle' ake' bdap ake' Le'e. 37 Na' yichi cruzen' gan' de'e na', bzoj ake' dan' blliayi'll ake' Le'e, na' llian: "Be'nn ni Jesúsen' rey ke be'nn Israel ka'."

³⁸Na' lekze ka', bda'a ake' ye chop be'nn wan chla' weje kwite'n, toe' cha'we ye toe' rbese. ³⁹Na' be'nn ka' bde gan' de'e na', llta yichj ake' goll ake' Le'e di'll yel ya', ⁴⁰bne ake':

—Rwe'n bne'o yechinnjo' yoda'o braon', na' chonn llaze yeyonte'on. Na' basrachk kwino' cha' rwe'n nako' dogarje Xhi'nn Dios, bayetjchek le' yay cruzen'.

41 Na' bxoz wnebia' ka', na' ren be'nn ka' llsedre ke ley dan' bzoj da Moisésen', na' ren be'nn fariseo ka', na' be'nn gor brao ka' llnebia', yeolole' bne ake' di'll yel ya' bne ake':

⁴²—iBe'nn zan basre'e, na' nna' bi llak yesrá kwine'! Cha' nake' rey ke lli'o be'nn Israel, yeyetje' le' yay cruz gan' de'e na', na'll chejle'llo ke'e. ⁴³Le'e llonlira'lle' Dios, le bne'e: "Dogarje Xhi'nn Dios nada!." iNa' re'chekello yesrá Diosen' Le'e nna', cha' llakre' Le'e!

44 Na' be'nn wan ka' zjada'a le' yay cruzen' chla' weje kwite'n, leska' bchachrén ake' Le'e.

Kan' gok kan' got Jesúsen' (Mr. 15:33-41; Lc.23:44-49; Jn.19:28-30)

⁴⁵Na' ka do wawill, doxhente yellrion' bachole bllinte lladá chonne. ⁴⁶Na' ka lladá chonne na', besia' Jesúsen' zillje bne'e:

—Elí Elí, ¿lama sabactani? (Lle'nen nen: Dios kia', Dios kia', ¿bixchen ba bsanra'llo' nada'?)

⁴⁷Na' bal be'nn ka' zjazé na', ne ake':

—Lewzenay ke'e, be'nn ni llalwille' da Elías be'nnen' be'e xti'll Dios kana'.

⁴⁸Na'll le bllojte to be'nn zejdoe' jaxie' to xhi're, na' bza'lle'n zo zichjen' da nak zla'n, na' bzoe'n to rao xhis tonne, na'll jazoe'n lloa' Jesúsen' nench xo'pe'n. ⁴⁹Na' ye bale' lle lwellj ake':

—Dokwezchek, cha' ke yed Elíasen' yedsre'e Le'e.

⁵⁰Na'll le besia'te Jesúsen' da yobre zillj kwis, na' le bayonte' spíritu ke'en rallna'a Dios. ⁵¹Na' ka hor na', blle'z kllole ra'll dan' ze lo yoda'o braon', bxhi'zen yichje ballinte lle'le, na' llebraz bxho', goxhjte yej ake. ⁵²Na' leska' byarj ba ke be'nn ba got. Na' zan be'nn ka' benlira'll Diosen', babán ake' radj be'nn wat ka'. ⁵³Na' bde na', ka babán Jesúsen' radj be'nn wat ka', balloj ake' lo ba ke ake'n, na'll jayake' jaroe'rao ake' Jerusalén. Na' zan be'nn bre'e leake'.

⁵⁴Na' xan waka'a ya ka', na' ren be'nn ka' lla'a llap Jesúsen', ka nak bre'e akre' bxho'n, na' biteze gok, na' blleb ake' kwis, na' ne ake': —Da likze be'nn ni, nake' dogarj Xhi'nn Dios.

⁵⁵Leska' na' zjalla'a zan no'r ak, zjazé ake' zi'tre llwia ake'. Be'nn ka' bnao Jesúsen', ka baze'e Galilea na'te llakrén ake' Le'e bi da byalljre'. ⁵⁶Na' ren María Magdalena, na' ren María be'nnen' nak xhna' Jacobo, na' José, na' ren María xho'r Zebedeo.

Bkwa'ch ake' Jesúsen'

(Mr. 15:42-47; Lc. 23:50-56; Jn.19:38-42)

57 Ka betj lle' na', bed to be'nn wnia' be'nn Arimatea re José, na' leska' bzenaye' ke Jesúsen'. 58 Josén' byeje' rao Pilaton' jannabe' kwerp ke Jesúsen', na' Pilaton' bayoe' kwerp ke Jesúsen' le'e. 59 Na'll bazi'i Josén' kwerp ke Jesúsen', na'll bara'lle' Le'e to ra'll xhen ra'll yalle. 60 Na' broe' kwerp ke'en to lo broj ke'e, da bche'nne' le' yej. Na'll btole' to yej xhen lloa' brojen', nench basejen len, na'll baze'e. 61 Na' María Magdalenan', na' ye to María be'nn yobre, jache' ake' lloa' brojen'.

Bkwa'nn ake' be'nn llape gan' bga'ch Jesúsen'

62 Na' bateyó, bde lla kan' llsinia' ake' ke lla nba'nn, badop bxoz wnebia' ka', na' be'nn fariseo ka' jake' gan' zo Pilaton'. 63 Na' lle ake' le'e:

—Ba jadinra'llto' kan' bne da be'nn wxhiye'n goten', kan' nna nbane': "Yeyónn lla na', yebana' radj be'nn wat ka'." ⁶⁴Ke len na' bse'lchek be'nn lljatap ake' lloa' brojen' gan' jakwa'ch ake' Le'e na', nench ke lljak be'nn ka' gok le'e txhen tlle'lre lljarej ake' kwerp ke'en, na' ye ake' be'nn ak, babane' radj be'nn wat ka', na' da ke nxhiall gak, kerke di'll dan' bdise da nell, kan' bne'e Diosen' bse'le Le'e.

65 Na'll goll Pilaton' be'nn ka':

—Gonna' re' waka'a ya ak, lewche'e ake' nench gap ake' ga zeraoze yezoe akre'.

⁶⁶Na'll byej ake' ren waka'a ya ka', na' bchi'ch ake' sey le' yej, dan' da'a lloa' brojen', na' bkwa'nn ake' waka'a ya ka' bdap ake'n.

Jesúsen' babane' radj be'nn wat ka'

(Mr. 16:1-8; Lc. 24:1-12; Jn.20:1-10)

28 Ka bde lla nba'nne, bal dmion' María Magdalena ren María be'nnen' ye to, byej ake' jawiá ake' gan' bkwa'ch ake' Jesúsen'. ²Na' le bxho'te, le to angl ke Xanllon' betje' yebán', na' blline' bke'e yej dan' nsej lloa' brojen', na' bllie' rao yejen'. ³Llaktit kwis nake lloa'rawe'n, ka'kze ga llep yes, na' xhara'ne'n naken llich kwis ka beye. ⁴Na' ka bre'e be'nn ka' llapen', to bxhiz akze' blleb ake' bacholra'll akte'. ⁵Na' anglen' lle'e no'r ka':

—Bi llebre, nada' nnezra' llayirjre Jesúsen', be'nnen' bda'a ake' le' yay cruz na'. ⁶Nollno llra' ganni, ba babane' radj be'nn wat ka' kan' bnekze'. Ledá ke, lewiá gan' bro' ake' Le'en. ⁷Sete lelljayak, lelljadixjwe' be'nn ka' nak Jesúsen' txhen, ye akre' ba babane' radj be'nn wat ka'. Na' ye akre' wyoblle yellín Jesúsen' Galilean', kerke leake', na' Galilea na' re'e akre' Le'e. Kan' bne Dios na' badtixjwe'ra' re'.

⁸Na'll le baza'te no'r ka' lloa' brojen', do lleb akze' na' llawé akre', zjayakdoe' jadixjwe' akre' be'nn San Mateo 28 62

ka' non Jesúsen' txhen kan' gok na'.
⁹Na' ka zjayake' na', ballay akre'
Jesúsen' tnez. Na'll bwape' leake'
lliox. Na'll bche'k xhib ake' rawe'n,
na' bde'l ake' nie'n, na'll be'rao ake'
Le'e. ¹⁰Na'll lle Jesúsen' leake':

—Bi llebre lelljadixjwe' be'nn lwelljllo ka', llaya'l lljake' Galilean' nench re'e akre' nada'.

Be'nn ka' gop lloa' brojen' jadixjwe' akre' bxoz ka' kan' goken

¹¹Na' chak zjayak no'r ka' yellen', bal waka'a ya ka', be'nn ka' bdap gan' bkwa'ch ake' Jesúsen', jayake' yellen', na' jadixjwe' akre' bxoz wnebia' ka' doxhen kan' goken. ¹²Na'll badop bxoz wnebia' ka', ren be'nn gor brao ka' llnebia' yell Israelen', na' be'e ake' di'll akre gon ake', kan' lloe' waka'a ya ka' di'll gok na'. Na'll be'e ake' waka'a ya ka' mell xhen. ¹³Lle ake' leake':

—Cha' no nnab akren' gok, na' ye aktezre' tlle'lre ka tasre na', badrej be'nn ka' non le'e txhen na' kwerp ke'en lo broj na', na' jaro' ake' Le'e ga yobre. ¹⁴Na' cha' ba bene be'nnen' llnebia'n di'll ki, neto' llje'rentoe' di'll nench bibi gon akre' re'.

¹⁵Na' bxhi'i waka'a ya ka' mell dan' be'e ake' leake'n, nench ben ake' kon kan' goll ake' leake' na'. Na' to nna' lla, nna ne ake' yeolol ka bne waka'a ya ka', doxhen gan' lla'a be'nn Israel ka'.

Jesúsen' bse'le' be'nn ka' lljatixjwe' akre' xti'lle'n doxhente

(Mr.16:14-18; Lc. 24:36-49; Jn.20:19-23)

¹⁶Na' be'nn chnej ka' nak Jesúsen' txhen, jake' Galilean' rao ya' gan' golle' leake' ka'. ¹⁷Na' ka bre'e akre' Jesúsen', be'rao ake' Le'e kwis. Na' ye bale' bi llejle' ake' cha' Le'en. ¹⁸Na'll zej Jesúsen' gan' ze ake' na', na' lle'e leake':

—Ba ben Diosen' rao na', doxhen yel llnebia' dan' de yebá na', na' yellrio ni. ¹⁹Ke len na' lechej, lelljased lelljaroe' be'nn ka', yeolol yell nench gonlira'll ake' nada'. Na' lewchoa ake' nis, nench wroe'n ba llonlira'll ake' Xallo Diosen', na' Xhi'nne' Jesucristo na', na' ren Spíritu ke'e na'. ²⁰Na' lewroe' lewsed akre', nench gon ake' yeolol dan' ba golla' re' na'. Nada' zorenkza' re' yeo lla, na' ka'kze sorenkza' re' yeyollte yellrio ni. Ka'n gakchga.

DI'LL WEN DAN' BZOJ SAN MARCOS

Juan be'nnen' bchoa nis bdixjwe're' Di'll Wen ke Diosen'

(Mt. 3:1-12; Lc. 3:1-9, 15-17; Jn.1:19-28)

Ki bzorao Di'll Wen ke
Jesucristo, be'nnen' nak Xhi'nn
Dios.

²Kana' bzo to be'nn golle Isaías, be'e xti'll Diosen', na' ki bzoje':

Wse'la' to be'nn kwiarawe' rao'n, we'e xti'llo'n,

nench yewe' xhnneze gan' te'on.

3 Le'e nne'e zillj latj dachen'
nne'e:

"iLegón xhnid, legoncha'o nez gan' te Xanllon',

lewsarj yichjra'llda'ore ka llon
to be'nn llsarj to nez li!"

ANa' ka'n gok kat bllin Juan na' latj
dachen', na' bchoe' be'nn nis, na'
bdixjwe're' be'nne llaya'l wayat
akre' ke da xhinnj ke ake'n, na'
choa' ake' nis nench wazi'xhen
Diosen' ke da xhinnj ke ake' ka'.
Be'nn zan be'nn za'k doxhen
gan' nbane Judea, na' be'nn za'k
Jerusalén lljake' lljazenay ake'
xti'lle'n, na' ka nak llxoarap ake' da
xhinnj ke ake'n, na' llchoe' leake'
nis lo yeo gan' nzi'i Jordán.

⁶Na' Juan na' goke' ra'll da nak de yich xha camello, na' bchej lloa' le'en to yid, na' bdawe' bichsoa ren blli'nda'o ke beser yi'xe. ⁷Na' llyixjwe're' be'nne ne'e:

—Za za'a ye to be'nne naplle yel llnebia' ka nada', ni jeze da lle'ka' yeyalja' xhere'n bi za'ka'. ⁸Da li nada' llchoa' re' nis, zan Le'e gone' ka yedsó Spíritu ke Diosen' yichjra'llda'ore.

Jesúsen' blloe' nis

(Mt. 3:13-17; Lc. 3:21-22)

⁹Na' ka llan' llchoa' Juan na' be'nn nis, Jesúsen' bze'e gan' nzi'i Nazaret gan' nbane Galilean', na' byeje' lloa' yeo gan' nzi'i Jordán, na' bchoa' Juan na' Le'e nis. ¹⁰Bixha chak llalloj Jesúsen' lo nisen', byarj yebán', na' betj Spíritu ke Diosen', naken ka to plom da'o jasorenen Le'e. ¹¹Na' blloj chi'i Diosen' yebán', bne'e:

—Rwe' nako' xhi'nna' nllie'ra', llawera' llayazra'lla' kwis.

Gokra'll daxi'on wko'yelen Jesúsen' gone' da xhinnj

(Mt. 4:1-11; Lc. 4:1-13)

¹²Na'll Spíritu ke Diosen', le benten nench byej Jesúsen' gan' nak latj dachen'. ¹³Ganna' bzoe' choa (40) lla radj bayi'x znia San Marcos 1 64

ake. Na' dan' llnebia' daxi'o ka' bko'yelen Le'e, gokra'llen gon Jesúsen' da xhinnj. Na'll angl ka' bllin ake' gokrén ake' Jesúsen'.

Jesúsen' bzorawe' llyixjwe're' xti'll Diosen'

(Mt. 4:12-17; Lc. 4:14-15)

¹⁴Bayoll bro' ake' Juan na' rill ya, Jesúsen' balline' gan' nbane Galilean' llyixjwe're' Di'll Wen, ka nak yel llnebia' ke Diosen'. ¹⁵Lle'e be'nn ka':

—Ba bllin lla gak dan' nwia Diosen' gone', na' sorao nnebie', lewayate ke da xhinnj keré ka', na' lechejle' Di'll Wen ke Diosen'.

Jesúsen' goxhe' tap be'nn wxhen bel

(Mt. 4:18-22; Lc. 5:1-11)

¹⁶ Jesúsen' de'e lloa' nisda'o Galilean', na' bre're' chop be'nn wxhen bel, be'nn re Simón ren bi'che'n re Andrés, na' llza'l yixj bel ke ake'n lo nisen'. ¹⁷ Na'll lle Jesúsen' leake':

—Ledá gonre nada' txhen, na' gona' nench re' wtopre be'nne, na' yelloj ake' rao da xhinnj ke ake' ka'.

¹⁸Na'll le bsanra'llte yixj bel ke ake'n, na' le bnao akte' Le'e.

¹⁹Na' bza'a Jesúsen' ye ra'te, na' bre're' Jacobo ren Juan, xhi'nn Zebedeo, lli' ake' lo barco ke ake'n llati'x yixj bel ke ake'n. ²⁰Leska' le goxhte' leake', na' bkwa'nnrén ake' xa ake'n be'nn wen llin ka', na' bnao ake' Jesúsen'.

Jesúsen' bayone' to be'nn yo' daxi'o yichjra'llda'we'

(Lc. 4:31-37)

²¹Na' bllin Jesúsen' ren be'nn ka' non Le'e txhen yellen' re Capernaum, na' ka bllin to lla nba'nne ke be'nn Israel ka', byeje' lo yoda'o, na' bzorao llroe're' leake'. ²²Na' llabane be'nn ka' ke di'llen' lloe'n, le nne'e ka be'nn nap yel llnebia', le bi llon be'nn ka' llsedre ke leyen' ka'. ²³Bixha lo yoda'o na', lli' to be'nn yo' daxi'o yichjra'llda'we', na' bzorao llosie' ne'e:

²⁴—¿Bixchen zadchixko' ren neto', Jesús be'nn Nazaret? ¿Za'o zadlleyi'o neto'n? Nnézkzera' no rwe', rwe'n Be'nn Nak La'y bse'l Diosen'.

²⁵ Jesúsen' benre' daxi'on znia lle'en:

—iLlakia llono', balloj yichjra'llda'o be'nnen'!

²⁶Na'll daxi'on bnnibchachen be'nnen', na' besia'n zillj kwis, na'll ballojen yichjra'llda'o be'nnen'. ²⁷Yeolol be'nn ka' llabán akre' kwis, na'll lle lwellj ake':

—¿Akre chejnie'llo dan'? ¿Bi da koben' llroe' llsede be'nnen'? Ka naken ren yel wak ke'en llalwille' daxi'on na' llzenayten.

²⁸Sete bnneze be'nn zan kan' goken, doxhen gan' nzi'i Galilean' bze ke Jesúsen'.

Jesúsen' bayone' xhna' no'r ke Simón Pedro

(Mt. 8:14-15; Lc. 4:38-39)

²⁹Ka balloj Jesúsen' lo yoda'on, na' zjayake' txhen ren Jacobo, na' Juan na', jake' rill Simón na', ren Andrés.
³⁰Bixha xhna' no'r ke Simón na', de'e yoe' da la res, le be'rén akte' Jesúsen' di'll kan' llaken.

³¹Na' jabi'ye', be'xe' ta'ke'n, na' balise' le'e, le ballachte da lan', le bzoraote llsinie' da gao ake'.

Jesúsen' bayone' be'nn zan

(Mt. 8:16-17; Lc. 4:40-41)

32 Ka ba za'a llen willen', na' ba llze yere, jwa'a ake' be'nn zan rao Jesúsen' be'nn llak yillwe', na' be'nn yo' daxi'o. 33 Yeolol be'nn yell bdop ake' lloa' yo' gan' zoe'n. 34 Be'nn zan bayone', be'nn llak wde wdere yillwe', na' babeje' daxi'o yichjra'llda'o be'nne, na' bi be'e latj nne daxi'o ka', le nnez akseren noxhan' nake'.

Jesúsen' bde'e doxhen Galilea llyixjwe're' xti'll Diosen'

(Lc. 4:42-44)

³⁵Na' nakte nnaxte byas Jesúsen', na' blloje' zeje' to latj dach, na' lloe'rene' Diosen' di'lle. ³⁶Na' Simón Pedro ren be'nn ka' non le'e txhen na', jake' jadirj ake' Le'e. ³⁷Ka ballel akre' Le'en, lle ake' Le'e:

—Yeolol be'nn ka' dá ake' llayirj ake' rwe'.

38 Na'll lle'e leake':

—Lecho'o yell wrill ka' nench chixjwe' akre' xti'll Diosen', le ke len na' ba beda'.

³⁹Doxhen gan' nbane Galilean' bda Jesúsen' llyixjwe're' xti'll Diosen' toto yoda'o ke be'nn Israel ka', na' llabeje' daxi'o yo' yichjra'llda'o be'nne.

Jesúsen' bayone' to be'nn llen yillwe' dan' ne lepra

(Mt. 8:1-4; Lc. 5:12-16)

40 Na' to be'nn llen yillwe' dan' ne lepra, byeje' rao Jesúsen', go'tyoere' Le'e, na' bche'k xhibe' lle'e Le'e:

—Cha' lle'nro', wakse waka'o yillwe' kia' ni.

⁴¹Na' Jesúsen' baya'chra'lle' le'e, na' bli ta'ke'n bdane' le'e, na' golle' le'e:

-Lle'nkzra', bayak.

⁴²Bayoll bne'e ka'n, le bayakte be'nnen', na' baga'nnte' yall kwis.

⁴³Na'll Jesúsen' base'le' le'e, na' go'tyoere' le'e, ⁴⁴lle'e le'e:

—Notno ye'o bayona' rwe', kon byej rao bxozen' nench re're' ba bayako', na' be'e dan' nllia da Moisésen' bia'a we'llo, nench yeyako' yall rao leyen'. Ka' ben nench yeolol be'nne nnez akre' ba bayako'.

⁴⁵Bixha be'nnen' ka baze'e na', bzorao lloe' di'll kan' gok bayake'n. Ke len na' bill gokse cho' Jesúsen' yell ka', na' bde'e llillize do ga ndach, na' dekz de be'nn zan lljakse rawe'n be'nn za'k do gateze.

Jesúsen' bayone' to be'nn bi dá nia'ne'e

(Mt. 9:1-8; Lc. 5:17-26)

2 Gok chop chonn na vza a Jesúsen' Capernaum na', Gok chop chonn lla bza'a kat balline' da yobre, na' bnneze be'nn ka' zoe' yo'. ²Le bdopte be'nn zan kwis bllinte lloa' yo'n bayichochiten to nollno llakse cho'. Na' bdixjwe're' leake' xti'll Diosen'. ³Kat le bllinte tap be'nn nlen ake' to be'nn bi dá nia'ne'e. ⁴Na' bi gok cho'rén ake' le'e, llin ake' rawe'n le lla'a be'nn zan kwis. Na'll blep ake' le'e yichjore, na' bsarj ake' to lati ga bleti ake' le'e do ka nak gan' xhoe'n, na' blline' rao Jesúsen'. ⁵Na' gokbe'e Jesúsen' nxenra'll ake' Le'e, na'll golle' be'nn xhinnjen':

—Xhi'nna', ni llazi'xhena' da xhinnj ko'on.

San Marcos 2 66

⁶Lo yo' na' zjalli' bal be'nn llsedre ke ley dan' bzoj da Moisésen', kate ben akre' kan' bne Jesúsen', ben ake' xhbab: ⁷"¿Bixchen nez be'nnen' ka'? Wakadi' ke Diosen' llone'. Nollno gak yezi'xhen da xhinnj ke be'nne, le zeraoze Dios." ⁸Na' Jesúsen' bayakbe're' kan' llon ake' xhbaben', na'll lle'e leake':

—¿Bixchen llonre xhbaben' ka'?

⁹Llákere bi napa' yel llnebia' na' yepe!: "Ni llazi'xhena' da xhinnj ko'o", na' bi za'k xti'lla'n. ¿Bixha cha' yepe!: "Bayas, bazi'i gan' xhoa'o na' bayej"?

¹⁰Ni nnézere, nada', Be'nnen' Gorj Radj Be'nnach napa' yel llnebia' rao yellrio nench yezi'xhena' da xhinnj ke be'nne.

Na'll golle' be'nn xhinnjen':

¹¹—Ni llepa' rwe', bayas, bazi'i gan' bxhoa'on na' bayej rillo'.

¹²Le bayasdote be'nnen', zanlene' gan' bxhoe'n, llwiate be'nn ka' balloje'. Na' llabane be'nn ka', na' lloe'rao ake' Dios ne ake':

—Gatga nna re'llo ka dan' gok nna' lla.

Ka gok brej Jesúsen' Leví

(Mt. 9:9-13; Lc. 5:27-32)

¹³Bde na', byej Jesúsen' lloa' nisda'on da yobre, na' be'nn zan bdop, na' broe' bsedre' leake'. ¹⁴Na' bdie' ga lli' to be'nn re Leví, nake' xhi'nn be'nnen' re Alfeo, llie' gan' llchixhje' dan' llaya'l wayej yell gan' llnebia' leake'. Na'll lle Jesúsen' le'e:

—Da nao nada!.

Na'll bzolle'e, na' bnawe' Le'e.

15 Na' bde na', lli' Jesúsen'
llaorene' leake' txhen rill Levín',
na' ren be'nn zan be'nn wachixhj,
na' yezikre no be'nn wen da xhinni,

na' ren be'nn ka' non Le'e txhen, le be'nn zan na' nao Le'e. ¹⁶Na' be'nn ka' llsedre ke ley dan' bzoj da Moisésen', na' be'nn fariseo ka', bre'e akre' Jesúsen' llaorene' be'nn wachixhj ka' txhen, na' be'nn wen da xhinnj ka' yela', goll ake' be'nn ka' non Jesúsen' txhen:

—¿Bixchen llaorene' wachixhj ka', na' ren be'nn wen da xhinnj ka' txhen?

¹⁷Ka bene Jesúsen' ka', na'll golle' leake':

—Be'nn bibi yillwe' llake, bi yalljre' be'nn wen rmell, zan be'nnen' llak yillwe'n, le'en yalljre' be'nn wen rmellen'. Kan' naken kia' nada', kere za'a zadyexha' be'nn wen aken', zan za'a zadwia' be'nn wen da xhinnj aken'.

Jesúsen' bzejnie're' bixchen bi llon be'nn ka' non Le'en txhen na' was

(Mt. 9:14-17; Lc. 5:33-39)

¹⁸Bixha gok to lla be'nn ka' non Juan na' txhen, na' be'nn ka' non be'nn fariseo ka' txhen non ake' was, na' bal be'nn ka' jak ake' rao Jesúsen', na' lle ake' Le'e:

—¿Bixchen be'nn ka' non Juan na' txhen, na' be'nn ka' nao be'nn fariseo ka' llon ake' was, na' be'nn ka' non rwe' txhen na', bi llon ake' was?

¹⁹Na'll lle Jesúsen' leake':

—¿Bixha wak gon be'nn ka' was, be'nn ka' llon ake' yexh ga llak yel wachayna'a chak lli'rén be'nnen' llchayna'n leake!? Chak nna zo be'nn byion', llon ake' le'e txhen, ker wak gon ake' was. ²⁰Zan wllin lla kat waga'a be'nn byion', kana'llen' gon ake' was.

²¹'Ni to be'nn kat wade'e ra'll, si'ze' to ra'll kobe wade'en da goren'. Cha' ka' gone', ra'll koben', kat chiben, wabe'n, na' da goren' yezikre che'zen. ²²Leska' nono ka'cha'oze xis uva koben' to lo blloy yid gore, le xis uva koben' wche'zen blloy yid goren' na' larjen. Ke nak xis uva koben' llaya'l ka'cha'we'n lo blloy yid kobe.

Be'nn ka' non Jesúsen' txhen blechj ake' dao ke trigo to lla nba'nne

(Mt. 12:1-8; Lc. 6:1-5)

²³Bixha gok to lla nba'nne ke be'nn Israel ka', bde Jesúsen' ga naz ake' trigo, na' be'nn ka' non Le'e txhen na', bzorao ll-lechj ake' dao ke trigon'. ²⁴Na' be'nn fariseo ka' lle ake' Le'e:

—Bwiake kan' llon be'nn ka' non rwe' txhen na', ¿bixchen llon akze' ka'? Llon ake' da bi llaya'l gonllo lla nba'nne.

²⁵Na' Jesúsen' golle' leake':

—¿Bixha bi nna golre kan' ben da rey Daviden' kana'? Ka bdone' ren be'nn ka' zejrene' txhen na'.

²⁶Kan' byoe' gan' nak rill Diosen', na' be'nnen' re Abiatar nake' bxoz, Daviden' bdawe' yet xtir ke Diosen' da bi de latj gao noteze be'nne, toze bxoz ka' gak gao len; Daviden' bdawe'n, na' leska' bdaorén be'nn ka' zejrén le'e txhen na' len.

²⁷Leska' lle'e leake':

—Ni ke be'nnachen' brej Diosen' lla nba'nne nench sie'n banez, kere breje' be'nnachen' nench gonchie' lla na'n. ²⁸Llaya'l nnézere nada', Be'nnen' Gorj Radj Be'nnach, naka' xan llan' llapre bara'nne.

Jesúsen' bayone' to be'nn nxho'n chla' ne'e

(Mt. 12:9-14; Lc. 6:6-11)

Gok ye to ka byo' Jesúsen' to lo yoda'o ke be'nn Israel ka', na' lli' to be'nn nxho'n chla' ne'e. ²Bal be'nn ka' lli'nao ake' cha' wayón Jesúsen' le'e to rao lla nba'nne, nench ga't da lljatao ake' xhia rao koxchis ka'. ³Na'll lle Jesúsen' be'nnen' nat ta'ke'n:

- —Bzollá, na' bze radjllo ni.
- ⁴Na'll lle'e be'nn ka':
- —Lennechk, ¿de latj gonllo da wen o cha' gonllo da xhinnj rao lla nba'nne? ¿Wak yesrallo be'nne o cha' we'llo latj kwiayie'?

Na' be'nn ka' ka ben akre' ka', to blle' akze' llize, billbi bne akse'. ⁵Jesúsen' bwie' leake' znia, le gokya'chre' ka nak bi llejle' ake' ke'e. Na'll lle'e be'nnen':

—Bli na'on.

Na' bli na'a be'nnen', le bayakten. ⁶Na' ka ballach be'nn fariseo ka', bzorao lloe' ake' di'll ren be'nn ka' non txhen Herodes na', akre gon ake' got ake' Jesúsen'.

Jesúsen' bayone' be'nn zan lloa' nisda'on

⁷Jesúsen' ren be'nn ka' non Le'e txhen na', bro' ake' nez jake' lloa' nisda'o, na' be'nn zan be'nn Galilea ka' bnao Le'e, na' ren be'nn Judea. ⁸Na' be'nn za'k Jerusalén, na' be'nn za'k gan' nzi'i Idumea, na' be'nn za'k chla' yeo Jordán, ren be'nn za'k gan' nzi'i Tiro, na' gan' nzi'i Sidón, ka nak bnnez akre' yel wak ka' llone'n, be'nn zan jake' gan' zoe'n. ⁹Na'll goll Jesúsen' be'nn ka'

San Marcos 3 68

non Le'e txhen na', gon ake' xhnid to barco ga choe' nench ke wchi'd be'nn zan ka' Le'e, ¹⁰le be'nn zan kwisen' bayone', na' yeolol be'nn yo' yillwe' jabi'y ake' to llbiacha' ake' Le'e, ka nak lle'n akre' kan ake' Le'e. ¹¹Na' be'nn ka' yo' daxi'on, ka llre'e akre' Le'en, llche'k xhib ake' na' daxi'o ka' llosia' aken ne aken:

-Rwe'n nako' Xhi'nn Dios.

¹²Na' Jesúsen' benre' daxi'o ka' znia nench bi we'e aken di'll non' nake'.

Jesúsen' breje' postl ka' ben Le'e txhen

(Mt. 10:1-4; Lc. 6:12-16)

¹³Bde na', byeje' to rao ya', na' goxhe' bal be'nn jake' gan' llie'n. Ka bllin ake' rawe' na', 14 breje' chllinn (12) be'nne nench gon ake' Le'e txhen, na' wse'le' leake' chixjwe' akre' xti'lle'n. ¹⁵Na' be'e leake' yel llnebia' nench wayón ake' be'nn we'e, na' wabej ake' daxi'o yo' yichira'llda'o be'nn ak. 16Ki re be'nn chllinn ka': Simón be'nnen' bsie' Pedro. 17 Jacobo ren Juan be'nn bi'che'n, nak ake' xhi'nn Zebedeo, na' bsie' leake' Boanerges, da ni lle'nen nen be'nn llon ka yi' bzi'o kat llachjen; ¹⁸na'll Andrés, Felipe, Bartolomé, Mateo na' Tomás, Jacobo xhi'nn Alfeo, Tadeo, na' Simón, be'nnen' ben txhen be'nn ka' nzi'i cananista, 19 na'll Judas Iscariote, be'nnen', ka bllin lla, bene' Jesúsen' rallna'a be'nn ka' llwie Le'e. Bayoll na' ballín ake' yo'.

Bne ake' ke Jesúsen' babeje' daxi'o kone yel wak ke daxi'on

(Mt. 12:22-32; Lc. 11:14-23; 12:10)

²⁰Yo' na' bdop be'nn zan kwis da yobre, ni ke llakze kwe' ake' gao ake'. ²¹Ka bene bi'ch lwellje' ka' kan' llaken, jake' gokra'll ake' wache'e ake' Le'e, le llak akre' bije zo yichjra'llda'we' wen na'.

²²Na' be'nn ka' llsedre ke ley dan' bzoj da Moisésen', be'nn ka' za'k Jerusalén na', bne ake':

—Beelzebú dan' llnebia' daxi'o ka', noe'n Le'e yel wak, na'llen' llabeje' daxi'o ka' yichjra'llda'o be'nne.

²³Na'll goxh Jesúsen' leake', na' lle'e leake':

—¿Akxha gon dan' llnebia' daxi'o ka' wabej kwine? ²⁴Cha' to yell naken chopre, lldilrén lwellj ake', wllin lla kwiayi'n. ²⁵Cha' to lo yo' dil ake' nak ake' chopre bi sibia ake', wllin lla wara' lwellj ake'. ²⁶Na' cha' daxi'on dil ren lwellje naken chopre, sete wlliayi' kwine chet ka'.

²⁷'Nono gak cho' lo yo' ke to be'nn war, na' sie' bi da de ke'e. Zga'tek lle'nen wcheje' le'e, na'llen' gak sie' bi da de ke'e.

²⁸'Da li nia' re', biteze bi da xhinnj gon be'nn ka', na' bi da zban ne ake', de yel llazi'xhen ke ake'. ²⁹Zan cha' nne ake' ke Spíritu ke Diosen', bi wazi'xhenkze Diosen' ke ake', xhia xhen llia be'nn ka' gon ka' ke chnare.

³⁰Bne'e ka' le leake'n bne ake', daxi'on yoe'.

Xhna' Jesúsen' ren bi'che' ka' bllin ake' gan' zoe'n

(Mt. 12:46-50; Lc. 8:19-21)

³¹Na' llakte ka'n, kat bllin xhne'e ren bi'che' ka', na' bze akte' lia'te, na' bse'l ake' be'nne gaxhe' Jesúsen' cheje' gan' ze ake'n. ³²Na' be'nn ka' nechj Le'en, goll ake' Le'e: —Xhna'o ren bi'cho' ka' ze ake' ganni, llayirj ake' rwe'.

³³Na' ballie' xti'll ake'n, lle'e leake':

—¿Noxhan' nak xhna'? ¿Non' nak bi'cha'?

³⁴Na'll bwie' be'nn ka' lli' nechj Le'en, na' bne'e:

—Be'nn kin' xhna', na' bi'cha'.

35 Le yeolol be'nn ka' llon kan' lle'ne
Diosen', leake'n nak bi'cha', zana'
na' xhna'.

Jesúsen' bsa'krebre' ka llon to be'nn goz go'nne

(Mt. 13:1-9; Lc. 8:4-8)

Da yobre byej Jesúsen' lloa' nisda'on, na' bzorao llroe' llsedre' be'nne, na' be'nn zan kwis bdop, to benen bien byoe' to lo barco da xhoa rao nis, na' bllie' loen' na' be'nn zan ka', ze akte' rao yo billre. ²Na' llroe' llsedre' leake' bsa'krebre' bi da ka', na' be'rene' leake' to di'll ke to be'nn llaz. Na' lle'e leake':

³—Lewzenay ke, to be'nn wen llin jeze' trigo. ⁴Bixha ka nak zeje' llose' nbaz ka', balen je'ten lloa' nez, na' betj byinn da'o, ban' dá rao lla, na' bdaoba'n. ⁵Na' ye balen jago'nnen rao yej ga bibi yo detek, sete bra' aken. 6 Na' ka nak bi nyin roe zitj, ka bnna' willen' na' byechen. ⁷Na' balen jacha'a radj yay ye'che, na' blli'o yay ye'chen', na' benen len roe', na' bibi bllian. ⁸Na' ye balen je'ten rao yo cha'o, na' bra' ake'n, na' blli'on, na' balen bllian chilloa (30) wej, balen bllian wyon (60) wej, na' balen bllian do to gayoa (100) wej.

⁹Na'll lle'e leake':

—Re' zo nayre, lewzenay xti'lla' ni.

Jesúsen' be'e di'll bixchen bsa'krebre' bi da ka' kan' bzejnie're' leake'

(Mt. 13:10-17; Lc. 8:9-10)

¹⁰Ka ballach be'nn zan ka', na' baga'nn be'nn chllinn ka'ze, na' ye bal be'nn ka' nak leake' txhen, bnnab akre' Le'e akre zejen na', ke di'llen' be'rene' leake'. ¹¹Na' lle'e leake':

—Re' ba brej Diosen' nench nnézere kan' llone' llnebie'n, zan be'nn ka' yela' bi llejle' kia', kone da ki llsa'krebra' lloe'rén ake' di'lle. ¹²Llona' ka' nench gak kan' ne xti'll Diosen': la'kze wia ake' bi gakbe'e akre' bi dan', la'kze yen akre' bi chejnie' akre'n, na' bi wayat akre', na' bi yezi'xhen Dios ke ake'.

Jesúsen' bzejnie're' ke dan' bsa'krebre' ke be'nn gozen'

(Mt. 13:18-23; Lc. 8:11-15)

¹³Na'll lle Jesúsen' leake':

—¿Bi llejnie're di'll ka' lloe'rena' re'? Cha' bi llejnie're di'll ki, ¿akxha gak chejnie're da ka' llsa'krebra' yela'? ¹⁴Be'nnen' llazen' nake' ka be'nn lloe' xti'll Dios. ¹⁵Nbaz ka' je't lloa' nezen' naken ka be'nn ka' llene xti'll Diosen', na' le ll-llinte daxi'on llabejen dan' yo' lo ra'llda'we'n. 16 Na' bal be'nne llak ke ake' ka nbaz dan' je't rao yejen', kate llen akre' xti'll Diosen' llawé akre' zi'i ake'n. ¹⁷Na' bi nyin roe zitj, chollze llejle' ake'. Kate bi llak ke ake', na' lla'dyi' be'nn leake' ke dan' nao ake' xti'll Diosen', le llabi' akte'. ¹⁸Na' ye bale llak ke ake' ka nbaz dan' je't radj yay ye'chen'. Llen akre' xti'll Diosen' na' zi'i

San Marcos 4 70

ake'n, ¹⁹bixha da zed ka' da de rao yellrio ni, na' yel wnia' dan' ziye'e lli'o, na' yel llzera'll billre da yobre, ll-llonen chejle' ake' kwasro, na' bi llak gon ake' kan' lle'ne Diosen'.

²⁰Na' leska' ni't be'nn llak ke ake' ka nbaz dan' je't rao yo cha'on.

Be'nn ka', ka llen akre' xti'll Diosen', llejle' ake' do yichj do ra'll ake', na' llon ake' kan' lle'ne Diosen', llon ake' kan' llak ke nbaz dan' bra'n, na' blli'on, na' balen bllia chilloa, na' wyon, na' do to gayoa wej toton.

Da nga'che llinkze lla llroe'rawe

(Lc. 8:16-18)

²¹Leska' lle Jesúsen' leake':

—Kat llwa'lre yi', ¿akre llonre?

¿Lldo'sren to llom o cha' llzoren
xhanre gan' llxhoare lltasre? ¿Bi
llda'ren sib nench llseni'n doxhen?

²²Bibi de da nga'ch da bi wroe'rawe,
na' to da llak llillize da bi nneze
be'nne len. ²³Re' zo nayre da llene,
lewzenay xti'lla'n.

24 Leska' lle'e leake':

—Lewiaya'nn kan' nia' ni. Le kon kan' llonre na', ka'n gon Diosen' ke re'. Na' yezikre gone' dan' ba bénere xti'lle'n. ²⁵Be'nn de ke'e, we'lle' le'e ye ra'te, na' be'nnen' bi de ke'e, to wake'e da da'o nape'.

Jesúsen' be'e di'll ka llon to nbaz kat ll-lli'on

²⁶Leska' lle Jesúsen' leake':

—Kan' gon Diosen' nnebie',
wsa'kreba'n ka llon to be'nn llaze'
xhoa' rao yellrio ke'e. ²⁷Na' xhoa'
binnen' llra'n na' ll-lli'on, na'
be'nnen' kon lltase', na' llase' yeo
lla, ni ke llakbe'zre' akren' llak
ll-lli'on. ²⁸Yellrio na'n llonen nench

llra'n, na' llakten yer, na'll llra'n dao, na' llda'n za'. ²⁹Na' kat ba naken yez, le llrapte'n.

Yel llnebia' ke Diosen' naken ka nbaz ke mostaz

(Mt. 13:31-32; Lc. 13:18-19)

³⁰Leska' lle Jesúsen' leake':

—¿Akre ka chejnie'llo kan' llon Diosen' llnebie'n, akre ke wsa'krébellon? ³¹ Wsa'krebra'n ka nbaz ke mostaz, kat llaze'n, la'kze nakten da da'o rize kerke no nbaz yobre, ³²ka llaze'n na', llra'n na' ll-lli'on, llakten da xhenll kerke yay da'o ake, na' llon xho'ze, na' lletj byinn ka' dá rao lla, llon xo'n akba' rao xo'zen'.

Kan' ben Jesúsen' llsa'krebre' bi da ka'

(Mt. 13:34-35)

³³Kone dan' bsa'krebre Jesúsen' broe're' be'nn ka' lldop llzenay xti'lle'n kon ka to llejnie' akre'. ³⁴Na' kone dan' bsa'krebre' bzejnie're' leake', na'll kat bill lla'a be'nn zan ka', bzejnie're' be'nn ka' non Le'e txhen na', kan' zejen da ka' bsa'krebre'.

Jesúsen' brekllie' to be' xhen lo nisda'on

(Mt. 8:23-27; Lc. 8:22-25)

³⁵Lekze lla na', ka betj lle', lle'e leake':

-Wla'yllo chla're nisda'on.

³⁶Be'nn ka' non Le'e txhen na', bkwa'nn ake' be'nn ka' lla'a llzenayen', na' bsa'a ake' barco gan' ba yo' Jesúsen', na' leska' bnao ye bal be'nn nsa'a to chop barco yobre. ³⁷Bixha kat bzorao dá to be' xhen rao nisda'on, na' bzorao lloll nis lo barcon', na' ba llonen da yi'chen. ³⁸Na' de Jesúsen' tase' xhnia' barcon' nkoye' to ga nxoa yichje'n, na' jasbán ake' Le'e, lle ake' Le'e:

—iMaestro! ¿Bi llakbe'ro' ka nak ba llbeyi'llo?

³⁹Na'll byase', na' babekllie' be'n, na' golle' nisda'on:

—iBabe' lli!

Le brexhte be'n ren nisda'on, bayakte lli. ⁴⁰Na'll lle'e leake':

—¿Bixchen llebre? ¿Bi de yel llonlira'll ke re'n?

⁴¹Na'll blleb ake' kwis, na' lle lwellj ake':

—¿Noxha be'nnen'? Rente kaze be', na' ren nisda'o na' llzenayen ke'e.

To be'nn rao yellen' nzi'i Gadara yoe' daxi'o

(Mt. 8:28-34; Lc. 8:26-39)

Na' bllin Jesúsen' ren be'nn ka' non Le'e txhen na', chla' nisda'o gan' nak rall be'nn Gadara ka'. ²Bixha ka balloje' lo barcon', le bllinte to be'nn jatile' Le'e, be'nn blloj latj gan' lljakwa'ch ake' be'nn wat ka', be'nn yo' daxi'o yichjra'llda'we'. ³Be'nn na' ba zotekze' latj gan' lljakwa'ch ake' be'nn wat ka', na' nono llakse wchej le'e, ni kon no gden. ⁴Da zan ras ba bchej ake' nia'ne'e kone gden, na' ka bize llale'e gden na', na' llxhoxhjte'n, ni to nono zoekze le'e. ⁵Do lla do yere de'e llosie' do rao ya' ka', na' do radi ba ke be'nn wat ka', llayón zi' kwine' kone yej. ⁶Kate bre're' Jesúsen' zi'tre, na'll zejdoe' jache'k xhibe' rawe'n. ⁷Na'll besie' zillj, lle'e Jesúsen':

—¿Bi de ko'o kone nada', Jesús? Rwe' Xhi'nn Dios zo yebá. ¡Ni ke Dios lla'tyoera' rwe', bi wsa'kzi'o nada'!

⁸Ne'e ka', le Jesúsen' ba golle' daxi'on:

—iBalloj yichjra'llda'o be'nnen'! ⁹Na'll bnnab Jesúsen' lle'en:

-¿Bi re¹o?

Na'll llen Le'e:

—Da Zan na' ria', le nyanto'.

¹⁰Na'll go'tyoere' Jesúsen' bi wraye' daxi'o ka' zi't gan' lla'a aken na'. ¹¹Na' awlloze ganna' zo to ya' ga zjalla'a kuch zan ake, llao akba' yi'xe. ¹²Daxi'o ka' lla'a be'nnen', go'tyoe aken Jesúsen' lle aken Le'e:

—Bse'l neto' gan' zjalla'a kuch ka', na' benn latje lljalla'to' lo yichjra'llda'o akba'n.

¹³Na'll be'e Jesúsen' latj. Ka ballach daxi'o ka' yichjra'llda'o be'nnen', jalla'a aken lo kuch ka'. Na' nake ka chop mir akba'. To gokllejla'llze kuch ka', na' bzorao bix dol akba' to le bdinnj, jabix akteba' lo nisda'on, na' wasa'tba', we'j akba' nis.

14 Na' be'nn ka' llap kuch ka', baxhonnjdo ake' zayejdo ake', jadixjwe' akre' be'nn lla'a lyell, na' be'nn lla'a lyi'xe kan' goken. Na' bllach be'nn ka' jawiá ake'. 15 Ka bllin ake' gan' ze Jesúsen', na' bre'e akre' be'nnen' blla'a daxi'o ka', ba babie' wen, ba bayak xhara'ne'. Na' blleb ake'. 16 Na' be'nn ka' bre'e kan' goken, be'rén ake' be'nn ka' bdop na' di'lle, kan' gok bayak be'nnen' blla'a daxi'o ka', na' kan' gok ke kuch ka'. 17 Na' bzorao be'nn ka' lla'tyoe akre' Jesúsen' wayeje' ga yobre.

San Marcos 5 72

¹⁸Na' ka bayoe' lo barcon', be'nnen' byo' daxi'on bnnabe' we'e Jesúsen' latje' lljannawe' Le'e. ¹⁹Na' bi be'e Jesúsen' latje', na' golle' le'e:

—Bayej rillo' ga lla'a bi'ch lwelljo', na' be'rén ake' di'll ka yel wak xhen na', ba broe' Xanllo Diosen' rwe', na' kan' baya'chra'lle' rwe'n.

²⁰Na' zayej be'nnen', na' yell ka' gan' nbane Decápolis bzorawe' lloe'rene' be'nn ka' di'll kan' ben Jesúsen' broe're' le'e yel wak xhen ke'en; na' yeolol be'nn ka' llabán akre' kwis.

Jesúsen' basbane' xhi'nn Jairo, na' bayak ye to no're bdan xhe'en

(Mt. 9:18-26; Lc. 8:40-56)

²¹Ka ballín Jesúsen' ye chla' nisda'on zayoe' lo barcon', na' jaze'e lloa' nisda'on, na' bdope be'nn zan kwis. ²²Na' bllin to be'nn re Jairo, nake' be'nn wnebia' ke yoda'o ke yellen'. Ka bre're' Jesúsen' le bche'kte xhibe' rawe'n. ²³Na' go'tyoere' Le'e, lle'e Le'e:

—Zo to xhi'nna' no're, ba llak watbe'; chenak sa'o wxoa ta'ko'n yichjbe' na' wayakbe', bi gatbe'.

²⁴Na'll zejrene' le'e, leska' be'nn zan kwis nao, to llchi'd ake' Jesúsen'. ²⁵Bixha radj be'nn ka' ren to no're, ba gok chllinn (12) iz llzoe' wa'a. ²⁶Na' da xhen ba ballayrawe' ba bde'e rao wen rmell ka', gaxt xhen ba bene' bi llayakse', yezikre llak yillwe' ke'en. ²⁷Bixha ka bénkzere' lloe' ake' xti'll Jesúsen', na'll zeje' jannawe' radj be'nn zan ka', na' jatane' xha Jesúsen'. ²⁸Le kan' bza'ra'lle' lo ra'llda'we'n bne'e: "La' xhe'e na'ze lljatana' wayaktia!." ²⁹Bixha ka

jatane' xhe'en, le brexhte wa'an llzoe'n, na' le gokbe'tere' ba bayake'. ³⁰Na' Jesúsen' le gokbe'tere' ka ben yel wak ke'en llin, na'll bayechje' llnnabre' be'nn zan ka':

—¿Non' bdan xha'n?

³¹Na' be'nn ka' nak Le'e txhen na', lle ake' Le'e:

—Ba bre'kzero' kan' nao be'nn llchi'd ake' rwe'. ¿Bixchen nnabrizo' non' bdan xha'on?

³²Na'll bayechje' llwie' noxhan' bdankze xhe'en. ³³Na'll lleb no'ren' do xhiztite', le ba bayakbe're' bayake' kwasro, na'll zeje' jache'k xhibe' rao Jesúsen', na' be'e di'll doxhente kan' goken. ³⁴Na'll lle Jesúsen' le'e:

—Xhi'nna', dan' nxenra'llo' na'n, ba basrá rwe', ka nake nna' ba bayako', bayejchga wen.

³⁵Na' zete Jesúsen' lloe' di'llen', ka bllindokze bal be'nn za'a rill Jairon', be'nnen' nak be'nn wnebia' ke yoda'on, na'll lle ake' Jairon':

—Ba gotte xhi'nno'n, ¿bixchen nna llonllro' Maestron' zede?

³⁶Bixha Jesúsen', ka benre' kan' bne be'nn ka', na' lle'e Jairon':

—Bi llebo', kon benlira'lle.

³⁷Na' bi be'e latj no nnao Le'e, Pedro na'ze, na' Jacobo, na' Juan, be'nnen' nak bi'ch Jacobo. ³⁸Na' byej ake' rill be'nnen'; ka blline'n, benre' llak llakia, lla'a be'nn llasbell ake' llak akre'. ³⁹Ka byoe' lo yo'n lle'e leake':

—¿Bixchen llonre llakia bellre? Kere got bida'o no'r nin', taszbe'n.

⁴⁰Na'll lltitje be'nn ka' Le'e. Na'll bachache' leake' lia're, na' bche'e xaxhna' bida'on, na' ren be'nn ka' nao Le'e na', na'll byoe' gan' xhoa bida'on. ⁴¹Na' be'xe' ta'kbe', na' lle'ebe':

—Talita, cumi —da ni lle'nen nen: Bida'o no're ni llepa' rwe', bayas.

⁴²Le bayaste bida'o no'ren', na' le badatebe', na' bida'o no'ren' nakebe' chllinn (12) iz. Na' be'nn ka' llabán akre' kwis. ⁴³Na' Jesúsen' go'tyoere' leake' notno ye ake' ka', na' golle' leake' we'e ake' da gao bida'o no'ren'.

Jesúsen' balline' Nazaret

(Mt. 13:53-58; Lc. 4:16-30)

Ma' baza'a Jesúsen' balline' ralle', na' nao be'nn ka' non Le'e txhen na'. ²Na' ka bllin lla nba'nne ke be'nn Israel ka', byeje' lo yoda'on na' llroe're' leake'. Be'nn zan bzenay xti'lle'n, na' llabán akre' kwis, na'll ne ake':

—¿Ga jaxi'rize' dan' nnezre'n? ¿No be'rize le'e yel si'n ni? ¿Gaxha jaxie' yel waken' llayone' be'nne? ³¿Kere be'nn nin' nake' be'nn waxhí yay, xhi'nn María? Nombia'llo bi'che' ka', re Jacobo, na' José, na' Judas, na' Simón, na' ganni ni't zane' ka'.

Ke len na' bi gokra'll ake' wzenay ake' ke'e. ⁴Na'll lle Jesúsen' le ake':

—To be'nn lloe' xti'll Dios, gateze llap ake' le'e bara'nne, zan ralle' ker no llejle' ke'e, ni bi'ch lwellje', ni lo yo' rille'.

⁵Na' bi gok wroe're' yel wak ke'en, le bi byejle' ake' ke'en. To chopze be'nn ka' bayak, ka naken bxoa ta'ke'n yichj ake'. ⁶Na' llabane Jesúsen' kwis ka naken chras bi byejle' ake'. Na' jate'e yell ka' yela' jaroe're' be'nn ake.

Jesúsen' bse'le' be'nn chllinn ka' jatixjwe' akre' xti'lle'n

(Mt. 10:5-15; Lc. 9:1-6)

⁷Na'll goxh Jesúsen' be'nn chllinn ka', na' bse'le' chop wej ake', be'e leake' yel llnebia' ke'en nench wabej ake' no daxi'o yo' yichjra'llda'o be'nne. ⁸Na' golle' leake' bibi go'x ake' ke tnez, kon toze yay da wchi'ch ake', na' bibi bzod go'x ake', ni yet xtir, ni mell. ⁹Kon xher ake' na'ze wrej ake', na' chkwe'ze xhara'n ake' dan' nak ake' na'ze, na' bi go'x ake' ye to da yobre. ¹⁰Na'll lle'e leake':

—Cha' to yo' ga llinre, ganna'ze sore llinte yeza're rao yellen'.

11 Cha' to yell ga llinre bi wreb ake' re', na' bi ye'n akre wzenay ake' xti'llren', lewalloj rao yellen', na' le wabibte bichte lo labre, nench na' wayakbe'e akre' da xhinnjen' llon ake'. Da li ganni nia' re', katen' llin lla gak yel koxchis ke yeolol be'nne, da xhen da sa'kzi' be'nn ki kerke be'nn ka' blla'a yell ka' re Sodoma ren Gomorra.

¹²Na'll bllach ake' llyixjwe' akre' be'nne, llaya'l wayat akre' ke da xhinnj ka' llon ake'n. ¹³Na' llabej ake' daxi'o ka' yo' yichjra'llda'o be'nne, na' be'nn llak yillwe' llwat ake' leake' ceit, na' llayón ake' leake'.

Kan' gok bet ake' Juan be'nnen' bchoa nis

(Mt. 14:1-12; Lc. 9:7-9)

¹⁴Herodes be'nnen' llnebia' Galilean', benre' kan' llon Jesúsen', le doxhen ganna' ba lloe' ake' xti'lle'n. Na'll bne Herodesen':

—Juan, be'nnen' bchoa be'nn ka' nis, le'en ba babán radj be'nn wat ka', le'e nape' yel wak xhen, na'llen' llak llone' da ki.

15 Na' zjalla'a ye bal be'nn ne ake':
Be'nn na'n re Elías, be'nn be'e
xti'll Diosen' kana'n.

Na' ye bal ake' ne ake':

—To be'nn ka' lloe'je xti'll Diosen', o cha' kon to be'nn ka' be'e xti'll Diosen' kana' babán.

¹⁶Na' Herodes na', ka nak llenre' kan' ne be'nn ka', na'll bne'e:

—Juan na'kzen', be'nnen' golla' be'nn ka' wchoy ake' yen na', le'en babán radj be'nn wat ka'.

¹⁷Herodes na', goklle'e Juan na', na' bse'le' be'nn ka' be'x ake' le'e, na' bchej ake' le'e gden, na' broe' le'e rill ya. Bene' ka' xto'l dan' baka'a Herodesen' to no'ren' re Herodías, no'r ke Felipe bi'che' na', nench bazorene' le'e, goke' xho're'. ¹⁸Le Juan na' lle'e le'e:

—Da xhinnjen' beno' baka'o xho'r bi'cho'n zorenoe'.

¹⁹Na'll Herodías na', bwiere' Juan na', na' blle'nawe' le'e kat ga't lati gote' le'e, na' bi za'kere'. 20 Herodes na', bllebe' gote' Juan na', le nnezre' nake' be'nn llon da li, nake' be'nn ke Dios, na' bdape' le'e nench ke lljet Herodíasen' le'e gan' yoe' na'. La'kze bi llejnie're' kan' ne Juan na', llawere' llzenaye' xti'lle'n. ²¹Bixha ka bllin lla ka btil Herodesen' iz. na' bene' to lnni, bene' wao nench bdaorene' be'nn ka' llnebia' ren le'en, na' ren be'nnen' nak xan waka'a ya ke'e ka', na' be'nn brao ka' lla'a Galilea na'; na' gok latj ke Herodíasen' kan' lle'nre' na'. 22 Bixha xhi'nn Herodías na', nakbe' to bi no're byo'be' gan' llak lnnin', na' jaya'be'; na' Herodesen' bayazra'lle' kwis kan' bya'be'n, leska' be'nn ka' lla'rene'n, llawé akre' kan' bya'be'n. Na'll lle reven' bi no'ren':

—Na' bnnab bitteze lle'nro', na' gonna'n.

²³Na' bchebe', lle'ebe':

—Kon da nnabo' gonna'n, la'kze cha' nne'o achj da ka' gan' llnebia' ni.

²⁴Na'll ballojdobe' jaye'renbe' xhna'be'n di'lle llebe le'e:

- —¿Bi ka wnnabra' Herodesen'? Na'll lle xhna'be'n lebe':
- —Bnnab yichj Juan na', be'nnen' llchoa be'nn ka' nis.

²⁵Na'll bayo'dobe' gan' lli' reyen', llebe' le'e:

—Lle'nra' yichj Juan na', be'nnen' llchoa be'nn ka' nis nna'stek, na' bxoan to lo ye'nne nllirj.

²⁶Herodesen' gokre' kwis ka benre' bne bi no'ren' ka', na' lle'n ke lle'nre' bzoe' di'll kan' gollebe', le ba bchebe' rao yeolol be'nn ka' lla'a ren le'e txhen na', we'ebe' dan' bnnabbe' na'. ²⁷Le base'lte reyen' to waka'a ya nench jachoye' yen Juan na'. ²⁸Ka bllin waka'a yan' lo rill yan', na' bchoye' yen Juan na', na' baxoe'n to lo ye'nn nllirj, na' zano'xe'n, na' be'en bi no'r na'; na' bi no'r na' bayoe'tebe'n xhna'be'.

²⁹Ka bene be'nn ka' non Juan na' txhen kan' ba gok na', na'll byej ake' jaxhi'i ake' kwerp ke'en jakwa'ch ake'n.

Jesúsen' bwawe' ga'y mir be'nne (Mt. 14:13-21; Lc. 9:10-17; Jn.6:1-14)

³⁰Bde na', ballín postl ka' gan' zo Jesúsen', na' be'rén ake' Le'e di'll kan' jen ake'n, na' kan' jazejnie' akre' be'nne xti'lle'n. ³¹Na'll lle'e leake':

—Ledá, lecho'o to latj dach ganna' yezi'ra'll-llo choll.

Bne'e ka', le be'nn zan na', lledi' leake' to ni ke llakze latj gao ake'.

75 San Marcos 6

³²Na'll byo' ake' to lo barco zjak leakze' bllin akte' to lati ga nono llra'. ³³Na't be'nn zan bre'e kan' bza'a ake'n, bayombia' ake' Jesúsen'. Na' yell ka' zjalli' awlloze, be'nn zan bllach zjakdo ake' kon nia' ake', ba lla'a akre' ka bllin ren Jesúsen' be'nn ka' nche'n, na' badil ake' Le'e. 34 Ka balloj Jesúsen' lo barcon', bre're' be'nn zan kwis ba lla'a akre' ganna', na' baya'chra'lle' leake', le lla'a ake' ka lla'a xhi'r da'o ba nono llra' xan, na'll bzorawe' da zan broe're' leake'. 35 Bixha ka ba llonen ba wlle', jabi'y be'nn ka' non Le'e txhen na', lle ake' Le'e:

—Letek gale na't ganni naken ga nollno llra'. ³⁶ Goll be'nn ka' lljayake' nench lljake' gan' lla'a be'nn ka' llen lyi'xe, na' yell da'o ka' zjalli' do na'ze, lljaxi'i ake' da gao ake', le bibi no'x ake' da gao ake'.

³⁷Na'll ballie' xti'll ake'n lle'e leake':

- —Re', lewe'e ake' da gao ake'. Na'll lle ake' Le'e:
- —¿Ga lljaxi'to' mell ke chop gayoa (200) lla llin, na' lljaxi'to' da gao be'nn ki?

38 Na'll lle'e leake':

- —¿Bale yet xtir no'xre? Lewiachke. Na'll bwia ake', na'll lle ake' Le'e:
- —De ga'y yet xtir, na' ye chop belya'.

³⁹Na'll golle' leake' kwe' ake' kwen kwen rao yi'xen'. ⁴⁰Na'll brekw ake' to gayoa (100) wej ake', na' do chiyon (50) wej ake'. ⁴¹Na'll bxhie' ga'y yet xtir ka', na' bel ka' ye chope. Na'll blis rawe'n llwie' yebáre benla'ye'n, na'll bxhoxhjen be'e be'nn ka' non Le'e txhen na', na' bdislas ake'n. Leska' bdislas ake'

bel ka' chop, rao yeolol be'nn ka'.

42 Na' ka badao yeolol akte', na' berj aktere' kwasro.

43 Na' batop ake' da la'o ka', na' goken ke do chllinn

(12) llom, ren bel ka' baga'nnen'.

44 Na' be'nn ka' bdaon' nak ake' ka do ga'y mir be'nne.

Jesúsen' bze'e rao nisda'on

(Mt. 14:22-27; Jn.6:16-21)

⁴⁵Na'll le gollte Jesúsen' be'nn ka' non Le'e txhen na', wayo' ake' lo barcon' wabiarao ake', lljayake' Betsaida yellen' lli' chla' nisda'on, chak nna na'y Le'en llawe' be'nn ka' nez. 46 Bixha ka bayoll bawe' be'nn ka' nezen', byeje' rao ya' ie'rene' Diosen' di'lle. 47 Na' ka golen. barcon' zayo' be'nn ka', ba dan kllol nisda'on, na' Jesúsen' ye toze de'e rao yo billen'. ⁴⁸Na' bre're' ka llakdil ren be'nn ka' llsa'a ake' barcon', le be'n za'n krere; ba llonten balze kate zaveje' gan' lla'a ake'n, zaveje' to rao nisen', lle'nre' yedie' rao ake'. ⁴⁹Bixha ka bre'e akre' Le'en zayeje' rao nisda'o na'n, gok akre' cha' bxen na', na'll besia' ake'. 50 Le yeolol ake', ka ba bre'e akre! Le'en blleb ake!. Na'll balwille' leake' lle'e leake':

⁵¹Na'll bayepe' lo barcon' gan' lla'a ake'n, na'll le brexhte be'n, na'll llabán akre' kwis. ⁵²Le nna llon ake' yel wan dan' bwawe' be'nn ga'y mir ka', bi llejnie' akya'nnre',

—iLegón war, nada'n, bi llebre!

Jesúsen' bayone' be'nn zan gan' nzi'i Genesaret

le nna nchole yichjra'llda'o ake'n.

(Mt. 14:34-36)

⁵³Ka bayoll bla'y ake' nisda'on, bllin ake' gan' nbane Genesareten', na' balloj ake' lo barcon'. ⁵⁴Ka balloj ake' lo barcon', le bayombia' akte' kaze Jesúsen'. ⁵⁵Na'll bllachdo yeolol be'nn yell ka' gan' nbane Genesareten', za'krén ake' be'nn we'e ka', nlen ake' leake' do ka nak gan' xhoa ake' na'. Na' jwa'a ake' leake' kon ga nnez akre' zo Jesúsen'. ⁵⁶Na' kon gan' ll-lline' do yell da'o ka', do yell xhen ka', do lyi'xe llni't ake' be'nn we'e ka' do tnez; na'll lla'tyoe akre' Le'e, we'e latj la' kan akze' lloa' xhe'e, na' yeolol be'nn ka' llgan Le'en llayak akte'.

Di'll zban ll-lloj lloa'llon' ll-llonen gak ra'llda'ollon' yall rao Dios

(Mt. 15:1-20)

Bal be'nn fariseo ka', na' be'nn ka' llsedre ley dan' bzoj da Moisésen' be'nn ka' za'k Jerusalén na', jabi'y ake' gan' ze Jesúsen'. ²Ka bre'e akre' bal be'nn ka' non Jesúsen' txhen bi bna'a ake' zan ras kan' llon leake' kat gao ake', na'll bdao ake' xhia. ³(Le be'nn fariseo ka', na' veolol be'nn Israel ka', nao ake' klle'llo dan' bsed xozxta'o ake' ka', llaya'l wna'a ake' zan ras to kwen to kwen kat gao ake'. 4Leska' kat llallín ake' lljake' lao ya'a, cha' bi wna'a ake' kwasro bi gao ake'. Leska' llayiblolj ake' no xchinraz ake' de ya, llayib ake' no tas, no leo, no ye'se de ya, na' ren ga llxhoa ake' lltas ake', da zan da ka' nao ake'n.) ⁵Na'll be'nn fariseo ka', na' be'nn ka' llsedre ke ley dan' bzoj da Moisésen' bnnab akre' Le'e:

—¿Bixchen bi llon be'nn ka' non rwe' txhen kan' ben xozxta'ollo ka', bi llna'a ake' weltze toto kwe' ake' gao ake'? ⁶Na'll lle Jesúsen' leake':

—iRe' be'nn chop rao nakre! Da likzen' bzoj da Isaíasen' ke re' kana', kan' bne'e:

Be'nn ki llon ake' nada' xhen kon lloa' ake' naze', kere lloe'rao ake' nada' do yichj do ra'll ake'n.

⁷ Bibi za'k dan' lloe'rao ake' nada'n,

ka nak llroe' llsed akre' da bayirjla'll be'nnachzen'. ⁸Ka'n llonre llkwasre di'll bia'a ke Xanllo Diosen' ka'le, na' lloe'la'llre llonre da bayirj be'nnach, ka nak llayibre zan ras no leo, no tas keré, na' lli' yichjre llonre da zan ka da ki.

9Leska' lle'e leake':

—Llbej yichjre dan' ne Diosen' gonre nench nnaore dan' bayirila'll be'nnach. 10 Zan ka nak da Moisésen', ki bzoje' xti'll Diosen': "Llaya'l gap xaxhna're bara'nne", na' "Be'nnen' yichibie' ke xaxhne'e llaya'l gate'." 11 Zan re' nere: "Kon dan' ye ake' xaxhna' ake': Bibi de gonna' gakrena' re', le yeolol da de kia! naken dan! nzi!i Corbán" (lle'nen nen ba bena'n rallna'a Diosen'). 12 Kone ka' lloe're latj bi gakrén be'nn ka' xaxhna' ake'. 13 Kone ka' llbekre ka'le dan' ne Diosen', na' naore dan' bkwa'nn da xozxta'ore ka', na' llonre yela' ka nak da ki.

¹⁴Na'll goxh Jesúsen' be'nn zan ka', na' lle'e leake':

—Lewzenay ke kan' nia' ni yeololre, na' lechejnie'. ¹⁵Kere da ka' lle'j llao be'nn ka', llon leake' gak ake' be'nn wen da xhinnj rao Diosen'. Da xhinnj ka' ll-lloj lo yichjra'llda'o ake' na'n, len na' llonen leake' be'nn wen da xhinnj. ¹⁶Re' zo nay da yénere, lewzenay.

¹⁷Ka baza'a Jesúsen' gan' lla'a be'nn zan ka', na' byoe' yo', na'll bnnab be'nn ka' non Le'e txhen na', akre zejen dan' bayoll bne'en. ¹⁸Na'll lle'e leake':

—¿Leska' re' bi llejnie're dan' nia'? ¿Bi llejnie're kere dan' lle'j llao be'nn ka' llon leake' be'nn wen da xhinnj rao Diosen'? ¹⁹Le dan' lle'j llao ake'n kere llo'n lo yichjra'llda'ollo, llejen lo le'llo choll, na' lladeten.

Bne'e ka', nench broe're' yeolol yel wao naken wen gaollon. ²⁰Na'll bne'e da yobre:

—Dan' ll-lloj yichjra'llda'o be'nn ka', len na' llon leake' be'nn wen da xhinnj. ²¹Le lo yichjra'llda'o ake' na'n, ll-llach da xhinnjen' llwia ake' gon ake'n, na' llzoa xto ake', na' llzorén lwellj ake' la'kze bi nchayna'a ake', na' llaso't ake' be'nne; ²²na' llban ake', na' llzera'll ake' mell ke be'nn yobre, na' llon ake' da xhinnj, na' lloe' ake' di'll wenra'lle, na' llon ake' da nak zdo', na' llaxhe' akre' be'nne, na' llyirj ake' xti'll be'nne, na' nak ake' be'nn ya'ra'lle, llon ake' da ke llaya'l gon ake'. ²³Yeolol ka nak da xhinni ki, ll-llach lo yichjra'llda'o be'nnachen', na' llonen le'e be'nn wen da xhinnj rao Diosen!.

To no'r bi nak be'nn Israel benlira'lle' Jesúsen'

(Mt. 15:21-28)

²⁴Na' baza'a Jesúsen' zayeje' gan' nbane yell ka' re Tiro na' Sidón. Na' byoe' to lo yo' bi gokra'lle' nneze be'nne cha' ganna' blline', bixha bi gok kwa'che'. ²⁵Le bnnezte to no're, to be'nn zo to xhi'nne' no're, bin' yo' daxi'o. Na'll zejdoe' jache'k xhibe' rawe'n. ²⁶Na' no'r na', bi nake' be'nn Israel, nake' be'nn yell gan' nzi'i Sirofenicia; go'tyoere' Jesúsen' yebeje' daxi'on yo' xhi'nne'n. ²⁷Bixha Jesúsen' lle'e le'e:

—Zga'tek llaya'l we'llo latj yerje xhi'nnllo ka', le bi naken wen si'rizllo dan' llao akbe'n, wza'l-llon rao be'kw ak.

²⁸Na'll balli'i no'ren' xti'lle'n, lle'e Le'e:

—Ka' naksen, Xa, zan wakse gao akba' bla' da'o ka', llexj gan' llbe' xhi'nnllo ka'.

²⁹Na'll lle Jesúsen' no'ren':

—Da li kwis kan' ne'on. Bayej na', ba ballojte daxi'on yo' yichjra'llda'o xhi'nno' no'ren'.

³⁰Bixha ka balline' rille'n, ba ballojte' daxi'on yo' xhi'nne'n, na' ba xhoatebe' wen gan' lltasbe'n.

Jesúsen' bayone' to be'nn kwell be'nn bi llak nne'e

31 Bde na' baza'a Jesúsen' gan' nbane Tiron', badete' gan' nbane Sidón, na' gan' nbane Decápolis ballinte' lloa' nisda'o Galilea. 32 Na' jwa'a ake' to be'nn kwell, na' be'nn ni bi llak nne'e, na'll lla'tyoe akre' Jesúsen' la' wxoaze ta'ke'n yichje'. 33 Na'll brej Jesúsen' le'e toze' radj be'nn ka', na' bche'e le'e ga yobre, na'll bzeb xhbene' lo nay be'nnen', na'll bxheje' xhe'n, na' bdane' roll be'nnen'. 34 Na'll blis rawe'n llwie' yebáre, llabanre', na' lle'e be'nnen':

—iEfata! —Lle'nen nen: iBayarje!

³⁵Na' le bayarjte nay be'nnen', leska' bayak rolle'n, na' gok banne'e kwasro. ³⁶Na'll goll Jesúsen' leake' notno ye ake' kan' bayone' be'nnen'. Na' la'kze golle' leake' ka', yezikre lloe' be'nn ka' di'lle. ³⁷Na' le llabane be'nn ka', ne ake':

—Le wen ba bene', llakte' llone' nench yeyene be'nn kwell, na' be'nn ka' bi llak nne'e, llanné ake'.

Jesúsen' bwawe' tap mir be'nne (Mt. 15:32-39)

8 To lla ka badop be'nn zan kwis, na' be'nn ka' bi de da gao ake', na' Jesúsen' goxhe' be'nn ka' non Le'e txhen na', lle'e leake':

²—Llaya'chra'lla' be'nn ki, ba gok chonn lla lla'rén ake' lli'o, na' bibi de gao ake'. ³Na' cha' yese'l ake' ka'ze, nxholl chaz ake' da xchol do tnez, le bal ake' za'a ake' zi'te.

⁴Na'll lle be'nn ka' Le'e:

—¿Ga llélello da gao yeolol be'nn ki? Gan' zollo ni naken to latj dach ga bibi dekze chras.

⁵Na'll bnnabre' leake':

—¿Bale yet xtir no'xre? Na'll lle ake' Le'e:

-Gallen.

⁶Na'll golle' be'nn zan ka' kwe' ake' rao yo, na'll bxhie' gall yet xtir ka', na' be'e yel llioxken ke Dios; na'll bzorawe' llxhoxhjen, na'll be'e be'nn ka' non Le'e txhen na', na' leake' jalek ake' ga'a yet xtir ka' rao be'nn zan ka'. ⁷Leska' de ye to chop bel da'o ak, na' benla'yeba', na' be'eba' leake' nench bdis akeba'. ⁸Ka gok bdao ake', berj aktere' kwasro, na' batop ake' da la'o ka' baga'nne, na' goken ye gall llom. ⁹Na' be'nn ka' bdaon', nak ake' ka

do tap mire. Bayoll na', na'll base'e leake'. ¹⁰Na' bayoe' lo barco ren be'nn ka' non Le'e txhen na', ballín akte' gan' nbane Dalmanuta.

Bnnab ake' Jesúsen' gone' to yel wak da re'e akre'

(Mt. 16:1-4; Lc. 12:54-56)

¹¹Na' be'nn ka' nzi'i fariseo bzorao ake' lla'dyi' ake' Le'e di'lle, llnnab ake' gone' to yel wak da yebán akre', na'll re'e akre' cha' da li zerén Diosen' Le'e. ¹²Na' Jesúsen' gokre' to lo ra'llda'we', bne'e:

—¿Bixchen llnnabre to da re'tere nench nnézere cha' Diosen' bse'l nada'? Di'll li nia', bi wroe'ra' re' dan' llnnabren'.

¹³Na' bkwa'nne' leake', na' bayoe' lo barcon' zayeje' ye chla're nisda'on.

Dan' llzejnie' be'nn fariseo ka' naken ka kwa binn

(Mt. 16:5-12)

¹⁴Be'nn ka' non Jesúsen' txhen gonra'll ake' go'x ake' da gao ake', ti'chga yet xtir no'x ake' lo barcon'. ¹⁵Na'll lle Jesúsen' leake':

—Lewiá ke si'rizre kwa binn ke be'nn fariseo ka', na' be'nn ka' llon txhen Herodes na'.

¹⁶Na'll bzorao lloe'rén lwellj ake' di'll, ne ake':

—Dan' bi no'xllo yet xtir na'n ne'e ka'.

¹⁷Na' Jesúsen' gokbe're' ka di'llen' lloe'rén lwellj ake'n, na' lle'e leake':

—¿Bixchen lloe're di'll ke dan' bi no'xre yet xtir na'? ¿Bi nna chejnie're bi zejen dan' nia' ka'? ¿Nchole yichjra'llda'oren'? ¹⁸ ¿Zote raore, na' bi llre're? ¿Zote nayre, na' 79 San Marcos 8

bi llénere? ¿Bi lljadinra'llre kan' ba broe'ra' re' yel wak kia'n? ¹⁹Kan' bwawa' ga'y mir be'nne ren ga'yze yet xtir, ¿bale llom da la'o batopre?

Na'll lle ake' Le'e:

—Chllinnen (12).

²⁰—Leska'n kone gall yet xtir na', bwawa' tap mir be'nne. ¿Bale llom da la'o batopre?

Na'll ne ake':

-Gallen.

²¹Na'll lle'e leake':

—¿Bi nna chejnie're kan' nia'?

Jesúsen' bayone' to be'nn lchol gan' nzi'i Betsaida

²²Ka bllin ake' gan' nzi'i Betsaida na', le jwa'a akte' to be'nn lchole rawe'n, na' go'tyoe akre' Jesúsen' cha' kane' le'e. ²³Na'll le be'xte' ta'k be'nn lcholen', na' breje' le'e yell. Na' btope' xhe'n rawe'n, na'll bxoa ta'ke'n yichje', na' llnnabre' le'e cha' llre're' ra'te. ²⁴Na' be'nnen' nak be'nn lcholen' lle'e Le'e:

—Llre'ra' be'nn ka' nak ake' ka yay, na' za'a ake'n.

²⁵Na'll bda'a ta'k Jesúsen' rawe'n da yobre, na' bene' nench bare're', na' gok bare're' kwasro. ²⁶Na' base'le' le'e rille', lle'e le'e:

—Bi lljada'o lyell, na' notno we'reno' di'll kan' bayona' rwe'n.

Pedron' bne'e Jesúsen' nake' Cristo be'nnen' bse'l Diosen' llnebie'

(Mt. 16:13-20; Lc. 9:18-21)

²⁷Na' le byejte Jesúsen' ren be'nn ka' non Le'e txhen yell da'o ka' zjalli' do gan' nbane Cesarea de Filipo. Ka zjake' tnez na'n, bnnabre' be'nn ka' nao Le'en:

—¿Bi ne be'nn ka' noxha nada'?

²⁸Na'll balli'i ake' xti'lle'n lle ake' Le'e:

—Bal ake' ne ake' rwe'n Juan be'nnen' bchoa nis. Na' ye bal ake' ne ake' Elíasen'. Ye bale' ne ake' nako' to be'nn ka' be'e xti'll Diosen' kana'.

²⁹Na'll lle'e leake':

—¿Bixha ne re'? ¿Noxha nada'? Na'll lle Pedron' Le'e:

—Rwe'n Cristo be'nn bse'l Diosen'.

30 Na'll golle' leake', nono we'rén
ake' di'll chat Le'en Cristo.

Jesúsen' bzorao llyixjwe're' gate' (Mt. 16:21-28; Lc. 9:22-27)

31Ka bzorao Jesúsen' bzejnie're' leake' kan' gak ke'en, lle'e leake':
—Dekz de wsa'kzi' ake' nada', naka' Be'nn Gorj Radj Be'nnach.
Be'nn gor brao ke be'nn Israel ka', na' bxoz wnebia' ka', na' ren be'nn ka' llsedre ke ley dan' bzoj da Moisésen', bi cho'ra'll ake' nada', na' got ake' nada', na' wayón lla na',

³²Kwasro llzejnie're' leake' kan' gak ke'en. Na'll brej Pedron' Le'e radj be'nn ka', bzorawe' dile' Le'e dan' ne'e ka'. ³³Na' Jesúsen' bayechje' llwiateze' be'nn ka', benre' Pedron' znia lle'e le'e:

wabana'.

—iBabi'y ka'le, llonzo' ka llon daxi'ore! Bi llbek yichjo' dan' lle'ne Dios, llbek yichjzo' dan' lle'ne be'nnachre.

³⁴Na'll goxhe' be'nn ka' non Le'e txhen, na' yezikre be'nn ka' nao Le'en, na' lle'e leake':

—Noteze be'nne cha' lle'nre' gake' nada' txhen, llaya'l wsanra'll kwine', na' gone' ka to be'nn noa' cruz ke'e, na' nawe' nada'. ³⁵Noteze be'nn

lle'nre' yesrá yel nban ke kwine' yellrio ni, wnite'n, na' noteze wnit vel nban ke'en ni kia' nada', na' ni ke xti'lla' na', le'en ga't yel nban zejlikane ke'e. 36 ¿Bixha za'ken na', cha' to be'nne gone' gan doxhente da de rao yellrio, na' kweyie', bi ga't yel nban zejlikane ke'e? 37 ¿Bi kone ga'we' yel nban na'? 38 Noteze be'nne cha' waye're' ni kia' nada', leska! ke xti!lla!n rao be!nn wen da xhinni ka' lla'a nna', be'nn ka' ba bsanra'll Dios, leska' nada' Be'nnen' Gorj Radj Be'nnach, waye'ra' ke be'nn ka' katen' yeda' nsa'a yel banez ke Xa' Diosen' kate yedrena' angl ke'e ka'.

9 Leska' lle Jesúsen' leake':
—Di'll li nia' re', balre lla'a
ganni nna', nna nbanre kate llin lla
re're Diosen', wroe' yel wak xhen
ke'en kan' llnebie'n.

Jesúsen' goke' ka to beni' (Mt. 17:1-13; Lc. 9:28-36)

²Bde xop lla, goxh Jesúsen' Pedron', na' Jacobon', na' ren Juan na', na' bche'e leake' to rao ya' sibe, na' nollre no bche'e ake'. Na' llwia akte' na', kate blla'a yichjrao Jesúsen'. ³Na' xhara'ne'n goken llaktit, goken llich kwis ka'kze beye, ni to nono gakse gon len kan' goken na', la'kze llebraz chiben. ⁴Na' bre'e akre' da Elías ren da Moisés lloe'rén ake' Jesúsen' di'lle. ⁵Na'll Pedron' lle'e Jesúsen':

—Maestro, le wen zollo ganni. Na' gonto' chonn yo' de yixh, to ko'o rwe', na' to ke Moisés, na' ye to ke Elías na'.

⁶Na' ni ke llakbe'zre' bin' ne'e, do llebtit ake' dan' llre'e akre'n. ⁷Kat blle' to bej gan' lla'a ake'n byechjen leake', na' lo bej na', ben akre' bne Diosen':

—Be'nn nin', xhi'nna' nllie'ra', llaya'l wzenayre ke'e.

⁸Ka bwiado ake' da yobre nollno bre'e akre'. Ye toze Jesúsen' ze.

⁹Ka llayetj ake' le' ya' na', golle' leake' bi we'e ake' di'll ka dan' bre'e akre'n, lle'e leake':

—Kat yebana' radj be'nn wat ka', nada' naka' Be'nn Gorj Radj Be'nnach, kana'll wak we're di'll ka'.

¹⁰Na' ka' ben ake', bi be'e ake' di'll, na' bi byejnie' akre' dan' golle' leake' dan' yebane' radj be'nn wat ka'. ¹¹Na'll bnnab akre' Le'e:

—¿Bixchen nerize be'nn ka' llsedre ke ley dan' bzoj da Moisésen', zga'tek da Elías na'n de yede' yellrion' ka za yedre Criston'?

¹²Na'llen' ballie' xti'll ake'n, lle'e leake':

—Da likzen' zga'tek da Elías na'kze yede' nench yewe' xhnneze dan' llak rao yellrio; leska' nyojen ka nak Be'nnen' Gorj Radj Be'nnachen' wsa'kzi' ake' Le'e, na' gon ake' Le'e kaze. ¹³Ni nia' re', ba bedkze da Elíasen', na' ben akre' le'e kon ka nen ke ake', le kan' ba nyojkzen gak ke'e.

Jesúsen' bayone' to bida'o yo' daxi'o (Mt. 17:14-21; Lc. 9:37-43)

¹⁴Bixha ka ballín Jesúsen' gan' lla'a be'nn ka' yela' non Le'e txhen na', bre're' be'nn zan nechj leake', na' zjazé be'nn ka' llsedre ke ley dan' bzoj da Moisésen' llakyollrén ake' leake'. ¹⁵Kate bre'e akre' Le'en llabán akre', na'll jakdoe' jawap ake' Le'e lliox. ¹⁶Na'll bnnabre' leake':

—¿Bi ken llakdilrenre be'nn ka'?

17 Na' blloj to be'nne radj be'nn
zan ka', lle'e Jesúsen':

—Maestro, ganni nchia' to xhi'nna' yo'be' daxi'o, na' nonen lebe' blloj. ¹⁸Kon ka zezbe' llo'xen lebe' llxizen lebe', llarj pep blli'n lloa'be', na' llaoxoxj laybe', na' zjazé llyechbe'. Na' golla' be'nn ka' non rwe' txhen na', cha' yebej ake' daxi'on, na' bi gok ake'.

19 Na'll lle Jesúsen' leake':

—iRe' nakre be'nn zid bi llejle're! ¿Bate zerena' re'? Na' nara'chk ye arte soera' serena' re'. Ledá wa'a bida'on ganni.

²⁰Na'll jwa'a ake' bida'on, bixha daxi'on yo' bida'on, ka bre'en Jesúsen' bxizen bida'on res kwis, bzalen lebe' lltolen lebe', llalj pep blli'n lloa'be'. ²¹Na'll llnnabe' Jesúsen' xabe'n:

- —¿Artxha ba gok llonen lebe' ki? Na'll lle'e Le'e:
- —Ka nakbe' bida'ote. ²²Na' da zan ras ba bzalen lebe' do lo yi' do lo nis, to lle'nen wlleyi'n lebe'. Cha' rwe' wak wayonobe', na' baya'chra'll neto' bayonbe'.

²³Na'll lle Jesúsen' le'e:

—Wakse kon cha' llonlira'llo', be'nnen' llejle'n wakse dan' llnnabe'n.

²⁴Le balli'te xa bida'on xti'lle'n, lle'e Le'e:

—iLlejlia'; gokrén nada' gonlira'lla' vezikre!

²⁵Ka bre'e Jesúsen' ba lla'll be'nn zanlle, na'll bdile' daxi'on yo' bida'on lle'en:

—Daxi'o, rwe'n nono' bida'on blloje na' nkwellbe', na' llepa' rwe' yellojo' chras lo yichjra'llda'o bida'on. Bsanbe', na' bill wayo' yichjra'llda'obe'n da yobre.

²⁶Daxi'on besia'n, na' ye to bxizen bida'on zi'llo, na'll ballojen; ka'kze bi wat bkwa'nnen lebe'. Ka bre'e be'nn ka' lla'a na', na'll ne ake':

—Baje gotbe'n.

²⁷Na' Jesúsen' be'xe' ta'kbe'n balisebe', bazolla'tebe'.

²⁸Na'll ka byo' Jesúsen' lo yo', be'nn ka' non Le'e txhen na', jannab akre' Le'e to wraze', lle ake' Le'e:

—¿Bixchen bi gok netzto' yebejto' daxi'on?

²⁹Na'll lle'e leake':

—Nench gak yebejre ka daxi'on llon ki, llaya'l we'la'llre yelwillre Diosen' na' gonre was.

Jesúsen' bdixjwe're' da yobre gate'

(Mt. 17:22-23; Lc. 9:43-45)

³⁰Ka baza'a ake' ganna', badé ake' gan' nbane Galilea, na' Jesúsen' bi gokra'lle' no nneze cha' de'e ganna'.

³¹Le llzejnie're' be'nn ka' non Le'e txhen na', lle'e leake':

—Nada' Be'nnen' Gorj Radj Be'nnach, dekz de gaka' rallna'a be'nne ka' llwie nada' got ake' nada', na' yeyoll got ake' nada', na' yeyonn lla yebana'.

³²Na' be'nn ka' chras bi byejnie' aksere' bi ken ne'e ka', to lleb akze' wnnab akre' Le'e.

Gokyoll be'nn ka' non Jesúsen' txhen nore nakll be'nn brao

(Mt. 18:1-5; Lc. 9:46-48)

³³Na' bllin ake' Capernaum, ka ba zo ake' yo' na', bnnabe Jesúsen' leake':

—¿Bi di'llen' lloe'zre beche?

³⁴Leake'n bibi bne akse', to bze ake' llize llak zban akre', le ka

bechre za'ke tnez na'n, llakdil ake' noren' nakll be'nn brao. ³⁵Na'll blle' Jesúsen', na' goxhe' be'nn chllinn ka', na' lle'e leake':

—Kon to re' cha' lle'nere gakre be'nn brao, llaya'l gakre ka to be'nn bibi za'ke ga zeraoze, na' gakre be'nn wzenia'na'a lwelljre.

³⁶Na'll goxhe' to bida'o, bze'ebe' kllol ake'n, na' bde'lebe' lle'e leake':

³⁷—Noteze be'nne gonre bida'o wen, ni kia' nada', nadkza'n llonre' wen chet ka', na' be'nne llone' wen ren nada', kere nada'n llonre' wen, be'nnen' bse'l nada'n llonre' wen.

Be'nne bi llwie lli'o, txhen na' llone' lli'o

(Lc. 9:49-50; Mt. 10:42)

³⁸Na'll Juan na', lle'e Jesúsen':

—Maestro, bre'to' to be'nn llabeje' daxi'o yo' yichjra'llda'o be'nne kone ra'o rwe', na' bi none' lli'o txhen, na' golltoe' bi gone' ka', le bi nawe' lli'o.

39 Na'll lle Jesúsen' leake':

—Bi wllonre gone' ka', cha' to be'nne llone' yel wak llwa'le' ra'a, zeje di'll txhen na' llone' nada', bi gak nne'e krere kia'. ⁴⁰Cha' to be'nne bi llwiere' lli'o, txhenkzen' nake' lli'o. ⁴¹Noteze be'nne cha' gonne' la' txhi'yze nis ye'jre, ni ke dan' nonre nada' txhen, da li nia' re', bi nnitrao ka nake dan' gon ake'n.

Llaya'l wiallo ke wlli'yllo be'nne gone' da xhinnj

(Mt. 18:6-9; Lc. 17:1-2)

42 Leska' bne Jesúsen':

—Noteze be'nn gone' bix to bida'o ki nxenra'll nada' gonbe'

da xhinnjen', naktere wen wchej ake' yene' to yej yich, na' lljaza'l ake' le'e lo nisda'o, kerke da gone' bix to bida'o ki. 43 Cha' to ta'kre llxhoben re' gonre da xhinnjen', wenre chenak wchoyren, kerke da gonre da xhinnjen', wenre yellinre gan' de yel nban na', yalli chla' ta'kren', kerke da zo llopten wayejre lo gabil ga lla'lnninn yi' da nono soekze yesor len. 44 Ganna' lla'a wara'o ba bi llat, leska' yi' da bi llayore. 45 Cha' nia'ren' llxhoben re' gonre da xhinnjen', wenre chenak wchoyren, kerke da gonre da xhinnjen', wenre yellinre gan' de yel nban na', yalli chla' nia're, kerke da zo llopten wayejre gabil ga lla'Inninn yi' da nono soekze yesor len. ⁴⁶Ganna' lla'a wara'o ba bi llat, na' yi' da bi llayorkze. 47 Cha' dan' llre'e raoren' llxhoben re' nench gonre da xhinnjen', wenre chenak kwejre yejraoren', kerke da gonre da xhinnjen', wenre yedo'lere gan' llnebia' Diosen' kon ren chla'ze raoren', kerke da zo llopten yese'le' re' gabil. 48 Ganna' lla'a wara'o ba bi llat, na' yi' da bi llayore.

⁴⁹ 'Yeolol be'nne te ake' gak ake' prueb, na' yeololte be'nn wayón kwine' rallna'a Dios, gak ake' ka da nwe'e ze'de. ⁵⁰Da wen ze'den', zan cha' nit yel zna' ken, billbi de gonre nench wayaken zich. Na' legón re' ka ze'd na', legón da wen, na' lesorén lwelljre wen.

Jesúsen' broe're' bi naken wen wsan xho'r xhyio be'nne

(Mt. 19:1-12; Lc. 16:18)

10 Bde na', bza'a Jesúsen' Capernaum, na' byeje' gan' 83 San Marcos 10

nbane Judea, bala'ye' ye chla' yeo Jordán na'. Na' da yobre bllay be'nn zan kwis gan' zoe'n, na' bzorawe' llzejnie're' leake' kan' llonkze'. ²Na' bal be'nn fariseo ka' jabi'y ake', na' llnnab akre' Le'e cha' naken wen be'nn ka' nchayna'a wsan no'r ke ake'. Lle ake' Le'e ka', le lle'n akre' kwej ake' Le'e di'll nench akre nne'e. ³Jesúsen' lle'e leake':

—¿Akxha ne ley dan' bzoj da Moisésen'?

⁴Na'll bne ake':

—Da Moisésen' be'e latj wsanra'll lwellj ake', na' chaste to yich we'n di'll bara'a ake'.

⁵Jesúsen' ballie' xti'll ake'n, lle'e leake':

—Yel yichjra'llda'o zid keré na'n, be'e da Moisésen' latj gonre ka'. ⁶ Zan da nell ka bxhe yellrion', "Diosen' bene' be'nn byio ren no're." ⁷ Ke len na' bne'e: "Be'nn byio yere'e kwit xaxhne'e, na' sie' no're, ⁸ na' chop ake' gak ake' ka toze be'nn." Na'llen' bill nak ke ke ake', ba nak ake' toze be'nne. ⁹ Ke len na', be'nn ba bko'd Diosen', bi gak yela'a be'nnach leake'.

¹⁰Ka ballín ake' yo' na', be'nn ka' non Le'e txhen na', bnnab ake' da yobre kan' goll be'nn ka' Le'en. ¹¹Na'll lle'e leake':

—Noteze be'nn cha' wsanra'll xho're', na' sie' ye to no'r yobre, da xhinnj xhen na' llone' ke xho're', llonkze' ka be'nn zo xto. ¹²Leska' no'ren' cha' wsanra'll xhyiwe', na' sie' ye to be'nn vobre, leska' llonkze' ka be'nn zo xto.

Jesúsen' benla'ye' bida'o ak

(Mt. 19:13-15; Lc. 18:15-17)

¹³Na'll jwa'a ake' bida'o ak rao Jesúsen' nench kane' yichj akbe', na' be'nn ka' non Le'e txhen na', ben akre' be'nn ka' znia. ¹⁴Ka bre'e Jesúsen' kan' llon ake'n, goklle'e leake', na' golle' leake':

—Lewe'e latj yed bida'o ka' rawa' ni, bi wllonre; le be'nn ka' nak ka bida'o ki, leake'n nak Diosen' txhen be'nn llnebia'. ¹⁵Da li nia' re', noteze be'nne cha' bi gone' ka llon bida'o ki nxenra'll akbe' nada', ni ke gakze' gake' Diosen' txhen be'nnen' llnebia'.

¹⁶Na'll bde'le' toto bida'o ka', bxoa ta'ke'n yichj akbe'n, na' benla'ye' leakbe'.

Be'nn we'o nak be'nn wnia'

(Mt. 19:16-30; Lc. 18:18-30)

¹⁷Ka bro' Jesúsen' nez, zejdo to be'nn we'o jache'k xhibe' rawe'n, na' llnnabre' Le'e:

—Maestro, nako' be'nn wen kwis, ¿akre gona' nench ga't yel nban zejlikane kia'?

¹⁸Jesúsen' golle' Le'e:

—¿Bixchen llezo' nada' be'nn wen? Nono be'nn wen llra', toze Diosen' nak be'nn wen. ¹⁹Rwe' nnezkzro' bin' ne Diosen' gonllo: "Bi tareno' wde wdere no're, bi gako' be'nn wen xhia, bi kwano', bi wxoa'o da xhinnj ko'll be'nne da bi bene', bi siye'o, bdap bara'nn xaxhna'o."

²⁰Na'll lle'e Le'e:

—Maestro, yeolol da ki llona' ka nna naktia' xkwi'dte.

²¹Na'll Jesúsen' bwie' le'e, llakre' le'e, lle'e le'e:

—Ye toze da yallj gono'; bayej jaye't yeolol da de ko'o, na' mell dan' go'to'n na', be'en be'nn ya'ch, na'll ga't yel wnia' ko'o yebá, na'tell yedo' nnao' nada'.

San Marcos 10 84

²²Bixha ka benre' ka', gokre' kwis, zayeje' llakre', le nake' be'nn wnia' kwis.

²³Na'll bayechj Jesúsen' bwie' be'nn ka' nechj Le'en, na' lle'e be'nn ka' non Le'e txhen na':

—iBni' kwis naken ke to be'nn wnia', we'e latj nnebia' Diosen' yichjra'llda'we'!

²⁴Na' be'nn ka' non Jesúsen' txhen na', llabán akre' kwis kan' bne'en, na' bne Jesúsen' ye to, lle'e leake':

—Re', xhi'nna', bni' kwis naken ke be'nn ka' nxenra'll yel wnia' ke ake'n, we'e ake' latj nnebia' Diosen' yichjra'llda'o ake'. ²⁵Sétere te to bayi'xe ban' nzi'i camello lo nay ye'chich, kerke to be'nn wnia' we'e latj nnebia' Diosen' yichjra'llda'we'n.

²⁶Na' llabán akre' kwis kan' ben akre' bne'en, na'll lle lwellj ake':

- —¿Noxha gakze yerá cha'?

 ²⁷ Jesúsen' llwie' leake', na'll
 bne'e:
- —Da li be'nnachen' bibi gak gone', zan ka nak Diosen', yeololte llak llone', bibi de da gakre' bni' gone'n.

²⁸Na'll Pedron' lle'e Le'e:

—Neto' ba bsanra'llto' yeolol da de keto' nench naoto' rwe'.

²⁹ Jesúsen' bne'e:

—Di'll li llepa' re', cha' to be'nne bsanra'lle' rille', bi'che', zane', xaxhne'e, no'r ke'e, xhi'nne', yellrio ke'e, ni kia' nada' nench wzenaye' xti'lla'n, ³⁰ za'klle da wayoe' Diosen' le'e, da xhenll wayoe' Diosen' le'e, kerke da ka' bsanra'lle'n, to gayoa (100) ras ke to dan' bniten' wayoe' le'e, la'kze cha' bllayrawe', na' kate llin lla na', we'e yel nban zejlikane ke'e. ³¹Na' llepa' re', be'nn zan nak

ake' ka be'nn lliarao nna', wllin lla kat yeyak ake' ka be'nn za'a xhante, na' be'nn ka' nak ake' ka be'nn za'a xhante nna', leake'n yeyak ake' ka be'nn lliarao.

Da yobre bdixjwe' Jesúsen' gate' (Mt. 20:17-19; Lc. 18:31-34)

³²Ka yo' ake' nez, llep ake' llin ake' gan' nzi'i Jerusalén na', Jesúsen' lliarawe' rao be'nn ka' non Le'e txhen na', na'll llon ake' yel wan nao ake' lleb ake'. Na'll da yobre Jesúsen' goxhe' be'nn chllinn ka' ga yobre, na' bzorao lloe'rene' leake' di'll kan' gak ke'en. ³³Lle'e leake':

—Lewiake nna', zejllo Jerusalén na', nada', Be'nn Gorj Radj Be'nnach, gaka' rao na'a bxoz wnebia' ka', na' be'nn ka' llsedre ke ley dan' bzoj da Moisésen' wchoy ake' kia' gata', na' gon ake' nada' rao na'a be'nn ka' bi nak be'nn Israel. ³⁴Na' wtitj akre' nada', chintat ake' nada', wxi't ake' xhe'n yichjrawa', na' got ake' nada'. Na' wayónn lla na' yebana'.

Jacobo na' Juan bnnab ake' kwe' ake' kwit Jesúsen' gan' nnebie'n

(Mt. 20:20-28)

³⁵Jacobon' ren Juan na', xhi'nn Zebedeon', jabi'y ake' kwit Jesúsen', na' lle ake' Le'e:

—Maestro, lle'neto' gono' to okré keto'.

36 Na'll lle'e leake':

-- ¿Bixhan' lle'nere gona'?

37 Na'll lle ake' Le'e:

—Lle'neto' kat ba llnebia'o na', gonno' latj yedlle'to' chla' wej kwito'n. 38 Jesúsen' lle'e leake':

—Bi llejnie're bi dan' llnnabre. ¿Wchoyra'llre tere yel zi' yel ya', ka dan' tia' nada', gak keré kan' gak kia'n?

39 Na' bne ake':

-Wakto!.

Na'll lle'e leake':

—Da likze tere yel zi' yel ya', ka dan' tia' nada', na' gak keré kan' gak kia'n. ⁴⁰ Zan ka nak dan' kwe're chla' wej kwita'n, kere nada' nnia' no kwe' kwita'n, Dios na'n ba breje' be'nn ka' kwe' kwita'n.

⁴¹Ka bene be'nn ye chi ka' yela' kan' goll ake' Le'en, goklla'a ake' Jacobon' ren Juan na'. ⁴²Na' Jesúsen' goxhe' leake', na' lle'e leake':

—Re' nnézere ka be'nn ka' llnebia' toto yell, llon ake' wzenay be'nn ka' nak rallna'a ake'n, leska' be'nn ka' nak be'nn brao, llnebia' ake' leake'. ⁴³Zan re' bi gonre ka', cha' re' lle'nere gakre be'nn brao, llaya'l wxhexjra'llre gakrenre be'nn lwelljre. ⁴⁴Na' cha' notezre lle'nere gakre be'nn lliarao, zga'tek llaya'le gakre ka to be'nn wen llin ke be'nn lwelljre. ⁴⁵Le nada', Be'nn Gorj Radj Be'nnach, kere za'a nench gakrén be'nn nada'n, za'a nench gakrena' be'nn ka', na' llsanra'll kwina' got ake' nada', ni ke xto'l be'nnach.

Jesúsen' bayone' to be'nn lchol re Bartimeo

(Mt. 20:29-34; Lc. 18:35-43)

⁴⁶Na' bllin ake' yellen' re Jericó. Na' ka ba llalloj Jesúsen' yell na'n ren be'nn ka' non Le'e txhen, na' yezikre be'nn zan, tnez na' lli' to be'nn lchole llnnabe' lmoxh. Be'nn na' re Bartimeo, na' nake' xhi'nn to be'nn re Timeo. ⁴⁷Ka gokbe're' badé Jesús be'nn Nazareten' tnezen', na' bzorawe' llosie' ne'e:

—iJesús, xhi'nn dialla ke rey David, baya'chra'll nada'!

⁴⁸Na'll bene be'nn zan ka' le'e znia nench kwe'e llize, bixha be'nn lcholen' yezikre besie' bne'e:

—iXhi'nn dialla ke rey David, baya'chra'll nada'!

⁴⁹Na'll brexh Jesúsen', na' lle'e be'nn ka':

—Legaxhe' nile.

Na' goxh be'nn ka' le'e, lle ake' le'e:

—Bxenra'lle, bzolla'a, le llaxhe' rwe'n.

⁵⁰Na'll bkwas be'nn lcholen' ra'llen' xhoa ko'lle'n, na'll zejdoe' gan' ze Jesúsen'. ⁵¹Na'll lle'e le'e:

—¿Bixhan' lle'nro' gona' ko'o? Na'll bne be'nn lcholen':

—Maestro, lle'nra' yere'ra'.

52 Na'll lle Jesúsen' le'e:

—Bayej nna', dan' nxenra'llo' na'n ba basrá rwe'.

Le bare'tere', na'll bnawe' Jesúsen' gan' zeje'n.

Jesúsen' byoe' Jerusalén

(Mt. 21:1-11; Lc. 19:28-40; Jn.12:12-19)

Ha ka ba zjake' awlloze
Jerusalén na', na' bllin ake'
yell ka' nzi'i Betfagé, na' Betania
gan' zo ya' gan' nzi'i Ya' Olivos. Na'
bse'l Jesúsen' chop be'nn ka' non
Le'e txhen na', ²lle'e leake':

—Lechejchk yell da'on lli' chla' na', na' kate cho're yellen', na' lljati're to burr da'a yay, ni to nono nna kwia leba', na' wsellreba', na' yedsantereba' ganni. ³Cha' lloj to San Marcos 11 86

be'nn nne'e: "¿Bixchen llonzre ka'?", na' leye'e: "Xanto' na' yálljreba' choll, le wadsántetoba'."

⁴Na'll byej ake', na' le jati' aktere' to burren' da'ba' yay lloa' yo' da zo lloa' nez, le bsell akteba'.

⁵Na' bal be'nn ka' zjazé ganna', lle ake' leake':

—¿Bixhan¹ llonre? ¿Bixchen llsellreba¹?

⁶Na' goll ake' leake' kan' goll Jesúsen' leake' na'. Na' be'e ake' latj bche'e akeba'. ⁷Na'll le bache'e akte' burren' gan' ze Jesúsen', na'll bxoa ake' no xha ake' ko'll burren', na'll bllie'ba'. ⁸Leska' be'nn zan zjake' llchirj ake' no xha ake' tnezen', na' ye bal ake' bchoy ake' no xho'z yay, na' llvixj ake'n tnezen'.

⁹Na' be'nn ka' lliarao, na' be'nn ka' nao Le'en, yeolol ake' llosia' ake' ne ake':

—iDowe'rao Dios! iNak la'y be'nnen' za'a ganni be'nn bse'l Xanllo Diosen'! ¹⁰ iZe'e nnebie' kan' bnebia' xozxta'ollo David! iDowe'rao Dios zo yebá!

¹¹Na' bllin Jesúsen' Jerusalén, na' byoe' lia' yoda'o braon'. Na' bayoll bwie' bayechjte', na' le zayejte' gan' ne Betania ren be'nn chllinn ka', le ba nak ba wlle'.

Jesúsen' bene' de'e yay higon' da bibi llia

(Mt. 21:18-19)

¹²Bateyó ka baza'a ake' Betanian' bdon Jesúsen'. ¹³Na' zi'tre bre're' to yay higo da llia la'ye, na'll zeje' llwie' cha' llian higo, bixha ka blline'n kere bi llia dan', la'yze llian le bi nna llin lla kwian. ¹⁴Na'll lle Jesúsen' yay higon': —Chras nollno gaokze da xhixen' llbia'o.

Na' be'nn ka' nao Le'en ben akre' kan' bne'en.

Jesúsen' bachache' be'nn ka' llon ya'a lia' yoda'o braon'

(Mt. 21:12-17; Lc. 19:45-48; Jn.2:13-22)

15 Bde na', bllin ake' gan' nzi'i
Jerusalén. Na' ka byo' Jesúsen'
lia' yoda'o braon', na' bzorawe'
llaraydoe' be'nn ka' llon ya'a, be'nn
ka' llo't, na' be'nn ka' lla'o. Bzale'
gan' nkwa'a mell dan' llcha'a ake',
leska' bllo'nne' gan' llbe' be'nn
we't plom ka'. 16 Nollno be'e latj te
lia' yoda'on, cha' bi da noe' go'te'.

17 Na'll bzejnie're' leake', lle'e leake':

—Kin' nyoj xti'll Diosen': "Rilla'n, naken ga lljak be'nn za'a yeolol yell yelwill ake' nada'"; na' re', ba nonren ka to lo broj ke be'nn wan.

¹⁸Be'nn ka' nak bxoz wnebia', na' ren be'nn ka' llsedre ke ley dan' bzoj da Moisésen', ben akre' kan' bne'e na', na'll llayirjla'll ake' akre ka gon ake' nench got ake' Le'e, le lleb ake' Le'e, ka nak doxhente yell, llabán akre' kan' llzejnie're' leake'n. ¹⁹Na' kate golen', le baza'te Jesúsen' Jerusalén na'.

Yay higo dan' bene de'e byechten

(Mt. 21:20-22)

²⁰Tzir bateyó badé ake' gan' zo yay higon', na' bre'e akre' byechte do roe. ²¹Pedron' jadinra'lle' kan' goll Jesúsen' yayen', na' lle'e Le'e:

—Maestro, bwiakero' yay higon' dan' beno' de'en byechte ka'zen'.

²²Jesúsen' ballie' xti'lle'n lle'e le'e:

—Lewxenra'll Dios. ²³Di'll likze llnia' re', notezre cha' yere ya'n zo

ganna': "Bkwas na' jasó lo nisda'o", na' bi gakgánere na' wxenra'llre, wakte kan' neren'. ²⁴Ke len na' nia' re', biteze da wnnabre ka yelwillre Diosen', cha' wxenra'llre do yichj do ra'llre, gonte' dan' nnabren'. ²⁵Na' katen' yelwillre Diosen', leyezi'xhen ke no be'nne cha' bi benre' re' nench lekze ka', Xallo Diosen' be'nn zo yebá yezi'xhene' da xhinnj ke re'. ²⁶Zan cha' re' bi yezi'xhenre ke be'nne, Xallo Dios zo yebá bi yezi'xhene' ka da xhinnj ke re'.

Yel llnebia' ke Jesúsen' (Mt. 21:23-27 ; Lc. 20:1-8)

²⁷Na'll ballín ake' Jerusalén na' da yobre, na' chak dá Jesúsen' lia' yoda'o braon', jabi'y bxoz wnebia' ka', na' be'nn ka' llsedre ke leyen', na' ren be'nn gor brao ke be'nn Israel ka'. ²⁸Na'll lle ake' Le'e:

—¿Bi yel llnebia' napo' llono' da ki? ¿No benn yel llnebia' llono' ka'?

²⁹ Jesúsen' ballie' xti'll ake'n, lle'e leake':

—Leze de to da nnabra' re', na' cha' yelli're xti'lla'n, na'll yepa' re' bi yel llnebia'n llona' da ki. ³⁰ ¿Noxhan' bse'l Juan na', be'nnen' bchoa be'nn nis? ¿Diosen' bse'l le'e o cha' be'nnachen'? Leyelli'i xti'lla'n.

³¹Na'll lloe'rén lwellj ake' di'll, ne ake':

—Cha' nnello Dios bse'l le'e, na' ye'e lli'o: "¿Bixchen ke byejle're ke le'e cha'?" ³²Na' leska' cha' nnello be'nnachen' bse'l le'e, bi gak.

Ka' bne ake', le lleb ake' be'nn yell, le yeolol ake' byejle' ake' da li Diosen' bse'l Juan na', nench be'e xti'lle'n. 33 Na'll lle ake' Jesúsen':

—Bi nnézeto'.

Na'll Jesúsen' lle'e leake':

—Leska' nada' bi yepa' re' no benn nada' yel llnebia'n da llonrena' ki.

Jesúsen' be'e di'll ka ben be'nn wen llin be'nn bi llon wen

(Mt. 21:33-46; Lc. 20:9-19)

Jesúsen' bzorao llzejnie're' leake', llsa'krebre' da ka'

—To be'nn goze' lba uvas, na' bzechje'n re'je, na' bene' to ga wsie' uvas ka', na' bene' to yo' sib ga lljasé be'nn gap len.

'Na'll bkwa'nne' yellrion' lo na'a be'nn wia ake'n de achj wej, na'll broe' nez zeje' zi'te. ²Kate bllin lla wachib ake' uvas ka', base'le' to be'nn wen llin ke'en nench lljaxhie' ka to da llaya'le' na'. ³Na' be'nn wen llin ka' be'x ake' le'e, ben ake' zi' ke'e, na' base'l ake' le'e bibi bayoe' ake' le'e. ⁴Na'll xan yellrion' bse'le' be'nn yobre; leska' bda'a ake' le'e yej, ben akte' we'e yichje', ye to chi'i bchachrén ake' le'e. 5Na'll base'lkze' be'nn yobre, na' leska' bet akte' le'e. Na'll base'le' be'nn zan, leska' bal be'nn ka' ben ake' zi' ke ake', na' ye bale' baso't ake'.

6'Na' zo ye to xhi'nn kwine' bi ti'che nllie're' kwis, na' bayoll na', lle'n ke lle'nre' bse'lebe' ne'e: "Xhi'nna' ni wap akjebe' bara'nne."

7Bixha be'nn ka' nlan lba uvas ka', ka bre'e akre' xhi'nne'n, na'll lle lwellj ake': "Be'nn nin' xhi'nn xan re'jen', lebe' yega'nn ren dan' de ke xabe'n, ledá gotllobe' na' gak dan' kello."

8Na'll bzap akebe', bet akebe', brej akebe' lo re'jen' jaza'l aktebe' ko'llre.

San Marcos 12 88

⁹Na'll Jesúsen' bnnabre' leake':

—¿Akre ka llákere? ¿Akre gon xan yellrion' ke be'nn ka'? Chej kwine' wlleyie' ke be'nn wen llin ka', na' yeyone' yellrion' rallna'a be'nn yobre.

10'¿Bi nna wrabre kan' nyoj xti'll Diosen'? Nen:

Yej dan' bi byo'ra'll be'nn wen yo' ka', gonrén ake' llin, len na' ba naken yej skin. ¹¹ Da ni ben Xanllo Diosen', na' naken zi yebánello.

¹²Na'll gokra'll ake' go'x ake' Le'e, ka bayejnie' akre' ke leake'n be'e di'llen' nak ka'; na' blleb ake' be'nn yell, na' bsan ake' bibi ben akre' Le'e, na' zjayake'.

Dan' llaya'l gaxhj rao be'nn llnebia' (Mt. 22:15-22 ; Lc. 20:20-26)

¹³Na' bse'l ake' bal be'nn fariseo ka', na' ye bal be'nn ka' non txhen Herodes na', nench lljalej ake' di'll lloa' Jesúsen', na' ga't da lljataorén ake' xhia. ¹⁴Ka bllin ake' gan' zoe'n, na'll lle ake' Le'e:

—Maestro, nnézeto' nako' be'nn lloe' di'll li, bi llzi'o lloa' xti'll be'nnach, na' toz ka llonro' yeolol be'nne, na' llroe'ro' lixhej kan' zej xhnnez Diosen'. ¿Llonen bien chixhjto' da llnnab be'nnen' nak le zeraoze wnebia', be'nnen' llia Roma? ¿Wyixhjto'n o cha' bi chixhjto'n? ¿Bi ka nezo' rwe'?

¹⁵Na' le bayakbe'tere' kere do ra'll ake'n llnnab akre' Le'e, na'll lle'e leake':

—¿Bixchen lle'nere kwejre nada' di'lle? Lewroe'chk nada' to xhmellren'.

¹⁶Na'll broe' akre' Le'e ton, ka bre're' mellen', na'll lle'e leake': —¿Noxha raon' da'a le' mell ni? ¿No ran' nyoj le' ni?

Na'll lle ake' Le'e:

-Ke César, be'nnen' llnebia'n.

¹⁷Na'll lle Jesúsen' leake':

—Da nak ke César lewayoe'n le'e; na' da llaya'l we're Dios, lewe'n Dios.

Na' llabán akre' kan' ballie' xti'll ake'n.

Bnnab ake' akren' gak kat yebán be'nn wat ka'

(Mt. 22:23-33; Lc. 20:27-40)

¹⁸Na'll be'nn saduceo ka' jake' rawe'n. Na' be'nn ki ne ake' bi de yebán be'nn waten', na'll bnnab akre' Le'e:

¹⁹—Maestro, da Moisésen' bzoje' cha' to be'nn byio gate', na' baga'nn no'r ke'e, na' nono xhi'nn ake' bzo, na' be'nn bi'ch be'nn wat na', llaya'l yezie' no'r wazeb na', nench nni't xhi'nn dialla ke bi'che'n. 20 Na' bzo gall bi'ch ake, be'nn nelle bchayne'e, na' le gotte' nono xhi'nne' bzo. ²¹Be'nn wllope na', le bazi'te' no'ren', na' leska' le gotte' nono xhi'nne' bzo. Na'll bazi'i be'nn wyonne na' le'e, lekze ka' gok ke'e. 22 Na' ka' gok ke toto be'nn ka' bzorén no'ren' bayate be'nn gall ka', na! ni toe! bi bzo xhi!nn ake! wasa!t ake', bayoll na' gotrén no'ren'. ²³Bixha kat yebán be'nn wat ka', ¿nore' gak xhyio no'ren', le yeolol be'nn gall ka'n bzorene'?

²⁴Jesúsen' ballie' xti'll ake'n:

—Llakchíxere le bi llejnie're kan' ne xti'll Diosen', na' bi nnézere akren' nake yel wak ke Diosen'. ²⁵Kat yebán be'nn wat ka', bill wchayna'a ake', ni ke we'e akze' 89 San Marcos 12

xhi'nn ake' wchayna'a akbe', le gak ake' ka angl be'nn lla'a yebá. ²⁶Ka nak dan' nnabre cha' yebán be'nn wat ka', ¿bi nna golre dan' bzoj da Moisésen' gan' llian kan' balwill Diosen' le'e to lo yay ye'che da lleye? Lle'e le'e: "Nada' naka' Dios be'nn lloe'rao Abraham, na' Dios be'nn lloe'rao Isaac, na' Dios be'nn lloe'rao Jacob." ²⁷Le Diosen' bi nake' Dios ke be'nn wat, nakse' Dios ke be'nn ban. Na'llen' nia', ni ke llejnie'zere dan' neren'.

Dan' nakll da brao llaya'l gonllo (Mt. 22:34-40)

²⁸To be'nn ka' llsedre ke ley dan' bzoj da Moisésen' ze'e llzenaye' ka lloe'rén Jesúsen' be'nn ka' di'lle, na' gokbe're' kwasro balli'i Jesúsen' xti'll ake'n, na' bnnabre' Le'e:

- —¿Noren' nakll da brao dan' nllia Diosen' bia'a gonllo rao yeololten? ²⁹Na'll goll Jesúsen' le'e:
- —Da nin' da nak da lliarao rao yeololte dan' nllia Diosen' bia'a gonllo: "Re' be'nn Israel, lewzenay, toze Xanllo Diosen' nake'. ³⁰Na' llie'ro' Xanllo Diosen' do yichj do ra'llo'." Da na'n da nakll lliarao gonllo. ³¹Na' da wllopen' ka rebze naksen: "Llie'ro' be'nn lwelljo' kan' nllie' kwino'." Billre bi de da nakll lliarao ka da ki.

³²Na'll ne be'nnen' llsedre ke leyen':

—Wakse, maestro, da wen kwis kan' ne'on. Toze Diosen' nakse, nollno llra' ye to ka Le'e. ³³Na' llie'lloe' do yichj do ra'll-llo, na' llie'llo lwelljllo ka nllie' kwinllo, za'kllen kerke da gotllo no bayi'x, na' wzeylloba' we'raollo Dios.

34 Jesúsen' gokbe're' ballie' xti'lle'n kwasro, na'll lle'e le'e:

—Kere da xhen yalljen nench Diosen' nnebie' yichjra'llda'on.
Na' nollno bayaxhjkze billre da nnab akre! Le'e.

¿No nak dialla Criston!?

(Mt. 22:41-46; Lc. 20:41-44)

³⁵Jesúsen' llzejnie're' be'nn ka' lla'a llyo' yoda'on, lle'e leake':

—¿Bixchen neze be'nn ka' llsedre ke leyen', Criston' nake' xhi'nn dialla ke rey David? ³⁶Rencha' kwinkze Daviden' bne'e kon ka bzejnie' Spíritu ke Diosen' le'e:

Xanllo Dios golle' Xana'n: "Blle' kwita'n ni,

na' gona' yeolol be'nn ka' llwie' rwe'n, wxhexj yichj ake' wzenay ake' ko'o."

³⁷Cha' kwinkze Daviden' ne'e nake' Xane', ¿akxha gak nello Criston' nake' xhi'nn dialla ke Daviden'? Le kwin Daviden' golle' le'e: "Xana'."

Be'nn zan be'nn yell llazra'll ake' llzenay ake' xti'lle'n.

Jesúsen' golle' be'nn ka' llsedre ke leyen' de do'l ke ake'

(Mt. 23:1-36; Lc. 11:37-54; 20:45-47)

³⁸Rawe llzejnie' Jesúsen' be'nn ka', na'll lle'e leake':

—Lewiaya'nn kan' llon be'nn ka' llsedre ke ley dan' bzoj da Moisésen', llawé akre' llak ake' to ra'll tonne da cha'o, na' gap be'nne leake' bara'nne do lao ya'a. ³⁹Na' leake' ll-lan ake' kwe' ake' ga llbe' be'nn brao lo yoda'o ka', na' leska' llon ake' do ga llak wao. ⁴⁰Na' llka'a ake' rill no'r wazebe, na' da llde' akre', scha llze ake' kate

llalwill ake' Diosen' nechkze ten ka'ze. Da xhen da de sa'kzi' be'nn ka' kan' llon ake'n.

To no'r wazeb be'e mell (Lc. 21:1-4)

⁴¹Ka lli' Jesúsen' kwite ga llia gan' llgo' ake' mell ke yoda'on, na' llwie' ka llgo' be'nn ka' mell, be'nn zan be'nn wnia' ka' llgo' ake' da xhen. ⁴²Ka bllin to no'r wazebe, na' nake' no'r ya'che, broe' chop mell da'o da bibi za'ktek. ⁴³Na'll goxh Jesúsen' be'nn ka' non Le'en txhen na', lle'e leake':

—Di'll li llepa' re', ka no'r wazeb ni, nake' be'nn ya'ch da'o, da xhenll za'k dan' broe'n kerke da bro' be'nn ka' yela'. ⁴⁴Le be'nn ka' bro' ake' da ba bago'nne, zan ka nak no'ren', rao yel ya'ch ke'en be'e ka da lallibe de ke'e.

Jesúsen' bdixjwe're' wllin lla yechinnj ake' yoda'o braon'

(Mt. 24:1-2; Lc. 21:5-6)

Ka ba llaza'a Jesúsen' yoda'o braon', to be'nn non' Le'e txhen golle' Le'e:

—iMaestro, bwia ke da xhen nak yoda'on, na' leska' da xhen nak yej ka' naken na'!

²Jesúsen' ballie' xti'lle'n, lle'e le'e:

—Ka nak yo' xhen ki llwiare, wllin lla wayinnj ake'n, ni to yej ngo'd lwellje bi yega'nne.

Kan' gak kat ba zo rez wayoll yellrion'

(Mt. 24:3-28; Lc. 21:7-24; 17:22-24)

³Na' jake' ya' gan' nzi'i Ya' Olivos, na' llga'nnen chla' gan' zo yoda'o braon', na' bllie', na'll Pedron' na' Jacobo, na' Juan, na' Andrés na', jannab akre' Le'e to wraze:

4—Bnechk neto', ¿batxhan' gak kan' ba bne'on? ¿Akxha gakze nnézello katen' ba zo rez gak yeolol da ki bne'o ni?

⁵Jesúsen' ballie' xti'll ake'n:

—Lewiaya'nn kwasro, notno siye'e re'. ⁶Be'nn zan yednné ake' nak ake' Cristo. Na' siye'e ake' be'nn zan.

7'Kate yénere ba za'a wdile, ba llak wdile, bi llebre, le ka'n dekz de gak, na' kere le wayollte yellrio na'n. ⁸Na'll tile toto yell, na'll yell xhen ren ye to yell xhen, na' xo' do gateze, na' gak win, na' bi gak bi nne, kone ka' sorao yellayrao be'nne lla'a yellrio.

9'Lewiake, lljwa'a ake' re' do rao koxchis, na' do lo yoda'o ka', na' chintat ake' re', lljwa'a ake' re' no rao rey, no rao be'nn wnebia' ka' ni kia' nada', na' ka'n we'rén akre' xti'lla'. ¹⁰Na' llonen bien nneze be'nn lla'a doxhen yellrio Di'll Wen ke Diosen'. ¹¹Katen' lljwa'a ake' re' rao be'nn wnebia' ka', bitbi gákere cho'rizre da zed akre nnere. Kat ba zere rawe na'. gonn Diosen' di'll yelli're xti'll ake'n, na' kere re'kzen' nnere, Spíritu ke Dios na'kzen' wzejnie'n re'. 12 Kana' bal be'nn wayechi ake' gon ake' be'nn bi'ch ake' ka', rao na'a be'nn got leake', na' nni't be'nn gon ake' xhi'nn ake' ka', rao na'a be'nn got ake' leakbe', na' nni't be'nn wayechi ake' gon ake' xaxhna' ake' ka', rao na'a be'nn got leake'. 13 Na' yeololte be'nn wie akre' re' ni kia' nada', na' noteze be'nn se war wxenra'lle' nada' llinte lla gate', le'en yerá.

¹⁴'Daniel be'nnen' be'e xti'll Dios kana' bzoje', wllin lla so da zban

da ke wayazra'll Dios. (Be'nn llol di'll ni llaya'l chejnie're'.) Na' kat re're ba zo dan' gan' bi llaya'l son, kana' be'nn lla'a Judean' llaya'l wxhonnj ake' lljake' do ya' da'ore. ¹⁵Be'nn dá yichjo rille', bi llaya'l wayetje' wayoe' lo yo', lljaxhie' no xchinraze'. 16 Na' be'nn dá lyi'xe, bi llaya'l wabie' lljaxhi'i xhara'ne'. ¹⁷Naken nya'chraz ke no'r noa' xhi'nne, na' no'r ka' nka' bda'o ka lla na'. 18 Lennab rao Dios katen' gak da ki bi gaken be'o zay. ¹⁹Da xhen yellayrao be'nne kate llin llan', kan' bxe Diosen' yellrio nono nna yellayrao kateken' yellayrao ake' kana', na' yeyoll na', billbi ga'te ve to ka len. ²⁰Chenak Diosen' bi gone' kwexhen kan' llaken, ni to nono yerakze, zan ni ke be'nn ka' ba breje' na', ni ke leake'n gone' kwexhen.

21'Na' cha' kana', no yerize re':
"Ledá, zote Criston' ganni", na'
"Lechej ganna' zoe'", bi chejle're.
22 Be'nn zan be'nn wxhiye'e cha'a
yellrion', nne ake' leake'n nak
Criston', na' leake'n lloe' xti'll
Diosen'. Gon akte' yel wak, na'
billre da yebane be'nn ka' kon ka
siye'e ake', nxhollte wxoayay ake'
be'nn ka' ba brej Diosen'. 23 Na' lesó
xhnid ka nak ba llepa' re' yeolol
kan' gonen nna'.

Kan' gak kat yed Jesucriston' da yobre

(Mt. 24:29-35, 42-44; Lc. 21:25-36)

²⁴'Na' ka nake lla ka yeyoll yellayrao be'nn ka', kana' willen' yecholen, leska' be'on bill wseni'n. ²⁵Berj ka' llia le' yebán' yexj aken, na' yel wak ke yebán' dan' nga'chen, gaken ka llak yellrion' kat llxho'. ²⁶Kana'll re'e be'nn ka' lla'a yellrion' nada', Be'nnen' Gorj Radj Be'nnachen', za'a radj bej ka' nsa'a yel wak xhen ren yel beni' xhen kia'n. ²⁷Na'll wse'la' angl kia' ka', yetop ake' be'nn ka' ba breja' doxhente yellrio, ga zeraoze llayollen, na' ga zeraoze llayoll yebá.

²⁸ 'Lechejnie' ka di'llen' we'rena' re' ke yay higo na': Kat ba llaga' xhla'ye na', llnnézere ba rez llin lla yeyo'llo rinne.
²⁹ Na' lekze kate re're ba llak da ke nxhia kan' ba bnia' na', kana'll nnézere ba zo rez yeda' da yobre.
³⁰ Da li llnia' re', be'nn ka' lla'a nna', nna nban akte' kate sorao gak da ki.
³¹ Ka nak yebán' ren yellrion' wllin lla kat te ke, zan ka nak xti'lla'n kere da te ke ka'zen'.

³²'Zan nono nneze bi llan', bi horen' gak ka', ni angl ka' ni't yebá na', ni nada'. Toze Xa' Dios na' nnezre'.

33'Ke len na', lewiá, lesó xhnid, leyelwill Dios, le bi nnézere baten' yeda' da yobre. 34 Gonen rebze ka ke to be'nne bro' nez zeje', na' bkwa'nn rille', na' bkwa'nne' da gon toto be'nn wen llin ke'e ka', na' be'nnen' bze llapen', lle'e le'e bi tase', na' wnne'e yere. 35 Leska' re', lesó xhnid, le bi nnézere bi llan' wara' xan yo'n, cha' ba llze yere o cha' do llere o kat ba bell lekw o cha' do ba lleni'. 36 Le nxholl kate ware'en, yeddi're' re' tasre kwis. 37 Da ni llnia' re', na' lekze ka' nia' yeolol be'nne; lesó xhnid.

Llayirjla'll ake' akre gon ake' go'x ake' Jesúsen'

(Mt. 26:1-5; Lc. 22:1-2; Jn.11:45-53)

Ye chop llare llin lnni paskwn', katen' llao ake'

San Marcos 14 92

yet xtir da bi nchix kwa binn; na' be'nn ka' nak bxoz wnebia' ren be'nn ka' llsedre ke ley dan' bzoj da Moisésen', lloe' ake' di'll akre ka gon ake' siye'e ake' Jesúsen', na' go'x ake' Le'e, na' yeso't ake' Le'e.

²Na' ne ake':

—Bi go'xlloe' rao lnnin' nench ke gakbe'e be'nn yell, na' gon ake' dá nne.

To no'r bwazje' ceit xhix yichj Jesúsen'

(Mt. 26:6-13; Jn.12:1-8)

³Na' zo Jesúsen' Betania rill be'nnen' re Simón, be'nnen' goke yillwe' dan' ne lepra. Na' ka llie' llawe' na', bllin to no're no'xe' to lmet de yej cha'o, na' yollen ceit da la' xhix nzi'i nardo, na' za'ken da xhen; le bla'te' lmeten' le bwazjte'n yichj Jesúsen'. ⁴Na' bale be'nn ka' zjalla'a ganna' goklla'a ake', na'll lle lwellj ake':

—¿Bixchen benditjerize no'ren' ceit xhixen'? ⁵Wenre chenak be'te'n ke to da llon be'nn gan chonn gayoa (300) lla llin, na' gakrene'n be'nn ya'che.

Na'll bi ne bi zill ake', lle ake' no'ren'.

⁶Na' Jesúsen' lle'e leake':

—Waljezen. ¿Bixchen llere' ka'?
Da wen na' bene' ka'. ⁷Ka nak be'nn ya'ch ka' lla'a akse' radjren', na' wakse gakrén akre' batteze, zan ka nak nada', nna'zen' zorena' re'. ⁸Ka nak dan' bwazj no'ren' ceit xhixen' yichja'n, ba bentegue' ke da llaya'lkze gon ake' kat ga'cha'n. ⁹Di'll li nia' re', doxhen yellrio do gateze lljatixjwe' be'nn Di'll Wen dan' llzejnie' kia'n, dekz de yene

be'nn ka', kan' ben no'r ni, nench lljadinra'll ake' le'e.

Judas bchebe' gone' Jesúsen' rao na'a bxoz wnebia' ka'

(Mt. 26:14-16; Lc. 22:3-6)

10 Na'll Judas Iscarioten' be'nnen' ren radj be'nn chllinn ka', byeje' rao bxoz wnebia' ka', na' bchebe' gone' Jesúsen' rallna'a ake'. 11 Ka ben akre' ka', bawé akre' kwis, na'll bcheb ake' we'e ake' le'e mell. Na'll Judasen' bzorawe' llayirjla'lle' akre gone' gak latje' gone' Jesúsen' rallna'a ake'.

Jesúsen' broe're' kan' gon ake' lljasa'ra'll ake' yel got ke'en

(Mt. 26:17-29; Lc. 22:7-23; Jn.13 :21-30; 1Co.11:23-26)

12 Bllin lla nell lnni kat llao ake' yet xtir dan' bi nchix kwa binn, leska' llot ake' xhi're nench lljasa'ra'll ake' kan' babej Diosen' xozxta'o ake' ka' gan' nzi'i Egipto. Be'nn ka' nao Le'en lle ake' Le'e:

—¿Gaxha lle'nro' lljasinia'llo da gaollo ke lnni paskwn'?

¹³Na'll bse'le' chop be'nn ka' non Le'e txhen, lle'e leake':

—Lechej yellen', na' kat cho're na', le walláytere to be'nn zanzoa leo nis xhichje', na' le nnaotere'.

14 Na' gan' wayoe' na', na' cho're, na' yere xan yo'n: "Maestron' ne'e ki: ¿Gan' zo yo' gan' gaorena' be'nn ka' non nada' txhen ke lnni paskwn'?"

15 Na'll le wroe'tere' re' to yo' da zo ye to kwia yichje ba zon xhnid. Ganna' le wsinia'tere dan' gaollon'.

¹⁶Na'll byej chop be'nn ka', ka byo' ake' yellen' gokte doxhen kan' golle' leake'n, na' bsinia' ake' ke lnni paskwn'. ¹⁷Ka betj lle' na', bllin ren Jesúsen' be'nn chllinn ka' gan' zo yo'n. ¹⁸Na' bllie' gan' gao ake'n, na' lle'e leake':

—Di'll likze nia' re', to re' llaorenre nada' txhen, gonre nada' rallna'a be'nn ka' llwie nada'.

¹⁹Na'll bzorao gok akre', na' twej twej ake' llnnab akre' Le'e:

—¿Kere nada'n gonriza' ka' lla? ²⁰Na'll lle'e leake':

—To re' rao be'nn chllinn ki, llrabjrenre nada' yet xtir kerén' lo ye'nnen', le'en gonre' nada' ka'. ²¹Ka nak nada', Be'nn Gorj Radj Be'nnach, ka nyojkze kia'n got ake' nada', zan inya'chraz naken ke be'nnen' gon nada' rallna'a be'nn ka'! Wenre chenak bi bzokze' yellrion'.

²²Na'll ka ba llao ake' na', bxhie' yet xtiren', na' benla'ye'n, na' bxhoxhje'n be'en leake', na' bne'e:

—Lesi'n, len na' naken kwerp kia'.

²³Na'll bxhie' leo da'on, na' be'e yel llioxken ke Dios, na'll be'e leake' xis uvan' we'e yeolol ake'. ²⁴Na' lle'e leake':

—Da ni naken xchena', na' larjen ni ke be'nnach, na' llroe'n sorao to da kobe dan' bcheb Diosen' gone' gakrene' be'nnach. ²⁵Di'll likze nia', bill ye'ja' xis uvan' llinte lla kat yeye'ja'n da yobre gan' llnebia' Diosen'.

Jesúsen' bne'e kan' gon Pedron' bi wchebe' cha' nombie' Le'e

 $(Mt.\ 26:30\text{-}35\ ;\ Lc.\ 22:31\text{-}34\ ;\ Jn.13\ :36\text{-}38\)$

²⁶Bayoll bel ake' da be'rao ake' Diosen', na'll bllach ake' zjake' gan' zo ya' gan' nzi'i Ya' Olivos. ²⁷Na'll lle Jesúsen' leake':

—Nna' lle' yeololre gakgánere, na' wkwa'nnre nada', gak kan' nyoj

xti'll Diosen' nen: "Gota' be'nnen' llap xhi'r ka', na' gaslas xhi'r ka'." ²⁸Na' kat wasbán Diosen' nada' radj be'nn wat ka', wabiarawa' raore waya'a Galilean'.

²⁹Na'll lle Pedron' Le'e:

—La'kze cha' yeolol be'nn ki wkwa'nn ake' rwe', nada' bi wsanra'lla' rwe'.

30 Na'll lle Jesúsen' le'e:

—Da li kwis llepa' rwe', za kwellre lekwn' da wllope nna' lle', kat gak chonn ras, ni ke wchebzo' cha' nombia'o nada'.

³¹Na' Pedron' yezikre lle'e Le'e:

—La'kze cha' gatrena' rwe', kbat nnia' bi nombia' rwe'.

Na'll toz ka' bne yeolol akte'.

Jesúsen' balwille' Diosen' lo re'j gan' nzi'i Getsemaní

(Mt. 26:36-46; Lc. 22:39-46)

³²Bllin ake' gan' nzi'i Getsemaní, na' lle Jesúsen' be'nn ka' non Le'e txhen na':

—Gannize lekwe', chak llje'rena' Diosen' di'lle.

³³Na' bche'e Pedron', ren Jacobo ren Juan na', na' ba bzorao llakya'chre'. ³⁴Na' lle'e leake':

—Wa ba llakya'ch ra'llda'wa'n kwis, llaka' ka be'nn le gatte, na' gannize lega'ye, lewnna' yere.

³⁵Na'll bdie' ye ra'te, na' bche'k xhibe', blle'ke' jano'pte' rao yo, na' bzorawe' llalwille' Dios bnnabe' cha' wak ten ka'ze, bi gak ke'e kan' ba zo gak ke'e na'. ³⁶Ka llalwille' Dios na'n, bne'e:

—Xa Dios, rwe' llak llono' yeololte, benchga bi sa'kzia' kan' ba zo gak na', zan bi gak ka lle'nra' nada', kon ka nnekzo' rwe' gak. San Marcos 14 94

³⁷Na'll le zayejte' jawie' be'nn ka' nkwa'nne'n, na' jadi're' leake' tas ake' kwis. Na'll lle'e Pedron':

—Simón, ¿bixchen le taso' kwis? ¿Bi gok wchacho' bichgalen' choll da'ozen'? ³⁸Bi tasre, lewalwill Dios nench ke gon da xhinnjen' re' gan. Nnezra' lo yichjra'llda'oren' lle'nere wnna'renre nada' yere, na' kwerp kerén' bi zoen.

³⁹Na'll zeje' da yobre, je'rene' Diosen' di'lle kan' ba bnekze' da nell na'. ⁴⁰Ka balline' da yobre, leska' tas ake', le lliacha' bichgalen' ko'll rao ake'n, ni ke bi llallel akzre' bi ye ake' Le'e. ⁴¹Da wyonn rase zayeje', na' jadi're' leake' tas ake', na'll lle'e leake':

—iLetas, lewazi'ra'll! Ba gok to kat, ba bllin lla, nada', Be'nn Gorj Radj Be'nnach, gaka' rallna'a be'nn wen da xhinnj ka'. ⁴²iLewayas, lewayo'o! Gannize ba ze be'nnen' gon nada' rallna'a be'nn ka'.

Kan' gok kan' be'x ake' Jesúsen' (Mt. 26:47-56; Lc. 22:47-53; Jn.18:2-11)

⁴³Na' zete Jesúsen' lloe' di'll na', kat bllindo Judas be'nnen' ren rao be'nn chllinn ka', nche'e be'nn zan be'nn no'x no spad no yay, be'nn bse'l bxoz wnebia' ka', na' be'nn ka' llsedre ke ley dan' bzoj da Moisésen', na' be'nn gor brao ka'.

⁴⁴Na' Judasen' be'nnen' bde Le'e rao na'a be'nn ka', golle' leake' akren' gone' wroe're' non' go'x ake'. Na'll lle'e leake':

—Kon be'nnen' wno'pa' na', lekze'n. Na' lego'xe', lewcheje', na' lewache'e.

⁴⁵Na'll kate blline'n, le jabi'yte' gan' ze Jesúsen' lle'e Le'e:

-Maestro.

Na' le bno'pte' Le'e. ⁴⁶Na' be'nn ka' nche'e Judasen', le be'x akte' Le'e, na'll bchej ake' Le'e.

⁴⁷Na' to be'nn ka' ze ganna', le brejte' spad ke'en bdine'n be'nnen' nak be'nn wen llin ke bxoz braon', bchoyte' chla' naye'. ⁴⁸Na' bne Jesúsen', lle'e be'nn ka':

—¿Bixchen llonre nada' ka to be'nn wan, za're zadxi're nada' kone spad, na' ren yay? ⁴⁹Rencha' yeo lla bzorena' re', broe'ra' re' lo yoda'o braon', na' bi be'xre nada' kana'. Na' ka nak llak da ki, llak ka' nench llak kan' nyoj xti'll Diosen'.

⁵⁰Kana' yeolol be'nn ka' nao Le'en, baxhonnj ake' bsanra'll ake' Le'e.

To be'nn we'o bxhonnje'

⁵¹Na' to bi we'o naobe' Jesúsen', na' llelbe' toze xchan, na' be'xrén akebe'. ⁵²Bixha to ballojzbe' lo xchan, na' bsanra'llbe'n baxhonnjbe' gal yidzbe'.

Bche'e ake' Jesúsen' gan' gak yel koxchisen'

(Mt. 26:57-68; Lc. 22:54-55, 63-71; Jn.18:12-14, 19-24)

53 Na'll jwa'a ake' Jesúsen' rao bxoz braon', na'll badope' bxoz wnebia' ka', na' be'nn gor brao ke be'nn Israel ka', na' ren be'nn ka' llsedre ke ley dan' bzoj da Moisésen'. 54 Pedron' nawe' zi't zi'te, ka byo' ake' rill bxoz braon', na' rene' byo', na' blle'rene' txhen be'nn ka' llap yoda'o braon', balle're' lloa' yi'n.

⁵⁵Na' bxoz brao ka' ren be'nn wnebia' ka', llayirjla'll ake' bi da 95 San Marcos 14

gao ake' xhia ke Jesúsen', na' chan di'll ke'e, na' got ake' Le'e. Na' bibi ballel akre'. ⁵⁶Bal ake' ziye'e ake' ll-lliayi'll ake' Le'e, na' bill dile xti'll ake' ka ne ake'. ⁵⁷Na'll bzolla'a be'nn lloe' ak di'll wxhiye'e, ne ake':

58—Neto' ba béneto' bne'e:
"Nada' yechinnja' yoda'on dan'
ben be'nnache, na' chonn llaze
wayontia' ye to yoda'o da bi gon
be'nnach."

⁵⁹Na' bi llakse toz di'lle ka ne yeolole'.

⁶⁰Na'll bzolla'a bxoz braon' rao be'nn zan ka', na'll lle'e Jesúsen':

—¿Bibi nnekzo¹ ka nak dan¹ lllliayi'll be'nn ki rwe'n?

⁶¹Na' Jesúsen' bi balli'kze' xti'lle'n, zeteze lliteze, na'll lekze bxoz braon' da yobre lle'e Le'e:

—¿Bixha rwe'n nako' Criston', Xhi'nn Dios be'nn le zeraoze nak la'ye?

62 Na'll lle Jesúsen' bxozen':

—Nada'n, na' re're nada', Be'nnen' Gorj Radj Be'nnach, lljallia' kwit Xanllo Dios be'nnen' nap yel wak xhen, na'll re're' katen' yeda' yetja' le' yebán' radj bejen'.

63 Na'll bxoz braon' bche'z xhara'ne' nench wroe're' da xhinnj kwisen' bne Jesúsen', na'll lle'e be'nn ka':

—Bill yálljello be'nn se gawe' xhia ke be'nn ni. ⁶⁴Ba bénere kan' bnne'e ke Diosen'. ¿Akre ka llákere? ¿Akre gonllo ke'e?

Na' yeolol be'nn ka' bchoy ake' ke'e gate'.

65 Na' bal ake' bzorao ake' llxi't ake' xhe'n yichjrawe', llsej ake' rawe'n, na' llba'll ake' Le'e, na'll lle ake' Le'e:

—iBnneya'chk noxhan' bra'll rwe'! Na'll be'nn ka' llap yoda'on llgap ake' lloa'rawe'.

Pedron' bi bchebe' cha' nombie' Jesúsen'

(Mt. 26:69-75; Lc. 22:56-62; Jn.18:15-18, 25-29)

⁶⁶Na' Pedron' llie' lia'te radj be'nn ka', ka bllinkze to no'r wet ke bxoz braon'. ⁶⁷Ka bre're' Pedron' lli'rene' be'nn ka' lloa' yi'n llayaye', na'll llwiaya'nne' le'e, na' lle'e le'e:

—Ren rwe'n nakreno' Jesúsen' txhen be'nn Nazareten'.

⁶⁸Na' Pedron' bi bchebe', na' bne'e:

—Bi nombie', ni ke nnezzra' bin' ne'o.

Na'll jazedoe' lloa' yo' na', na' le bllellte lekw. ⁶⁹Na'll no'r weten' llwiaya'nnkze' le'e da yobre, na' lle'e be'nn ka' lla'a na':

—Ren be'nnen' ze ganna' nake' be'nn ka' txhen.

⁷⁰Na' da yobre bi bchebkze Pedron'. Gok ye choll kat be'nn ka' zjalla'a ganna' da yobre lle ake' le'e:

—Li nakreno' be'nn ka' txhen, da lijen', le lekze be'nn Galilea rwe', nakbie'ze nne'o kan' nne be'nn Galilea ka'.

⁷¹Na' le bzoraote bnne'e znia, lle'e be'nn ka':

—Da li rao Dios bi nombia' no be'nnen' nere ka'.

⁷²Na' le bllellte lekwn' da wllop rase. Kana'll jadinra'll Pedron' kan' goll Jesúsen' le'e: "Za kwellre lekwn' da wllope, gak chonn ras bi wchebo' cha' nombia'o nada'." Kana'll jadinra'lle', na'll bllelle' kwis. San Marcos 15 96

Bche'e ake' Jesúsen' rao Pilaton'

(Mt. 27:1-2, 11-14; Lc. 23:1-5; Jn.18:28-38)

Kate byeni' na' badop bxoz wnebia' ka', na' be'nn gor brao ke be'nn Israel ka', na' ren be'nn ka' llsedre ke ley dan' bzoj da Moisésen', na' yeololte be'nn ka' llnebia' Israel, na' bchej ake' Jesúsen', na'll jwa'a ake' Le'e rao Pilaton'. ²Pilato na' bnnabre' Le'e:

—¿Rwe'n nako' Rey ke be'nn Israel ka'?

Na'll ballie' xti'll be'nnen', bne'e:

-Kan' ba bnekzo' na' naka'.

³Na' bxoz wnebia' ka', llaral akre' ll-lliayi'll ake' Le'e. ⁴Na'll da yobre llnnabe Pilaton' Le'e:

—¿Bibi nekzo'? Bwiake da zan dan' ll-lliayi'll ake' rwe'n.

⁵Na' Jesúsen' chras billbi bnekze'. Na'll llabane Pilaton' kwis.

Bchoybia' ake' gat Jesúsen'

(Mt. 27:15-31; Lc. 23:13-25; Jn.18:38-19:16)

⁶Na' de to da llon ake' yeo iz, yesán Pilaton' to be'nn yo' rill ya kat lla'l lnni Paskwn', kon be'nn nnab be'nn yell. ⁷Na' to be'nn re Barrabás yoe' rill yan', lla'rene' be'nn yob akre' le bxe ake' to wdile, na' baso't akte' be'nne. ⁸Be'nn zan badope, na' jake' jannab ake' wasán Pilaton' to be'nne kan' llonkze' yeo iz. ⁹Na'll lle Pilaton' leake':

—¿We'nere wasana' Rey kerén', re' nakre be'nn Israel?

10 Pilaton' bne'e ka' le gokbe're' dan' llaxhé' bxoz wnebia' ka' Jesúsen', na'llen' bde ake' Le'e rao ne'en. 11 Na' bxoz wnebia' ka', llko'yel akre' be'nn zan ka' nench bnnab ake' wasane' Barrabás na'le. 12 Na'll lle Pilaton' leake' da yobre:

—¿Akxha gona' ke be'nnen' nere Rey ke be'nn Israel ka'?

¹³Na'll llosia' ake' ne ake':

—iBde'e le' yay cruz!

¹⁴Na'll lle Pilaton' leake':

—¿Bixha da xhinnj ba bene' na'n? Na' leake'n llosia' ake' yezikre zillj kwis, ne ake':

—iBde'e le' yay cruz!

¹⁵Na'll basán Pilaton' Barrabásen' nench baga'nne' wen rao be'nn ka'. Na' golle' be'nn ka' bdintat ake' Jesúsen', na'll bene' Le'e rallna'a ake' wda'a ake' Le'e le' yay cruzen'.

¹⁶Na'll waka'a ya ka', le bche'e akte' Le'e llyo' yora'on gan' lli' Pilaton', na' goxh ake' waka'a ya ka' yela'. ¹⁷Na'll bwakw ake' Le'e to ra'll morad, na' bti'x ake' ye to de lba ye'che, na' bliz ake'n yichje'n. ¹⁸Na'll bzorao ake' lltitj akre' Le'e, ne ake':

—iSechga ke be'nn wnebia' ke be'nn Israel ka'!

¹⁹Na' bdin ake' yichje'n to xhis, na'll llxi't ake' xhe'n rawe', na' llche'k xhib ake' rawe'n lltitj akre' Le'e. ²⁰Bayoll btitj akre' Le'en, na'll bayalj ake' ra'll tonnen', na'll bawakw akse' Le'e xhakze', na'll bche'e ake' Le'e gan' wda'a ake' Le'e le' yay cruzen'.

Bda'a ake' Jesúsen' le' yay cruz

(Mt. 27:32-44; Lc. 23:26-43; Jn.19:17-27)

²¹Ka zjake' na', to be'nn zaza'a lyi'xe be'nn Cirene be'nn re Simón xa Alejandro ren Rufo, na' bchie' akre' le'e nench blene' cruzen'.

²²Na'll nche'e ake' Jesúsen' latjen' nzi'i Gólgota lle'nen nen Latj ke Yichj Llit Wat. ²³Na'll be'e ake' Le'e xis uva da nchix nell dan' nzi'i 97 San Marcos 15

mirra, na' bi we'je'n. ²⁴Na'll bda'a ake' Le'e le' yay cruzen'. Na' waka'a ya ka', bditjen ake' xhara'ne'n, llwia ake' nara'chk noren' llaya'l toto ake'.

²⁵Ka lladá gan' bda'a ake' Le'e le' yay cruzen'. ²⁶Na' yichj yay cruz na', bllia ake' bi ken de'e ganna', na' llian: "Rey ke Be'nn Israel ka'." ²⁷Leska' kwite' na', bzo ake' ye chop cruz, na' bda'a ake' chop be'nn wan ake chla' weje', toe' cha'we ye toe' rbese. ²⁸Na' dan' ben ake' ka', bzoa di'll kan' nyoj xti'll Diosen' gan' nen: "Ben ake' Le'e ka be'nn wen da xhinnj."

²⁹Na' be'nn ka' llde gan' nda'a ake' Le'en, ll-lol yichj ake' llchachrén ake' Le'e, lle ake' Le'e:

—Rwe'n ne'o yechinnjo' yoda'on, na' chonn llaze wayonte'on. ³⁰ Basrachk kwino', na' bayetjchk le' yay cruzen'.

³¹Na' leska' bxoz wnebia' ka' ren be'nn ka' llsedre ke ley dan' bzoj da Moisésen', lltitj akre' Le'e, na'll lle lwellj ake':

—Basre'e be'nn yobre, na' bi llasrá kwine' na'. ³²Cha' le'en Cristo, rey ke lli'o be'nn Israel, wayetjchke' le' yay cruzen' nench re'llo, na'll chejle'llo.

Leska' be'nn ka' zjada'a chla' wej kwite'n lltitj akre' Le'e.

Kan' gok kan' got Jesúsen'

(Mt. 27:45-56; Lc. 23:44-49; Jn.19:28-30)

33 Ka bllin wa willen', bachol doxhen yellrio bllinte lladá chonne.
34 Ka bllin lladá chonn na'n, besia' Jesúsen' zillje bne'e:

—Eloi, Eloi, ¿lama sabactani? — da ni lle'nen nen: Dios kia', Dios kia', ¿bixchen ba bsanra'llo' nada'?

³⁵Na' bal be'nn ka' zjalla'a ganna', ben akre' kan' bne'en, na'll ne ake':

—Lewiake llalwille' Elías, be'nnen' be'e xti'll Dios kana'.

³⁶Na'll zejdo to be'nnen', jaxie' to da bza'llen zo zichje, bzoe'n to rao yia na' jaze'en lloa' Jesúsen', na'll bne'e:

—Ledachk wiallo cha' yed Elíasen' yedletje' Le'e.

³⁷ Na'll besia' Jesúsen' zillj kwis, na' gote'. ³⁸ Na' ra'llen' ze lo yoda'on blle'zen goken chopre, bxhi'zen yichjte bllinte xhnie'. ³⁹ Na' xan waka'a yan' ze'e rao Jesúsen', bre're' doxhen kan' besie' gote'n, na'll bne'e:

—Da likze Xhi'nn Dios be'nnen'.

40 Leska' zjazé no'r ak llwia ake'
zi'tre, na' zerén María Magdalena,
na' María xhna' Jacobo be'nnen'
nak be'nn na'ch, na' José na' ren
Salomé. 41 No'r ki bnao ake' Jesúsen'
ka nna zote' Galilean', na' llakrén
ake' Le'e kat bi da yalljre', ren
no'r yob akre' bnao ake' Le'e bze'e
Galilean' zeje' Jerusalén na'.

Bkwa'ch ake' Jesúsen'

(Mt. 27:57-61; Lc. 23:50-56; Jn.19:38-42)

⁴²Ka ba wlle' na', na' naken lla llsinia' ake', zeje di'll lla vispr ke lla nba'nne ke be'nn Israel ka'. ⁴³Na' to be'nn re José be'nn Arimatea, nake' be'nn brao radj be'nn ka' llnebia' Israel na'; leska' ba llone' rez baten' sorao nnebia' be'nnen' wse'l Diosen'. Le'e bene' ra'll-lloy byeje' rao Pilaton', na' bnnabe' kwerp ke Jesúsen'. ⁴⁴Ka bene Pilaton' ba got Jesúsen', na'll llabanre', na'll goxhe' be'nn xan waka'a ya ka' nench bnnabre' le'e cha' da li ya'nnen' ba

gote'. ⁴⁵Na' be'nn waka'a yan' lle'e le'e, da likzen' ba gote', na'll be'e Pilaton' latje' waletj Josén' kwerp ke Jesúsen'. ⁴⁶Josén' we'we' to xchan, da bara'lle' Le'e, ka baletje' Le'e le' yay cruzen'; na'll jakwa'ch ake' Le'e to lo ba da bche'nne' le' yej. Na'll btole' to yej xhen lloa' brojen' nench bsejen len. ⁴⁷María Magdalena na' ren María xhna' Josén', ze ake' llwia ake' gan' bro' ake' Jesúsen'.

Jesúsen' babane' radj be'nn wat ka' (Mt. 28:1-10; Lc. 24:1-12; Jn.20:1-10)

16 Ka bde lla nba'nne María Magdalena na' ren María xhna' Jacobo na' ren Salomé, we'o ake' da la' xhix nench lljawat ake'n kwerp ke Jesúsen'. ²Na' nna nakte nnaxte lla dmion' zjake' lloa' ban', le llra'te will bllin ake'. ³Na' zjake' tnez lle lwellj ake':

—¿Noxha waka'a yejen' dan' da'a lloa' ba na'n?

⁴Bixha ka bllin ake' na'n, bre'e akre' ba lli' yej xhen na' ka'le. ⁵Ka byo' ake' lo ba na'n, bre'e akre' to be'nn llaban llie' chla' cha'ore, na' nake' to ra'll tonne llichen' kwis, na'll to blleb akze'. ⁶Na'll lle'e leake':

—Bi llebre, Jesús be'nn Nazaret na'n llayirjre, be'nnen' bda'a ake' le' yay cruzen'. Ba babán be'nnen', nollno xhoa ganni, lewiá ke gan' bxhoe'n. ⁷Lelljayell be'nn ka' non Le'e txhen na' ka', ren Pedro na', ba za lliarao Jesúsen' zayeje' Galilea, ganna' re're' kan' bnekze' na'.

⁸Na'll baza'do ake' lloa' ban' blleb ake' kwis, notno llalwill akse' le zebraz lleb ake'.

Jesúsen' broe'rawe' María Magdalena (Jn. 20:11-18)

⁹Ka nak babán Jesúsen' zir dmio na', zga'tek María Magdalena na', broe'rawe', no'ren' babeje' gall daxi'o. ¹⁰Na' le'e le jatixjwe'tere' be'nn ka' yela' bnao Jesúsen', le lla'a ake' llakya'ch akre' bell ake'. ¹¹Ka nak ben akre' nbane', na' ba bre'e no'r ka' Le'e, na' bi byejle' ake'.

Jesúsen' broe'rawe' chop be'nn ka' non Le'e txhen

(Lc. 24:13-35)

¹²Bde gok ki, chop be'nn ka' non Jesúsen' txhen zjake' lyi'xe, na' Jesúsen' broe'rawe' leake', nlla're kan' broe'rawe' be'nn ka' to kwen. ¹³Na' leake' jatixjwe' akre' be'nn ka' yela', na' ni ke byejle'ze be'nn ka' ke ake'.

Jesúsen' bse'le' be'nn ka' lljatixjwe' akre' xti'lle'n doxhente

(Mt. 28:16-20; Lc. 24:36-49; Jn.20:19-23)

¹⁴Ka bde gok ka', na'll broe'rawe' yeolol be'nn chnej ka', ka lli' ake' llao ake'. Na'll benre' leake' znia yel yichjra'llda'o war ke ake'n, le bi llejle' ake' ke be'nn ka' bre'e Le'en kan' babane'n. ¹⁵Na'll lle'e leake':

—Nna' chejre doxhen yellrio lelljatixjwe' xti'lla'n rao yeolol be'nne. ¹⁶Be'nn ka' wxenra'll ake' nada', na' choa ake' nis, leake'n yerá. Zan be'nn ka' bi wxenra'll ake' nada' kweyi' ake'. ¹⁷Be'nn ka' wxenra'll nada', wroe' akre' yel wak kia'n, da ki gon ake': kone ra'a nada', yebej ake' daxi'o yo' yichjra'llda'o be'nne, na' nne ake' to di'll kobe. ¹⁸La'kze cha' go'x ake' bel znia, bibi góneba' leake', la'kze ye'j ake' da nak

99 San Marcos 16

zi got leake', bibi gak akre', wxoa ta'k ake' yichj be'nn we'e, na' wayakte be'nn we'e ka'.

Jesúsen' bayepe' yebá (Lc. 24:50-53)

¹⁹Xanllo Jesúsen', bayoll be'rene' leake' di'll ki, zayeje' yebá, na' jallie' kwit Diosen'.

²⁰Na' be'nn ka' non Le'e txhen
na', bllach ake' jatixjwe' akre'
xti'lle'n do gateze. Na' Xanllon'
gokrene' leake', ben ake' yel
wak nench byejle' be'nn ka'
nakse xti'lle'n da li. Ka'n
gakchga.

DI'LL WEN DAN' BZOJ SAN LUCAS

Da ni bzoj San Lucas ke Teófilo

Be'nn zan ba gokra'll ake' wllia ake' yich dan' gok radjto' ni, le naken to da li, ²na' llonen bien wayojen kon kan' bzejnie' be'nn ka', bre'e da nellte kan' goken. Leake'n gok rallna'a ake' wzejnie' akre'n be'nne. ³Nada' leska' ba bnnabyolla' kwasro, akren' gok ka bxhen da nellte. Ke len na', nna' llzoja'n ko'o rwe', Teófilo, llapa' rwe' bara'nne, ⁴nench wayoll nnezro' ka nak da lin' ba nnézkzero'n.

To angl bdixjwe're' garj Juan be'nnen' bchoa be'nn nis

⁵Kan' llnebia' be'nnen' golle Herodes gan' nzi'i Judea, bzo to bxoz re Zacarías. Zacaríasen' nake' txhen bxoz ka' nzi'i Abías. Na' no'r ke Zacaríasen' re Elisabet, na' nake' xhi'nn dialla ke da Aarón, be'nnen' gok bxoz nelle. ⁶Llon ake' doxhen kan' ne ley ke Diosen', na' be'nn wen kwis nak ake', to nono bi ne ke ake'. ⁷Nono xhi'nn ake' ni'te, le Elisabeten' nake' be'nn will, na' ba nak ake' be'nn gore.

⁸Kate bllin lla baya'l Zacaríasen' ren be'nn lwellje' ka', cho' ake' yoda'on. ⁹Na' kan' llonkze bxoz ka', llbej twej twej ake' nench lloe' lljazeye' yar rao bkoy yoda'on. Na' baya'lkze Zacaríasen' gone'n. ¹⁰Chak lley yaren' rao bkoy yoda'on, be'nn zan lla'a lia're llalwill ake' Dios. ¹¹Bixha bllinkze to angl ke Xanllo Dios gan' ze Zacaríasen', na' jasé anglen' kwit bkoy gan' llzeye' yaren'. ¹²Ka bre'e Zacaríasen' anglen', to gokllejla'llze', le llebrazen' bllebe'. ¹³Na'll anglen' golle' le'e:

—Bi llebo' Zacarías, Diosen' ba bzenaye' ke dan' llnnabo'n, na' nna' no'r ko'o Elisabeten' so to xhi'nne'. na' wsi'obe' Juan. ¹⁴Na' so'o nbaraz. yewero', na' be'nn zan yewerén akre' re' katen' ba gorjbe'n. 15 Bida'on gakbe' bi za'k rao Dios, bi ye'jbe' xis uva, na' billre da llsolle be'nne, na' sorén Spíritu ke Diosen' lebe' ka za garjterbe'. 16 Na' gonbe' nench be'nn zan be'nn Israel ka', wayechi ake' we'rao ake' Dios. ¹⁷Na' kwiaraobe' rao Xanllon', na' Diosen' we'ebe' Spíritu ke'en, na' gonbe' kan' ben Elías, be'nnen' be'e xti'll Diosen' kana'. Be'nn dilrén xhi'nne', gonbe' wani't ake' wen; be'nn bi llzenay, gonbe' nench wzenaye'. Na' gonbe' nench be'nn ka' nni't ake' xhnid. we'rao ake' Xanllon' katen' yede'n.

¹⁸Na'll Zacaríasen' lle'e anglen':

—¿Akxha gak nnezra' cha' da li gak kan' ba bne'o nga? Le ba naka' be'nn gore, leska' no'r kia'n ba ngore'.

¹⁹Na'll lle anglen' le'e:

—Nada'n naka' angl Gabriel, na' llona' xchin Dios, Le'en bse'le' nada' nench zadtixjwe'ra' rwe' di'll wen nga. ²⁰Na' nna' ga'nno' blloje, bi gak nne'o llinte katen' garj xhi'nno'n, le bi byejle'o kan' bnia'n, le da li da gakten.

²¹Be'nn zan ka' lla'a lia're, llbexh ake' Zacaríasen', na' llabán akre' dan' bi llallojze' lo yoda'on. ²²Bixha kate balloje'n, kere gokll nne'e, na' llone' zre senze, na' bayakbe'e be'nn ka', bre'da'ore'n.

²³Ka bayoll xhman ke'en na' zayeje' rille'. ²⁴Bde na', bia'a xhi'nn Elisabet no'r ke Zacaríasen'. Ga'y be'o bzoze' yo' ke'e, bi bllojkze', na'll lloe'rén kwine' di'll ne'e: ²⁵"Nna'll ba ben Diosen' wen kia', ba bake'e yel zdo' kia'n, nollno nne kia' nna naklla' be'nn will."

Anglen' leska' bdixjwe're' garj Criston'

²⁶Ba gok xop be'o noa' Elisabeten' bda'o ke'en, kate bse'l Diosen' anglen' re Gabriel to yell da nzi'i Nazaret gan' nbane Galilea. ²⁷Bse'le' le'e ga zo to no'r da'o, re María, ba naken si'i to be'nn re José le'e, na' Josén' nake' xhi'nn dialla rey David. ²⁸Ka byo' anglen' lo yo' gan' zo Marían', lle'e le'e:

—iPadiox, Dios zorene' rwe', nna' gone' wen ko'o, gonla'ye' rwe' wdetere ka no'r ka' yela'! ²⁹Marían' bllebe' kwis, na' llakre' bixchen lleze anglen' le'e ka'. ³⁰Na' anglen' lle'e le'e:

—María, bi llebo', Diosen' ba breje' rwe', na' gone' wen ko'o. ³¹Go'o bda'o, so to xhi'nno', na' wsi'obe' Jesús. ³²Na' Jesúsen' gake' to be'nn brao, wsi'i ake' Le'e Xhi'nn Dios be'nn zo yebá. Na' Xanllo Diosen' gone' nench nnebie' kan' bnebia' David xozxta'we'n. ³³Nnebie' gan' nzi'i Israel ke chnare, na' bi te yel llnebia' ke'en.

³⁴Na'll lle Marían' anglen':

—¿Akxha gakrizen le bi nna wchayna'a?

³⁵Na'll goll anglen' le'e:

—Yed Spíritu ke Diosen' cho'n yichjra'llda'on, na' yel wak ke Dios be'nn zo yebá son kwe'jen rwe', ke len na' bida'on garjen' gakbe' bi ke Dios, na' wsi'i akebe' Xhi'nn Dios. ³⁶Leska' no'r biro', Elisabeten', no'ren' nak no'r will batna', ba gok xop be'o nna', noe' bda'o la'kze ba nake' be'nn gore. ³⁷Le bibi de da nak bni', da bi gak gon Diosen'.

³⁸ Na'll lle Marían' anglen':

—Ni zoa' naka' be'nn wen llin ke'e, wakse gon Diosen' kia' kan' ba bne'o nga.

Ka' gok, na' baza'a anglen' zayeje'.

María jara'nne' Elisabet

³⁹Bde chop chonn lla, le byejte Marían' to yell da llia rao ya' gan' nbane Judea. ⁴⁰Na' blline' rill Zacaríasen', na' byoe' bwape' Elisabeten' lliox. ⁴¹Bixha kate bene Elisabeten' balwill Marían' le'e, le bxhi'tte bda'o ke'en lo le'en, na' Spíritu ke Diosen' byo'n San Lucas 1 102

yichjra'llda'we'. 42 Na' bawere' kwis bnne'e zilli, lle'e Marían':

—Dios ba benla've' rwe' rao yeololte no're, leska' bda'o ko'on nak la'ybe'. 43 Xhna' Xanllo ba nako', ker bi za'kanda'. ¿Bixchen zadra'nnzo' nada'? 44 Kate bnne'on, le bxhi'tte bda'o kia'n lo lia'n bawebe'. 45 Nbaraz ko'o rwe' ba byejle'o, da li gonte Diosen' kan' ba golle' rwe'n.

46 Na'll bne Marían' lloe'rawe' Dios:

> Lloe'rawa' Diosen' do yichj do ra'lla'.

⁴⁷ Na' lo yichjra'llda'wa' llawera', le Diosen' nake' wasrá kia'.

48 La'kze naka' ka to be'nn wen llin, bibi za'ka', Diosen' baya'chra'lle' nada'.

Na' be'nn zan be'nn lla'a nna', na' be'nn za cha'a yellrio ni, nne ake! kia!:

"Nbaraz ke no'ren'."

Diosen' nake' be'nn wen, nape' yel wak xhen, ba bene' da wen kwis kia!.

iLe'e nak la'ye kwis!

⁵⁰ Noteze be'nn llape Diosen' bara'nne.

leska' Diosen' waya'chra'lle' leake!.

⁵¹ Na'll ba broe're' yel wak xhen ke'en,

na' bachinnje' xhbab ke be'nn ya'ra'll ka'.

52 Be'nn llnebia', be'nn llon ka be'nn brao, ba blli'ye' be'nn ka' ka'le,

na' blepe' be'nn ya'ch, be'nn nexjra'll ka'.

53 Be'nn ya'che, be'nn don, ba be'e leake' ka yerj akre',

zan be'nn wnia' ka', la'kze bze ta'k ake', bibi be'e leake'.

⁵⁴ Ba gokrene' Israelen', le yell ke'en,

le jadinra'lle' waya'chra'lle' leake!.

55 Ka di'll be'rene' xozxta'ollo Abraham, bne'e gonla'ye' veolol xhi'nne' za cha'a.

⁵⁶Chonn be'o bzorén Marían' Elisabeten', na'll baze'e zayej rille'.

Ka gok gorj Juan be'nnen' bchoa nis

⁵⁷Bixha kate bllin lla garj bda'o ke Elisabeten', bzo to bida'o byio. 58 Ka gokbe'e bi'ch lwellje' ka', na' be'nn wrill ke ake', kan' ba gokrén Diosen' Elisabeten', ren ake' bawerén akre' le'e. 59 Gok xo'n lla na', jwe'ebe' bzobe' sen dan' nzi'i circuncisión. Na' gokra'll ake' wsi'i akebe' kan' re xabe'n. Zacarías.

60 Nat xhnatbein bnete:

—Ka'a, bi si'be' ka', Juan, si'be'.

⁶¹Na' lle ake' le'e:

-¿Bixchen? Nono bi'ch lwelljre llra' be'nn re ka'.

62 Na'll ben ake' sen rao xabe'n. llnnab akre' le'e akre lle'nre' si'i bda'on. 63 Na' bnnabe' to bray da'o, na' bzoje'n bllie'n: "Juan, si'be'." Yeolol be'nn ka' llabán akre'. 64 Na' le gokte banné Zacaríasen', le bzoraote lloe'rawe' Dios. 65 Yeolol be'nn wrill ke ake' ka', blleb ake' kwis, na' yeolol yell ka' zjalli' radj ya' ka', doxhen ya'n gan' nbane Judean', goslas di'll kan' goken. 66 Na' yeolol be'nn ka' llene di'llen', da xhen llayón ake' xhbab lo yichira'llda'o ake', ne ake':

—¿Notek gak bida'on?

Le nakbie'tekze llonla'y Diosen' lebe! tlla tlla.

103 San Lucas 1, 2

Di'll da be'e Zacarías

⁶⁷Spíritu ke Diosen' byo'n yichjra'llda'o Zacaríasen', na' benen nench be'e di'll ki:

⁶⁸ Nak la'y kwis Xanllo Diosen' ke lli'o be'nn Israel,

le ba bre'e nench yesre'e lli'o nakllo yell ke'e.

⁶⁹ Rao dialla David be'nn ben xchin Dios batna',

ba blise' to be'nn nap yel wak nench yesre'e lli'o.

70 Ka di'llen' be'rén Diosen' be'nn ka', be'e xti'lle'n kana', le leake'n bzejnie' akre' be'nn

ie ieake'n dzejnie' akre' de'i xti'lle'n.

71 Bchebe' yesre'e lli'o rao na'a be'nn ka', bi zorén lli'o wen, na' rao na'a be'nn ka', llwie lli'o.

⁷² Na' bchebe' waya'chra'lle' xozxta'ollo ka',

na' bi kwej yichje' ka di'llen' be'rene' leake'n.

⁷³ Leska' golle' xozxta'ollo Abraham na',

74 wllin lla kate yesre'e lli'o rao na'a be'nn ka' llwie lli'on, nench gak we'raolloe', billbi nxholl sollo cha' gonllo xchine'n.

⁷⁵ Na'llen' gonllo da wen, gakllo rallne'e ke chnare.

⁷⁶ Na' rwe', xhi'nna', be'nn lloe' xti'll Dios be'nn zo yebá, nne ake' ko'o,

rwe' kwiarao rao Xanllon', goncha'o gono' xhnid gan' tie'n.

77 Rwe' wzejnie'ro' be'nn Israel ka', kan' lle'ne Diosen' yezi'xhene' da xhinnj ke ake'n, na' kan' lle'nre' yesre'e leake'. 78 Dios kellon', yel llaya'chra'll ke'en ba bene', nna' re'llo beni'n za'a yebá.
79 Be'nn lla'a xchole, ka ga de yel got, re'e akre' beni' ke'en, na'llen' re'llo garen' ka'llo, na' chejnie'llo ka gonllo nench cha'llo wen.

⁸⁰Bixha bida'on zjaze ll-lli'obe', llejnie'tebe' doxhen kan' lle'ne Diosen', na' bzoteze bzobe' yi'xe ga nak latj dach, bllinte lla broe'raobe' be'nn Israel ka'.

Ka gok gorj Jesúsen' (Mt. 1:18-25)

Gok kan' llnebia' be'nnen' re Augusto César gan' nzi'i Roma, bdixjwe're' llaya'l kwia yich, yeolol be'nn ka' lla'a doxhen gan' nbanre'n. ²Na' naken da nell kwia be'nn yiche. Le kana' be'nnen' re Cirenio, llnebie' gan' nzi'i Siria. ³Na' bene'n bien yeolol be'nn bayej rall ake', jallia ake' yiche.

⁴Na' Josén' bze'e Nazaret ga nbane Galilea, na' bayeje' Belén ga nbane Judea yell ke David, le xhi'nn dialla David na' le'e. ⁵Zanche'te' Marían' nench kwia ake' yiche, ba naken si'i lwellj ake'. Na' ba noa' Marían' bda'o. ⁶Na' zo akte' Belén na', bllin lla sane'. ⁷Na' gorj bda'o ke'en, gokbe' bida'o byio, bi nelle, na' bra'llebe' to ra'lle, na' jaxoe'be' gan' ll-lla'a ake' da llao bayi'xe, le bibi latj bllel akre' ga we'e ake' wazi'ra'll ake'.

To angl bdixjwe're' gop xhi'r ka' ba gorj Criston'

⁸Rao yer na', awllo Belén na', lla'a bal be'nn llnna' ake' yer, llap xhi'r San Lucas 2 104

ke ake'. ⁹Kate to angl ke Xanllon' blline' gan' lla'a ake'n, to yi' xhen bseni'n gan' lla'a ake'n, na' blleb ake' kwis. ¹⁰Na' anglen' golle' leake':

—Bi llebre, na' llyixjwe'ra' re' to da wen, da wayo'ra'll yeolol be'nne. ¹¹Nna' gorj to wasrá, gorje' rao yell ke David, na' re'e Cristo be'nn nak Xanllo. ¹²Cha' chejre, ki nak nench yellélere bda'on: llelbe' to ra'll, na' xhoabe' ga ll-lla'a ake' da llao bayi'x ake.

¹³ Nna nete anglen' ka', kate bllinkze angl zanll gan' ze anglen' to, na' angl zan ka', lloe'rao ake' Dios ne ake':

iDowe'rao Dios be'nn zo yebá! iNa' be'nn ka' lla'a rao yellrion', cha'a akchgue' xhbab wen, na' ka' bibi wdil kwe'!

¹⁵Ka baza'a angl ka' zayej ake' yebá, gop xhi'r ka' lle lwellj ake':

—Chejkello Belén na', lljawiallo bixhan' gokse, ka dan' bdixjwe' Xanllon' lli'o.

16 Na' bro'do ake' nez, ka bllin ake'n, na' jadi' akre' Marían' ren Josén' ren bda'on, xhoabe' gan' ll-lla'a ake' da llao bayi'x ka'. ¹⁷ Ka bre'e gop xhi'r ka' bda'on, bzorao lloe' ake' di'll doxhen kan' goll anglen' leake' ke bda'on. ¹⁸ Yeolol be'nn ka' bene di'llen' lloe' ake'n, llabán akre' kwis. ¹⁹ Marían' bro' yichje' kan' bne be'nn ka', na' llone' xhbab lo ra'llda'we'. ²⁰ Bde na', zayej gop xhi'r ka', lloe'rao ake' Dios kon ba jawiá ake', na' ba ben aktere' kan' goll anglen' leake'.

Ka jwa'a ake' Jesúsen' yoda'o

²¹Ka gok xo'n lla na', bzoe' bda'on sen dan' nzi'i circuncisión, na' bsi'i

akebe' Jesús, kan' goll anglen' leake' ka za garjterbe'.

²²Bde ba bayak Marían' ren bda'on yall kon kan' ne ley dan' bzoj da Moisésen', na' jwe'ebe' yoda'o Jerusalén na', ga gakbe' rallna'a Dios. ²³Le kan' ne ley ke Xanllo Diosen': "Noteze bida'o byio garj bi nelle, da bien na' gakbe' rallna'a Dios." ²⁴Na' byej ake' be'rao ake' Dios, ben ake' kan' ne ley ke'en, gan' nen ki: "Llaya'l gotre chop plom xtir o cha' chop plom vi'x da'o."

²⁵Na' Jerusalén na', zo to be'nn re Simeón, na' nake' to be'nn wen, na' nxenra'lle' Dios, bzoteze bzoe' brexhe' katen' llin lla gakrén Diosen' be'nn Israel ka', na' zorén Spíritu ke Diosen' le'e. ²⁶Spíritu ke Diosen' bdixjwe'n le'e ke za gattere', dekz de re're' Cristo be'nnen' wse'l Diosen'. ²⁷Leska' Spíritu na', benen nench byeje' yoda'o braon'. Yoda'o na' zoe' kate bllin xaxhna' Jesúsen' gon ake' kan' ne ley ke Diosen'. ²⁸Simeón na' bnnabe' bida'on bde'lebe', na' be'rawe' Diosen' bne'e:

²⁹ Ba gokse nna' Dios kia', bazi'chga nada' wen, naka' be'nn wen llin ko'o, kon ka di'llen' be'reno' nada'.

30 Rawa' ki nna' llre'ren be'nnen' yesrá neto'n.

³¹ Na' ba beno' to da re'te be'nn zan.

³² Bida'on gakbe' beni', nench chejnie' be'nn bi nak be'nn Israel,

na' Lebe' gon nench si'i yell ko'o Israelen' yel bara'nn xhen.

³³Na'll xaxhna' Jesúsen' llabán akre', ka llen akre' di'llen' lloe' 105 San Lucas 2, 3

Simeón na' ke bda'on. ³⁴Simeón na', bnnabe' rao Dios gonla'ye' leake'. Na'll lle'e Marían':

—Ni ke bida'on be'nn zan be'nn Israel ka' kweyi' ake', na' be'nn zan yerá ake'. Lebe' gakbe' to da wroe'n dan' bse'l Diosen' Lebe', na' be'nn zan bi cho'ra'll ake' dan' ben Diosen' ka'. ³⁵Leska' gonbe' nench ga'tbia' nore be'nn lla'a xhbab wen, na' nore lla'a xhbab da bi nak wen. Na' rwe', ka'kze to da látit chaz lo ra'llda'on, katek wallayrao' ke bida'on.

36 Leska' bzo to no'r re Ana, Jerusalén na'. Na' Anan' lloe' xti'll Dios, nake' xhi'nn Fanuel, be'nn nak xhi'nn dialla be'nnen' re Aser. Na' ba nake' be'nn gor, gall iz bzorén xhyiwe'n le'e. ³⁷Na' bga'nne' wazeb got xhyiwe'n, ba gok tapralj tap (84) iz. Na' yeo lla bzoteze bzoe' yoda'o braon', lloe'rawe' Dios, llalwille' Dios do lla do yere, na' llone' was. 38 Na' goken jabi'ye' gan' ze Josén' ren Marían', na' lloe' yel llioxken ke Dios, na' bzorao lloe' xti'll bida'on rao yeolol be'nn ka' lla'a, lloe'rene' di'llen' yeololte be'nn llbexh, baten' wse'l Diosen' be'nnen' gakrén leake'n.

³⁹Ka bayoll ben Marían' ren Josén' yeolol kan' ne ley ke Diosen', na' zayej ake' Nazaret gan' nbane Galilea. ⁴⁰Na' Jesúsen' zejze lllli'we', na' zejzell llejnie're' tlla tlla, na' ka' llakrente Diosen' Le'e.

Da ben Jesúsen' ka byeje' yoda'o brao Jerusalén na'

⁴¹Na' gan' nzi'i Jerusalén na' llon be'nn Israel ka' lnni dan' ne paskw, na' xaxhna' Jesúsen' yeo iz lljake' lnnin'. ⁴²Ka goke Jesúsen' chllinn (12) iz, bche'e ake' Le'e lnni Jerusalén na', kan' llon akse'. ⁴³Ka bde lnnin' baza'a ake', na' bi gokbe'e Josén' ren Marían', baga'nn Jesúsen' Jerusalén na'ze. ⁴⁴Llak akre' cha' zaza'rene' be'nn ka' yela'. Ba gokte tlla bago' ake' nezen' ka gokbe'e akre', na' bzorao llayirj ake' Le'e radj bi'ch lwellj ake' ka', na' be'nn nombia' akre'. ⁴⁵Na' bi llallel akre' Le'e, na' babi' ake' Jerusalén na', da yobre llayirj ake' Le'e.

⁴⁶Bixha bayónn lla kate ballel akre' Le'e lo yoda'o braon', na' llie' radj be'nn si'n ka', llroe' xti'll Diosen', llzenaye' xti'll ake'n, na' llnnabyollre' leake'. ⁴⁷Be'nn ka' lla'a llzenayen', llabán akre' katken' llejnie're'n, na' kan' llallie' xti'll be'nn si'n ka'. ⁴⁸Bixha ka bre'e xaxhne'e ka' Le'en, llabán akre', na' goll xhne'en Le'e:

—Xhi'nna', ¿bixchen ba benzro' neto' ka'? Xa'on na' ren nada', le ba bdato' bayirjto' rwe'.

49 Na'll Jesúsen' lle'e leake':

—¿Bixchen llayirjzre nada'? ¿Bi nnézere xchin Xa' na'n llaya'l gona'?

⁵⁰Bixha xaxhne'e ka', bi byejnie' akre' bixchen golle' leake' ka'.

⁵¹Na' ka', zayej ake' Nazareten' zanche'e akte' Jesúsen', na' bzenayteze bzenaye' ke ake'. Na' Marían' kon llone' xhbab lo yichjra'llda'we' kan' llaken. ⁵²Na' ka', blli'o Jesúsen' llejnie're', Diosen' na' ren be'nn ak, llayo'ra'll ake' kan' llone'n.

Juan be'nnen' bchoa nis bdixjwe're' Di'll Wen ke Diosen'

(Mt. 3:1-12; Mr. 1:1-8; Jn.1:19-28)

3 Kan' ba gok chi'no (15) iz llia be'nnen' re Tiberio

San Lucas 3 106

César, be'nnen' nak zerao wnebia' gan' nbane Roma, Poncio Pilaton' leska' llnebie' gan' nzi'i Judea, na' Herodesen' llnebie' gan' nzi'i Galilea, na' bi'ch Herodes be'nnen' re Felipe nake' be'nnen' llnebia' gan' nzi'i Iturea, na' gan' nzi'i Traconite, na' be'nnen' re Lisanias nake' be'nnen' llnebia' gan' nzi'i Abilinia. ²Na'll Anás na', na' Caifás na', nak ake! bxoz brao ke be!nn Israel ka!. Iz na', be'rén Diosen' Juan xhi'nn Zacaríasen' di'lle gan' zoe' yi'xen', gan' nak lati dachen'. ³Na'll byeje' toto yell ka' lli' to lloa' yeo Jordán na', llyixjwe're' be'nne llaya'l wayat akre' ke da xhinni non ake', na' choa ake' nis nench wazi'xhen Diosen' ke ake'. 4Llak kan' bzoi Isaías be'nn be'e xti'll Diosen' kana', bne'e ke Juan na':

To be'nn llosia' lyi'xen' ne'e:
"Legón xhnid, legoncha'o nez
gan' te Xanllon',
lewsarj yichjra'llda'ore ka llon
to be'nn llsarj to nez li.

Ga nak lotj, llaya'l walla'n yo,
ga de nez da llep llaze, llaya'l
waya'ten li.

Ga bi nak lixheje, waya't lin', na' nez da ni't yej, llaya'l wayej lben.

⁶ Yeolol be'nn lla'a yellrio ni, re'e akre' kan' yesrá Diosen' be'nne."

⁷Be'nn zan jake' rao Juan na', nench wchoe' leake' nis, na'll benre' leake' znia bne'e:

—iRe' nakre be'nn zban be'nn wxhiye'e, llonre ka bele! ¿No bzejnie' re', wak warare rao dan' wse'l Diosen' katen' gone' yel koxchis ke be'nnachen'? ⁸Cha'

rennere ba bayátere ke da xhinnjen' nonre na', llaya'l gonre da wen nench gakbe'e be'nne ba balla'a yichjra'llda'ore. Bi gonzre xhbab nnere: "Xhi'nn dia lla Abraham neto'." Yej ka' ni't nga, wakte gon Diosen' wayaken xhi'nn dialla Abraham. ⁹Leska' ba no'xte' banchen' xhnid, yeolol yay da bi llbia daxhix wen, wchoye' do roe, gaken waye da wzeye'.

¹⁰Na'll be'nn ka' lla'a na', lle ake' le'e:

- —¿Akxha llaya'l gonto' nna' cha'?

 11 Na'll Juan na', lle'e leake':
- —Cha' de chop xherk kere, lewe'e to xherk ke be'nn bibi de ke'e. Na' be'nn de da llawe', leska' we'e ke be'nn bi de da gawe'.

¹²Na' be'nn ka' nak wachixhj, jabi'y ake' lle'n akre' choa ake' nis, na' lle ake' le'e:

- -Maestro, ¿Bixha gon neto!?
- ¹³Na'll lle Juan na' leake':
- —Bi llaya'l wchixhjre da xhenll.

¹⁴Leska' be'nn waka'a ya ka' bnnab ake', lle ake' Le'e:

- —¿Bi llaya'l gon neto'?
- —Bi wxoare ko'll be'nne da wxhiye'e, na' bi wka're bi da de ke be'nne. Legón banez ka to da llonre gan.

¹⁵Na' be'nn zan be'nn Israel ka', ba lla'a ake' dá nne, llon ake' xhbab cha' Juan na' nak Criston'. ¹⁶Na'll Juan na', lle'e be'nn zan ka' lla'n:

—Da li nada' llchoa' be'nn nis, na' za yed to be'nn naplle yel wak ka nada', bi za'ka' nada' ka Le'e, ni gaz da wadia' xhere' bi za'ka'. Le'e wchoe' be'nn nis kon ren Spíritu ke Diosen', da gon ka llon yi'. ¹⁷Katen'

yede'n, gone' ka llon be'nn kate llsoe' trigo, llazie' trigon', na' llzeye' yixh bebe ken. Le'e nape' to yi' da bi wayorkze.

¹⁸Na' ka', di'll zan da be'e Juan na', llyixjwe're' Di'll Wen ke Xanllon'. ¹⁹Juan na', leska' lle'e Herodes be'nnen' llnebia' Judean', ka da xhinnj xhen na' none', zorene' Herodías no'r ke bi'che'n re Felipe. Leska' llete' le'e ka nak billre da xhinnj llone'. ²⁰Na' Herodes na', basyolle' bene' ye to da xhinnj xhen, broe' Juan na' rill ya.

Jesúsen' blloe' nis

(Mt. 3:13-17; Mr. 1:9-11)

21 Bixha chak nna llchoa Juan na' be'nn ka' nis, leska' bllin Jesúsen', na' bchoa Juan na' Le'e nis. Bixha chak llalwill Jesúsen' Dios na'n, byarj yebán', 22 na' Spíritu ke Diosen' betjen bzorenen Le'e, na' nak Spíritun' ka to plom da'o, na' ben akre' be xhnne ke Diosen' bne'e:

—Rwe' nako' xhi'nna' nllie'ra',

—Rwe' nako' xhi'nna' nllie'ra', llawera' llazra'lla' kwis.

Xozxta'o Jesucriston'

(Mt. 1:1-17)

²³Chilloa (30) ize Jesúsen', kan' bzorawe' llone' xchine' dan' zadyene' rao yellrion', kon kan' bne ake', goke' xhi'nn José, na' Josén' goke' xhi'nn Elí,

²⁴ Elí na' goke' xhi'nn Matat, Matat na' goke' xhi'nn Leví, Levín' na' goke' xhi'nn Melqui, na' Melqui na' goke' xhi'nn Jana, Jana na' goke' xhi'nn José.
²⁵ José na' goke' xhi'nn Matatías,

na' Matatías na' goke'

xhi'nn Amós.

Amós na' goke' xhi'nn Nahum, Nahum na' goke' xhi'nn Esli, na' Esli na' goke' xhi'nn Nagai,

²⁶ Nagai na' goke' xhi'nn Maat, na' Maat na' goke' xhi'nn Matatías,

Matatías na' goke' xhi'nn Semei, Semei na' goke' xhi'nn José, na' José na' goke' xhi'nn Judá.

²⁷ Judá na' goke' xhi'nn Joana, Joana na' goke' xhi'nn Resa, na' Resa na' goke' xhi'nn Zorobabel,

Zorobabel na' goke' xhi'nn Salatiel,

Salatiel na' goke' xhi'nn Neri.

28 Na' Neri na' goke' xhi'nn Melqui,
Melqui na' goke' xhi'nn Adi,
Adi na' goke' xhi'nn Cosam,
na' Cosam na' goke' xhi'nn
Elmodam,

Elmodam na' goke' xhi'nn Er. ²⁹ Er na' goke' xhi'nn Josué, na' Josué na' goke' xhi'nn Eliezer.

Eliezer na' goke' xhi'nn Jorim, Jorim na' goke' xhi'nn Matat.

30 Na' Matat na' goke' xhi'nn Leví, Leví na' goke' xhi'nn Simeón, Simeón na' goke' xhi'nn Judá, na' Judá na' goke' xhi'nn José.

José na' goke' xhi'nn Jonán, Jonán na' goke' xhi'nn Eliaquim.

³¹ Na' Eliaquim na' goke' xhi'nn Melea,

Melea na' goke' xhi'nn Mainán, Mainán na' goke' xhi'nn Matata, na' Matata na' goke' xhi'nn Natán.

³² Natán na' goke' xhi'nn David, David na' goke' xhi'nn Isaí, na' Isaí na' goke' xhi'nn Obed, San Lucas 3, 4 108

Obed na' goke' xhi'nn Booz, Booz na' goke' xhi'nn Salmón, na' Salmón na' goke' xhi'nn Naasón.

³³ Naasón na' goke' xhi'nn Aminadab,

Aminadab nan' goke' xhi'nn Aram, na' Aram na' goke' xhi'nn Esrom,

Esrom na' goke' xhi'nn Fares, Fares na' goke' xhi'nn Judá.

34 Na' Judá na' goke' xhi'nn Jacob, Jacob na' goke' xhi'nn Isaac, Isaac na' goke' xhi'nn Abraham, na' Abraham na' goke' xhi'nn Taré,

Taré na' goke' xhi'nn Nacor.

35 Nacor na' goke' xhi'nn Serug, na' Serug na' goke' xhi'nn Ragau,

Ragau na' goke' xhi'nn Peleg, Peleg na' goke' xhi'nn Heber, na' Heber na' goke' xhi'nn Sala.

36 Sala na' goke' xhi'nn Cainán, Cainán na' goke' xhi'nn Arfaxad, na' Arfaxad na' goke' xhi'nn Sem,

Sem na' goke' xhi'nn Noé, Noé na' goke' xhi'nn Lamec.

³⁷ Na' Lamec na' goke' xhi'nn Matusalén,

Matusalén na' goke' xhi'nn Enoc,

Enoc na' goke' xhi'nn Jared, na' Jared na' goke' xhi'nn Mahalaleel,

Mahalaleel na' goke' xhi'nn Cainán.

³⁸ Cainán na' goke' xhi'nn Enós, na' Enós na' goke' xhi'nn Set,

Set na' goke' xhi'nn Adán, na' Adán na' goke' xhi'nn Dios.

Gokra'll daxi'on wko'yelen Jesúsen' gone' da xhinnj

(Mt. 4:1-11; Mr. 1:12-13)

Na' Jesúsen' kon ren Spíritu ke Diosen' llnebia'tezen yichjra'llda'we'n, baze'e yeo Jordán na', na' Spíritun' benen nench byej Jesúsen' latj dachen'. ²Choa (40) lla bzoe' na', na' rao choa lla na', daxi'on bko'yelen Le'e gone' da xhinnj. Na' bene' was, bi bdaokze' da choa lla na', bde na' bdone'. ³Na' jabi'y daxi'on llen Le'e:

—Cha' da li nako' Xhi'nn Dios, bayonchk yej ki yet xtir.

⁴Na'll balli'i Jesúsen' xti'll daxi'on, lle'en:

—Ki nyoj xti'll Diosen': "Kere toze yet xtir dan' gaollo na'n, llonn yel nban ke lli'o be'nnach, renkze di'll dan' ll-lloj lloa' Diosen' nbanrenllo."

⁵Na'll bche'e daxi'on Le'e to rao ya' sibe, na' broe'n Le'e yeolol yell zjalli' rao yellrion'. ⁶Na' llen Le'e:

—Doxhen yel banez yel llnebia' ke yell ki, gonna' rwe', le kia'n naken, na' kon no llazra'lla' wa'an. ⁷Cha' rwe' wche'k xhibo' we'rao' nada', doxhenen gonna' rwe'.

⁸Na'll lle Jesúsen' daxi'on:

—Byej ka'le daxi'o, ki nyoj xti'll Diosen': "Llaya'l gonlira'llo' Diosen', na' toze Le'en we'ra'o."

⁹Na' bche'n Le'e yichjo yoda'o brao Jerusalén na', jasé akte' ga zerao nak sib, na' llen Le'e:

—Cha' da li nako' Xhi'nn Dios, bxhi'tchke ganni lljasote'o lle'le, ¹⁰le ki nyoj xti'll Diosen':

Diosen' wse'le' be'nn ka' nak angl ke'e, gakrén ake' rwe'. ¹¹ Na' go'x ake' rwe', nench ke lljache'o yej.

12 Na'll goll Jesúsen' len:

—Leska' nyojen: "Bi llaya'l nnabro' Diosen' cha' rennre' kan' ne'en."

¹³Bayoll kate billbi ballele daxi'on, akre ka wko'yelen Le'e, na' blle'yi'llen to chi'i.

Jesúsen' bzorawe' llyixjwe're' xti'll Diosen'

(Mt. 4:12-17; Mr. 1:14-15)

¹⁴Na' ka llnebia'teze Spíritu ke Diosen' yichjra'llda'o Jesúsen', bayeje' gan' nbane Galilean', yeolol yell ka' zjalli' do na', bze ke Jesúsen'. ¹⁵Na' llzejnie're' be'nn toto yell ga zo yoda'o ga lladop be'nn Israel ka', na' yeolol be'nn ka' lloe'rao ake' Le'e.

Jesúsen' balline' Nazaret

(Mt. 13:53-58; Mr. 6:1-6)

¹⁶Na' balline' Nazaret gan' blli'we'. To lla llap be'nn Israel ka' bara'nne, byeje' yoda'o gan' lladop be'nn Israel ka' kan' llonkze', na' bzolle'e bele' yichen'. ¹⁷Na' bgo'x ake' Le'e dan' bzoj da Isaías be'nn be'e xti'll Dios kana', na' bsarje'n, na' jadi're' gan' nen ki:

¹⁸ Spíritu ke Xanllon' zorenen nada'.

breje' nada' nench chixjwe'ra'
Di'll Wen ke'en be'nn ya'ch;
bse'le' nada' nench wayona'
be'nn bi zo wen, na' be'nn
zo ya'che.

Chixjwe'ra' be'nn ka' nzap daxi'on, Diosen' yesre'e leake',

waxa' rao be'nn lchole, wasra' be'nn llsa'kzi' da xhinnjen' leake'. ¹⁹ Chixjwe'ra' ba bllin lla gakrén Diosen' be'nnachen'.

²⁰Na' batobe' yichen', na' bayoe'n be'nnen' nak rallna'a len na', na' jallie'. Yeolol be'nn ka' lla'a lo yoda'on, llwiachich ake' Le'e. ²¹Na'll lle'e leake':

—Nna' llak kan' llia le' yichen'.

²²Be'nn ka' bene xti'lle'n, llabán
akre' katek nbaraz nak xti'lle'n, na'
bnne ake' wen ke'e. Na' lle lwellj
ake':

- —¿Kere be'nn nin' xhi'nn José? ²³Na'll lle Jesúsen' leake':
- —Cheke nna' yere nada' di'llen' ne ki: "Wen rmell rwe', bayonchk rmell kwino'". Na' leska' yere nada': "Da ka' ba béneto' beno' Capernaum na', gonchko'n rallo' ni nna'."

²⁴Na'll bne'e da yobre:

—Da li llnia', ni to be'nn lloe' xti'll Diosen', bi cho'ra'll ake' le'e ralle'. ²⁵Da li llnia', zan no'r wazeb lla'a Israelen', kan' bzo Elías be'nnen' be'e xti'll Diosen' kana'. Kana'n chonn iz xop be'o bi gok yej, na' gok win rao yellrion', ²⁶na' Diosen' bi bse'le' Elíasen' gan' zjazó no'r wazeb Israel ka', zan bse'le' le'e to yell da nzi'i Sarepta ga nbane Sidón, ganna'te bzo to no'r wazeb gokrene'. ²⁷Leska' be'nn zan be'nn llen yillwe' dan' ne lepra, blla'a Israelen' kan' bzo Eliseo, ni toe' bi bayak, toze be'nnen' re Naamán be'nn Siria, leze' bayak.

²⁸Ka ben akre' di'll ki, yeolol be'nn ka' lla'a lo yoda'on, goklla'a ake' kwis. ²⁹Na' bzolla'do ake', na' brej ake' Le'e yell, bche'e ake' Le'e to rao ya' awllo gan' lli' yellen', gokra'll ake' wllix ake' Le'e. ³⁰Na' bi gok, llwia akte' badie' radj ake'n zayeje'. San Lucas 4, 5 110

Jesúsen' bayone' to be'nn yo' daxi'o yichjra'llda'we'

(Mr. 1:21-28)

³¹Na' jasoe' yell dan' re Capernaum ga nbane Galilea, na' toto lla llap be'nn Israel ka' bara'nne, llzejnie're' be'nn ka'. ³²Na' llabán akre' kan' llzejnie're'n, le nakbie'ze nnezre' kwasro, na' nse'e yel llnebia' ke Diosen' ka nak lloe' di'llen'.

³³Bixha lo yoda'o gan' lladop ake' na', lli' to be'nn yo' daxi'o yichjra'llda'we', na' bzorao llosie', ³⁴bne'e:

—Byej ka'le, ¿bixchen zadchixko' ren neto', Jesús be'nn Nazaret? ¿Za'o zadlleyi'o neto'n? Nnézkzera' no rwe', rwe'n Be'nn Nak La'y bse'l Dios.

³⁵Na' benre' daxi'on znia, golle'n:
—iLlakia llono'! iLla balloj
yichjra'llda'o be'nnen'!

Na'll bllixtolen be'nnen', na' ballojen, na' bibi goke be'nnen'. ³⁶Yeolol be'nn ka' lla'n, llabán akre', lle lwellj ake':

—¿Bitk di'llen' ne be'nnen'? Nape' yel llnebia', na' yel wak, na'llen' lle'e daxi'o ka' yelloj aken, na' llalloj akten.

³⁷Yeolol yell ka' zjalli' do na', bze ke Jesúsen'.

Jesúsen' bayone' xhna' no'r ke Simón Pedro

(Mt. 8:14-15; Mr. 1:29-31)

³⁸ Jesúsen' bazolle'e zayeje', na' byeje' rill to be'nn re Simón. Na' xhna' no'r ke Simón na', yoe' da la, na' goll ake' Jesúsen' wayone' no'ren'. ³⁹ Na' Jesúsen' jabi'ye' gan' xhoa be'nn we'en, na' blle'ke', na' balwille' da lan'. Na' le bayakte no'ren', le bayaste' llsinie' da gao ake'.

Jesúsen' bayone' be'nn zan

(Mt. 8:16-17; Mr. 1:32-34)

⁴⁰Ka ba llen willen', jwa'a ake' be'nn zan llak biteze yillwe' rao Jesúsen', na' bxoa ta'ke'n yichj toto ake', na' bayone' leake'. ⁴¹Leska' balloj daxi'o ka' lo yichjra'llda'o be'nn zan ak, llosia' aken, nen:

—iRwe' nako' Xhi'nn Dios! Na' benre' daxi'o ka' znia, bi be'e latj nne aken, le nnez akren Le'en Criston!

Jesúsen' bde'e doxhen Galilea llyixjwe're' xti'll Diosen'

(Mr. 1:35-39)

⁴²Bateyó ka byeni', blloje' byeje' to latj dach. Na' be'nn ka' llayirj ake' Le'e, ka ballel akre' Le'en, bza'y ake' Le'e, bi gokra'll ake' cheje' ga yobre. ⁴³Na'll golle' leake':

—Llonen bien cha'a yell ka' yela', lljatixjwe'ra' Di'll Wen ke Diosen', le ke len na' bse'le' nada'.

44 Na' ka' toto ga zo yoda'o gan' lladop be'nn Israel ka' doxhen gan' nbane Galilean', lleje' llzejnie're' leake'.

Dan' ben Jesúsen' lo nisda'o

(Mt. 4:18-22; Mr. 1:16-20)

Gok ka ze Jesúsen' lloa' nisda'o da nzi'i Genesaret, na' be'nn zan kwis lla'a, to llchi'd ake' Le'e, lle'n akre' wzenay ake' xti'll Diosen'. ²Na' bre're' awlloze lloa' nisen', lli' chop barco, na' wxhen belya' ka', ba balloj ake' loen', llayib

yixj bel ke ake'n. ³Na' byoe' to lo barco ke Simón na', na' golle' le'e, wlli'ye'n ra't ka'le lo nisen'. Na' bllie' bzejnie're' be'nn ka' lla'n. ⁴Ka bayoll broe're' be'nn ka', lle'e Simón na':

—Blli'y barcon' lo nis gan' nak zitj na', na' lewza'l yixj bel kerén' nench senre bel.

⁵Na'll goll Simón na' Le'e:

—Maestro, do yer ba bento' llin, ni to gaz bel bi bdo'leto', nna' kone xti'llo' ni wza'lchekto'n.

⁶Na' bza'l yixj bel ke ake'n lo nisen', ba zan belya' ka' bzapen, to lle'ne yixjen' che'zen. ⁷Na'll goxh ake' be'nn lwellj ake' ka', lla'a lo barcon' ye to nench lljakrén ake' leake', na' byej ake', na' baslla'chochj akte' barco ka', to llon aken da yi'ch aken lo nisen'. ⁸Ka bre'e Simón Pedron' kan' goken, bche'k xhibe'n rao Jesúsen' lle'e Le'e:

—iBlle'yi'll ka'le Xana', be'nn wen da xhinnjze nada'!

⁹Bne Simón na' ka', le bllebe' kwis ren be'nn ka' yela', ke nak dan' bxhen ake' belya' zan ka'. ¹⁰Leska' Jacobo, na' Juan xhi'nn be'nnen' re Zebedeo, llabán akre' kwis, le nak ake' txhen toz ka llin llon ake' ren Simón na'. Na'll goll Jesúsen' Simón na':

—Bi llebo', nna' sorao' we'o xti'lla'n; kan' llono' da'o wxhen belen', ka' gono' ta'o wtopo' be'nne.

¹¹Ka jalek ake' barco ka' yo billen', na' bsanra'll xchinraz ake'n, na' bnao ake' Le'e.

Jesúsen' bayone' to be'nn llen yillwe' dan' ne lepra

(Mt. 8:1-4; Mr. 1:40-45)

¹²Bixha gok ka dá Jesúsen' to rao yell, byej to be'nn llen yillwe' dan'

ne lepra rawe'n. Ka bre'e be'nnen' Jesúsen', bche'k xhibe', blle'ktekze' rao yon', go'tyoere' Le'e, lle'e Le'e:

—Xana', cha' lle'nro', wakse waka'o yillwe' kia' ni.

¹³Na'll Jesúsen' bli ne'en, na' bdane' le'e, na' bne'e:

—Lle'nkzra', bayak.

Sete le baga'te yillwe' ke be'nnen'.

14 Jesúsen' go'tyoere' le'e, ni to be'nn bi we'rene' di'll kan' bayone' le'en, lle'e le'e:

—Byej rao bxozen', na' be'e dan' nllia da Moisésen' bia'a, nench yeyako' yall rao leyen'. Ka' ben nench yeolol be'nne nnez akre' ba bayako'.

¹⁵Yeolol yell ka', yezikre bze ke Jesúsen'. Na' be'nn zan kwis lldop llzenay ake' xti'lle'n, na' lljake' nench wake'e biteze yillwe' llak ake'. ¹⁶Na' Le'en ka llonkze', llbe'yi'lle' be'nn zan ka', lleje' to latj dach, na' lloe'rene' Diosen' di'lle.

Jesúsen' bayone' to be'nn bi dá nia'ne'e

(Mt. 9:1-8; Mr. 2:1-12)

be'nne, na' lli' be'nn ka' nzi'i fariseo, na' ren be'nn ka' llroe' ley dan' bzoj da Moisésen', be'nn za'k doxhen yell ka' gan' nbane Galilea, na' Judea, na' be'nn za'k Jerusalén. Na' yel wak ke Xanllo Dios zorenen Le'e nench llayone' be'nn llak yillwe'. ¹⁸ Bixha ka bllinkze txhonnj be'nn, noa' ake' to be'nn bi dá nia'ne'e, nxoa ake' le'e to rao bray. Lle'n akre' cho' ake' lo yo'n, lljwa'a ake' be'nn we'en rao Jesúsen'. ¹⁹ Na' zi'tere be'nn zan lla'a, kere llak cho' ake', na' byep ake' yichjore, bka'a

ake' dex ka', na' bletj ake' be'nn we'en do ka nake', na' bdixj ake' le'e rao Jesúsen'. ²⁰Ka bre'e Jesúsen' kan' ben ake'n, gokbe're' nxenra'll ake' Le'e, na'll lle'e be'nn we'en:

—Be'nne, ni llazi'xhena' da xhinnj ko'on.

21 Na'll be'nn ka' llsedre ke ley dan' bzoj da Moisésen', na' be'nn fariseo ka', ka ben akre' kan' bne Jesúsen', ben ake' xhbab, bne ake': "¿No be'nnen' neze' ka'? Llkadie' ke Diosen', ne'e ka'. Nollno gak yezi'xhen da xhinnj ke be'nne, le zeraoze Dios."

²²Na' Jesúsen' gokbe're' kan' llake lo yichjra'llda'o ake'n, na'll lle'e leake':

—¿Bixchen llake lo yichjra'llda'oren' ka'? ²³Llákere cha' bi za'k xti'lla' dan' llepa' be'nnen!: "Ni llazi'xhena' da xhinnj ko'o na'n." ¿Akxha gonre xhbab cha' yepe!: "Bayas na' bayej"? ²⁴Zan ni wroe'ra' re', nada' Be'nnen' Gorj Radj Be'nnach, napa' yel wak nench wayona' be'nne, na' leska' naptia' yel llnebia' nench yezi'xhena' da xhinnj ke be'nne.

Na'll goll Jesúsen' be'nn xhinnjen':
—Ni llepa' rwe', bayas, bazi'i gan'
bxhoa'on, na' bayej rillo'.

²⁵Le bayaste be'nn xhinnjen', llwiate be'nn ka' bazie' gan' bxhoe'n, na' zayeje' rille' lloe'rawe' Dios. ²⁶Yeolol be'nn ka' llabán akre' kwis, na' lloe'rao ake' Dios, do llebtit ake' ne ake':

-Nna' lla bre'llo to da yel wan kwis.

Ka gok brej Jesúsen' Leví (Mt. 9:9-13; Mr. 2:13-17)

²⁷Bde na', blloj Jesúsen', na' bre're' to be'nn wachixhj be'nn re Leví. Llie' gan' llchixhje'n, na' goll Jesúsen' le'e:

—Da nnao nada'.

²⁸Na' le bzolla'te' bsanra'lle' yeolol xchinraze', na' bnawe' Jesúsen'.

²⁹ Na'll ben Levín' to lnni xhen, na' jak be'nn zan be'nn wachixhje, na' ren yezikre be'nne. Na' blle' ake' llao ake'. ³⁰ Na' be'nn ka' llsedre ke ley dan' bzoj da Moisésen', na' fariseo ka', lla'dyi' ake' be'nn ka' non Le'e txhen na', lle ake' leake':

—¿Bixchen llaorenre be'nn wachixhj, na' ren yezikre be'nn wen da xhinnj ka' txhen?

³¹Na'll goll Jesúsen' leake':

—Be'nn bibi yillwe' llake, bi yalljre' be'nn wen rmell, zan be'nnen' llak yillwe'n, le'en yalljre' be'nn wen rmellen'. ³²Kere za'a zadyexha' be'nn wen aken', zan za'a zadwia' be'nn wayatre ke da xhinnj ba ben ake'.

Jesúsen' bzejnie're' bixchen bi llon be'nn ka' non Le'en txhen na' was

(Mt. 9:14-17; Mr. 2:18-22)

³³Na'll bal be'nn goll ake' Jesúsen':

—¿Bixchen be'nn ka' nao Juan be'nnen' bchoa be'nn nis, na' be'nn ka' nao be'nn fariseo ka', llonteze llon ake' was, na' llalwill ake' Dios, na' be'nn ka' nao rwe'n lle'j llao akse' kwasro?

34 Na'll lle'e leake':

—¿Bixha wak gon be'nn ka' was, be'nn ka' llon ake' yexh ga llak yel wachayna'a chak lli'rén wachayna'n leake'? ³⁵Zan wllin lla kate waga'a be'nn byion', kana'llen' gon ake' was. ³⁶Na' be'rene' leake' to di'll, bne'e:

-Ni to be'nne, kate wade'e to ra'll xha da gor, wxhoxhje' to ra'll kob wade'en. Cha' ka' gone', wlleyi' ra'll ra'n koben'. Na' leska' bi watilen to ra'll kob ren to ra'll gore. 37 Ni to be'nn leska' bi ka'cha'oze' xis uva koben' to lo blloy yid gore. Cha' ka' gone', wche'z xis uva koben' blloy yid goren', na' ka' larj xis uva ke'en, na' kweyi'te blloy yiden'. 38 Zan xis uva koben' ka'cha'we'n lo blloy yid kobe, na'llen' bibi gaken. 39 Na' be'nnen' bayo'rawe' lle'je' xis uva goren', bill ye'nre' ye'je' xis uva koben', na' nne'e: "Nakll xis uva goren' sia."

Be'nn ka' nao Jesúsen' blechj ake' dao ke trigo to lla nba'nne

(Mt. 12:1-8; Mr. 2:23-28)

Gok to lla nba'nne ke be'nn Israel ka', ka yo' ake' nez, bde ake' ga naz ake' trigo, na' be'nn ka' non Jesúsen' txhen na', bzorao lllechj ake' dao ke trigon', na' bxho'b ake'n, na' bdao ake'n. ²Na' bre'e be'nn fariseo ka' kan' llon ake'n, na'll lle ake' leake':

—¿Bixchen llonre ka!? Llonre da bi llaya'l gonllo lla nba'nne.

³Na'll lle Jesúsen' be'nn fariseo

—¿Bixha bi nna golre gan' llian, ka ben da Daviden' ren be'nn lwellje' ka' ka bdon ake'? ⁴Kan' byoe' lo yoda'on, na' bxhie' yet xtir da ba nak la'y, da bi de latj gao noteze be'nne, toze bxoz ka' gak gao len, na' Daviden' bdawe'n, na' leska' bdaorén be'nn ka' zejrén le'e txhen na' len.

⁵Na' leska' golle' leake':

—Nada', Be'nnen' Gorj Radj Be'nnach, leska' naka' xan llan' llapre bara'nne.

Jesúsen' bayone' to be'nn nxho'n chla' ne'e

(Mt. 12:9-14; Mr. 3:1-6)

Gok ye to lla nba'nne, ka byo'
Jesúsen' to lo yoda'o ke be'nn
Israel ka', na' llzejnie're' leake'. Na'
lli' to be'nn nxho'n ne'e cha'we.

Na' be'nn fariseo ka', na' be'nn
ka' llsedre ke ley dan' bzoj da
Moisésen', lli' ake' lli'nao ake' cha'
wayone' be'nnen' rao lla llap ake'
bara'nne, na' ka' ga't da lljatao
ake' xhia nench wlliayi'll ake' Le'e.

Jesúsen' llakbe'tere' kan' llon ake'
xhbaben', na'll golle' be'nnen' nat
chla' ta'ke'n:

—Bazolla'a, na' jasé kllole na'. Na' bzolla'a be'nnen'. ⁹Na'll goll Jesúsen' be'nn ka':

—Ni wnnabkera' re': ¿Bi llaya'l gonllo lla nba'nnen', gonllo da wen o cha' gonllo da xhinnj? ¿Wak yesrallo be'nn o cha' we'llo latj kwiayie'?

¹⁰Llwiateze yeolol be'nn ka', golle' be'nnen':

—Bli na'on.

Na' bli na'a be'nnen', le bayakte ne'en. ¹¹Goklla'a be'nn ka' kwis, na' lloe'rén lwellj ake' di'll akre gon ake' ke Jesúsen'.

Jesúsen' breje' postl ka' ben Le'e txhen

(Mt. 10:1-4; Mr. 3:13-19)

¹²To lla byej Jesúsen' to rao ya' jalwille' Diosen', na' do yer be'rene' Le'e di'lle. ¹³Kate byeni' na', batope' San Lucas 6 114

be'nn ka' non Le'e txhen na', na' breje' chllinn (12) be'nn nne lo raze', na' bsie' leake' postl. ¹⁴Ki re be'nn chllinn ka': Simón be'nnen' bsie' Pedron', na' bi'che'n re Andrés, Jacobo, na' Juan, Felipe, na' Bartolomé, ¹⁵Mateo, Tomás, Jacobo xhi'nn be'nnen' re Alfeo, Simón be'nnen' ben txhen be'nn ka' nzi'i Zelote, ¹⁶Judas bi'ch Jacobo, na'll Judas Iscariote be'nnen', kan' bllin lla, bene' Jesúsen' rallna'a be'nn ka' llwie Le'en.

Jesúsen' broe' bsedre' be'nn zan (Mt. 4:23-25)

¹⁷Ka llayetjrene' leake' le' ya'n, na' ballín ake' gan' nak ra'che, na' bze Jesúsen' ren be'nn ka' non Le'en txhen na', le ba lla'a be'nn zan za'k doxhen ga nbane Judea, na' Jerusalén, na' yell ka' re Tiro, na' Sidón dan' lli' lloa' nisda'o. Lla'a ake' wzenay ake' xti'lle'n, leska' wayone' yillwe' llak ake'. ¹⁸Ren be'nn yo' ake' daxi'o, bayone' leake'. ¹⁹Yeolol be'nn ka', lle'n akre' lljatan ake' Le'e, le ne ka lljatan ake' Le'en, ll-lloj yel wak ke'en, na' llayak akte' biteze yillwe' llak ake'.

Be'nn ka' so nbaraz, na' be'nn ka' za'kzi'

(Mt. 5:1-12)

²⁰Jesúsen' blis rawe'n bwie' be'nn ka' non Le'e txhen, na'll golle' leake':

—Nbaraz ke re' be'nn ya'che, re' gonre Diosen' txhen katen' nnebie'n.

²¹'Nbaraz ke re' nna' bil donre, re' gon Diosen' ka yérjere kwasro.

'Nbaraz ke re' nna' bellre, wllin lla kate yewere. ²²'Nbaraz ke re' kate be'nn llwie akre' re', na' wara'a ake' re', na' zi'chi'll ake' re', na' llre'e akre' re' ka be'nn wen da xhinnj, ni ke dan' naore nada' Be'nnen' Gorj Radj Be'nnach. ²³Katen' gon akre' re' ka', leyewé, yel banez xhen de keré kate wallinre gan' zo Diosen'. Ka'kzen' ben akre' be'nn ka' be'e xti'll Diosen' blla'a kana'.

²⁴'Zan nya'chraz naken ke re', be'nn wnia', le nna'zen' zi're banez. ²⁵'Nya'chraz naken ke re', nna' nérjere kwasro, za llin lla tonren'.

'Nya'chraz naken ke re', llawere nna', za wallayraoren', za llin lla gosia're.

²⁶'Nya'chraz naken ke re', cha' llon be'nn ka' re' xhen, leska' ben xozxta'o ake' ka', ben ake' xhen be'nn ka' bxhiye'e batna', be'nn ka' bne lloe' ake' xti'll Diosen'.

Llie'llo be'nn llwie lli'o (Mt. 5:38-48; 7:12)

²⁷'Na' re' llzenay, ni llnia' re':
Lellie' be'nn ll-lliayi'll re', legón
wen ke be'nn llwie re'. ²⁸Lewnnab
gak wen ke be'nn yichjbie' keré, na'
lewnnab gakrén Diosen' be'nn llxoa
da xhinnj ko'llre. ²⁹Be'nn kape
chla' xa'yo'n, bze dan' ye chla' na'
kape'n. Cha' be'nn ye'nzre' wke'e
xherk ko'on, be'e latj wka'a rente
xha'on. ³⁰Cha' be'nn bi da nnabre
re', lewe'n, na' cha' be'nn wke'e bi
da de keré, bi yennabren. ³¹Kon
yeolol da wen da lle'nere gon be'nn
ka' ke re', ka'kze legón ke ake'.

32'Cha' re' nllie're be'nn nllie'zre re', ¿bixha za'ken na' ka'? Leska' llon be'nn wen da xhinnj ka', nllie' akre' be'nn nllie're leake'. 33 Cha'

llonre wen ke be'nn llone re' wen, ¿bixha za'ken na' ka'? Leska' llon be'nn wen da xhinnj ka'. 34Re' kate bi da llbejre, na' kat bi lloe're be'nne, nnézere wayonne'n, na'llen' lloe'ren, ¿bixha za'ken na' ka'? Leska' llon be'nn wen da xhinni ka', llakrén ake' be'nn wago' wzon ke ake'. ³⁵Lellie' be'nn ka' llwie re', legón da wen, lewe'e be'nne bi da de keré, bi kwexhzre wayónn ake'n, na'llen' gakre xhi'nn Dios be'nnen' zo yebá, Le'e gonne' re' yel bara'nn xhen kate wallinre gan' zoe'n. Le'e llone' wen ke yeolol be'nne, la'kze nak ake' be'nn wen da xhinnj. ³⁶Lewaya'chra'll, kan' llon Xallo Diosen' llaya'chra'lle' noteze be'nn.

Bi llaya'l wchoybia'llo ke be'nne (Mt. 7:1-5)

³⁷'Bi wlliayi'llre be'nne nench ke wlliayi'll Diosen' re', na' bi wchoybia're ke be'nne nench ke wchoybia' Diosen' ke re'. Lewazi'xhen ke be'nne, na' ka' wazi'xhen Diosen' keré. ³⁸Lewe'e, cha' bi we're be'nne, ker da nnitrao ka'zen', da wayonnte Xanllo Diosen', wa lla'chochjte wayonne', kon ka we'llo, kon ka zánello we'llo, leska'n wayónn Diosen' lli'o.

³⁹Na'll be'rene' leake' to di'll, bne'e:

—¿Wak to be'nn lchol wse'e ye to be'nn lchol yobre? Cha' ka' gone', llop ake' lljabix. ⁴⁰Ka to bida'o llsede, kere za'kll lebe' kerke be'nnen' llsede lebe'n, zan cha' lebe' we'la'llbe' wsedbe', gonkzbe' ka be'nnen' llsede lebe'n.

⁴¹'¿Bixchen llwiazo' beb da'on yo' lo rao be'nn bi'cho'n, na' bi llwia'o

beb xhen na', yo' lo rao rwe'?

42 ¿Bixchen yezo' bibi'cho'n: "Anchk wabejkera' beb da'on yo' lo rao'n?"

¿Bixha dan' yo' lo rao rwe', be'nn chop rao? Zga'tek babej beb xhen na', yo' lo rao rwe', na'llen' yere'ro' kwasro, na' gak wabejo' yixh beben' yo' lo rao be'nn bi'cho'n.

Dan' llon be'nn ka' gakbe'llo kan' nak ake'n

(Mt. 7:17-20; 12:34-35)

43'Gaga zo yay wen da llbia daxhix da bi nak wen, leska' yay da bi nak wen, bi llbian daxhix wen. 44'Kon da xhixen' llbia yay na'n, nnézello ka nak yayen'. Bi llbia higo rao yay ye'che, leska' bi llbia yay ye'che uvas. 45'Be'nnen' nak be'nn wen, yichjra'llda'we'n naken ka to ga lla'a da cha'o, na'n llchache' da wen ka' llone'n. Na' be'nnen' nak be'nn wen da xhinnj, lo yichjra'llda'we' na'n, llchache' da ke nxhia ka' llone'n. Kon ke dan' lla'a yichjra'llda'ollo na'n, len na'n ll-llach lloa'llon' kate nnello.

(Mt. 7:24-27)

46'¿Bixchen llezre nada': "Xanto'" na' bi llonre kan' nia'n? 47 Ni wzejnie'kera' re', ka llon be'nnen' llzenay xti'lla'n, na' llone' ka'n nia'n. 48 Wsa'krebe' ka be'nn llon rille', na' brekwe' ranen to rao yej war. Na' gok yejsi'o, babia nis, blloj yeo wa'a byechjen gan' zo yo'n, na' bibi goke yo'n, le llian rao yej war. 49 Na' be'nnen' kon llenre', na' bi llone' kan' nia'n, wsa'krebe' ka be'nnen' ben rille' rao yo cholj, na' bi bche'nne' ranen zitj, na' ke blloj

San Lucas 6, 7 116

yeo wa'a xhen na', bzalen yo'n ka'le, na' blleyi'n.

Jesúsen' bayone' to be'nn wen llin ke to xan waka'a ya ka'

(Mt. 8:5-13)

Bayoll be'rén Jesúsen' be'nn ka' di'll ki, na' bayoe' yell Capernaum na'. ²Rao yell na' zo to be'nn nak xan be'nn ka', nak waka'a ya, na' zo to be'nn wen llin ke'e be'nn nllie're' kwis, na' llak be'nnen' yillwe', ba llontekzen zi goten le'e. ³Na' xane'n benre' ke Jesúsen', na' bse'le' chop chonn be'nn gor brao ke be'nn Israel ka', nench lljalwill ake' Jesúsen', cheje' wayone' be'nnen' llak yillwe'n. ⁴Ka bllin be'nn ka' rao Jesúsen', go'tyoe akre' Le'e nench cheje' wayone' be'nn we'en, lle ake' Le'e:

—Be'nnen' bse'l neto' nake' to be'nn wen, na' llaya'l gakrenoe', ⁵le nllie're' yell kellon', na' kone xhmelle' bene' to yoda'o keto'.

⁶Jesúsen' byejrene' leake', ba zejte' awlloze, kate bse'l be'nnen' nak xan waka'a yan', be'nn yobre be'nn nake' txhen, na' jatil ake' Jesúsen', lle ake' Le'e:

—Xanto', ne be'nnen': "Bi we'la'lltko', le bi za'ka' cho'o lo yo' rilla'n. ⁷Ke len na' bi bayaxhjra' yed kwina' yedtila' rwe'. To bneze di'llen', na' wayakte be'nn wen llin kia'n. ⁸Nada' zo be'nn llnebia' nada', na' lekze ni't be'nn waka'a ya kia' llnebia' ake'. Kate llepa' toe': Byej, na' llejte', na' kate llepa' ye toe': Da, na' le lledte', na' kate llepa' be'nn wen llin kia'n: Da ni gono', na' le llonte'n."

⁹Ka bene Jesúsen' di'll ki, llabanre' kwis ke be'nnen', na' bayechje', lle'e be'nn ka' nao Le'en:

—Chak da'a radj be'nn Israel ki, gatga nna lljadi'ra' to be'nn wxenra'lle katken' nxenra'll be'nnen'.

¹⁰Na' zayej be'nn ka', ka ballín ake' yo'n, ba bayakte be'nn wen llin ke be'nnen'.

Jesúsen' basbane' xhi'nn to no'r wazeb

¹¹Bde na', byej Jesúsen' to yell da nzi'i Naín ren be'nn ka' non Le'e txhen na', ren be'nn zan be'nn yobre. ¹²Ka le cho'te' yellen', kate za'k be'nn zan be'nn bllach yellen', nlen ake' to be'nn wat, be'nn waten' nakbe' bi ti'ch rao xhna'be', na' xhna'be' na' nake' no'r wazeb. Be'nn zan be'nn rao yellen', non ake' le'e txhen zjake' zjakwa'ch akebe'. ¹³Ka bre'e Xanllon' no'ren', baya'chra'lle' le'e, na' golle' le'e:

—Bi kwello'.

¹⁴Na'll jabi'y Jesúsen' jatane' yi'nn ke bi waten', na' be'nn ka' nlen yi'nnen' brexh ake'. Na' bne'e:

-Be'nn we'o, bayas.

¹⁵Na' bi waten' bayasbe', blle'be', na' bzorao llannebe', na' Jesúsen' bayoe'be' be'nnen' nak xhna'be'n. ¹⁶Yeolol be'nn ka' blleb ake' kwis, na' lloe'rao ake' Dios ne ake':

—Ba bra' to be'nn brao xhen, be'nn lloe' xti'll Diosen' rao rallllon', nna'll ba jadinra'll Diosen' lli'o, na' ba zadra'nne' yell ke'en.

¹⁷Doxhen gan' nbane Judean' ben akre' kan' bene'n, na' yeolol yell ka' lli' do na', bze ke Jesúsen'.

Juan be'nnen' bchoa nis bse'le' be'nn ka' nak le'e txhen gan' zo Jesúsen' (Mt. 11:2-19)

¹⁸Be'nn ka' nao Juan na', jazén akre' le'e yeolol ke da ka' llon Jesúsen'. Na' goxh Juan na', chop be'nn ka' non le'e txhen na'. ¹⁹Na' lle'e leake':

—Lechej gan' zo Jesúsen', na' yere': "¿Rwe'n be'nnen' ne Diosen' wse'le' o cha' kwexhto' be'nn yobre?"

²⁰Kate bllin ake' gan' zo Jesúsen', lle ake' Le'e:

—Juan be'nnen' llchoa' nis, bse'le' neto', le lle'nre' nnezre' cha' rwe'n be'nnen' wse'l Diosen' o cha' kwexhto' be'nn yobre.

²¹Rao lla na', bayón Jesúsen' be'nn zan be'nn llak biteze yillwe'. Bayone' be'nn yo' daxi'o, na' leska' be'nn lchol bayone'. ²²Na'll balli'i Jesúsen' xti'll be'nn ka' bse'l Juan na', lle'e leake':

—Lewayej, na' lelljayell Juan na', yeolol da ka' ba bénere, na' ba bre're ganni: be'nn lchol llare'e akre', be'nn xhinnj lladá ake', be'nn llen yillwe' dan' ne lepra llayak ake', be'nn bi llene ba llayén akre', be'nn wat llabán ake', na' be'nn ya'ch llzenay ake' Di'll Wen ke Diosen'.

23 iNbaraz ke be'nnen' bi llakganre', na' yezikre llejle' kia'!

²⁴Ka ba zayej be'nn ka' bse'l Juan na', Jesúsen' bzorao lloe' xti'll Juan na', ren be'nn ka' zjalla'n, lle'e leake':

—¿No be'nnen' jawiare latj dachen'? ¿To be'nn nak ka yia da zo lle' da le llta be'? ²⁵ ¿Bixha jawiakzre? ¿To be'nn nake' ra'll cha'o? Ka'a, be'nn nake' ra'll cha'on, yo' wen zo ake', na' rill be'nn llnebia' zjalla'a ake' lle'j llao ake' kwasro. ²⁶ ¿Bixha jawiakzre cha'? ¿To be'nn lloe' xti'll Dios? Awa', ni llepa' re', wdetere ka be'nn lloe' xti'll Diosen'. ²⁷Ke be'nn nin' nyoj xti'll Diosen' gan' nen:

Wse'la' to be'nn kwiarawe' rao'n, we'e xti'llo'n,

nench yewe' xhnneze gan' te'on. ²⁸Ni llnia', gatga nna so to be'nn nak be'nn braoll, ka Juan be'nnen' bchoa nisen'. Na' nna' noteze be'nn llzenay ke Dios, nench nnebia' Diosen' yichjra'llda'we'n, la'kze nake' be'nne le zeraoze be'nne bibi za'ke, gaklle' be'nn braoll ka Juan na'.

²⁹Be'nn zan be'nn yell, na' ren wachixhj ka', ka ben akre' xti'll Juan na', blloa ake' nis le byejnie' akre' nak ake' be'nn wen da xhinnj rao Dios. ³⁰Zan be'nn fariseo ka', na' be'nn ka' llsed llroe' ley dan' bzoj da Moisésen', bi gokra'll ake' wchoa Juan na' leake' nis, bi be'e ake' latj gon Diosen' da wen na' llwie' gone' ke ake'. ³¹Na' bne Jesúsen' da yobre:

—¿Akre ka wsa'kreba' be'nn ki lla'a nna'? ¿Akre nak ake'? ³²Ka bida'o kate yitj akbe' do lao ya'a, na' lle lwellj akbe': "Ba bkwellto' bllej, na' bi bya're, na' ba belto' da llon nya'chraz, na' ni ke bllellzre." ³³Ka nak ba bed Juan na', bi we'e bdaocha'we', na' bnere ke'e: "Daxi'on yo' be'nnen!." ³⁴Na' nada' Be'nnen! Gorj Radj Be'nnach, ba beda' rao yellrion', na' lle'j llawa' kwasro, na' nere kia': "Le lle'j llaoxen be'nnen!, na' llone' txhen

San Lucas 7, 8 118

be'nn wachixhj ka', ren yezikre be'nn wen da xhinnj ka'." ³⁵Zan zjalla'a akse be'nn llzenay ke Diosen'. Leake' llroe' akre' kan' nak yel si'n ke Diosen'.

Jesúsen' byeje' rill to be'nn fariseon'

³⁶To be'nn fariseo re Simón, bene' Jesúsen' yexh nench cheje' rille'n lljatawe', na' ka bllin Jesúsen' rill be'nn fariseon', bllie' gan' gao ake'n. ³⁷Na' rao yell na', zo to no'r wen da xhinnj, na' bnnezre' ka bllin Jesúsen' rill be'nnen'. Ka ba lli' Jesúsen' ren be'nn ka' yela' llao ake', jabi'y no'ren' no'xe' to lmet da yoll nis da la' xhix. 38 Na' blle'k no'ren' xhnia' Jesúsen', bzorao belle' kwis, na' kone nis rawe'n, llasbise' nia' Jesúsen', na' llachechte'n ren yich yichje', na' llno'pe' nie'n, na'll lltopte'n nis dan' la xhixen'. ³⁹Ka bre'e Simón na', be'nnen' ben Jesúsen' yexhen', bene' xhbab: "Chenak be'nn ni nake' be'nn lloe' xti'll Dios, wayakbe're' no'r wen da xhinnjze, no'ren' llone le'e ka'." ⁴⁰Na'll goll Jesúsen' le'e:

—Simón, de to da lle'nra' nnia' rwe'.

Na'll bne Simón na':

- -Bne, maestro.
- ⁴¹Na'll lle Jesúsen' le'e:
- —To be'nne llbej mell, bzo chop be'nn llba'y xhmelle'. To be'nnen' llba'ye' ga'y gayoa (500) mell da nzi'i denario, na' be'nnen' ye to llba'ye' chiyon (50) denario. ⁴²Llopte be'nn ka' bibi de ke ake' wayixhj ake' xhian', na' be'nnen' brej leake' mellen', bnitrawe'n ka'ze. Bnechk nada', ¿nore be'nn ki chop bllie'llre' xan mellen'?

- ⁴³Na' bne Simón na':
- —Cheke be'nnen' bazi'xhene' ke da xhenll.

Na'll bne Jesúsen':

- —Da li kwis kan' bne'on.
- ⁴⁴Na'll bayechje' bwie' no'ren', na' lle'e Simón na':
- —¿Llre'ro' no'ren'? Byoa' rillo'n, bi benno' nis chib nia', na' no'ren', kone nis rawe' na', ba bdibe' nia'n, na' llachechte'n ren yich yichje'.

⁴⁵Bi bno'po' nada', na' no'ren', ka bra'tia' llno'pe' nia'n.

⁴⁶Bi btopo¹ nada' ceit, zan no'ren' ba btope' nia'n to nis da la' xhix.
⁴⁷Ni llnia' rwe', la'kze nake' no'r wen da xhinnj, de yel llazi'xhen ke'e, le da xhen na' nllie're'.
Be'nn llba'ye' ra'tze, ra'tze de wazi'xhenllo ke'e, ka' ra'tze nllie're'.

- 48 Na'll lle'e no'ren':
- —Ba bazi'xhena' yeolol da xhinnj ko'on.

⁴⁹Be'nn ka' lli' llaorene' txhen na', bzorao lle lwellj ake':

- —¿Noxha be'nnen' llazi'xhenze' da xhinnj ke be'nne?
- ⁵⁰Na'll Jesúsen' golle' no'ren' da yobre:
- —Dan' nxenra'llo' na'n ba basrá rwe', bayejchga wen nna'.

Txhonnj no'r gokrén ake' Jesúsen'

Bde na', byej Jesúsen' toto yell, yell xhen, na' yell da'o, jate'e jatixjwe're' Di'll Wen ke Diosen' ren be'nn chllinn ka'.

Leska' txhonnj no'r nao Le'e, be'nn ka' bake'e yillwe' llak ake', na' no'r babeje' daxi'o yo' ake'. Na' ren to no'r re María be'nn Magdala, babej Jesúsen' gall daxi'o yoe'.

Na' ren ye to no'r re Xhuan, no'r ke to be'nn

re Chuza, na' Chuzan' nak rallne'e yo' ke Herodes, na' ren to be'nn re Susana, na' ye to chop no'r yobre. No'r ki gokrén ake' Jesúsen' kon da de ke ake'.

Jesúsen' bsa'krebre' kan' llon to be'nn goz go'nne

(Mt. 13:1-9; Mr. 4:1-9)

⁴Na'll badop be'nn zan, be'nn zak toto yell ka', na' kone da bsa'krebre' bi da ka' bzejnie're' leake', bne'e:

⁵—To be'nn blloje' zeje' goz trigo, na' rawe zeje' llose' nbaz ka', balen je'ten lloa' nez, na' brejchekw be'nn len, na' byinn ka' dá rao lla, bdao akba'n. ⁶Na' balen je'ten rao yej, bra' akten, na' byechen le bibi go'p detek rao yejen!. ⁷Na' balen jago'nnen lo yay ye'che; na' ka bra'n na', baga'rente ye'ch ka', na' benen len roe. ⁸Na' balen je'ten rao yo cha'o, na' nbaraz bra'n, na' bayoe'kazen nbaz ka' to gayoa (100) wej toton.

Bayoll be'e di'll ki, bne'e zillj:

—Re' zo nayre, lewzenay xti'lla' ni.

Jesúsen' be'e di'll bixchen bsa'krebre' bi da ka' kan' bzejnie're' leake'

(Mt. 13:10-17; Mr. 4:10-12)

9Na'll be'nn ka' non Le'e txhen na', bnnab akre' Le'e, lle ake' Le'e: —¿Akre chejnie'llo ka di'llen' bayoll bne'on?

¹⁰Na' Jesúsen' lle'e leake':

—Re', ba brej Diosen' nench nnézere da bi bnneze be'nn blla'a kana', kan' llnebia' Diosen', zan yezikre be'nn bi llejle', wsa'krebra' bi da ka' we'rén ake' di'lle. La'kze wia ake', bi gakbe'e akre' bi da ka'; la'kze yen akre', na' bi chejnie' akre'n.

Jesúsen' bzejnie're' ke dan' bsa'krebre' ke be'nn gozen'

(Mt. 13:18-23; Mr. 4:13-20)

¹¹'Ni wzejnie'ra' re' ka di'llen' be'rena' re': nbaz dan' bes be'nnen', xti'll Dios na'n. 12 Na' da ka' je't lloa' nezen', naken ka be'nnen' kon llenre' xti'll Diosen'; na'll ll-llin daxi'on llabejen xti'll Diosen' dan' ba yo' lo yichira'llda'we'n, na' ka' bi llejle' nench na' yere'e. ¹³Na' da ka' je't rao yejen', naken ka be'nnen' llawere' kwis llzenaye' xti'll Diosen'; na' bi nyin roe zitj, chollze llejle', na' kate llak bi da llak ke'e, le llsante' bill llnawe' Diosen'. 14 Na' da ka' je't radj yay ye'chen', naken ka be'nn ka' llzenay xti'll Diosen', na' da zed, na' yel llawé dan' de rao yellrion', na' yel llzera'll mell. bi lloe'n latj chi'we' rao xhnnez Diosen'. ¹⁵Na' da ka' je't rao yo wen na', naken ka be'nn ka' nak ra'llda'o wen; ka llzenay ake' xti'll Diosen', zi'i ake'n, na' llon ake' kan' lle'ne Diosen', la'kze biteze llak ke ake'.

Da nga'che llinkze lla llroe'rawe

¹⁶'Ni to be'nne kate wxhenze' to yi', wdo'sze'n to ye's leo, na' ni ke wkwa'chze'n xhanre gan' llxhoe' lltase', zan llde'en sibe, na'llen' wseni'n ke yeolol be'nn lla'a lo yo'n. ¹⁷Le gatga de to da nga'che da bi wroe'rawe, na' to da llon be'nn llillize da bi nneze be'nne.

¹⁸'Lewiaya'nn kan' nia' ni, le cha' to be'nn llejnie're', yezikre chejnie'llre'; zan be'nnen' bi lle'nre' chejnie're', ka to da da'o ra'ten' ba llejnie're'n waga'a.

San Lucas 8 120

Xhna' Jesúsen' ren bi'che' ka' bllin ake' gan' zoe'n

(Mt. 12:46-50; Mr. 3:31-35)

¹⁹Xhna' Jesúsen' ren bi'che' ka', bllin ake' gan' zoe'n, na' gokra'll ake' cho' ake' lo yo'n, kere gok, le zi'tere be'nn zan lla'a. ²⁰Na' goll ake' Le'e:

—Xhna'o ren be'nn bi'cho' ka', ze akte' lia' na', na' lle'n akre' re'e akre' rwe'.

²¹Na' Jesúsen' golle' leake':

—Be'nn ka' llzenay xti'll Diosen', na' llon ake' kan' nia'n, leake'n nak xhna', leake'n bi'cha'.

Jesúsen' brekllie' to be' xhen lo nisda'on

(Mt. 8:23-27; Mr. 4:35-41)

²²Bixha gok to lla Jesúsen' byoe' to lo barco, ren be'nn ka' non Le'e txhen na', na'll golle' leake':

—La'yllo ye chla're nisda'on.

Na'll bsa'a ake' barcon'. ²³Rawe zjake' rao nis na'n, btas Jesúsen'. Na' bzorao dá to be' xhen rao nisen', na' bzorao lloll nis lo barcon', ba llontekzen nxholl kwis. ²⁴Na'll basbando ake' Jesúsen', lle ake' Le'e:

- —iMaestro! iMaestro, ba llbeyi'llo! Na'll byase' balwille' be'n ren nisda'on; chollze babe'lli akten. ²⁵Na'll lle'e leake':
- —¿Gan' dan' nere nxenra'llre Dios?

To lleb ake', na' llabán akre' kwis, lle lwellj ake':

—¿Noxha be'nnen!? Rente kaze be', na' ren nisda'o na' llzenayen ke'e.

To be'nn rao yellen' nzi'i Gadara yoe' daxi'o

(Mt. 8:28-34; Mr. 5:1-20)

²⁶Na' bllin ake' to yell da re Gadara, na' lli' Gadaran' chla' nisda'o gan' nbane Galilea.

²⁷Ka balloj Jesúsen' lo barcon', to be'nn rao yellen' jatile' Le'e, na' be'nnen' ba gok scha yo' daxi'o yichjra'llda'we'. Na' kon ba daze' bill llakze xhara'ne'; bill llzokze' rille', na' ba zotekze' do gan' lljakwa'ch ake' be'nn wat ake.

²⁸Ka bre're' Jesúsen', zillj kwis besie'; na' bche'k xhibe' rawe'n bne'e:

—¿Bi de ko'o kone nada', Jesús? Rwe' Xhi'nn Dios zo yebá. Bi wsa'kzi'o nada'.

²⁹Ne'e ka' le Jesúsen' llchie're' daxi'on yellojen, le ba gok scha llnebia'n yichjra'llda'o be'nnen'. La'kze ba bchej ake' le'e kon gden, llchoyya'nne' gden na', na' llxhonnje' llgo' daxi'on le'e yi'xre. ³⁰Na' Jesúsen' golle' be'nnen':

—¿Bi re'o?

Na! bne!e:

—Nyanto'.

Bne'e ka' le da zan daxi'o ka'n lla'a yichjra'llda'we'n. ³¹Na' go'tyoe daxi'o ka' Jesúsen', bi wse'le'n gabil. ³²Na' awlloze ganna' zo to le' ya', lla'a kuch zan llao akba' yi'xe, na' daxi'o ka', lle aken Jesúsen' we'e latj lljacho' aken lo kuch ka', na' be'e latj. ³³Ka balloj daxi'o ka' yichjra'llda'o be'nnen', jacho' aken lo kuch ka'. Na'll to gokllejla'llze kuch ka', bdol akba' to le' bdinnj, na' wix akba' lo nisda'on, na' got akba' we'j akba' nis.

34Be'nn ka' llap kuch ka', ka bre'e akre' kan' goken, baxhonnjdo ake' jatixjwe' akre' be'nn, do lyell do lyi'xe kan' goken. 35 Na' ka bene be'nn ka' xti'll gop kuch ka', byej ake' jawiá ake' kan' goken. Na' jadi' akre' be'nnen' byo' daxi'o ka' yichjra'llda'on, ba llie' xhnia' Jesúsen' ba bayak xhara'ne', na' ba bazoe' wen. Na' blleb be'nn ka' kwis. 36 Be'nn ka' bre'en, be'rén ake' be'nn ka' bllin na' di'll, kan' bayak be'nnen'. 37 Yeolol be'nn ka' lla'a doxhen gan' nbane Gadaran', go'tyoe akre' Jesúsen' yeze'e rall ake'n, le lleb ake' kwis. Jesúsen' bayoe' lo barcon', na' baze'e. 38 Na' ka za wayoe' lo barcon', be'nnen' balloj daxi'o ka' yichjra'llda'on, go'tyoere' Jesúsen' we'e latj nnawe' Le'e. Bixha Jesúsen' bi be'e latj, na' golle' be'nnen':

39—Bayej rillo', na' jazene be'nne katek wen na' ba ben Diosen' ko'o. Na' zayej be'nnen', jate'e doxhen yell jazenre' be'nne, katek da xhen na' gokrén Jesúsen' le'e.

Jesúsen' basbane' xhi'nn Jairo, na' bayak ye to no're bdan xhe'en

(Mt. 9:18-26; Mr. 5:21-43)

⁴⁰Ka ballín Jesúsen' Capernaum na', be'nn zan ba lla'a llbexh Le'e, llawé akre' balline'. ⁴¹Na' bllin to be'nn re Jairo, be'nn nak rallne'e yoda'o ke yellen', na' bche'k xhibe' go'tyoere' Le'e cheje' rille', ⁴²le zo ti'ch xhi'nne' no're bi de chllinn (12) iz llakbe' yillwe', na' ba llatbe'. Chak zeje' rill Jairon', be'nn zan kwis nao Le'e, to llchi'd ake' Le'e.

⁴³Bixha to no're, leska' ba gok chllinn (12) iz llake' yillwe',

bzoe' wa'a, ba bene' gaxt doxhen xhmelle', lleje' rao wen rmell, na' bi llayakse'. ⁴⁴Na' jabi'ye' ko'llre Jesúsen' jatane' xhara'ne'n. Ka bdane' xhara'ne'n, le brexhte yillwe' ke'en. ⁴⁵Na'll le bnete Jesúsen':

—¿Non' bdan nada'?

Ni toe' bi bachebe', na'll Pedron' ren be'nn ka' zjakrén le'e txhen na', bne ake':

—Maestro, be'nn zan be'nn ka' llchi'd rwe', na' nechko': "¿No bdan nada'?"

⁴⁶Na'll bnekze' da yobre:

—Zo to be'nn bdan nada'; gokbe'tera' ben yel wak kia'n llin.

⁴⁷Ka bre'e no'ren' gokbe'te Jesúsen' kan' jatane' Le'en, to xhize', to llebe' jabi'ye' rawe'n, bche'k xhibe', na' be'e di'll rao yeolol be'nn ka' kan' gok bdane' xhara'ne'n, na' baga'te yillwe' ke'en. ⁴⁸Na' lle Jesúsen' le'e:

—Xhi'nna', dan' nxenra'llo' na'n, ba basrá rwe'. Bayejchga wen.

⁴⁹Na' lloe'te' di'llen', kate bllin to be'nn bza'a rill Jairon', na' lle'e Jairon':

—Bill wchie'ro' Maestron', ba gotte xhi'nno'n.

⁵⁰Ka bene Jesúsen' kan' bne be'nnen', na'll golle' Jairon':

—Bi llebo', kon bxenra'lle, na' wayakse xhi'nno'n.

⁵¹Ka byoe' lo yo'n, nono be'kze' latj cho' ren Le'e lete Pedro na'ze, na' Jacobo, na' Juan, na' ren xaxhna' bida'o no'r na'. ⁵²Yeolol be'nn ka' lla'n, bell ake' llak akre' bida'on, na'll lle Jesúsen' leake':

—Bi kwellre, kere gotbe'n, taszbe'n. ⁵³Na' bxhill ake' ke'e, le nnez

akre' kwasro ba gotbe'n. ⁵⁴Na'll

be'xe' na'a bida'o no'r waten', na' bne'e:

—Bida'o no're, bayas.

⁵⁵Na' babán bida'o no'ren', le bayástebe', na' goll Jesúsen' leake', we'e ake' da gaobe'. ⁵⁶Na'll xaxhna' bida'on llabán akre' kwis, na' Jesúsen' golle' leake' nono we'rén ake' di'll dan' goken.

Jesúsen' bse'le' be'nn chllinn ka' jatixjwe' akre' xti'lle'n

(Mt. 10:5-15; Mr. 6:7-13)

Na' batop Jesúsen' be'nn chllinn ka', be'nn ka' non Le'e txhen na', na' be'e leake' yel wak, na' yel llnebia' nench yebej ake' daxi'o yo' yichjra'llda'o be'nne, na' wayón ake' be'nn llak yillwe'. ²Na'll bse'le' leake' chixjwe' akre' be'nne kan' nak yel llnebia' ke Diosen', na' wayón ake' be'nn llak yillwe'. ³Na'll golle' leake':

—Bitbi go'xzre ke tnez, bi wayirjzre yay wchi'chre, ni bzod, ni yet, ni mell, ni ye chkwe' xhara'nre bi go'xre. ⁴Yell ga llinre, toz yo' sore chak sore rao yellen'. ⁵Cha' to yell ga llinre bi si'i ake' xti'llren', lewalloj yellen', lewabibte nia're nench wallib bichten' blliare na', na' gakbe'e akre' da xhinnj xhen na' llon ake'.

⁶Na'll bza'a be'nn ka', byej ake' toto yell, llyixjwe' akre' Di'll Wen ke Diosen', na' llayón ake' be'nn llak yillwe'.

Kan' gok bet ake' Juan be'nnen' bchoa nis

(Mt. 14:1-12; Mr. 6:14-29)

⁷Herodes, be'nnen' llnebia' Galilean' to llake' tore, ka llenre' yeolol da ka' llon Jesúsen', na' da xhen llakganre' ka nak llenre' ne be'nn ka': "Cheke Juan na' babanrize'." ⁸Ye bal ake' ne: "Cheke Elíasen', ba bara' rao yellrion' da yobre." Na' lla'a be'nn ne ake': "To be'nn ka' be'e xti'll Dios, be'nn bzo kana'n ba babán, na'llen' llone' ka'." ⁹Na'll Herodesen' bne'e:

—Nada' bse'la' be'nn ak bchoy ake' yen Juan na', ¿noxha be'nnen' ne ake' ka'?

Na' le lle'ne Herodesen' re're' Jesúsen'.

Jesúsen' bwawe' ga'y mir be'nne (Mt. 14:13-21; Mr. 6:30-44; Jn.6:1-14)

10 Ka ballín postl ka' gan' zo Jesúsen', be'rén ake' Le'e di'll kan' jen ake'n. Na' bche'e leake' to latj dach gan' nbane yellen' re Betsaida. 11 Ka gokbe'e be'nn yell ka' ba broe' nez, na' bnao ake' Le'e. Ka bre'e Jesúsen' leake' goxhe' leake', na'll bzejnie're' leake' kan' llnebia' Diosen', na' bayone' be'nn llak villwe'.

¹²Na' ba llonen ba wlle', na' be'nn chllinn ka' jabi'y ake', lle ake' Le'e:

—Bse'l be'nn ki lljake' yell ka' lli' do na', nench chirj ake' ga tas ake', na' llel da gao ake', le ker bi de ganni, naken to latj dach.

¹³Na' lle Jesúsen' be'nn ka' non Le'e txhen na':

—Re' llaya'l we're da gao ake'. Na'll bne ake':

—Ga'y ze yet xtir, na' ye chopze belya' da'o de kello, lete cha' lli'o llje'ollo da gao be'nn ki.

¹⁴Na' nak ka do ga'y mir zre be'nn byio. Na' goll Jesúsen' be'nn ka' non Le'e txhen na': —Leyé ake' kwe' chiyon (50) wej ake', kwen kwenze.

¹⁵Na' ka' ben ake', na' blle' yeolol be'nn ka'. ¹⁶Na' bxhie' yet xtir ga'y ka', na' belya' ka' ye chop, na' le bwiate' le' yebáre, benla'ye'n, na' be'e yel llioxken ke Dios, na'll bxhoxhje'n be'e be'nn ka' non Le'en txhen na', na' leake'n le be'e akte'n be'nn ka'. ¹⁷Yeolol ake' bdao to berj aktere', na' batop ake' da la'o ka' bago'nnen', na' goken ye chllinn (12) llom.

Pedron' bne'e Jesúsen' nake' Cristo be'nnen' bse'l Diosen' llnebie'

(Mt. 16:13-19; Mr. 8:27-29)

¹⁸Gok ye to ka ni't be'nn ka' non Jesúsen' txhen ren Le'e, na' Le'e lloe'rene' Diosen' di'lle to wraze. Na'll golle' leake':

- —¿Bi ne be'nn ka' no naka'?
- —Lla'a be'nn ne ake' Juan be'nnen' bchoa nis rwe', na' ye bale' ne ake' Elías rwe', na' ye bale' ne'e, kon to be'nn ka' be'e xti'll Dios kana' babán.

20 Na'll lle'e leake':

- —¿Bixha ne re', non' naka'? Na'll ne Pedron':
- -Rwe'n Cristo be'nn bse'l Dios.

Jesúsen' bzorao llyixjwe're' gate' (Mt. 16:20-28; Mr. 8:30-9:1)

²¹Na' Jesúsen' go'tyoere' leake', ni to be'nn bi we'rén ake' di'll cha' Le'en Criston'. ²²Na'll lle'e leake':

—Nada' Be'nnen' Gorj Radj Be'nnach, da xhen za wallayrawa', ka'n llaya'l gak. Ka nak be'nn gor ka' llnebia' Israelen', na' bxoz wnebia' ka', na' be'nn ka' llsedre ke ley dan' bzoj da Moisésen', bi cho'ra'll ake' xti'lla'n, na' got ake' nada', na' wayónn lla wabana'.

²³Na'tell lle'e be'nn ka' lla'n:

—Noteze be'nne cha' lle'nre' gake' nada' txhen, llaya'l wsanra'll kwine', na' gone' ka to be'nn noa' cruz ke'e, na' nawe' nada'. 24 Noteze be'nn lle'nre' yesrá yel nban ke kwine' yellrio ni, wnite'n, na' noteze wnit yel nban ke'en ni kia' nada', le'en ga't yel nban zejlikane ke'e. ²⁵¿Bixha za'ken na', cha' to be'nne gone' gan doxhente da de rao yellrio, na' kweyie', bi ga't yel nban zejlikane ke'e? ²⁶Cha' noteze be'nn waye're' nada', na' ke xti'lla'n, leska' nada' Be'nnen' Gorj Radj Be'nnach, waye'ra' nnia' nake' nada' txhen, katen' yeda' da yobre nsa'a yel beni' xhen kia'n, na' yel beni' ke Xa'n ren ke angl ka'. ²⁷Da li nia' re', balre lla'a ganni, bire nna llin lla gatre kate re're nnebia! Diosen!.

Jesúsen' goke' ka to beni'

(Mt. 17:1-8; Mr. 9:2-8)

²⁸Gok ka to xhman ka be'e di'll ki, byeje' to rao ya' je'rene' Diosen' di'lle, na' nche'e Pedron' ren Jacobo. ren Juan na'. 29 Chak lloe'rene' Diosen' di'llen', blla'a yichirawe'n, na' gok xhara'ne'n llich kwis, to llaktiten. 30 Le bllinte da Moisés, na' da Elías, be'nn ka' bzo kana'. na' lloe'rén ake' Jesúsen' di'lle. ³¹Na' nechj beni' xhen ke Diosen' leake', na' lloe' ake' di'll ke nak chej Jesúsen' Jerusalén, na' wallayrawe' na' gate'. 32 Pedron' ren be'nn ka' ye chop, le nen btas ke ake'; bixha bi btas ake', na' bre'e akre' Jesúsen' ren beni' xhen ke'en, na' ren be'nn

ka' chop zerén Le'en. ³³Na' ka ba llaza' da Moisésen' ren da Elíasen', Pedron' golle' Jesúsen':

—Maestro, le wen zollo ganni, na' gonllo chonn yo' de yixh, to ko'o rwe', to Moisés na', na' ye to Elías.

Bne'e ka' le ker llakbe're' bin' ne'en. ³⁴Na' nete' ka'n, kate to bej byechjen leake', na'll blleb Pedron' kwis ren be'nn lwellje' ka'. ³⁵Kate ben akre' bnne Diosen' lo bejen', bne'e:

—Be'nn nin' Xhi'nna', be'nn nllie'ra'; Le'en wzenayre ke'e.

³⁶Ka bayoll ben akre' be xhnne ke Diosen', na' bre'e akre' ye toze Jesúsen' ze'e. Nono be'rén akze' di'll ke dan' bre'e akre'n, bzo ake' llize.

Jesúsen' bayone' to bida'o llen xhgot

(Mt. 17:14-21; Mr. 9:14-29)

³⁷Bateyó ka llayetj ake' le' ya'n, be'nn zan jatil leake' gan' llayetj ake'n. ³⁸Na' blloj to be'nn radj be'nn zan ka', bnne'e zillj lle'e Jesúsen':

—Maestro, ben okré bwia xhi'nna'n, ti'chze lebe'n nak.

³⁹Llzap daxi'on lebe', na' to ka zezbe' llosia'be', na' llxizen lebe', na' llonen llarj pep blli'n lloa'be'; lltolen lebe', na' ni ke llallojzen.

⁴⁰Ba golla' be'nn ka' non rwe' txhen na', wabej ake' daxi'on, na' bi gok ake'.

⁴¹Na'll bne Jesúsen':

—Re' nakre be'nn wen da xhinnj, na' bi llejle're, ¿batten' na' zerena' re'?

Na'll lle'e be'nnen':

—Da wa'a xhi'nno'n ni.

⁴²Chak zej bida'on rawe' na'n, bllixtol daxi'on lebe' zi'llo, na' Jesúsen' bdile' daxi'on, na' ballojen, na' bayak bida'on, na' bayoe'be' xabe'n. ⁴³Yeolol be'nn ka' llabán akre', kan' llre'e akre' yel wak ke Diosen'.

Jesúsen' bdixjwe're' da yobre gate' (Mt. 17:22-23; Mr. 9:30-32)

Nna zete be'nn ka', llabán akre' dan' llon Jesúsen', kate golle' be'nn ka' non Le'e txhen na':

44—Legón bien nench di'll ki cho'n yichjra'llda'ore, le nada', Be'nnen' Gorj Radj Be'nnach, wllin lla gaka' rallna'a be'nn ka' llwie nada'n.

⁴⁵Na' be'nn ka' nao Le'en, bi byejnie' akre' bixchen ne'e ka', le nna nga'chen rao ake'n, na' leska' bi llayaxhi akre' wnnab akre' Le'e.

Gokyoll be'nn ka' non Jesúsen' txhen nore gakll be'nn brao

(Mt. 18:1-5; Mr. 9:33-37)

⁴⁶Be'nn ka' nao Jesúsen' bzorao lloe'rén lwellj ake' di'll, noren' gakll be'nn brao. ⁴⁷Jesúsen' gokbe're' kan' llon ake' xhbaben', na' goxhe' to bida'o bzebe' kwite'n. ⁴⁸Na'll lle'e leake':

—Notezre cha' gakrenre ka bida'on gonre wen kebe', dan' llonlira'llbe' nada', nadkza'n gonre wen kia' chet ka'. Na' be'nnen' llakren nada', Diosen', be'nnen' bse'l nada'n, llakrene' chet ka'. Na' be'nnen' bi llonxhen kwine', le'en nak be'nn brao.

Be'nn bi llwie lli'o, txhen na' llone' lli'o

(Mr. 9:38-40)

⁴⁹Na'll Juan na' golle' Le'e:

—Maestro, bre'to' to be'nn llabeje' daxi'o yo' yichjra'llda'o be'nne kone

ra'o na'. Na' golltoe' bill gone' ka', le bi nake' lli'o txhen.

⁵⁰Na'll Jesúsen' lle'e le'e:

—Bi wllonre gone' ka'. Cha' to be'nne bi llwiere' lli'o, txhenkzen' nake' lli'o.

Jesúsen' bdile' Jacobo ren Juan

⁵¹Bixha ka ba zo llin lla, wayeje' wazi'i Diosen' Le'e, na' bchoyra'lle' cheje' Jerusalén na'. ⁵²Na' bse'le' to chop be'nn blliarao rawe'n, lljen ake' xhnid gan' lline'n. Be'nn ka' bse'le'n, byo' ake' to yell ga nbane Samaria. ⁵³Na' be'nn Samaria ka', bi gokra'll ake' choe' yell ke ake'n, ni ke dan' llwia ake' llone' ka be'nn zej Jerusalénre. ⁵⁴Na' Juan na', ren Jacobon', ka bre'e akre' kan' bene be'nn ka' Jesúsen', goll ake' Le'e:

—Xanto', ¿Lle'nro', gonto' kan' ben da Elías be'nnen' be'e xti'll Dios kana', wnnabto' yetj yi' za'a yebá, wzeyen be'nn ki?

⁵⁵Na' bayechje' bdile' leake', bne'e:

—Bi llakbe're bi Spíritu xhinnje llnebia' re'. ⁵⁶Le nada', Be'nnen' Gorj Radj Be'nnach, kere beda' nench wlleyia' be'nnen', beda' nench yesrá akre'n.

Bayoll bne'e ka', na'll zjake' yell yobre.

Kan' goll Jesúsen' be'nn ka' gokra'll gon Le'e txhen

(Mt. 8:19-22)

⁵⁷Chak zjake' na'n, to be'nn golle' Jesúsen':

- —Xana', wnawa' rwe' gateze chejo'.

 58 Na'll lle Jesúsen' le'e:
- —Be'z ka' zo ga llallín akba' lltas akba', na' ba ka' zo xir dá rao lla,

llia xo'nn akba', zan nada', naka' Be'nnen' Gorj Radj Be'nnach, bitbi zo ga yezi'ra'lla'.

⁵⁹Na' Jesúsen' golle' ye to be'nn vobre:

—Da nnao nada'.

Na' be'nnen' golle' Le'e:

—Xana', zga'tek benn latj wkwa'cha' xa'n kate gate', na'll nnawa' rwe'.

60 Na'll lle Jesúsen' le'e:

—Bkwa'nn be'nn wat ka', wkwa'chze lwellj be'nn wat ka', zan rwe' byej jatixjwe' xti'll Diosen'.

⁶¹Na'll to be'nn yobre golle' Jesúsen':

—Wnawa' rwe' Xana', zga'tek ben latj lljaye'rena' bi'ch lwellja' di'lle.

62 Na' Jesúsen' golle' le'e:

—Cha' to be'nn llwa'nne' belle, na' nchi'che' raden' naweba'; kere wayechje', na' llwiaze' gan' ba bde'e na', be'nnen' gon ka' rao xhnnez Diosen' bi gake' nnawe'n.

Jesúsen' bse'le' wyon chi (70) be'nn jatixjwe' xti'lle'n

10 Bde na', Xanllon' breje' wyon chi be'nne, na' golle' leake' kwiarao ake' rawe'n, na' chej chop wej ake' toto yell gan' za tie' na'.

²Na' lle'e leake':

—Da li nia' re', ka be'nn gon wrapen' gonllo, da xhen llin na' de, na' to chopze be'nn wrap ka' nak. Lennabe Dios be'nnen' nak xan llin na', wse'le' yezikre be'nn wen llin rao llin na'. ³Lechej, ni llse'la' re', ka llse'le' xhi'r da'o radj be'kw yi'o. ⁴Bi go'xre bzod ni mell, ni ye chkwe' xher-re, na' bi sezre scha wapre be'nn lliox tnez. ⁵Yo' gan'

San Lucas 10 126

llinre, ka cho'ren' zga'tek nnere: "Sochgare wen." 6Cha' lo yo' na' zo to be'nn nak ra'llda'o wen, gonkze Diosen' gak wen ke'e. Cha' nono llra' be'nn nak ra'llda'o wen, bi gak kan' yeren'. ⁷Yo' ga llinre, ganna'ze sore, ye'j gaotezre kon da gonn ake'. Ka to be'nn wen llin llaya'l si'kze raxhje', ka'kze ke re'; bi tasre toto yo'. 8Cha' to yell ga llinre, kon da gonn ake' llaya'l gaore. 9Lennab yeyak cha' be'nn llak yillwe', na' levé ake': "Ba bllin lla re'llo kan' llnebia' Diosen'." 10 Cha' to yell ga llinre bi wreb ake' re', lechej do lyell, leyé ake': 11 "Bichte dan' bllia lo nia'to'n rao yell keré na', llabibto'n nench waxhoan ko'llre. na' llaya'l nnézere ke yel llnebia' ke Diosen', ba bra' rao rallren'." 12 Ni llnia' re', kate llin lla gon Diosen' yel koxchis ke yeolol be'nne, da xhenll yellayrao be'nn ki, kerke be'nn Sodoma ka'.

Da gak ke be'nn ka' bi llzenay ke Diosen'

(Mt. 11:20-24)

¹³'iNya'chraz ke re' be'nn Corazín! iNa' nya'chraz ke re' be'nn Betsaida! Chenake broe'ra' be'nn ka' ni't yell ka' nzi'i Tiro, na' Sidón yel wak kia'n ka dan' ba broe'ra' re', batna' ba bayechj ake' banao ake' Diosen' chenake, na' llak ake' to ra'll gasj da nak ze'ch, na' llwazj kwin ake' no de da llroe'n ba bayat akre' chenake. ¹⁴Kate llin lla gak yel koxchis ke yeolol be'nne, da xhenll yellayraore kerke be'nn Tiro, na' be'nn Sidón ka'. ¹⁵Na' re' be'nn Capernaum, llákere ba zekzre yebá, ga lle'le gor waza'le' re', ga yellayraore.

¹⁶Na'll lle'e be'nn ka' non Le'e txhen:

—Be'nn wzenaye' xti'llren', kia' nadkza'n wzenaye' chet ka'; na' be'nnen' bi wzenaye' xti'llren', kia' nadkza'n bi wzenaye'. Na' be'nnen' bi wzenaye' kia' nada', ke Dios be'nnen' bse'l nada'n, bi wzenaye' ke chet ka'.

Ka ballín be'nn wyon chi ka'

¹⁷Bixha gok kate ballín be'nn wyon chi ka', llawé akre' ballín ake', lle ake' Jesúsen':

—iXanto', rente daxi'o ka', llzenay aken keto' kate llwa'lto' ra'on!

¹⁸Na'll lle Jesúsen' leake':

—To bre'kazra' llaz daxi'on lle'le, ka llaz yi' bzi'o ka nak llnit yel llnebia' ken. ¹⁹Ganni llonna' re' yel wak, nench wrejchekwre no bele, no xhban leo, na' wrejchekwre doxhen yel wak ke da lle'ne wlliayi' lli'o, na' re' bibi gákere. ²⁰Na' bi wawétekere, ni ke dan' llzenay daxi'on keré, zan leyewé le ba nllia Diosen' raren' le' libr ke'en yebá.

Bawé Jesúsen'

(Mt. 11:25-27; Mr. 13:16-17)

²¹Rawe na' bawé Jesúsen', ka nak zorén Spíritu ke Diosen' Le'en, na' bne'e:

—Lloe'rawa' rwe' Dios Xa, rwe'n llnebia'o yebá na' yellrion', bkwa'cho' da ki, bi byejnie' be'nn si'n ka' len, na' broe'ro'n be'nn nak nexjra'lle. Beno' ka' Xa, le ka'n byo'ra'llo'.

²²'Yeololte da de, Xa'n ba bene'n rallna', na' nono nombia' Xhi'nne'n, toz Xa' na' nombie' Le'e, na' nono nombia' Xa'n, toz nada' nak Xhi'nne'

nombie', na' kon no llbeja' nada' llroe're' kan' nak Xa'n.

²³Na' bayechje' golle' be'nn ka' non Le'e txhen to wraz akze':

—Nbaraz ke re' llre're nada', na' da ka' llona'n. ²⁴Le be'nn zan be'nn be'e xti'll Diosen', na' be'nn llnebia' blla'a kana', le gokra'll ake' re'e akre' ka da ka' llre're nna', na' bi bre'e akre'n; na' le gokra'll ake' yen akre' ke dan' llénere nna', na' bi ben akre'n.

Di'll da be'e Jesúsen' ke to be'nn wen

²⁵Na' bzolla'a to be'nn llsed llroe' ley dan' bzoj da Moisésen', gokra'lle' kweje' Jesúsen' di'lle, lle'e Le'e:

—Maestro, ¿Bi llaya'l gona' nench ga't yel nban zejlikane kia'?

²⁶Na'll lle Jesúsen' le'e:

—¿Akxha nyoj le' leyen'? ¿Akre nen?

²⁷Na'll be'nnen' llejnie' leyen' kwasro bne'e:

—"Llie'ro' Dios do yichj do ra'llo', na' llie'ro' be'nn lwelljo', ka'kze nllie'ro' kwino'."

²⁸Na'll Jesúsen' lle'e le'e:

—Da li kan' bne'on, ka'n ben, na'll bano' zejlikane.

²⁹Na' be'nnen', gokra'lle' wroe're' dakze lixheje, na' lle'e Jesúsen':

—¿Ka noxha be'nnen' nak be'nn lwellja'n, na' llie're'?

30 Na'll bne Jesúsen':

—To be'nn bze'e Jerusalén, na' zeje' Jericó, bixha gok bllayre' be'nn wan, na' bka'a ake' bi ke'e da nse'e, ben ake' zi' ke'e, na' bkwa'nn ake' le'e tnezen' ye zre ke bet akze' le'e. ³¹Ka' goken, kate bde to bxoz tnezen', ka bre're' be'nn we'en, na' bdie' ye chla're nezen' zejze'.

³²Na'll bde ye to be'nn ka' nzi'i levita, lle'nen nen be'nn llakrén lo yoda'o, leska' ka bre're' be'nn we'en, le bdete' ye chla're. 33 Bixha to be'nn Samaria, bdie' tnezen'; ka bre're' be'nn we'en, baya'chra'lle' le'e. 34 Na' jabi'ye' kwite', na' bdibe' we'e ke'en, btope'n ceit, na' bllone'n xis uva, na' bene'n rmell, na' bcheje'n to ra'lle. Na' blene' le'e bllie' le'e ko'll burr ke'en, na' bche'e le'e ga zo to yo' ga lltas be'nn yo' nez. Ganna' basyolle' bwie' le'e. 35 Bateyó ka yewe' nezen', breje' chop mell dan' nzi'i denario, na' be'en xan yo'n, lle'e le'e: "Ben gokre bwia be'nnen', cha' billre da gono' gaxt, na' wayixhja'n kate zaza'a na'."

³⁶Na'll goll Jesúsen' be'nnen':

—Bnechk rwe', ¿nore be'nn ki chonne, gokre' ke be'nnen' bran ake'n nake' be'nn lwellje'?

³⁷Na' bne be'nnen' llsed llroe' leyen':

—Be'nnen' baya'chra'll be'nn we'en bran ake'n.

Na'll lle Jesúsen' le'e:

—Lekze ka'n llaya'l gono' rwe', waya'chra'llo' yeolol be'nne.

Jesúsen' jara'nne' Marta ren María

³⁸Na' Jesúsen' bawe' nez da yobre, na' bllin ake' to yell, na' rao yell na', zo to no'r re Marta, na' bene' Jesúsen' yexh cheje' rille'. ³⁹Na' zo to bir Martan', na' re María, na' Marían' le blle'te' xhnia' Jesúsen' llzenaye' xti'lle'n. ⁴⁰Na' Martan' llaral-llre' llsinie' da gao ake', kate jabi'ye' kwit Jesúsen', lle'e Le'e:

—Xana', ¿bi llakbe'ro' bi bira'n toza' bkwa'nnbe', llsinia' ganni? Gollbe' gakrenbe' nada'. 41 Na'll Jesúsen' lle'e Martan':
—Marta, Marta, le lli' yichjo' dan'
llsinia'on, na' llakllejla'llo' dan'
nyan da zed ko'on. 42 Zan toze da
de da nak lliarao gonllo, len na' ba
brej Marían' llone', na' nono gak
waka'a len.

Jesúsen' broe're' ka we'rén ake' Diosen' di'lle

(Mt. 6:9-15; 7:7-11)

Gok ka zo Jesúsen' to latj ga lloe'rene' Diosen' di'lle, bayoll na' to be'nn ka' non Le'e txhen, golle' Le'e:

—Xanto', bsede neto' akren' we'rento' Diosen' di'll, kan' ben Juan be'nnen' bchoa nis, broe're' be'nn ka' bnao le'en.

²Na'll lle'e leake':

—Kate we'renre Diosen' di'll, ki nnere:

Xa, rwe' llia'o yebá, nak la'y ra'on.

Yedchga yel llnebia' ko'on. Gakchga kan' lle'nro' rao yellrion', kan' llak yebá na'. ³ Na' dan' gaoto' tlla tlla, bennchgan nna'.

⁴ Na' bazi'xhen keto', kan' llon neto', llazi'xhento' ke

be'nn biteze da llon akre' neto'.

Bi wsanra'llo' neto', yexjto' rao da xhinnjen',

bkwas brekyi'll neto' rao da xhinnjen'.

⁵Na'll leska' lle'e leake':

—Bixha cha' re', zo to be'nn nombia're kwasro, na' chejre rille'n llere, na' yere': "Be'nn nllie'ra', ben gokre brej nada' chonn yet xtir; ⁶bra' to be'nn nllie'ra' be'nn za'a zi'te, na' bikzbi de kia' wa'a gawe'." ⁷Na' be'nnen' walli' kerén' gan' de'e na', ye'e re': "Bi gonro' nada' zede, ¿bi llwia'o ba neyj yo'n, na' ren xhi'nna' ki ba tasto', na' bi gak chasa' gonna'n?" 8Ni nia' re', la'kze bi nnen ke chase' gonne'n, na' dan' zere llchie're na', wyaskze' gonne' dan' llnnabren'. 9Ke len na' nia' re': Lewnnab, cha' bi wnnabre, gonnkze Diosen' len; lechirj, cha' bi chirjre, wllelkzen; lewse'kw, na' wyarjkze cho're. ¹⁰Le noteze be'nne bi da llnnabe', wzi'kze'n; na' be'nn llyirje', wllelkzere'n; na' be'nn llnne'e, llsarj akse' ke'e.

11'Cha' re' zo to xhi'nnre, na' wnnábebe' re' to yet xtir, kere we'zrebe' to yej. Cha' wnnábebe' re' to belya', kere we'zrebe' to bele. 12 Na' cha' wnnábebe' re' to xchit bellj, kere we'zrebe' to xhban leo. 13 Cha' re' naktere be'nn wen da xhinnj, nnézere llaya'l we'e xhi'nnre da wen, gonntell Xare be'nnen' zo yebá, gonne' re' Spíritu ke'en kon cha' wnnabren.

Bne ake' ke Jesúsen' babeje' daxi'o kone yel wak ke daxi'on

(Mt. 12:22-30; Mr. 3:19-27)

¹⁴Bixha gok ka llabej Jesúsen' to daxi'o yo' to be'nn blloj; ka balloj daxi'on, le bannete be'nn bllojen'. Na'll llabanre be'nn ka' lla'n. ¹⁵Na' bal be'nn ka' bne ake':

—Llabeje' daxi'o ka' kone yel wak ke Beelzebú dan' llnebia' daxi'o ka'.

¹⁶Na' ye bale', kon llnnab ake' wroe're' yel wak ke'en, gone' to da gone' le' yebá, nench ga't da wxoa ake' do'l ko'lle'. ¹⁷ Jesúsen' llakbe'tere' kan' nak xhbab ke ake'n, na'll lle'e leake':

—Cha' be'nn lla'a to yell gak ake' chopre, wllin lla kate kwiayi' vellen'. Na' cha' be'nn lla'a to lo yo', nak ake' chopre, leska' wllin lla kate waran ake'. ¹⁸Leska' daxi'o ka', cha' nak aken chopre, les bi gak soyib aken scha chet ka'. Le kan' nere llabeja' daxi'o yo' yichjra'llda'o be'nne kone yel wak ke Beelzebún'. ¹⁹Cha' naken kan' neren', ¿bixha xhi'nnre ka', bi kone llabej ake' daxi'o ka' yichira'llda'o be'nne? ¿Kone yel wak ke Beelzebú na'n llon ake' ka'? Leake' wroe' akre', kreren' nak xhbab kerén'. 20 Zan cha' llabeja' daxi'o ka' kone yel wak ke Dios, len naken to da llroe' ba bzorao llroe' Diosen' yel llnebia' ke'en gan' lla'ren'.

²¹'Kate to be'nn war, llape' rille'n kon ren ya, notno gak cho' rille'n. ²²Zan cha' llin to be'nn nak be'nn warlle tilrene' le'e, na' gone' le'e gan, na' wke'e ya ke'en dan' nxenra'lle'n, na' wka'te' yeolol da de ke'e, na' chisen we'e be'nn ka' nake' txhen.

²³'Be'nn bi llone' nada' txhen, llwiere' nada'n. Na' be'nn bi llakrene' nench wzenay be'nn ka' kia', yezikre llone' nench nono wzenaykze kia'.

Daxi'on lljallo'n da yobre lo yichjra'llda'o be'nne

(Mt. 12:43-45)

²⁴'Kate to daxi'o llallojen yichjra'llda'o be'nnen', na' dan llayirjen ga lljacho'n ga yobre. Na' cha' bi ll-llelen to latj ga yezi'ra'llen, na'll nnen: "Waya'chka' lljawia' gan' balloja'n, cha' gak lljalloa' da yobre." ²⁵Na'll llayejen lljawian gan' zo be'nnen', na' kate re'ren ra'llda'o be'nnen', naken ka to yo' da nxhi nloa, na' ndachen. ²⁶Na'll lljatopen ye gall daxi'o da llonll ka len, na'll yella'a aken txhen lo ra'llda'o be'nnen'. Na' cha' ka' ba ben ake'n, na'll yezikre gakll ke be'nnen', kere kan' gok ke'e kana'.

Nbaraz ke be'nnen' llzenaye' ke Diosen'

²⁷Chak lloe' Jesúsen' di'll ki, to no'r ren radj be'nn ka' lla'a llzenay xti'lle'n, bnne'e lle'e Jesúsen':

—Nbaraz ke no'ren' bxhan rwe', na' bwa'lle' rwe'.

²⁸Na' bne Jesúsen':

—Nakllen nbaraz ke be'nnen' llzenay xti'll Diosen', na' llone'n.

Be'nn ka' bi llzenay ke Diosen' bnnab ake' gon Jesúsen' yel wak

(Mt. 12:38-42; Mr. 8:12)

²⁹Na' ka badop be'nn zanll kwit Jesúsen', na'll lle'e leake':

-Be'nn ka' lla'a nna', nak ake' be'nn wen da xhinni kwis, llnnab ake' to da gona' nench wroe'ra' yel wak kia'n, na' chejle' ake' kia'; zan bi gak kan' llnnab ake'n, toze kan' gok ke da Jonás be'nnen' be'e xti'll Diosen' kana', ka'kzen' gak kia'. ³⁰Ka dan' gok ke Jonásen', len na' bre'e be'nn Nínive ka', na' bayakbe'e akre' Diosen' bse'l le'e. Ka'n gok ke'e na', ka'kzen' gak kia' nada' Be'nnen' Gorj Radj Be'nnach, na' gaken to da re'e be'nn ka' lla'a nna'. 31 No'ren' bnebia' yellen' re Sabá, kate llin lla gak yel koxchis ke yeolol be'nne, wabanrene' txhen be'nn ki lla'a nna', na' wchoybie' ke ake', le le'en zi't kwis bede' badzenaye' yel si'n ke

San Lucas 11 130

da Salomón na', na' nada' za'ktella' kerke Salomón na'. ³²Be'nn Nínive ka', kate llin lla gak yel koxchis ke yeolol be'nne, wabanrén ake' be'nn ki lla'a nna', na' wchoybia' ake' ke ake', le leake'n ka ben akre' xti'll da Jonásen', bayat akre' ke da xhinnj ke ake'n, na' nada' za'ktella' kerke da Jonásen'.

Beni' ke yichjra'llda'ollo

(Mt. 5:15; 6:22-23)

³³'Ni to be'nne kate wxhenze' to vi', wkwa'chze'n o cha' wdo'sze'n to llom, zan llde'en sibe nench llseni'n ke yeolol be'nne. ³⁴Yejraore llian naken ka to beni' nench re're. Cha' bibi llaken, llre'kzere kwasro. Zan cha' yejraoren' bi naken wen, doxhenre ncholen chet ka'. ³⁵Lewiaya'nn ke nnebia' da xcholen' re', lewe'e latj cho' beni' ke Diosen' yichira'llda'oren'. 36 Cha' bill yo'llo ni ra't da xcholen', na' doxhen yichjra'llda'ollo yo'n beni'n ke Dios, kana'llen' chejnie'llo kan' nak xhnnez Diosen', gonen ka'kze ga llseni' to yi' xhen rao nezen'.

Jesúsen' golle' be'nn fariseo ka', na' be'nn ka' llsedre ke leyen' de do'l ke ake'

(Mt. 23:1-36; Mr. 12:38-40; Lc. 20:45-47)

³⁷Ka bayoll be'e Jesúsen' di'll ki, to be'nn fariseon' bene' Le'e yexh rille' lljatawe'. Ka byo' Jesúsen' rill be'nnen', na' bllie' gan' gao ake'n. ³⁸Be'nn fariseon' llabanre' ka bre're' kere bna'a ta'k Jesúsen' zan ras, kan' llon leake'n ka nak gawe'n. ³⁹Na'll goll Xanllon' le'e:

—Re' be'nn fariseo ake, ka be'nn llayib to ko'llze tas ye'nnen' llonre. Yichjraozren' nak yall, zan lo yichjra'llda'oren' lla'n da ke nxhia, llzera'llre bi da de ke be'nne. ⁴⁰ iBe'nn ke llejnie'n nakre! ¿Kere Diosen' be'nnen' ben yichjraoren', lekze Le'en bene' yichjra'llda'oren'? ⁴¹Lewe'e lmoxh, legakrén be'nne, na'llen' gakre yall doxhenre.

⁴²'iNya'chraz ke re' be'nn fariseo! Lloe're Diosen' to ra't wej rao chi kwen ke yeolol da da'o bixhj, ke nak no yixh kwan da llazi're lo re'j keré, da ka' nzi'i menta na' rud, na' llbej yichjren' gonre da nak lliarao, ka nak dan' llie'llo Diosen', na' gonllo da wen. Da li da llaya'l we're da ki, na' bi wsanre yel nllie' ke Diosen'.

43'iNya'chraz ke re', be'nn fariseo! Re' ll-lanre siy nell ka' ni't lo yoda'on, na' do lao ya'a, llawere we'rao be'nn re'.

44'iNya'chraz naken keré llsedre ke ley dan' bzoj da Moisésen', na' re' be'nn fariseo! iNakre be'nn chop rao! Re' nakre ka ba ke be'nn wat, da bi nla'; be'nn dá rawen', ni ke llakbe'e akzre! akre nak loe.

⁴⁵Na'll to be'nn ka' llsedre ke leyen' golle' Jesúsen':

—Maestro, rente neto' lla'dyi'o ne'o ka'.

⁴⁶Na'll lle Jesúsen' le'e:

—Leska' re' llsedre ke leyen', nya'chraz ke re', ka nak llroe're leyen' be'nn yobre, llonren' ka to yoa' zi' da bi llzoe akre', na' re', ni ke llda'ba'yzre la kanzeren.

⁴⁷'iNya'chraz ke re', ka nak llayoncha'ore rao ba ke be'nn be'e xti'll Diosen' kana', le xozxta'ore ka'n bet leake'! ⁴⁸Kone ka' llroe're naksre xozxta'ore ka' txhen, le leake'n bet ake' be'nn ka', na' re' llayoncha'ore ba ke ake'n.

⁴⁹ 'Ke len na', rao yel si'n ke Diosen' bne'e ka'n batna'te: "Wse'la' be'nn chixjwe' xti'lla'n, na' be'nn nne lo raza', bal ake' got ake', na' ye bale' ko' ake' rill ya." ⁵⁰Re' llonre kan' bne'en, na' re' lla'a nna' yellayraore, ni ke xchen be'nn ka' bet ake'n, kan' bxhe yellrio llinte nna' lla. ⁵¹Da bzoraozen kan' bet be'nnen' re Caín bi'che'n re Abel, bllinte kan' gok ke Zacarías, be'nnen' bet ake' radj yoda'o za llinl-llo gan' zo bkoyen', re' lla'a nna' yellayraore ke yeolol be'nn ki goten'.

52'iNya'chraz ke re' llsed llroe' leyen'! Re' ll-lanre nnézere yel si'n ke Diosen', ni re' bi nnézeren kwasro, na' be'nn llazra'lle' nnezre'n, bi lloe're latj nnezre'n.

⁵³Ka bayoll be'e Jesúsen' di'll ki, be'nn fariseo ka', na' be'nn ka' llsedre ke ley dan' bzoj da Moisésen', bzorao zi'chi'll ake' Le'e, na' llbej ake' Le'e di'll. ⁵⁴Na' ka' lli'nao ake' bi di'llen' lloj lloe', nench sa'ke gao ake' xhia ke'e.

Da Ilzejnie' be'nn fariseo ka' naken ka kwa binn

Na' gok, be'nn zan kwis badop, na' ka nak badop be'nn zan na', to llrejchekw nia' lwellj ake', na'll Jesúsen' golle' zga'tek be'nn ka' non Le'e txhen na':

—Lewiaya'nn kan' llon be'nn fariseo ka', llon ake' ka kwa binn dan' llchixe' yezj yet xtiren', nench llonen yet xtiren' nbaraz. To ko'llzen nla' ake' be'nn wen, na' lla'a da xhinnj lo ra'llda'o ake'.

²Le bibi de da nga'che da nello bi wroe'rawe, na' bi de da nello nono yenneze len. ³Na'llen' biteze da nnere ga nga'che, be'nn zan yene len, na' di'll da we're lo yo' keré, leska' be'nn yell nneze len.

Non' llaya'l llebllo (Mt. 10:28-31)

4'Ni llnia' re' be'nn nllie'ra', bi llebre cha' be'nn got ake' re', kwerp na'zen' got ake' chet ka', te na' billbi gak gon ake'. ⁵Ni llnia' re', non' llaya'l llebre, lelleb Dios, Le'en kate ba bake'e yel nban kerén', ye to chi'i wase'le' re' lo yi' gabil, Le'en llaya'l llebre.

⁶'Lewiake byinn da'o ka', chop chonnze mell lla'ollo tap ga'yba', le bi za'kba' da xhen. Na' Diosen' ni toba' bi nsanra'lle'. ⁷Rente yich yichjre ka' nrab Diosen'. Na'llen' nia' bi llebre, za'kll re' kerke txhonnj byinn da'o ka'.

Be'nn wchebe' nawe' Jesúsen'

 $(Mt.\ 10{:}32{-}33\ ;\ 12{:}32;\ 10{:}19{-}20\)$

⁸'Ni llnia' re', noteze be'nn cha' wchebe' nnawe' nada', leska' nada', Be'nnen' Gorj Radj Be'nnach, wacheba' nake' nada' txhen rao angl ke Dios lla'a yebá. ⁹Na' be'nnen' bi wchebe' nnawe' nada', leska' nada' bi wacheba' nake' nada' txhen rao angl ke Dios.

10'Noteze be'nne cha' bi nne bi zille kia' nada', Be'nnen' Gorj Radj Be'nnach, de yel llazi'xhen ke'e; zan cha' to be'nn nne ke Spíritu ke Diosen', kbat yezi'xhen Diosen' ke'e.

¹¹'Kate wche'e akze' re' rao be'nn ka' llnebia' yoda'on, na' rao koxchis, San Lucas 12 132

bi we'la'llre akre ka gonre, na' akre ka nnere, ¹²wzerenkze Spíritu ke Diosen' re', na' wroe'ren re' kan' gonre, na' akre nnere.

To be'nn wnia' ke llejnie'raz

¹³Radj be'nn zan ka' lla'a rao Jesúsen', blloj to be'nn golle' Le'e:

—Maestro, goll bi bi'cha'n wla'to' bien dan' bkwa'nn xaxhna'to'n.

¹⁴Na' Jesúsen' lle'e le'e:

—¿No goll re', nada' llona' yel koxchis, na' ll-la' bi da de ke be'nne?

15 Na'll lle'e leake':

—Lewiá bi sera'llre bi ga't keré, le kere kon ka da dérellon', ka' ga'tte vel nban kellon'.

¹⁶Na' be'rene' leake' to di'll, bne'e:

—Bzo to be'nn wnia', de yellrion' ga goze', na' barape' da xhen. ¹⁷Na' bene' xhbab bne'e: "¿Akxha gona'? Billbi latj de ga wlla'cha'wa' dan' barapa'n." 18 Na'll bne'e da yobre: "To da gona', yechinnja' yo' gan' nlla'cha'wa' kia'n, na' gona'n da xhenll, na' wlla'cha'wa' dan' barapa'n, na' ren yeolol da de kia'. ¹⁹Na'llen' yeyep kwina': Lla nna' bi'cha', bxhi'i banez, we'e bdao, bzo nbaraz, da xhen da yo'cha'o ko' rwe' de da gao' zan iz." ²⁰Na' Diosen' golle' le'e: "Be'nn ke llejnie', nna' lle' gato', ¿no gao dan' nlla'cha'on?" ²¹Na' kan' naken ke be'nnen' zera'lle' chraoze bi ga't ke'e yellrio ni, na' bibi yel wnia' ke'e de rao Dios.

Diosen' llap llwie' xhi'nne' ka' (Mt. 6:25-34)

²²Na'll goll Jesúsen' be'nn ka' non Le'e txhen:

—Llnia' re', bi kwek yichjre chraoze da ye'j gaore chak nbanren', leska' bi kwek yichjre chraoze xhara'nre. 23 Za'kll yel nban kellon' kerke dan' ye'j gaollon', na' za'kll kwerp kellon' kerke ra'll dan' llakllo na'. ²⁴Lewiake bechi ka', ni ke llaz llarap akzba', ni ke zoze da' xhoa' keba', na' Diosen' llwaokzeba'. Za'kll re' kerke bechj ka'. ²⁵Ni to re' bi gak yesdón kwinre ye tchit, cha' kon kwek yichjzre gakre be'nn tonne. ²⁶Na' cha' da da'o na', nakten da ke nxhia bi llak gonre, ¿bixchen cho'zre billre da zed yobre?

²⁷'Lewiake yej ti'l ka', bibi llin llon aken, ni ke llabzen yere, na' ni llnia' re', ni gaz be'nnen' golle Salomón, ren yel wnia' xhen ke'en, bi gok xhara'ne' nbaraz kan' nak yej da'o ka'. ²⁸Cha' ka' llone Diosen' yej da'o ka', nench llzon nbaraz, la'kze nna'zen' zon, wxe ba byechen, na' cheyen, gontell Diosen' ke re' nench zore nbaraz chenak wxenra'llre. 29 Re', bi cho're da zed, ni ke dan' ye'j gaore na'ze, leska' bi gakllejla'llre. ³⁰Le be'nn ki lla'a yellrion', lezen na' yo' yichj ake', zan re', Xare be'nn zo yebá, ba nnézkzere' kan' yálljere da ki. 31 Llaya'l kwe' yichjre na' wzenayre ke Diosen', nench nnebie' yichjra'llda'oren', na' yeolol da ka' yálljeren', Dios na'kze gonne'n.

Yel wnia' da de yebá

(Mt. 6:19-21)

³²'Bi llebre la'kze nak to chopzre, Xallo Diosen' ba breje' re', nench nnebia' renre Le'e. ³³Lewayo'te bi da de kere, lewe'e be'nn cha' bi

yalljre', cha' gonre ka', na'llen' ga't yel wnia' xhen keré yebá da bi te ke, na' da bi kwiayi'. Ganna' nono be'nn wan llra', nono bada'o lla'a wteba'n. ³⁴Le gan' ngo'cha'ore dan' llazra'llre na'n, ganna'n zokze yichjra'llda'oren'.

To be'nn wen llin llaya'l soe' xhnid ka yellín xane'n

35'Lesoteze xhnid ka be'nn llbexh sorao gon llin, ba nka'choch le'e, na' dan' llseni' ke'en lla'ltezen. ³⁶Llaya'l gonre ka be'nn wen llin, lla'a ake' llbexh ake' xan ake'n, zeje' ga llak to wchayna'a. Kate yelline'n, na' nne'e, le ze akte' xhnid wsarj ake'. 37 Nbaraz ke be'nn wen llin ka', katen' yellin xan ake'n, lljadi're' leake' llnna' ake' yere; da li llnia' re', kana'll gonchie' leake', kwine' wsinie' da gao ake'. 38 Nbaraz ke be'nn ka' katen', la'kze llinte llere, na' llinte bale, cha'a ake' xhnid, llnna' ake' yere. 39 Leska', lewayón ke xhbab, chenak to xan yo', nnezre' batkren' chej be'nn wan ka' rille'n, da li, ni ke tasze' do yere, le kere we'e latj cho' be'nn wan ka' rille'n. 40 Leska' re', lesó xhnid, le katen' llonren' xhbab bi yeda', kana'n yeda' da yobre, nada' Be'nnen' Gori Radi Belnnach.

Be'nn wen llin bi llon wen

(Mt. 24:45-51)

⁴¹Na' Pedron' lle'e Le'e:

—Xanto', ¿dan' llsa'krebro' da ki naken ke neto'n o cha' ke yeolol be'nnen'?

42 Na'll bne Jesúsen':

—Naksen ke noteze be'nne, cha' gone' ka to be'nn wen llin be'nn llejnie'; xane'n, bene' rallne'e yo' ke'en, na' bene' rallne'e be'nn wen llin ka' yela', na' kwe'e xhnneze bi llin da llak, na' kate llin hor gao ake' na', wawe' leake'. 43 Nbaraz ke be'nnen', cha' kate yellín xane'n, lljadi're' le'e llone' ka dan' bkwa'nne' rallne'e gone'. 44Da li llnia', kana' gone' rallne'e yeolol da de ke'e. 45 Zan cha' be'nn wen llin na', nne'e lo yichjra'llda'we': "Cheke wlleje xana'n", na' sorao chine' be'nn ka' yela', na' ye'j gaoxene', na' sollre'. 46 Bixha yellinkze xane' kat lla ke llwie' yelline', kana' wzap xane'n le'e, chintate' le'e, na' wse'le' le'e ga yellayrawe' ga lla'a be'nn ka' bi llzenav ke Dios.

47'Na' be'nn wen llin na', cha' nnezre' kwasro bi dan' llaya'l gone', na' bi llone'n, bi soe' xhnid kate yellín xane'n, na' chintate' le'e.

48 Na' be'nnen' bi nnezre' bin' nllia xane'n bia'a gone', na' gonkze' ke da llaya'l chine' le'e, ra'tze chine' le'e, le bi nnezre'n. Le be'nnen' be'e Diosen' le'e da xhen, leska' da xhen wannabre' le'e, na' be'nnen' bxenra'll Diosen' le'e, bene' rallne'e da xhen, leze da xhenll wannabre' le'e.

Gak ake' chopre ni ke Jesúsen' (Mt. 10:34-36)

⁴⁹ 'Ka be'nn badxhen to yi' da wzey da de rao yellrio nin' badyena', le lle'nkazra' sorao ga'lnninnen. ⁵⁰De to da war da gak kia', na' llakra' kwis, llbexha' kate llin lla gak kia' ka'. ⁵¹ ¿Llákere cha' beda' nench be'nn ka' lla'a yellrion' gak ake' toze'n? Ka'a, chopren' gak ake'. ⁵² Soraozen nna', cha' to lo yo'

San Lucas 12, 13 134

nak ga'y ake', gak ake' chopre, na' chonne' gakyollrene chope', chope' gakyollrene chonne'. ⁵³ Be'nn byion' tilrene' xhi'nne' byion', na' xhi'nne' byion' tilrene' xe'en; no'ren' tilrene' xhi'nne' no'ren', na' xhi'nne' no'ren' tilrene' xhne'en; no'ren' tilrene' xhorille', na' xhorille'n tilrene' tawxhi'nne'n.

Bi gokbe'e be'nn ka' bin' ba llak gan' zo ake'n

(Mt. 16:1-4; Mr. 8:11-13)

⁵⁴Na'll goll Jesúsen' be'nn zan ka' lla'n:

—Kate llre're ba ze bej gan' llen willen', na' nere: "Wak yejw." Na' llakte yej. ⁵⁵Na' kate llénere dá be' da za'a lle'le, na' nere: "Wak ze'ye nna'." Na' llakte ze'ye. ⁵⁶iBe'nn chop rao ak! Llwiare yebán', na' yellrion', na' llakbe're cha' gak zay o cha' gak ze'ye, na' bi llakbe're bin' ba llak gan' ba zore nna'.

Llaya'l ko'llo xhnneze cha' bi de ke lwelljllo

(Mt. 5:25-26)

57 ¿Bixchen ke llayonre xhbab, akre ka gonre da wen? 58 Kate be'nn lljatawe' xhia rao koxchis, llxoa ake' do'l ko'llre, leko' xhnneze ka za llinre rao koxchisen', la'kze ba yo'tere nez, lewe'la'll leko' xhnneze, le cha' llinre rao koxchisen', na' koxchisen' gone' re' rao na' xa'y ka', na' ko' ake' re' lo rill ya. 59 Ni llnia' re', kere wabeje' re' cha' bi chixhjre doxhen dan' llba'yre.

Lewayate ke da xhinnjen' nench ke kwiayi're

Rao lla na', bal be'nn ka' lla'a gan' llroe' Jesúsen',

be'rén ake' Le'e di'lle kan' ben Pilaton', bse'le' be'nn bet ake' txhonnj be'nn Galilea ka', kan' lla'a ake' lo yoda'o llot ake' bayi'x lloe'rao ake' Dios, na' bchixe' xchen ake'n ren ke bayi'x ka'.

²Na'll balli'i Jesúsen' xti'll ake'n, lle'e leake':

—Llákere cha' dan' gok ke be'nn ka' ka'n, nak aklle' be'nn wen da xhinnjll, kerke be'nn Galilea ka' yela'.

³Kere ka'n; ni llepa' re', cha' re' bi wayátere ke da xhinnj kerén', wllin lla kwiayi're kan' gok ke be'nn ka'.

⁴Be'nn ka' chi'n chonne (18), got ake' bdekw ake' to ze'e sibe gan' nzi'i Siloé, ¿leska' llákere nak aklle' be'nn wen da xhinnjll, kerke be'nn ka' yela' lla'a Jerusalén na', na'llen' gok ke ake' ka'?

⁵Kere ka'n; ni llnia' re', cha' re' bi wayátere ke da xhinnj kerén', wllin lla leska' kwiayi're kan' gok ke be'nn ka'.

Jesúsen' bsa'krebre' ka llon to yay da bi llbia

⁶Na'll Jesúsen' bsa'krebre' bne'e:
—Bzo to be'nne, na' lo re'j ke'e ga
naze' uvas, zo to yay higo; na' jawie'
cha' llian daxhix, na' bibi llian. ⁷Na'
golle' be'nnen' llap re'jen': "Ba gok
chonn iz lladwia' yayen' cha' llian
daxhix, na' bikzbi llbian; wenkre
bchoyen, ke da zozen nlanen yellrion!."
⁸Na' goll be'nnen' le'e: "Xana'
kwexhkello ye choll, la ye twiz rize;
wche'nnkera' xhane, na' wlla'n be'n.
⁹Cha' kwian daxhix, na' wkwa'nnllon,
na' cha' bi kwiakzen, na'll wchoyllon."

Jesúsen' bayone' to no're lla nba'nne ke be'nn Israel ka'

¹⁰Gok to lla, lla llap be'nn Israel ka' bara'nne, byej Jesúsen' lo

yoda'on, na' jazejnie're' leake'. ¹¹Na' lli' to no're lo yo'n; ba gok chi'n chonn (18) iz nleo ko'lle', le byo' to daxi'o kwerp ke'en, na' kere gokll waze'e lilla. ¹²Ka bre'e Jesúsen' no'ren', goxhe' le'e, na' lle'e le'e:

—No're, nna' wayako' ke villwe'

—No're, nna' wayako' ke yillwe' ko'on.

¹³Na'll bxoa ta'k Jesúsen' ko'll no'ren', na' le bazete no'ren' lilla barí ko'lle'n. Na' bzorao lloe'rawe' Dios. ¹⁴Na' be'nnen' llnebia' yo'n, goklle'e kwis dan' bayón Jesúsen' no'ren' to rao lla llap ake' bara'nne. Na'll be'nnen' golle' be'nn ka' ni't lo yo'n:

—Xop lla llaya'l gonllo llin; rao xop lla ka' yedre, cha' lle'nere wayakre, zan bi yedre lla llapllo bara'nne.

¹⁵Na'll Xanllon' golle' be'nnen':

—iBe'nn chop rao ake! La'kze nak lla llapre bara'nne, dekz de llsellre bell keré, burr keré, lljawe'jreba' nis. ¹⁶Na' no'ren' nakteke' xhi'nn dialla ke xozxta'ollo, Abraham, ¿kere leska' llaya'l wayelle ke dan' nchej daxi'on le'e ba gok chi'n chonn iz?

¹⁷Ka bayoll bne Jesúsen' ka', le llakzbane be'nn ka' llwie Le'en. Na' be'nn ka' yela' llayo'ra'll ake' kwis kan' llone'n, le naken da wen.

Yel llnebia' ke Diosen' naken ka nbaz ke mostaz

(Mt. 13:31-32; Mr. 4:30-32)

¹⁸Na' bne Jesúsen':

—¿Akre ka wsa'kreba' kan' llnebia' Diosen'? ¹⁹Wsa'kreba'n ka nbaz ke mostaz da goz be'nn lo re'j ke'en, na' ke bra'n na', blli'on gokten to yay xhen, na' byinn da'o ka' jachia akba' rawen, ben xo'nn akba'.

Jesúsen' bsa'krebre' ka nak kwa binn

(Mt. 13:33)

²⁰Na'll bne Jesúsen' da yobre:
—¿Akre ka wsa'kreba' kan' llnebia'
Diosen'? ²¹Wsa'kreba'n ka kwa binn
da bxhi'i to no're, na' bchixe'n trob
yezj, na' baslli'on kwa ke yet xtir
na'.

Llaya'l cho'llo lloa' reyj yo' dan' ncho'pen

(Mt. 7:13-14, 21-23)

²² Jesúsen' bzejnie're' be'nne toto yell gan' bdie'n, ka nak zeje' Jerusalén na'. ²³To be'nn golle' Le'e:

—Xanto', ¿to chopze be'nn ka' yerán'?

Na'll golle' be'nnen':

²⁴—Lewe'la'll, lecho'o gan zo reyj yo' dan' ncho'pen, le llnia' re', be'nn zan ye'n akre' cho' ake', na' bi sa'k akre'. ²⁵Na' gonen kate te na', xan yo'n wseje' reyj yo'n, na' sorao gosia're le' reyj yo'n, nnere: "Xanto', bsarj cho'to'." Na'll ye'e re': "Bi nombia' re', bi nnezra' ga beinne rei." ²⁶Naill sorao nnere: "We'e bdaorenteto' rwe', na' bdate'o broe'ro' xti'llo'n do lao ya'a rallto'n." ²⁷Na' da yobre ye'e re': "¿Kere ba bnetia', bi nnezra' ga za're? Lewayej ka'le, re' be'nn wen da xhinnj." ²⁸Kana' kwellya'chre, gaoxoxi layre kate re're Abraham na', na' Isaac, na' Jacob, na' yeolol be'nn ka' be'e xti'll Diosen' kana', lla'a ake' gan' llnebia' Diosen' yebán'; na' re' bi renre. ²⁹Be'nn zan be'nn za'k doxhen yellrio, yellín ake' yebá gan' llnebia' Diosen', na' kwe'rén ake' Le'e lloa' mes ke'en. 30 Na' ganni

nia' re', be'nn zan nak ake' ka be'nn lliarao nna', wllin lla kat yeyak ake' ka be'nn za'a xhante, na' be'nn ka' nak ake' ka be'nn za'a xhante nna', leake'n yeyak ake' ka be'nn lliarao.

Jesúsen' gokre' kwis ni ke be'nn Jerusalén ka'

(Mt. 23:37-39)

³¹Na' llak rao lla na', bllin bal be'nn fariseo ka' rawe'n, lle ake' Le'e:

—Baxhonnj, bayej do ga yobre, le Herodes na', lle'nre' gote' rwe'.

32 Na' lle'e leake':

—Lelljayell be'zen': "Ye chop chonn llazen' nna dakza' llabeja' daxi'o yo' yichjra'llda'o be'nne, na' llayona' be'nn llak yillwe', na'tell wayoll xchina'n." ³³Dekz de wasyollkza' gona' dan' llona'n nna', wxe, willj la llintekza' Jerusalén na', le cha' to be'nn lloe' xti'll Diosen' gate', Jerusalén na'kze llaya'l gate'.

34'Re' be'nn Jerusalén, llotre be'nn ka' ba bse'l Diosen' lladzejnie're re' xti'lle'n, na' ba bchekwre leake' yej. Da zan ras gokra'lla' yetopa' re', ka llon to bellj ba nche'e xhi'nne, llatobba' leakba' lo xirba'n, na' bi gokra'llre. 35 Na' nna' tach rillren', ga'nnen ka ga nono llra'kze. Ni llnia' re', bill re'kzere nada' llinte lla nnere: "Nbaraz ba za'a be'nnen' nse'l Xanllo Diosen' ganni nnebie'."

Jesúsen' bayone' to be'nn yo' yi

Gok to lla llap be'nn Israel ka' bara'nne, Jesúsen' byeje' rill to be'nn fariseo be'nn llnebia', na' jatawe', na' bal be'nn fariseo ka' bdop rill be'nnen', lli'nao ake' Le'e.

²Na' rawe na', lli' to be'nn yoe' yi. ³Na' goll Jesúsen' be'nn ka' llsedre ke ley dan' bzoj da Moisésen', na' be'nn fariseo ka':

—¿Bi ne leyen!? ¿De latj wayonllo be'nn lla nba'nne o cha' bi de latj?

⁴Na' ni to ake' bi balli'i xti'lle'n. Na'll Jesúsen' be'xe' ta'k be'nnen', na' bayone' le'e, na'll lle'e le'e:

—Bayej nna', ba bayako'.

⁵Na'll lle Jesúsen' be'nn ka' lla'a rill be'nn fariseon':

—Nekxha re', cha' to burr keré o cha' bell keré lljabixba' to lo yelle, ¿kere sete lljarejreba', la'kze nak lla nba'nne?

⁶Na' billkze bi llallel akre' ka ye ake' Le'e.

Be'nn ka' llak yexh ga llak yel wachayna'a

⁷Chak lli' Jesúsen' rill be'nn fariseon', llwie' kan' llon bal be'nn ka', ll-lan ake' lljache' ake' raote ga ba nak kwe' be'nn brao, na'll be'rene' leake' to di'll, bne'e:

8—Kate gon ake' re' yexh chejre ga llak yel wchayna'a, bi lljache're raote ga lljache' be'nn brao, ke gonzen llin be'nnen' nak be'nn braoll. ⁹Na'll xan lnni ye'e re': "Leyezolla'a, lewe'e latj kwe' be'nn ni." Na' yesolle'e re', lljalekwte' re' xhante, na' si're zdo'. 10 Zan kate gon ake' re' yexh, wenre lelljache' xhante, na' kate re'e xan lnnin' re', na'llen' cha' ye'e re': "Da nile blle'." Na' lljalekwe' re' raote, na'llen' si're yel bara'nne. 11 Le be'nnen' cha' lle'nre' gake' be'nn brao, yezikre wayexje' yega'nnte' xhane, na' be'nnen' llakre' bi za'ke, le'en gak be'nn brao.

¹²Na' golle' be'nnen' ben Le'e yexhen':

—Kate gono' wao, bi gono' yexh toze be'nn nllie'ro', no bi'ch lwelljo', no be'nn wrill ko'o be'nn nak be'nn wnia', le leska' wayón ake' rwe' yexhe, na' ka' wayo'te' wzon ko'o.

13 Zan kate gono' wao, goxh be'nn ya'che, be'nn nxhinnj nia'na'a, na' be'nn lchole.

14 Na' ka' so'o nbaraz, le leake'n bi gak wayón ake' rwe' yexhe. Na' kate llin lla wasbán Diosen' be'nn wat, kana' gon Diosen' wen ko'o.

Jesúsen' bsa'krebre' ka ben to be'nn ben wao

¹⁵To be'nn lli'rén Jesúsen' txhen gan' llao ake'n, ka benre' xti'lle'n, bne'e:

—Nbaraz ke be'nnen' kwie' gaorene' Diosen' txhen, katen' ba llnebie'n.

¹⁶Na' goll Jesúsen' le'e:

—Bzo to be'nne, bene' to wao xhen, na' be'nn zan bene' yexhe. ¹⁷Ka bllin lla gao ake'n, bse'l xan waon' to be'nn wen llin ke'en, lljatixjwe're' be'nn ka' bene' yexhen', na' lle'e leake': "Ledá nna', ba bsinia'te dan' gaollon'." ¹⁸Na' be'nn ka', dete da llde' akre' nechkze bi lljake' waon'. Toe' bne'e: "Za bxhia' to yellrio, na' len cha'a lljawia'. Ye'o xano'n bi gak yeda'." ¹⁹Na' ye toe' bne'e: "Bxhi'za' ga'y kwe' belle, na' za lljawiachka' akre llon akba'. Yechgo' xano'n, si'xhene' bi gak yeda'." 20 Na' ye toe' bne'e: "Za bchayna', na' bi gak yeda'." ²¹Be'nn wen llin na', zayeje' jayelle' xane'n kan' bne be'nn ka', na' goklla'a xan yo'n kwis, na'll

golle' be'nn wen llin ke'en: "Byej do lao ya'a, jatateze do lyell, jaxi'i be'nn ya'ch, be'nn xhinnj, be'nn lchole." ²²Bayoll bene' ka', na'll golle' xane'n: "Xana', ba bena' kan' bne'on, na' nna dellkze latj." ²³Na'll be'nnen' golle' le'e: "Byejkze da yobre kon ga xhoa nez, na' jaxi'i yezikre be'nne, ben bien cho' ake', le lle'nra' yella'te yo' kia'n. ²⁴Le ni to be'nn ka' bena' yexh da nellen', bill gak gao ake' dan' bsinia'n."

Akre llaya'l gonllo cha' lle'nello nnaollo Criston'

²⁵Be'nn zan kwis nao Jesúsen', na'll bayechje' lle'e leake':

²⁶—Cha' re' nllie'llre xare, xhna're, no'r keré, xhi'nnre, bi'chre, zanre, na' nllie'llre kwinre kerke nada', bi gak gonre nada' txhen. ²⁷Na' be'nnen' bi llone' ka to be'nn noa' cruz ke'e, na' nnawe' nada', bi gak gone' nada' txhen. ²⁸Cha' notezre lle'nere gonre to yo', ¿kere zga'tek kwejbia're ka to gaxt gonen, na'llen' gonren? ²⁹Ke gonrizen kon wxere rane na'ze, na' bi soere yesyollren; na' re'e be'nne, na' wtitj akre' re', 30 ne ake': "Kon bxe be'nnen' yo' ke'en; kere bzoere' yesyolle'n." 31 Cha' to rey llwie' cheje' rao wdil, zga'tek wyi wsa'ke' cha' gak soyibe'; le'en nape' chi mir waka'a ya, na' be'nnen' tilrene'n nape' galj mire'. 32 Na' cha' llwie' bi soere', ka nna za'te be'nnen' tilrene'n zi'te, wse'le' to be'nn lljadie' xti'lle'n, na' wnnabe' yeni't ake' wen. 33 Ka'n naken, cha' re' bi kwej yichjre yeolol da de keré, bi gak gonre nada' txhen.

Jesúsen' bsa'krebre' ka llon ze'de (Mt. 5:13; Mr. 9:50)

³⁴Na'll bne Jesúsen' da yobre:

—Da wen kwis ze'den', zan cha' wnit yel zich ke'en, bikzbi de gónellon nench yeyaken zich da yobre. ³⁵Kate bill naken zichen', bill gak gonen llin, ni ke gakze gakrenen yellrion' gaken be'n, na'll lljacho'nnllon yeo. Re' zo nayre yénere lewzenay.

Jesúsen' bsa'krebre' ka gok ke xhi'r da'o ba gokllejla'lle

(Mt. 18:10-14)

Na' bdop no be'nn wachixhj, na' yezikre no be'nn wen da xhinnj rao Jesúsen', na' llzenay ake' xti'lle'n. ²Na' be'nn fariseo ka', na' be'nn ka' llsedre ke ley dan' bzoj da Moisésen', ka bre'e akre' ka', na'll bne ake':

—Be'nnen' llonteze' be'nn wen da xhinnj ka' txhen, na' llaorente' leake'.

³Na'll Jesúsen' be'e to di'll, bne'e: ⁴—Cha' re' ni't to gayoa (100) xhi'r keré, na' nnit toba', ¿kere kwa'nnre ba tapralj twalj ka' (99) lo re'j ke akba'n, na' chejre lljadirjre ba ti'chen' kon ka wallélereba'? ⁵Kate yellélereba'n, yewere kwis waxoadoreba' xhichire. 6Ka yellinre rillren', yetopre be'nn wrill keré, ye akre': "Leyewé ren nada', le ba balléltera! xhi!r kia!n bniten!." ⁷Ni nia' re', leska' llawelle Diosen', na' angl ka' lla'a yebán', kate to be'nn wen da xhinni llayatre' ke da xhinni ba bene', na' llanawe' Diosen', kerke tapralj twalj be'nn wen, be'nn bibi do'l ke ake' de da wayat akre'.

Jesúsen' bsa'krebre' ka mell da bnite

8'Na' cha' to no'r de chi mell plat ke'e, na' nnit ton, ¿kere na' wa'le' to yi', na' wloe' kwasro lo yo' ke'en to walléltere'n? ⁹Kate yellelen na', yetope' no're nake' txhen, na' no be'nn wrill ke'e, na' ye'e leake': "Leyewé ren nada', ba balléltera' mell kia'n bniten'." ¹⁰Ni nia' re', leska' llawé angl ke Diosen' kate to be'nn wen da xhinnj, llayatre' bi da xhinnj bene'.

Be'e di'll ke be'nnen' benditjere' bi da go't ke'e

¹¹Leska' bne Jesúsen':

—Bzo to be'nn, na' bzo chop xhi'nne' byio. 12 Na' bin' na'chen' gollbe' xabe'n: "Xa, benntega nada' dan' llaya'la' sia'n." Na'll xa akbe'n ble'e da de ke'e be'en leakbe'. ¹³Ker gok scha kate bin' na'chen'. batopbe' yeolol da nake kebe', na'll bro'be' nez byejbe' to yell zi'te. Na' benditjebe' xhmellbe'n, benbe' da ke nxhia. 14 Bixha kate bllin lla bayá xhmellbe'n, na' le gokte to win xhen doxhen do gan' zobe'n. Na' billbi mell kebe' de, si'be' da gaobe'. 15 Na' bdirjbe' llin gonbe', na' bllinbe' ga zo to be'nn be'e xchinbe', na' bse'lebe' lyi'xe ga lla'a kuch zan ke'e, na' benbe' gop kuch. ¹⁶Na' llebraz donbe', to lle'nebe' gaobe' dan' llao kuch ka', ni len nono lloe' lebe'. ¹⁷Kate jadinra'llbe' na' bnebe': "Be'nn zan be'nn wen llin ke xa' zialla'a, deteze de da llao ake', na' nada' lli'chka' ganni dona' kwis. ¹⁸To da gona' nna', waya'lla' gan' zo xa'n, na' yepe': Xa, ba bena' da xhinni rao Dios, na' rao rwe'. 19 Bill za'ka' nench na' nne'o naka' ka xhi'nno', ben nada' ka to be'nn wen llin ko'o." ²⁰Na' netebe' ka'n, bazolla'be' bago'be' nez, zayejbe' gan' zo xabe'n.

'Ka za yellinterbe', bre'e xabe'n lebe', na' baya'chra'llebe', na' bzolla'doe' jatile' xhi'nne'n bde'lchochjebe', na' bno'pebe'. ²¹Na'll gollbe' xabe'n: "Xa, ba bena' da xhinnj rao Dios, na' rao rwe', bill za'ka' gonllo' nada' ka xhi'nno'." ²²Na' xabe'n le gollte' be'nn wen llin ke'e ka': "Lekwej chkwe' ra'll cha'o lewakbe', leko' to da cha'o xhbenbe', na' lewdé chkwe' xherbe'. ²³Na' lelljaxhi'i to bell ban' zerao lla'ra'll, na' legotba' gaolloba', gonllo lnni. ²⁴Le xhi'nna'n llakra' cha' ba gotbe'n, zan nbanbe'; llakra' cha' ba bnitbe'n, na' ba ballerbe'." Na' bzorao llon ake' lnni.

²⁵'Xhi'nne' bi waken', datebe' lyi'xe ke naken llak ka', na' ka zaza'be' lyi'xen', ka le yellintebe' yo' na'n, bénebe' llak llakia, llak wakwell, na' llak waya'a. 26 Na' goxhbe' to be'nn wen llin ka', na' bnnabbe' bixchen llak lnni. ²⁷Na' be'nnen' lle'ebe': "Bi bi'cho'n bara', na' xa'on ba bete' to bell ba zerao lla'ra'll, dan' bara'be' wen na'." 28 Na' goklla'be' kwis, na' bi gokra'llbe' wayo'be' yo', na' blloj xabe'n, go'tyoerebe' wayo'be'. ²⁹Na' bi ni gollbe' xabe'n: "Ba gok scha zorena' rwe', llona' xchino'n, na' llzenaya' ko'o, na' ni to gaz to chiv da'o bi nna gonno' nada', nench gona' lnni gaorena' be'nn ka' naka' txhen. 30 Na' kate bara' xhi'nno'n bin' benditja da de ko'o, na' bdarenbe' no'r wen da xhinnj ak, bette'o to bell ba lla'ra'll kebe'." 31 Na'll lle xabe'n lebe': "Xhi'nna', zorenkzo' rwe' nada', yeolol da de kia' ko'kzo'n. ³²Zan llaya'l yewello ke bibi'cho'n, le za bara'be'n, gokra' cha' ba gotbe'n, zan nbanbe', llakra' cha' ba bnitkzbe'n, na' nna' ba ballerbe'."

Be'e di'll ke to be'nne bi bdape' da de ke xane'

Na'll leska' goll Jesúsen' be'nn ka' non Le'e txhen: -Bzo to be'nn wnia', na' bzo to be'nn wen llin ke'e, be'nn nak rallne'e yeolol da de ke'e; bllin lla kate jatao ake' xhia rao be'nn wnia'n, goll ake' le'e, be'nn wen llin ke'en le ll-llevie' da ka' nak rallne'en. ²Na' be'nn wnia'n goxhe' be'nnen', na' lle'e le'e: "Ba benra' doxhen kan' llono'n. Llaya'l wia' bixhan' llonkzo', zerao nna' gonna' xchino' chet ka'." 3Na'll be'nnen' bayone' xhbab, na' bne'e: "¿Akxha gona' nna', ba bne xana'n bill gonne' xchina'? Na' kere llak gona' llin war, na' llaye'ra' wnnaba' lmoxh. ⁴Ba nnezra' to da gona' nench kate xana'n bill gonne' xchina'n, ba zjalla'a be'nn wreb ake' nada' rill ake'n." 5Na' goxhe' toto be'nn ka' llba'y xhmell xane'n, na'll lle'e be'nn nellen' bllin na': "¿Arke llba'yo' ke xana'n?" 6Na' bne be'nnen': "To gayoa (100) ye's ceiten' llba'ya'." Na'll bne be'nn wen llin na', nak rallna'a da ka': "Blle'kero', na' de yich ko'on, bzoj da yobre ke chiyonzen na' (50), llba'yo'." ⁷Na'll lle'e be'nn wllope: "¿Bixha rwe', arken' llba'yo' ke xana'n?" Na' bne be'nnen': "To gayoa (100) rrob trigon' llba'ya'." Le bnete be'nnen' nak rallna'a da ka': "Na' de yich ko'on, bzoj ganni tapraljzen na' (80), llba'yo'." 8Na' be'nn wnia'n, ka gokbe're' kan'

San Lucas 16 140

ben be'nn wen llin ke'en, llabanre' kwis katek llejnie're', la'kze nake to be'nn wen llin ke nxhia, lle'e xhbab bene' ka'.

Na'll bne Jesúsen':

—Na' ka', be'nn ka' llo'ra'll dan' de rao yellrio nize, llayirjla'll aklle', akre ka gon ake' gan be'nne, kerke be'nn ka' ba dá rao beni' ke Dios.

9'Na' llnia' re', legonrenteze llin mell dan' de rao yellrion', nench gakrenre be'nne, na' kate llin lla bill gon mellen' llin, ba nlla're be'nn wreb ake' re' yebá ga sore ke chnare.

10'Be'nnen' llone' da lixhej kone da da'o ra't da de ke'e, na' llroe'n ka'kze gone' cha' de da xhen ke'e. Na' be'nnen' bi gone' da lixhej kon ren da da'o ra'ten, ka'kze gone' cha' ga't da xhen ke'e. 11 Na' cha' re', bi gonre da nak lixhej kon ren da de kere rao yellrion' da te chelteze, ¿akxha gon Diosen' rallna're da za'kll da bi te ke? 12 Na' cha' ke nollre be'nn yobre, bi gapren' bara'nn, ¿akxha wxenra'll no be'nne gonne' re' da nak keré?

13'Nono gak gon llin ren chopre xane' to chi'ze, le cha' ka' gone', wiere' to xan llin na', na' llie're' be'nnen' ye to; na' gone' llin ke toe' do yichj do ra'lle', na' ke be'nnen' ye to, gone'n ka'ze ra'lle'. Ka'kze ke re' bi gak gonre xchin Diosen', na' waráltere gonre llin sera'llre gakre be'nn wnia'.

¹⁴Be'nn fariseo ka', nak ake' be'nn llzera'll mell, ka ben akre' kan' bne Jesúsen', bzorao lltitj akre' Le'e.
¹⁵Na'll goll Jesúsen' leake':

—To wrazren' llonxhen kwinre, na' llonre ka be'nn wen tegar nechkze

re'e be'nne, zan Dios nnezre' kwasro ka nak yichjra'llda'oren'. Le de da llake be'nne, naken da wen, zan rao Diosen' naken da zban.

Ley dan' bzoj da Moisésen' na' yel llnebia' ke Diosen'

16'Ley dan' bzoj da Moisésen', na' dan' bzoj be'nn ka' be'e xti'll Diosen' kana', benen llin zerao ka bra' Juan be'nnen' bchoa nis. Bzoraozen kan' bra' Juan na', ba llnneze be'nne kan' nak yel llnebia' ke Diosen', na' be'nn zan llon ake'n ga zerao za'k akre', nench nnebia' Diosen' yichjra'llda'o ake'.

¹⁷'Ka nak yellrion', na' da ka' llia le' yebán', wllin lla kwiayi' aken, zan ke nak doxhen kan' ne ley ke Diosen', dekz de gak kan' nen na'.

Jesúsen' broe're' bi naken wen wsan xho'r xhyio be'nne

(Mt. 19:1-12; Mr. 10:1-12)

18'Noteze be'nn cha' wsanra'll xho're', na' sie' ye to no'r yobre, llonkze' ka be'nn zo xto. Na' noteze be'nn yechayna'rene' to no're be'nn bsan xhyiwe'n le'e, rebze llonkze' ka llon be'nnen' darén xho'r be'nne.

To be'nn wnia' na' to be'nn ya'ch re Lázaro

19'Bzo to be'nn wnia' zre ra'll cha'o llake', na' yeo lla llontekze' ka to lnnire dan' llaocha'we'. 20 Na' leska' bzo to be'nn ya'ch re Lázaro, na' blle'teze' bllie' lloa' yo' ke be'nn wnia'n, na' le llie' ye'lle. 21 To lle'ne Lázaron' lljatope' bla'a ka', llexj gan' lli' be'nn wnia'n llawe', na' be'kw ake lljale' akba' we'e ke'en. 22 Bixha kate got be'nn ya'chen', na' angl

ka' bache'e ake' le'e gan' nak to latj wen gan' zo Abraham na'. Na' leska' got be'nn wnia'n, na' bkwa'ch ake' le'e. 23 Lo gabil gan' ballín be'nn wnia'n llallayrawe', kate blis rawe'n, na' bre're' Abraham na', ren Lázaron', lla'a ake' to latj na' naken zi'te. ²⁴Na'll besia' be'nn wnia'n zillj bne'e: "Xa Abraham, baya'chra'll nada', bse'l Lázaron' wasbis xhbene'n, na' wakole' ra't rolla'n, le llallayrawa' lo yi'n." ²⁵Na'll Abraham na', golle' le'e: "Xhi'nna', jadinra'lle, bxhi'o rwe' banez bzo'o yellrion', na' Lázaron' ballayrawe' bxha'kzie', na' nna' llazie' banez, na' rwe' llallayrao'. ²⁶Na' leska' to bdinnj xhen, nla'n lli'o, na' ni ke gakze yedto' gan' lla'ren', ni re' bi gak yedre gan' lla'to' ni." ²⁷Na'll bne be'nnen': "Ben gokre cha', xa Abraham, base'le' rill xa'n, 28Le nna zo ga'y be'nn bi'cha', na' chixjwe're' leake' nench ke wayed ake' ganni yellayrao ake'." 29 Na'll lle Abraham na' le'e: "Na' dekze yich dan' bzoj da Moisésen', na' dan' bzoj be'nn ka' be'e xti'll Diosen' kana', len wzenay ake' ke chet ka'." 30 Na'll bne be'nnen': "Bi wzenay ake' ka', xa Abraham, zan cha' to be'nn yebane' radj be'nn wat ka', na' we'rene' leake' di'lle, na'll chejle' ake', na' wayechj ake'." 31 Na'll goll Abraham na' le'e: "Cha' bi chejle' ake' xti'll Dios dan' ba dekze, leska' ni ke chejle' akze', la'kze yebán to be'nn wat."

Llaya'l wiallo ke wlli'yllo be'nne gone' da xhinnj

(Mt. 18:6-7, 21-22; Mr. 9:42)

Na'll lle Jesúsen' be'nn ka' non Le'e txhen:

—Dekz de chaz da xhinnjen' radjren', zan nya'chraz ke be'nnen' wchize' da xhinnjen'. ²Nakteren wen wchej ake' yene'n to yej xhen, na' wza'l ake' le'e lo nisda'o, kerke da gone' bix to bida'o ki nxenra'll nada' gonbe' da xhinnjen'. ³Lewiá, cha' to be'nn lwelljo', bi gonzre' rwe', byej be'rene' di'll nench wayakbe're' bin' bene', na' cha' wayatre', bazi'xhen ke'e. ⁴Na' cha' gall ras gone' bi da gone' ko'o rao tlla, na' gall ras za'te' ye'e rwe': "Llayatra' kan' bena'n, bazi'xhen kia'", llaya'l yezi'xheno' ke'e.

Llnnab ake' gakrene' leake' nench wxenra'll aklle'

⁵Na'll postl ka', goll ake' Xanllon': —Gokrén neto' nench yezikre wxenra'llto'.

⁶Na' lle Xanllon' leake':

—Chenak dan' llejle're naken ka to nak nbaz ke mostaz, gakte yere yayen' zo ganni: "Bkwas ganni, na' jasó lo nisda'o na'le," wzenayten keré.

Da llaya'l gon to be'nn wen llin

⁷Leska' bne Jesúsen':

—Re' yo'raore llonre, kate be'nn wen llin keré lleje' wawa'nn belle o cha' gop belle, kate llare'e yo' kerén', kere na' llere': "Blle'do gao' xche'."

§ Yezikre llere': "Bsinia'kero' da gawa'; yedawa' na', na'll gao' rwe'."

§ Leska' kere llere': "Llioxkeno'", kate ba bayoll bsinie' dan' bdaoren'.

10 Leska' naken ke re', naore nada', kate ba benre doxhen kan' ba bnia' gonre, kana' nnere: "Be'nn wen llin ke nxhia nakto', gannen' ba bento' dan' bne'o gonto' na'ze."

San Lucas 17 142

Jesúsen' bayone' chi be'nn llak yillwe' dan' ne lepra

¹¹Bixha chak zej Jesúsen' Jerusalén na', bdie' ga zerao nbane Galilean' ren Samaria. ¹²Ka blline' to lloa' yell da'o, na' blloj chi be'nn llak yillwe' dan' ne lepra, na' jatil ake' Le'e, bze akte' zi'tre, ¹³besia' ake' lle ake' Le'e:

—iJesús, Maestro, baya'chra'll neto'!

¹⁴Ka bre'e Jesúsen' leake'n, golle' leake':

—Lechej rao bxoz ka', na' wia ake' re'.

Bixha chak zjake' na'n, bayak ake'. ¹⁵Toe', ka gokbe're' ba bayake'n, na' babie' llosie' zillj lloe'rawe' Dios. ¹⁶Ka balline' rao Jesúsen', bche'k xhibe' lloe' yel llioxken ke'e, be'nnen' ben ka' nake' be'nn Samaria. ¹⁷Ka bre'e Jesúsen' be'nn ti'chen', bne'e:

—¿Kere chi be'nn kin' bayak? ¿Gannxha be'nn ga ka' yela'? ¹8 ¿Ti'chga be'nn zi't ni, babie' lloe'rawe' Dios?

¹⁹Na' lle'e be'nnen':

—Bayas, na' bayej, dan' nxenra'llo' na'n, ba basrá rwe'.

Kate llin lla wroe' yel llnebia' ke Diosen'

(Mt. 24:23-28, 36-41)

²⁰Gok ka bnnabe be'nn fariseo ka' Jesúsen', baten' sorao nnebia' Diosen'. Na'll lle'e leake':

—Ke nake sorao nnebia' Diosen', ni ke no gakbe'ze katen' sorawen. ²¹Ni ke no nneze: "Ganni ba llnebie!", na' "Ganna' ba llnebie!". Ba llnebia'kze Diosen' do radjren' nna'. ²²Na'll lle'e be'nn ka' non Le'e txhen na':

-Wllin lla kate le ye'nere re're la tllaze kan' gon Be'nnen' Gorj Radj Be'nnachen', na' re' bi gak kan' lle'neren'. ²³La'kze ye ake' re': "Ba zote' ganni", o "Ganna' ba zoe'"; bi chejle're ke be'nn ka', na' bi nnao akre'. 24 Kan' llak kate llep yes, llo'nnte beni' ken ye chla're yellrio to sete, kan' gakse katen' yeda' nada', Be'nnen' Gorj Radj Be'nnach, katen' llin llan'. ²⁵Na' zga'tek llaya'l wallayrawa', na' be'nn ka' lla'a nna', bi chejle' ake' kia'. 26 Kan' gokse ka bzo da Noé, kan' gakse katen' llin lla yed Be'nnen' Gorj Radj Be'nnachen' da yobre. ²⁷Kan' bzo da Noén', llao ake', lle'j ake', llak wchayna'a nile na'le, bllinte lla byo' da Noén' lo barco xhen na', na'll gok yejsi'o xhen, na' blleyi' be'nn ka'. 28 Leska' gok kan' bzo be'nnen' golle Lot, llao ake', lle'j ake', llo't ake', lla'o ake', goz ake', baral akllre' bencha'o rill ake'. 29 Bixha ka balloj da Loten' yell Sodoman', na' bzorao llyinni yi' barje, bexj da nak ka yoran, na' bzeyen yeolol be'nn ka' lla'a rao yellen'. 30 Ka'kzen' gak katen' yed Be'nnen' Gorj Radj Be'nnach da yobre rao yellrion'.

31'Na' katen' llin llan', cha' to be'nn de'e yichjore, na' lla'a xchinraze lo yo'n, bi llaya'l wayetje' lljaxhi'i xchinraze' ka'. Na' cha' to be'nn zeje' lyi'xe, leska' bi llaya'l wabie' wayej rille'. 32 Lelljadinra'll kan' gok ke no'r ke da Lot. 33 Be'nnen' ye'nre' yesrá yel nban ke kwine', le'en wnite'n, na' be'nnen' wsanra'lle' yel nban ke'en ni kia' nada', le'en yerá.

³⁴'Ni llnia' re', lle' na' cha' chop be'nn de ake' txhen, toe'n yezi'i Diosen' na' ye toe' ga'nne'. ³⁵Chop no'r lli' ake' llot ake', toe'n yezi'i Diosen', na' ye toe' ga'nne. ³⁶Chop be'nn cha' da ake' txhen lyi'xe, toe'n yezi'i Diosen', na' ye toe' ga'nne'.

³⁷Na'll goll be'nn ka' non Le'e txhen na' Le'e:

—¿Gaxhan' gak ka', Xanto'? Na'll lle'e leake':

—Na' gonen ka ke be'nnen' ne'e: "Gan' de ba wat na', ganna'n wadopkze chod ka'."

Ka gok ke to no'r wazeb na' ye to be'nn bi llon yel koxchis lixheje

Na' be'rén Jesúsen' leake' di'll, bsa'krebre' ka gok ke to no'r, nench broe're' leake' da lliarao xhen na', we'rén ake' Diosen' di'll, na' bi gatra'll ake'. ²Na' bne'e:

—Rao yell na' bzo to be'nn llon yel koxchis, nono llapkze' bara'nne, ni Dios, ni lwellj be'nne. ³Na' leska' rao yell na' zo to no'r wazeb, na' weltze llej no'ren' rao be'nn wen yel koxchisen', lle'e le'e: "Ben yel koxchis kia', zo to be'nn le llsa'kzie' nada'." ⁴Na' gokte scha, bi bro'kze' xhnneze kan' llak ke no'ren'. Bixha kate bllin lla bne'e: "La'kze bi llapa' bara'nne Dios ni be'nne, ⁵gonlla' yel koxchis ke'en, nench ke yesdó no'ren' yel llxhenra'll kia'n, le zi'te zed llone'."

⁶Na'll bne Xanllon':

—Lewayón ke xhbab kan' bne be'nn wen yel koxchisen', nakte' be'nn llon da bi zej lixheje. ⁷¿Kere leska' gon Diosen' yel koxchis ke be'nn ka' ba breje' llonlira'll Le'en, cha' llalwill ake' Le'e do lla do yere? ¿O cha' wllere' bi gakrenze' leake'? ⁸Ni llnia' re', sete gone' yel koxchis ke ake'. Zan katen' llin lla yeda' nada', Be'nn Gorj Radj Be'nnach, da yobre, ¿lla'rize be'nn nna nxenra'll Dios?

Ka ben to be'nn fariseo na' to wachixhj

⁹Na' lla'a bal be'nn le nxenra'll kwin ake', na' llak akre' nak akse' be'nn wen, na' llon ake' kaze nollre be'nn yobre, na' be'e Jesúsen' di'll bsa'krebre' bne'e:

10—Chop be'nn zjake' yoda'o brao, llje'rén ake' Diosen' di'lle, toe' nake' be'nn fariseo, na' ye toe' nake' be'nn wachixhi. 11 Be'nn fariseon' zellateze' llalwille' Diosen', lloe'rao kwine' ne'e: "Dios, llioxkeno', le bi naka' be'nn wen da xhinnj, ka be'nn ka' yela', be'nn wan, be'nn la'kze zo no'r ke ake', darén ake' no'r yobre, na' ni ke nakza' kan' nak wachixhi ni. ¹²Na' chop ras rao to xhman llona' was, na' da llona' gan, llbeja' to kwenen rao chi kwen, na' lljwa'an yoda'on." 13 Na' be'nn wachixhjen' bzete' zi'tre, to ni ke llayaxhjzre' wlis rawe' yebá, na' llba'll lchoe' ne'e: "iDios baya'chra'll nada', naka' be'nn wen da xhinnj!" ¹⁴Ni llnia' re', be'nn wachixhjen', bazi'xhente Diosen' ke'e, na' zayejte' rille' nbaraz kerke be'nn fariseon'. Le be'nnen' lloe'rao kwine', Diosen' gone' ka sie' yel zdo', na' gakbe're' bi za'ke, na' be'nnen' llakre' bibi za'ke, Diosen' gone' ka sie' yel bara'nne.

Jesúsen' benla'ye' bida'o ak

(Mt. 19:13-15; Mr. 10:13-16)

¹⁵Na' jwa'a ake' bida'o rao Jesúsen' nench wxoa ta'ke'n yichj San Lucas 18 144

akbe'. Na' bre'e be'nn ka' non Le'e txhen kan' llon ake'n, na' bdil ake' be'nn ka'. ¹⁶Na' Jesúsen' goxhe' bida'o ka', na'll bne'e:

—Lewe'e latj yed bida'o ka' rawa'n, bi wllonre, le be'nn ka' nak ka bida'o ki, leake'n nak Diosen' txhen be'nn llnebia'. ¹⁷ Da li nia' re', noteze be'nne cha' bi gone' ka llon bida'o ki nxenra'll akbe' nada', ni ke gakze' gake' Diosen' txhen be'nnen' llnebia'.

Be'nn we'o nak be'nn wnia'

(Mt. 19:16-30; Mr. 10:17-31)

¹⁸To be'nn brao be'nn wnia', golle' Jesúsen':

—Maestro, rwe' nako' be'nn wen; bne nada', ¿bi llaya'l gona' nench ga't yel nban zejlikane kia'?

¹⁹Jesúsen' lle'e le'e:

—¿Bixchen llezo' nada' be'nn wen? Nono llra' be'nn nak be'nn wen, toze Dios na'n nak be'nn wen. ²⁰Rwe' nnezro' bin' ne Diosen' gonllo: "Bi tareno' no'r yobre, bi goto' be'nne, bi kwano', bi wtobro' be'nn bi da ke bene', bdap bara'nn xaxhna'o."

²¹Na'll bne be'nn we'on:

—Yeolol da ka' ba bena' ka nna naktia' xkwi'de.

²²Ka bene Jesúsen' kan' bne be'nnen', na'll lle'e le'e:

—De ye to da llaya'l gono', jaye't yeolol da de ko'o, na' mell dan' go'to'n na', be'en be'nn ya'ch, na'll ga't yel wnia' ko'o yebá, na'tell yedo' nnao' nada'.

²³Ka bene be'nnen' kan' bne Jesúsen', le gokre', bzoya'che' le nake' be'nn wnia'. ²⁴Ka bre'e Jesúsen' gokya'che be'nnen' kwis, na'll bne'e:

—iBni' kwis naken ke to be'nn wnia', we'e latj nnebia' Diosen' yichjra'llda'we'! ²⁵Sétere te to bayi'xe ban' nzi'i camello lo nay ye'chich, kerke to be'nn wnia' we'e latj nnebia' Diosen' yichjra'llda'we'n.

²⁶Be'nn ka' ka ben akre' kan' bne Jesúsen', ben ake' yel wan kwis, ne ake':

—¿Ka noxha yerakzen' cha'?

—Da li de da bi gak gon be'nnachen' to wraze', zan wak gon Diosen' len.

28 Na'll bne Pedron':

—Neto' ba bsanra'llto' yeolol da de keto', na' ba naoto' rwe'.

²⁹Na' lle'e leake':

—Da li nia' re', noteze be'nne, cha' bsanra'lle' rille', xaxhne'e, bi'che', no'r ke'e, xhi'nne', ni ke dan' ba llnebia' Diosen' yichjra'llda'we', ³⁰da za'ktell we'e Diosen' le'e nna', rao yellrion', na' kate llin lla na', we'e yel nban zejlikane ke'e.

Da yobre bdixjwe' Jesúsen' gate' (Mt. 20:17-19; Mr. 10:32-34)

³¹ Jesúsen' goxhe' be'nn chllinn ka' chla're, na' lle'e leake':

—Na' chejllo Jerusalén na', ganna' soa' di'll doxhen kan' bzoj be'nn ka' be'e xti'll Diosen' batna' kan' gak kia' nada', Be'nn Gorj Radj Be'nnach. ³²Ganna' gon ake' nada' rallna'a be'nn zi't ka', na' wtitj akre' nada', ga'dyi' ake' nada', na' wxi't ake' xhe'n rawa'. ³³Na'll chintat ake' nada', na' got ake' nada', na' wayónn lla wabana'.

³⁴Na' be'nn ka' nao Le'en, ni ke byejnie' akzre' bixchen bne'e ka', nna nchol yichjra'llda'o ake'n, na'llen' bi llejnie' akre'.

Jesúsen' bayone' to be'nn lchol (Mt. 20:29-34; Mr. 10:46-52)

³⁵Bixha gok ka le cho'te Jesúsen' yell dan' re Jericó, to be'nn lchol llie' lloa' nezen', llnnabe' lmoxh. ³⁶Ka benre' llde be'nn zan tnezen', bnnabe' bin' llak. ³⁷Na' goll ake' le'e'

—Jesús be'nn Nazareten' lldie' ganni nna'steke.

³⁸Na'll besie' zillj, bne'e:

—iJesús, Xhi'nn dia lla David, baya'chra'll nada'!

³⁹Be'nn ka' lliarao rao Jesúsen', ben akre' le'e znia nench bi gone' llakia, na' le'en yezikre besie' zillj, bne'e da yobre:

—iXhi'nn dia lla David, baya'chra'll nada'!

40 Na' Jesúsen' brexhe', na' golle' be'nn ka' lljwa'a ake' le'e rawe'n. Ka bllin be'nn lcholen' rawe'n, lle'e le'e:

⁴¹—Bnechk, ¿bixhan' lle'nro' gona'?

Na'll bne'e:

-Xana', lle'nra' yere'ra'.

⁴²Na' goll Jesúsen' le'e:

—Bare'e, dan' bxenra'llo' na'n, ba basrá rwe'.

⁴³Na' le bare'te be'nnen', na' bnawe' Jesúsen' lloe'rawe' Dios. Ka bre'e yeolol be'nn yell kan' bayake'n, na' be'rao ake' Diosen'.

Jesús na' Zaqueo

Ka byo' Jesúsen' yellen' re Jericó, na' bdie' kllol yellen'.

² Jericó, na' zo to be'nn re Zaqueo, na' nake' be'nn llnebia' wachixhj ka', na' nake' be'nn wnia'. ³Na' le lle'nre' re're' Jesúsen', na' kize llak le be'nn zan na' nao Jesúsen'; na' bi gok wie' Le'e, le Zaqueon' nake' to be'nn bcheko da'o. ⁴Na'll bza'doe' blliarawe' rao be'nn zan ka', na' byepe' to rao yay gan' le tete Jesúsen'. ⁵Ka bllin Jesúsen' xhan yayen', blis rawe'n, na' bre're' Zaqueon', na' lle'e le'e:

—Zaqueo, sete bayetj, rillo' na' tasa' nna' lle'.

⁶Na' bayetjdoe', llawere' kwis bache'e Le'e rille'. ⁷Ka bre'e be'nn ka' ka', bzorao nne ake' ke Jesúsen' dan' blline' byoe' rill to be'nn wen da xhinnj. ⁸Na' Zaqueon' bzelle'e, na' lle'e Jesúsen':

—Xana', achj da dera' wa'an be'nn ya'che, na' cha' no be'nn bxoayaya' bchixhje' da xhenll, wakse wayoa' ke'en la'kze tap rasre ke to dan' bka'an.

⁹Jesúsen' lle'e le'e:

—Na' bllin lla yerá be'nn ka', lla'a lo yo' ni, le leska' be'nn ni nake' xhi'nn Abraham. ¹⁰Le nada' Be'nnen' Gorj Radj Be'nnach zaddirja', na' yesra'a yeolol be'nn ba bnit.

Jesúsen' bsa'krebre' ka ben be'nn be'e be'nn wen llin ke'e ka' mell

¹¹Na' chak llen akre' di'll ki, Jesúsen' be'e di'll ka nak ba zjake' awlloze Jerusalén na', le be'nn ka' nao Le'en, llak akre' le llnebia'te Diosen'.

12 Na' bne'e:

—To be'nn nak be'nn brao, blloje' zeje' to yell zi'te ga we'e ake' le'e

San Lucas 19 146

yel llnebia', na'tell wabie' nnebie' yell ke'en. 13 Ka za ko'tere' nez, goxhe' chi be'nn wen llin ke'e, na' be'e toto ake' mell, na' golle' leake': "Legonrén mellen' llin chak zaza'a na'." 14 Na'll be'nn wrall ke'e ka' llwie le'e, ka bre'e akre' ba broe' nezen', bse'l ake' be'nn bnao le'e, nench lljayell ake' be'nnen' we'e le'e yel llnebia'n: "Bi lle'neto' nnebia' be'nnen' neto'." 15 Bixha kate bllin lla ballín be'nnen' ralle'n, ba nake' be'nn wnebia'. na' goxhe' be'nn wen llin ka' be'e mellen', le lle'nre' nnezre' akre ben ake' mellen' bkwa'nnrene' leake'n. 16 Be'nn nellen' blline' rawe'n, lle'e le'e: "Xana', xhmello'n benen gan ye chi rasre ke to dan' bkwa'nno'n." 17 Na'll golle' be'nnen': "Da wen beno', nako' be'nn wen llin wen, ren da da'o ra't na', ba broe'ro' nako' be'nn wen. Na' nna' nnebia'o chi yell." 18 Na'll bllin be'nn yobre bne'e: "Xana', xhmello'n benen gan ga'y rasre ke to dan' bkwa'nno'n." 19 Leska' golle' le'e: "Leska' rwe' nnebia'o ga'y yell." ²⁰Na' bllin ye toe', bne'e: "Xana', nna de xhmello'n dan' benno'n, bro'cha'oza'n bra'lltia'n to bay, 21 blleba' rwe', le nako' to be'nn znia, llazi'o da bi beno', na' llrapo' ga ke llazo'." ²²Na' bne be'nn wnebia'n: "Be'nn wen llin mellian, ka di'llen' ll-lloj lloa'on, ka' gonkza' ko'o. Cha' nnezro' naka' be'nn znia, na' llazia' da bi bena', na' llrapa' ga ke llaza', ²³ ¿bixchen ke jalo' xhmella'n ga cho'cha'on na' gonen gan chak zaza'a na', na' nna yezia'n ba xhoa la ra'tze yichje?" ²⁴Na'll golle' be'nn ka' zjalla'a

kwite'n: "Lewaka'a mellen' no'xe'n, na' lewe'n be'nnen' ben gan ye chi ke to dan' bie'n." ²⁵Na' goll be'nn ka' le'e: "iXanto', ba napkze' dan' bene' gan na'!" ²⁶Na' goll be'nn wnebia'n leake': "Llnia' re', be'nnen' ba napkze' da nape', yezikre we'e da yobre, na' be'nnen' bibi de ke'e, rente da da'o ra't, cha' de ke'e, yeka'a. ²⁷Na' ka nak be'nn ka' llwie nada' na', bi gokra'll ake' gaka' be'nn wnebia', lelljaxi'i ake', na' lewchoy yen ake' rawa' nga."

Jesúsen' byoe' Jerusalén

(Mt. 21:1-11; Mr. 11:1-11; Jn.12:12-19)

²⁸Ka bayoll be'e Jesúsen' di'll ki, na' broe' nez zeje' Jerusalén. ²⁹Ka ba zeje' kwit yellen' re Betfagé na' Betania, gan' zo ya'n gan' nzi'i Ya' Olivos, bse'le' chop be'nn ka' non Le'e txhen, ³⁰lle'e leake':

—Lechej yellen' lli' chla' na', kate cho're yellen' re're to burr da'ba' yay, ba nono nna kwia, lewsellba', na' wche'tereba'. ³¹Na' cha' lloj be'nn ye'e re': "¿Bixchen llsellre burren'?", leye'e: "Xanto' na'n yallje leba'."

³²Na' bro' be'nn ka' nez, na' gokte kan' golle' leake'n. ³³Ka llsell ake' burren', bllin xanba'n lle'e leake':

—¿Bixchen llsellre burren'?

³⁴Na' goll be'nn ka' chopen' le'e:

—Xanto' na'n yallje leba'.

³⁵Na' le bache'e akteba' gan' ze Jesúsen', na' bxoa ake' ra'll da nak ake' ko'll burren', na' bllia ake' Jesúsen' ko'llba'n. ³⁶Ka nak zjake' na'n, llchirj ake' no sab ke ake' tnezen'. ³⁷Na' ka le llin akte' letj le' ya' gan' nzi'i Ya' Olivos, na' ba naken awlloze Jerusalén na', bzorao be'nn ka' non Le'e txhen na', llosia' ake' zillj llawé akre', lloe'rao ake' Dios, ka nak bre'e akre' yel wak ke Jesúsen', ³⁸ne ake':

—iNak la'y Rey be'nnen' za'a nna', be'nn bse'l Xanllo Dios! iDowe'rao Diosen' txhen ren be'nn ka' lla'a yebán', nna' ba bllin lla yeni'trenlloe' wen!

³⁹Radj be'nn zan ka' nao Jesúsen', ren be'nn ka' nak be'nn fariseo, na' goll ake' Jesúsen':

—Maestro, bdil be'nn ka' nao rwe'n.

40 Na'll balli'i Jesúsen' xti'll ake'n:

—Llnia' re', cha' be'nn ki so ake' llize, yej ki le gosia'n we'rao ake'n nada'.

⁴¹Ka bllin Jesúsen' awlloze Jerusalén na', bre're' yell Jerusalén na', na' bllelle', ⁴²na' bne'e:

—iChenak re' llayakbe're, nna'tek de latj nench wazore wen ren Diosen'! Zan bi llakbe're, le nna nga'chen rao re'. ⁴³Wllin lla kate be'nn ka' llwie re', yedcha'a ake' wayechjte gan' lla'ren', nono gakse lloje. ⁴⁴Na' yechinnj ake' yellen', got ake' yeolol re' lla'a rao yellen'. Ni to yej da ndil lwellje bi yega'nne, ka'n gak keré, le bi byejnie're bi llan' bed Diosen', zadyakrene' re' chenake.

Jesúsen' bachache' be'nn llon ya'a lia' yoda'o braon'

(Mt. 21:12-17; Mr. 11:15-19; Jn.2:13-22)

⁴⁵Ka bllin Jesúsen' Jerusalén na', byoe' yoda'o braon', na' bachache' yeolol be'nn ka' llon ya'a lia' yoda'on, ⁴⁶na' lle'e leake':

—Ki nyoj xti'll Diosen': "Rilla'n, naken yo' ga llaya'l yelwill be'nn

nada'", na' re' ba nonren ka broj ke be'nn wan.

⁴⁷ Yeo lla llzejnie' Jesúsen' leake' do lia' yoda'o braon', na' bxoz wnebia' ka', na' be'nn ka' llsedre ke leyen', na' ye bal be'nn brao ke be'nn Israel ka', llayirjla'll ake' akre ka gon ake' got ake' Le'e. ⁴⁸Na' ni ke llallel akzre' akre ka gon ake', le be'nn yell yel wan xhen llon ake', ka nak llzenay ake' xti'lle'n.

Yel llnebia' ke Jesúsen' (Mt. 21:23-27; Mr. 11:27-33)

Gok to lla ka llzejnie'
Jesúsen' be'nn ka' yoda'o
braon', llroe're' Di'll Wen ke Xanllo
Diosen', kate bllin bxoz wnebia'
ka', na' be'nn ka' llsedre ke ley dan'
bzoj da Moisésen', na' be'nn gor
brao ke be'nn Israel ka', ²lle ake'
Le'e:

—Bnechk neto', ¿bi yel llnebia' napo' llono' da ki? ¿No benn yel llnebia'n llono'n?

³Na'll balli'i Jesúsen' xti'll ake'n, bne'e:

—Leska' nada' wnnabra' re', lennechk, ⁴¿non' bse'l Juan be'nnen' bchoa nis? ¿Diosen' bse'l le'e o cha' nollre be'nnachen'?

⁵Na' bzorao lloe'rén lwellj ake' di'll, ne ake':

—¿Akxha nnello? Cha' nnello Diosen' bse'l le'e, na' ye'e lli'o: "¿Bixchen bi byejle're ke'e cha'?" ⁶Cha' nnello lwellj be'nnkzllon' bse'l le'e, nxholl wchekw be'nn ki lli'o yej, le ne ake' Juan na'n goke' to be'nn bse'l Dios.

⁷Na'll goll ake' Jesúsen' bi nnez akre' no bse'l Juan na'. ⁸Na'll lle Jesúsen' leake': —Leska' nada', bi nnia' non benn nada' yel llnebia'n nench llona' da ki.

Jesúsen' be'e di'll ka ben be'nn wen llin be'nn bi llon wen

(Mt. 21:33-34; Mr. 12:1-11)

⁹Na' bne Jesúsen' to di'll llzejnie're' be'nn ka' lla'a llzenay xti'lle'n:

—To be'nne, goze' lba uvas rao yellrio xhen ke'en, na' bene'n rallna'a be'nne, na' broe' nez zeje' ga yobre ga jasoe' scha. ¹⁰Ka bllin lla llalis be'nn ka' da ka' llaz ake'n. be'nnen' nak xane'n bse'le' to be'nn wen llin ke'en, nench wazie' ke to da llaya'le'. Na' ka bllin be'nnen', ben ake' zi' ke'e, na' bibi be'e ake' le'e. ¹¹Na'll be'nnen' bse'le' ye to be'nn wen llin ke'e be'nn yobre, leska' go'dyi' ake' le'e, na' ben ake' zi' ke'e, na' bibi be'e akse' le'e. ¹²Na'll bse'lkze' be'nn yobre, na' bentat ake' zi' ke'e, ben akte' le'e we'e, jaza'l akte' le'e latj yobre.

13'Na'll xan yellrion' bne'e:
"¿Akxha gona' nna'? Wse'lcheka'
xhi'nna' bin' nllie'ra' na', cheke gap
akebe' bara'nne." 14 Bixha be'nn
wen llin ka', ka bre'e akre' xhi'nn
be'nnen', lle lwellj ake': "Be'nn nin'
xhi'nn xan yellrion', le'en llaya'l si'i
bien na', ledá gotlloe', na' gak dan'
kello." 15 Na' brej ake' le'e lo re'jen',
na' bet ake' le'e.

Na'll bne Jesúsen':

—¿Akre llákere, akre gon xan yellrion! ke be'nn ka' llon llin rao yellrion!? ¹⁶Cheje!, na' lljete! leake!, na' gone! yellrion! rallna'a be'nn yobre.

Ka bayoll bene be'nn ka' ka di'llen', bne ake':

—iDios gakrene' lli'o bi gonllo ka'!

¹⁷Na'll Jesúsen' llwiateze' leake',
bne'e:

—¿Ka akxha chejnie'llo gan' nyoj xti'll Diosen', nen ki?:

Yej dan' bi byo'ra'll be'nn wen yo' ka', gonrén ake' llin, len na' ba naken yej skin.

¹⁸Be'nn bixe, na' lljago'nne' rao yejen', gachjtine', na' be'nnen' cha' yej na' bixen wxejen le'e, wxhoxhjtinten le'e.

Dan' llaya'l gaxhj rao be'nn llnebia'

(Mt. 21:45-46; 22:15-22; Mr. 12:12-17)

19 Bayoll bne Jesúsen' ka', bxoz wnebia' ka', na' be'nn ka' llsedre ke leyen', le gokra'll akte' go'x ake' Le'e, le byejnie' akre' ni ke leake'n be'e di'llen' ka', na' blleb ake' be'nn yell.

²⁰Na' bse'l ake' be'nn blle'nao Le'e, be'nn ben ka llon Le'e txhenre, nench na' kwe'nao ake' cha' bi di'll lloj lloe', na' sa'ke gon ake' Le'e rallna'a be'nn wnebia'n. ²¹Na' be'nn ka' goll ake' Jesúsen':

—Maestro, nnézeto' lloe'o di'll li llroe'ro' lixheje, na' toz ka llono' ren noteze be'nne, na' llzejnie'ro' kan' nak xhnnez Diosen'. ²²Lle'neto' nnézeto', ¿naken wen chixhjto' dan' llnnab be'nnen' le zeraoze nak wnebia', be'nnen' llia Roma o cha' bi naken wen?

²³Na' Jesúsen' bayakbe're' kere do ra'll ake'n llnnab ake', na'll lle'e leake':

—¿Bixchen lle'nzere gonre're nada'? ²⁴Lewroe' nada' to xhmellren'.

Ka be'e ake' Le'e mellen', na' bne'e:

149 San Lucas 20

—¿Noxha raon' da'a le' mell ni? ¿No ran' nyoj le ni?

Na'll bne ake':

—César be'nnen' llnebia' Roma na'n.

²⁵Na'll lle'e leake':

—Da nake ke César lewayoe'n le'e; na' da llaya'l we're Dios, lewe'n Dios.

²⁶Na' bi llakse gon ake' lloj to di'll krere lloa' Jesúsen' rao be'nn ka' lla'n, na' llabán akre' kan' llallie' xti'll ake'n, llazé akte' llize.

Bnnab ake' akren' gak kat yebán be'nn wat ka'

(Mt. 22:23-33; Mr. 12:18-27)

²⁷Na'll bllin bal be'nn ka' nzi'i saduceo, be'nn ka' bi llejle' yebán be'nn wat ka'. Na' goll ake' Le'e:

²⁸—Maestro, dan' bzoj da Moisésen', ganna' nllian bia'a, cha' to be'nn wchayne'e, na' gate', na' nono xhi'nne' bzo, to be'nn bi'che' wazie' no'ren' nench wazó lo raz be'nn waten'. ²⁹Ki gok bzo gall be'nne, be'nn nellen' bxhie' no'ren', na' gote' bi bzo xhi'nne'. 30 Na'll bi'che', be'nn wllopen' bazie' no'ren', na' leska' gote' nono xhi'nn ake' bzokze. 31 Na'll be'nn wyonne bazie' no'ren', leska' gote', na' ka' yeolol ake' bzorén no'ren', na' yeolol ake' got, ni to xhi'nn ake' bi bzo. 32 Na'll got ren no'ren'. 33 Kate llin lla yebán be'nn wat ka', ¿nore be'nn ki gakse be'nn ke no'ren', le yeolole'n bzorén le'e?

34 Na' goll Jesúsen' leake':

—Be'nn ka' lla'a rao yellrio ni, llchayna'a ake', na' llchayna'a no xhi'nn ake'. ³⁵Zan ka nak be'nn ka' ba nbej Diosen' nench yebán ake', na' yellín ake' yebán', kere wchayna'll be'nn ka', na' nollno wchayna'kze. ³⁶Le kere na' gat ake' da yobren', ka angl ke Diosen' wayak ake', gak ake' xhi'nn Dios dogarje, le ke len na' ba basbane' leake'. ³⁷Ka nak dan' de yebán be'nn wat ka', kwin da Moisésen' bzejnie're'n ka nak bzoje' kan' balwill Diosen' le'e to lo xhis ye'che, na' bne Diosen' nake' Dios ke Abraham, Dios ke Isaac na' Dios ke Jacob, le nban be'nn kin', na'llen' bne'e ka'. ³⁸Ka nak Diosen', bi nake' Dios ke be'nn wat, Dios ke be'nn ban na' nake', na' yeolol be'nn nxenra'lle' Diosen', la'kze ba got ake', nban akse' rao Le'e.

³⁹Na' bal be'nn ka' llsedre ke ley dan' bzoj da Moisésen', goll ake' Le'e:

—Da li kan' bne'on, Maestro.

40 Na' bill bayaxhj akre'
wnnab akllre' Le'e billre da
yobre.

¿No nak dialla Criston'?

 $(Mt.\ 22{:}41{-}46\ ;\, Mr.\ 12{:}35{-}37\)$

⁴¹Na' lle Jesúsen' leake':

—¿Bixchen ne akze', Criston' nake' xhi'nn da rey Daviden'? ⁴²Rencha' kwin Daviden' bzoje' le' yich ke Salmos ki:

Xanllo Diosen' golle' Xana'n: "Blle' kwita'n,

43 llinte lla ka gona' yeolol be'nn ka' llwie rwe'n,

nni't ake' xhnia'on."

44Cha' Daviden' bne'e Criston' nake' Xane', ¿akxha gakze Criston' xhi'nn dialla ke Daviden' chet ka'?

Jesúsen' golle' be'nn ka' llsedre ke leyen' de do'l ke ake'

(Mt. 23:1-36; Mr. 12:38-40; Lc. 11:37-54)

⁴⁵Be'nn zan lla'a llzenay xti'll Jesúsen', na'll golle' be'nn ka' non Le'e txhen na':

46—Lewiaya'nn kan' llon be'nn ka' llsedre ke ley dan' bzoj da Moisésen', llawé akre' llak ake' to ra'll tonn, na' llawé akre' gap be'nn leake' bara'nne do tnez, do lao ya'a, na' do lo yoda'o. Leska' ga llak no wao, ll-lan ake' ga ba nak kwe' be'nn brao. ⁴⁷ Na' llka'a ake' rill no'r wazebe, na' da llde' akre', scha llze ake' kate llalwill ake' Diosen' nechkze ten ka'ze. Da xhen da de sa'kzi' be'nn ka' kan' llon ake'n.

To no'r wazeb be'e mell

(Mr. 12:41-44)

21 Ka zo Jesúsen' yoda'on, bre're' ka llgo' be'nn wnia' ka' mell dan' lldop lo yoda'on.

²Leska' bre're' ka bllin to no'r ya'ch no'r wazeb, broe' chop mell da'o.

³Na'll bne Jesúsen':

—Da li llnia', no'r wazeb ya'ch ni, da xhenll ba broe' kerke yeolol be'nn ka' yela'. ⁴Le bro' ake' da ba bgo'nn billbi de gon akre'n, zan ka nak no'ren', rao yel ya'ch ke'en be'e ka da lallibe de ke'e.

Jesúsen' bdixjwe're' wllin lla yechinnj ake' yoda'o braon'

(Mt. 24:1-2; Mr. 13:1-2)

⁵Na' bal be'nn ka' lla'n, lloe' ake' di'll katek nbaraz nak yoda'o braon', na' ka wallajllo nak yej ka' naken na', na' billre da non len nbaraz da lloe' ake' ke yoda'on. Na' bne Jesúsen':

⁶—Ka nak da ka' llre're nga, wllin lla kat ni to yej ki zjankwa'a ganni, no'x lwellje bi yega'nnen. Yeololen yeyinnj aken.

Kan' gak kat ba zo rez wayoll vellrion'

(Mt. 24:3-28; Mr. 13:3-23)

⁷Na'll bzorao llnnab akre' Jesúsen', lle ake' Le'e:

—Maestro, ¿baten' gak ka'? ¿Bixha gak katen' ba zo rez gak kan' bne'on?

8 Na'll lle'e leake':

—Lewiá ke nench ke no siye'z re', na' ka're nez yobre, le be'nn zan be'nn wxhiye'e ra', na' nne ake': "Nada'n Criston!", na' "Ye chollze le yellayraote be'nn lla'a yellrion!." Bi chejle're ke ake'. ⁹Kate yénere gak wdile, na' yénere do ga yobre ba llak wdil, bi llebre, da llaya'l gakse da ki, na' ker le wayollte yellrio na'n.

¹⁰Na'll bne'e:

—Na' til to yell ren ye to yell, na' yell xhen ren ye to yell xhen. ¹¹Na'll xo' gateze, na' gak win, na' ra' yillwe', na' be'nn ka' lleb ake' kwis kan' gaken, na'll biteze gak le' yebán' da yebán akre'.

12'Na' ka za gaktere da ki, go'x ake' re', na' si'chi'll ake' re', na' xobxexj ake' re', wche'e ake' re' ga zo no yoda'o ga lladop ake', na' ko' ake' re' rill ya, na' lljwa'a ake' re' no rao rey, rao koxchis, ni ke dan' nxenra'llre nada'. ¹³Ka nake gon ake' ka', na' ga't latj we're xti'lla'n. ¹⁴Bi gonre xhbab akre ka nnere, kate llinre rao be'nn wnebia' ka', ¹⁵nada' gonna' di'll, na' gonna' re' yel si'n nench gak walli're xti'll

ake'n, ni ke no soeze re'. ¹⁶Na' dan' llebraz wie akre' re'n, kwin xaxhna're, bi'chre, bi'ch lwelljre, na' be'nn ka' nonre txhen, gon ake' re' rallna'a be'nn ka' llwie re'n, na' balre got ake'. ¹⁷Yeolol be'nn wie akre' re', ni ke dan' nxenra'llre nada'n, ¹⁸zan ni to yich yichjre bi kwiayi' rao Dios. ¹⁹Lesé war, na' legap yel llxhenra'lle, na' gonre gan.

²⁰'Kate re're ba lla'a waka'a ya ba nechj ake' Jerusalén na', nnézello ba zo rez kwiayi'n na'. ²¹Re' lla'a gan' nbane Judean', lewxhonnj lechej ya' xhen, na' re' lla'a Jerusalén na', lellache; re' zej lyi'xe, bi ye'nzere wayo're yell. ²²Le ba bllin lla yellayrao be'nn ka', na' soa di'll kan' nyoj xti'll Diosen'. ²³ iNya'chraz ke no'r noa' bda'o, na' no'r nka' bda'o kana'! Doxhen rao yellrion' wallayrao be'nne, na' yeolol be'nn ka' lla'a gan' nbane Judean', Diosen' gone' yellayrao ake'. ²⁴Be'nn zan gat rao wdilen', na' be'nn zan wchach ake', na' wche'e akte' leake' rao yeolol yell xhen ka' zjalli' rao yellrion', na' be'nn zi't bi nak be'nn Israel, cha'a ake' wrejchekw ake' Jerusalén na', llinte lla bill nnebia' be'nn ka' bi nak be'nn Israel.

Kan' gak katen' yed Jesucriston' da yobre

(Mt. 24:29-35, 42-44; Mr. 13:24-37)

²⁵'Na' bi gak bi nne le' yebán', willen', be'on na' berj ka', na' be'nn ka' lla'a rao yellrion', to gak ake' tore le llebraz lleb ake' ka yen akre' gon nisda'on llakia, ka nak wlis be'n len. ²⁶Na' dan' lleb ake'n, to gatzi ake' kan' gak rao yellrion', le

kana' wroe'rao doxhen yel wak da bi na' re'llo le' yebán'. ²⁷ Na'tellen' re'e akre' Be'nnen' Gorj Radj Be'nnachen', ze'e to lo bej nse'e yel wak xhen ke'en, na' beni' xhen ke'en. ²⁸ Kate ba bzorao llak da ki, legondipra'lle, na' leyewé le ba zo rez yesrá Diosen' re'.

²⁹Na'll bsa'krebre' llroe're' leake':

—Lewiá ke yay higo, na' biteze yay, ³⁰kate ba llaga' xhla'yen, na' llakbe're ba zo rez cho're rao ba. ³¹Leska'kzen', katen' ba llre're llak da ka' ba bnia' ni, ba nnézere ba zo rez nnebia' Diosen'.

32'Da li llnia' re', be'nn ka' lla'a nna', nna nban akte' kate sorao gak da ki. 33 Ka nak yebán' ren yellrion' wllin lla kat te ke, zan ka nake xti'lla'n kere da te ke ka'zen'.

34'Na' lewiá, ke ye'j gaoxenre, sollere, na' kwiare ria, na' cho' yichjre chraoze da de rao yellrion', na' bi gakbe're katen' llin llan'.
35 Ka llak ke to bayi'x da'o, ni ke llakbe'zeba' lljabixba' ga lldo'lba', kan' gak ke be'nn ka' lla'a rao yellrion'.
36 Lewnna' yere, lewalwill Diosen' nench gakrene' re' katen' llin lla na', na' gak wallinre lljazere rao Be'nnen' Gorj Radj Be'nnach.

³⁷Ka', yeo lla, Jesúsen' llzejnie're' be'nn ka' do lia' yoda'o braon', na' yeo lle' llayejte' ya' gan' nzi'i Ya' Olivos. ³⁸Na' kate lleni' be'nn zan lladop yoda'o braon', na' lljazejnie're' leake'.

Be'e ake' di'll yeso't ake' Jesúsen'

(Mt. 26:1-5, 14-16; Mr. 14:1-2, 10-11; Jn.11:45-53)

22 Bixha ba zo rez ga'l lnni dan' ne paskw Jerusalén

San Lucas 22 152

na', katen' llao ake' yet xtir dan' bi nchix kwa binn. ²Na' bxoz wnebia' ka', na' be'nn ka' llsedre ke ley dan' bzoj da Moisésen', bzorao llyirjla'll ake' akre gon ake' nench got ake' Jesúsen', le lleb ake' be'nn yell.

³Na' daxi'on byo'n yichjra'llda'o Judas, be'nnen' nsi'i ake' Iscariote, be'nnen' nak txhen be'nn chllinn ka'. ⁴Na'll byeje' je'rene' bxoz wnebia' ka' di'lle, na' ren be'nn ka' nak xan be'nn ka' llap yoda'on, kan' gone' Jesúsen' rallna'a ake'. ⁵Bawé be'nn ka' kwis, na' be'e ake' di'll we'e ake' le'e mell. ⁶Judas na' bchebe' wdie' Jesúsen' rao na'a ake', na' bzorao lli'nawe' ga't latj gone' Le'e rao na'a be'nn ka', kate bi gakbe'e be'nn yell.

Jesúsen' broe're' kan' gon ake' lljasa'ra'll ake' yel got ke'en

(Mt. 26:17-29; Mr. 14:12-25; Jn.13:21-30; 1Co.11:23-26)

⁷Na' ka bllin lla, ka llao ake' yet xtir dan' bi nchix kwa binn, na' leska' llot ake' xhi'r kan' lla'l lnni Paskw. ⁸Jesúsen' bse'le' Pedron' ren Juan na', lle'e leake':

—Lechej lelljén xhnid, lelljasinia' dan' gaollo lnni paskwn'.

9Na'll goll ake' Le'e:

—¿Gaxha lle'nro' lljasinia'to'n?

10 Na' lle'e leake!:

—Kate cho're yellen', na' walláyere to be'nne zanzoe' to lle' nis xhichje', lennawe', kon ga cho' le'e, ganna' cho're. ¹¹Kate cho'ren', leyé xan yo'n: "Maestron', ne'e: ¿Ga zo yo' gan' gaoto' xche', ren be'nn ka' non nada' txhen lnni paskw ni?" ¹²Na' wroe're' re' to yo' da zo chkwia, na' ba de yeolol da ka'

yálljellon', ganna' wsinia're dan' gaollon'.

¹³Na' bza'a ake', gokte kan' golle' leake'n, na' bsinia' ake' dan' gao ake'n.

¹⁴Ka bllin gao ake' xche'n, blle' Jesúsen' ren postl ke'e ka'. ¹⁵Na' golle' leake':

—iLe ba bzera'llkaza' gaorena' re', lnni paskwn' ka za gata'! ¹⁶Ni llnia' re', zerao nna' llaorena'n re'. Kate ba gok doxhen dan' llroe'ra' ni, na' ba llnebia' Diosen', kana'll gaorena' re' da yobre.

¹⁷Na' be'xe' leo da'on, be'e yel llioxken ke Dios, bne'e:

—Lesi'i da ni, na' leye'j ra't wejen yeololre. ¹⁸Llnia' re', zerao nna' lle'ja' xis uvan', llinte lla kate ba llnebia' Diosen'; kana'll yeye'ja'n da yobre.

¹⁹Na'll bxhie' yet xtiren', na' be'e yel llioxken ke Diosen', na'll bxhoxhje'n be'en leake', na' bne'e:

—Da nin' naken kwerp kia', ke nak nna' llsanra'lla'n ni ke re', ka' gonre gaoren nench lljasa'ra'llre nada'.

²⁰Na' ka badawe' xche'n, be'xe' leo da'on bne'e:

—Dan' yoll lo leo da'o ni, naken to da llroe'n, nna' sorao to da kob, dan' bcheb Diosen' gakrene' re', ke len na', larj xchena'n nench gaken da li. ²¹ Be'nnen' gon nada' rallna'a be'nn ka' got nada', leska' rawe gan' lli'llo ni, nxoa ta'ke'. ²² Da li, nada', Be'nnen' Gorj Radj Be'nnach, ba naksen gak kia' ka', zan nya'chraz ke be'nnen' gon nada' rao na'a be'nn ka' got nada'n.

²³Na' be'nn ka' non Le'e txhen na', bzorao llnnabe lwellj ake', nor San Lucas 22

ake'n gon Le'e rallna'a be'nn ka' llwie Le'en.

Lloe'rén lwellj ake' di'll noren' gak be'nn brao

²⁴Leska' bzorao lloe'rén lwellj ake' di'll, noren' gakll be'nn brao.
²⁵Na'll lle Jesúsen' leake':

-Be'nn ka' llnebia' toto yell xhen, llawé akre' gon be'nn ka' kon da nez leake', na' leska' llawé akre' nne be'nne, nak ake' be'nn wen. ²⁶Zan re', bi gonre ka', be'nnen' ye'nzre' gake' be'nn brao, llaya'l gake' ka be'nn bibi nneze, na' be'nnen' ye'nzre' nnebie' radjren', llaya'l gake' ka to be'nn wen llin keré. 27 Lennechk. ¿nore be'nnen' nak be'nn brao, be'nnen' lli' llao na', o cha' be'nnen' llsinia' dan' gawe' na'n? Nakbie'kze be'nnen' lli' llao na', nak be'nn brao. Zan nada' zia' ganni ka be'nn wen llin keré, na' zia' nench gakrena' re' biteze da gak keré.

²⁸'La'kze biteze da ba gok kia', re' ba bzerenre nada'. ²⁹Leska' gona' nench nnebia're katen' gonn Xa'n yel llnebia' ke'en nada', ³⁰nench kwe'renre nada', na' ye'j gaollo txhen katen' ba llnebia'n, leska' gona' to latj ga kwe're nench gonre yel koxchis, na' wchoybia're ke be'nn Israel ka'.

Jesúsen' bne'e kan' gon Pedron' bi wchebe' cha' nombie' Le'e

(Mt. 26:31-35; Mr. 14:27-31; Jn.13:36-38)

³¹Leska' goll Xanllon' Simón Pedron':

—Simón, Simón ba bnnab daxi'on nench gonre'ren re', gonen re' ka llon be'nn llrobe trigo. ³²Nada' ba bnnaba' rao Dios gakrene' rwe' nench bi gakganro', na' kate ba beno' gan na', gakrenchgo' be'nn bi'cho' ki.

³³Na'll Pedron' lle'e Le'e:

—Xana', ba bchoyra'lla' kere lo rill yaze sa'rena' rwe', gatrentekza' rwe' chet ka'.

34 Na'll lle'e Pedron':

—Pedro, llnia' rwe', bire nne kwell lekwn' nna' lle', llinte gak chonn ras bi we'o di'll nombia'o nada'.

Ba zo rez yellayrao Jesúsen'

³⁵Na' lle Jesúsen' be'nn ka' non Le'e txhen:

—Kan' bse'la' re', ka'n bibi be'xkzre, ni mell, ni bzod, ni ye chkwe' xher-re; lennechk, ¿bi byálljere?

Na' lle ake' Le'e:

—Bitbi byálljeto'.

Na'll bne'e:

36—Zan nna', cha' re' de mell keré, lewa'n; leska' cha' napre bzod, lego'xen; na' re' bi napre spad, lego't no xherk keré, na' lesi'i ton.
37 Le llnia' re', dekz de gak kia' kan' nyoj xti'll Diosen' gan' nen ki: "Ben akre' le'e ka llon akre' be'nn wen da xhinnj." Le dan' nyoj gak kia'n dekz de gaken.

³⁸Na'll bne be'nn ka' nao Le'en:

—Xanto', na' de chop spad. Na' lle'e leake':

-Ba gokse to kate.

Jesúsen' balwille' Diosen' lo re'j gan' nzi'i Getsemaní

(Mt. 26:36-46; Mr. 14:32-42)

³⁹Na' blloj Jesúsen' zeje' ya'n gan' nzi'i Ya' Olivos, ka llonkze', na' be'nn ka' non Le'e txhen bnao ake' Le'e. ⁴⁰Ka bllin ake' latjen', lle'e leake':

—Lewalwill Diosen' nench ke gon da xhinnjen' re' gan.

⁴¹Na'll Le'en bdete' zeje', ke to ga llin to yej da llza'l-llo, na' bche'k xhibe' balwille' Diosen', ⁴²bne'e:

—Xa, cha' rwe' lle'nro', benchga bi wallayrawa', zan bi gak kon ka nnia' nada', gak kan' nnekzo' rwe'.

⁴³ Na' betj to angl za'a yebán' blline' gan' nche'k xhibe'n, na' btipra'lle Le'e. ⁴⁴ Na' llallayrawe' kwis llake yichjra'llda'we'n, na' llalwille' Diosen', kate bzorao llayaklolje', na' nis yes ke'en naktekzen llen ll-llonen rao yon'.

⁴⁵Bixha ka bayoll be'rene' Diosen' di'llen', bazolle'e. Ka balline' gan' ni't be'nn ka' non Le'e txhen na', jadi're' leake' tas ake' dan' llak akre'. ⁴⁶Na'll lle'e leake':

—¿Bixchen tasre? Lechas, na' lewalwill Dios nench ke gon da xhinnjen' re' gan.

Kan' gok kan' be'x ake' Jesúsen' (Mt. 26:47-56; Mr. 14:43-50; Jn.18:2-11)

⁴⁷Na' zete Jesúsen' lloe' di'llen', kate bllin Judas be'nnen' nak txhen ren be'nn chllinn ka', nche'te' be'nn zan, na' jabi'ye' kwit Jesúsen' bno'pe' Le'e. ⁴⁸Jesúsen' golle' Judasen':

—Judas, ¿llno'pte'o nada', Be'nnen' Gorj Radj Be'nnach, nechkze gono' nada' rallna'a be'nn ka' llwie nada'n?

⁴⁹Bixha ka bre'e be'nn ka' nao Le'en, go'x ake' Le'en, bne ake':

—Xanto', na' de spad, ¿wzoyibllo?

50 Toe' bdine' spad ke'en, bchoyte'
yid nay cha'we be'nn wen llin ke
bxoz braon'. 51 Na' goll Jesúsen' le'e:

-Bi gono' ka'.

Na'll bdane' nay be'nnen', na' bayake'n. ⁵²Na'll goll Jesúsen' bxoz wnebia' ka', na' be'nnen' nak xan be'nn ka' llap yoda'o braon', na' be'nn gor brao ke be'nn Israel ka', zjake llje'x Le'en:

—Ka be'nn llje'x to be'nn wan, za're no'xre yay na' spad. ⁵³Yeo lla blle'rena' re' yoda'o braon', na' bi be'xre nada', zan nna' bllin lla gak kan' lle'neren', nna' nnebia' da xcholen'.

Pedron' bi bchebe' cha' nombie' Jesúsen'

(Mt. 26:57-58, 69-75; Mr. 14:53-54,66 -72; Jn.18:12-18, 25-27)

⁵⁴Na' be'x ake' Jesúsen', na' bche'e ake' Le'e rill bxoz braon', Pedron' bnawe' Le'e zi't zi't. ⁵⁵Be'nn ka' bxhen ake' to yi' xhen lia' ke bxozen', na' blle'rén Pedron' leake' lloa' yi'n. ⁵⁶To no'r nak wete, ka bre're' Pedron' llie' lloa' yi'n, na' bwie' le'e, na' bne'e:

—Be'nn ni leska' nake' txhen Jesúsen'.

⁵⁷Na' Pedron' bi bchebe', na' bne'e:

-No're, bi nombia' be'nnen'.

⁵⁸Gok choll kate be'nn yobre bre're' le'e, na' bne'e:

—Renkze rwe'n nako' be'nn ka' txhen.

Na'll bne Pedron':

—Be'nne, bi nak ake' txhen.

⁵⁹Bixha ka gok choll kate be'nn yobre bne'e:

—Da likze, be'nn nin' nake' txhen ren Jesúsen', le nake' be'nn Galilea.

⁶⁰Na' Pedron' golle' be'nnen':

—Be'nne, bi nnezra' bi di'llen' lloe'o.

Na' nete' ka'n, kate le bllellte lekwn'. ⁶¹Xanllon' le bayechjte' bwie' Pedron', na' jadinra'll Pedron' kan' goll Jesúsen' le'e: "Bire nne kwell lekwn' nna' lle', llinte gak chonn ras, bi we'o di'll nombia'o nada'." ⁶²Pedron' balloje' gan' lla'a be'nn ka', da xhen gokre', na' bllelle' kwis.

Bsa'kzi' ake' Jesúsen' na' bdin ake' Le'e

(Mt. 26:67-68; Mr. 14:65)

63 Be'nn ka' llap Jesúsen', bzorao lltitj akre' Le'e, na' llon ake' zi' ke'e. 64 Bchej ake' to ra'll rawe'n, na' llba'll ake' yichjrawe'n, na' lle ake' Le'e:

—Banneya'chk, ¿non' bra'll rwe'? ⁶⁵Na' da zan da lle ake' Le'e, lla'dyi' ake' Le'e.

Bche'e ake' Jesúsen' gan' gak yel koxchisen'

(Mt. 26:59-66; Mr. 14:55-64; Jn.18:19-24)

66 Ka byeni'n, badop be'nn gor brao ke be'nn Israel ka', na' bxoz wnebia' ka', na' be'nn ka' llsedre ke ley dan' bzoj da Moisésen', na'll goxh ake' Jesúsen' gan' ze ake'n, le leake'n llon yel koxchisen'. Ka blline'n lle ake' Le'e:

67—Bne cha', ¿rwe'n Criston'? Cha' rwe'n, bne neto' kwasro.

Na' lle'e leake':

—Chenak nnia' re', ni ke chejle'zre. ⁶⁸Chenak nada' wnnabra' re', ni ke yelli'zre xti'lla'n, ni ke yesanzre nada'. ⁶⁹Na' soraozen nna', Be'nnen' Gorj Radj Be'nnach lljachie' kwit Diosen', be'nn nak yel wak xhen.

70 Yeolol ake' goll ake' Le'e:

—¿Rwe'n Xhi'nn Diosen' cha'?

Na'll bne'e:

-Re'n nere ka', na' ka'n naksen.

⁷¹Na'll bne ake':

—Nollno be'nn yálljello gao xhia ke'e; kwinllo ba bénello kan' bne'en.

Bche'e ake' Jesúsen' rao Pilaton'

(Mt. 27:1-2, 11-14; Mr. 15:1-5; Jn.18:28-38)

Yeolol be'nn ka' lla'n bzolla'a ake', na' bche'e ake' Jesúsen' jwa'a ake' Le'e rao Poncio Pilato, be'nnen' llnebia' Judea. ²Na' bzorao llao ake' xhia, llxoa ake' do'l ko'll Jesúsen' rao Pilaton', ne ake':

—Be'nn ni de'e llonchixre' be'nne, na' ll-llone' chixhjto' dan' llnnab Césaren', ne'e le'en Criston', na' nake' to be'nn wnebia'.

³Na'll Pilaton' bnnabre' Le'e:

—¿Rwe'n nako' Rey ke be'nn Israel ka'?

Na'll ballie' xti'll Pilaton', bne'e:

-Kan' bnekzo' na' naka'.

⁴Na'll Pilaton' lle'e bxoz wnebia' ka', na' be'nn ka' lla'a na':

—Ni to da xhinnj bi non be'nnen'.

⁵Na' yezikre llchie' akre', ne ake':

—Llonchixre' be'nne doxhen gan' nbane Judea, bzoraoze' Galilea na'te, na' ba bra'te ganni.

Jwa'a ake' Jesúsen' rao Herodes

⁶Ka bene Pilaton' bwa'l ake' Galilea, na' bnnabe' cha' be'nn Galilea Jesúsen'. ⁷Ka bnnezre' be'nn Galilea Jesúsen', na'll bse'le' Le'e rao Herodes na', le le'en llnebia' Galilean', na' rao lla na' zo Herodes, Jerusalén na'. ⁸Herodesen' ka bre're' Jesúsen', le bawere', le batna'te llenre' lloe' San Lucas 23 156

ake' xti'll Jesúsen', na' le lle'nre' re're' yel wak dan' llone'n. ⁹Da zan da bnnabre' Le'e, na' bi balli'kze Jesúsen' xti'lle'n. ¹⁰Na' le zete bxoz wnebia' ka', na' be'nn ka' llsedre ke ley dan' bzoj da Moisésen', llao ake' xhia llchie' aktekzre'. ¹¹Na' Herodesen' ren waka'a ya ke'e ka', bzorao zi'chi'll ake' Jesúsen', lltitj akre' Le'e. Na' bwakw ake' Le'e to ra'll da llaktit, na' base'le' Le'e rao Pilaton' da yobre. ¹²Lla na', Pilaton' ren Herodes bani't ake' wen, le kere zo ake' wen na'.

Bchoybia' ake' gat Jesúsen'

(Mt. 27:15-26; Mr. 15:6-15; Jn.18:39-19:16)

¹³Na'll Pilaton' batope' bxoz ka', na' be'nn wnebia' ka', na' bal be'nn vell. ¹⁴Na' lle'e leake':

—Re' badwa're be'nnen' rawa', na' nere llonchixre' be'nne. Llwiátere nga ba bnnabyollre', bibi da xhinnj non be'nnen' ka dan' lltóberen'.

15 Ba bse'le' rao Herodesen', leska' bibi da xhinnj bre're' none', bibi do'l ke'e de, da llaya'l gate'.

16 Na' wkwa'nne' rallna'a be'nn ka' chintat ake' Le'e, na'll yesane'.

¹⁷Na' llonen bien wsane' to be'nne yo' rill ya lla na', kan' llak toto lla lnni paskw. ¹⁸Na' be'nn zan ka' lla'n, bzorao llosia' ake' ne ake':

—iGat be'nnen', na' basán Barrabásen'!

¹⁹Barrabásen' yoe' rill ya, le bwiere' be'nn ka' llnebia', bxie' to wdil rao yell, na' bene' xhia. ²⁰Pilaton' lle'nre' wsane' Jesúsen', na' golle' leake' cha' wsane' Le'e. ²¹Na' be'nn ka', yezikre besia' ake', ne ake': —iBde'e le' yay cruz! iBde'e le' yay cruz!

²²Da wyonn ras golle' leake':

—¿Bixha da xhinnj bene' na'n? Bi nna lljadi'ra' cha' bi da xhinnj bene' da llaya'l gate'. Wsa'kzie', na'll yesane'.

²³Na' be'nn ka' ze ake' llchie' akre', na' llosia' ake' llnnab ake' gat Jesúsen' le' yay cruzen', na' ka' da bnez leake' gok. ²⁴Pilaton' bchoyra'lle' gak kan' lle'n akre'n. ²⁵Na' bsane' be'nnen' llnnab ake'n, Barrabásen', be'nnen' bxe wdil, na' bene' xhia. Na' bene' Jesúsen' rallna'a ake', nench gon akre' Le'e kan' lle'n akre'n.

Bda'a ake' Jesúsen' le' yay cruz (Mt. 27:32-44; Mr. 15:21-32; Jn.19:17-27)

²⁶Na' bche'e ake' Le'e, brej ake' Le'e yell Jerusalén na', na' tnez na', ballay akre' to be'nn re Simón be'nn Cirene zaze'e lyi'xe, na' bda'a ake' yay cruzen' ko'lle', na' noe'n bnawe' Jesúsen'.

²⁷Be'nn zan be'nn yell nao Le'e, na' ren bal no're. Na' bell no'r ka', llak akre' ke nak llwia ake' kan' llon akre' Le'en. ²⁸Na' Jesúsen' bayechje', lle'e leake':

—Re' no'r Jerusalén, bi kwellre kia', lekwell ke kwinre, na' ke xhi'nnre. ²⁹Le wllin lla kate nne ake': "Nbaraz ke no'r will, na' no'r bi bxhan, na' bi zo xhi'nne' llwa'lle'." ³⁰Kana' to nnab ake' bix ya' ka' kwenen leake', na' to nnab ake' ka' bdinnj nench kwa'chen leake'. ³¹Cha' ki llon akre' nada', naka' ka yay ya', gon aktellre' re', nakre ka yay yeche.

157 San Lucas 23

³²Leska' nche'e ake' ye chop be'nn wen da xhinnj got ake'. ³³Ka bllin ake' latj gan' nzi'i Llit Yichj Be'nn Wat, na' bda'a ake' Jesúsen' le' yay cruzen', ren be'nn wen da xhinnj ka' ye chope, bda'a ake' leake' chla' weje. ³⁴Kate bne Jesúsen':

—Xa, bxhi'xhen ke be'nn ki, le bi nnez akre' bin' llon ake'.

Na' bditjen ake' xhara'ne'n, llwia ake' nara'chk noren' llaya'l toto ake'. ³⁵Be'nn zan ka', ze ake' zi'tre llwia ake', na' be'nn ka' llnebia' Israelen', leska' ren ake' lltitj akre' Le'e, ne ake':

—Be'nn yobre basre'e, yesrachke kwine' nna', cha' le'en nak Criston' bse'l Dios.

³⁶Leska' waka'a ya ka', lltitj akre' Le'e, lljabi'y ake' lljazé ake' zo zichj lloe', ³⁷na' lle' ake' Le'e:

—iCha' rwe'n Rey ke be'nn Israel ka', basrachk kwino'!

³⁸Na' bllia ake' di'll yichj cruzen', nen: "Be'nn nin' Rey ke be'nn Israel ka'." Llian di'll griego, na' di'll latín, na' di'll hebreo.

³⁹To be'nn wen da xhinnj ka', da'a le' yay cruzen', leska' lla'dyie' Jesúsen', ne'e:

—iCha' rwe'n Criston' basrá kwino', na' basrá ren neto'!

⁴⁰Na' be'nn lwellje'n ye to, benre' le'e znia, lle'e le'e:

—Rennriz rwe' nne'o, na' bi llapo' Diosen' bara'nne, llwiate'o leska'n ba da'llo ganni gatllo. ⁴¹Lli'o da'llo ganni llallayraollo, le ka' llaya'l gakse kellon', le da xhinnjen' benllo, zan be'nn ni, bibi da xhinnj bene'.

⁴²Na'll golle' Jesúsen':

—Lljadinra'llchgo' nada' katen' za'o nnebia'on.

⁴³Na'll Jesúsen' golle' le'e:

—Da li llnia' rwe', nna' llate sereno' nada' latj wen gan' zo Diosen'.

Kan' gok kan' got Jesúsen'

(Mt. 27:45-56; Mr. 15:33-41; Jn.19:28-30)

⁴⁴Kan' bllin wawillen', gok xchol rao yellrion' bllinte do lladá chonne. ⁴⁵Bill bnna' willen', na' ra'll dan' ze lo yoda'o Jerusalén na', blle'zen goken chopre. ⁴⁶Na'll Jesúsen' besie' zillj, bne'e:

—Xa, llona' rallna'o Spíritu kia'n. Ka bayoll bne'e ka'n, gote'.

⁴⁷Na' ze be'nnen' nak xan waka'a ya ka', ka bre're' kan' goken, be'rawe' Dios bne'e:

—Da likze be'nn wen be'nnen'.

⁴⁸Be'nn zan ka' lla'a llwian', ka bre'e akre' dan' goken, baza'a ake' llba'll lcho' ake'. ⁴⁹Na'll be'nn ka' nombia' Jesúsen', ren no'r ka' nao Le'en Galileate, ze akte' zi'tre llwia ake' kan' llaken.

Bkwa'ch ake' Jesúsen'

(Mt. 27:57-61; Mr. 15:42-47; Jn.19:38-42)

50 To be'nn re José be'nn Arimatea, yell ga nbane Judea, nake' txhen be'nn ka' llnebia' Israelen', na' nake' be'nn wen, be'nn wen da zej lixheje. 51 Bzoteze' brexhe' katen' wroe' Diosen' yel llnebia' ke'en, na' bi bene' txhen lwellje' ka', ke nak dan' ben ake'n. 52 Byeje' rao Pilaton' jannabe' kwerp ke Jesúsen'. 53 Na' baletje' Jesúsen' le' yay cruzen', na' bra'lle' Le'e to xchan, na' bkwa'che' Le'e. Broe' Le'e to lo ba kob, to broj da bene' le' yej ga nono nna lljacho'. 54 Naken lla llsinia' ake' ke lnnin', na' le llinte lla nba'nne.

⁵⁵Na' no'r ka' za'a ren Jesúsen' Galileate, bnaorén ake' be'nn ka' nlen Jesúsen', na' bre'e aktere' gan' bro' ake' Le'en, na' kan' bxoa ake' kwerp ke'en. ⁵⁶Bde na', baza'a ake' jencha'o ake' za da la xhix, na' nis da la xhix da wtop ake' kwerp ke Jesúsen'. Na' le byo' akte' lla nbane ke be'nn Israel ka', na' bazi'ra'll ake' kan' ne leyen'.

Jesúsen' babane' radj be'nn wat ka' (Mt. 28:1-10; Mr. 16:1-8; Jn.20:1-10)

Ka bllin lla nell ke xhman na', ka le za'te cheni', txhonnj no'r ka', jake' gan' zo broj dan' nak ban', no'x ake' dan' bencha'o ake', dan' la xhix. ²Ka bllin ake' na', bre'e akre' bill da'a yejen' lloa' ban', ba da'ten chla're. ³Ka byo' ake' lo ban', bill ballel akre' kwerp ke Jesúsen'. 4Bixha na' ze ake' llon ake' yel wan ke dan' bill xhoa kwerp ke Jesúsen', kate bllin chop be'nn jasé ake' kwit ake'n, llaktit xhara'n be'nn ka' kwis. ⁵Blleb no'r ka', na' bche'k xhib ake' llwia akte' rao yore, na'll goll be'nn ka! leake!:

—To be'nn ban, ¿bixchen llayirjzre' radj be'nn wat ka'? ⁶Nollno xhoa ganni, ba babane'. Lelljadinra'll kan' nna zorente' re' gan' nzi'i Galilea na', ⁷bne'e dekz de gake' rallna'a be'nn ka' llwie Le'en, na' got ake' Le'e le' yay cruzen', na' wayónn lla yebane'.

⁸Na'll jadinra'll no'r ka' xti'll Jesúsen'. ⁹Na' baza'a ake' lloa' ban', jatixjwe' akre' be'nn chnej ka', na' ren be'nn ka' nak leake' txhen. ¹⁰Ki re no'r ka': María be'nn Magdala, Xhuan, na'll María xhna' Jacobo, na' ye to chop no'r yobre, leake'n bdixjwe' akre' postl ka'. ¹¹Na' be'nn chnej ka', llak akre' bi di'll ke nxhian' lloe' no'r ka', na' bi byejle' ake'.

¹²Na' Pedron' bzolla'doe' byeje' jawie' ban', na' ka blline'n, ra'llen' bchel ake' Jesúsen', na'ze xhoan, na' baze'e llabanre' ka dan' bre're'n.

Jesúsen' broe'rawe' chop be'nn ka' non Le'e txhen

(Mr. 16:12-13)

¹³Lekze lla na', chop be'nn ka' bnao Le'en, zjake' to yell re Emaús, na' Emaúsen' llgo'nnen ka chonn hor nez sa'llo Jerusalén na'. ¹⁴Zjake' lloe' ake' di'll ke da ka' goken. ¹⁵Chak zjak ake' lloe' ake' di'llen' ka', kate bllin Jesúsen' jabi'ye' kwit ake'n, na' zejrene' leake' txhen. ¹⁶Na' chaokze ben Diosen' nench bi wayombia' akre' Le'e, la'kze llwia akte' Le'e. ¹⁷Na'll lle'e leake':

—¿Bi di'llen' lloe're chak yo're nezen'? ¿Bixchen zoya'chre?

¹⁸To be'nnen' re Cleofas, lle'e Le'e:
—¿Bixha tozo' rwe' nako' be'nn
zi't zo'o Jerusalén na', bi bnnezro'
bi gok do nej nnase?

¹⁹Na'll lle'e leake':

—¿Bixha gok?

Na! bne ake!:

—Dan' gok ke Jesús be'nn Nazareten', goke' to be'nn be'e xti'll Dios. Be'nn yell bayakbe'e akre' xti'lle'n nsa'n yel wak, na' yeolol dan' bene'n, bene'n kon ren yel wak ke Dios. ²⁰Na' bxoz wnebia' ka', na' be'nn ka' llnebia' neto', ben ake' Le'e rao na'a be'nn ka' llwie Le'en, na' bchoybia' ake' llaya'l gate', na'll bda'a ake' Le'e le' yay cruzen'. San Lucas 24

²¹Neto' lláketo' Le'en gakrene' Israelen', nench bill nnebia' be'nn zi't ka' len. Na' nna' ba zejzen da wyonn lla gok ka'. ²²Na' leska' llabáneto' ka di'llen' lloe' no'r ka' non neto' txhen na', byej ake' be'e bale, ka za cheni' gan' bkwa'ch ake' Le'en. ²³Na' bill bre'e akre' kwerp ke'en, na' ne ake' bre'e akre' angl ak, na' goll angl ka' leake' nbankze'n. ²⁴Na'll bal be'nn byio ka' nakto' txhen na', byej ake' lloa' ban', na' doxhen kan' ne no'r ka', ka' nakten nono Jesúsen' bre'e akre'.

²⁵Na'll goll Jesúsen' leake':

—iYichj war kwis nakre, bi llejle're dan' bzoj be'nn ka' be'e xti'll Diosen' kana'! ²⁶¿Kere llian, zga'tek wallayrao Criston', na'tellen' wroe're' yel llnebia' ke'en?

²⁷Na' bzorao llroe're' leake' xti'll Diosen' gan' llian lloe'n di'll ke Le'e. Bxhi'zen yich dan' bzoj da Moisésen', na'll dan' bzoj be'nn ka' be'e xti'll Diosen' kana', bzorao llroe're' leake'.

²⁸Na' llakte ka'n, kate bllin ake' yellen' gan' zjake'n, na' Le'en bene' ka be'nn zej ye ra'te zi'tre. ²⁹Na' go'tyoe akre' Le'e, nench ga'yrene' leake', lle ake' Le'e:

—Go'yrén neto', ba wlle' nna', la galte.

Na'll go'yrene' leake'. ³⁰ Bixha gok, ka blle' ake' gan' gao ake' na', bxhie' yet xtiren', na' be'e yel llioxken ke Dios, na' bxhoxhje'n be'en leake'. ³¹ Kana'll gok ake' ka be'nn baxha' rao, bayombia' akre' Le'e. Na' Le'en to baranze' rao ake'n, bill bre'e akre' Le'e. ³² Na'll lle lwelli ake':

—To llawé ra'llda'ollon' ke nak za'llo tnezen', llroe're' lli'o kwasro xti'll Diosen'. ³³Na' ne akte' ka' baza'do ake' zayej ake' Jerusalén na', ka' ballín ake' gan' lla'a be'nn chnej ka', ren be'nn ka' yela'. ³⁴Na' goll be'nn chnej ka' leake':

—Da likzen' babán Xanllon', ba broe'rawe' Simón na'.

³⁵Na' be'nn ka' chop, leska' be'e ake' di'll kan' gok zjake' tnezen', na' kan' gok ka bxhoxhje' yet xtir na', bayombia' akre' Le'e.

Jesúsen' broe'rawe' be'nn ka' non Le'e txhen

(Mt. 28:16-20; Mr. 16:14-18; Jn.20:19-23)

³⁶Na' lla'a akte' lloe' ake' di'llen', kate bllinkze Jesúsen' jase'e kllol ake'n, na' bwape' leake' lliox, bne'e:

—Cha'chga re' wen.

³⁷Blleb ake' kwis, na' llabán akre', llak akre' cha' llre'da'o akre'n o cha' bxen na' llre'e akre'. ³⁸Na' lle'e leake':

—¿Bixchen llebre? ¿Bixchen llakgánere? ³⁹Lewiá ta'ka' ni, na' nia'n, nadkza'n. Lekán nada', ke nak to bxen, bill naken de llit, na' be're kan' naka' nada'n.

⁴⁰Ka ne'e ka'n, llroe'tere' leake' nie'n na' ta'ke'n. ⁴¹Na'll bawé akre' kwis, to llon ake' ka be'nn bi llejle', na' llabán akre' kwis, na'll Jesúsen' lle'e leake':

—¿Bi de ra't da gawa'?

⁴²Na'll be'e ake' Le'e ra't belya', na' ra't chi'xh beser. ⁴³Llwia akte' bdawe' da ka'. ⁴⁴Na'll lle'e leake' da yobre:

—Ka' bnetekza' kan' nna zorena' re', dekz de gak kia' kan' nyoj le' ley dan' bzoj da Moisésen', na' dan' bzoj be'nn ka' be'e xti'll Diosen' kana', na' dan' llia le' yich ke Salmos ka'.

San Lucas 24 160

⁴⁵Na'll bene' nench byejnie' akre' xti'll Diosen'. ⁴⁶Na' bne'e:

—Gok kan' nyojkze gak ke Criston', yellayrawe', na' gate', na' yebane' wayónn lla. ⁴⁷Na'tellen' llaya'l nneze be'nne xti'lle'n, si'zen Jerusalén na', llinte doxhen yellrio nnez akre' llaya'l wayat akre', yebi'ra'll ake' nench yezi'xhen Diosen' ke ake'. ⁴⁸Na' re' llaya'l we're di'll ke doxhen da ki ba goken. ⁴⁹Na' wse'la' Spíritu ke Diosen', cho'n lo yichjra'llda'ore, le ka'n bcheb Xa'n. Jerusalén na'ze cha're.

kwexhre llinte lla si're yel wak da za'a yebá.

Jesúsen' bayepe' yebá

(Mr. 16:19-20)

⁵⁰Na' bchach Jesúsen' leake' Jerusalén na', bllin akte' Betania, na' blis ta'ke'n benla'ye' leake'.
⁵¹Bayoll benla'ye' leake'n, na'
bayepe' zayejte' yebá, bazi'i Diosen'
Le'e. ⁵²Na' be'rao ake' Le'e. Bayoll na', zayej ake' Jerusalén na', llawé akre' kwis.
⁵³Na' bzeteze bze ake' yoda'o braon' lloe'rao ake' Diosen'.
Ka'n gakchga.

DI'LL WEN DAN' BZOJ SAN JUAN

Jesucristo be'nn nzi'i Di'lle gorje' goke' be'nnach

Kan' bxhete yellrion', ba zokze be'nnen' nzi'i Di'lle, na' zorenkze' Dios na', na' Lekze'n Diosen'. ²Ba zorenkze' Diosen' kan' bxhe yellriote. ³Le'en bene' yeolol da de. Bibi de, da bxhe to wrazze da bi ben be'nnen' nzi'i Di'll. ⁴Le'en nse'e yel nban, na' yel nban ke'e na', naken ka to beni' dan' nseni' yichjra'llda'o yeolol be'nnach. ⁵Beni'n nseni'n gan' nak xchole, na' da xcholen' bi bzoen wkwe'jen beni' ke'en.

⁶Bzo to be'nn re Juan, na' bse'l Diosen' le'e. ⁷Juan na' be'e di'll ke be'nnen' nsa'a beni' na', nench byejle' yeolol be'nnach ke'e. ⁸Kere Juan na'n nak be'nnen' nsa'a beni'n, badeze' di'll ke be'nnen' nsa'a beni' ke yichjra'llda'o be'nnachen'. ⁹Ba bllin lla bra' beni' dan' nak dogarje, ba bra'n yellrio ni, nench wseni'n yichjra'llda'o noteze be'nne.

10 Be'nnen' nzi'i Di'll ba zokze' yellrio ni. La'kze Le'en bene' yellrion', be'nn ka' lla'a yellrio ni, bi gokbe'e akre' noxhan' nake'.

11 Gorje' radj be'nn wrall ke'e ka', na' zan be'nn wrall ke'e ka', bi

byejle' ake' ke'e. ¹²Bal akze' byejle' ake' ke'e, na' be'nn ka' llonlira'll Le'en, bene' nench nak ake' xhi'nn Dios. ¹³Na' kere nnello nak ake' xhi'nn Dios dan' gorj ake' ni't xaxhna' ake' na'zen'. Na' lekze kere nak ake' xhi'nn Dios, dan' bzorén to be'nn byio to no're na' bzo xhi'nn ake'n, na' leska' kere dan' go'ne be'nn byio so xhi'nne' na'n; zan dan' benlira'll ake' Le'e na', na'llen' non Diosen' leake' ka xhi'nne'.

¹⁴Na' be'nnen' nzi'i Di'll gorje' goke' be'nnach, na' bzorene' neto'. Na' bre'to' nake' to be'nn za'k xhen kwis, le toze Le'en nake' dogarje Xhi'nn Diosen', nllie're' lli'o be'nnach, badzejnie're' lli'o di'll li ke Diosen'. ¹⁵Juan na' be'e di'll ke'e, bne'e:

—Di'll ke be'nn nin' badia' kan' bnia'n: "Be'nnen' za za'a, za'klle' ka nada', le ba zokze Le'en kan' bi nna soa' nada'."

¹⁶Le'en nllie're' lli'o kwis yeolol lli'o llonlira'll Le'e, zokze' llakrene' lli'o. ¹⁷Le da Moisésen' bzejnie're' ley ke Diosen' da xozxta'ollo be'nn Israel ka', na' Jesucriston' be'nnen' bed na', badroe're nllie' Diosen' lli'o be'nnach, na' badzejnie're' lli'o di'll li ke Diosen'. ¹⁸Nono zo be'nn ba

San Juan 1 162

bre're' Diosen', toze Xhi'nne' ti'ch na', be'nnen' nak dogarje Xhi'nn Dios be'nnen' zeteze ze'e kwite', Le'en ba bzejnie're' lli'o be'nnach, kan' nak yichjra'llda'o Xallo Diosen'.

Juan be'nnen' bchoa be'nne nis be'e xti'll Jesúsen'

(Mt. 3:11-12; Mr. 1:7-8; Lc. 3:15-17)

¹⁹Na' be'nn ka' llnebia' be'nn Israel ka' lla'a Jerusalén na', bse'l ake' to chop bxoz ka', na' ye bale be'nn gorje rao dialla da Leví, be'nn llakrén bxoz ka', nench jannab akre' Juan na' noxha le'e. ²⁰Na' golle' leake' lixheje:

—Kere nada'n Criston' be'nnen' bexhllo yeden'.

²¹Na'll lle ake' le'e:

—¿Noxha rwe' cha'? ¿Rwe'n Elías be'nnen' be'e xti'll Dios kana' cha'? Na'll lle'e leake':

—Kere nadkza'n.

Na'll bnnab akre' le'e da yobre:

- —¿Rwe'n nako' be'nnen' yedtixjwe' neto' xti'll Dios cha'? Na'll golle' leake':
 - —Kere nada'n.
 - ²²Na'll bnnab akre' le'e da yobre:
- —¿Noxha rwe' cha'? Nench yeto' be'nn ka' bse'l neto' ka'. ¿Bixha nekzo' ke kwino'?
 - ²³Na'll goll Juan na' leake':
- —Nada'n naka' be'nn nne zillj to latj dach, nia': "Lewasarj to nez li gan' te Xanllon!", kan' bne da Isaías be'nnen' bdixjwe' xti'll Diosen' kana'.

²⁴Na' be'nn ka' jak rao Juan na', be'nn fariseo ake'n bse'l leake'.

²⁵Na'll lle ake' le'e:

—¿Bixchen llchoa'o be'nne nis, cha' bi nako' Cristo, na' ni ke nakzo' Elías, na' ni be'nnen' bexhto' yed yedye'e xti'll Dios na'?

²⁶Na'll lle Juan na' leake':

—Nada' llchoa' be'nne nis, zan radjre na', ba zo to be'nne bi nna gombia're. ²⁷Le'en za wroe'rawe' re', na' za'klle' ka nada', na' dan' nake' be'nn za'k na', ni ke za'kza' nada', ni jeze xhere' ke gak wlechja'.

²⁸Yeolol da kin' gok gan' nzi'i Betábara, dan' lli' chla' yeo Jordán gan' llchoa Juan na' be'nn ka' nis.

Jesúsen' nake' ka xhi'r da'o ba llot be'nn Israel ka' nench llazi'xhen Diosen' ke ake'

²⁹Na' bateyó bre'e Juan na', zej Jesúsen' gan' ze'e na', na'll lle Juan na' be'nn ka' nao le'en:

—Lewiá ke ganni za'a be'nnen' ba brej Diosen', nench yedke'e xto'l be'nnach. Be'nn nin' nake' ka xhi'r da'o ba llot lli'o be'nn Israel, nench llazi'xhen Diosen' ke xto'l-llo. ³⁰Ke Le'en bia'a di'll, bnia': "Be'nnen' za za'a za'klle' ka nada', na' Le'en ba zokze' ka bi nna soa' nada'." ³¹Na' bi bnnezra' noxhan' nake', bixha Dios na' bzejnie're' nada', ke len na' za'a zadchoa' be'nne nis, nench nneze yeolol be'nn Israel ka' noxhan' nake'.

32 Leska' bne Juan na':

—Bre'ra' betj Spíritu ke Diosen' yebán', bllinen gan' zo Jesúsen'. Bllinen naken ka to plom da'o, na' baga'nnrenen Le'e. ³³Nada' bi gokbe'ra' cha' nake' be'nnen' bse'l Dios, Dios be'nnen' bse'l nada' llchoa' be'nne nis golle' nada': "Nna' re'kero' ka yetj Spíritu kia'n, na' yega'nnrenen be'nnen' ba nbeja' na'. Le le'en nake' be'nnen' wzo Spíritu

kia'n lo yichjra'llda'o be'nne." ³⁴Na' ba bre'ra' ba gok kan' bne'e na', na'llen' lloa' di'll, be'nn nin' Xhi'nn Diosen'.

Be'nn nell ka' brej Jesúsen'

³⁵Bateyó da yobre zerén Juan na' ye chop be'nn ka' nao Le'en. ³⁶Ka bre're' bde Jesúsen', na'll lle'e be'nn ka':

—Lewiá ke be'nnen' bse'l Diosen', be'nn na'n nake' ka xhi'r da'o ban' llot lli'o be'nn Israel, nench llazi'xhen Diosen' da xhinnj ka' nonllo.

³⁷Na' be'nn chop ka' nao Juan na', ka ben akre' kan' bne'en, na'll zjakdoe' jannao ake' Jesúsen'. ³⁸Ka bayechj Jesúsen' llwie' nao ake' Le'en, na'll lle'e leake':

—¿Bixhan¹ lle¹nere?

Na'll lle ake' Le'e:

—Rabí (lle'nen nen be'nn llzejnie' be'nne), ¿gaxhan' zo'o?

39 Na'll golle' leake':

—Lecho'o na' re'kere.

Na'll byejrén ake' Le'e, na'll bre'e akre' gan' zoe'n, na'll baga'nnrén ake' Le'e rao lla na', le ba nak ba wlle', ba llonen ka do lladá tap.

⁴⁰Na' be'nn chop ka' bzenay xti'll Juan na', bnao ake' Jesúsen', toe' re Andrés, bi'ch Simón Pedron'. ⁴¹Na'll Andrés na', le jadirjte' bi bi'che'n re Simón na'. Na'll lle'e le'e:

—Ba ballayto' be'nnen' ne ake' Mesías. (Na' Mesías na' lle'nen nen Cristo.)

⁴²Na'll bche'e Andrésen' be'nn bi'che'n gan' zo Jesúsen'. Na' ka bre'e Jesúsen' Simón na', na'll lle'e le'e:

—Rwe'n Simón xhi'nn Jonás, rwe' wsi'to' Cefas. (Na' Cefas na' lle'nen nen Pedro.)

Jesúsen' breje' Felipen' ren Natanael

⁴³Bateyó bayej Jesúsen' Galilean', na' jadi're' Felipen', na' lle'e le'e:

-Cho' ren nada'.

⁴⁴Felipen' nake' be'nn yellen' nzi'i Betsaida gan' nak rall Andrésen', ren Pedro na'. ⁴⁵Na' Felipen' jawie' Natanaelen', na'll lle'e le'e:

—Ba bre'to' be'nnen' bzoj da Moisésen' xti'lle' le' leyen' kana', na' lekze xti'll Le'en bzoj be'nn ka' bdixjwe' xti'll Diosen' kana'. Le'en Jesús be'nn Nazaret, xhi'nn José.

⁴⁶Na'll Natanaelen' bne'e:

—¿Wllojrize da wen Nazareten' lla?

Na'll lle Felipen' le'e:

—Cho' ke re'ro'.

⁴⁷Ka bre'e Jesúsen' ba zej Natanaelen' gan' ze'e na', na'll bne'e:

—Ganna' za'a to be'nn nak dogarje be'nn Israel, ni ra't bi nake' be'nn wxhiye'e.

⁴⁸Ka bene Natanaelen' kan' ne Jesúsen', na'll lle'e Le'e:

—¿Akxha gok nombia'o nada'? Na'll lle Jesúsen' le'e:

—Bre'ra' rwe' kan' ze'o xhan yay higon', kan' za nne Felipen' rwe'.

⁴⁹Na'll ne Natanaelen':

—Maestro, rwe'n nako' dogarje Xhi'nn Dios. Rwe'n nako' be'nnen' bexhto' yednnebia' rall-llo Israelen'.

⁵⁰Na'll lle Jesúsen' le'e:

—¿Dan' nia' bre'ra' rwe' xhan yay higo na'n, na'llen' llejle'o kia'? Za re'llro' da za'kll ye ra'te.

51 Leska' bne'e:

—Di'll li, di'll li nia' re': Nna' re're le' yebán' gan' zo Diosen' gaken ka to da yarje, na' be'nn ka' nak angl

San Juan 1, 2 164

ke'e ka', chep chetj ake' gan' zoa' nada'n Be'nn Gorj Radj Be'nnach.

To yel wachayna'a da gok yell gan' nzi'i Caná

Bayónn lla go't to yel wachayna'a yell gan' nzi'i Caná gan' nbane Galilea. Na' xhna' Jesúsen' byeje' gan' gok yel wachayna'n. ²Na' leska' goxh ake' Jesúsen', na' ren be'nn ka' non Le'en txhen na'. ³Na't babillkze xis uvan' lle'j ake' gan' llak lnnin', na'll xhna' Jesúsen' golle' Le'e:

—Billbi xis uva ke be'nn ka' de.

⁴Na'll lle Jesúsen' le'e:

—¿Bixchen ne'o ka'? Rencha' bi nna llin lla wroe'rawa'n.

⁵Na'll lle xhne'en be'nn ka' dá llwia bi da yallj rao lnni na':

—Legón kon bin' ne'e na'.

⁶Na' zjazó xop ye's de yej, ga llga'a ake' nis da llonrén be'nn Israel ka' llin da llayib kwin ake' kon kan' llia le' ley na'. Na' toto ye's ka' lloll aken do chop chonn lle' nis. ⁷Na'll goll Jesúsen' be'nn ka' dá llwia bi da yallj rao lnni na':

—Leyeslla'a nis lo ye's ka'. Na'll bda'a ake'n nis balla'a akten. ⁸Na'll lle'e leake':

—Lega'ch ra'ten', na' lewe'n be'nnen' nak rallna'a lnni na'.

Na'll ben ake' kan' bne'e na'. ⁹Na' be'nnen' nak rallna'a lnnin' kon bnixe'n, na' bi nnezre' ga za'n, kon be'nn ka' dá llwia bi da ka' yallj rao lnni na'ze, nnez akre' nisen' bayak xis uvan', le leake'n go'ch ake' nisen'. Na' be'nnen' bnix len na', goxhe' be'nn byion' llchayna'n, ¹⁰na'll lle'e le'e:

—Yeololte be'nn ka' llon lnnin', llde ake' xis uva cha'on ka zorao

lnni na', na' kat ba we'j ake' da xhen, na'll zorao ake' llde ake' xis uva da bi naktek wen na'. Na't rwe' nza'yo' xis uva cha'on, llde'on nna'll ba llayoll lnnin'.

¹¹Ka'n ben Jesúsen' yell Canán' gan' nbane Galilean', goken yel wak nell dan' bene' nench broe're' nake' be'nn za'k xhen, na' benlira'll be'nn ka' non Le'e txhen na' Le'e.

¹²Bde na', byeje' gan' nzi'i Capernaum ren xhne'e na', ren bi'che' ka', na' ren be'nn ka' non Le'e txhen na', na' na'ze go'y ake' to chop chonn lla.

Jesúsen' bachache' be'nn ka' llon ya'a lia' yoda'on

(Mt. 21:12-13; Mr. 11:15-18; Lc. 19:45-46)

¹³Na' ba zo ga'l lnni Paskw ke be'nn Israel ka', na' byej Jesúsen' Jerusalén na'. ¹⁴Ka blline' lia' yoda'o braon', be'nn zan zjalla'a llo't ake' no bell, no xhi're, no plom, ba llonrén ake' llin kat llayoe'xhen ake' Dios, na' zjalli' be'nn llcha'a ak mell. ¹⁵Ka bre'e Jesúsen' kan' llaken, na' bene' to sot nench bachache' yeolol be'nn ka' zjalla'a lia' yoda'on, yeolol no bell ka' llo't ake'n, no xhi'r ka' ren be'nn ka' llcha'a mell ka', bese' xhmell ake'n rao yo, na' bllo'nne' gan' nkwa'a ake' xhmell ake'n. ¹⁶Na'll golle' be'nn ka' llo't plomen':

—Leyechach yeolol ba ki ganni. Bi gonre ya'a rill Xa'n.

¹⁷Na'll jadinra'll be'nn ka' non Le'e txhen na', kan' nyoj xti'll Diosen' gan' nen: "Dan' lli' yichja' kwis ke rillo'n za'kzia'."

¹⁸Na' be'nn Israel ka' llasné ake':

—¿Bi yel wak wroe'ro' neto', nench chejle'to' ko'o za'ko' bachacho' be'nn ka'? ¹⁹Na'll balli'i Jesúsen' xti'll ake'n, lle'e leake':

—Leyechinnjchek yoda'o ni, na' chonn llaze wayontia'n.

²⁰Na'll be'nn Israel ka', goll ake' Le'e:

—Xopayon (46) iz blle akre', ka ben ake' yoda'on. ¿Na' rwe' wayonchko'n chonn llaze?

²¹Bixha Jesúsen' kwine'n bsa'kre' yoda'on bne'e ka', na' llake leake'n cha' yoda'o na'kzen' ne'e ka'. ²²Na' ka bllin lla babane' radj be'nn wat ka', be'nn ka' non Le'e txhen na', jadinra'll ake' kan' bne'en, na'll byejle' ake' xti'll Diosen' dan' nyoj ke'e na', leska' benlira'll ake' xti'll Jesúsen'

Jesúsen' nnéztere' bi yo' lo yichjra'llda'o toto be'nnach

²³Na' chak zo Jesúsen' lnni Paskwn' Jerusalén na', be'nn zan bre'e akre' yel wak ka' bene'n, na'll byejle' ake' ke'e, nakse' be'nn bse'l Dios. ²⁴Bixha Jesúsen' bi gotra'llteke' radj be'nn ka', le nombie' yichjra'llda'o ake'n. ²⁵Bi byalljre' no ye Le'e bi xhbab yo' lo yichjra'llda'o be'nn ka'. Kwinkze' nnezre' bin' yo' lo yichjra'llda'o toto be'nnach.

Jesúsen' ren Nicodemo

Bzo to be'nn fariseo be'nn golle Nicodemo. Goke' to be'nne wnebia' ke yell Israelen'.

Byeje' rao Jesúsen' tlle'lre, na' lle'e Le'e:

—Maestro, nnézeto' bse'l Diosen' rwe' nench wzejnie'ro' neto', le nono gak gon ka yel wak ka' llono'n, cha' bi zorén Diosen' le'e.

³Na'll lle Jesúsen' le'e:

—Di'll li, di'll li nia' rwe', cha' non' bi yeyarje' ye to, bi gak re're' Diosen' gan' llnebie'n.

⁴Na'll lle Nicodemon' le'e:

—¿Akxha gon to be'nne yeyarje' ye to, cha' ba nake' be'nn gore? ¿Waklle yeyoe' lo le'e xhne'en, na' yeyarje' ye to?

⁵Na'll goll Jesúsen' le'e:

—Di'll li, di'll li nia' rwe', cha' non' bi yeyarje' ren nis, na' ren Spíritu ke Diosen', bi gak lljazoe' gan' zo Diosen' llnebie'. ⁶Be'nn llarje' rao dialla be'nnach, lekze be'nnachkze le'e. Na' be'nn llarje' rao Spíritu ke Diosen', le'en de yel nban dan' lloe' Spíritun' le'e. ⁷Bi yebanro' dan' bnia': "Llonen bien yeolol be'nne de yeyarje' ye to." 8Kat llechj be', llechjen gateze, na' llenro' llolyoyen, na' bi nnezro' ga za'n, na' ni ke nnézzero' ga zejen. Ka'kzen' naken ke yeolol be'nn ka' llon Spíritu ke Diosen' nench llayarj ake' ye to da vobre.

⁹Na'll lle Nicodemon' Le'e:

—¿Akxha gak kan' ne'o ni?

10 Na'll lle Jesúsen' le'e:

—Rwe' llzejnie'ro' be'nn Israel ka' xti'll Dios, ¿bi llejnie'ro' da ki? ¹¹Da li neto' llyixjwe'to' da nnézeto', na' lloe'to' di'll ke da ba bre'to', na' bi llejle're. ¹²Ba bia'a di'll dan' llak yellrio ni, na' bi llejle're. ¿Akxha gakrize chejle're chenak nia' re' dan' llak yebá na'?

13'Notno nna wayep yebán', toze nada' za'a yebán' naka' Be'nn Gorj Radj Be'nnach. 14 Kan' gok latj dachen' kana', kan' ben da Moisésen' to bel de ya cha'on nzi'i bronce, na' bde'eba' to le' yay, ka'n San Juan 3 166

llaya'l gak wda'a ake' nada' to le' yay, nada' Be'nn Gorj Radj Be'nnach. ¹⁵Ka'n gak kia' nench noteze be'nn gonlira'lle nada' bi kwiayie', na' ga't yel nban zejlikane ke'e.

Nllie' Diosen' be'nnach

¹⁶ 'Ka'n nllie' Diosen' lli'o be'nnach, na'llen' bse'le' Xhi'nne' ti'chen' nench noteze be'nne gonlira'lle Le'e bi kwiayie', na' ga't yel nban zejlikane ke'e. ¹⁷ Diosen' bi bse'le' Xhi'nne'n yellrio ni, nench gone' da wsa'kzi' be'nnach, zan bse'le' Le'e nench yesre'e leake' rao da xhinnj ke ake'n.

¹⁸'Noteze be'nne gonlira'll ake' Xhi'nn Dios be'nn ti'ch na', bi vellavrao ake' ke do'l ke ake'n, na' be'nn ka' bi gonlira'll ake' Le'e, ba nlloyen ke ake' sa'kzi' ake' ke chnare, le bi llonlira'll ake' Xhi'nn Dios be'nn ti'ch na'. 19 Kan' naken, ke be'nn ka' bi llonlira'll Xhi'nn Diosen', ba nlloyen ke ake', sa'kzi' ake' ke chnare, le ba bed Xhi'nn Diosen', nse'e beni' ke yichjra'llda'o be'nnach, bixha leake' na'n, llawé akllere' dan' nak da xcholen' kerke beni'n, le da ka' llon ake' na', naken da xhinnj. ²⁰ Yeololte be'nn ka' llon da xhinnjen', llwie akre' beni' ke'en, na' bi llazra'll ake' wzenay ake' ke'e, nench ke wroe'rawe da xhinnj ka' llon ake'n. ²¹Zan be'nn ka' llon kan' llia di'll li ke Diosen', llawé akre' lljabi'y ake' gan' nseni' beni' ke Diosen', len llroe'n zokze Diosen' llakrene' leake', nench llon ake' kan' llia di'll li ke'e na'.

Juan be'nnen' bchoa nis be'e di'll ke Jesúsen'

²²Bde na' byej Jesúsen' ren be'nn ka' non Le'e txhen na', yell da'o ka' zjalli' do gan' nbane Judean', na' chak zo ake' na', bchoe' be'nne nis. ²³Na' leska' bchoa Juan na' be'nn ak nis yell gan' nzi'i Enón dan' lli' kwitze Salim, le na' de nis xhen, na' jak be'nn ka' gan' bzoe'n nench bchoe' leake' nis. ²⁴Ka'n gok ka bi nna ko' ake' Juan na' rill ya.

²⁵Na' be'nn ka' nao Juan na', go'd di'll lwellj ake' ren be'nn Israel ka', akren' llaya'l gon be'nne nench yeyak ake' xhira'll rao Diosen'. ²⁶Na'll byej ake' rao Juan na', na' lle ake' le'e:

—Maestro, be'nnen' bzo ren rwe' ye chla' yeo Jordán na', be'nnen' lloe'o xti'll na', ba llchoe' be'nne nis, na' yeololze be'nne lljake' gan' zoe'n.

²⁷Na'll lle Juan na' leake':

—Bibi yedo'l be'nnachen' cha' bi we'e Diosen' len. ²⁸Nnézkzere kan' ba bnia'n, kere Cristo na', nada', be'nnen' bse'l Diosen' yednnebie' lli'o. Zan nada' naka' be'nn bse'l Dios nench blliarawa' badia' xti'lle'n. ²⁹Kat llak to yel wachayna'a, toze be'nn byio na' zi'i no'ren'. Na' be'nnen' nak txhen be'nn byion' llchayna'n zerene' le'e, llawere' ka nak llzenaye' kan' ne be'nnen' llchayna'n. Kan' llakra' nada', llawera' kwis. ³⁰Le Le'en llaya'l chejlle' gon be'nne Le'e xhen, na' nada' llaya'l yeyexja'.

Be'nn za'a gan' llia Dios

³¹Leska' bne Juan na':

—Ka nak Criston' be'nnen' za'a gan' llia Diosen', Le'en nake' be'nn zaklle ka yeolol be'nne. Na' be'nnach nak be'nn ke yellrio nize, di'll da de yellrio ni lloe'. Na' be'nnen' za'a gan' llia Dios na', za'klle' ka veolol be'nne. 32 Le'en lloe' di'll ke dan' ba bre're'n, na' di'll ke dan' ba benre' gan' llia Diosen', na' nono llzenay xti'lle'n. 33 Na' be'nnen' llzenay xti'll be'nnen' za'a vebá na', le'en llroe're' lloe' Diosen' di'll li. 34 Be'nnen' bse'l Diosen', lekze'n lloe' xti'll Diosen', le Spíritu ke Dios na' zerenen Le'e, na' kat Diosen' we'e Spíritu ke'en, bi llyise' ra't wejen. 35 Diosen' nllie're' Xhi'nne' Criston', na' ba bene' rallne'e yeolol bi da de ke'e. ³⁶Na' be'nn ka' llonlira'll Xhi'nn Diosen', de yel nban zejlikane ke ake', zan be'nn ka' bi llzenay ke Diosen', bibi yel nban ke be'nn ka' ga'te, le Dios na' gone' sa'kzi' ake' ke chnare.

Jesúsen' be'rene' to no'r Samaria di'lle

Na'll Jesúsen' gokbe're' ba bnneze be'nn fariseo ka', na' ne ake': be'nn zanll nao Jesúsen', na' be'nn zanlle llchoe' nis ka be'nn ka' llchoa Juan na' nis, ²(la'kze kere kwin Jesúsen' bchoe' be'nn nis, be'nn ka' non Le'e txhen na', llchoa' ake' nis). ³Na'll ka bnneze Jesúsen' ka', baze'e Judean' bayeje' Galilea.

⁴Na' dekze de yedie' Samaria na'le. ⁵Ka goken balline' to yell da nzi'i Sicar ga nbane Samaria, to yell da lli' kwitze gan' de yellrio dan' be'e da Jacoben' xhi'nne' Josén'. ⁶Ganna' llia to bej da nake zitj kwis, dan' nzi'i Bej ke da Jacob. Ka do wawillen' ba lljaxa'ke Jesúsen' zayoe' nez, na' jallie' lloa' bejen'.

⁷Ka bllin to no'r Samarian' lloa' bejen' zjaxie' nis. Na'll lle Jesúsen' le'e: —Benn ra't nis ye'ja'.

⁸Na' be'nn ka' non Le'e txhen na', zjake' lyell zjaxi'i ake' da gaorén ake' Le'e. ⁹Na'll lle no'r Samarian' Le'e:

—¿Bixchen llnnabzero' nada' nis ye'jo', le be'nn Israel rwe', na' no'r Samaria nada'?

(Le be'nn Israel ka', bi llalwill lwellj ake' ren be'nn Samaria ka'.)

10 Na'll lle Jesúsen' Le'e:

—Nada' nia' ka': "Benn ra't nis ye'ja'", na' chenak llayakbe'ro' dan' lle'ne Diosen' gonne' rwe', na' wayakbe'ro' noxha nada', na' ba bnnabro' nada', na' benna' rwe' nis dan' llonn yel nban zejlikane chenake.

¹¹Na' no'ren' lle'e Le'e:

—Be'nne, bi no'xo' da ga'cho'n le nak bejen' zitj. ¿Gaxha si'o nis dan' llonn yel nban na', ne'o ka'?

12 ¿Llakro' za'kllo' ka da xozxta'ollo Jacoben', be'nnen' bkwa'nnrén neto' bej ni, gan' we'jrén xhi'nne' ka' nis, na' ren no bayi'x ke'e ka'?

¹³Jesúsen' lle'e le'e:

—Noteze be'nne ye'j nis ke bej ni, dekze bilre' da yobre. ¹⁴Na' noteze be'nne ye'je' nis dan' we'e nada', chras bill bilkzere', le dan' we'e nada'n gaken lo ra'llda'we' ka to latje ga llra' nis, nench ga't yel nban zejlikane ke'e.

¹⁵Na'll lle no'ren' Le'e:

—Be'nne, bennchek nada' nisen' ne'o ka' nench bill yeda' yedxia'n gannite.

¹⁶Na'll lle Jesúsen' le'e:

- —Jalwill xhyi'o, na' darene' ganni.
- ¹⁷Na'll lle'e Jesúsen':
- —Notno xhyiwa' zo.
 Na'll lle Jesúsen' le'e:

San Juan 4 168

—Rennkzro' kan' bne'on nono xhyi'o zo, ¹⁸le ga'y be'nn ba bzoreno', na' be'nnen' zoreno' nna', kere xhyi'on. Da li kan' bne'on.

¹⁹Na'll lle no'ren' Le'e:

—Be'nne, llakzra' nakje'o to be'nne llayixjwe' bi da ne Dios. ²⁰Da xozxta'o neto' be'nne Samaria, bxenra'll ake' Diosen' rao ya'n zo ganni, na' re' nakre be'nn Israel, nere Jerusalén na'n llaya'l gonxhenlloe'.

²¹ Jesúsen' lle'e le'e:

—No're, byejle' kia', wllin lla kat bill yedre rao ya' nite, yedye'raore Xallo Diosen', ni Jerusalén na'. ²²Re' nakre be'nn Samaria bi nombia'va'nnre Dios be'nnen' lloe'raoren'. Zan neto' be'nn Israel, nombia'to' Dios be'nnen' nxenra'llto'n, na' radito' ni lloj to be'nn yebeje' be'nnach rao da xhinnj. ²³Wllin lla, na' nna' ba bllinen, kat be'nn gon Xallo Diosen' xhen dogarje, na' we'rao ake' Le'e kone yel wak ke Spíritu ke'en, na' we'rao ake' Le'e kan' llaya'le, le Xallo Diosen' llayirje' be'nne we'rao Le'e ki. ²⁴Diosen' nake' Spíritu, na'llen' be'nn ka' we'rao Le'en. llaya'l we'rao ake' Le'e kan' llaya'le kone Spíritu ke'e na'kze.

²⁵Na'll lle no'ren' Le'e:

—Nnezra' wed be'nn ba brej Diosen' be'nnen' nzi'i Mesías, Le'en Cristo, na' kate yede' na', yedzejnie're' lli'o yeolol da ki.

²⁶Na'll lle Jesúsen' le'e:

—Nada' naka' be'nnen' ne'o ka', na' lloe'rena' rwe' di'lle.

²⁷Nna lloe'rente Jesúsen' no'ren' di'll ka', ka ballindo be'nn ka' non Le'e txhen na' lloa' bejen'. Na' babán akre' lloe'rene' to no're di'lle, na' bitbi goll akse' Le'e bi di'llen' lloe'rene' no'ren', na' bixchen lloe'renze' le'e di'lle. ²⁸Na'll bkwa'nn lle' nis ke no'ren' na'ze, na' bayeje' yellen' jayelle' be'nn wrall ke'e ka':

²⁹—Lecho'ke wiare to be'nn ba golle' nada' yeolol da ba bena'. ¿Kere Le'en Criston' lla, be'nnen' ne ake' yeden'?

³⁰Na'll bllachdo ake' yellen' zjake' gan' lli' Jesúsen'. ³¹Na' chak zayej no'ren', be'nn ka' non Jesúsen' txhen na', lla'tyoe akre' Le'e, lle ake' Le'e:

-Maestro, bdao.

32 Na'll lle'e leake':

—De to yel wao kia' da bi nna gombia're.

33 Na'll lle lwellj ake':

—¿Kere no ba badwa'rize da bdawe'n lla?

³⁴Na'll lle Jesúsen' leake':

—Yel wao kia'n naken gona' kan' llazra'll Diosen', be'nnen' bse'l nada' nench gak yeolol da zera'lle'. 35 Re' nere: "Nna dell ye tap be'o yedop dan' gozllon'." Na' nada' nia', lewiá ke dan' naz ake' rao yellrio, ba byechen ba lle'nen yedopen. ³⁶Be'nn llon ka be'nn llon wrap, ba llone' llin nench ga't yel nban zejlikane ke be'nn llzenay xti'll Diosen'. Na' be'nn ka' llyixjwe' xti'll Diosen', na' rente be'nn ka' llon nench wzenay be'nn xti'lle' na', nni't ake' txhen nbaraz. ³⁷Di'll ni naken da li nen: "Be'nn yobre llaz na', na' be'nn yobre llarape." ³⁸Ba llse'la' re' lljarapre gan' bi gozre, le re' gonre wzenay be'nne xti'll Diosen' dan' ba bdixjwe' be'nn yobre.

³⁹Na' be'nn Samaria ka', zane' benlira'll Jesúsen' dan' ben akre' bne no'ren': "Ba golle' nada' yeolol da ba bena!." ⁴⁰Na'llen' bllin be'nn Samaria ka' gan' lli' Jesúsen', na' go'tyoe akre' Le'e yega'nnrene' leake', na'll baga'nnrene' leake' chop lla. ⁴¹Na' be'nn zanlle benlira'll Jesúsen' ka ben akre' di'll da ka' be'rene' leake'n. ⁴²Na'll lle ake' no'ren':

—Ba byejle'to' na', kere dan' béneto' xti'llo' na'zen', ba bénkzeto' lloe' kwine' di'lle, na' ba bnnézeto' Le'en Criston' be'nnen' yesrá be'nn ka' lla'a yellrio.

Jesúsen' bayone' to xhi'nn be'nn wnebia'

⁴³ Ka gok chop lla na', baza'a Jesúsen' Samarian' zjayake' Galilean'. ⁴⁴ Kwinkze Jesúsen' ba be'e di'll ne'e, noteze be'nne llyixjwe' bi da ne Diosen', bi llap be'nn wrall ke'e ka' le'e bara'nne. ⁴⁵ Ka ballín ake' Galilean', be'nn yell ka' bareb ake' Jesúsen', le ba bre'e akre' yeolol da wen na' bene' rao lnni Jerusalén na', le renkze leake'n jake' lnnin'.

⁴⁶Na' bayej Jesúsen' da yobre yell Caná, dan' lli' gan' nbane Galilean' gan' bene' bayak nisen' xis uva, na' yell Capernaum na', bzo to be'nn non reyen' rallne'e yel llnebia', na' llak xhi'nne'n yillwe'. ⁴⁷Ka benre' ba bllin Jesúsen' Galilean' zaze'e Judea, na'll byeje' jelle' Jesúsen' cheje' lljayene' xhi'nne'n, le ba lle'nen goten lebe'. ⁴⁸Na'll lle Jesúsen' le'e:

—Chenak bi llre're yel wak kia'n, bi chejle're kia'.

49 Na'll lle be'nnen' Le'e:

—Be'nne, yo'kero' chaga bi nna gat xhi'nna'n.

50 Na'll lle Jesúsen' le'e:

-Bayejdo, bi gat xhi'nno'n.

Na'll byejle' kan' goll Jesúsen' le'e, na'll baze'e. ⁵¹Ye ra'tz yelline' na'n, kat jatil be'nn wen llin ke'e ka' le'e, na'll lle ake' le'e:

-Ba bayakte xhi'nno'n.

⁵²Na'll bnnabre' leake' ka do bi hor bzorao bache'be', na'll lle ake' le'e:

—Neje lladá to bde wawill, ballachbe' da lan'.

53 Na'll llakre' ka hor na'kzen' goll Jesúsen' le'e bi gatbe'. Na'll benlira'lle' Jesúsen', le'e na', ren yeolol be'nn ka' lla'a rille' na'.

⁵⁴Da ni yel wak wllopen' ben Jesúsen' kan' zaze'e Judean', na' balline' Galilean'.

Jesúsen' bayone' to be'nn nat chla' nia'ne'e

5 Bde na' gok ye to Israel ka', na' byej Jesúsen' Bde na' gok ye to lnni ke be'nn Jerusalén na'. ²Kwitze gan' zo reyj ke ze'e dan' nechi yell na', dan' nzi'i Reyj ke Xhi're, ga llia to ga yoll nis da nzi'i Betesda, na' zjazé ga'y lchir nkwe'j kwite gan' yoll nis na'. ³Na' be'nn zan be'nn we'e, zjadé ake' lo lchir ka', no be'nn lchol, no be'nn nxhinnj nia', no be'nn nat nia'na'a ake', zjadé ake' bexh ake' batkren' chas nisen'. ⁴Le twej twejze kat lletj to angl, na' llte'e nisen', na' be'nn nellen' llado'l cho' lo nisen' llayoll llta anglen' len na', llayakte' biteze yillwe' da llake'. ⁵Na' de to be'nn ba gok chi'nchonnalloa (38) iz llake' yillwe'. 6Na' bre'e Jesúsen' le'e, na'

San Juan 5 170

gokbe're' ba gok scha de'e ka', na'll lle'e le'e:

—¿Lle'nro' wayako'?

⁷Na'll lle'e Jesúsen':

—Nono llra' ko' nada' lo nisen' katen' dan na'. Na' chak zya' na', le lldedote be'nn yobre lletje' lo nisen' llaga'nntia' ka'ze.

⁸Na'll lle Jesúsen' le'e:

—Byas na' batob gan' xhoa'on, na' badá.

⁹Na'll le bayakte be'nnen', na' bazie' gan' bxhoe'n, na' bzorao bade'e. Na' goken to lla nba'nne ka bi de latj gon be'nn Israel ka' llin. ¹⁰Na' be'nn wnebia' ke be'nn Israel ka', lle ake' be'nnen' bayaken':

—Lla nba'nn nna', bi de lsens yeyoa'o gan' bxhoa'on.

¹¹Na'll lle be'nnen' leake':

—Be'nnen' bayón nada' Le'en goll nada': "Batob gan' xhoa'o na' badá." ¹²Na'll lle ake' le'e:

—¿Noxhan' gollze rwe' ka': "Batob gan' xhoa'o, na' badá"?

¹³Na' be'nnen' bayaken', bi nnezre' non' bayón le'e, le Jesúsen' to banitze' radj be'nn zan ka'. ¹⁴Bdere badil Jesúsen' be'nnen' bayak lo lchir yoda'o braon', na' lle'e le'e:

—Ba bayako' nna', llaya'l kwej yichjo' bill gono' da xhinnj, nench ke gak ye to da zi'llore ko'o.

¹⁵Na'll baza'doe' jayelle' be'nn Israel ka', Jesús na'n bayón le'e. ¹⁶Na'll be'nn Israel ka', bzorao blle'nao ake' Jesúsen', na' llayirjla'll ake' akre gon ake' got ake' Le'e dan' llone' yel wak ka' lla nba'nne, kat bi de lsens gon be'nn Israel ka' llin. ¹⁷Na'll lle Jesúsen' leake':

—Xa'n zokze' llaraltezre', leska'kze nada'.

¹⁸Na'll llayirjla'll ake' akre gon ake' nench got ake' Jesúsen', kere ni ke dan' bi llone' kan' ne ley na', gan' llwa'len ke lla nba'nne na'zen'; dan' bne'e Diosen' nake' Xe'e, dan' zejen toze ka za'ke' ren Diosen'.

Yel llnebia' dan' nap Xhi'nn Diosen'

¹⁹Jesúsen' lle'e leake':

—Di'll li, di'll li nia' re': Bibi llak gona' to wrazza', kon da llre'ra' llon Xa' na'n, len na' llona' le naka' Xhi'nne'. ²⁰Le Xa'n nllie're' Xhi'nne'. na'llen' llroe're' nada' yeolol dan' llone'n, na' wroe're' nada' da za'klle ka da ki gone' nench yebánere. ²¹Kan' llon Xa' Diosen' llasbane' be'nne radi be'nn wat ka', ka'kzen' llona' nada' naka' Xhi'nne', lloa' yel nban ke noteze be'nne llbeja' nench ga't yel nban ke ake'. ²²Na' Xa'n bi llchoybie' ke to be'nn nape' do'le, zan ba bene' rallna' wchoybia' ke yeolol be'nnach cha' non' nap do'le. ²³Xa'n lle'nre' yeolol be'nne gone' nada' xhen, na' lekze ka'n llona' Le'e xhen, na' be'nn bi llone' nada' xhen, Xa' Dios na'kzen' bi llone' xhen le Le'en bse'l nada'.

²⁴'Di'll li, di'll li nia' re', kan' zjazén na': Be'nn llzenay xti'lla'n, na' llonlira'lle' Dios be'nnen' bse'l nada', de yel nban zejlikane ke'e, na' bi sa'kzi' ake' chras. Na' bill nak ake' ka be'nn wat lo yichjra'llda'o ake'n, le ba bakobe' yichjra'llda'o ake'n dan' ba llonlira'll ake' Le'en. ²⁵Di'll li, di'll li nia' re': Wllin lla kat be'nn ka' nat yichjra'llda'o ake'n, yen akre' xti'lla'n naka' Xhi'nn Dios, na' be'nn wzenay kia', wa't yel nban zejlikane ke ake', na' ka'n ba bzorao llak nna'. ²⁶Xa'

171 San Juan 5, 6

Diosen' nse'e yel nban zejlikane, na' leska' bene' nench nada' nsa'a yel nban zejlikane, le Xhi'nne' nada'.

²⁷Na' leska' ba benne' nada' yel llnebia' nench nnezra' non' nap do'le, le Le'en bse'le' nada' naka' Be'nn Gorj Radj Be'nnach.

²⁸Na' bi yebánere kan' nia' ni, le wllin lla kat yeolol be'nn wat lla'a lo ba, yen akre' katen' yelwill ake'.

²⁹Na' be'nn ka' ben da wen chak bzo ake' yellrio ni, yebán ake', na' ban da xhinnj chak bzo ake' yellrio ni, yebán ake' sa'kzi' ake' ke chnare.

Jesúsen' broe're' nape' yel wak

³⁰'Bibi gak gona' to wraza'. Le llzenaya' bi dan' ne Xa'n, nench ka' llona' yel koxchis ke be'nnach. Na' dan' nia' gak ke toto be'nne lekze da llaya'l gaken, le kere nia' kon da lle'nra' nada' gaken, kon ka dan' ne Xa' na'n gak, be'nnen' bse'l nada'. ³¹Cha' to wraza' lloa' xti'll kwina'. bi naken to da chejle're. ³²Zan be'nn yobre lloe' di'll li noxhan' naka', na' nnezra' dan' lloe' kia'n naken da li. ³³Na' ba bse'lre be'nne rao Juan na', nench jannabre' le'e akren' nak kia'n, na' be'rén Juan na' re' di'll li noxha nada'. 34 Zan nada' bi yalljra' ni to di'll da we'e be'nnach kia', kon da kizen' nia' re' nench chejle're kia' nench yesrá Diosen' re' rao da xhinnjen'. 35 Juan na' goke' ka to yi' da llseni' da xhen dan' bzejnie're' re' ke Diosen', na' choll da'on bawere dan' bzejnie're' re'n. ³⁶Na' de to da lloe' xti'lla'n da za'klle ka di'll dan' lloe' Juan na' kia': llona' yeolol da ba bro' Xa'n rallna' gona', na' da ka' llona'n

lloe'n di'll, le Xa' na'n bse'l nada'. ³⁷Na' Xa', be'nnen' bse'l nada'n leska' lloe' xti'lla', la'kze bi nna yénere kan' ne'en, na' bi nna re're kan' nake' na'. ³⁸Na' bi nna cho' xti'lle'n lo yichjra'llda'ore, le bi llonlira'llre nada' naka' be'nn bse'l Le'e. ³⁹Lewsedya'nn xti'll Diosen', le nnézere nsa'n yel nban zejlikane. Na' len na' lloe'n di'll li kia'n. ⁴⁰Na' re' bi lle'nere gonlira'llre nada' nench ga't yel nban zejlikane keré.

41'Ka nak nada' bi llyalljra' nne be'nnach kia' naka' be'nn za'ke. ⁴²Na' nada' nombia' re', na' nnezra' bi nllie're Diosen'. 43 Xa'n bse'l nada' llona' kon da ne'e, na' bi llejle're kia'. Na' kat za'k be'nn llon ake' ka da llarjla'll akze', lere'n llejle're. ⁴⁴¿Akxha gak chejle're kia' nada'n? Le llawere yeyoe'rao be'nne re', bi llazra'llre gonre nench toze Dios na' nne'e llonre wen. 45 Na' bi gonre xhbab cha' nada'n ll-lliayi'lla' re' rao Xa'n. Da Moisés na'n lllliayi'lle' re' rawe'n, le llsedre kwis dan' bzoje'n llákere zore wen rao Dios. 46 Chenak re' llejle're xti'll da Moisésen', kia' nadkza'n llejle're chet ka', le xti'lla' nada'n bzoje'. ⁴⁷Na' cha' bi llejle're dan' bzoje' na', ¿akxha gonre chejle're dan' llepa' re! na!?

Jesúsen' bwawe' ga'y mir be'nne (Mt. 14:13-21; Mr. 6:30-44; Lc. 9:10-17)

Bde gok ka', byej Jesúsen' ye chla' nisda'o Galilean'.
Na' nisda'on leska' nzi'n nisda'o
Tiberias. ²Na' be'nn zan nao
Jesúsen' dan' ba bre'e akre' yel
wak dan' llone' llayone' be'nn we'e
ka'. ³Na' byep Jesúsen' to rao ya'

San Juan 6 172

ren be'nn ka' non Le'e txhen na', jache'rene' leake'. ⁴Na' ba zo rez ga'le lnni paskw ke be'nn Israel ka'. ⁵Na' ka bwia Jesúsen' be'nn zan ba nao ak Le'e, na'll golle' Felipen':

—¿Gaxha si'llo da gao yeolol be'nn ki?

⁶Bne'e ka' nara'chek bi ne Felipen', le nnezkze Le'en akren' gone'. ⁷Na'll lle Felipen' Le'e:

—Chop gayoa (200) mell dan' nzi'i denario yet xtir, kere waken ni ra't wejen bi yellel ake'.

⁸Na' ye to be'nn non Jesúsen' txhen re'e Andrés, nake' be'nn bi'ch Simón Pedro. Na' Andrés na' lle'e Le'e:

⁹—Ganni ze to bida'o, no'xbe' ga'y yet xtir kebe' da nak de yezj dan' nzi'i cebada, na' ye chop belya'. Kere bi de gon da ki ke be'nn zan ki lla'a ganni.

¹⁰Na'll lle Jesúsen' be'nn ke'e ka' non Le'e txhen na':

—Leyé yeolol be'nn ka' kwe' ake'. Na' ganna' de yix dak, na'll blle' be'nn ka' rao yixen', nak ake' ka do ga'y mir be'nn byio. ¹¹ Na'll bxhi'i Jesúsen' yet xtir ka', be'e yel llioxken ke Dios. Bayoll na', be'en be'nn ka' non Le'e txhen na', na' be'nn ka' bdislas ake'n rao be'nn ka' zjalli' na'. Na' leska' bene' kone belya' ka', na' be'e totoe' kon ka berj akre' bdao ake'. ¹² Na' bayoll badao ake' na', na'll lle'e be'nn ka' non Le'e txhen na':

—Leyetop da ka' baga'nn ye ra't wejen nench bitbi kwiayi'.

¹³Na'll batop be'nn ka' da la'o ka' baga'nnen', na' goken ye chllinn (12) llom dan' baga'nn rao yet xtir ga'y ka', dan' ben ake' de yezj dan' nzi'i cebada. ¹⁴Ka bre'e be'nn ka' yel wak dan' bene'n, na'll ne ake':

—Da li ya'nne be'nn nin' nak be'nnen' bexhllo yedtixjwe' lli'o xti'll Diosen' yellrio ni.

¹⁵Ka gokbe'e Jesúsen' ba ze be'nn ka' wche'e ake' Le'e nench gon ake' Le'e rey ke ake', na'll baze'e, na' byeje' ya' da'on toze'.

Jesúsen' bze'e rao nisda'on

(Mt. 14:22-27; Mr. 6:45-52)

¹⁶Ka gol na', jayak be'nn ka' non Le'e txhen lloa' nisda'on. ¹⁷Na'll bayo' ake' to lo barco lljayake' gan' nzi'i Capernaum. Ba nak ba gol, na' bi nna yellín Jesúsen'. ¹⁸Na' bzorao llechj be' rao nisda'on, na'll llas yitjen. ¹⁹Na' ka bexte zjayake'n ba bago' ake' nez lo barcon' rao nisda'on, ka bre'e akre' ba zaza'a Jesúsen' zaze'e rao nisen' to kwit barcon', na'll blleb ake'. ²⁰Na'll lle'e leake':

—Nada'n, bi llebre.

²¹Na'll llawé akre' kwis, bago' ake' Le'e lo barcon'. Ye chollze le ballín akte' rao yo bill lloa' nisda'on gan' zjayake'n.

Be'nn zan llayirj ake' Jesúsen'

²²Na' bateyó na', be'nn zan baga'nn chla' lloa' nisda'o na'ze, gokbe'e akre' nono Jesúsen' zejrén, na' gokbe'e akre' billbi barco yobre llasdá, toze dan' zayo' be'nn ka' non Le'e txhen na'ze, na' bnnez akre' bi zayo' ren Jesúsen' leake' lo barco na'. ²³Kat le ballinte barco da zaya'k yellen' nzi'i Tiberias kwitze gan' bdao ake' yet xtir, dan' gan' bayoll be'e Xanllo Jesúsen' yel llioxken ke Dios. ²⁴Na' ka gokbe'e 173 San Juan 6

akre' nono Jesúsen' zerén leake' gan' lla'a ake' na', na'll balla'a ake' lo barcon' jayake' Capernaum nench bayirj ake' Jesúsen' do na'.

Yet xtir dan' lloe' be'nne yel nban zejlikane

²⁵Na'll ka ballele be'nn zan ka' Jesúsen' ye chla' nisda'on, na'll lle ake' Le'e:

- —Maestro, ¿batkre bayedo' ganni? ²⁶Na'll lle Jesúsen' leake':
- —Di'll li, di'll li nia' re', llayirjre nada' le dan' bdaore kon ka bérjere na'n, kere llayirjre nada' ni ke da ka' bre're yel wak ka' dan' llona' na'n. ²⁷Bi llaya'l ko' yichjre ga't da ye'j gaore, leko' yichjre ga't da gonn yel nban zejlikane keré. Nada' Be'nnen' Gorj Radj Be'nnach, gonna' to da ye'j gaore, nench ga't yel nban zejlikane keré. Le len na', ba bro' Xa' Diosen' lo na' gonna' re'.

²⁸Na'll lle ake' Le'e:

—¿Bixhan' llaya'l gonto' na', nench gonto' dan' llazra'll Diosen'?

²⁹Na'll lle Jesúsen' leake':

—Da nin' llaya'l gonre, na'llen' yewé Diosen', gonlira'llre nada' naka' be'nn bse'l Le'e.

³⁰Na'll lle ake' Jesúsen':

—¿Bixha yel wak gonkzo' chet ka', na'll gonlira'llto' rwe'? ¿Bi gono'? ³¹Le da xozxta'ollo ka', bdao ake' yet da'o dan' nzi'i maná, chak bzo ake' latj dachen', na' nyoj xti'll Diosen' ke ake' llian: "Yet xtir da za'a yebán' be'e leake' bdao ake'."

³²Na'll lle Jesúsen' leake':

—Di'll li, di'll li nia' re': Kere da Moisés na'n be'e da xozxta'ollo ka' yet xtiren', Xa' Dios na'kzen' be'en leake'. Na' Le'en llonne' re' yet xtiren' dan' za'a yebá gan' zoe' na'. ³³Na' dan' za'a yebá na', betjen yellrio ni, na' lloe'n yel nban ke noteze be'nn gao len.

34 Na'll lle ake' Le'e:

—Xanto', bennchga neto' yeo lla yet xtiren' ne'o ka'.

³⁵Na'll lle Jesúsen' leake':

—Nada'n naka' yet xtir dan' lloe' be'nn yel nban zejlikane. Na' noteze be'nn wzenay kia' bill tone', na' be'nn gonlira'll nada', bill bilre' nis chras. 36 Na' ba bnekza' re', la'kze ba bre're nada', na' bi llonlira'llre nada'. 37 Yeololte be'nn kwej Xa'n nench gak ake' nada' txhen, ll-llin lla gonlira'll ake' nada', na' noteze be'nne ye'nre' gonlira'lle' nada', bi wkwase' ka'le. ³⁸Nada' betja' yebá za'a yellrio ni, kere nench gona' ka nen kia' nada'n, kon kan' ne Xa' be'nnen' bse'l nada' na'n gona'. 39 Le'en lle'nre' bi wa'a latje kweyi' ni to be'nn ba breje', nench gak ake' nada' txhen. Na' kat llin lla te ke yellrio ni, kana' yesbán ake' radj be'nn wat ka', cha' ba got ake'. 40 Xa'n lle'nre' yeolol be'nn ka' gonlira'll ake' nada', we'e ake' yel nban zejlikane, na' nada' yesbán ake' radj be'nn wat ka', cha' ba got ake' kat llin lla te ke yellrio ni.

41 Be'nn zan be'nn Israel ka',
bchach ake' dan' bne Jesúsen' ka':
"Nada' naka' yet xtir dan' betj yebá."
42 Na' wasné ake':

—¿Kere be'nn nin' Jesús, xhi'nn José lla? Nombia'kzllo xaxhna' be'nnen'. ¿Bi di'llen' lloe' ne'e, ze'e yebá, na' betje' yellrio?

⁴³Na'll lle Jesúsen' leake':

—Bi wchachre kia'. ⁴⁴Notno gak gonlira'll nada', cha' Xa' be'nnen'

San Juan 6 174

bse'l nada', bi gakrene' leake' gonlira'll ake' nada', na' kat llin lla te ke yellrio ni, yesbana' leake' cha' ba got ake'. ⁴⁵Le gan' bzoj be'nn ka' be'e xti'll Diosen' kana' nen: "Yeolole', Diosen' wroe' wsedre' leake'." Na' yeolole' nneze kan' ne Xa'n, na' wzenay ake' nench gon ake' kan' ne'e na', leska' gonlira'll ake' nada'.

46'Nono be'nn nna re'e Xa'n. Toze nada' ba bre're' le gan' zoe' na'n za'a. ⁴⁷Di'll li, di'll li nia' re': Be'nn gonlira'll nada', de yel nban zejlikane ke ake'. 48 Nada' naka' yet xtir dan' lloe' be'nne yel nban zejlikane ke ake'. ⁴⁹Da xozxta'ollo ka', la'kze bdao ake' vel wao da nzi'i maná chak bzo ake' latj dachen', na' yeololte' dekz de wasa'te ka bllin lla ke ake'. 50 Nada' lloa' di'll ke to yet xtir da za'a yebá, na' be'nn gao len bi gate'. 51 Nada'n naka' yet xtir da za'a yebán' dan' nsa'a yel nban zejlikane. Be'nn gao yet xtiren', wbane' ke chnare. Na' vet xtir dan' we'e ake'n nench ga't yel nban ke be'nnach, naken kwerp kia'n.

⁵²Na'll llaschach be'nn Israel ka' llasné ake':

—¿Akxha gone' gonne' kwerp ke'en gaollon, neze' ka'?

53 Na'll lle Jesúsen' leake':

—Di'll li, di'll li nia' re': Nada' Be'nnen' Gorj Radj Be'nnach, cha' bi gaore kwerp kia'n, na' cha' bi ye'jre xchena'n, bibi yel nban zejlikane de keré chet ka'. ⁵⁴Be'nn ka' gao ake' kwerp kia'n, na' ye'j ake' xchena'n, ke chnare de yel nban ke be'nn ka', la'kze cha' ba wasa't ake', kat te ke yellrio ni, wasbana' leake' radj be'nn wat ka'. ⁵⁵Le kwerp kia'n naken dogarje yel wao, na' xchena'n naken dogarje da ye'jre. 56 Be'nn ka' llasa'o ake' kwerp kia'n, na' llase'je' xchena'n, de yel nban zejlikane ke be'nn ka', na' nak ake' nada' txhen, leska' nada' nak akse' txhen. 57Xa' Diosen' bse'le' nada', na' Le'en nape' yel nban na', na' de yel nban kia' dan' naka' toze ren Le'e. Na' ka'kze gak ke be'nn gao kwerp kia'n, so ake' ke chnare, le gak ake' nada' txhen. 58 Kwerp kia'n naken yet xtir da za'a yebá, bi naken ka dan' bdao da xozxta'ollo ka' kana' lati dachen', le be'nn bdao len dekze de got ake'. Na' be'nn gao yet xtir dan' nia' nada' ka', ke chnare so ake'.

⁵⁹ Jesúsen' broe' bsedre' da ki lo yoda'o ke be'nn Israel ka' gan' nzi'i Capernaum.

Xti'll Jesúsen' lloe'n yel nban zejlikane ke be'nn wzenay len

⁶⁰Na' zan be'nn ka' zjanao Jesúsen', ka ben akre' da ka' llzejnie're' leake'n, na'll ne ake':

—Bni' xhen naken gonllo dan' llzejnie're'n. ¿Noxha gakrize gon kan' ne'e na'?

61 Gokbe'e Jesúsen' llasnné ake' ke dan' bzejnie're' leake' da ka', na'll lle'e leake':

—¿Bi llazra'llre da ka' golla' re' na'n? 62 ¿Akxha nnere kat re're nada' yeyepa' yebá gan' bzoa' kana', nada' Be'nnen' Gorj Radj Be'nnach? 63 Spíritu ke Diosen' lloe'n yel nban ke be'nnach, na' kwerpen' bi gak gonen ka'. Di'll dan' ba be'rena' re', naken di'll da lloe' Spíritun', na' nsa'n yel nban. 64 Bixha nna ni't bale re', bi lleile're kia'.

Ka' bne Jesúsen' le kate na', gokbe're' nore be'nn ka' llejle' ke'en, na' noren' wde Le'e rao be'nn ka' llwie Le'e na'. ⁶⁵Na'll bne Jesúsen':

—Ke len na', ba bnia' nono gak gonlira'lle nada', cha' bi gakrén Xa' Diosen' le'e nench gonlira'lle' nada'.

da ka', zan be'nn ka' llzenay xti'lle'n, brej yichj ake' bill bnao ake' Le'e. ⁶⁷Na'll bnnabe Jesúsen' be'nn chllinn ka' (12) breje' nao Le'en:

—¿Ren re' lle'nere wayejre?

68 Na'll lle Simón Pedron' Le'e:

—Xanto', nollno za'k wzenayto' ke'e. Tozo' rwe'n lloe'o di'll da lloe' yel nban ke be'nn llzenay len. ⁶⁹Neto' llonlira'llto' rwe', na' nnézeto' nako' Cristo, na' nako' dogarje Xhi'nn Dios be'nnen' zo ke chnare.

⁷⁰Na'll lle Jesúsen' leake':

—Ba breja' re' chllinnre nnaore nada', na' to re' rao chllinn na', llzenayre ke daxi'on.

7¹Kan' bne'e ke Judas Iscarioten' xhi'nn be'nnen' re Simón, le ba nnezre', le'en wdie' Le'e rao na'a be'nn ka' llwie Le'en, la'kze nake' be'nn ren rao be'nn chllinn ka'.

Be'nn ka' nak be'nn bi'ch Jesúsen' bi benlira'll ake' Le'e

Bde na', bdakze Jesúsen' broe' bsedre' be'nn ka' do gan' nbane Galilean'. Bill gokra'lle' chejlle' gan' nzi'i Judean', le be'nn Israel ka' lla'a na', llayirj ake' akre gon ake' got ake' Le'e. ²Na' ba zo rez ga'le lnni ke be'nn Israel ka', dan' llon ake' nench lljadinra'll ake' kan' bzo ake' yo' de yixh kana'. ³Na'

be'nn ka' nak be'nn bi'ch Jesúsen', lle ake' Le'e:

—Bi yega'nno' ganni, byej Judea na'le nench be'nn ka' llzenay ko'on, re'e akre' yel wak ka' llono'n.

4Noteze be'nn cha' lle'nre' gombia' be'nn ka' le'e nake' to be'nn za'k, bi gone' yel wak nga'chze. Cha' da li llono' yel wak, benen rao yeolol be'nne, na'll re'e akre' dan' llono'.

⁵Ka'n bne be'nn ka' nak be'nn bi'ch Jesúsen', le ni leake' bi llejle' ake' ke Jesúsen'. ⁶Na'll lle Jesúsen' leake':

—Bi nna llin lla cha'a, zan re' wakse batteze chejre. ⁷Be'nn ka' bi nombia' Dios bi gak wie akre' re', zan llwie akre' nada', le llroe'ra' da xhinnj ka' llon ake'n. ⁸Lechej lnnin'. Zan bi sa'a nada', le bi nna llin lla kia'.

⁹Bayoll golle' leake' ka', na' go'ye' Galilea na'ze.

Jesúsen' byeje' Jerusalén gan' llak lnni

¹⁰Bde bza'a bi'che' ka' zjake' lnnin', na'll bza'a Jesúsen', de nga'chze byeje'. ¹¹Na' be'nn wnebia' ke be'nn Israel ka' lla'a na', llayirj ake' Le'e rao lnnin' llasné ake':

—¿Gaxha dá be'nnen' do ni?

¹²Na' be'nn ka' bllay rao lnnin', lloe' ake' di'll llillize ke'e, na' biteze bne totoe'. Bale ne: "Wa be'nn wen nake'", na' ye bale ne: "Bi nake' be'nn wen, ziye'ze be'nnen' de'e."

¹³Na'll llillize lloe' ake' di'llen', le yeololze be'nne lleb ake' bi gone be'nn wnebia' ka' leake', cha' yen akre' lloe' ake' xti'll Jesús na'.

¹⁴Na' ka do achje lnni na'n, kate byej Jesúsen' lo lchir yoda'o brao ke be'nn Israel ka', na' bzorawe' llroe' llsedre' leake'. ¹⁵Na'll babane be'nn wnebia' ka', llasné ake':

—¿Akxha llaken da zan da nneze be'nnen'? Rencha' kere bi nzede'n.

¹⁶Na'll lle Jesúsen' leake':

—Dan' llroe' llsedra' ni, kere xhbab kia'n, xhbab ke be'nnen' bse'l nada'n. ¹⁷Noteze be'nne gakra'lle gone' kan' lle'ne Dios be'nnen' bse'l nada'n, wayakbe'kzere' cha' dan' llroe' llsedra'n naken ke Dios o cha' naken da llarjla'lla' nadza'. ¹⁸Kate to be'nn llroe' llsedre' xhbab kekze', llayirjla'lle' akre gone' nench gake' xhen. Zan be'nn gakra'lle gon ake' xhen be'nnen' bse'l le'en, nnézkzello nak xti'lle'n da li, bi naken da wxhive'e.

19'Da Moisés na', benne' re' ley dan' nsedre, na' ni tore bi llonre kan' nen na'. ¿Bixchen llayirjzre akre gonre gotre nada'?

²⁰Be'nn ka' zjalla'a na', bne ake':
—Daxi'on yo'. ¿Noxhan' lle'ne got rwe'?

²¹Na'll lle Jesúsen' leake':

—Toze yel wak da bena', na' yeololre babánere, ²²Da Moisésen' bllie' bia'a sollo sen dan' nzi'i circuncisión (la'kze kere le'en bllie' bia'an, le da bkwa'nn xozxta'ollo ka' blla'a kana'n), na' ke len na', llzoare bida'o byio ka' sen, la'kze lla nba'nne, ²³Na' kan' naken, la'kze cha' naken lla nba'nne, llzoare bida'o byio ka' sen, kat llákebe' xo'n lla nench na' llonre kan' ne ley dan' bzoj da Moisésen', na' ¿bixchen llaklla're nada' dan' bayona' to be'nn we'e lla nba'nne? ²⁴Bi wlliayi'llre be'nne cha' bi da da'o llre're' llone', legón vel koxchisen' lixheje kan' llaya'l gaken na'.

Bne Jesúsen' ze'e gan' zo Dios

²⁵Na'll bne to chop be'nn Jerusalén ka':

—¿Kere be'nn nin' llayirj ake' nench yeso'te Le'e? ²⁶Lewiá kan' llone'n, lloe' di'll rao be'nn yell, na' nono bi llekze Le'e. ¿Kere ba llaso'n be'nn wnebia' ka' xhbab, Le'en nake' Criston' be'nnen' bexhllo? ²⁷Nnézello ga be'nn be'nn ni, zan kat yed Criston', nono nneze gaxha ze'e.

²⁸Jesúsen' llroe' llsedre' llyo' yoda'o braon', ka bne ake' ka'. Na'll bne'e zillje, lle'e leake':

—Llákere nombia're nada', na' nnézere gaxha be'nne nada'. Bixha kere to wrazza'n za'a. Da li zo be'nn bse'l nada'n, re' ni ke nombia'zre'. ²⁹Nada' nombie', le gan' zoe' na'n za'a, le Le'en bse'le' nada'.

³⁰Na' dan' bne'e ka', bale be'nn ka' gokra'll ake' go'x ake' Le'e, zan nono be'x Le'e, le bi nna llin lla ke'e, gake' rao na'a ake'. ³¹Be'nn zan byejle' ke Jesúsen', nake' be'nn bse'l Dios, na'll bne ake':

—¿Gonlle Criston' ye ra't yel wak da za'klle ka dan' ba ben be'nn ni, kat yede'?

Be'nn ka' llape yoda'on jake' nench llje'x ake' Jesúsen'

32 Na' be'nn fariseo ka', ben akre' di'llen' lloe' ake' ke Jesúsen'. Na' be'rén ake' bxoz wnebia' ke Israel ka' di'lle, na' bse'l ake' be'nn ka' llap yoda'o braon', nench na' llje'x ake' Jesúsen'. 33 Na'll goll Jesúsen' leake':

—Ye chollze sorena' re', na'll waya'a gan' zo be'nnen' bse'l nada' na'. ³⁴Na'll wayirjre nada', na' bi yellélere nada', le bi gak yedre gan' zoa' na'.

³⁵Na'll lle lwellj be'nn Israel ka':

—¿Gaxhan' ne'e wayeje' ga bi yellélelloe'? ¿Yeyeje' gan' naslas be'nn wrall ka' radj be'nn griego ka', na' wroe' wsedre' leake'n? ³⁶¿Akxha zejen dan' bne'e ka': "Yeyirjre nada', na' bi yellélere nada', na' bi gak yedre gan' zoa'n"?

Jesúsen' be'e di'll ke Spíritu ke Diosen'

³⁷Lla zerao llon ake' lnni na', naken lla xhenlle, na' bzellá Jesúsen' llroe' llsedre' leake', na' bne'e zillje, bne'e:

—Noteze re', cha' lo yichjra'llda'oren' nakre ka be'nne llbilra'lle, llaya'l gonlira'llre nada', na' gonna' da ye'jre. ³⁸Na' be'nnen' nxenra'll nada', gak ke'e kan' ne xti'll Dios dan' nyojen, to da wen kwis gak lo yichjra'llda'we', gaken ka to yellrio ga llartit nis da lloe' yel nban.

³⁹Na' dan' bne Jesúsen' ka', be'e di'll ke Spíritu ke Dios dan' yedsó lo yichjra'llda'o noteze gonlira'll Le'en. Na' kan' bne'e ka', bi nna yedsó Spíritun' lo yichjra'llda'o be'nne, le bi nna gak yeolol da ka' llaya'l gak, nench wroe'n Jesúsen' nake' be'n za'k xhen.

Gok ake' chop kwe're ni ke Jesús na'

- ⁴⁰Be'nn ka' llzenay xti'll Jesúsen' bal ake' bne:
- —Da li be'nn nin' be'nn llyixjwe' xti'll Dios, be'nnen' ba naksen yede'.
 - ⁴¹Na' ye bal ake' ne:
- —Be'nn nin' Criston' be'nnen' ba naken yednnebia'.

Bixha ye bale'n llasne'e:

—¿Bixha nello be'nn Galilea na', kwej Diosen' gake' Criston'? ⁴²Xti'll Diosen' dan' nyojen nen, Cristo be'nnen' yeden', lloje' rao dialla ke rey David, na' nake' be'nn za'a Belén gan' nak rall David na'.

⁴³Na' gok be'nn ka' chop kwe're, ni ke Jesús na'. ⁴⁴Na' bale' gokra'll ake' go'x ake' Le'e, na' bi gok go'x ake' Le'e.

Be'nn wnebia' ke Israelen' bi byejle' ake' ke Jesúsen'

⁴⁵Be'nn ka' llape yoda'o braon', jayake' gan' zjazó bxoz wnebia' ka', ren be'nn fariseo ka', le be'nn ka'n bse'l leake' nench go'x ake' Jesús na', na'll be'nn ka' lle ake' leake':

—¿Bixchen bi bche're'?

⁴⁶Na' be'nn ka' llap yoda'on braon', llasné ake':

- —Bi nna yéneto' be'nn we'e di'll wen, ka dan' lloe' na'.
 - ⁴⁷Na'll lle be'nn fariseo ka' leake':
- —¿Rente re' ba bxhiye'rene'? ⁴⁸Ni to neto' be'nn fariseo, bi nna chejle'to' xti'lle'n, ni be'nn wnebia' kello ka', ni toe' bi nna chejle' xti'lle'n. ⁴⁹Zan be'nn ki zjalla'a ni, bi nombia' ake' ley dan' bzoj da Moisésen', na' ba nbeyi' ake', dan' llejle' ake' xti'lle'n.

⁵⁰Na' Nicodemo be'nnen' byej rao Jesúsen' tlle'lre be'nnen' nak txhen fariseo ka', golle' leake':

⁵¹—Ley kellon' nen bi gak wchoybia'llo ke to be'nne ba ben da xhinnj, cha' bi nna we'e di'll akren' gok, na' cha' bi nna nnézello bixhan' bene'.

52 Na'll lle ake' le'e:

—¿Reno' rwe' ba bayako' be'nn Galilea? Bsed xti'll Diosen' kwasro San Juan 7, 8 178

dan' nyojen, na' nnezro' ni to be'nn bdixjwe' xti'll Diosen' kana' blloje' Galilea.

No'ren' bado'l akre' llone' da xhinnj

⁵³Na'll baza'a totoe', jayak ake' rill ake'.

Jesúsen' byeje' rao ya' gan' nzi'i Ya' Olivos. ²Na' bateyó kate byeni', byeje' lo yoda'o braon' da yobre, na' yeolol be'nn ka' lla'a na', jabi'y ake' rawe'n. Na' bllie' na' bzorawe' llroe' llsedre' leake'. ³Na' be'nn ka' llsedre ke ley dan' bzoj da Moisés na', na' be'nn fariseo ka', jwa'a ake' to no're, bado'l akre' le'e ren xtoe'. Na' jazé ake' le'e kllol be'nn ka' llzenay xti'll Jesúsen'. ⁴Na'll lle ake' Jesúsen':

—Maestro, no'r ni bado'letoe' llone' da xhinnj. ⁵Ka nak ley dan' bzoj da Moisésen', nllian bia'a wchekw aklloe' yej got aktelloe'. ¿Bixha ne'o rwe', akre gonllo ke'e?

⁶Lle ake' Jesúsen' ka', nench wkwej ake' Le'e di'll, na' ga't da gao ake' xhia ke'e. Bixha Jesúsen' kan' lli'teze na', to bxhexjze yichje'n bzorawe' llzoje' rao yo ren xhbene'. ⁷Na'll llchie' akre' Le'e, akre ne'e. Na'll kat babe'cha'we', na'll lle'e leake':

—Noteze re' bibi da xhinnj nonre nakre yalle, re' lesorao lewchekwe' yejen'.

⁸Le babe'te' syichjre da yobre, llzoje' rao yon'. ⁹Ka golle' leake' ka', na'll bayakbe'e akre', lekze be'nn wen da xhinnj leake', na'll chba' chba' balloj twej twej ake', zga'tek be'nn gore ka', na'll zanao be'nn llaban ka', baga'nnte no'r na'ze gan' lli' Jesúsen'. ¹⁰Ka bakos yichje'n da

yobre, nollno be'nn ka' llra', ni ye toe', na'll lle'e no'ren':

—No're, ¿gannxha be'nn ka' lle'ne got rwe'n? ¿Ni toe' billbi ll-lliayi'll rwe!?

¹¹Na'll ne no'ren':

-Ni toe', Xana'.

Na'll lle Jesúsen' le'e:

—Ni nada' bi wlliayi'lla' rwe'. Bayej, na' bill nnao' gono' da xhinnjen'.

Jesúsen' nake' beni' ke yichjra'llda'o be'nnach

¹²Jesúsen' be'e di'll da yobre, lle'e be'nn ka':

—Nada' naka' beni' ke yichjra'llda'o be'nnach. Be'nn gone' nada' txhen, bill nchole yichjra'llda'o ake'n, na' lo yichjra'llda'o ake' na', ba naken ka to da yo' beni'. Leake'n ba de yel nban zejlikane ke ake'.

¹³Na'll lle be'nn fariseo ka' Le'e:

—Kwinzo' lloe'o di'll ko'o, ne'o nako' be'nn za'ke, bi nak dan' da li.

¹⁴Na'll lle Jesúsen' leake'n:

—La'kze cha' lloa'a di'll ke kwinza', xti'lla'n naken da za'ke, na' da li. Nada' nnezra' gan' bza'a na', na' gan' waya'a, zan re' ni ke nnézzere gaxhan' za'a, na' gaxhan' waya'a. ¹⁵Re' ll-lliayi'llre nada' kon ka llara'n lo yichjra'llda'ore, zan nada' notno ll-lliayi'lla'. ¹⁶Na' chet ka' llona' yel koxchis ke be'nn ka', llona'n ka llaya'l gaken, le bibi de da llona' to wrazza', llona' kan' ne Xa' be'nnen' bse'l nada' na'. ¹⁷Ley kellon' dan' llsedren' nen, llaya'l chejle'llo kat chope be'nn bre'e kan' goken, na' toze ka di'll we'e ake'. ¹⁸Nada' lloa'a di'll kia' kwina', na'

Xa' be'nnen' bse'l nada', lekze di'll kia' nada'n lloe'.

¹⁹Na'll lle ake' Le'e:

—¿Gaxhan¹ zo xa¹o?

Na'll ne Jesúsen':

—Ni nada' ni Xa' na', bi nombia're. Chenak nombia're nada', renkze Xa' na', ba nombia're.

²⁰Di'll ka' broe' bsede Jesúsen', kan' lla'a ake' kwitze gan' lloe' ake' mell ke yoda'o brao ke be'nn Israel ka'. Na' notno be'x Le'e, le bi nna llin lla ke'e go'x ake' Le'e.

Jesúsen' lle'e leake' bi gak wayejrén ake' gan' wayeje'n

²¹Jesúsen' lle'e leake':

—Nada' yeya'a, na' yeyirjre nada', zan bi gak yeza'renre gan' yeya'an, na' rao da xhinni keré ka' kwiayi're.

²²Na' dan' bne'e ka'n, bne be'nn Israel ka':

—¿Yeyotje kwine'n, na'llen' ne'e nono gak yeyej gan' wayeje' na'?

²³Na'll lle Jesúsen' leake':

—Re' nakre be'nn ke yellrio ni, na' llzenayre ke dan' llnebia' yellrio ni, zan ke nak nada', za'a yebá bi llzenaya' ke dan' llak yellrio ni. ²⁴Ke len na', golla' re' kwiayi're rao da xhinnj keré ka'. Le cha' bi chejle're nada'n naka' doxhen kan' ba bnia' na', kwiayi're rao da xhinnj keré ka'.

25 Na'll lle ake' Le'e:

—ċNoxha rwe'?

Na'll lle Jesúsen' leake':

—Da zan ras ba golla' re' noxha nada'. ²⁶Da zanlle de da nnia' re', na' wzejnie'ra' re' napre do'le. Na' be'nnen' bse'l nada', lloe' di'll li, na' nada' lloe'rena' be'nnach di'll da ba benra' bne'e.

²⁷Be'nn wnebia' ka', bi byejnie' akre' lloe'rene' leake' di'll ke Xe'e Diosen'. ²⁸Na'll lle Jesúsen' leake':

—Kat wlisre nada' to le' yay, nada' naka' Be'nn Gorj Radj Be'nnach, kana'll nnézere naka' be'nnen' ba bnia' naka', na' nnézere bibi llona' to wraza', kon da ba bzejnie' Xa'n nada', len na' nia'. ²⁹ Xa' be'nnen' bse'l nada', zerenkze' nada'. Bi llbej yichje' nada', le zoteze zoa' llona' da llayo'ra'lle'.

³⁰Na' ka lloe'rén Jesúsen' be'nn ka' di'll ka', be'nn zan bzorao llonlira'll ake' Le'e.

Da lin' gonen nench yelloj be'nn ka' rallna'a da xhinnjen'

³¹Na'll lle Jesúsen' be'nn Israel ka' ba bzorao llonlira'll Le'e:

—Cha' sotezre gonre kan' ba bnia' na', na'll wroe'n da likzen' llonre nada' txhen. ³²Gombia're di'll li kia'n, na'll gakrenen re', na'll yellojre rao na'a dan' llnebia' re' na'.

³³Bale be'nn ka', goll ake' Jesúsen':

—Neto'n nakto' dialla da Abraham na', na' nono nna so be'nn nnebia' neto'. ¿Bixchen nezo' yellojto' dan' llnebia' neto'?

³⁴Na' lle Jesúsen' leake':

—Di'll li nia' re', yeololte be'nn llon da xhinnje, nak ake' rallna'a da xhinnj dan' llnebia' leake'n. ³⁵Be'nn zo rill xan llin ke'en, choll wejze llzorene' xan yo'n txhen, zan be'nn nak xhi'nn xan yo'n zorenteze' le'e. ³⁶Nada' naka' dogarje Xhi'nn Dios, na' wak gona' nench yelloj da xhinnj ka' yichjra'llda'oren', bill nnebia'n re'. ³⁷Nnezra' nakre dialla da Abraham na', na' llayirjla'llre akre gonre gotre

nada', le bi lloe're latj so xti'lla'n yichjra'llda'oren'. ³⁸ Nada' lloa'a di'll ke da ka' ba bre'ra' kan' zoa' kwit Xa'n, na' re' leska' llonkzre da ba bénere bne xaren'.

³⁹Na'll lle be'nn ka' Jesúsen':

- —Neto' nakto' dialla da Abraham. Na'll lle Jesúsen' leake':
- —Chenak nakre dogarje dialla da Abraham na', gonre kan' bene' na'. ⁴⁰La'kze ba bzejnie'ra' re' di'll li dan' benra' bne Diosen', na' lle'nkzere gotre nada'. Da Abraham na', bi bene' kan' llonre na'. ⁴¹Toz ka' llonre ren xaren'.

Na'll lle be'nn ka' Le'e:

- —Toze Dios na'n nak xato', na' bi llzenayto' ke nollre be'nne.
 - 42 Jesúsen' lle'e leake':
- —Cha' Dios na' nak xare, llie're nada' chenake, le nada'n bza'a gan' zo Diosen'. Kere to wrazza'n za'a, Dios na'n bse'l nada'. 43 Bi llejnie're dan' llepa' re'n, le bi lle'nere wzenayre kia'. 44 Daxi'o na', nak xare, na'llen' llawere llonre kan' lle'nen na'. Le len na' naken wet be'nne, kan' bxhe yellrio na'te. Na' bi llejle'n di'll li, le bibi di'll li yo' lo ra'llda'we. Na' kat nen di'll wenra'lle. nen kon kan' naken na', le len na' nak wenra'lle, naken xa yeolol di'll wenra'lle. 45 Na' nada', lloe'tia' di'll li, na' bi llejle're kia'. 46 ¿Noxha re' gak wroe' cha' bi da xhinni nona'? Nada' zoteze zoa' lloa'a di'll li. ¿Bixchen bi llejle're kia'? 47 Be'nn ka' nak xhi'nn Diosen', llzenay ake' xti'lle'n. Na' re' bi llzenayre ke'e, le bi nakre xhi'nne'.

Ba zokze Criston' kan' gorj da Abraham na'

⁴⁸Na'll be'nn wnebia' ke Israel ka', lle ake' Jesúsen':

- —Kan' ba bnekzto' na', nakbie'kze nako' txhen be'nn Samaria ka', na' yo' daxi'o lo yichjra'llda'on.
 - 49 Jesúsen' lle'e leake':
- —Bitbi daxi'o yo' lo yichjra'llda'wa'n, Xa' na' lloe'xhena', na' re' bi llapre nada' bara'nne. ⁵⁰Kere llyirja' be'nn gon nada' xhen na', Xa' na'n zoe' lle'nre' be'nnache gone' nada' xhen, le Le'en llone' yel koxchis. ⁵¹Di'll li, di'll li nia' re': Noteze be'nn llzenay xti'lla'n, ga't yel nban zejlikane ke'e.

⁵²Na'll lle be'nn wnebia' ka' Le'e da yobre:

—Na' bayoll bnnézeto' yo' daxi'on lo yichjra'llda'on. Ba got xozxta'ollo Abraham na', ren yela' be'nn ka' bdixjwe' xti'll Dios kana', na' rwe' nechko' be'nn wzenay ko'o, ga't yel nban zejlikane ke'e. ⁵³ ¿Llakro' za'kllo' ka da xozxta'ollo Abraham na'n? Le'en ba gote', na' ren be'nn ka' bdixjwe' xti'll Diosen' kana', leake'n ba got ake'. ¿Noxha llakro' nako' rwe' na'n?

⁵⁴Na'll lle Jesúsen' leake':

- —Cha' llon kwina' xhen, bibi za'ken, zan Xa'n llon nada' xhen be'nnen' nere llonre xhen. ⁵⁵Na' ni ke nombia'zre', zan nada' nombie'. Cha' nia' bi nombie', na' gaka' be'nn wenra'll kan' nak re'. Zan nada' nombie', na' llzenaya' xti'lle'n. ⁵⁶Da Abraham na', be'nnen' gok xozxta'ore, bawere' kwis bnnezre' wre're' llan' yeda' rao yellrio ni, na' zoe' nbaraz ba bre're'n.
 - ⁵⁷Na'll lle be'nn Israel ka' Le'e:
- —Ni ke nna gákzero' chiyon (50) iz, na' nechko' ba bre'ro' Abraham na'.
 - 58 Jesúsen' lle'e leake':

—Di'll li, di'll li nia' re': Ba zokza' nada' ka bi nna so Abraham na'.

⁵⁹ Na' bxhi'i ake' yej wchekw ake' Le'e, che'r ke bkwa'chdoe', na' balloje' yoda'on. Ni ke gokbe'e akzre', badie' radj ake'n.

Jesúsen' bayone' to be'nn nchole ka gorjte'

Jesúsen' zejrene' be'nn ka' non Le'e txhen, na' bre'e akre' to be'nn nchole ka gorjte'. ²Na'll lle ake' Le'e:

—Maestro, ¿noxha nap do'len', gorj be'nnen' be'nn lchole, le'en o cha' xaxhne'en?

³Na'll lle Jesúsen' leake':

—Be'nn ni gorje' nchole kere da nape' do'len', na' ni kere da nap xaxhne'e do'len', gorje' ka' nench wroe'rawe bi dan' gon Diosen'. ⁴Llaya'l gonllo xchin Dios be'nnen' bse'l nada', chak nna de latje. Le wllin lla kat bill ga'l gonllon. ⁵Na' chak nna zoa' yellrio ni, llgoa' beni' lo yichjra'llda'o be'nnache.

⁶Bayoll bne'e ka'n, bllo'nn xhe'n ke'en rao yon', na'll bene' ra't bennj kone xhe'n ke'e na', na'll bdebe' bennjen' rao be'nn lcholen'. ⁷Na'll golle' le'e:

—Byej jadib rao'n gan' llia nisen' gan' nzi'i Siloé.

(Siloé na' lle'nen nen Nse'la'.) Na' ka' gok byeje', na' jadib rawe'n, ka balline', na' ba llare're'. ⁸Na' be'nn wrill ke'e ka', na' nollre be'nne bre'e akre' le'e yeo lla, kan' nna nake' be'nn nchole na', ne ake':

—¿Kere be'nn nin' llbe' llnnabe' lmoxh lla?

⁹Na! bale! ne:

—Le'en.

Na' ye bale' llasné:

—Kere le'en, be'nn yobren', zan toz ka nake' ren be'nn ni.

Na'll bne be'nnen':

-Nadkza'n.

¹⁰Na'll lle ake' le'e:

—¿Akxha gok bzorao llare'ro'n?

¹¹Na'll lle'e leake':

—To be'nn re Jesús bene' ra't bennj, na' bdebe'n rawa'n, na'll lle'e nada': "Byej gan' llia nis gan' nzi'i Siloé, na' jadib rao'n." Na'll bya'a jadiba'n, na'll bzorao llare'ra'.

¹²Na'll lle ake' Le'e:

—¿Gannxha be'nnen' na'? Na' lle'e leake!:

-Bi nnezra'.

Be'nn fariseo ka' bnnabyoll akre' be'nn lcholen' akre gok bayake'

¹³Na'll bche'e ake' be'nnen' gok be'nn lcholen' gan' lla'a be'nn fariseo ka'. ¹⁴Na' nak to lla nba'nne, kan' ben Jesúsen' bennj dan' bdebe' rao be'nnen' nench bare're'. ¹⁵Na' leska' bnnabe be'nn fariseo ka' le'e, akre goken ba llare're', na' lle'e leake':

—Bdebe' bennj yejrawa'n na'll jadiba'n, na' nna' ba llare'tera'.

¹⁶Na' bale be'nn fariseo ka', bne ake':

—Nnézello bi zorén Diosen' be'nnen' bayón be'nn lcholen', le llone' da bi llaya'l gone' lla nba'nne.

Na' ye bale' ne ake':

—¿Akxha gon to be'nn wen da xhinnj, goncheke' yel wak ka dan' llon be'nn ni?

Na'll gok ake' chop kwe're. ¹⁷Na'll lle ake' be'nnen' bayaken':

—¿Bixha ne'o rwe' ke be'nnen' bayón rao'n?

Na'll ne be'nnen':

—Nake' to be'nn llyixjwe' xti'll Dios.

¹⁸Na' be'nn wnebia' ke be'nn Israel ka', bi byejle' ake' ke be'nnen' gok be'nn lcholen', na' ba llare're'. Na'll goxh ake' xaxhne'en. ¹⁹Na'll bnnab akre' xaxhna' be'nnen' gok lcholen', lle ake' leake':

—¿Xhi'nnre be'nn ni, be'nnen' nere gorje' nchole? ¿Akxha goken ba llare're' nna'?

²⁰Na' xaxhne'e na', goll ake' leake':

—Xhi'nnto'n, na'llen' nnézeto' ka gorjtebe'n ncholbe'. ²¹Zan bi nnézeto' akren' gok ba llare'be', na' ni ke nnézzeto' non' bayón raobe'n. Ba naksbe' bi wak, lennabteze kwinbe', nench we'be' di'll akren' gok.

²²Ka' bne xaxhne'e ka', le lleb ake' be'nn Israel ka', le leake'n bchoy ake'n nono wreb ake' lo yoda'on, noteze be'nn we'e di'll llejle' ke Jesúsen' nake' Cristo. ²³Na'llen' bne xaxhna'be'n ka': "Ba nwaksbe', lennabteze kwinbe!."

²⁴Na'll goxh ake' be'nnen' gok be'nn lcholen' da yobre, lle ake' le'e:

—Be'e di'll li rao Dios. Be'nnen' ne'o bayón rwe'n, nake' be'nn wen da xhinnje.

²⁵Na'll lle be'nnen' leake':

—Bi nnezra' cha' nake' be'nn wen da xhinnje. Kon toz da nnezra', goka' be'nn lchole, na' nna' ba llare'ra'.

²⁶Na'll da yobre lle ake' le'e:

—¿Bixha benre' rwe'? ¿Akre bene'n nench bare'ro'?

²⁷ Na'll lle'e leake!:

—Ba bnekza' re', na' bi llejle're. ¿Bixchen lle'nzere nnia' weltze? ¿Lle'nere nnaore gonre' txhen na'?

²⁸Na'll bchachrén ake' le'e, lle ake' le'e:

—Rwe'n nakoe' txhen, zan neto' da Moisés na', nakto' txhen. ²⁹Le nnézeto' Dios na', be'rén da Moisésen' di'lle, na' be'nn ni, bi nnézeto' ga ze'e.

³⁰Na'll lle be'nnen' bayaken' leake':

—Da nin' nak zi yebánello, le bi nnézere ga za'a be'nn ni, na' ba bayone' nada'. ³¹Nnézello Diosen' bi llzenaye' ke be'nn llon da xhinnje, zan llzenaye' ke noteze be'nn llonlira'll Le'e. ³²Ka bxhe yellriote, gaga nna yénello zo be'nne llayone' rao be'nn nchol ka gorjte'. ³³Be'nn ni, bibi gak gone' chenak bi ze'e ga zo Dios.

³⁴Na' balli'i be'nn fariseo ka' xti'lle'n:

—Rwe'n ka gorjte'o nako' be'nn wen da xhinnj kwis. ¿Llakro' cha' rwe' za wsedro' neto'n?

Na'll babej ake' le'e lo yoda'on.

Be'nn ka' nchole yichjra'llda'o

³⁵Jesúsen' benre' kan' ben ake' babej ake' be'nnen' lo yoda'on, be'nnen' bayone' yejraon', na'll ka badile' le'en, lle'e le'e:

—¿Llonlira'llo' Xhi'nn Diosen'?

³⁶Na'll ne be'nnen':

—Xana', bne nada' noxhan', nench gonlira'lle'.

37 Jesúsen' lle'e le'e:

—Ba bre'kzero' nada', nadkza'n lloe'reno' di'lle.

³⁸Na'll bzoa xhib be'nnen' rawe' lloe'rawe' Le'e, bne'e:

-Xana', llonlira'lla' rwe'.

³⁹Na'll lle Jesúsen' le'e:

—Za'a yellrio ni, nench wroe'n non' nap do'le, na' non' bi nap do'le, na' zadyena' nench be'nn ka' bi llejnie', bill gak ake' ka be'nn lchole, na' zadyena' nench be'nn ka' llak akre' llejnie' akre', gak ake' ka be'nn nchole lo yichjra'llda'o ake'n.

⁴⁰Na'll bal be'nn ka' zjazé ka'le, be'nn fariseo ka', ben akre' kan' ne Jesúsen', na'll lle ake' Le'e:

—¿Llakro' cha' ren neto'n nakto' be'nn lcholen!?

⁴¹Na'll lle Jesúsen' leake':

—Chenak nakre be'nn lchole, bibi do'l keré de, zan dan' nere llejnie're na', na'llen' dekze do'l keré.

Jesúsen' bsa'krebre' ka llon be'nn gop xhi're

Di'll li, di'll li nia' re': Be'nne bi choe' gan' nake lloa' re'j ke xhi'ren', na' choe' ga yobre, le'en nake' be'nn wan. ²Be'nn wsarje' choe' lixhej lloa' re'jen', le'en llap xhi'ren'. ³Na' be'nnen' llape lloa' re'jen' wsarje', na' cho' gop xhi'ren'. Na' llzenay xhi'r ka' xti'll be'nnen' llwia leakba'n, nombia' akba' chie'n kat llaxheba', lloe' ra akba' kat llbejeba'. ⁴Na' kate ba bchache' yeololteba' lo re'jen', llbiarawe' rao akba'n, na'll nao xhi'r ke'e ka' le'e. le nombia' akba' chie' na'n. 5Bill nnao akba' no be'nn yobre, to llxhonni akzba' le bi nombia' akba' chie' na'.

⁶Jesúsen' be'e di'll ke be'nn gop xhi'ren', nench bzejnie're' be'nn ka' lla'a na', na' bi byejnie' be'nn ka', akre zeje'n dan' golle' leake'n.

Jesúsen' nake' ka to be'nn llap xhi'r ke'en wen kwis

⁷Na' lle Jesúsen' leake' da yobre:
—Di'll li, di'll li nia' re': Nada'
naka' ka to lloa' re'j gan' llalla'a
xhi'r ka'. ⁸Yeololte nollre be'nn ba
bede' ka za yeda' nada', nello nak
ake' be'nn wan. Na' be'nn ka' nak
ka xhi'r da'o kia', bi bzenay ake'
xti'll be'nn ka'. ⁹Nada'n naka' ka
lloa' re'j ke xhi'r ka', na' noteze
be'nne gonlira'll nada', yerá ake'
rao da xhinnjen', na' gak ake' ka
xhi'r da'o ba llo' lo re'j, na'll llalloj
akba', na' llel da llao akba'.

¹⁰'Le be'nn wan na', ze'e nench kwane' xhi'r da'o ka', na' goteba', na' wlleyie'ba'. Zan nada' za'a lloa'a yel nban zejlikane ke be'nn ka' llonlira'lle nada', nench nni't ake' wen kwis. ¹¹Na' nada' llona' ka to be'nne llap xhi'r ke'en kwasro. Na' be'nn llap xhi'r ke'en kwasro llsanra'll yel nban ke'en, ni ke dan' nllie're' xhi'r ke'e ka'. ¹²Na' be'nn zi'i raxhje' gape' xhi'r ke be'nnen', to wxhonnjze' wsanra'lleba' ka re're' za'a be'kw yi'on, le bi nak xhi'r ka' ba ke'e. Na'llen' lloe' latj llje'x be'kw yi'on leakba', na' lloslasba' xhi'r da'o ka'. ¹³Na' be'nn bi nak xan xhi'r ka', llxhonnje' le bi nllie're' xhi'r ka', le bi nak xhi'r ka' ba ke'e. Dan' zi'i raxhje' na'zen' llwieba'.

¹⁴'Nada' llona' ka llon to be'nn llape xhi'r ke'en kwasro, na' nombia' be'nn ka' nak ake' ka xhi'r da'o kia', na' leake' nombia' ake' nada'. ¹⁵Ka'n nombia' Xa'n nada', na' ka' nombia' Le'e, na' llsanra'll kwina' gata' ni ke ake'. ¹⁶Na' zjani't be'nn San Juan 10 184

yobre be'nn bi nak ak be'nn Israel. Be'nn kin' llaya'le lljatop ake' nench wzenay ake' kia', na'll gak ake' ka xhi'r da'o ka' lla'a toze re'j, na' toze be'nn llap leakba'.

17 'Llsanra'll kwina' yeso't be'nn ka' nada', na' te na', yebana' da yobre, na' Xa'n nllie're' nada', le llazra'lle' kan' llona' na'. 18 Nono llaka'a yel nban kia'n. Nadkza'n llsanra'll kwina' gata'. Wak wsanra'll kwina' got ake' nada', na' leska' wak yeyas yebana' radj be'nn wat ka', kan' nllia Xa'n bia'a gona'.

¹⁹Da yobre gok be'nn Israel ka' chopre, ni ke xti'll Jesús na'. ²⁰Zan ake' bne:

—Daxi'on yo' yichjra'llda'we'n, bi ne bi zille'. ¿Bixchen llzenayrizre xti'lle'n?

²¹Na' ye bale' ne ake':

—Ni to be'nn yo' daxi'o bi gak nne'e ka'. ¿Bixha wak gon daxi'on yeyak be'nn lchol yere're'?

Be'nn wnebia' ke Israelen' lllliayi'll ake' Jesúsen'

²²Ka bllin lla byo' lnni dan' llon ake' ka nak lljadinra'll ake' llan' benla'y ake' yoda'o brao ke Diosen', na' ba bllin lla llak zay Jerusalén na'. ²³Na' dá Jesúsen' lo lchir ke Salomón na'. ²⁴Na' be'nn wnebia' ke Israelen', byechj ake' Jesúsen' ne ake':

—¿Bixchen llonllejla'llo' neto', cha' rwe'n nako' Cristo? Bnetega neto' chet ka' rwe'n.

²⁵Na'll lle Jesúsen' leake':

—Ba bnekza', na' re' bi llejle're. Da ka' ba bena'n kone yel wak ke Xa' na'n, llroe'n naka' be'nn bse'l Le'e. ²⁶Na' bi llejle're kia', le bi llonre txhen be'nn ka' llonlira'll nada', kan' ba bnekza' re'. ²⁷Be'nn ka' nak ka xhi'r da'o kia' ka', nombia' ake' chia'n. Na' nada' nombia' ake', na' nao ake' nada'. ²⁸Na' lloe' ake' yel nban zejlikane, na' kbat kweyi' ake', na' nono gak yeka'a leake' rao na'. ²⁹Xa' na', ba breje' be'nn ka' llonlira'll nada', nench llwia ake', na' notno gak yeka'a leake' rao na'a Xa'n, le nape' yel llnebia' ga zeraoze. ³⁰Nada' ren Xa' na', nakto' ka toze be'nne.

³¹Bayoll bne'e ka', le bxhi'te be'nn wnebia' ka' yej, gokra'll ake' wchekw ake' Le'e. ³²Na'll lle Jesúsen' leake':

—Da zan da wen ba bre're bena' kone yel wak ke Xa'n. ¿Bixha ken lle'nere wchekwre nada' yej?

³³Na'll lle be'nn wnebia' ka' Le'e:

—Kere ke da wen ka' beno' na'n, wchekwto' rwe' yejen', dan' llkadi'o ke Dios na', le be'nnachze rwe', na' llon kwino' Dios.

34 Na'll lle Jesúsen' leake':

—Nnézkzere kan' nyoj xti'll Diosen' dan' nzedren' gan' nen: "Nada' ba bnia' re', nakre ka dios ka'." 35 Na' xti'll Dios dan' nyojen kere da te ken, na' len na' nen Diosen' bne'e ke be'nn ka' bzenav xti'lle'n kana', gok ake' ka Le'e. ³⁶Diosen' breje' nada' nench gakrena' be'nnach lla'a vellrio ni. na' ¿bixchen nere llkwasa' Diosen' ka'le, dan' nia' naka' Xhi'nne'n? ³⁷Cha' bi llona' yel wak ke Xa' Diosen', bi llaya'l chejle're kia' chet ka'. 38 Zan cha' llakbe're llona' da za'k kone yel wak ke Diosen', llaya'l chejle're, Le'en bse'le' nada', la'kze bi lle'nere chejle're xti'lla'n. Na'

cha' chejle're ke da ka' ba llona' na', na'llen' nnézere zerenkze Xa'n nada', na' leska' nada' zerena' Le'e.

³⁹Na'll gokra'll ake' go'x ake' Jesúsen' da yobre, na' bi bdo'le'.

⁴⁰ Jesúsen' bayeje' gan' zoe' ye chla' yeo Jordán na', latje gan' bzo da Juan na', chak bchoe' be'nne nis.
⁴¹ Na' be'nn zan jak gan' zoe'n nench bzenay ake' xti'lle'n, na' bne ake':

—Da Juan na', ni to yel wak bibi bene', zan yeolol dan' bne'e ke be'nn ni, naken da li.

⁴²Na' be'nn zan benlira'll Jesúsen' latj na'.

Kan' gok kan' got Lázaro

To be'nne goke' yillwe', golle Lázaro bzoe' gan' nzi'i Betania, ren ye chop zane' ka' nzi'i María ren bire', be'nnen' re Marta. ²(María, zan Lázaro na', le'en bwazj to ceit dan' la' xhix nia' Xanllo Jesúsen', bayoll na', bachechte'n kone yich yichje'.) ³Na' ka' gok llop bir no'r ki, bse'l ake' rson ke Jesúsen', lle ake' Le'e:

—Xanto', be'nnen' nllie'ro', re Lázaron' ba llake' yillwe'.

⁴Ka bnneze Jesúsen' llak Lázaron' yillwe', na'll bne'e:

—Ka nak yillwe' llak be'nnen' bi kwiayi'rene'n, llake' ka' nench gakbe're katek be'nn za'k nak Diosen', na' gakbe're naka' nada' be'n za'k kwis, nada' naka' dogarj Xhi'nn Dios.

⁵Na' nllie' Jesúsen' Martan' ren bire' na', na' ren Lázaron'. ⁶Ka bnnezre' llak Lázaron' yillwe', na' bzoe' ye to chop lla gan' zoe' na'. ⁷Na'll golle' be'nn ka' non Le'e txhen na': —Lecho'o, chejllo gan' nbane Judean' da yobre.

⁸Na' lle ake' Le'e:

—Maestro, bi lla na'ze gokra'll be'nn ka' lla'a ganna', got ake' rwe', wchekw ake' rwe' yej. ¿Na' lle'nchkero' chejllo' ganna' da yobre?

⁹Jesúsen' lle'e leake':

—Rao lla nsa'n chllinn (12) hor, na' be'nn dá te lla bi lljache'we' le zo willen' nseni'n rao yellrion'. ¹⁰Na' be'nn dá ba gole lljache'we', le ba nak xchole.

¹¹Bayoll bne'e ka', na'll lle'e leake':

—Be'nnen' nllie'llo nzi'i Lázaron' ba lltase', na' cha'a lljasbane'.

¹²Na'll lle ake' Le'e:

—Xanto', cha' ba lltase', wayakzere'n.

¹³Ka' bne Jesúsen', le ba bnnezre' ba got Lázaron', na' be'nn ka' nao Jesúsen', llak akre' cha' tasze' llazi'ra'lle'n. ¹⁴Na'll goll Jesúsen' leake' lixheje:

—Ba got Lázaron'. ¹⁵Na' llawera' bi bzoa' ganna' kan' goke' yillwe'n, nench na' chejle're kia'. Lecho'o chejllo gan' de'e na'.

¹⁶Na'll be'nnen' re Tomás, be'nnen' bsi'i ake' Tomás Dídimo golle' yezikre be'nn ka' non Jesúsen' txhen:

—Lecho'o nench gatrenllo Jesúsen' txhen, cha' ba llot ake' Le'e.

Jesúsen' nape' yel wak yesbane' be'nn wat na' we'e leake' yel nban zejlikane

¹⁷Na' ka bllin Jesúsen' Betanian' ren be'nn ka' non Le'e txhen na', lle ake' Le'e ba gok tap lla nna', bkwa'ch ake' Lázaron'. ¹⁸Betania San Juan 11 186

na', lli'n awlloze Jerusalén ka do choll da'oze llgo'llo nez. ¹⁹Be'nn zan be'nn Israel ka', bllin ake' gan' zo Martan' ren Marían', lloe' ake' leake' yel llxhenra'lle dan' got zan ake'n. ²⁰Ka bnneze Martan' ba bllin Jesúsen' lloa' yellen', na'll bza'doe' jatile' Le'e, na' María na' baga'nne' yo'ze. ²¹Na'll lle Martan' Jesúsen':

- —Xana', chenak zo'o ganni kan' gok be'nn zana'n yillwe', bije gote' chenake. ²²Na' nnezra' la'kze ba gote', biteze bi da nnabro' Diosen' gonkze'n.
 - ²³Na'll lle Jesúsen' le'e:
 - -Wabán bi zano'n.
 - ²⁴Na'll lle Martan' Le'e:
- —Nnézkzera' wabane' kat yebán be'nn wat ka', kat llin lla wayoll yellrion'.
 - ²⁵Na'll lle Jesúsen' le'e:
- —Nada' napa' yel wak yesbana' be'nn wat ka', na' we'e ake' yel nban zejlikane. Na'llen' be'nn ka' gonlira'll nada', la'kze gat ake', wa't yel nban zejlikane ke ake'. ²⁶Na' noteze be'nn ni't gonlira'lle nada', kbat gat be'nn ka', na' bi kweyi' ake'. ¿Llejle'o dan' llepa' rwe'n?
 - ²⁷Na'll Île Martan' Le'e:
- —Xana', llejlia' nako' dogarje Xhi'nn Dios, llejlia' nako' Cristo be'nnen' ba brezto' wse'l Diosen' yellrio ni.

Jesúsen' bllelle' gan' bkwa'ch ake' Lázaron'

- ²⁸Bayoll goll Martan' Le'e ka', bayeje' jayelle' María bire'n ka' llillize:
- —Ba bra' Maestron' lloa' yell na', na' llaxhe' rwe'.

²⁹Na'll kate bene Marían' kan' goll Martan' le'e na', le bza'dote' byeje' gan' zo Jesúsen'. ³⁰Bi nna cho' Jesúsen' lyellen', na' ze'e lloa' yellre gan' jatil Martan' Le'e na'. ³¹Na' be'nn Israel ka', zjalla'a rill Marían', lloe' ake' le'e yel llxhenra'll dan' got zane' na'. Ka bre'e akre' bza'doe'n, na'll naodo ake' le'e, llak akre' cha' zeje' lloa' ba na' zjachelle'n.

³²Na' Marían', kate blline' gan' ze Jesúsen', le bzoate xhibe' rawe' ka bre're' Le'en, na' lle'e Le'e:

—Xana', chenak zo'o ganni kan' gok be'nn zana'n yillwe', bije gotje' chenake.

³³Na' ka bre'e Jesúsen' bell Marían', na' ren be'nn Israel ka' za'rén le'e na', na' gokya'chre' kwis na' goke' lo yichjra'llda'we'n. ³⁴Na' lle'e leake':

- —¿Gaxha jakwa'chre'? Na'll lle ake' Le'e:
- -Xanto', cho'ke lljawia'o.
- ³⁵Na' bllell Jesúsen'. ³⁶Na' be'nn Israel ka', bne ake':
 - -Lewiake kateken' llákere' le'e.
 - ³⁷Na' bale' bne:
- —Be'nn ni bayone' rao be'nn lcholen' bare're', chenak zoe' ni, kan' gok Lázaron' yillwe'n, bije gote' chenake.

Jesúsen' basbane' Lázaron' radj be'nn wat ka'

³⁸ Jesúsen' goke' lo ra'llda'we'n da yobre. Ka byeje' gan' jakwa'ch ake' Lázaron', naken to broj, na' da'a to yej lloa' ban' da nsej lloe' na'. ³⁹ Na'll lle Jesúsen' leake':

-Lewka'a yejen'.

Na' Marta zan da Lázaron', lle'e Le'e:

—Xana', ba la' be'nnen' zban, le ba gokte tap llan' gote'.

40 Na'll lle Jesúsen' le'e:

—¿Bixha kere ba bnetia', cha' gonlira'llo' nada', na' re'ro' nak Diosen' be'nn za'k xhen?

⁴¹Na'll bka'a be'nn ka' yejen', na'll le bwiate Jesúsen' yebáre, na' bne'e:

—Xa, llioxkeno' ba bzenayo' kia'.

42 Nnezra' yeo ras llzenayo' kia',
nia' ka' nench chejle' be'nn ka',
rwe'kzo'n bse'lo' nada'.

⁴³Bayoll balwille' Diosen', na'll bnne'e zillje, bne'e:

—iLázaro, balloje!

44 Na'll le ballojte Lázaron' ndob do nia'ne'e to ra'lle, na' lloa' rawe'n ndoben to bay. Na'll lle Jesúsen' leake':

—Leyesell ra'llen', na' leyesane' wayeje'.

Be'e ake' di'll yeso't ake' Jesúsen' (Mt. 26:1-5; Mr. 14:1-2; Lc. 22:1-2)

⁴⁵Na' zan be'nn Israel ka', be'nn ka' byej ren Marían', bre'e akre' ka yel waken' ben Jesúsen', na'll benlira'll ake' Le'e. ⁴⁶Na' bal be'nn Israel ka', jake' rao be'nn fariseo ka', na' jayell ake' leake' kan' ben Jesúsen' basbane' Lázaron'. ⁴⁷Na'll bxoz wnebia' ka', na' ren be'nn fariseo ka', batop ake' be'nn ka' nak koxchis llnebia' Israelen'. Na' bzorao ake' ne ake':

—¿Akxha gonllo nna'? Le yel wak zan na', llon be'nn ni. ⁴⁸Cha' nnello waljezen, yeololze be'nn gonlira'll ake' Le'e, na' yed be'nn Roma ka' yedlan ake' yoda'o brao kellon', na' yedlleyi' ake' rall-llon'.

⁴⁹Na' to be'nn wnebia' zo kana' re'e Caifás. Le'e nake' bxoz brao iz na', na' lle'e leake':

—Re' ni ke bi nnézzere. ⁵⁰Bi llakbe're naken wen kello gat toze be'nne, kerke da kweyi' yeolol-llo, na' rente yell kello ni.

⁵¹Kere dogarjen' bne Caifásen' ka', dan' nake' bxoz brao iz na'n, na'llen' bne'e ka', Diosen' bene' bne'e ka', nench na' bdixjwe're' gat Jesúsen', ni ke yell Israel na'. ⁵²Na' dan' gate' na', kere ke be'nn Israel ka'ze, renkze ke yeolol be'nn ba brej Diosen' gak xhi'nne' doxhente, gak ake' Le'e txhen gonlira'll ake' Le'e. ⁵³Ka' gok, na' lla na'te bzorao be'nn wnebia' ka', ben ake' di'll akre gon ake' nench yeso'te Jesúsen'.

⁵⁴Ke len na', bill bda Jesúsen' gan' lla'a be'nn wnebia' ke Israelen', na' bze'e Judean', na' byeje' to yell da nzi'i Efraín dan' lli' awlloze latj dachen', na' baga'nnrene' be'nn ka' non Le'e txhen na'.

55Na' ba zo rez ga'le lnni paskw ke be'nn Israel ka'. Na' be'nn zan za'k toto yell jake' Jerusalén na', kan' za ga'l lnni na', nench wayón kwin ake' yall rao Diosen' kan' ne ley ke ake' na'. ⁵⁶Na'll dá ake' llayirj ake' Jesúsen' do gan' zo yoda'o brao na', na'll lle lwellj ake':

—¿Bi ka nere? ¿Bi yede' lnnin' lla?

57 Bne ake' ka' le bxoz wnebia'
ka', na' be'nn fariseo ka', ba bchoy
ake'n cha' noteze be'nn nnezre' gan'
zo Jesúsen', llaya'l wzenre' leake'
nench na' llje'x ake' Le'e.

Marían' llgoe' ceit xhix nia' Jesúsen' (Mt. 26:6-13; Mr. 14:3-9)

12 Na' ka ye xop llare ga'le lnni paskwn', byej Jesúsen'

San Juan 12 188

yell Betania na', gan' zo Lázaro be'nnen' basbane' radi be'nn wat ka'. ²Na' bsinia' ake' da bdao Jesúsen' xche', nench ben ake' Le'e xhen. Na' Marta na', bdie' yel wao ke ake'n, na' Lázaron' blle'rene' be'nn ka' txhen, bdaorene' leake' ren Jesús na!. ³Na! Marían! no!xe! ka do tva ceit xhix ke'e da za'k da xhen, na' naken dogarje da blloj yay yej xhix dan' nzi'i nardo. Na' iabi'ye' awllo xhnia' Jesúsen', na'll broe' ceit xhixen' nie'n. Na'll bayoll na', bachechte'n kone vich vichje'n. Na' doxhen lo yo'n, bla' xhix kwis. ⁴Na! Judas Iscariote xhi!nn to be!nn re Simón, be'nnen' nak txhen be'nn chllinn ka', be'nnen' ba naken wdie' Jesúsen' rao na'a be'nn ka' llwietate Le'en, bne'e:

5—¿Bixchen bi be'te' ceiten', na' ga't mell nench gakrenen be'nn ya'che? Le ceiten' za'ken ka chonn gayoa (300) mell dan' nzi'i denario.

⁶Ka' bne Judasen', na' kere dan' llaya'chra'lle' be'nn ya'ch ka'n bne'e ka', dan' goke' be'nn wan na'. Le le'en no'xe' mell dan' benrén yeolole' llin, na' brejrane' mellen'.

⁷Na'll lle Jesúsen' le'e:

—Bitbi ye'we', le ba bene' da non gone' kia' kat ga'cha'n. ⁸Be'nn ya'ch ka', lla'renkzre be'nn ka' batteze, zan nada' bill sorena' re' ye scha.

Bxoz wnebia' ka' ben ake' di'll got ake' Lázaron'

⁹Be'nn zan be'nn Israel ka', bnnez akre' zo Jesúsen' yell Betanian', na' byej ake', na' kere dan' re'e akre' toze Jesús na'n, lle'n akzere' re'e akre' Lázaro be'nnen' basbane' radj be'nn wat ka'. ¹⁰Na' bxoz wnebia' ke Israel ka', leska' ben ake' di'll gotrén ake' Lázaron', ¹¹le be'nn zan be'nn Israel ka', ba llara'll ake' leake', na' ba llonlira'll ake' Jesúsen' dan' bnnez akre' basbane' Lázaron'.

Jesúsen' bayoe' Jerusalén na' da yobre

(Mt. 21:1-11; Mr. 11:1-11; Lc. 9:28-40)

¹²Na' ka bateyó, baza'a Jesúsen' Betanian' zayeje' Jerusalén na', na' be'nn zan llay Jerusalén na', dan' ba zo rez ga'le lnni na'. Na' be'nn zan ba bnnez akre' llin Jesúsen' Jerusalén na', ¹³bllach ake' jalexh ake' Le'e no'x ake' no zi'n, na' llosia' ake' llasné ake':

—iNbaraz, be'nn nak la'y be'nn ni! iNbaraz be'nnen' za'a, nse'l Xanllo Diosen' le Le'en nnebie'! iNbaraz be'nnen' nak Rey ke Israelen'!

¹⁴Na' bllele Jesúsen' to burr da'o ba bllie', na' gok kan' nyoj xti'll Diosen' nen:

¹⁵ Re' llonre Diosen' xhen gan' nzi'i Sión na', bi llebre na', ba za'a Rey kerén' llie' to burr da'o.

¹⁶Na' be'nn ka' non Jesúsen' txhen bi byejnie' akzere'n. Bayoll got Jesúsen', na' broe'rao Jesúsen' nake' be'nn za'k xhen, kana'll jadinra'll ake' di'll ka' nyoj ke Jesúsen', na'll byejnie' akre'n.

¹⁷Be'nn ka' bre'e kan' balwill Jesúsen' Lázaron', basbane' le'e nench balloje' lo ba na', be'rén ake' be'nn ka' lla'a yellen' di'll kan' goken. ¹⁸Na'llen' jalez be'nn zan kwis Jesúsen', dan' ba ben akre' di'll ke yel wak dan' basbane' Lázaron'. ¹⁹Na'll lle lwellj be'nn fariseo ka': 189 San Juan 12

—Ba bre're bikze bi llak gonllo. Yeololze be'nne ba llzenay ake' ke'e.

To chop be'nn za'k ga yobre bnnab ake' we'rén ake' Jesúsen' di'lle

²⁰To chop be'nn griego ak jen ake' Diosen' xhen rao lnni na'. ²¹Na' be'nn ki ballín ake' gan' zo Felipen', be'nnen' nak be'nn Betsaida gan' nbane Galilea, na' lle ake' le'e:

—Si'xhenchgo', lle'neto' we'rento' Jesúsen' di'lle.

²²Na'll byej Felipen' jawie' Andrésen', na'll llop akte' jell ake' Jesúsen' ka'. ²³Na'll lle Jesúsen' leake':

-Nna' ba bllin lla gak yeolol da llaya'l gak, nench na' wroe'rawa' naka' be'nn za'k xhen. ²⁴Di'll li. di'll li nia' re': Cha' to nbaz trigon' bi chazen lo yo, na' yexhinnjen, naksen toze nbaz; zan cha' yexhinnjen, na' ra'n, da zan trigo yeyaken. ²⁵Noteze be'nn kon lli' yichj ake' gak wen ke ake' yellrio nize, be'nn ka'n kwiayi' ake'. Na' noteze be'nne llsanra'll kwine', biteze da llak ke yellrio ni, wa't yel nban zejlikane ke ake'. ²⁶Na' noteze be'nne lle'n akre' gon ake' xchina'n, llaya'le gon ake' nada' txhen. Na' gan' soa' nada', lekze na' so be'nn ka' yeso'n xchina'n. Noteze be'nne gon xchina'n, Xa' na' gone' gak ake' xhen.

Jesúsen' bdixjwe're' got ake' Le'e

²⁷'Ba llak zozeze lo yichjra'llda'wa'n. ¿Akxha yepa' Xa'n? ¿Llákere nnabre' yesre'e nada' dan' ba zo gak kia' na'n? Bi gona' ka', le ke len na' za'a gak kia' yeolol da ki. ²⁸Na'll balwille' Dios, bne'e:

—Xa, ben nada' nench gakbe'e be'nne nako' be'nn za'k kwis.

Bayoll bne'e ka'n, blloj to be xhnne yebán':

—Nada' ba benkza' nench gakbe'e be'nn naka' be'nn za'k, na' gonllkza' ka' ye to, nench yeyakbe'e akre' naka' be'nn za'ke.

²⁹Na' be'nn zan ka' lla'a na', ben akre' kan' bne Diosen', na' bale' llasné yi'wzi'on gochj. Na' ye bale' llasné ake':

—To anglen' bne'e le'e.

30 Na' Jesúsen' bne'e:

—Diosen' bnne'e nada' zillje, kere nench yenra' nada'n, bnne'e zillje nench yene re'n. ³¹Ba bllin lla wchoybia' Diosen' ke be'nn ka' bi llejle' kia'. Na' ba bllin lla yelloj daxi'on ka'le, dan' llnebia' be'nn ka' lla'a yellrio ni. ³²Na' kate wlis ake' nada' rao yellrion', kana'll gona' nench gonlira'll be'nn lla'a doxhente yellrio nada'.

³³Bne'e ka' nench bnnez akre' akren' got be'nn ka' Le'en. ³⁴Na' be'nn ka' zjalla'a na', lle ake' le'e:

—Neto' ba béneto' kan' ne xti'll Dios dan' nyojen, Criston' soe' ke chnare. Na' rwe', ¿bixchen nezo' nako' Be'nn Gorj Radj Be'nnach, na' ne'o got ake' rwe' to le' yay cruze? ¿Noxha nako' na'n?

³⁵Na'll goll Jesúsen' leake':

—Ye chollzen' zorena' re', na' nsa'a beni' ke yichjra'llda'oren'. Lewzenay kia' chaga nna de latje cho' beni' kia'n lo yichjra'llda'oren', nench bi kweyi'renre da xhinnjen' dan' llnebia' re'n. Le be'nn dá ga nak xchole bi llakbe're' gan' zeje'n. ³⁶Legonlira'll nada' chak nna

zorena' re', nench cho' beni' kia'n lo yichjra'llda'ore.

Bayoll bne Jesúsen' ka', le baza'te' jakwa'chre' leake'.

Zan be'nn Israel ka' bi benlira'll ake' Jesúsen'

³⁷Na' la'kze bre'e be'nn Israel ka', ben Jesúsen' zan yel wak, bi byejle' akze', ³⁸nench bzoa di'll kan' bzoj da Isaías be'nnen' be'e xti'll Diosen' kana', bne'e:

Xana', nono llejle' di'll dan' chixjwe'to'n,

na' nono ba bayakbe'e yel wak ka' ba beno'n.

³⁹Bi gok chejle' ake', le ka'kzen' bzoj da Isaíasen', bne'e:

40 Diosen' bene' nench nak ake' ka be'nn lchole, na' bene' nench nak ake' be'nn nak yichjra'llda'o war.

Na' bene' ka' nench bi re'e akre', na' bi llayakbe'e lo yichjra'llda'o ake'n bi zejen dan' llroe're' leake'n.

na' bi wayat akre', na' bi wayone' leake'.

⁴¹Ka' bne İsaíasen', le bre're' batna'te Jesúsen' nake' be'nn za'k kwis, na'llen' be'e di'll ke'en.

⁴²Na' la'kze naken ka', be'nn zan byejle' ke'e, ren no be'nn wnebia' ka', benlira'll ake' Le'e, na' bi be'e ake' di'll cha' llonlira'll ake' Le'e, le lleb ake' bill wreb be'nn fariseo ka' leake' lo yoda'on. ⁴³Lle'n akllre' sorén be'nnach leake' wen, kerke da sorén ake' Diosen' wen.

Xti'll Jesúsen' wroe'n be'nnach kan' nap ake' do'le

⁴⁴Na'll bne Jesúsen' zillje, golle' be'nn ka' zjalla'a na':

—Be'nn gonlira'lle nada', kere toze nada'n gonlira'lle', renkze Xa' be'nnen' bse'l nada' na'n llonlira'lle'. 45 Na' be'nnen' llre'e nada'n, llre're' be'nnen' bse'l nada'n. 46 Nada' za'a yellrio ni, llgoa' beni' lo vichira'llda'o be'nn ka' llonlira'll nada', nench bill so aklle' rao da xcholen', na' bill gon aklle' da xhinnj. 47 Na' noteze be'nne nnezre' kan' ba bnia'n, na' cha' bi llzenaye' kia', kere nada'n wa'a yel llza'kzi' ke do'l ke'en, le kere za'a yellrion' wa'a yel llza'kzi' ke do'l ke be'nnachen', za'a nench yesra'a be'nn gonlira'll nada'n. 48 Na' de da wchoybia' ke be'nn ka' bi llonlira'll nada'n, le bi llzenav ake' ke dan' ba bnia' na', xti'lla' dan' ba bnia' na'. len na' choybia'n ke be'nn ka' nap ake' do'le, kat llin lla yeyoll yellrio ni. 49 Kere to wrazza'n nia' ka', Xa' be'nnen' bse'l nada' na'n, golle' nada' bi da ka' llaya'l nnia'n, na' bi da llaya'l wroe' wsedra'. 50 Nnezra' dan' nllie' bia'a, nsa'n yel nban zejlikane ke be'nn wzenay len, na' da li kon kan' ne Xa' na'n, ka'n lloe'rena' re' di'll.

Jesúsen' bdibe' nia' be'nn ka' non Le'e txhen

Ka za ga'l lnni paskwn'
Jesúsen' ba nnezre' ba bllin
lla yeze'e yellrion', na' yeyeje' gan'
zo Xe'e Diosen', na' kan' nllie'kzre'
yeolol be'nn ka' llonlira'll Le'en
yellrio ni, na' ka'kze bllie're' leake'
bayollte.

²Na' ka nak ba lla'a ake' llao ake' xche'n, na' ba byo' daxi'on lo yichjra'llda'o Judas Iscarioten', be'nnen' nak xhi'nn be'nnen' re Simón, nench na' wdie' Jesúsen' rao na'a be'nn ka' llwietate Le'en.

3 Na' nneze Jesúsen' ba ben Xe'en Le'e nape' le zeraoze yel llnebia', na' nnezre' gan' zo Diosen' bze'e, na' na'kzen' wayeje'.

4 Na' bzolle'e gan' lla'a ake' llao ake' xche'n, na' golje xhe'e dan' nake' ko'llre', na'll bxhie' to ra'll da bro' lsi'ne'.

5 Na'll bxhie' nis, na' bde'en to lo cha', na'll bzorawe' bdibe' nia' be'nn ka' non Le'e txhen na', na'll bachechte' nia' ake'n kone ra'll dan' ngo' lsi'ne' na'.

6 Na' ka baya'l chibe' nia' Simón Pedro na'n, na'll lle Pedron' Le'e:

—Xana', ¿rwe' chibo' nia'n?

7 Na'll lle Jesúsen' le'e:

—Dan' llona' ni bi llejnie'ro'n nna', zan wllin lla kat chejnie'ro'n.

⁸Na'll lle Pedron' Le'e:

- —Ni ke gonnza' latj chibo' nia'n. Jesúsen' lle'e le'e:
- —Chet ka' bi chiba' nia'on, bill gak gako' nada' txhen chet ka'.

⁹Na'll lle Pedron' Le'e:

—Xana', kere to nia'na'zen' chibo', doxhenkza'n chet ka'.

¹⁰Na'll goll Jesúsen' le'e:

—Be'nn no'ch nazje', nie' na'ze'n lle'nen chall, le doxhene' nake' yalle. Kan' nak re', nak yichjra'llda'oren' yalle, la'kze kere yeololre.

¹¹Le Jesúsen' bnnezre' non' wde Le'e rao na'a be'nn ka' llwietate Le'e. Na'llen' bne'e: "Kere yeololren' nak ra'llda'oren' yalle."

¹²Na'll ka bayoll bdibe' nia' yeololte'n, na'll bayakwe' xhe'e dan' nake' ko'llre, na'll babie' gan' lli' ake' llao ake'n da yobre. Na' lle'e leake':

—¿Llejnie're akre zejen dan' benrena' re' ganni? ¹³Re' nsi're nada' Maestro na' xanre, wenkzen' nere ka', le ka'n naksa'. ¹⁴Nada' la'kze naka' maestro keré na' xanre, ba bdiba' nia'ren' ka llon to be'nn wen llin, na' ka'n llaya'l gakrén lwelljre, gakre ka to be'nn wen llin ke be'nn yobre. ¹⁵Ba bdiba' nia'ren' nench broe'ra' re', llaya'l gonre kan' ba bena' na'. ¹⁶Di'll li, di'll li nia' re': Noteze no be'nn nak be'nn wen llin, bi nake' be'nn llonlle ka xane'n, na' to be'nn zej ga zeje', bi za'klle' ka be'nnen' bse'l le'e na'. ¹⁷Cha' chejnie're da ki, na' gonre kan' bnia'n, na'llen' sore nbaraz.

18'Bi nia' ka' ke yeololre. Nombia' yichjra'llda'o toto re' ba breja' nench sorenre nada' txhen. Na' nnezra' gak kan' ne xti'll Diosen' dan' nyojen nen: "Be'nnen' bdaorén nada' txhen, ba brej bchekwe' nada'." ¹⁹Llepa' re' da ki za gak, nench kat ba goken na', na'll chejle're naka' be'nn bse'l Dios, kan' ba bnekza' re'. ²⁰Di'll li, di'll li nia' re': Be'nn wrebe noteze be'nn llse'la', nadkza'n llreb ake' chet ka', na' be'nn wrebe nada', leska' Dios na'kzen', llreb ake', be'nnen' bse'l nada'.

Jesúsen' bne'e to be'nn ka' non Le'e txhen na' wdie' Le'e rao na'a be'nn ka' llwie Le'e

(Mt. 26:20-25; Mr. 14:17-21; Lc. 22:21-23)

²¹Bayoll bne Jesúsen' ka', bzorao llakya'che' lo ra'llda'we'n, na' golle' leake' lixheje:

—Di'll li, di'll li nia' re': To re' wdere nada' rao na'a be'nn ka' llwie nada'.

²²Na' be'nn ka' non Le'e txhen na', kon llaswia rao lwellj ake', llon ake' xhbab cha' nore ke'en bne'e ka'. ²³Na' to be'nnen' lli' kwite'n, le nllie' Jesúsen' le'e. ²⁴Na'll ben Pedron' sen rao be'nn na', nench bnnabre' Le'e no ke'en ne'e ka'. ²⁵Na'll jabi'ye' awllo, lle'e Jesúsen':

—¿Noxhan' gon ka', Xana'?

26 Na'll lle'e le'e:

—Be'nnen' wa'a yet xtir na' kat ba blabja'n lo yel wao na', le'en gon ka'.

Na'll blabje' ra't yet xtiren' lo ye'nnen', na' le be'te'n Judas Iscariote, be'nnen' nake' xhi'nn be'nnen' re Simón. ²⁷Na' ka bayoll be'e Judasen' yet xtiren', le byazte daxi'on lo yichjra'llda'o Judasen'. Na'll lle Jesúsen' le'e:

—Dan' ba zo gono' na', le benten. ²⁸Na' ni to be'nn ka' zjalli'rene' txhen na', bi byejnie' akre' bixchen golle' le'e ka'. ²⁹Bale' llak akre' dan' no'x Judasen' gan' lla'a mell na'n, lle'e le'e ka', na' lljaxie' da yallj rao lnni na'n o cha' we'e mell da yallje no be'nn ya'ch aken'. ³⁰Ka bayoll bdao Judasen' yet xtir dan' be'e Jesúsen' le'e, le bllojte'. Na' ba nak ba gol kwis.

To da kobe nllia Jesúsen' bia'a gonllo

³¹Bayoll blloj Judasen', bne Jesúsen':

—Nada' Be'nnen' Gorj Radj Be'nnach, na' ba broe'rawa' naka' be'nn za'ke, na' leska' ba llroe'ra' nak Diosen' be'nn za'k kwis. ³²Na' dan' llroe'ra' nake' be'nn za'k na', na' lekze Le'en wroe're' naka' nada' be'nn za'ke, na' le gonte'n nna'. ³³Xhi'nna' da'o ak, ye chollzen' zorena' re'. Na' yeyirjre nada', na' nia' re' kan' golla' be'nn Israel ka', bi gak yeza'renre nada' gan' yeya'a na'. ³⁴To da kobe llia' bia'a gonre, llie' lwelljre. Kan' ba bllie'ra' re', na' ka'kze re' llie're lwelljre. ³⁵Na' cha' soteze sore llie' lwelljre, kone ka' nneze be'nn ak, da likzen' nxenra'llre nada'.

Jesúsen' bne'e ka gon Pedro bi wchebe' cha' nombie' Le'e

(Mt. 26:31-35; Mr. 14:27-31; Lc. 22:31-34)

³⁶Na' Simón Pedron' bnnabre' Le'e:

—Xa, ¿gaxhan' wayejo'? Na'll lle Jesúsen' le'e:

—Gan' yeya'a na', bi gak yeza'reno' nada' nna', zan tere wayedo' yenao' nada'.

³⁷Na'll lle Pedron' Le'e:

—Xa, ¿bixchen bi gak yeza'rena' rwe' nna'? Wsanra'll kwina' kere bi gonen cha' gata', ni ko'o rwe'.

³⁸Na'll lle Jesúsen' le'e:

—¿Da bare lle'nro' wsanra'll kwino' gato' ni kia' nada'? Di'll li, di'll li nia' rwe': Ka za kwellre lekwn' ba gok chonn ras bi wchebo' cha' nombia'o nada'.

Be'nn llonlira'lle Jesúsen', Dios xe'e na'kzen' nombie'

Leska' bne Jesúsen':
—Bi gakllejla'llre,
legonlira'll Dios, na' leska'
legonlira'll nada'. ²Da zan yo' lla'a
gan' zo Xa' Diosen'. Chenak bi
naken ka', bi golla' re' ka'. Na' nna'
yeya'a, na' lljayencha'wa' yo' ke
keré. ³Na' kat yeyoll lljayencha'wa'
yo' keré ka', kana' yeda' da yobre
yechia' re', nench yedzore gan'
lljazoa' nada'. ⁴Ba nnézkzere gan'
yeya'a na', na' ba nombia're nezen'
nench yellinre na'.

193 San Juan 14

⁵Na'll lle Tomásen' Le'e:

—Xana', bi nnézeto' gaxhan' wayejo'. ¿Akxha gonto', na' nnézeto', na' yellinto' to li?

⁶Na'll lle Jesúsen' le'e:

—Nada'n naka' nezen', na' nsa'a di'll li, na' toz nada' llak lloa' be'nne yel nban zejlikane. Ni to be'nne bi yellín gan' zo Xa'n, cha' bi gonlira'lle' nada'. ⁷Cha' nombia're nada', renkze Xa' na'n nombia'renre. Na' nna' ba nombia're', na' ba bre're'.

⁸Na'll lle Felipen' Le'e:

—Bennchek latje re'to' Xa'on, na' kone len chejle'to'.

⁹Jesúsen' lle'e le'e:

—Felipe, da xhen na', ba bzorena' re'. ¿Na' bi nna gombia'o nada'? Noteze be'nne ba bre'e nada'. Xa' na'kzen' ba bre're'. ¿Bixchen llnnabzero' nada' re'ro' Xa' na'? 10 ¿Bi llejle'o Xa' na'kzen' zerén nada', na' nada' zerena' Le'e? Di'll dan' lloe'rena' re', kere da lloa'a to wrazza'n. Xa' na'n zerene' nada', Le'en llone' nench lloa'a di'llen' dan' lle'nre' wa'a na'. 11 Lechejle' kia' zerena' Xa' na', na' Le'en zerene' nada'. Na' cha' bi llejle're xti'lla' na', lechejle' kia' dan' ba bre're yel wak ka' ba bena' na'. ¹²Di'll li, di'll li nia' re': Be'nn ka' llonlira'll nada', da ka' llona'n wakte gon ake'n. Na' da za'kll gon ake', le waya'a gan' zo Xa'n. ¹³Na' biteze da nnábere Xa'n, dan' llonlira'llre nada'n naka' Xhi'nne', gona'n, nench wroe'ra' nak Xa'n be'nn za'k kwis. 14 Na' biteze da nnabre, dan' llonlira'llre nada'n, nada' gonna'n.

Jesúsen' bne'e wse'le' Spíritu ke Diosen'

¹⁵'Cha' nllie're nada', legón kan' nllia' bia'a na'. ¹⁶Na' nnabra' Xa'n nench wse'le' Spíritu ke'en sorenen re' ke chnare, na' gakrenen re'. 17 Na' Spíritu ke Dios na', wzejnie'n re' da nak da li. Na' be'nn bi llonlira'll ak Diosen', bi gak sorén Spíritu ke'en leake', le bi llre'e akre'n, na' ni ke llejle' akze' cha' zon. Zan re' nombia'ren, le zerenkzen re', na' son lo yichjra'llda'oren'. ¹⁸Bi yekwa'nna' re' ka xkwi'd wazebe. Wedkza' ye to gan' zore ni. 19 Ye chollze na' bill re'e be'nn ka' nada', be'nn ka' bi llonlira'll Dios, zan re' wre'llkzere nada', le nada' nbana', ka'kze re' banre ke chnare. ²⁰Na' kat llin lla yedsó Spíritu ke Diosen' lo yichjra'llda'ore, kana'llen' gakbe're nada'n zorena' Xa'n, na' re' zorenre nada', na' nada' zerena' re', ²¹Be'nn nnez akre' dan' nllia' bia'a gon ake'n, na' llon ake'n, be'nn ka'n ba nllie' akre' nada'. Na' be'nn ka' nllie' nada', lekze ka' llie' Xa'n leake', na' nada' lekze llie' akre', na' gona' ka gombia' akllre' nada'.

²²Na' Judas na' (kere Judas Iscariote) lle'e Le'e:

—Xanto', ¿bixchen wroe'raozo' chraoze neto', na' bi wroe'rao' be'nn ka' bi llonlira'll Dios na'?

²³Na' goll Jesúsen' le'e:

—Be'nn nllie' akre' nada', llzenay ake' xti'lla'n, na' Xa'n lekze llie're' leake', na' nada' ren Xa' na', yedsorén aktoe'. ²⁴Be'nn bi nllie' nada', bi llzoa ake' xti'lla'n. Na' di'll dan' lloa'a na', kere kia' to wraza'n, kon da ne Xa' be'nnen' bse'l nada' na'n ba bnia'.

²⁵'Da ki ba bnia' chak nna zorena' re' ni. ²⁶Zan Xa'n wse'le' Spíritu ke'en son lo yichjra'llda'ore gonlira'llre nada' nench gakrenen re'. Na' Spíritun' wzejnie'n yeolol da llaya'l nnézere, na' lljasa'ralle'n re' yeolol da ka' ba bnia'.

²⁷ 'Yel nbaraz kia'n llkwa'nna'n, yel nbaraz kia'n gonna' re'. Bi llonna'n kan' llonn be'nn ka' lla'a yellrio ni len. Bit gakgane ra'llda'ore, na' bi llebre. ²⁸ Ba bénere bnia' yeya'a gan' zo Xa' na', na' wadzorenkza' re' da yobre. Na' cha' do ra'llre nllie're nada', na' yewere dan' yeya'a gan' zo Xa'n, le Xa' na' za'klle' ka nada'. ²⁹ Na' ba be'rena' re' di'll ka', chaga bi nna gaken nench na', katen' gaken na', gonlira'llre nada'.

30 'Bill we'rena' re' di'll zan, le ba za'a daxi'on dan' llnebia' be'nn ka' bi llonlira'll nada', zan bibi de gon ren nada'. 31 Llona' kon kan' nllia Xa'n bia'a, nench nneze be'nnachen' nllie'ra' Xa'n. Leyezolla'a, leyeyo'o.

Jesúsen' nake' ka to yay da llbia uvas

'Nada' llonen kia' ka ke to yay da llbia uvas, na' Xa' na', nake' ka to be'nn llonchi'i len. ²Na' re' llonlira'llre nada', nakre ka to xho'z yay na'. Na' xho'ze ka' dan' bibi llbian', wchoye'n. Na' xho'ze dan' Ilbia uvas na', llonchie'n nench llbiallen ye ra't da zanlle. ³Na' re' ba nakre ka to xho'ze dan' ba nonchie', le ba llzenavre xti'lla' dan' ba be'rena' re'. ⁴Lesechichrén nada' nench ka' sechichrena' re'. Kan' nak xho'z yayen', bibi llbian to wraze cha' bi nka'n le' yayen', ka'n naken ke re', bi gakre gonre kan' lle'ne Diosen', cha' bi serenre nada'.

⁵'Nada' za'krebra' ka to yay da llbia uvas, na' re' nakre ka xho'ze. Notezre cha' sechichrenre nada', lekze ka' sechichrena' re', na' gakre kan' llazra'll Diosen', ka'kzen' naken ke yay uvas dan' llbiachachen, le bibi gak gonre to wrazzre. ⁶Be'nn bi sechichrene' nada', na' gak ke'e kan' llak ke xho'z yay dan' bi llbia, llchoye'n na' llyechen, na' ll-llin lla llatope'n, na' lla'den yi' nench lleyen.

7'Na' re' cha' sechichrenre nada', na' zechichre wzenayre xti'lla'n, biteze da lle'nere nnábere Diosen', gonnkze'n. ⁸Llazi'i Xa'n bara'nn xhen kate zore llonre kan' llazra'lle'n, na' cha' llonre ka', na' gakbe'e be'nne da likzen' llonlira'llre nada', na' llzenayre kia'. ⁹Kan' llon Xa'n nllie're' nada', leska' nada' ba nllie'ra' re'. Lesó legón kan' nia' na', nench gakbe're nllie'ra' re'. ¹⁰Cha' gonre kan' nllia' bia'a gonre, na'llen' gakbe're nllie'ra' re', le nada' llona' dan' nllia Xa'n bia'a gona', na' llakbe'ra' nllie're' nada'.

¹¹'Ka'n ba bnia' re', nench sore nbaraz ka nbarazeni zoai nadai. Zera'lla' sore nbaraz kwis. 12 Na' da ni nllia' bia'a gonren', llie' lwelljre kan' nllie'ra' nada' re'. ¹³Nono zo be'nne nllie'llre lwellje' gone' ka da ni, wsanra'll kwine' gate', ni ke be'nn lwellje' ka' nllie're' na'. 14 Na' re' nakre be'nn nllie'ra' cha' llonre kan' nllia' bia'a na'. ¹⁵Na' bill nia' nakre be'nn wen llin kia', le to be'nn wen llin, bi nnezre' yeolol dan' llon xane'n, zan nia' nakre be'nn nllie'ra', le yeolol dan' ba benra' bne Xa'n, ba bzejnie'ra'n re'. ¹⁶Kere re'n brejre nada', nada'n breja' re', na' naka' xanren'. Na' llse'la' re' nench lljenre kan'

llazra'll Xa' na', na' kere da te ke da ka' gonren'. Na' yeolol da wnnábere Xa'n, gonkze'n dan' llonlira'llre nada' na'. ¹⁷Na' da ni nllia' bia'a gonre, llie' lwelljre.

Be'nn bi llonlira'll Dios llwie akre' be'nn llzenay ke Jesúsen'

¹⁸'Cha' be'nn bi llonlira'lle Diosen', llwie akre' re', lenneze zga'tek nada'n bwie akre'. 19 Chenak re' llonre txhen be'nn ka' bi llonlira'll Diosen', na'llen' llie' akre' re', kan' nllie' lwellj ake' chenake. Zan ba breja' re' nench llzenayre kia', na'llen' llwie akre' re', dan' bi llonrén akre' txhen. ²⁰Lelljasa'ra'll kan' bnia' re'n: "Noteze be'nn nak ka to be'nn wen llin, bi nake' be'nn llonlle ka xane'n." Chet ka' nada' ba bsa'kzi' be'nn, leska' gon akre' re'. Na' cha' ba bzenay ake' xti'lla'n, leska' wzenay ake' xti'll re'n. ²¹Na' dan' bi nombia' ake' Dios be'nnen' bse'l nada'n, len na' llon akre' re' ka', le llwie akre' re', dan' llzenayre kia! na!.

22'Chenak nada' bi beda' yedzejnie' akre', bibi do'l nap ake' chenake. Zan nna' bibi de wde akre', ne ake' bibi do'l nap ake'.
23 Be'nn llwiere nada' renkze Xa' na'n llwiere'.
24 Ba bena' yel wak da nono nna gon, na' chenak bi bre'e akre'n, bibi do'l nap ake'. Zan ka naken ba bre'e akre' da ki, llia bia'kze llwie akre' nada' ren Xa' na'.
25 Na' llak kan' nyoj xti'll Diosen' dan' llsed ake' gan' nen: "Bwie akre' nada', la'kze bibi da xhinni bena'."

²⁶'Na' katen' yed Spíritu dan' wayonxhenra'll re', dan' za'a gan' zo Xa' na', Spíritu dan' lloe' di'll li, len we'e di'll li akre nak kia' nada'.

²⁷Leska' re' llaya'le we're xti'lla'n,
le ba bzerenre nada' chak ba
bdixjwe'ra' xti'll Xa' Diosen'.

16 'Ba bnia' re' yeolol da ki nench bi gakllejla'llre. ²Le wabej ake' re' lo yoda'o ke ake' ka', na' wllin lla kat noteze be'nn got ake' re', gak akre' llawé Dios kan' llon ake'n. ³Gon akre' re' yeolol da ka', le bi nombia' ake' Xa'n, ni nada'. ⁴Nia' re' da ki nench kat llin lla gak kan' bnia'n, lljadinra'llre.

Dan' llon Spíritu ke Diosen'

'Bi bnia' re' yeolol da ka' gak kerén', ka llan' bzorawa' bzejnie'ra' re' xti'll Diosen', le nna zokza' llakrena' re'. ⁵Na' nna' waya'a gan' zo Xa' be'nnen' bse'l nada' na'. ¿na' ni tore bi llnnábere nada' gaxhan' waya'a? 6Na' dan' bnia' ka' ba llakya'chere. ⁷Di'll lin' ba bnia', llonen bien waya'a, le cha' bi waya'a, bi yedsó Spíritu ke Xa' Diosen' lo yichjra'llda'oren' gakrenen re'. Waya'a na'llen' wse'la'n. 8Na' kat yed Spíritun', wzejnie'n be'nnach nap ake' do'le, na' wzejnie'n non' nak be'nn wen rao Dios, na' wzejnie'n ga't yel llza'kzi' ke chnare ke be'nn bi wzenay kia'. ⁹Spíritun' wzejnie'n leake', nap ake' do'l dan' bi llonlira'll ake' nada'n. 10 Na' wzeinie'n leake' non' nak be'nn wen rao Dios, le waya'a gan' zo Xa' Diosen', na' re' bill re're nada'. ¹¹Na' wzejnie'n leake', ga't yel llza'kzi' ke do'l ke ake'n ke chnare, le daxi'on dan' llnebia' rao yellrio ni, ba nlloybia'n sa'kzi'n ke chnare.

¹²'Nna' dell da zan da nnia' re', zan naken bni' chejnie'ren San Juan 16 196

nna'. ¹³Na' kat yedsó Spíritu ke Diosen' dan' lloe' di'll lin', len ko' re' nez rao yeololte da nak da li, le kere we'n di'll to wrazzen, kon we'n di'll da llzene Xa' na' len na', na' chixjwe'n re' bi da ka' za gak. ¹⁴Spíritun' gonen nench wroe'rawe, naka' be'nn za'ke kwis, le yeolol kan' naka' nada' wroe'n re'. ¹⁵Yeololte bi da de ke Xa'n naken kia', ke len na' golla' re', Spíritun' wroe'n re' yel nbaraz kia'n.

Jesúsen' bne'e chollzen' gakya'ch akre', te na' yewé akre'

¹⁶'Ye chollze na', bi re're nada', na'll te na', yere're nada' da yobre, le waya'a gan' zo Xa' na'.

¹⁷Na' bal be'nn ka' non Jesúsen' txhen, lle lwellj ake':

—¿Akre zejen dan' lleze' lli'o, ye chollze na', bill re'lloe', na' te na', yere'lloe' da yobre? Na' ¿akre zejen dan' ne'e, wayeje' gan' zo Xe'en?

18 ¿Bi zejen dan' ne'e ye chollzen'?
Bi llejnie'llo dan' ne'e ka'.

¹⁹ Jesúsen' gokbe're' lle'ne be'nn ka' nnab akre' Le'e, akre zejen ka di'll ka', na'll golle' leake'n:

—¿Ba llnnabe lwelljre dan' bnia'n: "Ye chollze na' bill re're nada', na' te na', yere're nada' da yobre"? ²⁰ Di'll li, di'll li nia' re': Kwellre na' gákere, chak yewé be'nn ka' bi llonlira'll Diosen'. Gakya'chere, zan chollze gakya'chere, te na' na'll yewere. ²¹ Ka ke to no're zan, ll-llayrawe' chak llake bes yel zan na'. Na' kat ba gorj bda'o ke'e na', bill llone' xhbab dan' bllayrawe'n, ba llawere' ba gorj ye to be'nnach yellrio ni. ²² Ka'kzen' ke re', ba llakya'chere nna', zan kat yellayllo da yobre sore

nbarazlle, na' nono gak yeka'a yel llawé ke lo yichjra'llda'oren'.

²³'Na' kate ba bllin lla lljazoa' da yobre gan' zo Xa'n, kana' billbi nnábere wzejnie'ra' re'. Di'll li, di'll li nia' re': Dan' llonlira'llre nada'n, biteze da nnábere Xa'n, gonnkze'n re'. ²⁴Xte nna' bibi nna nnábere Xa'n, ni ke dan' llonlira'llre nada'n. Na' nna' lennabe Xa'n, na' gonne'n nench sore nbaraz kwis.

Criston' bene' yenit yel llnebia' ke daxi'on

²⁵'Da zan ba bnia' re' kan' bsa'krebra' bi da ka'. Wllin lla kate bill wzejnie'ra' re', wsa'krebra' bi da ka' llzejnie'ra' re'n. Na' wa'a di'll da chejnie're kat wzejnie'ra' re' ke Xa'n. ²⁶Na' kat llin lla na', kana' nnábere Xa'n bi da nnábere, ni ke dan' llonlira'llre nada'. Bi yalljen nnabra' Xa'n gakrene' re'. ²⁷Le kwinkze Xa' na'n nllie're' re', dan' nllie're nada'. ²⁸Gan' zo Xa' Dios na'n, bza'a beda' yellrio ni, na' nna' yeza'a yellrio ni. Na' waya'a gan' zo Xa'n da yobre.

²⁹Na'll goll ake' Le'e:

—Ba lloe'o di'll da ba llejnie'to', na' bill llsa'krebro' bi da ka' llzejnie'ro' neto'n. ³⁰Na' ba gokbe'to' nombia'o yeolol xhbab ke be'nnach. Ba nnezro' bin' lle'ne be'nne nnezre' kat za nnabtere'n. Ke len na' ba llejle'to' za'o gan' zo Diosen'.

³¹Na'll lle Jesúsen' leake':

—¿Ba llejle're nna'? ³²Ba bllin lla nna', na' ba go'l gaslasre. Totore wka'a xhnnez ke keré, na' wkwa'nnre toza'. Zan bi zoa' toza', Xa' na'n zorenkze' nada'. ³³Ba bnia' re' ka', nench na' nni'tre nbaraz, legonlira'll nada'. Yellrio ni sa'kzi're, bi gakllejla'llre, nada' ba bena' yenit yel llnebia' ke daxi'on, dan' zo llnebia'n yellrio ni.

Jesúsen' nnabe' rao Diosen' ke be'nn ka' non Le'e txhen

Bayoll bne Jesúsen' da ki, na'll bwie' yebáre bne'e:

—Xa, ba bllin lla gak kia', dan' ba bllia'o bia'a gak kia'n. Ben nench nakbie' nada'n, naka' xhi'nno', naka' be'nn za'k xhen, nench gona' re'e akre', nako' be'nn za'k xhen.

Ba benno' nada' yel llnebia' rao be'nnach, nench lloa'a yel nban zejlikane ke yeolol be'nn ka' ba brejo' llonlira'll nada'n.

Ba benno' nada' yel nban zejlikane: gombia' akre' rwe', le tozo' rwe'n nako' Dios li, na' leska' gombia' akre' nada'n, Jesucristo, be'nnen' bse'lo'.

4'Rao yellrio ni, ba bena' nench nakbie' nako' be'nn za'k, na' ba bayoll bena' yeolol da bro' rao na' gona'. ⁵Na' nna' Xa, ben nench na' wroe'n naka' be'nn za'k, kat yeyeda' gan zo'o na', doxhen kan' broe'n kan' bzoa' gan' llia'o na', kan' za xete yellrio.

6'Be'nn ka' ba brejo' rao yellrion', nench na' beno' leake' rallna', ba broe'ra' leake' noxhan' nako'. Be'nn ko'on nak ake', na' ba beno' leake' rallna', na' ba bzenay ake' xti'llo'n.

Na' ba nnez akre' yeolol dan' llona', na' yeolol di'll dan' lloa'an, naken ko'o rwe'. Le ba be'rén ake' di'll dan' ba bzejnie'ro' nada', na' ba bzenay ake'n, na' ba llakbe'e akre', da likzen' bza'a gan' zo'o na', na' llejle' ake' rwe'kzo'n bse'lo' nada'.

⁹ 'Na' llnnaba' gakrén akoe'. Bi llnnaba' gakreno' yeolol be'nnach, kon be'nn ka' ba brejo' na'n, gakreno' le ba llonlira'll ake' nada', na' ba nak ake' rallna'o. ¹⁰ Na' yeolol be'nn llonlira'lle nada', leska' llonlira'll ake' rwe'. Na' ka' noteze be'nne nak rallna'o, leska'kze nak ake' rallna' nada', na' be'nn ka' llonlira'll nada'n, llroe' akre' naka' be'nn za'ke.

11'Na' nna' bill soa' yellrio ni, zan be'nn ki llonlira'll nada'n, nna zjani't akse' rao yellrio ni, na' nada' ba zaza'a gan' zo'o na'. Xa, nako' le zeraoze be'nn ra'llda'o yalle, na' llnnaba' gakrén akoe', wkwaso' da xhinnjen' ka'le, nench nni't ake' gak ake' toze ren no lwellj ake', kan' nak lli'o toze. 12 Chak bzorén ake', benrena' yel llnebia' ko'on llin, nench bkwasa' da xhinnjen' ka'le. Ke len na', ni toe' bi blleyi', kon toze be'nne ba naken kweyi', nench gak doxhen kan' ne xti'llo' dan' nyoj na'.

13'Na' nna' ba zaza'a gan' zo'o na', na' chak nna zoa' yellrio ni, lloa'a di'll ki nench nni't be'nn ki nbaraz, ka nbarazen' zoa' nada'. ¹⁴Nada' ba be'rén ake' xti'llo'n. Na' be'nn ka' bi llonlira'll rwe'n, llwie akre' be'nn ka' llonlira'll nada'n, dan' bi llonrén ake' leake' txhen, ka'n ben akzre' nada', le bi benrena' leake' txhen. ¹⁵Na' ka nak be'nn ka' llonlira'll nada'n, bi llnnaba' yeka'a akoe' rao yellrio ni, llnnaba' gakrén akoe' na' wkwe'jo' leake' rao biteze da xhinni da de rao vellrio ni. 16 Leake' bi nak ake' txhen be'nn ka' llon da xhinni, dan' de rao yellrio ni, ka nada' bi llona' txhen da xhinnjen',

San Juan 17, 18 198

da de rao yellrio ni. ¹⁷Ben nench yichjra'llda'o be'nn ka' llonlira'll nada', gaken yall kone di'll li ko'o na'. Le di'll ko'on naken da li. ¹⁸Rwe'n bse'lo' nada' yellrio ni, nench baddia' xti'llo'n, leska' nada' llse'la' leake', we'e ake' xti'lla'n rao yellrio ni. ¹⁹Non kwina' rallna'o, nench na' leake' gak ake' yall kone di'll li ko'o na'.

²⁰'Na' bi llnnaba' gakreno' to leakze', leska'kze gakreno' be'nn ka' za gonlira'll nada', kat yen akre' di'll dan' lloe' be'nn ki. ²¹Xa, ben nench yeolole' gak ake' toze ren lwellj ake', na' gak ake' lli'o txhen, ka rwe' nako' toze ren nada', na' nada' naka' rwe' toze. Ben nench yeyoll gak ake' lli'o toze, nench gakbe'e be'nn ka' bi llonlira'll rwe'n, rwe'kzo'n bse'lo' nada'. ²²Na' vel bara'nn dan' benno' nada', ba be'e ake'n nench nak ake' toze ren be'nn lwellj ake', kan' nak lli'o toze. ²³Leake'n nak ake' nada' txhen, na' nada' naka' rwe' txhen. nench yeolol-llo gakllo toze. Gakllo toze nench gakbe'e be'nn ka' bi llonlira'll rwe'n, rwe'kzo'n bse'lo' nada', na' gakbe'e akre' nllie'kzro' be'nn ka', kan' nllie'ro' nada'.

²⁴'Xa, nllie'ro' nada' ka bi nna xe yellrio na'te, na' nono' nada' be'nn za'ke. Na' lle'nra' be'nn ki brejo', llonlira'll ake' nada', yedzorén ake' nada' gan' yedzoa'n, nench re'e akre' naka' be'nn za'ke. ²⁵Xa, nako' be'nn llon da zej to lilla. Na' ka nak be'nn ka' bi llonlira'll nada'n, leska' bi nombia' ake' rwe', zan nada' nombia' rwe', na' be'nn ka' ba brejo' gonlira'll ake' nada', nnez akre' rwe'n bse'lo' nada'. ²⁶Na' ba bzejnie'

akre' kan' nako'n, na' kan' llono', na' za wzejnie' akllere', nench gakbe'e akre' nllie' akroe' kan' nllie'ro' nada', na' sorena' leake'.

Kan' gok kan' be'x ake' Jesúsen' (Mt. 26:47-56; Mr. 14:43-50; Lc. 22:47-53)

Bayoll be'rén Jesúsen' **▲O** be'nn ke'e ka' non Le'e txhen na' di'll, na' bza'rene' leake', na' jake' chla' yeo gan' nzi'i Cedrón, gan' de to re'j ga naz ake' zan yay dan' nzi'i olivos. Na' blla'a ake' lo re'ien'. ²Na' Judas be'nnen' ba naken gone' Jesúsen' rallna'a be'nn ka' llwie Le'en, leska' nombie' latjen', le da zan ras ba badop be'nn ka' non Jesúsen' txhen ganna'. ³Ka goken bllin Judasen', na' nche'e zan waka'a ya ka', na' ye txhonni be'nn ka' llap yoda'o braon', be'nn bse'l bxoz wnebia' ka', na' ren be'nn fariseo ka', nench go'x ake' Jesúsen'. Zjano'x ake' no da llseni', na' zjano'x ake' no yi' yell yay, na' zjana'l ake' spad. ⁴Na' Jesúsen' ba nnezre' yeolol ka da ka' gak ke'en, na'll blloje' jatile' leake', na'll golle' leake!:

—¿No llayirjre?

⁵Na'll lle ake' Le'e:

—Jesús be'nn Nazaret. Na'll goll Jesúsen' leake':

—Nada'n.

Na' Judas be'nnen' wde Le'e rao na'a be'nn ka', llwie Le'en, zerene' leake'. ⁶Kate goll Jesúsen' leake': "Nada'n", le babi' akte' sko'llre, byal ake' rao yon'. ⁷Na'll da yobre goll Jesúsen' leake':

—¿Non' llayirjre? Na'll bne ake':

—Jesús be'nn Nazareten' llayirjto'.

⁸Na' bne Jesúsen':

—Ba bnetia'. Cha' nada'n llayirjre, lewe'e latje wayej be'nn ki.

⁹Ka' bne'e nench gok kan' ba bdixjwe're', kan' bne'e: "Ni to be'nn ka' ba brej Diosen' gonlira'lle nada', bi kweyi' ake'." ¹⁰Na' Simón Pedron' na'le to spad, na' le blechjte'n bdine'n be'nn wen llin ke bxoz braon', bchoyte' naye' cha'wen'. Na' be'nnen' benre' ka', re'e Malco. ¹¹Na'll lle Jesúsen' Pedron':

—Bago' spad ko'on lo rille. ¿Llakro' bi llaya'l gak dan' ba nllia Xa' Diosen' bia'a gak kia'n?

Bche'e ake' Jesúsen' rao be'nnen' re Anás

(Mat. 26:57-58; Mr. 14:53-54; Lc. 22:54)

12 Na' waka'a ya ka' ren xan ake'n, na' be'nn ka' llape yoda'o brao ke be'nn Israel ka', be'x ake' Jesúsen', na' bchej ake' Le'e. 13 Na' bche'e ake' Le'e da nell rao be'nnen' nzi'i Anás, xa no'r ke be'nnen' nzi'i Caifás. Na' Caifás na' goke' bxoz brao ke be'nn Israel ka', ka iz na'. 14 Na' Caifás na'n golle' be'nn wnebia' ka', naksen wen ke ake', toze be'nne gat ker ke da kweyi' yeolole'.

Pedron' bi bchebe' cha' nombie' Jesúsen'

(Mt. 26:69-70; Mr. 14:66-68; Lc. 22:55-57)

15 Simón Pedron' ren ye to be'nn non Jesúsen' txhen, bnao ake' Le'e. Na' bxoz braon' nombie' be'nnen' ye to, na'llen' gok byo'rene' Jesúsen' lia' ke bxoz braon'. 16 Na' Pedron' baga'nne' lloa' yo'ze. Na' be'nnen' ye to, dan' nombie' bxoz wnebia' na'n, be'rene' no'ren' di'lle, be'nnen' lli' llape' lloa' yo' na',

nench broe' Pedron'. ¹⁷Na' no'ren' llap lloa' yo' na', golle' Pedron':

—¿Kere reno' rwe'n llzenayo' dan' llroe' llsed be'nn ni?

Na'll bne Pedron':

-Ka'a, bi rena'.

18 Na' llak zay, na' nbek be'nn wen llin ka' to yi' barje, na' zjazellá ake' lloa' yi'n, llacha'a kwin ake'. Na' Pedron' le jaserente' leake' lloa' yi'n, llacha'a kwine'.

Bnnab akre' Jesúsen' bi dan' llroe' llsedre' be'nn ka'

(Mt. 26:59-66; Mr.14:55-64; Lc. 22:66-71)

¹⁹Na' be'nnen' nak bxoz braon', bnnabre' Jesúsen' non' llzenay dan' llroe' llsedre'n, na' dan' llzejnie're'n. ²⁰Na' lle Jesúsen' leake':

—Ba bia'a di'll doxhente, na' da zan ras broe' bsedra' lo yoda'o kellon', na' lia' yoda'o brao, gan' ll-llay yeolol be'nn wrall kello ka'. Na' bi bia'an ga nga'ch.

21 ¿Bixchen llnnabzro' nada'?
Bnnabe be'nn ka' badzenay dan' broe' bsedra' na'. Leake'n nneze bi di'llen' bia'a.

²²Bayoll bne Jesúsen' ka', na' to be'nnen' llape yoda'o brao na', zerene' ganna', le bro'te' to ke xa'ye', lle'e Le'e:

—¿Ka' llaya'l yelli'o di'll ke be'nnen' nak bxoz braon!?

²³Na'll goll Jesúsen' le'e:

—Cha' bi da xhinnj ba bnia', bne chet ka', na' cha' bnia' da wen, ¿bixchen llgapo' nada'?

²⁴Na' Anásen' bdie' Jesúsen' nllejteze' ta'ke' rao Caifásen', be'nnen' nake' bxoz braon'. San Juan 18 200

Pedron' bi bchebe' cha' nombie' Jesúsen'

(Mt. 26:71-75; Mr. 14:69-72: Lc. 22:58-62)

²⁵Na' lli' Pedron' lloa' yi'n nench llalle're', na'll lle be'nn ka' zjalla'a na' le'e:

—¿Kere renkzo' rwe'n nako' be'nn ke be'nn ni?

Na' bi bchebe', bne'e:

—Ka'a, bi rena'.

²⁶Na' to be'nn wen llin ke bxoz braon', nake' bi'ch lwellj be'nnen' bchoy Pedron' nay na', na' golle' le'e:

—¿Kere rwe'n bre'ra' reno' Jesúsen' lo re'j, gan' lla'a yay olivos ka'?

²⁷Na'll Pedron' da yobre kere bchebe', na' le bllellte lekwn'.

Bche'e ake' Jesúsen' rao Pilaton'

(Mr. 27:1-2, 11-14; Mr. 15:1-5; Lc. 23:1-5)

²⁸Ka ba lleni' na', brej ake'
Jesúsen' gan' zo Caifásen', na'
bche'e ake' Le'e rao be'nnen' llon
yel koxchisen'. Na' bi byo'rén be'nn
ka' ll-lliayi'll Jesúsen', gan' zo
be'nnen' llon yel koxchisen', le kan'
nak dan' nao be'nn Israel ka', bi gak
gao ake' katen' ga'l lnni paskwn',
cha' cho' ake' gan' zjalla'a be'nn bi
nake be'nn Israel. ²⁹Na'llen' blloj
Pilaton' lle'e leake':

—¿Bixha ben be¹nn nin¹? ¿Bi ken llaore xhia ke¹e?

³⁰Na'll bne be'nn wnebia' ka':

—Chenak be'nn ni bi nake' be'nn wen da xhinnj, bi yedwa'toe' rao na'o chenake.

³¹Na'll lle Pilaton' leake':

—Leyeche'e cha', na' legón yel koxchis ke'en kan' ne ley keré na'.

Na'll ne be'nn wnebia' ke Israel ka':

—Bi de latj gotto' no be'nne.

³²Na' bzoa di'll kan' bne Jesúsen' kan' bzejnie're', akre gon ake' got ake' Le'e. ³³Na'll bayo' Pilaton' lo yo'n da yobre, na'll goxhe' Jesúsen', lle'e Le'en:

—¿Rwe'n nako' Rey ke be'nn Israel ka'?

34 Na'll lle Jesúsen' le'e:

—¿Da gorjla'llzo'n llnnabo', cha' nollren' goll rwe' ka'?

35 Na'll lle Pilaton' Le'e:

—¿Llakro' cha' be'nn Israel nada'n? Be'nn Israel wrall ko'o ka'n, na' bxoz wnebia' keré ka'n, bde ake' rwe' ganni. ¿Bixha da xhinnj beno' na'n?

36 Na'll lle Jesúsen' le'e:

—Nlla're nak yel llnebia' kia'n, ka ke be'nn llnebia' yellrio ni. Chenak yel llnebia' kia'n naken ke yellrio ni, wdil be'nn ka' llzenay kia'n chenak, na' bi gaka' rao na'a be'nn wnebia' ke Israel ka' chenake. Zan yel llnebia' kia'n bi naken ke yellrio ni.

³⁷Na'll lle Pilaton' Le'e:

—¿Rwe'n nako' rey cha'? Na'll goll Jesúsen' le'e:

—Da li kan' ne'o na', naka' rey, na' ba beda' yellrio ni, nench wzejnie'ra' be'nnach di'll lin', na' yeolol be'nn llon ak txhen di'll lin', llzenay ake' kia'.

Bchoybia' ake' gat Jesusen'

(Mt. 27:15-31; Mr. 15:6-20; Lc. 28:13-25)

38 Na'll lle Pilaton' Le'e:

—¿Bi dan' nak di'll lin'?

Bayoll bne Pilaton' ka', na' blloje' ye to chi'i, gan' zjalla'a be'nn Israel ka', na' lle'e leake': —Bibi da xhinnj nroe'n ke be'nnen' cha' bi llone'. ³⁹Na' ka nak dan' llonre yeo iz, de wsana' to be'nn yo' rill ya rao lnni Paskwn'. ¿Lle'nere wsana' be'nnen' nak rey keré, be'nn Israel?

40 Na'll besia' ake', ne ake':

—iBi wasano' be'nn na'! iBarrabás na' basán!

Na' Barrabásen' nake' to be'nn wan.

Na'll goll Pilaton' be'nn ka', bdin ake' Jesúsen'. ²Na' waka'a ya ka', ben ake' to da bro' ake' yichje' de lba ye'che. Bayoll na', bwakw ake' Le'e to ra'll morad, ka da ka' llonrén no be'nn wnebia' ka' llin. ³Na'll lltitj akre' Le'e, na' bro' ake' ke xa'ye', na' llasné ake':

—iSechga ke be'nn wnebia' ke be'nn Israel ka'!

⁴Na'll blloj Pilaton' da yobre lle'e leake':

—Kweja' be'nnen' da yobre, nench nnézere bibi da xhinnj llallelra', cha' bi none'.

⁵Na' blloj Jesúsen' yo'te dan' yichje', dan' nak de lba ye'ch na', na' nakte' ra'll moraden'. Na' bne Pilaton':

-Ganni ba ze be'nnen' nna'.

⁶Na' xan bxoz ka', na' ren be'nn ka' llape yoda'o braon', ka bre'e akre' Jesúsen', na'll besia' ake' da zan ras bne ake':

—iBde'e le' yay cruz! iBde'e le' yay cruz!

Na'll lle Pilaton' leake':

—Lewche'e chet ka', na' lewde'e re' le' yay cruzen', le bibi da xhinnj llallelra' cha' bi none'.

⁷Na' be'nn Israel ka', lle ake' le'e:

—De to ley keto' da nen, llaya'l gate' dan' ne'e nake' Xhi'nn Dios, le be'nnachze Le'e.

⁸Na' ba llalleb Pilaton' kan' ba llaken, na' ka benre' xti'll ake'n, blleblle'. ⁹Na' bayoe' da yobre gan' llie' llnebie'n, zanche'e Jesúsen', na' llnnabre' Le'e:

—¿Gaxha be'nne rwe'? Na' bi balli'kze Jesúsen' xti'lle'n. ¹ºNa'll lle Pilaton' Le'e:

—¿Bi llalli'o xti'lla'n? ¿Bi nnezro' nada' napa' yel llnebia' da yesana' rwe', na' napa' yel llnebia' wchoybia' ko'o, wda'a ake' rwe' le' yay cruzen'?

¹¹Na' balli'i Jesúsen' xti'lle', golle' le'e:

—Bibi yel llnebia' napo' chenak bibi nonn Diosen' rwe'. Zan be'nnen' bde nada' rao na'on, naplle' do'l ka rwe'.

¹²Na'll bayirjla'll Pilaton' akre gone' wasane' Jesúsen'. Na' be'nn Israel ka', besia' ake' ne ake':

—Cha' ba llasano' be'nn ni, bi llono' kan' ne be'nn wnebia' ke Roman', le noteze be'nn cha' llone' kwine' ka to be'nn llnebia', na' llkwase' be'nn wnebia'n nzi'i César ka'le.

¹³Na'll ka bayoll bene Pilaton' xti'll ake'n, breje' Jesúsen' lia're, na' renkze le'e bllojrene', na' bllie' gan' llone' yel koxchisen', to latje dan' nzi'i Gan' Nak Rao Yej, di'll hebreo nzi'n Gábata. ¹⁴Ka do wawill, ka wxere za sorao lnni Paskwn' goll Pilaton' be'nn Israel ka':

—Ganni zo Rey kerén'.

¹⁵Na'll bzorao ake' llosia' ake' da yobre, llasné ake':

—iLlaya'l gate'! iBde'e le' yay cruz!

San Juan 19 202

Na'll lle Pilaton' leake':

—¿Rey keré nin', wda'a Le'e le' yay cruz?

Na'll bne bxoz wnebia' ka':

—Kere rey keto' be'nnen', toze César na'n nak be'nn llnebia' neto'.

¹⁶Na'll bde Pilaton' Jesúsen' rao na'a ake', nench wda'a ake' Le'e le' yay cruzen'. Na'll bza'a ake' Jerusalén na', bche'e akte' Jesúsen' lloa' yellre.

Bda'a ake' Jesúsen' le' yay cruz (Mt. 27:32-44; Mr. 15:21-32; Lc. 23:26-43)

¹⁷Na' zej Jesúsen' noe' yay cruz ke'en, na' blline' to latje gan' nzi'i Latj ke Llit Wat, di'll hebreo nzi'n Gólgota. 18 Na' bda'a ake' Le'e le' yay cruzen', na' leska' bda'a ake' ye chope be'nne le' yay cruzen' chla' weje kwit Jesúsen'. 19 Na' Pilaton' bzoje' vichj vay cruz ke'en. Di'llen' bzojen' nen: "Jesús be'nn Nazaret, Rey ke be'nn Israel ka'". ²⁰Bzoje'n di'll hebreo, na' di'll griego, na' di'll latín. Na' zan be'nn Israel ka' bel ake'n, le gan' bda'a Jesúsen' le' yay cruzen', naken awlloze Jerusalén na'. 21 Na' bxoz wnebia' ka' ke Israelen', goll ake' Pilaton':

—Bi wzojo'n: "Rey ke be'nn Israel ka'", wenre bzojen: "Le'en bne'e nake' rey ke be'nn Israel ka'."

²²Na'll bne Pilaton':

—Da ba nzoja' ba nyojkzen na'.

²³Ka bayoll bda'a be'nn waka'a
ya ka' Jesúsen' le' yay cruzen', na'll
bxhi'i ake' xhara'ne'n, na' ben
ake'n tapre, na' bxhi'i ake' tweje'n.
Na' leska' bxhi'i ake' ye to xhe'e

dan' nak to chewalize, bibi dia zon. ²⁴Na'll lle lwellj ake':

—Bi wche'zllon, wenre chitjenllon, na' norllo yedo'le len.

Na' kan' ben ake' na', bzoa di'll kan' nyoj xti'll Diosen' nen: "Bla' ake' xhara'na'n, na' ra'll dan' llaka' na', bditj ake'n."

²⁵Na' ka'lze gan' zo cruz ke Jesúsen', ze María be'nnen' nak xhne'e na', ren bir xhna' Jesús na', na' María be'nnen' nake' no'r ke Cleofas, na' María Magdalena. ²⁶Ka bre'e Jesúsen' ze xhne'en ka'lze, na' ren ye to be'nnen' nak le'e txhen, be'nnen' nllie' Jesúsen' kwis, na'll lle'e xhne'en:

—Be'nn na' gake' ka xhi'nno'.

²⁷Na'll lle'e be'nnen' non Le'e
txhen na':

—Be'nn ni gake' ka xhna'o. Na' lla na'te be'nnen' non Le'e txhen na', bxhie' le'e, bene' le'e ka xhne'e.

Kan' gok kan' got Jesúsen'

(Mt. 27:45-66; Mr. 15:33-41; Lc. 23:44-49)

²⁸Bde na', ba nneze Jesúsen' ba gok yeolol da ka' llaya'l gak ke'en, kan' ne xti'll Diosen' dan' nyoj na', bne'e:

-Bilra' nis.

²⁹Na' de ra't zo zichj da yoll to lo leo da'o. Na' to be'nnen' bza'lle' zo zichjen' to da nak ka xhi're, bzoe'n to rao xhis ke yay dan' nzi'i hisopo, na' blise'n lla're, na' bzoe'n lloa' Jesúsen'. ³⁰Na' bayoll bxho'p Jesúsen' da zichjen', bne'e:

—Ba gok yeolol da llaya'l gak, na'll le baxhexjte yichje'n, na' bayone' spíritu ke'en rallna'a Diosen', na' gote'.

To be'nn waka'a ya go'de lanz lwit Jesúsen'

³¹Na'llen' be'nn wnebia' ke Israel ka', ba llsenia' ake' ga'l lnni Paskw ke ake'n, na' jannab ake' rao Pilaton', we'e latj lljatichj waka'a ya ke'e ka' nia' be'nn ka' zjada'a le' yay cruzen', nench yob gat ake', na' yeletj ake' leake' le' yay cruz ka', le bill lle'n akre' ta'lle be'nn ka' le' yay cruzen' lla nba'nne ke ake'n. ³²Na'll jak waka'a ya ka', jatichj ake' llop la'te nia' be'nnen' da'a kwit Jesúsen' chla'. Na' leska' ben akre' be'nnen' bda'a ye chla'. ³³Na' ka bllin ake' gan' da'a Jesúsen', na' bre'e akere' ba gote'. Na'll bill bdichj ake' nie' ka'.

³⁴Na' to waka'a yan' go'de' to da látit lwit Jesúsen', na' bra'n llen ren nis. ³⁵Nada' bre'ra' kan' goken, na' nnezra' lloa'a di'll li, nench chejle' re'. ³⁶Na' da ka'n gok ke Jesúsen', nench gok kan' ne xti'll Diosen' dan' nyoj ke'e, nen: "Ni to llit yoe' bi chichj ake'." ³⁷Na' ye to gan' nen: "Yeswia ake' be'nnen' ba bllia ake' we'e."

Bkwa'ch ake' Jesúsen'

(Mt. 27:57-61; Mr. 15:42-47; Lc. 23:50-56)

38 Bayoll gok yeolol da ka', José be'nnen' nak be'nn yell gan' nzi'i Arimatea, jannabre' Pilaton' we'e latj veletje' Jesúsen'. Na' be'e Pilaton' latj. Na'll byej Josén' jaletje' Jesúsen'. Josén' ba llejle' ka nak dan' broe' bsede Jesúsen', na' ba llonlira'lle' Le'e llillize, le llebe' be'nn wnebia' ka'. ³⁹Na' leska' byej Nicodemon' be'nnen' ba byej gan' zo Jesúsen' ba gole, na' no'xe to da la' xhix, da nchix nell dan' nzi'i mirra, na' ren to yezi dan' nzi'i áloes, ka do chonn rroben'. 40 Na'll bchel ake' kwerp ke Jesúsen' to ra'll xhen, na' ren dan' la' xhix na', le ka' llon be'nn Israel ka', llkwa'ch ake' be'nn wat ke ake' ka'. 41 Kwitze gan'

bda'a ake' Jesúsen' le' yay cruzen', de to re'j ga naz ake' yay ak. Na' ganna' ben ake' to bloj, nench ben ake'n ka to ba, na' nono nna cho' be'nn wat rao yellrion'. ⁴²Ka llan' got Jesúsen' naken llan' llsinia' ake' ke lla nba'nne, na'llen' llyen akre' wkwa'ch ake' Le'e awlloze.

Jesúsen' babane' radj be'nn wat ka' (Mt. 28:1-10; Mr. 16:1-8; Lc. 24:1-12)

Na' bal dmio na', nna nakte xchole, byej María Magdalena lloa' broj gan' bro' ake' Jesúsen'. Na' bre're' gan' bga'ch Jesúsen', ba baga'a yejen' dan' bda'a ake' lloa' ba na'. ²Na'll baza'doe' bayeje' gan' zo Simón Pedron', na' ren ye to be'nn nak Jesúsen' txhen, be'nnen' nllie' Jesúsen' kwis, na'll lle'e leake':

—Ba babej ake' Xanllon' lo ban', na' bi nnézeto' ga jalo' ake' Le'e.

³Na'll bza'a Pedron' ren be'nnen' ye to, jake' lloa' brojen'. 4Llopte' bza'do ake', bixha be'nnen' ye to bza'dolle' ye ra'te res ka Simón Pedron', na' byoblle' blline' lloa' ban' ka le'e. ⁵Na'll blle'ke' bwie' lo ban', na' bre're' ra'll ka', zjalli'n lo ba na', na' bi byoe'. 6Le bllinte Simón Pedron', le byo'te' lo brojen', na' bre're' ra'll ka' zjalli'n loe na'. ⁷Na' bay dan' bchel ake' yichje'n, bi lli'n gan' lli' ra'll ka', lli'ten chla're ndoben. ⁸Na' byo'rén be'nnen' ye to, le bi nna choe', la'kze byoblle' blline' lloa' ba na'. Na'll bre're' kan' naken na', na'telle byejle'e. 9Le bi nna chejnie' akre' xti'll Diosen' dan' nyoj nen, llaya'le' yebane' radj be'nn wat ka'. 10 Na'll baza'a ake', na' jayake' yo' gan' zo ake'n.

María Magdalenan' bre're' nbankze Jesúsen'

(Mr. 16:9-11)

¹¹Na' Marían' baga'nne' ka'lte lloa' ban', bze'e belle'. Nna bellte' na'n, blle'ke' na' bwie' lo ba na'. ¹²Na' bre're' chop angl be'nn nak ake' ra'll lliche, zjalli' ake' lo ba na', toe' lli' yichjre gan' bxhoa Jesúsen', na' ye toe' lli' xhnie're gan' bxhoe' na'. ¹³Na'll lle ake' no'ren':

—¿Bixchen bello¹ no¹re?

Na'll ballie' xti'll ake'n, bne'e:

—Ba badrej ake' Xanllon', na' gara jaro' akre' Le'e.

¹⁴Bayoll bne Marían' ka', ka bayechjkzere' zellá Jesúsen' ko'llre; na' bi gokbe're' chet ka' Le'en. ¹⁵Na'll lle Jesúsen' le'e:

—¿Bixchen bello' no're? ¿Noxhan' llayirjo'?

Marían' llakre' cha' be'nne llap re'j na'n, na'll balwille' le'e, lle'e Le'e:

—Bne, cha' rwe'n jasanoe' ga yobre, bne nada' ga jasanoe' nench lljaxhie'.

16 Na'll lle Jesúsen' le'e:

—iMaría!

Na'll byechj Marían' da yobre, na' lle'e Le'e:

—iRaboni! —di'll hebreo lle'nen nen be'nn llzejnie' be'nne.

¹⁷ Jesúsen' lle'e le'e:

—Bi go'xo' nada', le bi nna yeyepa' yebá gan' zo Xa' na'. Bayejrén be'nn ka' ba bzenay xti'lla'n, be'nn ka' nak ka bi'cha', ka zana', na' goll ake' yeyepa' gan' zo Xa'n, be'nnen' nakrenkze Xare. Nake' Dios be'nnen' llona' nada' xhen, leska' nake' Dios be'nnen' llonre xhen.

¹⁸Na'll baza'a María Magdalenan', jadixjwe're' yezikre be'nn ka' llzenay xti'll Jesúsen', le ba bre're' Le'en.

Jesúsen' broe'rawe' be'nn ka' non Le'e txhen

(Mt. 28:16-20; Mr. 16:14-18; Lc. 24:36-49)

¹⁹Na' gol lle' dmio na', nna ndop be'nn ka' non Jesúsen' txhen lo yo'n neyjchochten, le lleb ake' be'nn wnebia' ke be'nn Israel ka'. Na' byo' Jesúsen', na' jase'e kllol be'nn ka', na' lle'e leake':

—Lesó nbaraz lo yichjra'llda'ore.

²⁰Bayoll bne'e ka', le broe'tere'
leake' lo ta'ke'n, na' ren lwite' na'.
Na'll bawé akre' kwis, ka bre'e akre'
Xanllon'. ²¹Na' lle'e leake' da vobre:

—Lesó nbaraz lo yichjra'llda'ore. Kan' bse'l Xa'n nada' yellrio ni, baddia' xti'lle'n, leska' nada' llse'la' re' we're xti'lla'n.

²²Bayoll bne'e ka', na'll brobe' leake', na' golle' leake':

—Lesi'i Spíritu ke Diosen'. ²³Be'nn ka' yere': "Ba banit barán da xhinnj keré ka'", ba bnitraokzen na', na' be'nn yere': "Bi nna yenitrao da xhinnj keré ka'", bi nna yenitraokzen na'.

Tomásen' bre're' nbankze Jesúsen'

²⁴Na' Tomás be'nnen' bsi'i ake' Tomás Dídimo, be'nn ren rao be'nn chllinn ka', bi zoe' kan' jaroe'rao Jesúsen' leake' lle' dmio na'. ²⁵Na' be'nn ka' yela' goll ake' le'e:

-Ba bre'to' Xanllon'.

Na'll lle Tomásen' leake':

—Bi chejlia' cha' nbane', cha' bi re'ra' lo ta'ke'n gan' bzo ake' klav ka', na' wzeb xhbena' gan' bdeb klav ka', na' ren le' lwite' na'. ²⁶Ka bde to xhman na', badop ake' lo yo'n da yobre, na' zerén Tomásen' leake'. Na' la'kze neyjte yo'n, byo' Jesúsen' da yobre, na' jase'e radj ake'n, na' bne'e:

-Lesó nbaraz lo yichjra'llda'ore.

²⁷Na'll golle' Tomásen':

—Bwia lo ta'ka' ki, na' bzeb xhbeno'n. Na' bzeb na'on lwita' ni, nench chejle'o. Bi gako' be'nn bi llejle', byejle'chga.

28 Na'll bne Tomásen':

—iXana', na' Dios kia'!

²⁹Na'll bne Jesúsen', lle'e Tomásen':

—Tomás, ba byejle'o dan' ba bre'ro' nada'n. Nbaraz ke be'nn ka' ba llejle' ake', la'kze bi nna re'e akre' nada'.

Da kin' nyoj nench chejle'llo ke Jesúsen'

³⁰ Da zan yel waken' ben Jesúsen', da bre'e be'nn ka' non Le'e txhen, da bi nyoj le' ni. ³¹ Na' da ki nyojen nench chejle're ke Jesúsen' nake' Cristo, be'nnen' nak Xhi'nn Dios, na' gonne' yel nban zejlikane keré dan' llonlira'llre' na'.

Jesúsen' broe'rawe' gall be'nn ka' non Le'e txhen

21 Bde ye to lla yobre, broe'rao Jesúsen' be'nn ke'e ka' non Le'e txhen, lloa' nisda'o dan' nzi'i Nisda'o Tiberias, ki gok: ²Ze ake' txhen Simón Pedron' ren Tomás be'nnen' nsi'i ake' Dídimo, na' ren Natanael be'nn yell Caná gan' nbane Galilea, na' llop xhi'nn Zebedeon', na' ye chop be'nn ka' non Jesúsen' txhen. ³Na' lle Simón Pedron' leake':

-Cha'a wxhen bel.

Na'll lle ake' le'e:

—Leska' wza'rén neto'.

Na'll bza'a ake' jake' lloa' nisda'on, na' byo' ake' to lo barco. Na't nokze no bel bllel akre' lle' na'. ⁴Na' kan' ba za'a lleni' na'n, bre'e akre' ze Jesúsen' lloa' nisda'on, na' bi gok akre' cha' Le'en. ⁵Na'll lle'e leake':

—Xhi'nna' da'o ak, ¿de bel gaollo? Na'll lle ake' Le'e:

—Ka'a, nokz no lldo'leto'.

⁶Na'll lle'e leake':

—Lewza'l yixj bel kerén' kwit barcon' cha'ore, na'll do'l akba'.

Na'll bza'l yixj bel ke ake'n. Na' bel zan kwis bdo'l akre', to bi zoe akre' yego' ake'n lo barcon'. ⁷Na' to be'nnen' nllie' Jesúsen', lle'e Pedron':

-Xanllo na'n.

Na' kate golle' Simón Pedron', Xanllo na'n, le bayakdote Pedro xhara'ne'n, le kere bi nake'n llone' llin na', na' le bxhi'tte' lo nisen', nench byob blline' gan' ze Jesúsen'. ⁸ Na' zjakdo ren be'nn ka' yela' ren barcon', nxhob ake' yixj gan' lla'a belya' ka', le ka do ye chop gayoa (200) waka'a nia', lloa' nisda'o na'n ze ake'. ⁹ Ka bayetj ake' lloa' nisda'on, jadi' akre' ga lli' yi' barje, na' xhoa to belya' rawen', na' ye to yet xtir. ¹⁰ Na' lle Jesúsen' leake':

—Leyeyo'x to chop belya' ka' nile, ba ka' za bxhenre na'.

¹¹Na'll byej Simón Pedron', jaxhie' yixj belen' gan' lli' barcon', na' baxhobe'n gan' nak yo bill. Lla'n to gayoa chi'nnayon (153) bel xhen ka', na' la'kze lla'a bel zan loe na', bi blle'zen. ¹²Na'll lle Jesúsen' leake':

—Ledá gaore.

San Juan 21 206

Na' ni toe' bi bayaxhje, ye ake' Le'e: "¿Noxha rwe'?", le ba gokbe'e aksre' Xanllo na'n. ¹³Na'll jabi'y Jesúsen', na' bxhie' yet xtiren', na'll be'e ke ke be'nn ka', na' leska' bene' belya' ka'. ¹⁴Kan' gok da wyonn rase, broe'rawe' be'nn ka' non Le'e txhen na', bde ka nak babane' radj be'nn wat ka'.

Jesúsen' be'rene' Simón Pedron' di'll

¹⁵Na' ka bayoll badao ake'n, na' lle Jesúsen' Simón Pedron':

—Simón xhi'nn Jonás, ¿nllie'llro' rwe' nada', kerke kan' nllie' be'nn ki nada'?

Na' balli'i Pedron' xti'lle'n, lle'e Le'e:

—Awa' Xana', nnezkzro' nllie'ra' rwe'.

Na'll lle Jesúsen' le'e:

—Bdap bwia be'nn ka' nak ka xhi'r da'o kia'.

¹⁶Na' golle' le'e da wllop ras:

—Simón xhi'nn Jonás, ¿nllie'ro'

Na'll da yobre bne Pedron':

—Xana', rwe'kzo' nnezro' nllie'ra' rwe'.

Jesúsen' golle' le'e:

—Bwia be'nn ka' nak ka xhi'r da'o kia'n.

¹⁷Na' da wyonn ras goll Jesúsen' Lele

—Simón xhi'nn Jonás, ¿nllie'ro' nada'?

Na' gokya'che Pedron' dan' goll Jesúsen' le'e ka' da wyonne ras, na'll lle'e Le'e:

—Xana', rwe'kzo' nnezro' yeololten, na' rwe' nnézkzero' nllie'ra' rwe'.

Na'll lle Jesúsen' le'e:

—Bdap bwia be'nn ka' nak ka xhi'r kia'n. ¹⁸ Di'll li, di'll li llepa' rwe': Ka goko' bi we'o, kwino' goko' xhara'no'n, na' byejo' kon ga nen ko'o. Na' kat gako' be'nn gore, wli na'on, na' be'nn yobre wakwe' xhara'no'n, na' yeche'e rwe' ga bi llazra'llo'.

¹⁹Golle' le'e ka' nench broe're' Pedron', kan' gak ke'e kat llin lla gate', na' kone len we'rawe' Diosen'. Na'll goll Jesúsen' le'e:

-Kon benlira'll, na' bnao nada'.

Kan' bne Jesúsen' ke be'nnen' nllie're'

²⁰Na' ye to be'nn non Jesúsen' txhen nawe' leake'. Na' bayechj Pedron' bre're' le'e. Na' nake' be'nnen' nllie' Jesúsen', be'nnen' blle' kwite', kan' bdao ake' xche', ka za gak Jesúsen' rallna'a be'nn ka' llwietate Le'en, be'nnen' bnnabe' Le'e: "Xana', ¿noxhan' wde rwe' rao na'a be'nn ka'?"

- —Xana', ¿akxha gak ke be'nn ni? ²²Na'll lle Jesúsen' le'e:
- —Cha' lle'nra' nna zokze' kat yeda' da yobre, ¿bi zed llakro'? Rwe'n bzoteze benlira'll nada', na' bzenay kia'.

²³Na'll biteze bne be'nn ka' llonlira'll Criston', ne ake' bi gat be'nnen'. Zan kere bne Jesúsen' bi gate'n, bne'e: "Cha' lle'nra' nna zokze' kat yeda' da yobre, ¿bi zed llakro'?"

²⁴Be'nn nin' nnezre' kan' gok yeolol da ki, ke len na' ba be'e di'll ki, na' ba bzoje'n. Na' nnézkzello lloe' di'll li. ²⁵Na' da zanll da ben Jesúsen' da bi nyoj, le chenak nyoj yeololen, ni rao yellrio ni, bi gaken cha'n, le yich zan kwis gaken chenake. Ka'n gakchga.

DAN' BEN BE'NN KA' JATIXJWE' XTI'LL XANLLON'

Bcheb Jesúsen' wse'le' Spíritu ke Diosen'

Teófilo, ganna' nllia' yeolol da ka' ben Jesúsen', na' dan' broe're' ²bllinte lla baze'e bazi'i Diosen' Le'e yebá da yobre. Ka za waza'tere', be'rene' postl ke'e ka' di'll bin' llaya'l gon ake', be'e di'll kon ka' bzejnie' Spíritu ke Diosen' Le'e. ³Broe'rawe' leake', na' da zan da bene' nench byejle' ake', da likzen' babane' radj be'nn wat ka'. Bdarene' leake' rao choa (40) lla, na' ye to chi'i bzejnie're' leake' kan' nak yel llnebia' ke Diosen'.

⁴Nna zorente' leake' txhen, golle' leake' bi llaya'l yellach ake' Jerusalén na', bne'e:

—Kwexhre nize llinte kat wse'l Xa'n dan' bchebe', kan' ba gollkza' re'. ⁵Da li Juan na' bchoe' be'nn nis, na' tere wakll wen ke re', ke nak ba zo rez yedsó Spíritu ke Diosen' yichjra'llda'ore.

Ka bayep Jesúsen' yebá

⁶Na' gok ka badop ake' rao Jesúsen', na' goll ake' Le'e:

—Xanto', ¿kere ba bllin lla gono' nench yelloj be'nn Israel ka' rao na'a be'nn zi't ka'? ⁷Na'll lle'e leake':

—Bi llaya'l nnézere bi llan' gon Xallo Diosen' da llwie' gone' rao rall-llo ni. ⁸Zan katen' yed Spíritu ke'en yedsorenen re', kana' gapre yel wak ke'e, na' chislasre xti'lla'n, soraozre Jerusalén na', na'll yell ka' gan' nzi'i Judea, na' gan' nzi'i Samaria, na'tell doxhen yellrio.

⁹Bayoll bne'e ka', na' llwia akte' Le'e na', kat bayepe' yebán', le zete to bej bkwa'chen Le'e rao ake'n, na' bill bre'e akre' Le'e. ¹⁰Bixha nna ze akte' llwia ake' yebá gan' bayepe' na', kat bllinkze chop be'nn kwit ake'n, na' nak xhara'n ake' llich kwis. ¹¹Na'll lle be'nn ka' leake':

—Re' be'nn Galilea, ¿bixchen nna zezre llwiare yebán'? Kan' bre'kzere zayej Jesúsen' yebán', bazi'i Diosen' Le'e radjre na', ka'kze gak katen' yede' da yobre.

Ka gok brej ake' be'nnen' re Matías nench bzoe' roraz Judas

12 Na' baza'a ake' rao ya' gan' lla'a ake'n, ya' gan' nzi'i Ya' Olivos, zayej ake' Jerusalén na'. Na' naken awlloze, ke to de latj sa'a ake' rao lla nba'nne ke be'nn Israel ka'. 13 Na' ballín ake' latj gan' lljaxhi'ra'll

Hechos 1, 2 208

postl ka', to yo' da zo chkwia. Ganna' ren Pedro, Jacobo, Juan, Andrés, Felipe, Tomás, Bartolomé, Mateo, Jacobo xhi'nn Alfeo, Simón be'nn ben txhen be'nn ka' nzi'i Zelote, na' Judas bi'ch Jacobo. ¹⁴Yeolol ake' lla'a nak ake' toze, llalwill ake' Diosen' yeo lla. Ganna' ren María xhna' Jesúsen' ren bi'che' ka', na' ye bal no'r non leake' txhen.

¹⁵Ka bllin to lla, bzolla'a Pedron' radj ake'n, na' nak to gayoa galj ake' (120), na' bne'e:

¹⁶—Re' be'nn bi'che, dekz de gok kan' nyoj xti'll Diosen'. Batna'te Spíritu ke Diosen' bzejnie'n rey Daviden', nench be'e di'll ke Judas be'nnen' bche'e be'nn ka' be'x ake' Jesúsen'. 17 Judas na' goke' neto' txhen bento' xchin Diosen'. 18 Na' ka nak da xhinnjen' bene'n, bxhi'i raxhje', na' baya'we' to yellrio. Na' ka gote'n bayexje' jatin yichje', blle'zte le'en, na' blloj doxhen xhojloe'. 19 Yeolol be'nn Jerusalén ka', bnnez akre' kan' goken, na' bsi'i ake' yellrion' Acéldama, na' Acéldama na! lle'nen nen Yellrio Llen. ²⁰Ke nak da ni, ba nyojkzen le' vich ke Salmos gan' nen ki:

Gakchga rille'n to da dach, na' nono sokze len.

Leska! nen:

Na' te to be'nn yobre wlane' xchine'n.

²¹ 'Ke nak ganni lla'a bal be'nn non lli'o txhen, chak bda Xanllo Jesucristo radjllo ni, ²² be'nn ki llon lli'o txhen, bzoraozen kan' bchoa Juan na' Le'e nis, bllinte ka bazi'i Diosen' Le'e yebá. Na' llaya'l kwejllo toe', nench gone' neto' txhen, we'to' di'll ke Jesucriston' kan' gok babane' radj be'nn wat ka'.

²³Na' brej ake' chope', toe' re José be'nn nsi'i ake' Barsabás, leska' re Justo, na' ye toe' re Matías. ²⁴Na'll balwill ake' Diosen' bne ake':

—Xanto', rwe' nombia'o ke nak yichjra'llda'o yeolol be'nne, broe' neto' nore be'nn ki chop, ba brejo' ²⁵ gake' neto' txhen gonto' xchino'n. Ke nak Judas na', bsanra'lle' dan' beno' rallne'e gone'n, na' ba zayeje' gan' llaya'l wayejkze' yel be'nn wen da xhinnj ke'e na'.

²⁶Na'll bza'l ake' yej da'o ak, nench nore lljata'n, na' blloj toe', na' be'nnen' re Matías bdo'len le'e, na' goke' txhen ren postl ka' ye chnej.

Ka gok betj Spíritu ke Diosen'

Ra bllin lla lnni dan' ne
Pentecostés, yeolol be'nn ka'
llonlira'll Jesucriston', nak ake'
toze gan' lla'a ake'n. ²Kat gokse
llakia yebán' ke ga za'a to be'
xhen, bllinte lo yo' gan' lla'a ake'n.
³Na' bre'e akre' da nak ka bel yi',
llalnninnen jasó ra't wejen yichj
toto ake'. ⁴Yeolol ake' byo' Spíritu
ke Diosen' yichjra'llda'o ake', na'
bzorao llnne ake' wde wdere di'll,
kon ka llzejnie' Spíritun' leake'.

⁵Na' be'nn zan be'nn Israel ka' lloe'rao Diosen' ba ndop ake' Jerusalén na', na' gateze yell za'k toto ake'. ⁶Ka ben akre' gok llakian', be'nn zan bdop gan' lla'a postl ka', na'll to nna'l-llej akze', ka nak llen akre' llnne be'nn ka' xti'll toto ake'. ⁷Na' lla'a ake' llabán akre', ne ake':

—¿Kere be'nn Galilea be'nn ki? ⁸¿Akre llakze llnne ake' xti'll-llo da gorjrén totollo? ⁹Ganni lla'a balllo nakllo be'nn Partia, na' be'nn Media, na' be'nn Elam. Na' bal-llo 209 Hechos 2

nakllo be'nn Mesopotamia, na' be'nn Judea, na' be'nn Capadocia, na'll be'nn Ponto, na' Asia. ¹⁰Na' be'nn Frigia, na' be'nn Panfilia, na' be'nn Egipto, na' rente be'nn za'a yell ka' zjalli' África, zi'tre ka gan' nzi'i Cirene, bixha ren be'nn Roma zo ganni, be'nn nakse be'nn Israel, na' be'nn za bayak txhen be'nn Israel. ¹¹Na'tell be'nn Creta, na' be'nn Arabia. iNa' ka nak be'nn Galilea ki, lloe'rén ake' lli'o di'll ren xti'll totollo, kan' nak yel wak ke Diosen'!

12 Yeolol ake' lla'a llakgan akre', na' llabán akre' lle lwellj ake':

—¿Akre ka chejnie're kan' llaken?

13 Na' ye bal ake' lltitj akre', ne
ake':

—Zoll akre'n.

Di'll da be'rén Pedron' be'nn ka' bdop gan' lla'a ake'n

¹⁴Na' bzolla'a Pedron' ren be'nn chnej ka', na' bnne'e zillj, lle'e leake':

—Re' be'nn Israel, na' yeolol re' lla'a Jerusalén ni nna' lla, lewzenay, llonen bien nnézere di'llen' we'rena' re' ni. ¹⁵Kere zolle be'nn ki kan' nere na', le nna nak tzire. ¹⁶Ganni llak kan' bzoj da Joel, be'nnen' be'e xti'll Diosen' kana', bzoje' kan' bne Diosen' ki:

17 Kate ba zo rez wayoll yellrio,
nada' Dios wse'la' Spíritu kia'n,
na' sorenen yeolol be'nne,
na' gona' nench xhi'nnre byio,
na' xhi'nnre no'r,
we'e akbe' xti'lla'n.
Na' bi we'o ka', re'da'o akebe',
na' be'nn gor ka', nne akre' yere.

18 Be'nn ka' llon xchina'n be'nn byio ren no're, sorén Spíritu kia'n leake', nench we'e ake' xti'lla'n.
19 Gona' le' yebán' da yebane

¹⁹ Gona' le' yebán' da yebane be'nne,

na' rao yellrio wroe'ra' yel wak kia'n, na' larj llen, na' xhen yi', na' kwe' llén da nak ka bej.

Willen' wayaken da xchole, na' be'on wayaken xhna ka llen, katen' ba zon llin lla yeda' da yobre, nada' naka' Xanre.
Kana' gaken to lla lliarao xhen

Kana' gaken to lla lliarao xhen, na' wroe'ra' yel wak kia'n.

²¹ Ka nak nada' naka' Xanre, noteze be'nn yelwille nada', nada' yesre'e rao da xhinnjen'.

²²'Na' re' be'nn Israel, lewzenay xti'lla'n. Ke nak Jesús be'nn Nazareten', Diosen' broe're' nake' be'nn za'ke. Diosen' bene' nench Jesúsen' bene' yel wak, na' billre da yebánello kan' ba nnézkzere na'. ²³Bixha gok Jesúsen' rallna're kan' ba nwiakze Diosen', na'll benre' rao na'a be'nn wen da xhinnj ka', na' bet ake' Le'e bda'a ake' Le'e le' yay cruzen'. ²⁴Bixha nna' Diosen' basbane' Le'e radj be'nn wat ka', yel goten' bi bzoen wza'yen Le'e. ²⁵Le ka'kzen' bne rey Daviden' batna', be'e xti'll Jesúsen' bne'e:

Llre'teze llre'ra' Xanllon', ze'e kwita',

ke len na' notno soe wta wnne nada'.

²⁶ Na'll llawé ra'llda'wa', na' llola' nench lloe'rawe'. Na' leska' nnezra' katen' gata', kere ke chnaren' gata'. Hechos 2 210

²⁷ Le nnézkzera' bi wsanra'llo' nada' gan' lla'a be'nn wat ka'.

Bi we'o latj go'll xpe'ra'n, nada' naka' rallna'o.

²⁸ Broe'ro' nada' ka nak nez dan' zej rao yel nban na', na' yewera' kwis ke naken zereno' nada'.

²⁹'Re' be'nn bi'che, nnézello xozxta'ollo Daviden' gote', na' bkwa'ch ake' le'e, na' llre'tello ba ke'en nna' lla. 30 Na' rey Daviden' goke' to be'nn be'e xti'll Dios, be'e di'll kan' bzejnie' Diosen' le'e, na'llen' bnnezre' kwasro kan' gaken, le kwin Diosen' bchebe' bne'e, Criston' garie' rao xhi'nn dialla ke'e, na' nnebie' roraze'. ³¹Ke len na' gokbe'e Daviden' kan' yebán Criston', bne'e bi ga'ye' gan' lla'a be'nn wat ka', na' bi go'll xpe're'n. ³²Na' ba gok kan' bne'en, ke nak Diosen' basbane' Jesúsen' radi be'nn wat ka', na' neto' lloe'to' xti'lle'n, bre'to' kwasro kan' babane'n. 33 Na' nna' Diosen' ba balise' Le'e, bazie' Le'e kwite', na' ba llnebia'rene! Le'e txhen. Na! Diosen' bene' rallne'e Spíritu ke'en, kan' ba bchebe' na'. Jesús na'n ba bene' yel wak ni, kan' ba bénere, na' kan' ba bre're. 34Ka nak rey Daviden' kere bayepe' yebán', le kwine'n bne'e ki:

Xanllo Dios na', lle'e Xana'n: "Blle'kero' kwita' ni,

35 llinte lla kat gona' nni't be'nn ka' xhnia'o, be'nn ka' llwie rwe' na'."

³⁶'Na' nna' llaya'l nneze yeolol be'nn Israel ka', Jesús be'nnen' betre bda're le' yay cruzen', Le'en ba brej Diosen' nake' Xanllo, na' leska' Le'en Cristo be'nn brej Dios nnebie'.

³⁷Ka bayoll ben akre' di'll ki, da xhen gok akre', na'll lle ake' Pedron' ren be'nn ka' non le'e txhen na':

- —¿Akxha gonto' nna' cha', bi'cha'?

 38 Na'll lle Pedron' leake':
- —Lewayate ke da xhinnjen' nonre na', na' choare nis, nench wroe'n llonlira'llre Jesucriston'. Na'llen' yezi'xhen Diosen' keré, na'll gonne' re' Spíritu ke'en son yichjra'llda'ore. ³⁹Le ke re'n ba bchebe' gonne'n, ke xhi'nnre, ke be'nn lla'a zi'te, na' ke yeolol be'nn gaxh Xanllo Diosen'.

⁴⁰Na' ka' di'll zan da lloe'rén Pedron' leake', llawe' leake' nez, lle'e leake':

—Bi gonre be'nn wen da xhinnj ki txhen, nench ke gak keré kan' gak ke ake' na'.

⁴¹Na' ka nak be'nn ka' bxhi'i xti'lle'n, blloa ake' nis. Na' byan ake', ke lla na' badil ake' ka do chonn mire'. ⁴²Na' bni'tteze bni't ake', bzenay ake' dan' llroe' llsede postl ka'. Na' toze ka llon yichjra'llda'o ake', na' llao ake' txhen, na' llalwill ake' Diosen'.

Ka ben be'nn ka' bxenra'll Jesucriston' da nelle

⁴³Yeolol be'nne llon ake' yel wan kwis kan' llon postl ka', da zan da yebánello llon ake', da llroe' yel wak ke Diosen'. ⁴⁴Yeolol be'nn ka', ba byejle' ke Jesucriston', lla'a ake' toze, na' toze non bi da de ke ake'. ⁴⁵Bayo't ake' no yellrio, na' bi da de ke ake', na' mellen' bda'on na', llyis ake'n kon ka yallje totoe'. ⁴⁶Na' yeo lla lldop ake' yoda'o braon', na' we'j bdao ake' txhen

211 Hechos 2, 3

rill toto ake', na' nbaraz kwis blla'a ake' txhen bawé akre'. ⁴⁷Lloe'rao ake' Diosen', na' yeolol be'nn yell llayo'ra'll kan' llon ake'n. Na' Xanllo Diosen' llone' tlla tlla llren yezikre be'nn llonlira'll Jesucriston'.

Ka gok bayak to be'nn bi llak sa'a

Gok to lla zej Pedron' ren Juan na' yoda'o braon', ka do lladá chonne, hor na' llalwill be'nn Israel ka' Diosen' yeo lla. ²Na' to be'nn bi llak sa'a ka gorjte', yeo lla lljalek ake' le'e lloa' yoda'on, puert dan' nzi'i Da Nbaraz. Na' llbie' llnnabe' lmoxh rao be'nn ka' llo' yoda'on. ³Bixha kate bre're' Pedron' ren Juan na', ka za cho' ake' yoda'on, le bzete ta'ke' llnnabe' lmoxh. ⁴Na'll bwiachich ake' le'e, na' lle Pedron' le'e:

-Bwiake neto'.

⁵Na'll bwie' leake', llakre' cha' we'e ake' le'e mellen'. ⁶Bixha Pedron' lle'e le'e:

—Bibi mell kia' de, ni plat ni oro, zan ka da napa' gonna' rwe', kone yel wak ke Jesucristo be'nn Nazareten', bayas na' badá.

⁷Le be'xte Pedron' ta'ke' cha'we, le gokte bazelle'e, balí nie' ka'. ⁸Na'll bxhi'te' na' bzorao de'e, na' byo'rene' leake' yoda'on, xhi'te' llawere' lloe'rawe' Dios. ⁹Yeolol be'nn yell bre'e akre' kan' de'en, na' kan' llone' lloe'rawe' Diosen'. ¹⁰Na' bayombia' akre' le'e, nake' be'nnen' llbe' llnnab lmoxh lloa' puerten' nzi'i Da Nbaraz. Na'll llabán akre', nna'l-llej akte' dan' bre'e akre' bayak be'nnen'.

Pedron' be'e xti'll Dios lo lchir yoda'on

¹¹Na' be'nnen' bayaken', no'xe' Pedron' ren Juan na', bi llsankze' leake'. Na'll yeolol be'nn ka' lla'a yoda'on, llabán akre' kwis zjakdo ake' gan' ze Pedron' ren Juan na', ren be'nn xhinnjen' bayak na', ze ake' gan' ze to lchir kwit yoda'on da nzi'i Lchir ke Salomón. ¹²Ka bre'e Pedron' be'nn zan ka', na' lle'e leake':

-Re' be'nn Israel, ¿bixchen llabánzere, na' llwiachichre neto'? ¿Llákere kone yel wak ke neto'n bayak be'nnen'? ¹³Dios ke xozxta'ollo Abraham na', na' Isaac na' Jacob, ba be'e Xhi'nne' Jesúsen' doxhen yel bara'nnen', be'nnen' benre rallna'a koxchis. la'kze Pilaton' gokra'lle' yesane' Le'e, na' re' bi be're latje. ¹⁴Latje da bnnabre yesán Pilaton' be'nnen' nak ra'llda'o yall be'nnen' llon da li na', bnnabzre yesane' to be'nn wen xhiare. 15 Na' betre be'nnen' nak xan yel nban na'. Bixha Diosen' balise' Le'e radi be'nn wat ka', na' neto' bre'to' da likzen' babane'. ¹⁶Na' llre're be'nn ni, bi gok se'e, na' nombia're', na' nna' ba bayak nie'n kone yel wak ke Jesúsen', be'nnen' nxenra'llto' na'. Le dan' llonlira'llto' Jesúsen', ke len na' bayone' nia' be'nn ni, na' ba llre're kan' bayake'n.

17'Na' nna' bi'cha', nnézkzera', re' ren be'nn gor brao keré ka', betre Jesúsen' le bi nnezya'nnere bixhan' benre. 18 Na' dan' benre ka', gok kan' bne Diosen' gak, kan' bdixjwe' be'nn ka' be'e xti'lle'n kana', bzoj ake' ke Criston' yellayrawe'. 19 Na' nna' lewayate ke da xhinnjen' nonren', nench yezi'xhen Diosen' keré, na'llen' wzoe' re' nbaraz. 20 Wse'l Xanllo Diosen' Jesúsen' da

Hechos 3, 4 212

yobre rao yellrion', be'nnen' breje' kana'te, nench na' yednnebie' lli'o. ²¹Na' dekz de yega'nn Jesúsen' yebán', llinte kat Diosen' yewe' xhnneze doxhen kan' llak rao yellrion'. Kana'llen' yede', le ka'n bne be'nn ka' be'e xti'll Diosen' kana'. ²²Da Moisésen' golle' xozxta'ollo ka': "Wllin lla kat Xanllo Diosen' kweje' to be'nn radjren', na' we'e xti'll Diosen' kan' bene' breje' nada', na' llaya'l wzenayre ke'e. ²³Na' noteze be'nn cha' bi wzenaye' ke'e, llaya'l bi'y be'nnen' ka'le, na' kweyie'."

24'Yeolol be'nn ka' be'e xti'll Diosen' kana', bzoraozen be'nnen' re Samuel, bdixjwe' akre' gak dan' llre'llo llak nna'. ²⁵Re' nakre xhi'nn dialla ke be'nn ka' be'e xti'll Diosen'. na' dan' goll Diosen' xozxta'ollo ka' gone', lekze naken ke re'. Ka di'llen' be'renkze' xozxta'ollo Abraham na', kan' golle' le'e: "To xhi'nn dialla ko'on zaza'a, gone' gak la'y be'nn lla'a rao yellrio." ²⁶Ke nak Diosen' ba balise' Xhi'nne'n, zga'tek bse'le' Le'e radj lli'o be'nn Israelen', badyenla'ye' lli'o, nench wayakbe'llo da xhinnj kellon', na' wayátello.

Pedron' ren Juan na' ni't ake' rao koxchis

A Nna zete Pedron' ren Juan na', lloe'rén ake' be'nn ka' di'll kat bllin bxoz ka' ren be'nnen' nak xan be'nn ka' llap yoda'o braon', na' ren be'nn ka' nzi'i saduceo. ²Llaklla'a ake' dan' llroe' postl ka' be'nn yell kan' gok babán Jesúsen', ka'kzen' yebán yeolol be'nne. ³Na'll be'x ake' leake', bro' ake' leake' rill ya bllinte

bateyó, le ba llonen ba wlle' kan' be'x ake' leake'n. ⁴Na' be'nn zan ka' bzenay xti'll Diosen' benlira'll ake'n, na' be'nn byio ka' ba nonlira'll Jesucriston', nak ake' do ga'y mire.

⁵Bateyó badop be'nn wnebia' ka' gan' nzi'i Jerusalén na', na' be'nn gor brao ka', na' be'nn ka' llsedre ke ley dan' bzoj da Moisésen', ⁶na' be'nnen' nak bxoz brao, be'nnen' re Anás, na' Caifás, na' to be'nn re Juan, na' Alejandro, na' ren no bi'ch lwellj bxoz brao ka'. ⁷Na'll jaxhi'i ake' Pedron' ren Juan na', bze ake' leake' kllol ake'n, na'll bnnab akre' leake!:

—Lennechk neto', ¿no bse'l rwe' dan' llonre ki? ¿No ben latj bayonre be'nnen'?

⁸Bixha llnebia'teze Spíritu ke Diosen' yichjra'llda'o Pedron', lle'e leake':

—Re' be'nn llnebia' rao yell, na' re' be'nn gor brao ke Israelen'. ⁹ka nak nna' llnnábere neto' akre goken bayak to be'nn xhinnj. ¹⁰Llaya'l nnézere, na' llaya'l nneze yeolol be'nn Israel, be'nnen' ze nga, bayake' kone yel wak ke Jesús be'nn Nazaret na', be'nnen' betre bda're le' yay cruzen', bixha Diosen' basbane' Le'e. 11 Jesúsen' wsa'krébelloe' ka to yej, na' re' be'nn wnebia' nakre ka be'nn llon to yo'. Re' bi byo'ra'llre yejen', na' yejen' bi byo'ra'llren', ba naken to yej da za'ke. 12 Gatga zo to be'nn gak yesrá lli'o rao da xhinnjen', nono noe' Diosen' yel wak rao yellrio, be'nn gak yesrá lli'o, zeraoze Jesucristo na'.

¹³Bixha be'nn wnebia' ka', llwia ake' kan' llon Pedron' ren Juan

na', bi lleb ake' llalli'i ake' xti'll ake'n. Na' llabán akre', le nak ake' be'nn bi nsedtek. Na'll bayakbe'e akre' leake'n bdarén ake' Jesúsen'.

14 Na' llwia akte' ze be'nn xhinnjen' bayaken' kwit Pedron' ren Juan na', na' bi llallel akre', akre ye ake' leake'.

15 Na'll bchach ake' leake' lia're choll, chak be'rén lwellj ake' di'lle.

16 Na' lle lwellj ake':

—¿Akre gonllo ke be'nn ki? Yeolol be'nn Jerusalén ka', nneze da yel wan na' ben ake'n, bikzbi de nnello ke be'nn ki. ¹⁷Lete to da gonllo wcheb aklloe', nench ni ye to nollno we'rén aklle' xti'll Jesúsen'.

¹⁸Na'll goxh ake' Pedron' ren Juan na', na' goll ake' leake', chras bill we'e ake' xti'll Jesúsen'. ¹⁹Bixha Pedron' ren Juan na', lle ake' leake':

—Lennechk re' cha' nakllen wen wzenayto' ke re' be'nnach, na' bi wzenayto' ke Diosen'. ²⁰Bi gak soto' lli, dekz de llaya'l nneze be'nn ka' da ka' ba bre'to'n, na' da ka' ba béneto'.

²¹Na'll da zan da goll ake' leake', ben akre' leake' znia nench lleb ake'. Na'll basán ake' leake', le billbi llallel akre' ka gon akre' leake', le yeolol be'nn yell lloe'rao ake' Dios dan' bayak be'nnen'. ²²Ka nak be'nnen' bayaken', ba llone' ka do choa (40) iz wde.

Bnnab ake' rao Diosen' gakrene' leake' we'e ake' xti'lle'n

²³Na' Pedron' ren Juan na', kate basán ake' leake'n, jayake' gan' lla'a be'nn ka' non ake' txhen na', be'rén ake' leake' di'll, kan' goll bxoz wnebia' ka' ren be'nn gor brao ka' leake'. ²⁴Ka ben akre' ka', gok ake' toze, na' balwill ake' Diosen', bne ake':

—Xanto' Dios, rwe' beno' yebá ren yellrio, na' nisda'o, na' yeolol da de rawe na'. ²⁵Na' rey da David na', be'e xti'llo' kan' bzejnie'roe'n, bne'e:

¿Bixchen llach be'nn ka' nench gon ake' da xhinnj? ¿Bixchen be'nn ka' lla'a yellrion' llon akze' xhbab da bibi za'ke?

²⁶ Na' badop yeolol be'nn ka' llnebia' rao yellrion', gok ake' toze nench blliayi'll ake' Xanllo Diosen', na' blliayi'll ake' Criston' be'nnen' bse'le' nnebia' na'.

²⁷'Na' da li da gokte rao yell nga, rey Herodes, na' Poncio Pilato, na' ren be'nn bi nak be'nn Israel. gok ake' txhen be'nn Israel ka', nench bet ake' xhi'nno'n, Jesúsen' be'nnen' nak la'y, na' be'nnen' brejo' nnebia'. ²⁸Gok ka' nenchk gok da ba nwiakzo' rwe' gak. ²⁹Na' nna' Xanto' Dios, bwia kan' llon ake'n llcheb ake' neto', na' gokrén neto' be'nn wen llin ko'o, nench bi llebto' we'to' xti'llo'n. 30 Na' rwe' wroe'ro' yel wak ke xhi'nno' Jesús, be'nnen' nak la'yen', wayak be'nn llak yillwe', na' gak billre da yebane beinne.

³¹Bixha ke bayoll balwill ake' Diosen', bxho' na' bxhiz gan' lla'a ake'n, na' Spíritu ke Diosen' byo'n yichjra'llda'o yeolol ake', na' gok be'e ake' xti'll Diosen', ni ke lleb akze'.

Da zjadé ke ake' ben ake'n toze

³²Na' be'nn zan ka' llonlira'll Jesucriston', toze ka gok Hechos 4, 5 214

yichjra'llda'o ake'. Bi da zjadé ke ake', toze ben ake'n, nono bne: "Kia' da ni", na' "Kia' da na'". Yeolol bi da zjadé ke ake' non ake'n toze. 33 Na'll postl ka', kone yel wak ke Dios, lloe' ake' di'll kan' babán Jesúsen', na' llonla'yte Diosen' yeolol ake'. 34Ni to be'nn ren radj ake'n bibi byalljre', le ren be'nn zjadé yellrio ke ake', na' no yo' ke ake' llayo't ake'n, na' lljwa'a ake' mellen' gan' lla'a ake' na'. ³⁵Na' ben ake'n rallna'a postl ka', na' leake' llyis ake'n kon ka vallje toto ake'. ³⁶Ka ben to be'nn Chipre be'nn re José, nake' xhi'nn dialla ke Leví, na' postl ka' bsi'i ake' le'e Bernabé, lle'nen nen Be'nn Llayoe'xhen. ³⁷Le'e de to yellrio ke'e, na' bayo'te'n, na' bene' mellen' rallna'a postl ka'.

Ka ben to be'nn re Ananías na' ren no'r ke'e

Na' bzo to be'nn re Ananías, na' no'r ke'e re Safira, na' bayo't ake' to yellrio da de ke ake'. Na' ka jwa'a Ananíasen' mellen' rao na'a postl ka', lle'e leake':

—Doxhenkzen na' no'xa'.

Rencha' ba be'e ake' di'll wkwa'ch ake' ra'ten. ³Na'll Pedron' lle'e le'e:

—Ananías, ¿bixchen be'zo' latj byo' daxi'on yichjra'llda'on, na' ziye'o Spíritu ke Diosen' ke nak bkwa'cho' mell ke yellrion'? ⁴¿Kere yellrio ko'kzo'n? Leska' rwe'kzo' bxhi'o mellen' bayo'to'n na'. Da xhinnjen' llono' ziye'o. Kere be'nnachen' ziye'o, kwinkze Diosen' ziye'o.

⁵Ka bayoll bene Ananíasen' kan' goll Pedron' le'en, to byalze' gotte'. Yeolol be'nn ka' bene kan' goken, blleb ake' kwis. ⁶Na' bzolla'a bal be'nn llabán ka', babej ake' le'e, na' jakwa'ch ake' le'e.

⁷Bixha gok ka chonn hor, bllin Safira no'r ke da Ananíasen', na' bi nnezre' cha' bi ba gok. ⁸Na'll lle Pedron' le'e:

—Bnechk nada', ¿da lin' bayo'tre yellrion' to ka'te?

Na'll bne Safiran':

-Awa', to katen' bayo'tto'n.

⁹Na'll lle Pedron' le'e:

—¿Bixchen goko' toze ren xhyi'on, na' gokra'llre siye're Spíritu ke Diosen!? Lloa' yo' na', ba ze be'nn ka' jakwa'ch xhyi'on, na' leska' lljakwa'ch ake' rwe'.

10 Ka bayoll bne Pedron' ka', le byalte' xhnia' Pedron' gotte'.
Ka bayo' be'nn ka' jakwa'ch Ananíasen', bre'e akre' no'ren' ba de'e gote', na' blen ake' le'e, na' jakwa'ch ake' le'e kwit xhyiwe'n.

11 Yeolol be'nn ka' llonlira'll Criston', blleb ake' ka bre'e akre' kan' goken, na' nollre be'nn yobre leska' blleb ake' kwis ka ben akre' ka'.

Da zan yel wak gok

¹²Na' postl ka' da zan da yebánello llon ake', na' llroe' ake' yel wak ke Diosen'. Na' yeolol ake' lladopteze lladop ake' lchir yoda'o braon', dan' nzi'i Lchir ke Salomón. ¹³Yeolol be'nn yell llayo'ra'll kan' llon ake'n, na' bdap ake' leake' bara'nne, la'kze lleb ake' gon ake' leake' txhen. ¹⁴Be'nn ka' llxenra'll Xanllon', byan ake' ka be'nn byio ren no're. ¹⁵Na' to llbej ake' be'nn we'e ke ake' ka', llni't ake' leake' tnez. Na' llxoa ake' leake' no rao da', nench kat te Pedron', la' bxen ke'e

naz llel be'nn we'e ka', na' wayak akse'. ¹⁶Leska' be'nn ka' zjalli' awlloze lljake' Jerusalén na', lljwa'a ake' no be'nn llak yillwe', no be'nn yo' daxi'o, yeolol ake' llayak.

Ka gok bro' ake' Pedron' ren Juan na' rill ya

¹⁷Na'll be'nnen' llnebia' bxoz ka', ren be'nn ka' llon txhen be'nn ka' nzi'i saduceo, gok akre' postl ka' zi'. ¹⁸Na' bzap ake' leake' bro' ake' leake' rill ya. ¹⁹Na' to angl ke Xanllo Dios blline' tlle'le, bsarje' rill yan', na' babeje' postl ka', lle'e leake':

²⁰—Lechej yoda'o braon' da yobre, na' lellje'rén be'nn yell xti'll Dios da nsa'a yel nban na'.

²¹Ka bayoll ben akre' ka', kate byeni', byej ake' yoda'o braon', jazejnie' akre' be'nn ka' xti'll Diosen'.

Bixha be'nnen' nak bxoz brao, ren be'nn ka' nake' txhen na', batop ake' be'nn gor brao ka' llnebia' be'nn Israel ka', na'll bse'l ake' be'nn ak lljaxhi'i ake' postl ka', gan' ni't ake' rill yan'. ²²Ka bllin policía ka' lloa' rill yan', ker no be'nn ka' da nne. Na' zayej ake' jadixjwe' akre', ²³lle ake' be'nn wnebia' ka':

—Neyjchochte rill yan', na' lla'a akte' llap ake'n, bixha ke bsarjto'n na', ker no be'nn ka' da nne.

²⁴Be'nnen' nak bxoz brao, na' be'nnen' nak xan be'nn ka' llap yoda'on, na' bxoz wnebia' ka', ka ben akre' ka', llayón ake' xhbab akre wayoll ke dan' llaken. ²⁵Bixha le bllinte to be'nn, lle'e leake':

—Be'nn ka' bro're rill yan', ba ze akte' da yobre yoda'on llroe' akre' be'nn yell.

²⁶Na'll be'nn ka' llap yoda'on ren xan ake' na', jake' jaxhi'i ake' leake', na' kone di'll wen zanche'e ake' leake', le lleb ake' wchekw be'nn yell ka' leake' yej. ²⁷Ka ballín ake' rao be'nn wnebia' ka', na'll be'nnen' nak bxoz brao lle'e postl ka':

²⁸—¿Kere gollteto' re', bill wroe're xti'll be'nnen'? Na' yezikre llonre, doxhen Jerusalén na', ba bzénere xti'lle'n, na' lltóbere neto' bettoe'.

²⁹Na'll Pedron' ren postl ka' yela', lle ake' be'nn ka':

—Nakllen lliarao wzenayto' ke Diosen' kerke ke be'nnach. 30 Dios ke xozxta'ollo ka' balise' Jesúsen', be'nnen' betre bda're le' vav cruzen'. 31 Na' Diosen' ba be'e Jesúsen' doxhen yel bara'nn ke'en, na' ba bazie' Le'e rawe', nench nnebie', na' yesre'e lli'o be'nn Israel. Na' kone Le'en yezi'xhen Diosen' ke da xhinnjen' benllo, cha' lli'o wayátello. 32 Neto' nnézeto' kan' ben Diosen', na' lloe'to' di'll ke'en, na' lekze Spíritu ke Diosen' lloe'n di'll lo ra'llda'oto'n, le Diosen' bse'le' Spíritu ke'en lo yichjra'llda'o be'nn llzenay ke'e.

³³Ka llen akre' kan' ne postl ka', to llaklla'a ake' kwis, to lle'n akre' got ake' leake'. ³⁴Radj be'nn ka' lla'a na', ren to be'nn fariseo re Gamaliel, na' llroe' llsedre' ley dan' bzoj da Moisés, na' le llap be'nn ka' le'e bara'nne. Bzolle'e na' golle' be'nn ka', bachach ake' postl ka' choll ko'llre. ³⁵Na' lle'e leake':

—Re', be'nn Israel, lewiachek akre gonre ke be'nn ki. ³⁶Lelljadinra'll ka ben be'nnen' re Teudas kana', bne'e nake' to be'nn za'ke, na' tap Hechos 5, 6 216

gayoa (400) be'nn bzenay ke'e. Bixha kat bet akse' le'e, na'll be'nn ka' bnao le'en bayaslas ake', na' ka' gok barán ake'. ³⁷ Bixha gok da yobre blloj be'nnen' re Judas, be'nn Galilea, kan' bllia be'nn yiche, na' be'nn zan bnao le'e, leska' gote', na' bayaslas be'nn ka' bnao le'en. ³⁸ Na'llen' ni llnia' re', waljé be'nn ki, bibi gon akere'. Cha' dan' llon ake'n naken ke lwellj be'nnachllo, to wrazzen yeranen. ³⁹ Zan cha' naken ke Dios, kere da soere yelanren, lewiaya'nn ke gonzre tilrenre Dios.

⁴⁰Bayo'ra'll be'nn wnebia' ka' kan' bne Gamalielen'. Bde na', goxh ake' postl ka', na' bdintat ake' leake', na'll bllon ake' bill wsed akre' be'nn xti'll Jesucriston', na'll basán ake' leake'. ⁴¹Ka balloj ake' gan' lla'a be'nn wnebia' ka', llawé akre' kwis, le nnez akre' Diosen' lloe'kze' latj llallayrao ake', ni ke Jesucriston'. ⁴²Na' yeo lla, do ga zo yoda'o, na' do lo yo' rill ake', llroe' akre' be'nn xti'll Jesucriston'.

Ka gok brej ake' gall be'nn gakrén be'nn ka' llonlira'll Jesucriston'

6 Ka gok ka lla na', llan be'nn ka' llonlira'll Jesucriston', na' be'nn ka' nne di'll griego, bnne ake' ke be'nn ka' nne di'll Hebreo. Ne ake' no'r wazeb ke ake' ka', bi zi'i ake' da lle'j llao ake' ke to da llaya'l si'i ake' tlla tlla. ²Na'll be'nn chllinn ka' (12), batop ake' yeolol be'nn ka' llonlira'll Jesucriston', na' lle ake' leake':

—Bi naken wen wsanra'llto' xti'll Diosen', na' seto' chislasto' da ye'j da gao be'nn ka'. ³Na' nna' be'nn bi'che, lekwej gall be'nn lwelljre, be'nn nak be'nn si'n, be'nn llzenay ke Dios, na' be'nn yo' Spíritu ke Diosen' yichjra'llda'o ake', na'll gak rallna'a ake' chis ake' dan' gao be'nn ka'. ⁴Na' neto' we'la'll-llto' yelwillto' Dios, na' wroe'to' xti'lle'n.

⁵Yeolol be'nn ka' bayo'ra'll kan' bne postl ka', na' brej ake' to be'nn re Esteban, be'nn le nxenra'll Dios, na' yo'ya'nn Spíritu ke Diosen' yichjra'llda'we'. Na' brej ake' ye to be'nn re Felipe, na' Prócoro, na' Nicanor, na' Timón, na' Parmenas, na'll Nicolás be'nn yellen' re Antioquía bene' txhen ren be'nn Israel. ⁶Na' jwa'a ake' be'nn ki rao postl ka', na' bxoa ta'k ake'n yichj ake', na' balwill ake' Dios.

⁷Be'nn zan llnnez akre' xti'll Diosen', na' Jerusalén na', zejze llan be'nn ka' llxenra'll Jesucriston', leska' zan bxoz ka', ba llxenra'll ake' Le'e.

Ka gok be'x ake' Esteban

⁸Na' be'nnen' re Esteban. napya'nne' yel wak ke Dios, na' Diosen' llakrene! le'e llone! da llabane be'nn yell. 9Bixha gok to lla, txhonnj be'nn ka' lladop gan' zo yoda'o dan' nzi'i Yo' ke Be'nn Bill Zo Xan, na' ren be'nn Israel zaya'k yell ka' nzi'i Cirene, na' Alejandría, na' do gan' nzi'i Cilicia, na' gan' nzi'i Asia, na' bzorao lla'dyi' ake' Esteban. ¹⁰Na' bi llzoe akre' yelli'i ake' xti'll Esteban, le Spíritu ke Diosen' be'n yel si'n ke'en. ¹¹Na' be'nn ka' bko'yel akre' bal be'nn, nench btob akre', dá Esteban llnne'e ke da Moisés, na' leska' llnne'e ke Diosen'. 12 Na' bta bnne

217 Hechos 6, 7

ake' be'nn yell, leska' bta bnne ake' be'nn gor brao ke yell Israelen' ren be'nn ka' llsedre ke ley dan' bzoj da Moisésen', na' bzap ake' Esteban, na' jwa'a ake' le'e rao koxchis ka'.

13 Leska' bdirj ake' be'nn be'e di'll wenra'll, nench bne ake':

—Be'nn ni, dateze de'e lloe' di'lle, na' llnne'e ke yoda'o braon', na' rente ke ley ke Diosen'. ¹⁴Leska' béneto' ne'e, Jesús be'nn Nazareten' yechinnje' yoda'o kellon', na' wache'e dan' bkwa'nn da Moisésen' gonllo. ¹⁵Na'll koxchis ka', na' ren be'nn ka' zjalli' ren leake'n, ka bwia ake' rao Esteban, na' bre'e akre' ka'kze rao angl ke Dios nak rawe'n.

Di'll da be'e Esteban

Na'll be'nnen' nak bxoz braon', lle'e Esteban:

—¿Renne be'nn ki kan' ne ake'n? ²Na'll bne Esteban:

-Re' be'nn gor xa, na' re' be'nn bi'cha', le wzenay kia' choll. Xanllo Dios be'nnen' nak le zerao be'nn za'k, broe'rawe' da xozxta'ollo Abraham na', kan' zoe' gan' nzi'i Mesopotamia, ka za lljasoe' yellen' nzi'i Harán. ³Goll Diosen' le'e: "Blloi vell ko'on, bsanra'll bi'ch lwelljo', na' chejo' ga de to yellrio da wroe'ra' rwe'." 4Ka' goken blloje' bkwa'nne' yellrio gan' nbane be'nn Caldeo ka', na' jasoe' Harán. Harán na' got xe'e. Bde got xe'e na'n, badwa'a Diosen' le'e gan' lla'llo ganni nna' lla. 5Bixha Diosen' bi gokra'lle' gak yellrion' ke'e kate na', ni ra'ten bi gok ke'e, zan bchebe' we'en xhi'nn dialla ke'e kate ba gote', la'kze nono xhi'nne' nna so, katen' golle' le'e ka'. 6Na'

goll Diosen' le'e: "Wllin lla kat lljacha'a xhi'nn dialla ko'o ka' to yell zi'te, ga gak ake' be'nn wen llin ke be'nn ka' gan' lljasó ake' na', wsa'kzi' ake' leake' tap gayoa (400) iz." 7Na' leska' goll Diosen' le'e: "Nada' wsa'kzia' yellen' gone leake' ka', na'll wallach ake', na' wayed ake' ganni nench we'rao ake' nada'." ⁸Diosen' be'rene' Abraham na' di'lle, ke yeolol no xhi'nn dialla ke'e bi byio za so, so akbe' sen dan' nzi'i circuncisión nench gak akbe' txhen rao yell ke Diosen'. Na' ka gok gorj xhi'nne' Isaac, ka gókebe' xo'n lla, bzoebe' sen, leska' ben Jacoben' ke xhi'nne' ka', be'nn chllinn ka' (12) gok xozxta'ollo ka'.

⁹ 'Bixha be'nn ka' gok xozxta'ollo, baxhé' akre' to bi'ch ake' be'nnen' le José, na' be't ake' le'e, bxhi'i be'nn Egipto ka' le'e, bixha Diosen' zerenkze' Josén'. ¹⁰ Diosen' gokrene' le'e la'kze ballayrawe', na' be'e le'e yel si'n. Na' ka bllin lla byej Josén' rao Faraón na', be'nnen' llnebia' be'nn Egipto ka', byo'ra'll be'nnen' le'e, na' bene' rallne'e doxhen Egipton'. Na' gok rallna'a Josén' rente yo' gan' llia be'nn wnebia'n.

11'Kana' gokse to win doxhen Egipton' ren Canaán na', na' ballayrao be'nn ka' kwis, ren xozxta'ollo ka', byallj da gao ake'.

12 Ka bene Jacoben', Egipto na' de trigo, na' bse'le' xozxta'ollo ka' jaxi'i ake'n, ka gok byej ake' da nelle.

13 Ka zjaklle' da wllop ras na', broe'rao Josén' bi'che ka'. Kana'll bnneze Faraón na', no be'nn ka' nak dialla Josén'.

14 Na' base'l Josén' leake', jaxhi'i ake' xa ake'n, na' yeolol bi'ch lwellje' ka', na' nak

Hechos 7 218

wyon chi'no ake' (75), to katen' bllin Egipton'. ¹⁵Ka' goken bllin Jacoben' Egipton', ganna' gote'; leska' Egipto na', got xozxta'ollo ka'. ¹⁶Bde got ake' na', jakwa'ch akte' leake' yell gan' nzi'i Siquem gan' zo ba dan' we'o Abraham na', ke xhi'nn be'nnen' le Hamor be'nn Siquem na'.

¹⁷ 'Bixha ka ba zo llin lla we'e Diosen' leake' yellrio dan' bchebe' ren da Abraham na', ba bzorao llan no xhi'nn dialla da Abraham na'. rall be'nn Egipto ka'. ¹⁸Na' bzorao llnebia' to be'nn yobre, be'nn bi bnnezre! cha! bi da wen ben da Josén' rao ralle'n. 19 Be'nn wnebia'n bavirila'lle' ka bene' nench bsa'kzie' xozxta'ollo ka', na' golle' leake' lliacho'nn ake' bda'o ke ake' ka' za llarje, nench bill chan ake'. ²⁰Kan' llak ka', gorj da Moisésen', na' byazra'll Diosen' le'e, blli'we' chonn be'o gan' zo xe'en. ²¹ Bllin lla bill bzoe akre' wkwa'ch ake' bda'on. na'll bsanra'll akebe'. Kat ballelkze no'ren' nak xhi'nn be'nn wnebia' na' lebe', na' bazie'be' bénebe' ka xhi'nne'. 22 Ka' gok bsed da Moisésen' yel si'n ke be'nn Egipto ka', na' gok be'e di'll da za'ke, na'll leska! bene! da za!ke.

²³'Ka goke Moisésen' choa (40) iz, bzo lo ra'llda'we'n lljara'nne' be'nn wrall ke'e, be'nn Israel ka'. ²⁴Ka blline' gan' lla'a ake'n, jadi're' to be'nn Egipton' llone' zi' ke to be'nn wrall ke'en, na' gokrene' be'nn wrall ke'en, bette' be'nn Egipton'. ²⁵Moisésen' llakre' wayakbe'e be'nn wrall ke'e ka', gonrén Diosen' le'e llin yechache' leake' Egipton', na' bi bayakbe'e be'nn ka'. ²⁶Bixha

bateyore bre're' chop be'nn Israel ka' dil ake', na' byeje' jale'e leake', lle'e leake': "¿Kere llopteze be'nn Israel re', bixchen dilzre?" ²⁷Na' be'nnen' ze llone' zi' ke lwellje'n, blli'ye' Moisésen', na' lle'e le'e: "¿Non' bse'l rwe' nench yedyeno' yel koxchis keto'n? ²⁸¿Cha' leska' lle'nro' goto' nada' kan' beno' beto' be'nn Egipton' neje?" ²⁹Ka bene Moisésen' kan' bne be'nnen', le bllebe' na' bxhonnje', jasote' to yell zi'te nzi'i Madián. Ganna' bchayne'e, na' bzo chop xhi'nne'.

30 'Ka gok choa iz zoe' Madián na', broe'rao to angl ke Diosen' le'e gan' nak lati dach, yoe' to lo xhis ve'che da lla'lnninnen gan' zo va' nzi'i Sinaí. 31 Ka bre'e Moisésen' kan' llaken, llabanre' kwis, na' jabi'ye' jawie', na' bne Diosen', lle'e le'e: 32"Nada' naka' Dios ke xozxta'o Abraham, na' Isaac, na' Jacob." Moisésen' bllebe', na' bi bayaxhjre' lljawie'. ³³Na'll goll Xanllo Diosen' le'e: "Golje xhero'n le nak la'y latj gan' ze'on. 34Ba bre'ra' kan' llsa'kzi' ake' be'nn ka' nak yell kia'n lla'a Egipto na', ba benra' kan' llosia' ake'n, na' ba bllin lla yesrá ake'. Nna' wse'la' rwe' Egipton'."

35'Moisés, be'nnen' bi byo'ra'll be'nn Israel ka' da nell, ka nak goll ake' le'e: "¿No bse'l rwe' nench yedyeno' yel koxchis keto'?" Le'e base'l Diosen' da yobre nench nnebie', na' yechache' leake' lo na' be'nn Egipto ka', le ka'n goll angl ke Diosen' le'e kan' bne'e lo yay ye'chen'. 36Na' bachache' leake', broe're' yel wak ke Diosen', bene' da yebane be'nn Egipto ka', leska' bene' ka blline' lloa' Nisda'o Xhna'n,

na'll gan' blla'a ake' gan' nak latj dachen', ka' gokte choa iz. ³⁷Na' da Moisésen' golle' xozxta'ollo ka': "Radjre be'nn Israel, kwej Xanllo Diosen' to be'nn we'e xti'lle'n, kan' bene' breje' nada', llaya'l wzenayre ke'e." ³⁸Moisésen' bzorene' xozxta'ollo ka' gan' nak latj dachen', na' be'rén angl ke Diosen' le'e di'll, gan' zo ya' da nzi'i Sinaí, be'e le'e di'll da nsa'a yel nban, len na' broe're' lli'o.

³⁹ 'Bixha xozxta'ollo ka', bi bzenay ake' ke da Moisésen', bi ben ake' le'e bare, na' gokra'll ake' wayej ake' Egipton' da yobre. 40 Na' goll ake' da Aarón na', be'nn bi'ch da Moisésen!: "Ben to dios kello, be'nn wabiarao raollo tnezen'. Ka nak Moisésen' be'nnen' babej lli'o Egipton', nono nneze bin' ba gok ke'e." 41 Na' ben ake' to bell da'o, na' bet ake' no bayi'x, ben ake' lnni, be'rao ake' dan' bayoll ben ren nia'na'a ake'n. 42 Diosen' bsanra'lle' leake', be'e lati be'rao ake' no will, be'o na' berj ka' llia le' yebá. Le' yich dan' bzoj be'nn ka' be'e xti'll Diosen' kana' na', llian gan' bne Diosen! ki:

Re' be'nn Israel, ni ke be'raozre nada'.

kan' betre bayi'x ka', kan' bzore latj dachen' rao choa iz.

⁴³ Da yobre be'raore, bia're lwa'a lsa'ken' nzi'i Moloc,

na' bia're berj ke lwa'a lsa'ken nzi'i Refán dios ben kwinre. Ke len wachacha' re' gan' lla'ren', na' wse'la' re' zi't gan' nzi'i Babilonia.

44'Chak blla'a xozxta'ollo ka' gan' nak latj dachen', ben ake' to

yoda'o da lladobte ga bro'cha'o ake' bray de yej, gan' llia ley ke Diosen'. Diosen' broe're' da Moisésen' doxhen kan' bene' yoda'on. 45 Xozxta'ollo ka' bga'nnrén ake' yoda'on. Kan' bzo Josuén', Diosen' bchache' be'nn ka' lla'a vell ka', nench gok blan ake' yellrio dan' bchebe' we'e leake'. Bsa'rén akte' yoda'o dan' lladobte, ka nak bllin ake' rao yellrion', na' ka' bdap ake'n bllinte bzo rey Daviden'. 46 Diosen' byo'ra'lle' kan' ben Daviden', Daviden' gokra'lle' gone' yoda'o ke Diosen', be'nnen' be'rao Jacoben' kana'. 47 Bixha xhi'nne' Salomón na', bene'n. 48 La'kze nnézello Diosen' ker be'nn zo yoda'o da llon be'nnachen', le kan' bzoj be'nnen' be'e xti'll Diosen' kana':

⁴⁹ Nada' zoa' yebá, na' nzoate nia' rao yellrion'.

¿Akxhan' nezre gonre to yo' ga soa'?

¿Akxhan' nezre gonre to ga wazi'ra'lla'?

⁵⁰ ¿Kere nada' bena' yeolol da zjadé rao yellrion'?

⁵¹'Na' nna' re', leska' llonre war yichjra'llda'oren', bi llzenayre ke Spíritu ke Diosen', doxhen kan' ben xozxta'ore ka', ka'n llonre. ⁵²Xozxta'ore ka' bsa'kzi' ake' yeolol be'nn ka' be'e xti'll Diosen' kana'. Bet ake' be'nn ka' bdixjwe', wllin lla yed be'nnen' zerao nak be'nn wen. Na' Le'en ba bede' nna', na' re' benre' rallna'a be'nn ka' bwie Le'e, na' kone ka' betre'. ⁵³Na' re' nnéztere ley ke Dios dan' bse'le' kone angl ka', na' bi bzenayre ke.

Ka gok bet ake' Esteban

⁵⁴Ka llene be'nn ka' kan' ne Esteban, to llrok ake' le'e, na' llaoxoxj lay Hechos 7, 8 220

ake'. ⁵⁵Na' Esteban yo'ya'nn Spíritu ke Diosen' yichjra'llda'we', ka blis rawe'n bwie' yebán', na' bre're' beni' ke Diosen', na' bre're' Jesucriston' ze'e kwit Diosen'. ⁵⁶Na'll bne'e:

—Nna'stek llre'ra' nyarj yebán', na' ze Jesúsen' Be'nnen' Gorj Radj Be'nnach, ze'e kwit Diosen' gan' llnebie'n.

57 Ka bayoll bne Esteban ka', bsejdo nay ake' besia' ake', yeolole' zejdo, byechj ake' le'e. 58 Na' brej ake' le'e yell, bchekw ake' le'e yej. Na'll be'nn ka' bchekw le'e yejen', blechj xha ake'n, na' bni't ake'n xhnia' to be'nn llabán re Saulo. 59 Ka llaral llchekw ake' Esteban yejen', balwille' Diosen' bne'e:

- —Xa Jesús, bazi'chga spíritu kia'n. ⁶⁰Na'll bche'k xhibe', bne'e zillj:
- —Xana', bi lljadinra'llchgo' da xhinnjen' llon ake'n.

Bayoll bne'e ka' gote'.

Saulo blle'nawe' na' bsa'kzie' be'nn ka' llonlira'll Jesucriston'

Be'nnen' re Saulo byazra'lle' kan' ben ake' bet ake' Esteban. Na'll be'nn ka' llnebia'n, bzorao llsa'kzi' ake' be'nn ka' llonlira'll Jesucriston' lla'a Jerusalén na'. Be'nn zan bxhonnje jake' do gan' nzi'i Judea, na' Samaria, na' postl ka' go'y akse' Jerusalén na'. ²Bal be'nn ka' llonlira'll Jesucriston', jakwa'ch ake' Esteban, na' bllell ake' ke'e. ³Na' Saulon' le llwiere' be'nn ka' llonlira'll Jesucriston', na' lloe' toto yo' llxhobxexje' no be'nn byio, no no're, llgoe' leake' rill ya.

Be'nn Samaria ka' bzenay ake' Di'll Wen ke Jesucriston'

⁴Be'nn ka' bxhonnjen', toto yell ga ll-llin ake' llyixjwe' aktere' be'nn ka', kan' nak Di'll Wen ke
Jesucriston'. ⁵Be'nnen' re Felipe
blline' yellen' re Samaria, na'
bzorao llroe're' be'nn ka' xti'll
Jesucriston'. ⁶Be'nn Samaria ka',
lldop ake' llzenay akya'nne' kan' ne
Felipen', na' llwia akte' yel wak ka'
llone' na'. ⁷Le be'nn zan be'nn yo'
daxi'o llayak ake', llalloj daxi'o ka'
llosia' ake'n, na' be'nn zan be'nn
nat chla' nia'na'a ake', na' be'nn
xhinnj be'nn bi llak sa'a, llayak ake'.
⁸Na' be'nn Samaria ka', llawé akre'
kwis.

⁹Leska' Samaria na', zo to be'nn walla'a re Simón, batna'te ziye'e leake' kone yel walla'a na', lle'e leake' nake' to be'nn za'ke. ¹⁰ Yeolol ake' bzenay ke'e, ka be'nn gor rente xkwi'de, na' ne ake':

—Be'nn ni nape' yel wak xhen ke Dios.

¹¹Na' lla'a ake' llzenay ake', na' llwia akte' ka yel walla'an llone' na', le kone len na', ba bxhiye'e leake' scha. ¹²Bixha ka bllin Felipen' llyixjwe're' Di'll Wen ke Jesucriston', llroe're' leake' kan' lle'ne Diosen' nnebie' yichjra'llda'o ake'n. Na' byejle' ake', na' blloa ake' nis ka be'nn byio ren no're. ¹³Ren Simón na' byejle', na' blloarene' nis, na' bdarenteze Felipen' txhen, llwie' yel wak dan' llone' na', na' llabanre' kwis.

¹⁴Na' postl ka' lla'a Jerusalén na', ka ben akre' ke be'nn Samaria ka', ba bxhi'i ake' xti'll Diosen', na' bse'l ake' Pedron' ren Juan na', Samarian'. ¹⁵Ka bllin ake'n, balwill ake' Dios nench betj Spíritu ke'en jasón yichjra'llda'o be'nn Samaria ka'. ¹⁶Le nono nna si'i Spíritu ke

Diosen', la'kze ba byejle' ake' ke Xanllo Jesucriston', na' ba blloa akte' nis. ¹⁷Na'll bxoa ta'k postl ka' yichj toto ake', na' ka' jasó Spíritu ke Diosen' lo yichjra'llda'o ake'n.

¹⁸Ka bre'e Simón na' kan' ben postl ka', bxoa ta'k ake'n yichj be'nn ka', nench bxhi'i ake' Spíritun', na' bchabre' postl ka' mell, ¹⁹lle'e leake':

—Legónn nada' yel waken' napren', nench noteze be'nn wxoa ta'ka'n yichje', leska' so Spíritu ke Diosen' lo yichjra'llda'we'.

²⁰Na' lle Pedron' le'e:

—Kweyi'renchgo' xhmello'n, ¿llakro' cha' da gak ga'o yel wak ke Diosen'? ²¹Bibi latj ko'o rwe' de gono' ka nak dan' llonto' ni, le bi nak yichjra'llda'on wen rao Dios. ²²Na' Llaya'l wayatro' ka dan' bne'o, na' bnnabe Diosen' cha' yezi'xhene' ko'o. ²³Nakbie'ze nna nchej da xhinnjen' rwe', na' nna lla'a yel xhe' lo ra'llda'o, bi lloe'n latj gono' da wen.

²⁴Na'll bne Simón na':

—Lennab okré rao Xanllon', bi gakchga kia' ka dan' bnere nga.

²⁵Pedron' ren Juan na', ka bayoll bzejnie' akre' xti'll Diosen', na' baza'a ake' zayej ake' Jerusalén na'. Na' ka badé ake' yell ka' gan' nbane Samarian', bdixjwe' akre' xti'll Diosen'.

Felipe na' to be'nn Etiopía

²⁶Bixha gok, kat to angl ke Xanllon' balwille' Felipen', lle'e le'e:

—Byej gan' xhoa nez dan' za'a Jerusalén na', dan' zej yellen' re Gaza gan' nak latj dachen'. ²⁷Na'll bro' Felipen' nez zeje', na' bre're' to be'nn we'o gore, be'nn nak be'nn brao gan' nzi'i Etiopía, zaze'e byeje' Jerusalén na', je'rawe' Dios. Na' nake' be'nn wex mell ke no'ren' re Candace be'nn llnebia' Etiopía. ²⁸Na' ka zaze'e zayoe' to lo karret, llole' yich dan' bzoj da Isaías be'nnen' be'e xti'll Diosen' kana'.

²⁹Na'll goll Spíritu ke Diosen' Felipen':

—Byej jabi'y kwit be'nnen', na' byejrene' txhen.

30 Na'll byej Felipen' jabi'ye' kwite'n, na' benre' llol be'nnen' yich dan' bzoj da Isaíasen' be'nnen' be'e xti'll Diosen' kana', na' lle Felipen' le'e:

—¿Llejnie'ro' dan' llolo'n?

³¹Na'll bne be'nnen':

—¿Akxha chejnie'ra'n na', cha' nono llra' wzejnie' nada'?

Na'll golle' Felipen' choe' lo karreten', na' zjake' txhen. ³²Na' gan' llol be'nnen' nen:

Ka xhi'r da'o ba nxhobe', zejba' rao yel got,

ka xhi'r da'o bi llosia' kat llchipe' xhaba',

ka' bene', bi ballie' xti'll ake'n.

³³ Na' ben ake' Le'e ka to be'nn bibi za'ke, bi ben ake' yel koxchis ke'en ka llaya'l gaken.

Nono xhi'nn dialla ke'e ni't, le baka'a ake' yel nban ke'en rao yellrio nga.

³⁴Na' wex mellen' lle'e Felipen':

—Ben okré bne nada', ¿bixchen ne be'nnen' ka', ke kwine'n ne'e ka' o cha' ke be'nn yobren' ne'e ka'? ³⁵Na'll Felipen', bxhi'zen gan' bel be'nnen', bzorao lloe'rene' le'e Di'll Wen ke Jesucriston'. ³⁶Na' chak yo' ake' nezen' ka bllin ake' ga de nis, na'll lle'e Felipen':

—Ganni llia nis, ¿bi gak choatega' nis nna'?

³⁷ Felipen' lle'e le'e:

—Cha' wxenra'llo' Jesucriston' do yichj do ra'llda'o, wakse.

Na'll ne be'nnen':

—Ba byejlia' Jesucriston' nake' Xhi'nn Dios.

³⁸Na'll golle' be'nnen' wza'ye' karreten', na' llop ake' betj ake' lo nisen', na' bchoa Felipen' le'e nis. ³⁹Ka balloj ake' lo nisen', Spíritu ke Diosen' bache'en Felipen' ga yobre, bill bre'e be'nnen' le'e. Na' bago' be'nnen' nez llawere' kwis zayeje'. ⁴⁰Ka gokbe'e Felipen' ba bllinte' yellen' nzi'i Azoto, na' zejze' toto yell llyixjwe're' Di'll Wen ke Jesucriston', bllinte' yellen' re Cesarea.

Ka gok bacha'a Diosen' yichjra'llda'o Saulon'

(Hch. 22:6-16; 26:12-18)

Na' Saulon' zokze yichjra'llda'we' go'xe' be'nn ka' llonlira'll Jesucriston', nench gote' leake'. Na' byeje' rao bxoz braon', ²na' bnnabe' yich da we'e latj cheje' yellen' re Damasco, na' choe' toto yoda'o ke be'nn Israel ka', na' go'xe' be'nn ka' nao nez kob ke Diosen', ka be'nn byio ren no're, na' wache'e leake' Jerusalén cho' ake' rill ya. ³Ka gok bro' Saulon' nez zeje', bixha ka le llinte' Damascon', to beni' da za'a yebá byechjen le'e.

⁴Na' wixe' je'tte' rao yo, na'll benre' bne to be'nn lle'e le'e:

—Saulo, Saulo, ¿bixchen llwiero' nada', na' da'o llrayo' nada'?

⁵Na'll bne Saulon':

—¿No rwe!, Xana!?

Na'll bne be'nnen':

—Nada'n Jesús, nada'n da'o llonro' ka', llonze zi' kwino'n llono' ka', ka llon to bell llche'oba' rao to da la, da lla'deba'.

⁶Na'll Saulon' do xhize', llebe' bne'e:

—Xana', ¿Bixha lle'nro' gona'? Na'll lle Xanllo le'e:

—Byejkze Damascon', ganna' nne ake' akre gono'.

⁷Be'nn ka' zejrén Saulon' txhen blleb ake' kwis, ka nak ben akre' chi'i be'nnen', na' nono bre'e akre'. ⁸Na' bayas Saulon', ka gokra'lle' yexa' rawe'n bill bre're'. Na' be'nn ka' zejrene' txhen na', be'x ake' ta'ke', bche'e ake' le'e gan' nzi'i Damascon'. ⁹Chonn lla bzoe' bi bre're', na' bi we'j bdaokze'.

¹⁰Damasco na', zo to be'nn llonlira'll Xanllo Jesucriston' be'nn re Ananías, na' Ananíasen' bre'da'ore' Xanllon', lle'e le'e:

-iAnanías!

Na'll bne Ananíasen':

—Bi na', Xana', ganni zoa'.

¹¹Na'll lle Xanllon' le'e:

—Bzolla'a, na' byej rill be'nnen' re Judas, be'nnen' zo gan' nzi'i Nez Li, na' bayirj to be'nne re Saulo be'nn Tarso, nna'stek llie' llalwille' nada'. ¹²Na' ba bena' nench bre'da'ore' rwe', bllino' wxoa ta'ko'n yichje', nench yere're'.

¹³Na'll bne Ananíasen':

—Xana', be'nn zan kwis lloe' xti'll be'nnen', katek da xhinnj kwis ba bene', bsa'kzie' be'nn ka' llonlira'll rwe'n lla'a Jerusalén na'. ¹⁴Na' ke len na', bede' ganni no'xte' to yich dan' be'e bxoz wnebia' ka', nench go'xe' be'nn ka' llalwill rwe'n.

¹⁵Na'll Xanllon' lle'e Ananíasen':

—Lla byej, nada' ba breja' be'nnen', nench cheje' we'e xti'lla'n rao be'nn ka' bi nak be'nn Israel, na' cheje' no rao be'nn wnebia' ke toto yell ka', na' renkze be'nn Israel ka'. ¹⁶Nada' wroe're' katek yellayrawe' dan' wzenaye' kia' na'.

¹⁷Na' byej Ananíasen' gan' zo Saulon', ka blline'n bxoa ta'ke'n yichje', lle'e le'e:

—Saulo bi'cha', Xanllo Jesús be'nnen' broe'rao rwe' kan' za'o tnezen', bse'le' nada' nench yere'ro', na' so Spíritu ke Diosen' lo yichjra'llda'o.

¹⁸Na'll le ballachte da nak ka yid bde'j lo rawe'n, na'll bare're'. Na'll bayase', na' blloe' nis. ¹⁹Bde na', bayawe', na' bayakra'lle'. Na' baga'nne' Damascon' chop chonn lla ren be'nn ka' llonlira'll Jesucriston'.

Saulon' lloe' xti'll Diosen' Damascon'

²⁰Le bzoraote Saulon' lleje' ga zo toto yoda'o gan' lladop be'nn Israel ka', na' lloe' xti'll Diosen', ne'e Jesucriston' nake' Xhi'nn Dios. ²¹Yeolol be'nn ka' llzenay xti'lle'n, llabán akre' kwis, na' lle lwellj ake':

—¿Kere be'nn nin' dá lli'nawe', na' llo'xe' be'nn ka' llalwill Jesucriston', be'nn ka' lla'a Jerusalén na'? ¿Na' kere ke len na' ba bede' ganni nench go'xe' be'nn ka', na' lljasane' leake' rao bxoz wnebia' ka'?

²²Na'll Saulon' yezikre llaralre' llroe're' ne'e, Jesúsen' nake' Cristo be'nn bse'l Dios nench nnebie'. Na' be'nn Israel ka' lla'a Damascon', bi ballel akre' akre ye ake' le'e.

Ka gok baxhonnj Saulon' Damascon'

²³Bixha ba gok zan lla, lloe' Saulon' xti'll Jesucriston', na'll be'nn Israel ka', be'e ake' di'll got ake' le'e. ²⁴Ka nak yellen' nechjen ze'e, na' blle'nao ake' toto gan' ll-lloj ake' yellen'. Bixha Saulon' gokbe're' ka'. ²⁵Na' be'nn ka' llonlira'll Jesucriston', bro' ake' le'e to lo wit, na' baletj ake' le'e tlle'le ko'll ze'en, na' baxhonnje'.

Saulon' balline' Jerusalén na'

²⁶Ka ballín Saulon' Jerusalén na', gokra'lle' gake' txhen ren be'nn ka' llonlira'll Jesucriston', na' yeolol ake' blleb ake', bi llejle' ake' cha' da lin' ba llonlira'lle' Jesucriston'. ²⁷Na' be'nnen' re Bernabé bche'e le'e gan' lla'a postl ka', na' be'rene' leake' di'll, kan' gok bre'e Saulon' Xanllon', kan' yoe' nez zeje' Damascon', na' kan' be'rene' le'e di'll. Na' gollte' leake' kan' ben Saulon', bi bllebe' be'e xti'll Jesucriston' Damascon'. ²⁸Saulon' bzoe' Jerusalén na', na' bdateze bnawe! be!nn ka! nxenra!ll Jesucriston'. ²⁹Na' bi llebe' we'rene' be'nn griego ka' xti'll Jesucriston', na' be'nn ka', lle'n akre' got ake' le'e. 30 Ka gokbe'e be'nn ka' llonlira'll Jesucriston' dan' lle'n akre' got ake' le'en, na'll bche'e ake' Saulon' yellen' nzi'i Cesarea, na'll base'l ake' le'e Tarso.

³¹Yeolol be'nn ka' ba lldop ll-llay llonlira'll Jesucriston' toto gan'

Hechos 9, 10 224

nbane Judean', na' Galilea, na' Samaria lla'a ake' wen, na' zejzell llejnie' akre' xti'll Jesucriston', na' llonlira'll aklle' Le'e. Na' Spíritu ke Diosen' lltipra'llen leake', na' zejze llan be'nn ka' tlla tlla.

Ka gok bayak to be'nn re Eneas

³²Bixha gok ka dá Pedron' llra'nne' yeolol be'nn ka' llonlira'll Jesucriston'. Na' blline' yellen' nzi'i Lida. ³³Na' jadi're' to be'nn re Eneas. Ba gok xo'n iz de'e nat nie'. ³⁴Pedron' lle'e le'e:

—Eneas, Jesucriston' wayone' rwe' nna'steke, bayas batob xta'on.

Le bayaste be'nnen' bayake'. ³⁵Yeolol be'nn ka' lla'a Lidan', na' be'nn ka' lla'a yellen' re Sarón bre'e akre' kan' bayak be'nnen', na' bsanra'll ake' billre da llxenra'll ake', na' baxenra'll ake' toze Xanllon'.

Ka gok babán Dorcas

³⁶Bixha gok to lla yellen' nzi'i Jope, zo to no'r nxenra'll Dios, na' nzie' Tabita, di'll griego lle'nen nen Dorcas. Dorcas na' zoteze zoe' llone' da wen llakrene' be'nne. ³⁷Bixha goksere' yillwe', na' gote'. Na' bayoll bwazj ake' le'e na', bxoa ake' le'e to lo yo'. ³⁸Yell Lida na', naken awlloze Jope, na' bnneze be'nn ka' nxenra'll Jesucriston', yell Lida na' zo Pedron', na' bse'l ake' chop be'nn nench ga'tyoe akre' le'e, na' lle ake' le'e:

—Ben okré cho'rén neto' nnastek. ³⁹Le byejrente Pedron' leake'. Ka bllin ake' na', jwa'a ake' le'e gan' de be'nn waten', na' jabi'y no'r wazeb ka', bell ake', na' llroe' akre' le'e

ra'll xha ka' da ben Dorcas ka nna nbane'. ⁴⁰Na' Pedron' bchache' yeolol be'nn ka' lla'a lo yo'n, na'll bche'k xhibe' balwille' Dios. Na'tell bayechje' bwie' be'nn waten', na' lle'e le'e:

—iTabita, bayas!

Le baxa'te rao Tabitan'. Ka bre're' Pedron', le bayaste' babie'. ⁴¹Na'll be'x Pedron' ta'ke' basolle'e le'e, na'll goxhe' no'r wazeb ka', na' be'nn ka' llonlira'll Jesucriston', broe're' leake' ba babane'. ⁴²Yeolol be'nn Jope ka', bnnez akre' kan' goken, na' be'nn zan byejle' ke Xanllon'. ⁴³Pedron' go'ye' zan lla Jopen', bzoe' rill to be'nn re Simón be'nn wazo'll yid.

Pedro ren Cornelio

Na' yellen' re Cesarea, zo to be'nn re Cornelio, na' nake' xan waka'a ya ka', nzi'i Be'nn Italia. Llape' Diosen' bara'nne, la'kze bi nake' be'nn Israel, lloe'rawe' Dios ren be'nn ka' lla'a lo yo' ke'en, na' lloe' mell da llakrene' be'nn Israel ka', na' zoteze zoe' llalwille' Diosen'. Gok to lla, lladá chonne bre'da'ore', bre're' to angl ke Dios byoe' gan' zoe'n, na' lle anglen' le'e:

—iCornelio!

⁴Cornelio na' bwiachiche' anglen', na' do llebe' lle'e le'e:

—¿Bi na', xana'?

Na'll lle anglen' le'e:

—Diosen' ba benre' kan' llalwilloe'n, na' ba bre're' kan' llakreno' be'nn ya'ch ka'. ⁵Na' bse'l be'nn lljake' yellen' re Jope, na' lljaxi'i ake' to be'nn re Simón Pedro. ⁶Zoe' rill be'nn leska' re'e Simón, be'nn wazo'll yid, na' zoe'

lloa' nisda'o, le'e ye'e rwe' da llaya'l gono'.

⁷Ka baza'a anglen', goxh Cornelion' chop be'nn wen llin ke'e, na' goxhte' ye to waka'a ya, be'nn llakrén le'e, leska' waka'a yan' nxenra'lle' Diosen'. ⁸Na' be'rene' leake' di'll kan' goll anglen' le'e, na'll bse'le' leake' Jopen'.

⁹Bateyó ka ba zo rez llin be'nn ka' Jopen', Pedron' byepe' yichjo gan' zoe'n, nench balwille' Dios, llonen ka do wawill. ¹⁰Na' done' kwis, na' gokra'lle' gawe'. Chak llon ake' da gawe'n, bre'da'ore'. ¹¹Bre're' byarj yebán', na' bre're' to xchan xhen, nllej toto xhi'ne lletjen. ¹²Na' loe na' lla'a yo'y kwen bayi'xe ba llia tap nia'na'a, na' ba llxhob le', na' ba llia xire. ¹³Na'll benre' bne Diosen':

- —Byas Pedro, bet ba ki na' bdao.

 14 Na'll Pedron' lle'e Diosen':
- —Ka'a, Xana', bi nna gawa' ba zban ka', nllon leyen' gaoto' ka ba ka'.

¹⁵Na'll bne Diosen' da yobre, lle'e le'e:

—To da ba bayib Dios, bi nne'o nakllen da zban.

¹⁶Gokte chonn ras lle'e le'e ka', na'll bayep xchan na' yebá. ¹⁷Chak llon Pedron' xhbab kwis, bi zejen dan' bre'da'ore'n, kat bllinkze be'nn ka' bse'l Cornelion' lloa' yo'n, llnnab ake' gan' zo be'nnen' re Simón, be'nn wazo'll yid na'. ¹⁸Ka bllin be'nn ka' lloa' yo'n, bnne ake' zillje, llnnab ake' cha' ganna'n zo to be'nn re Simón Pedro.

¹⁹Na' nna ze Pedron' llone' xhbab ke dan' bre'da'ore'n, kat goll Spíritu ke Diosen' le'e: —Rwe'n llayirj be'nn ki chonne. ²⁰Lla bzolla'a, na' bayetj, na' byejrén ake', bi gakganro', nadkza'n bse'l ake'.

²¹Na'll bayetj Pedron', jatile' be'nn ka' bse'l Cornelion', lle'e leake':

—Nada'n ria' Simón Pedro, ¿bi ken llayirjre nada'?

22 Na'll bne be'nn ka':

—To xan waka'a ya ka' re Cornelio bse'le' neto', nake' to be'nn lloe'rao Dios, na' yeolol be'nn Israel ka', lloe' ake' xti'lle' nake' be'nn wen. To angl ke Diosen' broe'rawe' le'e, na' golle' le'e yedxi'to' rwe' chejo' rille'n, nench ye'we' bin' llaya'l gone'.

²³Na' broe' leake' yo', na' btas ake' lle' na'. Bateyó byas Pedron' zejrene' be'nn ka', na' ren ye bal be'nn nxenra'll Jesucriston', be'nn lla'a Jope na'.

²⁴Ballop lla bllin ake' Cesarean'. Cornelion' ba llbexhe' leake', ba btope' no bi'ch lwellje', no be'nn nake' txhen. ²⁵Ka bllin Pedron' yo'n, le bllojdote Cornelion', jatile' le'e, bche'k xhibe' gokra'lle' we'rawe' Pedron'. ²⁶Pedron' basolle'e le'e, na' lle'e le'e:

- —Bazolla'a, lekze be'nnach nada'.

 ²⁷Nna lloe'rente' le'e di'llen', byo'
 ake' lo yo'n, na' bre're' be'nn zan ba
 lla'a. ²⁸Na'll Pedron' lle'e leake':
- —Re' nnézere, ley ke neto' be'nn Israel, ll-llonen cho'to' lo yo' rill be'nn bi nak be'nn Israel gon aktoe' txhen, zan Diosen' ba broe're' nada' gona' be'nn ka' txhen, la'kze bi nak ake' be'nn keto'. ²⁹Ke len na', kate bra' be'nn ki badxi'i ake' nada'n.

Hechos 10 226

le za'tia'. Na' lle'nra' nnere bi ken goxhre nada'.

30 Na'll bne Cornelion':

-Nna' llak tap lla, hor kite lladá chonne, nona' was, na' llalwilla' Dios, ka bre'ra' to be'nn badse'e rawa'n llaktit xhara'ne'n kwis. 31 Na' bne'e: "Cornelio, ba bzenay Diosen' kan' llalwilloe'n, na' ba bre're' kan' llono' llakreno' be'nn va'che. ³²Bse'l be'nn lljake' Jope, na' lljaxi'i ake' to be'nn re Simón Pedro, zoe' rill be'nn re Simón, be'nn wazo'll vid. Zoe' lloa' nisda'o. Na' kate ra' Pedron' rillo', na'll we'rene' rwe' di'lle." ³³Na'llen' le bse'ltia' be'nn ka' badxi'i rwe'n, na' ba beno' wen bedo'. Ni lla'to' nna', na' lle'neto' wzenayto' bin' lle'ne Diosen' gonto'.

Di'll da be'e Pedron' rill Cornelio

³⁴Pedron' bzorao lloe' di'll, na'

—Nna'll ba byejnie'ra' ke Diosen' bi llale'e ke ke be'nne. ³⁵Be'nn lla'a gateze vellrio, cha' llap ake' Diosen' bara'nne, na' llon ake' da wen, llo'ra'llkze Diosen' leake'. ³⁶Diosen' bdixjwe're' be'nn Israel ka', wak wazorenllo Diosen' wen, cha' wxenra'll-llo Jesucriston', le Le'en nak Xan yeolol-llo. 37 Re' nnézkzere ka dan' gok doxhen gan' nzi'i Judean', dan' bzorao gan' nzi'i Galilea na', bde kan' bdixjwe' Juan na' xti'll Diosen', na' bchoe' be'nn ka' nis. ³⁸Nnézkzere, Dios na'n be'e Jesús be'nn Nazareten' yel wak, na' be'e Le'e Spíritu ke'en. Na'llen' bda Jesúsen' bene' da wen, bayone' yeolol be'nn llsa'kzi' daxi'on, le Diosen' bzorén Le'e. ³⁹Na' neto' bre'to', na' lloe'to' di'll

ke da ka' ben Jesúsen' do Judea na' Jerusalén, na' bre'teto' kan' gok bet ake' Le'e, bda'a ake' Le'e le' yay cruzen'. 40 Bixha Diosen' basbane' Le'e bayónn lla, na' bene' nench broe'rawe' neto'. 41 Kere broe'rawe' yeolol be'nnen', neto' breje' da nellte nench we'to' xti'lle'n broe'rawe' neto'. Neto' we'j bdaorentoe' txhen, kan' babane' radi be'nn wat ka'. 42 Na'll ba bse'le' neto' chixjwe'to' yeolol be'nne, ba brej Diosen' Le'e gone' yel koxchis ke be'nn ban, na' be'nn ba got. 43 Yeolol be'nn ka' be'e xti'll Diosen' kana', be'e ake' xti'll Jesucriston', bne ake' noteze chejle' ke'e, Dios na' vezi'xhene' ke ake'.

Ka gok byo' Spíritu ke Diosen' yichjra'llda'o be'nn ka'

44Nna lloe'te Pedron' di'llen', kat byo' Spíritu ke Diosen' yichjra'llda'o be'nn ka' lla'a llzenayen'. ⁴⁵Be'nn Israel ka' nxenra'll Jesucriston', be'nn ka' bnao Pedron', llabán akre' kwis ka nak rente be'nn bi zjanak be'nn Israel, ba byo' Spíritu ke Diosen' yichjra'llda'o ake'. ⁴⁶Gokbe'e akre' kan' bxhi'i be'nn ka' Spíritu ke Diosen', le bzoraote lloe'rao ake' Dios, llnne ake' to di'll yobre. ⁴⁷Na'll bne Pedron':

—Bibi de wllon choa be'nn ki nis nna', ka nak Spíritu ke Diosen' ba byo'n lo yichjra'llda'o ake'n, kan' ba byo'n lo yichjra'llda'o lli'o.

⁴⁸Na' golle' leake' choa ake' nis, le ba nxenra'll ake' Jesucriston'. Bde na' go'tyoe akre' Pedron', nench go'yrene' leake' ye chop chonn lla.

Pedron' bzénre' be'nn Jerusalén ka' kan' goken

Postl ka', na' be'nn ka' llonlira'll Jesucriston' lla'a do gan' nzi'i Judean', bnnez akre' ke nak be'nn ka' bi nak be'nn Israel, ba bxhi'i ake' xti'll Diosen'.

²Ka ballín Pedron' Jerusalén na', be'nn Israel ka', be'nn ka' nxenra'll Jesucriston', bdil ake' le'e, ³lle ake' le'e:

—¿Bixchen jacho'zo' rill be'nn ka' bi nak be'nn Israel, na' jataorén akte'we' txhen?

⁴Na'll be'rén Pedron' leake' di'll kwasro doxhen kan' goken, lle'e leake':

⁵—Chak zoa' yellen' re Jope, ka llalwilla' Diosen' bre'da'ora', bre'ra' to xchan xhen nllejten dapte xhi'ne, lletjen yebá, na' za'n gan' zia' na'. ⁶Na' bwiaya'nna' bixhan' lla'a loen', na' bre'ra' lla'a bayi'x ba llia tap nia'na'a, ba llxhob le'e, na' ba llia xire. ⁷Na' benra' bne Diosen' lle'e nada': "Bzolla'a Pedro, bet ba ki, na' bdao akba'." 8Na'll ballia' xti'lle'n: "Ka'a, Xana', bi nna gawa' ba zban ka', nllon leyen' gaoto' ka ba ka'." ⁹Na'll bne'e da yobre, lle'e nada': "Da ba bayib Dios, bill nne'o nakllen zban." 10 Chonn ras gok ka', na'll bayep xchan na' yebá. ¹¹Nna' llakte ka'n, le bra'te chonn be'nn gan' zoa'n, be'nn za'k yellen' re Cesarea. 12 Na'll Spíritu ke Diosen' gollen nada' llaya'l cha'rén ake', na' bi gakganra'. Na' bza'rente be'nn bi'chllo ki xope, bllinteto' rill to be'nn re Cornelio, na' byo'to' rille'n. ¹³Cornelion' be'rene' neto' di'll ka gok broe'rao to anglen' le'e, na'

goll anglen' le'e: "Bse'l be'nn lljake' Jope, na' lljaxi'i ake' to be'nn re Simón Pedro. 14 Be'nn na' we'rene' rwe' xti'll Diosen' akre gono', nench yera'o rao da xhinnjen' ren be'nn lla'a lo yo' rillo'." ¹⁵Na' ka bzorawa' lloe'rén ake' di'llen', Spíritu ke Diosen' byo'n yichjra'llda'o ake', kan' byo'n lo yichjra'llda'ollon' kana'. ¹⁶Na' jadinra'lla' xti'll Xanllo Jesucriston', kan' bne'e: "Da li Juan na' bchoe' be'nn ka' nis, zan to da za'kll gak keré yedsó Spíritu ke Diosen' yichjra'llda'ore." ¹⁷Cha' kwin Diosen' ba be'e leake' Spíritu ke'en kan' benne'n lli'o nxenra'll-llo Jesucriston', ¿noxha naka' nada'n yepa' Diosen' bi gone' ka'?

¹⁸Ka bayoll ben akre' kan' bne Pedron', bzo ake' llize na' be'rao ake' Dios, bne ake':

—¿Bixha ren be'nn ka' bi nak be'nn Israelen', ba lloe' Diosen' latj yeyat akre' nench yezi'xhene' ke ake', na' we'e yel nban zejlikane ke ake'n cha'?

Be'nn ka' llonlira'll Jesucriston' yellen' re Antioquía

19 Be'nn ka' bxhonnj goslas kan' bde bet ake' Esteban na', bal ake' bllin akte' gan' nzi'i Fenicia, na' yell ka' zjalli' to yellrio da lli' lo nisda'o gan' nzi'i Chipre, na' yellen' re Antioquía gan' nbane Siria. Na' bi lloe'rén ake' no be'nn yobre xti'll Diosen', zre be'nn Israel ka'ze lloe'rén ake' di'lle. ²⁰ Na' bal be'nn yellen' nzi'i Chipre, na' be'nn Cirene bllin ake' Antioquía, na' bzorao llroe' akre' Di'll Wen ke Xanllo Jesucriston', ren be'nn ka' bi nak be'nn Israel. ²¹ Na' yel

Hechos 11, 12 228

wak ke Xanllon' zerenen leake'. Na' be'nn zan llsanra'll da nao ake', na' baxenra'll ake' Xanllon'.

²²Na' be'nn ka' lldop ll-llay llonlira'll Jesucriston' lla'a Jerusalén na', ben akre' kan' llaken, na' bse'l ake' be'nnen' re Bernabé Antioquía na'. ²³Ka bllin Bernabén', bre're' kan' llakrén Diosen' leake' bawere' kwis, na' golle' leake' do yichj do ra'll ake' nnao ake' Xanllon'. ²⁴Ka nak Bernabén' nake' to be'nn wen kwis, na' yo'ya'nne' Spíritu ke Diosen', na' le nxenra'lle' Dios, na'll yezikre be'nn zanll bxenra'll Xanllon'.

²⁵Na'tell byej Bernabén' yellen' re Tarso jadirje' Saulon', ka ballele' le'en, bche'e le'e Antioquían'.

²⁶To iz bzo ake' Antioquían', ben ake' txhen be'nn ka' lldop ll-llay llonlira'll Jesucriston', na' be'nn zan broe' akre' xti'll Diosen'. Antioquía na' bsi'i ake' be'nn ka' llonlira'll Xanllon'. Cristiano da nelle.

²⁷Ka gok ka', bal be'nn ka' lla'a Jerusalén, be'nn ka' lloe' xti'll Diosen' kon ka llzejnie' Spíritu ke Diosen' leake', na' byej ake' Antioquían'. 28 Toe' be'nn re Agabo bzolle'e radj be'nn ka' lla'a lloe'rao Diosen', na' bne'e kon kan' bzejnie' Spíritun' le'e, bdixjwe're' gak to win xhen doxhen yellrio. Na' ka bllin lla bnebia' be'nnen' re Claudio doxhen gan' nbane Roma, kana' gok win kan' bne Agabon'. 29 Na' be'nn Antioquía ka' llonlira'll Jesucriston', be'e ake' di'll gakrén ake' be'nn lwelli ake' ka' lla'a yell ka' do gan' nzi'i Judea, kon ka yeza'ra'll toto ake'. 30 Na' ka bayoll bdopen na', bse'l ake' Bernabén' ren Saulon'

jwa'a ake' mellen' rao be'nn gor brao ka', nak rallna'a be'nn ka' llonlira'll Jesucriston' lla'a Judean'.

Ka gok bet ake' Jacobo na' bro' ake' Pedron' rill ya

Leska' kana' bchoybia' rey Herodes, be'x ake' bal be'nn ka' llonlira'll Jesucriston'. nench wsa'kzie' leake'. 2Na' bchoybie' bet ake' Jacobo, bchoy ake' yene', be'nnen' nak be'nn bi'ch Juan na'. ³Gokbe'e Herodesen' bavo'ra'll be'nn Israel ka' kan' bene'n, na'll bse'le' be'nn ka', be'x ake' Pedron' rao lnnin', katen' llao ake' yet xtir dan' bi nchix kwa binn. ⁴Herodes na', broe' Pedron' rill va. na' bse'le' tap kwen waka'a ya, be'nn nak tap wej, nench bdap ake' rill yan'. Llakre' ka te lnni na', kweje' le'e rao be'nn yell, gone' yel koxchis ke'e. ⁵Bixha chak yo' Pedron' rill yan', na' lla'a waka'a ya ka' llap ake' le'e, na' be'nn ka' llonlira'll Jesucriston', llaral llalwill ake' Diosen' gakrene' Pedron'.

Ka gok balloj Pedron' rill ya

⁶Bixha tlle'le na', ka wxere llwia Herodesen' kweje' Pedron'. Na' Pedron' de'e tase' radj chop waka'a ya, na' nllej ta'ke'n chop gden, na' lla'te ye to kwen waka'a ya, llap ake' lloa' rill yan'. ⁷Kat bllinkze to angl ke Xanllo Dios lo rill yan', to beni' xhen go'te, na' anglen' jatane' Pedron' basbane' le'e, lle'e le'e:

—iSete byase!

Ka bne'e ka'n, le ballojte gden ka' ta'k Pedron'. ⁸Na'll lle anglen' le'e: —Bachej le'on, na' barejdo xhero'n. Na'll bayoll na', lle'e le'e:

—Balleldo xhallero'n, na' banao nada'.

⁹Na' balloj anglen', na' zanao Pedron', na' bi llakbe're' cha' da lin' llabej anglen' le'e rill yan', kon llakre' cha' llre'da'ozre'n. ¹⁰Badé akte' gan' lla'a to kwen waka'a ya ka', na'll badé ake' ga lla'a be'nn wllope ka'. Kat ballín akte' ga zo reyj de ya dan' llwia tnezre, to wrazzen byarjen, na' balloj ake'. Bza'a ake' ye ra't, na'll baza'a anglen', na' bakwa'nne' Pedron' toze.

¹¹Kana'll gokbe'e Pedron' da likzen' balloje' rill yan', na'll bne'e:

—Nna'll llre'ra' da likzen' bse'l Diosen' angl ke'en, nench basre'e nada' rao na'a Herodes na', na' rao yeolol da ka' lle'ne be'nn Israel ka' gon akre' nada'.

¹²Llonteze' xhbab kan' goken, ballinte' rill María xhna' Juan Marcos, na' lla'a be'nn zan llalwill ake' Dios. ¹³Ka bnne Pedron' le' zaguan na', byejdo to bi no'r re Rode jawiabe' non' nne. ¹⁴Ka bayombia'be' chi'i Pedron', bawebe' kwis, na' bi bsarjbe', zayejdobe' jatixjwe'be' be'nn ka' yela', ba ze Pedron' lloa' yo'n. ¹⁵Na'll lle be'nn ka' bi no'ren':

—¿Bin' ba llakro'?

Na' zekzbe' llebe' leake', Pedro na'n ze ganna'. Na'll bne ake':

—ċKere angl ke Pedro na'n lla?

¹⁶Na'll Pedron' zekze' llnne'e lloa' yo'n, na'll jasarj ake'. Ka bre'e akre' le'en, llabán akre' kwis. ¹⁷Na'll Pedron' bene' sen ren ta'ke' nench bzo ake' lli, na' be'rene' leake' di'll kan' gok babej Xanllon' le'e rill yan', leska' lle'e leake':

—Lechixjwe' Jacobon', na' be'nn lwelljllo ka' yela' kan' ba goken. Na'll balloje' zayeje' ga yobre.

18 Bixha ka byeni', da xhen gokllejla'll waka'a ya ka', ke nak nollno Pedron' yo' lo rill yan'.

19 Na'll Herodes na', bse'le' be'nne bayirj ake' Pedron', na' bi ballel akre' le'e, na'll bnnabyollre' waka'a ya ka', akre gok balloje', na' waka'a ya ka' bibi gokse nne ake'. Na' bchoybie' bet ake' waka'a ya ka' gop rill yan'. Na'll bza'a Herodesen' Judean', na' byeje' jasoe' yellen' re Cesarea.

Ka gok got Herodes

²⁰Rey Herodes na', llaklle'e be'nn yell ka' nzi'i Tiro, na' Sidón. Na'll be'nn ka' be'e ake' di'll lljake' rawe'n, na' be'rén ake' to be'nne di'll, be'nn nak rallna'a gan' nbane Herodes, be'nn re Blasto. Be'e ake' le'e mell nench wdie' xti'll ake', na' bnnabe' yeni't ake' wen ren reyen', le yallj akre' da ye'j gao ake' gan' nbane Herodes. ²¹Herodes na' bzoe' to lla lljak be'nn ka' rawe'n. Ka bllin llan', Herodes goke' xhara'ne' da cha'o, na' bllie' gan' llone' yel koxchis, na' broe' lban rao be'nn Tiro, na' be'nn Sidón ka'. 22 Ka bayoll broe' lban na', besia! be'nn ka! bne ake!:

—iKere be'nnachen' bnne, Dioskzen' ba bnne!

²³Rawe llak ka'n, to angl ke Xanllo Dios bene' nench Herodes na', bia'ze' to yillwe', le bi be'rawe' Dios, be'e latj be'rao be'nn ka' le'e. Na' gote', na' bdao bel da'o ka' xpe're'n.

²⁴Zan ka nak xti'll Xanllon', zejzell goslasen, na' gateze ba lloe' ake' xti'lle'n. Hechos 12, 13 230

²⁵Bernabé ren Saulon', bayoll bi dan' ben ake' Jerusalén na', na' baza'a ake' zayej ake' yellen' nzi'i Antioquían', nche'e akte' be'nnen' re Juan Marcos.

Blloj Bernabé ren Saulo zjake' zjatixjwe' akre' xti'll Diosen'

Radj be'nn ka' lldop ll-llay llonlira'll Jesucriston' lla'a yellen' nzi'i Antioquían', zjarén be'nn lloe' xti'll Diosen' kon ka llzejnie' Spíritu ke Diosen' leake'. Na' zjarén be'nn llak llroe' llsede xti'll Diosen', ki re bal ake': Bernabé, na' Simón (be'nnen' nsi'i ake' Be'nn Gasj), Lucio be'nn Cirene, na' Manaén (be'nn blli'orén Herodesen' txhen, be'nnen' llnebia' Galilean'), na' Saulo. ²To lla ka non ake' was, na' lloe'rao ake' Dios, na' llalwill ake' Le'e, na' bnne Spíritu ke'en llen leake':

—Lekwej Bernabén' ren Saulon', le ba bayaxh ake' gon ake' xchina'.

³Na'll bayoll ben ake' was na', balwill ake' Diosen', na' bxoa ta'k ake' yichj Bernabén' ren Saulon', na'll bsa'a ake' leake'.

Postl ka' bdixjwe' akre' xti'll Diosen' yellen' re Chipre

⁴Spíritu ke Diosen' bse'len Bernabén' ren Saulon' yellen' re Seleucia, ganna' byo' ake' barco bllin akte' to yellrio, da lli' radj nisda'o gan' nzi'i Chipre. ⁵Ka bllin ake' yellen' nzi'i Salamina, bzorao lljake' yoda'o ke be'nn Israel ka', na' lloe'rén ake' leake' xti'll Diosen'. Na' nao Juan Marcos na' llakrene' leake'.

⁶Na' ka' bde ake' doxhen yellrion' lli' radj nisen', bllin akte' yellen' nzi'i Pafos. Ganna' jadi' akre' to be'nn Israel be'nn walla'a re Barjesús, na' ziye'e be'nn ka' ne'e nake' be'nn lloe' xti'll Dios. ⁷Zoteze zorene' to be'nn wnebia', to be'nn si'n re Sergio Paulo. Na' be'nnen' goxhe' Bernabén' ren Saulon', lle'nre' wzenaye' xti'll Diosen'. 8 Na' Barjesúsen', lekze nsi'i ake' le'e Elimas, (di'll griego lle'nen nen be'nn walla'a), ll-llone' wzenay be'nnen' llnebia'n bi lloe' latj chejle'. ⁹Na'll Saulon', lekze le'en re Pablon', ka nak yoe' Spíritu ke Diosen', bwiachiche' be'nn walla'an. 10 Na'll llele lele:

—Be'nn wxhiye'e, be'nn wen da xhinnj, xhi'nn daxi'o bi llo'ra'llo' da nak da wen. ¿Bat wsano' bill gonchixro' yichjra'llda'o be'nn ka', nench bi nnao ake' di'll li ke Diosen'? ¹¹Na' nna' Xanto' Diosen' wsa'kzie' rwe', wcholo' to chi'i bi re'ro' beni'.

Le bcholte be'nnen', bxhoa bej rawe', na' de'e llgane' no go'x ta'ke'. ¹²Ka bre'e be'nnen' llnebia'n kan' goken na' byejle', llabanre' kwis kan' nak xti'll Xanllo Jesucriston'.

Pablon' ren Bernabén' jake' Antioquía ga nbane Pisidia

¹³ Na'll Pablon' ren be'nn lwellje' ka', baza'a ake' yellen' re Pafos, byo' ake' barco bllin akte' yellen' nzi'i Perge gan' nbane Panfilia. Ganna' bsanra'll Juan Marcos leake', zayeje' Jerusalén. ¹⁴ To bde akze' Pergen', bllin akte' yellen' nzi'i Antioquía ga nbane Pisidia. Ka bllin to lla nba'nne, na' jake' yoda'o ke be'nn Israel ka', na' jache' ake'. ¹⁵ Ka bayoll bel be'nn ka' yich gan' llia

ley, dan' bzoj be'nn ka' be'e xti'll Diosen' kana', na'll be'nn ka' llnebia' lo yoda'on, bse'l ake' be'nn, jell ake' Pablon' ren Bernabén':

—Be'nn bi'ch ake, cha' bi di'll de we'renre be'nn ki wak nnere nna'. ¹⁶Na'll bzolla'a Pablon', bene' sen ren ta'ke'n, nench bzo ake' lli, na' bne'e:

—Re', be'nn Israel, na' notezre llapre Diosen' bara'nne lewzenay kan' nia' ni. ¹⁷Dios be'nnen' lloe'raollo lli'o be'nn Israel, breje' xozxta'ollo ka', bene' leake' to yell xhen kan' blla'a ake' gok ake' be'nn zi't gan' nzi'i Egipton'. Na' Diosen' broe're' yel wak ke'en ka nak bachache' leake' Egipton'. ¹⁸Diosen' gokxhenre' kan' ben ake' blla'a ake' latj dachen' choa (40) iz. ¹⁹Diosen' banit balane' be'nn ka' lla'a gall yellrio ka', nench be'e yellrion' xozxta'ollo ka'.

²⁰'Na' rao tap gayoa chiyon (450) iz, Diosen' breje' be'nn ben yel koxchis ke ake', nench bnebie' leake', ka gok bllinte lla bzo be'nnen' re Samuel, be'nnen' be'e xti'll Diosen'. 21 Na'll bnnab ake' so rey be'nn bnebia' leake', na' Diosen' breje' be'nnen' re Saúl, nench goke' rey choa iz. Saúlen' goke' xhi'nn Cis, na' goke' xhi'nn dialla ke Benjamín. ²²Kat bllin lla bkwas Diosen' Saúlen' ka'le, na' breje' David goke' rey, na' bne Diosen' ke Daviden': "David xhi'nn Isaín', le'e llo'ra'lla', le'e gone' dan' lle'nra'n." 23 Na' rao dialla ke rey David na', gorj Jesús be'nnen' yesrá lli'o be'nn Israel, kan' bcheb Diosen'. 24 Ka zayedtere Jesúsen', Juan na' bdixjwe're' be'nn Israel ka', llaya'l wayat akre' ke da

xhinnjen' non ake', na' choa ake' nis. ²⁵Ka ba zo rez wayoll xchin Juan na', bne'e: "Be'nnen' bexhren' kere nada', za za'a to be'nn za'kll ka nada', bi za'ka' nada' ka Le'e, ni da wadecha'wa' xhere'n nie', bi za'ka'."

²⁶'Be'nn bi'che, nakllo xhi'nn dialla da Abraham, na' notezre llapre Diosen' bara'nne, ke lli'on ba bse'l Diosen' lloa' xti'lle' dan' nsa'a yel wasrá. ²⁷Ka nak be'nn ka' lla'a Jerusalén na', na' be'nn ka' llnebia' leake', bi bayakbe'e akre' cha' Diosen' bse'l Jesúsen', na' ni ke llejnie' akzre' dan' bzoj be'nn ka' be'e xti'll Diosen' kana', la'kze lla'a ake' llol ake'n yeo lla nba'nne. Na' ka' gok bzoa lloa' xti'll Diosen' ka nak bchoybia' ake' llaya'l gat Jesúsen'. ²⁸Llwia akte' bibi da xhinni bene' nench gate', na' goll akse' Pilaton' llaya'l gat be'nnen'. ²⁹Gok ka' nench gok doxhen kan' nyoj xti'll Diosen' gak ke Jesúsen'. Na' bayoll gote' na', baletj ake' Le'e le' yay cruzen', na' bkwa'ch ake' Le'e. 30 Bixha Diosen' basbane' Le'e radj be'nn wat ka'. 31 Na' broe'rawe' be'nn ka' ben Le'e txhen kan' bze'e Galilean' bllinte' Jerusalén na', zan lla bdarene' leake' kan' babane'n. Na' leake'n lloe' xti'll Jesucriston' rao be'nn yell.

32'Na' nna' neto' leska' llyixjwe'to' re' kan' nak Di'll Wen ke Jesucriston', di'll dan' bcheb Diosen' ren xozxta'ollo ka'. 33 Lli'o nakllo xhi'nn dialla ke ake', na' lli'o llre'llo ba llon Diosen' ka dan' golle' leake'n, dan' basbane' Jesúsen'. Kan' nyojkze salmo wllopen' nen: "Xhi'nnkza' rwe', nada' gonna' rwe' yel nban." 34 Dan' basbane'

Hechos 13 232

Jesúsen', bill we'e latj gate' da yobre, leska' nen: "Na' gonna' rwe' vel nak la've dan' bcheba' wa'a Daviden'." 35 Ke len na' leska' ne le' yich ke to salmo yobre: "Bi we'o latj go'll xpe'ra'n, nada' naka' rallna'o." ³⁶Da li naken, Daviden' bzoe' gokrene' xozxta'ollo ka' kon ka broe' Diosen' le'e. Bde na', gote' jayene' txhen xozxta'ollo ka' ba got, na' go'll xpe'r Daviden'. ³⁷Zan ka nak be'nnen' basbán Diosen', bi go'll xpe're'n. ³⁸Na' llaya'l nnézere, be'nn bi'cha', Jesucriston' be'nnen' lloe'to' xti'lle'n, Le'e yezi'xhene' ke yeolol be'nne cha' gonlira'll ake' Le'e. 39 Ka nak ley dan' bzoj da Moisésen', bi llzoen yelanen da xhinni kellon', zan Jesucriston' Le'en yenit yelane' da xhinni kellon', cha' lli'o wxenra'll-lloe'. 40 Lewiá. ke gak keré kan' bzoj be'nn ka' be'e xti'll Diosen' kana', gan' nen:

⁴¹ Lewayón xhbab be'nn lltitje, Legón yel wan, na' lewxhonnje. Nada' Dios gona' to da yebánere chak nbanre, na' la'kze we'rén akte' re' di'll, ni ke chejle'zre.

⁴²Ka balloj Pablon' ren be'nn lwellje' ka' lo yoda'on, be'nn ka' bi nak be'nn Israel go'tyoe akre' leake', nench kat wazó xhman na', lljake' da yobre lljazejnie' akre' leake'. ⁴³Ka ballach ake'n, be'nn zan be'nn Israel ka', na' leska' be'nn ka' ba nao llon kan' ne ley ke be'nn Israel ka', bnao ake' Pablon' ren Bernabén'. Na' basyoll Pablon' ren Bernabén' broe' akre' leake', na' goll ake' leake' seteze se ake' wxenra'll ake' Dios, be'nnen' nllie' lli'o.

44 Bixha ka bazó xhman lla nba'nne, yeolol kaze be'nn yell badop bzenay ake' xti'll Diosen'.
45 Bixha be'nn Israel ka', ka bre'e akre' be'nn zan ka', baxhé' akre' postl ka', na' ka nne Pablon', llalli'i akte' xti'lle'n, na' lla'dyi' ake' le'e.
46 Bixha Pablon' ren Bernabén' bi lleb ake' lloe' ake' di'llen', na' lle ake' be'nn ka':

—Ba bento' bien ba bzejnie'to' zga'tek re' be'nn Israel xti'll Diosen', na' ka nak ll-llon yichjra'llda'ore, bi llo'ra'llre xti'lle' dan' nsa'a yel nban zejlikane, na' wayejllto' gan' lla'a be'nn ka' bi nak be'nn Israel. ⁴⁷Le ka'kzen' bne Xanto' Diosen' golle' neto':

Ni nzoa' rwe' gako' beni' ke be'nn ka' bi nak be'nn Israel, nench be'nn ka' lla'a doxhen yellrio, gakbe'e akre' wak yerá ake' rao da xhinnj ke ake'n.

48 Na'll be'nn ka' bi nak be'nn Israel, ka ben akre' ka', llawé akre' kwis, na' ne ake' wen kwis nak xti'll Xanllo. Na' byejle' yeolol be'nn ka' ba brej Diosen' ga't yel nban zejlikane ke ake'. 49 Ka' gok, doxhen gan' nzi'i Pisidia, bnnez akre' xti'll Xanllo Jesucriston! 50 Bixha be'nn Israel ka', bko'yel akre' bal no'r brao ka', nench ben ake' txhen koxchis ka', na' bzorao bdilrén ake' Pablon' ren Bernabén', ben akte' gan babej ake' leake' yellen'. ⁵¹Na'll postl ka' balloj ake' yellen', babib akte' no bichte bllia nia' ake', nench bavakbe'e be'nn ka' kreren' ben ake'. Na' baza'a ake' ballín akte' vellen' re Iconio. 52 Yeolol be'nn ka' nxenra'll Jesucriston', lla'a ake'

233 Hechos 13, 14

llawé akre' kwis, na' Spíritu ke Diosen' llnebia'n yichjra'llda'o ake'.

Pablon' ren Bernabén' bllin ake' Iconio

Na' gok ka bllin Pablon' ren Bernabén' yellen' nzi'i Iconio, jake' yoda'o ke be'nn Israel ka'. Na' jazejnie' akre' xti'll Diosen' kwasro, na' be'nn zan benlira'll Jesucriston' ka be'nn Israel na' ren be'nn griego ka'. ²Na' be'nn Israel ka' bi nxenra'll Jesucriston'. bko'yel akre' be'nn ka' bi nak be'nn Israel, nench gok akre' Pablo ren Bernabén' be'nn wen da xhinni ak. ³Ni ke len na' baga'nn ake' scha Iconion', lloe' ake' xti'll Xanllon'. ni ke lleb akze'. llroe' akre' kan' nllie' Diosen' be'nn ka'. Na' Diosen' llroe're' di'll likzen' lloe' ake', ke nak be'e leake' yel wak, na' llon ake' da yebánello. ⁴Na' be'nn Iconio ka' gok ake' chopre, bal ake' bda'a be'nn Israel ka', na' ye bal ake' bda'a postl ka'. ⁵Na' be'nn Israel ka'. na' ren be'nn ka' bi nak be'nn Israel, gok ake' toze ren koxchis ka', na' bzi'chi'll ake' Pablon' ren Bernabén'. na' lle'n akre' wchekw ake' leake' yej. ⁶Ka gokbe'e Pablon' ren Bernabén' ka', na'll baza'a ake' jake' yell ka' nzi'i Listra, na' Derbe ga nbane Licaonia. Na' jatá ake' yell ka' lli' do kwite, ⁷na' ganna' jatixjwe' akre' Di'll Wen ke Jesucriston'.

Ka gok bchekw ake' Pablon' yej chak zoe' Listra

⁸Gan' ne Listra jadi' akre' to be'nn nxhinnj nia' ka gorjte, na' bi llak se'e. ⁹Bixha ka llzenaye' di'llen' lloe' Pablon' ren Bernabén', Pablon' bwiaya'nne' le'e, na' gokbe're' nxenra'lle' wayake'. ¹⁰Na' goll Pablon' le'e zillj:

—iBalí nia'on, na' bazolla'a! Na' le bazolla'te be'nnen', bxhi'te' na' le gokte baze'e. ¹¹Be'nn Listra ka', ka bre'e akre' kan' ben Pablon', bzorao llosia' ake' nne xti'll ake', ne ake':

—iDios aksen' ba betj radjllon', nak ake' ka be'nne!

12 Na! bne ake! Bernabén! nake! dios ke ake', be'nn re Júpiter, na' Pablon' nake' dios be'nn re Mercurio, le le'en lloe' di'llen'. ¹³Na' bxoz ke Júpiter na', ke nak yoda'o ke'en zon lloa' yellre, jaxie' bal bell, na' bencha'we' yeje, na' jwa'a ake'n gan' lla'a ake' ren be'nn zan ka'. gokra'll ake' got ake' bell, nench we'rao ake' postl ka'. ¹⁴Ka gokbe'e Bernabén' ren Pablon' kan' lle'ne be'nn ka' gon ake'n, na'll bche'z xhara'n ake', nench broe' akre' be'nn ka', kreren' llon ake', na' bde ake' radj be'nn zan ka' llosia' ake', lle ake! leake!:

15—Re', be'nne, ¿bixchen llonre ka'? Lekze be'nnachkze neto', za'to' llzejnie'to' re', llaya'l wsanra'llre dan' naore na', da bi za'ke, na' wayoe'raore Dios be'nn nban zejlikane, be'nn ben yebá, yellrio na' nisda'o, na' bene' yeolol da zjadé. 16 Do batna' be'e latj ben be'nn ka' ka nezen ke ake'. 17 Na' bzekze' gokrene' yeolol be'nne, nench bnnez akre' zokze', na' Lekze'n llone' llak yejw nench llak bi da llaz lla'nnllo, na' de da lle'j llaollo, na' zollo nbaraz.

¹⁸Da zan da goll ake' be'nn ka', ganne bzoe akre' bi bet be'nn Listra

Hechos 14, 15 234

ka' bell ka', we'rao ake' leake'.

19 Nna llakte ka'n, bllin be'nn Israel
ka' za'k yell ka' nzi'i Antioquía
ren Iconio, na' benchix akre' be'nn
ka', nench bill byejle' ake' ke postl
ka'. Na' bchekw ake' Pablon' yej.
Na' llak akre' cha' ba gote'n, na'll
bxhob ake' le'e brej akte' le'e
yell. 20 Na' be'nn ka' llonlira'll
Jesucriston' bdop ake' byechj ake'
Pablon' gan' de'en, na'll bayase' na'
bayoe' yell. Bateyó bago' Pablon'
ren Bernabén' nez, jayake' gan' nzi'i
Derbe.

²¹Ka ballín ake' na', bdixjwe' akre' be'nne kan' nak Di'll Wen ke Jesucriston', na' be'nn zan benlira'll ake' Xanllon'. Bde na', bza'a ake' ballín akte' Listra, na'll Iconio, na'tell ballín ake' Antioquía. ²²Toto yell ga badé ake', be'ltipra'll ake' be'nn ka' llonlira'll Jesucriston', lle ake' leake':

—Yezikre lesé war ka naken ba nxenra'llre Jesucriston', dekz de yellayraollo chak bexhllo yeyejllo gan' llnebia' Diosen'.

²³Leska' toto yell gan' badé ake'n, brej ake' be'nn gor llejnie', nench se ake' wia ake' be'nn ka' llonlira'll Jesucriston'. Na' bayoll ben ake' was, balwill ake' Diosen', na' ben ake' leake' rallna'a Xanllon', be'nnen' bakze llonlira'll ake'.

Pablon' ren Bernabé ballín ake' Antioquía gan' nbane Siria

²⁴Ka zayo' Pablon' ren Bernabén' nezen', bde ake' ga nzi'i Pisidia, na'll ballín akte' gan' nzi'i Panfilia.
²⁵Ka bayoll be'e ake' xti'll Diosen' yellen' re Perge, na'll baza'a ake' ballín akte' yellen' re Atalia.

²⁶Ganna' byo' ake' barco, na' ballín akte' Antioquía gan' nbane Siria, le kana' ben be'nn Antioquía ka' leake' rallna'a Dios, kan' blloj ake' jatixjwe' akre' xti'lle'n dan' ballín akte' na'. ²⁷Ka ballín ake'n, batop ake' be'nn ka' llonlira'll Jesucriston', na' be'rén ake' leake' di'll kan' gokrén Diosen' leake', broe're' da zan da yebánello gan' jatá ake'n, na' kan' ben Xanllon' bsarje' yichjra'llda'o be'nn ka' bi nak be'nn Israel nench byejle' ake'. ²⁸Na' go'y ake' scha ren be'nn ka' ba llonlira'll Jesucriston'

Jerusalén na' bayej di'll akre gon be'nn ka' nxenra'll Jesucriston'

Kan' llak ka', bal be'nn bza'a yell ka' gan' nbane Judean', bllin ake' Antioquía na', na' bzorao llsed akre' be'nn ka' nxenra'll Jesucriston', ne ake':

—Cha' bi sore sen dan' nzi'i circuncisión kan' ne ley dan' bzoj da Moisésen', bi gak yerare rao da xhinnjen'.

²Pablon' ren Bernabén' llakdilrén ake' be'nn ka', bixchen llroe' akre' leake' ka'. Na'll be'nn ka' llonlira'll Jesucriston' lla'a Antioquían', be'e ake' di'll lljak Pablon' ren Bernabén' ren ye bal be'nn lwellj ake' ka' Jerusalén na', nench lljara'nn ake' postl ka', na' be'nn gor brao ke be'nn ka' llonlira'll Jesucriston', na' llje'rén ake' leake' di'lle, akre gak ke dan' llroe' be'nn ka'.

³Ke len na', be'nn ka' lldop ll-llay llonlira'll Jesucriston' lla'a Antioquían', bse'l ake' leake' Jerusalén na'. Ka zjake'n bde ake' yell ka' gan' nzi'i Fenicia, na'll

gan' nzi'i Samaria. Lloe'rén ake' be'nn ka' di'll kan' ba bacha'a yichjra'llda'o be'nn ka' bi nak be'nn Israel, ba llzenay ake' ke Dios. Na' be'nn ka' nak leake' txhen na', llawé akre' kwis ka llen akre' ka'.

⁴Ka bllin ake' Jerusalén na', be'nn ka' lldop ll-llay llonlira'll Jesucriston', na' be'nn gor brao ke ake' ka', na' postl ka', bwap ake' leake' lliox. Na' Pablon' ren Bernabén' be'rén ake' leake' di'll kan' ba gokrén Diosen' leake'. ⁵Bixha bal be'nn fariseo ka' ba llejle' ke Jesucriston', bzolla'a ake', na' bne ake':

—Llonen bien noteze be'nn byio wxenra'll Jesucriston', llaya'l soe' sen dan' nzi'i circuncisión, na' llaya'l gon ake' kan' ne ley dan' bzoj da Moisésen'.

⁶Na'll badop postl ka', na' be'nn gor brao ka', nench wayej di'll akre gaksen. ⁷Bixha ba gokte scha llayej di'llen', kat bzolla'a Pedron', na' bne'e:

-Re', be'nn bi'cha', nnézkzere kwasro kan' gok batna', Diosen' breje' nada' jazejnie'ra' xti'll Jesucriston' be'nn ka' bi zjanak be'nn Israel, nench chejle' ake' ke'e. ⁸Diosen' nnezre' ka nak vichjra'llda'o yeolol be'nne, leska' broe're' nllie're' leake', ka nak be'e leake' Spíritu ke'en kan' bene' ke lli'o. ⁹Toz ka ben Diosen' kello, na' ren leake', lekze ba bayibe' vichjra'llda'o ake', ni ke dan' nxenra'll ake' Jesucriston'. 10 Na' nna', ¿bixchen bikze lleile're, ba llwiátere dan' llon Diosen'? Bi llaya'l wchie'llo be'nn ka' bi nak be'nn Israel, gon ake' ke dan' llon

lli'o be'nn Israel, nnéztello ni lli'o, ni xozxta'ollo ka', bi gok gon ake'n.

11 Nnéztello kere ni ke dan' gonllo kan' ne ley na'n, yesrá Diosen' lli'o, le ni ke dan' nllie're' lli'on, na'llen' yesre'e lli'o, na' ka'kze yesre'e noteze be'nne.

¹²Na'll billbi bnekze be'nn zan ka', na'll blla'a ake' lli chak bzenay ake' lloe' Pablon' ren Bernabén' di'll kan' gokrén Diosen' leake', ben ake' da zan da yebánello radj be'nn ka' bi nak be'nn Israel. ¹³Ka bayoll bnne ake' na', bzolla'a Jacobon' bne'e:

—Be'nn bi'cha', lewzenay kia' choll. ¹⁴Simón Pedron' ba be'e di'll kan' bzorao broe' Diosen' yel wak ke'en ren be'nn ka' bi nak be'nn Israel, na' breje' bale' nench gok ake' to yell ke Dios. ¹⁵Dan' llak ka', llatilen ke dan' bzoj be'nn ka' be'e xti'll Diosen' kana':

16 Te na' yeda' da yobre, kana' gona' nench nnebia' xhi'nn dialla ke rey Daviden',

la'kze ba nak ake' ka to yo' da ba bayinnje,

na' nada' wayona'n, walisa'n wayontia'n ka wazón war,

¹⁷ gona' ka' nench be'nn ka' bi zjanak be'nn Israel, wayirj ake' nada' naka' Xan ake',

na' noteze be'nn yellrio wak walwille' nada'.

¹⁸ Kan' ne Xanllo Diosen' llyixjwe're' lli'o da ki kan' batna'te.

¹⁹'Ke len na', nia' be'nn ka' bi nak be'nn Israel, bi llaya'l gon akelloe' zed, cha' ba llayechj ake' llonlira'll ake' Diosen'. ²⁰To da gonllo, wzojllo to yich, na' ye aklloe' bi gao ake' Hechos 15 236

no yel wao da ba bxhoa no rao lwa'a lsa'ke, na' cha' bi nchayna'a ake', bi gak sorén lwellj ake', na' bi gao ake' bayi'x ba llchok ake' yen, na' leska' bi gao ake' llen na'.

²¹Ka nak ley dan' bzoj da Moisésen' kana'te, lla'kze be'nn toto yell llzejnie' akre'n, katen' lladop ake' lla nba'nne.

²²Na' postl ka', na' be'nn gor brao ka', na' yeolol be'nn ka' lldop ll-llay llonlira'll Jesucriston', bayazra'll ake' kan' bne Jacobon'. Na' be'e ake' di'll kwej ake' chop be'nn lwellj ake' ka', na' wse'lrén ake' leake' Antioquían' ren Pablon' na' Bernabén'. Na' brej ake' Judas lekze nzie' Barsabás, na' Silas, be'nn ka'n nak be'nn brao radj ake'. ²³Na' bzoj ake' to yich be'x be'nn ka', yichen' nen:

"Neto' postl, na' ren be'nn gor brao ka', na' ren be'nn bi'chllo ka', llwapto' re' lliox, re' lla're Antioquía, na' Siria, na' Cilicia. Nakllo txhen llonlira'll-llo Jesucriston', la'kze bi nakre be'nn Israel. ²⁴Ba bnnézeto' bal be'nn blloj radjto' ni, bra' ake' gan' lla'ren' lloe' ake' di'll wenra'll, na' llonchix akre' re', ne ake' llaya'l sore sen dan' nzi'i circuncisión, na' gonre yeolol billre kan' ne ley dan' bzoj da Moisésen'. Kere neto' bse'lto' be'nn ki, bya'zera'll ake'n llon ake' ka'. ²⁵Ni ke len na', ba be'to' toze di'lle, na' ba brejto' chop be'nn nench yedwia ake' re', na' llse'l aktoe' ren be'nn bi'chllo ki nllie'to' kwis, Pablo na' ren Bernabén'. 26 Ke nak be'nn ki ba bzoa yel nban ke ake'n rao da nxholl, ni ke Xanllo Jesucriston!, ²⁷Ganni llse'lto! Judas

ren Silas, leake' we'rén akse' re' di'll lloa' ake', dan' ba nlliato' le' yich nga. ²⁸Llaweto' ka nak Spíritu ke Diosen' ba bzejnie'n neto', akre nneto' nench bi wchie'to' re' gonre billre, lete ka nak da brao ki: ²⁹Bi gaore yel wao da ba bllia ake' rao lwa'a lsa'k Dios, bi gaore llen, na' bi gaore no bayi'x ba llchoke yen, leska' cha' bi nchayna're, bi gak sorén lwelljre. Cha' wzenayre da ki, da wen kwis gonre. Cha'chgare wen."

30 Ka' gok, na' bza'a be'nn ka', zjake' Antioquían', ka bllin ake' na', batop ake' yeolol be'nn ka' llonlira'll Jesucriston', na' bayoe' ake' leake' yichen'. 31 Ka bayoll bel ake' yichen', llawé be'nn ka' kwis, le da xhen llayoe'xhenen leake'. ³²Na'll ka nak Judasen' ren Silas na', llak lloe' ake' xti'll Diosen' kon ka llzejnie' Spíritu ke Diosen' leake', ye to chi'i bayonxhenra'll ake' leake', be'rén ake' leake' di'll nni'tteze nni't ake' gonlira'll ake' Jesucriston'. 33 Ka gok scha da'o bzorén ake' leake', bllin lla yeza'a ake', na' be'nn ka' llonlira'll Jesucriston', bago' ake' leake' nez, lle ake' leake':

-Wallinchgare wen gan' bza'ren'.

³⁴Bixha Silas na', byazra'lle' ga'ye' ganna'ze. ³⁵Leska' Pablo ren Bernabén' go'y ake' ren ye txhonnj be'nn zej ren leake' txhen Antioquían', broe' bsed akre' xti'll Diosen'.

Pablon' byeje' da yobre gan' ba jatixjwe're' xti'll Diosen'

³⁶Ka bde zan lla, Pablon' lle'e Bernabén':

—Chejllo da yobre gan' ba jatallo jatixjwe'llo xti'll Xanllo Jesucriston',

237 Hechos 15, 16

lljawiallo akre lla'a be'nn bi'chllo ka' ba nxenra'll Le'en.

³⁷Na'll Bernabén' lle'nre' wche'e ake' be'nnen' re Juan Marcos. 38 Na' Pablon' llakre' bi gonen wen wche'e ake' le'e, le bsanra'lle' leake' gan' nzi'i Panfilia, bill bnawe' gakrene' gon ake' xchin Diosen'. 39 Ni ke len na', bi gokse gon ake' toze di'lle, na' bra'a lwellj ake'. Na' bza'a Bernabén' nche'e Juan Marcos, na' byo' ake' barco zjake' yellrio dan' lli' lo nisda'o gan' nzi'i Chipre. 40 Leska' Pablon' bze'e nche'e be'nnen' re Silas, na' be'nn ka' llonlira'll Jesucriston' lla'a Antioquían', ben ake' leake' rallna'a Dios, ka nak bza'a ake'n. 41 Na'll Pablon' ren Silas na', ka zjake'n, bde akte' yell ka' gan' nzi'i Siria, na' gan' nzi'i Cilicia, na' llgo'ltip ake' be'nn ka' llonlira'll Jesucriston' toto yell.

Timoteo bnawe' Pablo ren Silas

Na' bllin Pablon' ren Silas yell ka' re Derbe na' Listra. Ganna' jadi' akre' to be'nn re Timoteo, na' nxenra'lle' Jesucriston', xhna' Timoteon' nake' be'nn Israel. leska' nxenra'lle' Jesucriston', na' xe'e nake' be'nn griego. ²Be'nn ka' nxenra'll Jesucriston' lla'a Listra, na' Iconio, lloe' ake' di'll nak Timoteon' be'nn wen. ³Pablon' byazra'lle' wche'e le'e, na' zga'tek bzoe' le'e sen dan' nzi'i circuncisión, nench bibi de nne be'nn Israel ka' lla'a do ganna', le nnez akre' xe'en bi nake' be'nn Israel. 4Na' yeololte yell gan' bde ake'n, bdixjwe' akre' be'nn ka' ba nxenra'll Jesucriston' kan' llaya'l gon ake', kan' bne postl ka', na' ren be'nn gor brao ka' lla'a

Jerusalén na'. ⁵Na' Be'nn ka' ba lldop ll-llay llonlira'll Jesucriston', toto yell yezikre llxenra'll ake' Le'e, na' tlla tlla zjazell llan ake'.

Pablon' bre'da'ore' to be'nn Macedonia lla'tyoere' le'e cheje' ralle'

⁶Spíritu ke Diosen' bi be'n latj we'e ake' xti'll Diosen' yell ka' gan' nzi'i Asia, na'll to bde akze' yell ka' gan' nzi'i Frigia na' Galacia. ⁷Bllin akte' gan' nzi'i Misia, na' gokra'll ake' lljake' yell ka' do gan' nzi'i Bitinia, leska' bi be'e Spíritu ke Diosen' latj. ⁸Na'll to bde akze' Misia, bllin akte' yellen' re Troas. ⁹Rao lle' na', bre'da'we Pablon', bre're' to be'nn Macedonian' lla'tyoere' le'e, lle'e le'e: "Yo'o Macedonian' nench gakreno' neto'."

10 Kate bde gok ka', le bsinia'te keto' chejto' yell ka' do gan' nzi'i Macedonian', le byejnie'to' Dios na'kzen' llse'le' neto' chixjwe'to' Di'll Wen ke Jesucriston' ganna'.

Pablo ren Silas jake' Filipos

11 Troas na' byo'to' barco da zej lixhej gan' ne Samotracia, to yellrio da lli' kllol nis, na' bateyó na' bllinto' yellen' re Neápolis.

12 Neápolis na' bza'to', na' bllinto' yellen' re Filipos gan' nbane Macedonia, Filipos na' naken to yell brao ga lla'a be'nn Roma, na' bzoto' to chi'i ganna'. 13 To lla nba'nne ke be'nn Israel ka', bllojto' yellen' byejto' lloa' yeo ga lladop ake' llalwill ake' Diosen', na' blle'to' be'rento' bal no'r ka' bllayen' di'lle.

14 Radj no'r ka' ren to no'r re Lidia, be'nn yellen' re Tiatira, na' non

Hechos 16 238

xchine' llo'te' ra'll cha'o da morad. Lidian' lloe'rawe' Dios, na' llie' llzenaye', na' Xanllo Diosen' bsarje' yichjra'llda'we' nench bzenaye' kan' ne Pablon'. ¹⁵Na' ka' blloe' nis ren be'nn ka' lla'a rille'n, na' go'tyoere' neto' ne'e:

—Cha' ba llakliere dan' ba llonlira'lla' Xanllon', lecho'o rilla', na' sore.

Na'll bchie're' neto' nench byejto' rille'n.

¹⁶Gok ye to lla chak zejto' llje'rento' Diosen' di'lle, balláyeto' to bi no're, yo'be' daxi'o da llanneya'. Da xhen llon xanbe' gan ke dan' llanneya'be' na'. ¹⁷Na'll badnnaobe' neto' ren Pablo na', llosia'be' nebe':

—iBe'nn kin' llon ake' xchin Dios, be'nn zo yebá, na' llyixjwe' akre' akre nak nez ke Diosen' dan' nsa'a yel wasrá!

¹⁸Na' ka' llonbe' naobe' neto' gokte zan lla, na' bi byazra'll Pablon' kan' llonbe', na' bayechje', lle'e daxi'on yo' yichjra'llda'o bi no'ren':

—Kone yel wak ke Jesucristo, llepa' rwe' yellojo' yichjra'llda'o bi no'ren'.

Na'll le ballojten.

¹⁹Bixha ka gokbe'e be'nn ka' nak xan bi no'ren', na' zerao yel wnia' ke ake'n, ka nak ba balloj yel llnneya' ke bi no'ren', na' be'x ake' Pablon' ren Silas, na' jwa'a ake' leake' lao ya'a gan' lla'a be'nn ka' llnebia'. ²⁰Ka bllin ake' rao koxchis ka', lle ake' leake':

—Be'nn Israel ki da ake' llta llnne ake' be'nn rao yell kellon'. ²¹Llroe' akre' leake' to da yobre da bi gak nnao lli'o, na' bi llaya'l gonllon nakllo be'nn Roma.

²²Na'll bdop be'nn zan go'dyi' ake' Pablon' ren Silas, na' golj ake' xhara'n ake'n, na' koxchis ka' goll ake' be'nn ka' bdin ake' leake' xhis. ²³Bayoll bdintat ake' leake', na'll bro' ake' leake' rill ya, na' goll ake' be'nnen' llap rill yan' wseje'n da war. ²⁴Ka bene be'nnen' llap rill yan' ka', na' jaloe' leake' lo rill ya da zo loete. Na'll ye to chi'i, broe' yen nia' ake'n to lo yay da nzi'i cepo.

²⁵Do llere na', Pablo ren Silas lloe'rén ake' Diosen' di'lle, na' llol ake' lloe'rao ake' Dios, na' be'nn ka' yela' lla'a rill yan', llzenay ake' kan' llol ake'n. ²⁶Bixha kate bxho'kze da xhen, na' bnniben rill yan', yeololte gan' nsej ake' waren', byarj aken na' gden ka' yo' yen ta'k be'nn ka' lla'a lo rill yan', to wrazze bayell ake'n. ²⁷Ka babán be'nnen' llap rill yan', gokbe're' ba nyarj rill yan', na' blechj spad ke'en gokra'lle' wayot kwine', llakre' cha' yeolol be'nn ka' lla'a lo rill ya na', ba baxhonnj ake'. ²⁸Na' Pablon' bnne'e zillj, lle'e le'e:

—Bi gono' ka', ni lla'a yeololto'.

²⁹Na'll be'nnen' bnnabe' to yi',
na' byo'doe' lo rill yan', bllinte gan'

ze Pablo ren Silas na', to xhiztite' bche'k xhibe' rao ake'n. ³⁰Na'll le babejte' leake', na' lle'e leake':

—¿Bi llaya'l gona' nench yera' rao da xhinnjen!?

³¹Na'll lle ake' le'e:

—Gonlira'llo' Xanllo Jesucriston', na'll yesre'e rwe' rao da xhinnjen' ren be'nn lla'a lo yo' rillo'.

³²Na'll le broe' aktere' le'e xti'll Xanllon' rente be'nn ka' lla'a lo 239 Hechos 16, 17

yo' rille'. ³³Leska' rao yer na', bdib be'nnen' llap rill yan' rao we'e ke ake'n, na'll le blloate' nis ren yeolol be'nn ka' lla'a lo yo' rille' na'. ³⁴Le bache'te' leake' rille', be'e da bdao ake', llawere' kwis ka nak yeolol ake' ba nxenra'll Dios.

³⁵Ka byeni'n bse'l koxchis ka' policía ka', na' goll ake' be'nnen' llap rill yan':

—Basán be'nn ka'.

³⁶Na'll be'nnen' llap rill yan' lle'e Pablon':

—Ba bse'l koxchis ka' rson ba gok yesana' re', na' nna' lewalloje, lewayejchga wen nna'.

³⁷Na' Pablon' lle'e policía ka':

—Zga'tek bdintat ake' neto' rao lkwe' be'nn zan ka' latj gon ake' yel koxchis keto', na'tell bro' ake' neto' rill ya, na' nna' lle'n akchekre' yesán ake' neto' llillize, rencha' ndeteto' le' yich nakto' be'nn Roma. Na' bi yellojto', dekz de yed kwin ake' yedrej ake' neto'.

³⁸Policía ka' le jayell akte' koxchis ka' kan' bne Pablon', na'll blleb ake' kwis, ka ben akre' nak be'nn ka' be'nn Roma. ³⁹Na'll jak koxchis ka' rao Pablon' ren Silas, na' bnnab ake' si'xhen ake' kan' goken, na' babej ake' leake' rill yan'. Na' go'tyoe akre' leake' gon ake' okré yelloj ake' yellen'. ⁴⁰Ka' balloj ake' rill yan', na' jayake' rill Lidian', na' be'rén ake' be'nn ka' nxenra'll Jesucriston' di'lle, be'ltip ake' leake', na'll baza'a ake'.

Gok to da nne xhen yellen' nzi'i Tesalónica

Ka baza'a ake' yellen' nzi'i Filipos, bde akte' yell dan'

nzi'i Anfípolis, na' yell da nzi'i Apolonia, na'll bllin ake' yellen' nzi'i Tesalónica. Ganna' lla'a be'nn Israel, na' zo to yoda'o ke ake'. ²Pablon' kan' llonkze', byeje' yoda'on, chonn xhman toto lla nba'nne, je'rene' leake' xti'll Diosen'. ³Llroe're' leake' xti'll Dios dan' bzoj be'nn ka' be'e xti'll Diosen' kana', gan' llian katen' yed Cristo be'nnen' wse'l Diosen' dekz de zga'tek yellayrawe', na'tellen' gate', na' leska' llian yebane'. Na' lle Pablon' leake':

—Ni lloa' xti'll Jesús, Le'en Criston' bse'l Diosen'.

⁴Bal ake' byejle', na' benrén ake' Pablon' txhen ren Silas, na' be'nn zan be'nn griego ka', lloe'rao Dios, leska' byejle' ake', na' leska' zan no'r ka' nak no'r brao rao yellen'. ⁵Bixha be'nn Israel ka' bi llejle' gok akre' zi', na'll btop ake' be'nn ria ak, na' be'nn wen da xhinnj ak, na' bta bnne ake' be'nn yell. Na' ben ake' bien byo' ake' rill be'nn re Jasón na', llayiri ake' Pablo ren Silas na', lle'n akre' kwej ake' leake' rao be'nn yell ka'. 6Bixha ker no ballel akre', na' bche'e ake' Jasón na', ren ye bal be'nn ka' nxenra'll Jesucriston' rao koxchis ka', na' llosia' ake' ne ake':

—Be'nn kin' llonchix akre' be'nn lla'a doxhen yellrio, ba bra' ake' yell kello ni. ⁷Na' Jasón na', ba brebe' leake' lo yo' rille', na' dá ake' lle ake' be'nn bibi za'k ley dan' non Césaren' gonllo, na' dá ake' ne ake' zo to rey yobre be'nn re Jesús.

⁸Kone di'll ki bta bnne ake' be'nn, na' ren koxchis ka'. ⁹Jasón na' ren be'nn lwellje' ka', bllia ake' mell, na'll basán ake' leake'.

Pablo ren Silas jake' Berea

¹⁰Na'll be'nn ka' llonlira'll Jesucriston', rao lle' na', basa'a ake' Pablo ren Silas jake' yell dan' nzi'i Berea. Ka bllin ake' na', byej ake' yoda'o ke be'nn Israel ka'. 11 Be'nn Berea ka' nak aklle' be'nn ra'llda'o wen kerke be'nn ka' lla'a Tesalónican', le lla'teze lla'a ake' llzenay ake' xti'll Diosen' yeo lla, na' llse's akte' le' yich dan' bzoj be'nn ka' be'e xti'll Diosen' kana', cha' da li dan' lle ake' leake'n. 12 Be'nn zan byejle' ke Jesucriston', leska' bal no'r griego be'nn nak no'r brao byejle' ake', leska' zan be'nn byio. ¹³Na' be'nn Israel ka' lla'a Tesalónica, ka ben akre' ba zo Pablon' gan' nzi'i Berea llyixjwe're' xti'll Diosen', na' jake' Berean' leska' jatá nne ake' be'nn zan, nench bi byejle' ake' ke Pablon'. ¹⁴Na' be'nn ka' ba non txhen llonlira'll Jesucriston', le bse'l akte' Pablon' lloa' nisda'ore, na' Silas ren Timoteon' go'y ake' Berea na'ze. ¹⁵Be'nn ka' zejrén Pablon' txhen, jwa'a akte' le'e yellen' nzi'i Atenas. Ka baza'a be'nn ka', le gollte Pablon' leake' chej Silas ren Timoteo gan' zoe! na!.

Pablon' bzejnie're' be'nn Atenas ka' xti'll Diosen'

16 Chak zo Pablon' Atenas na', bexhe' be'nn lwellje' ka', da xhen llakre' ka nak llwie' be'nn Atenas ka', nize na'ze lloe'rao ake' be'nn non ake' lwa'a lsa'k diosen'. 17 Ni ke len na', llej Pablon' yoda'o ke be'nn Israel ka', na' lloe'rene' leake' di'll, na' ren yezikre no be'nn llap

Diosen' bara'nne. Leska' yeo lla byeje' lao ya'a gan' lladop be'nn ka', na' je'rene' leake' xti'll Diosen'. ¹⁸Ganna' lla'a be'nn llsed da llroe' to be'nn re Epicuro, na' lla'a ye bal be'nn llsed da llroe' be'nn ka' nzi'i estoico, lloe'rén ake' Pablon' di'lle. Na' bal be'nn ka' ne ake':

- —¿Bin¹ ne be¹nn llaljen¹ ganna¹?
 Na¹ ye bale ne:
- —Cheke di'll kob ke diosjen' lloe'. Ne ake' ka', le lloe'rene' leake' xti'll Jesucriston', na' kan' gok babane'n radj be'nn wat ka'. ¹⁹Na' bche'e ake' Pablon' to latj nzi'i Areópago ga lladop ake' llgo' ake' lban, na' lle ake' le'e:
- —¿Wak nnézeto' bi da koben' nsa'o? ²⁰Di'll da bi nna yéneto'n lloe'o, na' lle'neto' nnézeto' bi lle'nen nnen.

²¹Bne ake' ka', le be'nn Atenas ka', na' noteze be'nn zo Atenas na', le llawé akre' no wchaljrén leake', na' no we'rén leake' di'll bi da kobe.

²²Na'll bzolla'a Pablon' radj be'nn ka' lla'a gan' ne Areópago, na' bne'e:

—Re' be'nn Atenas, ba bre'ya'nnra' kan' llonre yell ni, wa lloe'raore kon biteze. ²³Ka nak bdia' bwia' gan' ni't da ka' lloe'raore na', jadi'ra' to rao bkoy nyojen ki: "To dios nono nombia'." Xti'll Le'en lloe'rena' re' nna'.

²⁴'Dios be'nnen' ben yellrio, na' bene' yeolol da zjadé rawe na', Le'en nake' xan yebá, na' yellrio ni, ker be'nn gak wzoallo to lo yoda'o da llon be'nnachen'. ²⁵Nono llyalljre' no bi gon ke'e, le Le'en llonne' lli'o yel nban, na' llonne' bich yo'llo, na' llonne' yeolol da napllo.

241 Hechos 17, 18

²⁶'Rao toze llen na', bene' yeololtello, na' bene' to lati ga cha'a to kwen to kwenllo, na' bzoate' ke toto ga sollo. 27 Diosen' bene' ka' nench wayirjlloe', ka llon be'nn dá llgan lltobe', wallelre' kan' nakse Diosen', na' da li bi zoe' zi'te gan' zollon', zorenkze' lli'o. ²⁸Ni ke Le'en na', zollo, na' dallo, na' nbanllo, kan' bzojkze be'nn si'n keré ka', bne ake': "Dialla ke Lekze'n nakllo." ²⁹Na' ka nak nakllo be'nn za'a rao dialla ke Diosen', bi gonllo xhbab Diosen' nake' to be'nn de yej cha'o dan' nzi'i oro, be'nn de plat, be'nn de yej, be'nnen' ben be'nnachen' kon ka bara'n yichjra'llda'we'. ³⁰Na' ba bwiaraoze Diosen' be'nn ka' blla'a batna' ben ake' ka', le bi byejnie' akre'n. Na' nna' ne Diosen' yeolol be'nne llaya'l wayat akre' ke dan' ben ake'n. 31 Le ba nzoe' to lla kat gone' yel koxchis ke yeolol be'nne, na' ba brejte' be'nnen' gonrene' yel koxchisen', ke len na' basbane' Jesucriston' nench nnézello Le'en gone' yel koxchisen'.

³²Ka ben akre' bne Pablon' yebán be'nn wat ka', bale' bzorao lltitj akre', na' ye bale' bne:

—Nna' wzenayto' xti'llo'n kat ye to.

³³Bde na', balloj Pablon' radj ake'n.
³⁴Na' bal ake' byejle' akse', na' bdop
ake' kwit Pablon'. Radj be'nn ka'
byejle'n ren to be'nn re Dionisio,
nake' txhen be'nn si'n ka' nlan
llnebia' Areópago, na' ye to no'r re
Dámaris, na' ye bal be'nn yobre.

Pablon' byeje' Corinto

Bde na', baza'a Pablon' yellen' nzi'i Atenas, na'

byeje' yellen' nzi'i Corinto. ²Corinto na' ballayre' to be'nn Israel re Aguila, na' no'r ke'en re'e Priscila, nak ake' be'nn za'k gan' nzi'i Ponto. Chin ballín akze' Corinton' zaya'k ake' gan' nzi'i Italia, le Claudio be'nnen' llnebia' Italia, bachache' yeolol be'nn Israel ka' lla'a yellen' nzi'i Roma. Na' byej Pablon' gan' zo ake'n, ³na' bzorene' leake', le lekze llake' llone' ka llin na' llon ake'n. llia ake' ra'll llej da llchirj ake' ga llzo ake'. ⁴Toto lla nba'nne ke be'nn Israel ka', Pablon' lleje' yoda'o ke ake'n, na' llzejnie're' leake' kan' nak xti'll Jesucriston' ka be'nn Israel, na' be'nn griego, llroe're' leake'.

⁵Ka bllin Silas ren Timoteon', zaya'k ake' Macedonia, Pablon' llaral-llre' llroe're' xti'll Diosen', lle'e be'nn Israel ka', Jesús na'n nak Criston' be'nnen' llbexh ake' wse'l Diosen'. ⁶Bixha be'nn Israel ka', bi llo'ra'll xti'll Diosen', bzorao ne ake' di'll zban ke Pablon'. Na' Pablon' babibe' xhara'ne'n nench broe're' da xhinnjen' llon ake', na' lle'e leake':

—Bi naken xhia kia', xhia ke re' naken, na' nna' wzejnie'llra' xti'll Diosen' be'nn ka' bi nak be'nn Israel.

⁷Na' baze'e, na' balline' rill to be'nn re Justo be'nn lloe'rao Dios, zoe' awllo gan' zo yoda'on. ⁸To be'nn re Crispo be'nn llnebia' lo yoda'on, benlira'lle' Xanllon' ren be'nn lla'a lo yo' rille', leska' be'nn zan be'nn Corinto ka' byejle', na' blloa ake' nis. ⁹Na' gok to lle', Xanllon' broe'rawe' Pablon', lle'e le'e:

—Bi llebo', be'kze xti'lla'n, bi so'o lli. ¹⁰Ni zerenkza' rwe' nono bi gak

Hechos 18 242

gone rwe', le rao yell ni lla'a be'nn zan za wxenra'll nada'.

¹¹Na'll bzo Pablon' yellen' nzi'i Corinton' twiz xop be'o, llroe're' xti'll Diosen'.

12 Bixha ka lla llia be'nne re Galión, nake' be'nn llnebia' gan' nzi'i Acaya, be'nn Israel ka' gok ake' toze, be'e ake' di'll nench blliayi'll ake' Pablon', na' jwa'a ake' le'e gan' llon be'nn wnebia' ka' yel koxchis.

13 Ne ake':

—Be'nn ni de'e llpere' be'nne, nench we'rao ake' Diosen' krere kan' ne leyen'.

¹⁴Ka gokra'll Pablon' we'rene' leake' di'llen', na' Galión na' golle' be'nn Israel ka':

—Chenak naken billre da yobre, na' cha' bene' no xhia, gona' yel koxchis kerén', be'nn Israel. ¹⁵Zan naken zre di'llze, na' ra be'nne, na' da nak da naore, leko' xhnneze re', bi lle'nra' gaka' be'nn wchoybia' bi dan' llak kerén'.

¹⁶Na' bachache' leake' gan' llie' llone' yel koxchisen'. ¹⁷Na'll yeololte be'nn griego ka', be'x ake' Sóstenes be'nnen' llnebia' yoda'o ke be'nn Israel ka', na' ben ake' zi' ke'e gan' lla'a be'nn ka' llon yel koxchisen', bixha Galión na', bi bwiakze'.

Pablon' blline' Antioquía na'll blloje' jatixjwe're' xti'll Diosen' da yobre

18 Bde gok ka', ye to chi'i bzo Pablon' zan lla Corinton'. Na'll ka baze'e na', be'rene' be'nn ka' llonlira'll Jesucriston' di'lle, na'll bawe' nez bayoe' lo barco ren Priscila, na' Aquilan', zjake' gan' nzi'i Siria. Bixha ka za wago'tere Pablon' nez yellen' re Cencrea, bchip yichje' le kan' bchebe' gone'.

19 Na' bllin ake' yellen' nzi'i Éfeso, na' bkwa'nne' Aquila ren Priscilan', na' byej le'en yoda'o ke be'nn Israel ka', na' je'rene' leake' xti'll Diosen'.

20 Be'nn ka' lladopen' go'tyoe akre' le'e ga'ye' wroe're' leake' zan lla, na' bi bcheb Pablon'.

21 Na'll baze'e lle'e leake':

—Llonen bien cha'a Jerusalén na', ganna' lljadia' lnni dan' za'a. Te na' yeda' yedra'nna' re', cha' Dios gonne' latj.

Na' bayoe' lo barcon', baze'e Éfeson'. ²²Bllinte' yellen' nzi'i Cesarea, na'll byeje' Jerusalén na', jawape' be'nn ka' lldop ll-llay llonlira'll Criston' lliox, na'll baze'e zayeje' Antioquía. ²³Na' bzoe' to chi'i da'o, na'll blloje' da yobre jate'e toto yell ka' gan' nbane Galacia, na' Frigia, na' lloe'ltipe' be'nn ka' llonlira'll Jesucriston'.

Apolos bdixjwe're' xti'll Diosen' Éfeso

²⁴Katen' llak ka', bllin to be'nn Israel Éfeson' be'nnen' re Apolos, nake' be'nn yellen' nzi'i Alejandría, na' llejnie're' llroe' llsedre' Di'll Wen, na' leska' nnezre' kwasro kan' ne xti'll Diosen'. ²⁵Apolos na' bnnezre' kan' nak xhnnez Jesucriston'. Na' do vichi do ra'lle' lloe'rene' be'nn ka' xti'll Jesucriston', la'kze bi nnezya'nnre'n, le dan' broe' Juan be'nnen' bchoa nis, lezen na' nnezre'. ²⁶Bi llebe' llroe're' be'nn Israel ka' xti'll Jesucriston' lo yoda'on. Ka bene Priscilan' na' Aquilan' kan' llone' llroe're' be'nn ka', na' goxh ake'

243 Hechos 18, 19

le'e to ga yobre, na' bsed akre' le'e xhnnez Diosen' da bi nna nnezre'. ²⁷Na' lle'ne be'nnen' nzi'i Apolos cheje' yell ka' gan' nzi'i Acaya, na' be'nn ka' lldop ll-llay llonlira'll Jesucriston', bayo'ra'll ake' ka naken llwie' cheje'n. Na' bzoj ake' to yich be'xe', nench wreb be'nn ka' lla'a gan' nzi'i Acayan' le'e. Ka blline' ganna', da xhen gokrene' be'nn ka' ba brej Xanllo Diosen' nxenra'll Le'e. 28 Llroe' llsedre' be'nn Israel ka', lle'e leake', kreren' llejnie' akre' ke Jesucriston', na' llroe're' leake' xti'll Diosen', nen ke Jesúsen' nake' Cristo be'nnen' bexh ake' yednnebia'.

Pablon' byeje' yellen' nzi'i Éfeso

Bixha chak zo Apolos yellen' nzi'i Corinto na', Pablon' jate'e yell ka' lli' radj ya' ka'. Na'll blline' Éfeso, na' jadi're' bal be'nn llejle' ke Jesucriston'. ²Pablon' bnnabre' leake':

—¿Badsó Spíritu ke Diosen' yichjra'llda'ore llan' byejle're ke Jesucriston!?

Na'll bne ake':

—Ni ke nnézzeto' cha' de da nzi'i Spíritu ke Diosen'.

³Na'll lle'e leake':

—¿Akxha gok blloare nis?

—Kon ka bchoa Juan na' be'nn ka' nis na', blloato' nis.

⁴Na'll bne Pablon':

—Da li Juan na' bchoe' be'nn ka' nis, be'nn ba bayate ke da xhinnj ke ake', na' leska' bne Juan na', llaya'l chejle' ake' ke to be'nn za yed, zeje di'll Jesús be'nnen' nak Criston' bse'l Dios. ⁵Ka ben akre' ka', na'll blloa ake' nis ke dan' ba nxenra'll ake' Xanllo Jesúsen'. ⁶Na'll bxoa ta'k Pablon' yichj toto ake', nench bllin Spíritu ke Diosen' byo'n yichjra'llda'o ake'. Na' bzorao lloe' ake' di'll yobre, na' llne ake' xti'll Diosen' kon kan' llzejnie' Spíritun' leake'. ⁷Ka do chllinn (12) be'nn byio nak yeolol ake'.

⁸Na' Pablon' byoe' lo yoda'o ke be'nn Israel ka' llroe're' leake', bi llebe' ke nak lla'tyoere' leake', na' llzejnie're' kan' nak yel llnebia' ke Diosen'. Ka llejteze lleje' gokte chonn be'o. ⁹Na' bal ake' llonchoch vichira'llda'o ake'n, bi llejle' ake', na' bzorao llnne ake' no di'll zban rao be'nn ka' ke xhnnez Diosen'. Ka llaken bra'a Pablon' leake', na'll babie' be'nn ka' ba nxenra'll Jesucriston' radj ake'n, na' bche'e leake' to lo yo' xkwel ke to be'nn re Tirano, na' broe' bsedre' leake' yeo lla. 10 Ka bene' gokte chop iz, na' ka' doxhen gan' nzi'i Asia ben akre' xti'll Xanllo Jesucriston', ka be'nn Israel, na' ren be'nn bi nak be'nn Israel. ¹¹Diosen' llakrene! Pablon! llone! da zan da yebánello. 12 Na' no ra'll no bay da llllel kwerp ke'en, lljada'a ake'n be'nn ka' llak yillwe'n llayak akte', leska' be'nn yo' daxi'o llalloj akten.

¹³Na' bal be'nn Israel be'nn llon rmell ren yel walla'a, leska' gokra'll ake' gonrén ake' ra Xanllo Jesúsen' llin, nench yebej ake' daxi'o yo' be'nne, na' lle ake' daxi'o ka':

—Kon ren yel wak ke Jesús be'nnen' dá Pablon' lloe' xti'll, llalwillto' re' yellojre.

¹⁴Ka' ben gall xhi'nn to be'nn re Esceva be'nn nak xan bxoz. ¹⁵Bixha bayechjkze daxi'on, llen leake': Hechos 19 244

—Nombie'ra' Jesúsen', na' nnezra' no be'nnen' re Pablo, zan re', ¿noxha nak re'?

¹⁶Na' be'nnen' yo' daxi'on, bxhi'te' bzape' leake', ka bize be'xe' leake' bente' leake' we'e, na' baxhonnj be'nn ka' gal yid akze'. ¹⁷Yeolol be'nn Éfeson' bnnez akre' kan' goken, ka be'nn Israel na' be'nn griego, blleb ake' kwis, na' ben ake' xhen Xanllo Jesúsen'.

¹⁸Na' zan be'nn ka' ba byejle' ake' ke xti'll Jesucriston', na' bllin ake' rao be'nn ka' yela', na' llxoarap ake' bi da xhinnj ba ben ake'. ¹⁹Leska' be'nn zan ba ben xchin ake' yel walla'an, na'll jaxhi'i libr ke ake'n, bzey ake'n rao yeolol be'nn ka'. Na' bwia ake' ka to za'k yich ka', na' gokbe'e akre' za'ken ka chiyon mir (50,000) mell plat. ²⁰Na' ka zejze llaslas xti'll Xanllon', na' llroe'tere' yel wak ke'en.

²¹Bde na', Pablon' bene xhbab wayeje' Jerusalén na', kat te wadie' yell ka' gan' nzi'i Macedonia na' Acaya, bne'e:

—Zga'tek waya'a Jerusalén na', na'tell cha'a Roma. ²²Na'll bse'le' chop be'nn lwellje' ka' Macedonia, Timoteo ren Erasto, na' le'en go'ye' ye to chi'i Asian'.

Gok to da nne xhen yellen' nzi'i Éfeso

²³Na' be'nn ka' bi llazra'll xti'll Jesucriston', to da zed xhen bdixj ake' yellen' re Éfeso. ²⁴Na' be'nnen' ben ka' re Demetrio, be'nnen' non xchine' no bi da da'o de ya cha'o nzi'i plat, na' llone' no yoda'o riz kan' nak yoda'o ke Diana lwa'a lsa'k dios. Be'nn ka' llonrene' llin

na', da xhen llon ake' gan kone llin na'. ²⁵Na'll Demetrion' batope' be'nn ka' llonrene' llin na', na' ren yezikre be'nn llon ka llin ke'e na', lle'e leake':

—Re' be'nne, nnézkzere kone xchinllon', da xhen llonllo gan. ²⁶Na' kan' ba llwiare, na' llénere kan' ne Pablon', de'e ne'e, na' be'nn zan ba bene' gan, kere Éfeso nize, doxhente Asia, lle'e be'nn ka': "Kere dios da za'k ke nak da ki llon nia'na'a be'nnachen!." ²⁷Na' nxholl billbi xchinllo ga'te, na' leska' yoda'o ke dios kello Dianan', nxholl bill wxenra'll ake'n, na' sorao nnit yel bara'nn ke'en, le nnézello doxhen gan' nzi'i Asia, na' doxhenkze yellrio, llap ake' Dianan' bara'nne.

²⁸Ka bene be'nn ka' ka', na'll goklla'a ake', na' besia' ake' bne ake':

—iBe'nn yel wak xhen nak Diana ke lli'o be'nn Éfeso!

²⁹Na' da nne xhen gok rao yellen', na' le bllachte be'nn zan ka', na' bzap ake' chop be'nn lwellj Pablon', toe' re'e Gayo, na' ye toe' re'e Aristarco be'nn Macedonia ake. Na' bxhoblle'o ake' leake', bche'e akte' leake' ga zo yo' gan' lladop ake'n. 30 Pablon' gokra'lle' cheje' llje'rene' be'nn ka' di'lle, na' be'nn ka' nxenra'll Jesucriston' bi be'e ake' latj cheje'. 31 Leska' bal be'nn ka' nak be'nn llnebia' nak ake' Pablon' txhen na', bse'l ake' rson bi cheje' lljatile' be'nn ka' gan' ndop ake'n. ³²Na' be'nn ka' bdopen', wde wdere da ne toto ake' kon llak da nne xhen, na' be'nn zan, ni ke nnez akzre' bi ken bdop ake'. ³³Na' brej

245 Hechos 19, 20

ake' to be'nn re Alejandro radj be'nn zan ka', na'll blli'y be'nn Israel ka' le'e rao lkwe' be'nn yell. Na'll Alejandro blis ta'ke' bnnabe' cha'a ake' lli, gokra'lle' wne'e, wayo'xe' be'nn ka' rao lkwe' be'nn yell. ³⁴Bixha ka bayombia' akre' lekze be'nn Israelen', na' bzorao llosia' ake' ka chop hor, bne ake':

—iBe'nn yel wak xhen nak Diana ke lli'o be'nn Éfeso!

³⁵Na' be'nnen' nake wazoje rao yellen', ka gok babekllie' be'nn ka', na'll lle'e leake':

—Re' be'nn Éfeso, yeolol be'nn lla'a doxhen yellrion', nnez aksere' rao yell kello ni zo voda'o ke Diana, na' lli'o llapllon, na' ren lwa'a lsa'k ke'en da za'a yebá. ³⁶Nono te nne'e bi naken ka', na' nna' lesó lli, na' lewayonya'nn xhbab kan' llonren'. 37 Le be'nn ki badwa're ganni, bibi nna si'i ake' lo yoda'o, leska' bi nne ake' zban ke dios kello Dianan'. 38 Zan ka nak Demetrion' na' ren be'nn ka' llonrene' llin na', cha' bi de ke ake' kon ren be'nn ki, ke len na' zo be'nn llnebia', na' lljatao ake' xhia chet ka', nench cho' xhnneze ke ake'n. ³⁹Na' cha' billre da yobren' lle'nere, wakse wadopllo, na' wayej di'll kwasro chet ka'. 40 Bixha ka nak da nne xhen na', ba gok nna', nxholl wtob akre' lli'o llonllo da wlliayi'll be'nn wnebia' kello, na' ke len na' ba lldopllo. Cha' wnnab ake' bin' llonllo, ni ke bi dez nnello ke da zban na' ba gok nna'.

⁴¹Bayoll bne'e ka', na'll golle' leake' wayaslas ake'.

Byej Pablon' gan' nzi'i Grecia na' gan' nzi'i Macedonia

20 Ka bde da nne xhen na' Éfeson', Pablon' goxhe'

be'nn ka' llonlira'll Jesucriston', be'rene' leake' di'll bi wsan ake' dan' ba nxenra'll ake' Jesucriston'. Na'll bde'le' toto ake', na' bawe' nez zayeje' gan' nzi'i Macedonia. ²Na' jate'e yell ka' lli' gan' nzi'i Macedonia, be'rene' be'nn ka' llonlira'll Jesucriston' di'lle, nni'tteze nni't ake' gonlira'll ake' Le'e. Ka' gok bllinte' gan' nzi'i Grecia. 3Chonn be'o bzoe' Grecian'. Na'll gokra'lle' choe' lo barco wayeje' gan' nzi'i Siria, bixha gokbe're' be'nn Israel ka' lli'nao ake' le'e, lle'n akre' go'x ake' le'e. Na'll bawe' nez kon nie', na' babie' Macedonia na'le. ⁴Bal be'nn ka' bveirén ake' Pablon', to be'nn re Sópater be'nn Berea, na' Aristarco, na' ren ye to be'nn re Segundo llopteze be'nn Tesalónica, na'll be'nnen' re Gayo, be'nn za'a yellen' nzi'i Derbe, na' Timoteo, na' chop be'nn za'k gan' nzi'i Asia, toe' re'e Tíquico, na' ye toe' re'e Trófimo. ⁵Be'nn ki blliarao ake' raoto', na' brexh ake' neto' yellen' nzi'i Troas. ⁶Na' neto', ka bde lnni dan' kate llao ake' yet xtir dan' bi nchixe kwa binn, na'll byo'to' lo barcon', na' bza'to' yellen' nzi'i Filipos. Gok ga'y lla bllinto' yellen' nzi'i Troas gan' llbexh be'nn ka' yela' neto', na' bzoto! to xhman.

Da gok chak zo Pablon' yellen' nzi'i Troas

⁷Bixha ka bllin lla dmio, badop yeolol be'nn ka' llonlira'll Jesucriston' lla'a yellen' nzi'i Troas, na' bdaoto' txhen. Na' Pablon' ka wxere yewe' nez, broe're' leake' xti'll Diosen' bllinte llere. ⁸Na' lla'to' to yo' da zo Hechos 20 246

chkwia, zan yi'n zjazó ake'n lla'len. ⁹Na' to bi llabán re Eutico, lli'be' lloa' ventan na', na' Pablon' da xhen zejze di'llen' lloe'n, bdekze bichgal kebe', wixbe' lloa' ventan na', na' naken chonn kwia, na' ka jalis akebe'n, ba gotbe'. ¹⁰Na'll betjdo Pablon', ka blline' gan' debe'n, go'tteze bde'lebe', na'll lle'e be'nn ka':

—Bibi gákere, nbankzbe'n.

11 Na'tell bayepe' lo yo'n, na'
bxhoxhje' yet xtiren', na' bdao ake'n,
na' ye to chi'i be'rene' leake' di'll
bllinte bale, na'll baze'e. 12 Ka ballach
ake'n, llawé akre' kwis ka nak bin'
wixen', zanche'e akebe' nbanbe'.

Bro' ake' nez jake' yellen' nzi'i Mileto

¹³Neto' blliaraoto' byo'to' barco byejto' yellen' nzi'i Asón, le be'to' di'll ganna' kwexhto' Pablon', le le'en gokra'lle' cheje' kon nie'. 14 Ka' bllinto' yellen' nzi'i Asón, na' byepe' lo barcon', ka' gok bllinto' yellen' nzi'i Mitilene. ¹⁵To bdezto' Mitilenen'. bateyó bdeto' chla' yellrion' lli' lo nisda'on dan' nzi'i Quío. Tlla gok zejto' lo barcon', na' bllinto' ye to vellrion' lli' lo nisda'on re Samos. Ganna' ballojto' barcon', na' byejto' yellen' nzi'i Trogilio, na' go'yto' bazi'ra'llto'. Na' bayo'to' lo barco da yobre, na' bateyó bllinto' yellen' re Mileto. ¹⁶Bi byejto' yellen' nzi'i Éfeson', le Pablon' bi lle'nre' ga'ye' scha gan' nzi'i Asian', le ne lle'nre' yobdo yelline' Jerusalén na', cha' ga'le yelline' lnni Pentecostés.

Di'll da be'rén Pablon' ren be'nn Éfeso ka'

¹⁷Chak zo Pablon' yellen' re Mileto, goxhe' be'nn Éfeso ka', be'nn ka' nak be'nn gor brao ke be'nn ka' llonlira'll Jesucriston'. ¹⁸Ka bllin ake'n, na' lle'e leake':

-Re' nnézere kan' bena' chak bzorena' re', bxhi'zen lla nell kan' beda' Asian'. 19 Kan' bzoa', bena' xchin Diosen', bi benxhen kwina', zan ras bllella', na' ballayrawa' ni ke be'nn Israel ka', kan' blle'nao ake' nada'. 20 Na' bi bsana' wroe'ra' re' da ka' llaya'l nnézeren, broe'ra' re' gan' lladop llallayllo, na' leska' rill totore. ²¹Ka be'nn Israel, na' be'nn bi nak be'nn Israel, goll ake' llaya'l wayat akre' ke da xhinni ke ake'n, na' gonlira'll ake' Xanllo Jesucriston'. ²²Na' nna', Spíritu ke Diosen' llchie're' nada' wava'a Jerusalén na', na' bi nnezra' bi gak kia'. 23 Lete toto yell ga lldia', Spíritu ke Diosen' llyixjwe'n go'x ake' nada', na' wallayrawa'. 24 Na' ker bi gon dan', ba nsanra'llkza' yel nban kia'n, le lle'nra' wasyolla' yeolol da llaya'l gona'. Na' llawera' kwis ke llin na', benn Xanllo Jesúsen' gona'. Breje' nada' nench ta'a we'rena' be'nn ka' di'll kan' nllie! Diosen! lli'o.

²⁵'Na' nnezra' re' lla'a yell gan' ba bdia' llyixjwe'ra' yel llnebia' ke Diosen', ni tore bill re're nada'. ²⁶Ke len ni nia' re', bibi xhia naken kia', cha' no re' kwiayi'. ²⁷Doxhen kan' nak xti'll Diosen' ba broe'ra' re', bibi nello bkwa'chra' re'. ²⁸Na' nna', legap kwinre, na' legap yeolol be'nn ka' nakre txhen na'. Spíritu ke Diosen' brejen re', nench gap wiare be'nn ka' lldop ll-llay llonlira'll Xanllo Jesucriston', le we'we' lli'o kon ren xchene' dan' brarje le' yay cruzen'. ²⁹Nada' nnezra', ka nak

247 Hechos 20, 21

nna' waya'a bill sorena' re'. Chaz be'nn wxhiye'e ak radjren', gon ake' ka'kze be'kw yi'o, le gonchix akre' be'nn ka' nench la'a ake' nez li ke Xanllo Diosen'. ³⁰ Radjre nize llojkze be'nn we'e di'll wenra'll da bi zej lixheje, nench be'nn ka' llejle' ke Jesucriston', wzenay ake' ke ake'. ³¹ Lewiaya'nn nench nono siye'e re', lelljadinra'll kan' bena' bzorena' re' chonn iz, tella na' tlle'le, to bllella' ke totore ka nak llzejnie'ra' re' xti'll Diosen'.

³²'Na' re' be'nn bi'cha', llona' re' rallna'a Dios, xti'lle'n napkzen yel wak gakrenen re', nench sere war llinte lla gonne' re' dan' bchebe' we'e veolol be'nn ka' breie', nench wxenra'll ake' le'e. 33 Bi bzera'lla' bi da de keré, ni mell keré, ni xhara'nre. ³⁴Re' nnézkzere cha' bi byalljra', leska' bi byalljre be'nn ka' bzorena' txhen na', nia'na' ki ben llin. 35 Kone ka' broe'ra' re' kan' llaya'l gonllo llin, nench gakrenllo be'nn cha' bi yalljre'. Lelljadinra'll kan' bne Xanllo Jesucriston', kan' bne'e: "Nbarazre naken cha' bi we'llo be'nn, kerke si'llo cha' bi da gonn ake' lli'o."

³⁶Ka bayoll be'rén Pablon' leake' di'll ki, na'll bche'k xhibe' balwillrene' leake' Dios. ³⁷Yeolol ake' bzorao bell ake' kwis, na' llye'l ake' Pablon'. ³⁸Da xhen llak akre' ka nak dan' lle'e leake': "Nna'ze llre're nada'." Na' ben ake' le'e txhen gan' bayoe' barcon'.

Zej Pablon' Jerusalén

Bde bkwa'nnto' be'nn ka', na' byo'to' barcon' zejto' lilla gan' lli' to yellrio dan' lli' lo

nisda'on dan' nzi'i Cos. Na' bateyó bllinto' ye to yellrio dan' lli' lo nisda'o dan' nzi'i Rodas, na' bza'to', na' bllinto' to yell nzi'i Pátara. ²Pátara na', jadi'to' to barco da le llza'te chej gan' nzi'i Fenicia, na' byo'to' zejto'. ³Ka zejto' na'n, bre'to' yellen' lli' lo nisda'on dan' nzi'i Chipre, na' bkwa'nnto'n ta'kllo rbese zejzeto' Siria. Kat bllinto' Tiro na' bletj ake' yoa' noa' barcon'. ⁴Tiro na' jadi'to' be'nn nxenra'll Jesucriston', na' bzoto' to xhman ren leake'. Na' lle ake' Pablon' bi cheje' Jerusalén na', ka' llzejnie' Spíritu ke Diosen' leake'. ⁵Gok to xhman na' bago'to' nez. Yeolol be'nn ka' llonlira'll Jesucriston' ren no'r ren xkwi'd, bza'rén ake' neto' txhen lloa' nisda'on, na' bche'k xhibto' balwillto' Dios. 6Na'll bde'l lwellito', na' neto' byo'to' lo barcon', na' leake'n zayej rill ake'.

⁷Na' bza'to' Tiro, na' bllinto' yellen' nzi'i Tolemaida, na' ballojto' barcon', na' jawapto' lliox be'nn ka' nxenra'll Jesucriston' lla'a Tolemaidan', na' bzorén aktoe' tlla. ⁸Na' bateyó bza'rento' Pablon' bllinteto' Cesarea, na' byejto' rill be'nnen' re Felipe be'nn lloe' xti'll Jesucriston', leska' nake' txhen be'nn gall ka' llakrén postl ka', rille' na' bzoto'. ⁹Felipen' zo tap xhi'nne' no'r we'o, na' nne akbe' xti'll Diosen' kon ka llzejnie' Spíritu ke Diosen' leakbe'. 10 Na' bzoto' zan lla, kat bra' to be'nn Judea be'nn re Agabo, lloe' xti'll Dios kon ka llzejnie' Spíritu ke Diosen' le'e. ¹¹Na' badra'nne' neto', na' bnnabe' xpaydon Pablon', na' bcheje'n nia'ne'e, na'll bne'e:

Hechos 21 248

—Spíritu ke Diosen' ne, ki gone be'nn Israel ka' xan baydon ni, go'x ake' le'e gon ake' le'e rallna'a be'nn zi'te.

¹²Ka bayoll béneto' ka', neto' na' ren be'nn Cesarea ka', go'tyoeto' Pablon' zanakzen cheje' Jerusalén na'. ¹³Na'll Pablon' lle'e neto':

—¿Bixchen bellre, na' llzoaya'chre nada'? Ba bchoyra'llkza' kere wchej akze' nada', wakse gata' Jerusalén na', ni ke Xanllo Jesucriston' chet ka'.

14 La'kze da zan da golltoe', bibzoekzeto' wza'ytoe', na'll lletoe':—Gakchaz kon kan' ne XanlloDiosen'.

¹⁵Bde gok ka', bento' xhnid, na'll zejto' Jerusalén na'. ¹⁶Na' bal be'nn Cesarea ka' nxenra'll Jesucriston', bza'rén neto' nche'e akte' to be'nn re Mnasón be'nn Chipre, ba gok scha nawe' Jesucriston', rill le'e llinto' Jerusalén na'.

Bllin Pablon' Jerusalén na' jara'nne' Jacobo

¹⁷Ka bllinto' Jerusalén na', llawé be'nn ka' nakllo txhen llonlira'll Jesucriston', ka bre'e akre' neto'. ¹⁸Bateyó byejrento' Pablon', jara'nnto' Jacobo na', gan' zoe' na', leska' balláyeto' yeolol be'nn gor brao ka'. ¹⁹Na' bwap Pablon' leake' lliox, na'll be'rene' leake' di'll toto kan' gokrén Diosen' le'e, ka nak de'e llroe're' xti'll Diosen' be'nn ka' bi nak be'nn Israel. ²⁰Ka ben akre' di'llen' be'e Pablon', be'rao ake' Dios, na'll goll ake' le'e:

—Rwe' nnézkzero' be'nn zan be'nn Israel ka', ba llejle' ke Jesucriston', na' yeolol ake' ne ake' llonen bien gonllo kan' ne lev dan' bzoj da Moisésen'. 21 Na' ba ben akre', rwe'n da'o llroe'ro' be'nn Israel wrall kello ni't rall be'nn zi't ka', bill gon ake' kan' ne ley dan' bzoj da Moisésen', na' bi wzoa xhi'nn ake' sen dan' nzi'i circuncisión na', na' bi gon ake' billre da ka' nao lli'o be'nn Israel. ²²¿Akxha gonllo nna'? Nnez akre' ba bayedo', na' wadop be'nn yell. ²³To da ben, ganni zo tap be'nne ncheb ake' we'e ake' Diosen' to da we'e ake' Le'e, na' ba bllin lla we'e ake'n. 24 Byejrén ake' yoda'o braon', jadib kwino' ren leake', na' bdixhj dan' llaya'l chixhj ake' na', nench gak wchip yichi ake'. Ka' ben nench re'e be'nn ka' llonkzo' kan' ne leyen', na' gakbe'e akre' kere da li kan' goll ake' leake'n. ²⁵Ka nak be'nn ka' bi nak be'nn Israel, ba bzoj akstoe', bi gon ake' da ka' nao lli'o. Lete to da gon ake', bi gao ake' yel wao da bxoa ake' rao lwa'a lsa'k dios, bi gao ake' llen, na' bi gao ake' no bayi'x ba llchok ake' yen, na' cha' bi nchayna'a ake', bi gak sorén lwelli ake'.

Ka gok be'x ake' Pablon' lo yoda'o braon'

²⁶Na' bche'e Pablon' be'nn tap ka', na' bateyó bayib kwin ake' ren le'e. Na'll byo' ake' yoda'o braon', nench bdixjwe' akre' bxozen' ba bllin lla yeyib kwin ake', na' yera' dan' bcheb ake' we'e ake' na'.

²⁷Bixha ka le gakte gall lla, na' wayoll yera' dan' bcheb ake'n, bal be'nn Israel zaya'k Asia, bre'e akre' Pablon' lo yoda'o braon', na' bta bnne ake' be'nn, na' be'x ake' Pablon'. ²⁸Na' llosia' ake' ne ake':

249 Hechos 21, 22

—iRe' be'nn wrall, legakrén go'xllo be'nnen'! Le'e doxhente de'e llroe're' be'nne, wiello yell kellon', na' rente yoda'o braon', na' bi gonllo kan' ne ley dan' bzoj da Moisésen'. Na' ye to da xhinnj xhen ba bene', ba broe' be'nn bi nak be'nn Israel lo yoda'on.

²⁹Ne ake' ka', le bre'e akre' Pablon' de'e lyell ren to be'nn re Trófimo be'nn Éfeso, na' llak akre' cha' broe' le'e lo yoda'o braon'.

³⁰Yeolol be'nn lla'a rao yell Jerusalén na', ben ake' da nne xhen, na' bdop ake' be'x ake' Pablon'. Na' bxhobxexi ake' le'e, babej ake' le'e lo yoda'o braon', na'll le basej akte' yeololte kon ga nyarjkze ke yoda'on. ³¹Na' ba llot akse' le'en, kat bllin di'll rao be'nnen' nak xan yeolol waka'a ya ka', na' bnnezre' llak da nne xhen Jerusalén na'. 32 Na'll bza'do be'nnen' nche'te' txhonni waka'a ya rente xan ake'. Ka bre'e akre' be'nn waka'a ya ka', bsan ake' bill ben ake' zi' ke Pablon'. ³³Ka bllin be'nnen' gan' lla'a be'nn ka', na' golle' waka'a ya ka' be'x ake' Pablon', na' bchej ake' le'e chop gden. Na'll bnnabe' no be'nnen'. na' bixha bene' na'. 34 Bixha be'nn zan ka' kon llosia' ake', wde wdere da ne toto ake', na' be'nnen' ni ke llejnie'zre' bixhan' ne ake', kon llak llakia. Na' golle' waka'a ya ka' bache'e ake' Pablon' gan' lla'a ake' na'. ³⁵Ka bllin ake' gan' xhoa ne'p ke gan' lla'a waka'a ya ka', na' blen waka'a ya ka' Pablon' rao llaze, le be'nn zan ka' llon ake' zban, lle'n akre' wzap ake' le'e. ³⁶Le ne nao ake' llosia' ake' ne ake':

—iLlaya'l gat be'nnen'!

Pablon' be'e di'll rao be'nn zan ka'

³⁷Ka ba llgo' ake' le'e gan' lla'a waka'a ya ka', Pablon' lle'e xan waka'a ya ka':

—¿Bi gonnre latj nnia' to chop di'lle?

Na' lle be'nnen' le'e:

—¿Bixha llakse nne'o di'll griegon!? ³⁸¿Kere rwe'n be'nn Egipto be'nn bwie be'nn wnebia' ka' kan' batna', na' byejo' latj dachen' bche'o tap mir be'nn wen xhia ake?

39 Na'll bne Pablon':

—Kere nada'n, be'nn Israel nada', na' naka' be'nn Tarso to yell za'k gan' nbane Cilicia, ben okré benn latj we'rena' be'nn ki di'lle.

⁴⁰ Na' be'e be'nnen' latj. Na'll bze Pablon' rao ne'p ka', na' bene' sen ren ta'ke' nench blla'a be'nn ka' lli, na'll bnne'e di'll hebreo bne'e:

22 —Re' be'nn bi'cha', re' be'nn gor xa, le wzenay di'llen' nia' ni.

²Ka ben akre' nne'e di'll hebreon', yezikre blla'a ake' lli. Na'll bne Pablon':

3—Lekze be'nn Israel nada', gorja' yellen' re Tarso gan' nbane Cilicia, na' Jerusalén ni blli'wa', be'nnen' re Gamaliel broe' bsedre' nada', na' bseda' kan' nak ley dan' bzoj da xozxta'ollo ka'. Do yichj do ra'lla' bena' da llakra' llo'ra'll Dios, kan' llonkze re' nna'. ⁴Bda'a blle'nawa' be'nn ka' nao nez koben', gokra'lla' got ake', na' be'x akse' bro' ake' rill ya ka be'nn byio ren no're. ⁵Be'nnen' nak bxoz brao, na' be'nn gor brao ka', nnez akre' kwasro kan' bena'. Leake' benn yich da llonn nada' latj cha'a gan'

Hechos 22 250

lla'a be'nn wrall kello ka' Damasco. Na' bya'a llje'xa' be'nn ka' llejle' ke Jesucriston', na' wache'e ake' Jerusalén ni, nench sa'kzi' ake'.

Pablon' be'e di'll kan' gok bayechje' bnawe' Jesucriston'

(Hch. 9:1-19; 26:12-18)

6'Bixha gok ka zya' Damasco, llonen ka do wawill byechjkze to beni' da za'a yebá nada'. ⁷Na' wixa' je'ttia' rao yo, na' benra' chi'i to be'nn bne'e: "Saulo, Saulo, ¿bixchen da'o llrayo' nada'?" 8 Na'll ballia' xti'lle'n, llepe': "¿Noxha rwe! Xana!?" Na! bne!e: "Nada!n Jesús be'nn Nazaret, nada'n da'o llravo'." ⁹Na' be'nn ka' za'rén nada' txhen na' bre'e akre' beni'n. na' blleb ake', na' bi byejnie' akre' kan' bne be'nnen' balwill nada'n. 10 Na'll llepe': "¿Bixha gona', Xana'?" Na'll bne'e: "Bayas, na' byejkze Damascon'. Ganna' nne ake' bi llaya'l gono'." 11 Bacholtia' ka nak byo' beni'n rawa'. Be'nn ka' zya'rena' txhen na', be'x ake' ta'ka', ka' gok bllina' Damascon'.

12'Na' zo to be'nn lloe'rao Dios re Ananías, llone' kan' ne ley kellon'. Yeolol be'nn Israel ka' lla'a Damascon', ne ake' nake' be'nn wen. 13 Bede' gan' zoa'n, na' lle'e nada': "Saulo bi'cha', nna' yere'ro' da yobre." Na' le bare'tera', na'll gok bre're'. 14 Na'll bne'e: "Dios ke xozxta'ollo ka', ba breje' rwe' nench nnezro' bixhan' lle'nre' gono', na' ba bre'ro' Xhi'nne' be'nn zerao nak be'nn wen, na' ba benro' xti'lle'. 15 Na'll we'o xti'lle'n rao yeolol be'nne, na' we'o di'll ke da ki ba bre'ro', na' ba benro'. 16 Na' nna', ¿bi

llbexho'? Le bayaste' blloa nis, na' balwill Xanllo Jesucriston' nench yezi'xhene' ko'o."

Pablon' be'e di'll kan' gok bse'l Diosen' le'e radj be'nn ka' bi nak be'nn Israel

¹⁷'Na' gok ka bayeda' Jerusalén ni, ka llalwilla' Dios lo yoda'o braon' bre'da'ora', broe'rao Jesúsen' nada'. 18 Na' bne'e: "Be'la'll blloj Jerusalén na', le bi chejle' ake' di'llen' we'o kia'n." 19 Na' nada' llepe': "Xana', leake' nnez akre' kan' bena' jata'a toto gan' zo yoda'o, llayirja' be'nn ka' nxenra'll rwe'n, na' llgo' ake' rill ya, na' lloa' lati llon ake' zi' ke ake'. ²⁰Kan' bet ake' Esteban be'nnen' be'e xti'llo'n. nada' zia' goka' txhen be'nn ka' bet le'en, nada' bdapa' xhara'n ake'n." ²¹Bixha Jesúsen' bne'e: "Lla blloje, nada' wse'la' rwe' zi'te ga lla'a be'nn ka' bi nak be'nn Israel."

Pablon' goke' rao na'a xan waka'a ya ka'

²²Zerao to kat bzenay ake' xti'll Pablon', na'll bzorao llosia' ake' da yobre ne ake':

—iBill llaya'l so be'nnen' yellrio, llaya'l gate'!

²³Yezikre llosia' ake', llza'l xhara'n ake', na' llza'l ake' bichte yo rao lla.

²⁴Na' xan waka'a yan' golle' be'nn ka' bro' ake' Pablon' gan' lla'a waka'a ya ka', leska' golle' leake' chintat ake' le'e, nench nne'e bixchen llosia' be'nn ka' llwie le'en.

²⁵Bixha ba nllejte' sorao chintat ake' le'en, Pablon' lle'e to be'nn ka' ze kwite'n:

—¿Bixha de latj to be'nn nde le' yich nake' be'nn Roma chin ake' le'e, ka za gaktere yel koxchis ke'en?

²⁶Ka bene be'nnen' ka', na' byeje' jelle' xan waka'a ya ka':

—Bwiaya'nn kan' gono'n, nde be'nnen' le' yich nake' be'nn Roma.

²⁷Na'll byejdo xan waka'a ya ka' gan' ze Pablon', na' lle'e le'e:

—¿Da li de xhlicho¹ nako¹ be¹nn Roma?

Na'll bne Pablon':

--Awa'.

²⁸Na'll bne be'nnen':

—Da xhen mell bxha'kra'n nada' nench goka' be'nn Roma.

Na'll bne Pablon':

—Ka gorjtia' naka' be'nn Roma.

²⁹Be'nn ka' gokra'll chin le'en blle'yi'll ake', leska' xan waka'a ya ka', ka bnnezre' Pablon' ndie' yich nake' be'nn Roma, bllebe' kwis ke naken be'e latj bchej ake' le'en.

Bse'l ake' Pablo rao be'nn ka' llnebia' Israelen'

30 Bateyó xan waka'a ya ka', lle'nre' nnezre' kwasro bixchen llao be'nn Israel ka' xhia ke Pablon'. Na' bake'e gden na', nllej ta'k Pablon', na'll batope' bxoz wnebia' ka', na' yeolol be'nn gor brao ka' llnebia' Israelen', na' breje' Pablon' bze'e le'e kllol ake'n.

Na' Pablon', ka bre're' be'nn wnebia' ka', lle'e leake':

—Re' be'nn bi'cha', chak ba bzorena' re' bllinte nna' lla, nbaraz zo yichjra'llda'wa' llona' kan' llazra'll Diosen'.

²Na' bxoz braon' re Ananías golle' be'nn ka' ze kwit Pablon', bdap ake' lloe'. ³Pablon' lle'e le'e: —Dios kape' rwe', be'nn wxhiye'e, llia'o ganna', gono' yel koxchis kan' ne leyen', na' llxinnjo', bi llono' kan' ne leyen' ke naken be'o latj bdap ake' nada'.

⁴Be'nn ka' lla'a ganna', lle ake' Pablon':

—¿Bixchen lle'o bxoz brao ke Diosen' ka'?

⁵Na'll bne Pablon':

—Be'nn bi'cha' ak, kere llakra' cha' bxoz braon', le ki nyoj xti'll Diosen': "Bi nne'o zban ke be'nnen' llnebia' rao yell ko'o."

⁶Pablon' bre're' be'nn ka' lla'n, bale' nak be'nn fariseo, na' ye bale' nak be'nn saduceo, na'll bnne'e zillje:

—Lewzenay ke bi'cha', nada' naka' be'nn fariseo, leska' bi'ch lwellja' nak ake' be'nn fariseo. Na' zoa' ni, llonre yel koxchis kia', ni ke dan' llejlia' yebán be'nn wat ka'.

⁷Ka bne Pablon' ka', gok be'nn ka' chopre, be'nn fariseo ka', na' be'nn saduceo ka', bzorao lla'dyi' lwellj ake'. ⁸Le be'nn saduceo ka', bi llejle' ake' cha' yebán be'nn wat ka', na' ne ake' nono angl, na' bibi spíritu zo. Na' be'nn fariseo ka' llejle' ake' yeolol da ki. ⁹Llakia kwis llak llchachrén lwellj ake'. Na' bzolla'a be'nn ka' llsedre ke ley dan' bzoj da Moisésen', llon ake' txhen be'nn fariseo ka', bne ake':

—Bibi do'l ke be'nnen' de, bixha cha' to alm o cha' to angl balwill le'e, bi gonllo ka', nxholl gonllo da bi llo'ra'll Diosen'.

¹⁰Na' blle' to wdil xhen radj ake'n, to blleb xan waka'a ya ka' wxhoxhjtin ake' Pablon'. Na' golle' be'nn waka'a ya ka', jaxhob ake' Hechos 23 252

le'e radj ake'n, na' bache'e ake' le'e gan' lla'a ake'n.

¹¹Bateyó, tlle'le broe'rao Xanllo Jesucriston', Pablon', lle'e le'e:

—Bendipra'll Pablo, kan' beno' be'o xti'lla'n Jerusalén ni, ka'kze gono' kat llino' Roma.

Be'nn Israel ka' be'e ake' di'll got ake' Pablon'

¹²Na' bateyó bal be'nn Israel ka', be'e ake' di'll got ake' Pablon', na' bcheb ake' bne ake':

—Bi ye'j gaokzllo llinte kat gotllo Pablon', Dios wlleyie' kon to lli'o cha' bi gonllo dan' ba bnello gonllo.

¹³Nak ka choa (40) wde be'nn ka' be'e di'llen' ka'. ¹⁴Na'll byej ake' rao bxoz wnebia' ka', na' rao be'nn gor brao ke be'nn Israel ka', na' goll ake' leake':

—Ba bento' di'll bi ye'j gaoto' llinte kat gotto' Pablon'. ¹⁵Na' lle'neto' re' be'nn wnebia' yere xan waka'a ya ka', yedwe'e Pablon' raoren', yere' lle'nere nnézere ye to chop bin' llone', na' neto' kwe'naoto' tnez gottoe'.

¹⁶Bixha to bi nak xhi'nn no'r zan Pablon', bénebe' kan' llwia ake' gon ake'n, na' byejbe' gan' lla'a waka'a ya ka', na' gollbe' Pablon' ka'. ¹⁷Pablon' goxhe' to be'nn nak xan waka'a ya ka', lle'e le'e:

—Jwa'a bi ni rao xanren', de to di'll we'renbe' le'e.

¹⁸Na' bche'e be'nnen' lebe', jwe'ebe' rao xan ake'n, na' lle'e le'e:

—Pablon' be'nnen' yo' rill yan' bnnabe' okré yedwa'a bi ni rao'n, de to di'll we'renbe' rwe'.

¹⁹Be'nnen' llnebia'n be'xe' ta'kbe', bche'ebe' ga yobre, na' bnnabrebe':

—¿Bi di'llen' lle'nro' we'reno' nada'?

²⁰Na'll llebe' le'e:

—Be'nn wrall keto' ka', ba be'e ake' di'll, ye ake' rwe', wxe lljwa'o Pablon' rao be'nn wnebia' ke ake' ka', nne ake' lle'n akre' nnez akre' ye to chop di'll bin' llone'. ²¹Bi chejle'o ke ake', ke do choa be'nn ka' kwe'nao ake' le'e tnez, ba be'e ake' di'll, bi ye'j gao ake' llinte kat got ake' Pablon'. Na' nna' to llbexh akze' bi nne'o rwe'.

²²Ka baza'be' na', xan waka'a ya ka' lle'ebe', nono yebe' ka di'llen' be'e ake'n.

Bse'l ake' Pablon' rao be'nnen' llnebia'n re Félix

²³Na'll xan waka'a ya ka' goxhe' chop be'nn ka' nlan to gayoa (100) wej waka'a ya, na' golle' leake' gon ake' xhnid chop gayoa (200) waka'a ya, ye wyon chi (70) be'nn llbia kabay, na'll chop gayoa (200) be'nn llak yitjen yay da nak da rao la nench lljake' Cesarea lladá ga tlle'le. ²⁴Leska' lle'e leake' gon ake' xhnid to kabay kwia Pablon' nench lline' wen ka nak lljwa'a ake' le'e rao be'nnen' llnebia'n re Félix. ²⁵Na'll bzoje' to yich da bse'le' rao be'nnen' llnebia'n nen ki:

²⁶"Nada' Claudio Lisias, Ilzoja' rwe' be'nn llnebia', rwe' Félix, nako' be'nn brao, llwapa' rwe' lliox. ²⁷Be'nn Israel ka' be'x ake' be'nnen' gokra'll ake' got ake' le'e. Bixha bnnezra' ndie' yich nake' be'nn Roma, na' bake'e rao na'a ake'n. ²⁸Gokra'lla' nnezra' bi ken llao ake' xhia ke'e, na' jwe'e rao be'nn wnebia' ke ake' ka'. ²⁹Na' benra'

253 Hechos 23, 24

llao ake' xhia bi llone' ka ne ley ke ake'n. Bixha ke nak da ni, bi naken zi gotlloe', na' bi naken zi choe' rill yan'. ³⁰Bixha bnnézkzera' be'nn Israel ka' be'e ake' di'll kwe'nao ake' le'e nench got ake' le'e. Ke len na' llse'le' rao'n, na' leska' ba golla' be'nn ka' llao xhian' yed ake' rao'n, na' nne ake' bin' de ke ake' ren le'e. Sochgo' wen."

³¹ Bllin tlle'le, na' ben waka'a ya ka' kon kan' bne xan ake', bche'e ake' Pablon', jwa'a ake' le'e gan' ne Antípatris. ³² Bateyó waka'a ya ka' jak kon nia' babi' ake' gan' lla'a ake'n na' zjak zreze be'nn ka' llia kabayen' ren Pablon'. ³³ Ka bllin ake' gan' nzi'i Cesarean', na' be'e ake' be'nnen' llnebia'n yichen', leska' ben akte' Pablon' rallne'e. ³⁴ Bayoll bele' yichen' na' bnnabe' ga be'nne Pablon', na' ka bnnezre' ze'e gan' nzi'i Cilicia, ³⁵ na'll lle'e Pablon':

—Nna' we'llo di'll katen' yed be'nn ka' llao xhian'.

Na' golle' leake' jalo' ake' le'e lo yo' gan' llon Herodes yel koxchis.

Pablon' be'e di'll rao be'nn wnebia'n nzi'i Félix

Gok ga'y lla zo Pablon'
Cesarean', na'll bllin
Ananías be'nnen' nak bxoz brao,
nche'te' be'nn gor brao ke be'nn
Israel ka', leska' nche'e akte' to
be'nn re Tértulo be'nn llak lloe' di'll
rao lkwe' be'nne. Na'll jake' rao
be'nnen' llnebia'n, llao ake' xhia
ke Pablon'. ²Bixha ka jaxi'i ake'
Pablon', Tértulon' bzorao llawe'
xhia, ne'e:

—Ni ko'o rwe', be'nn llnebia' neto', lla'to' wen, llioxkeno'n llak llgo' xhnnez dan' llak rao rall-llo, le nako' be'nn llejnie'. 3Llazra'llto' yeolol da ka' llono'n, na' gateze lla'a be'nn llonn ake' yel llioxken ko'o. ⁴Na' bi lle'neto' gonto' zan di'll cha' de billre da gono', llnnabto' gono' okré wzenayo' keto' chollteze. ⁵Za'to' zadtaoto' xhia ke be'nnen' ze rao' ni, nake' to be'nn wen da xhinni, de'e llyixje' da zed doxhen, kon ga lla'a be'nn Israel lleje', na' llone' leake' chopre. Nake' be'nn brao rao be'nn ka' nzi'i Nazareno. ⁶Na' gokra'lle' gone' da xhinni kwis lo voda'o keto'n. Na'llen' be'xtoe' gokra'llto' gonto' yel koxchis ke'e kon kan' ne ley keto'n. ⁷Bixha xan waka'a yan' be'nnen' re Lisias, da bien byoe' radito'n, bake'e le'e rao na'to'n. ⁸Le'en bse'le' neto' yedto' ganni, yedtaoto' xhia rao rwe' ni. Na' ka nak gono' yel koxchisen', wnnabke rwe', na' nnezro' di'll lin' lloe'rento' rwe'.

⁹Ren be'nn Israel ka' ze ake', ne ake' ka'n naken. ¹⁰Na'll be'nnen' llnebia'n bene' sen rao Pablon' nench nne'e. Na'll bne Pablon':

—Nnezra' ba gok zan iz rwe' llono' yel koxchis ke yell kellon', ke len na' llawera' nia' to chop di'll ke dan' llao be'nn ki xhia kia'. ¹¹Chinze gok chllinn (12) lla bya'a Jerusalén na', je'rawa' Diosen'. Wakse wnnab akroe' nench nnezro' di'll lin' lloa'. ¹²Kere bre'e akre' nada' llakyollrena' be'nne, ni ker llta llnnia' be'nne do lo yoda'o braon', ni lo yoda'o yobre, na' do lyellen'. ¹³Ni ke deze da lloe' di'll cha' da li dan' llao ake' xhian'. ¹⁴Na' ni llnia' rwe', llona' xchin Diosen' be'nn be'rao xozxta'oto' ka', na' la'kze

Hechos 24, 25 254

nawa' nez kob dan' ne leake'n da xhinnj, na' llejlia' doxhen da ka' llia le' leyen', na' dan' bzoj be'nn ka' be'e xti'll Diosen' kana'. ¹⁵Nada' llona' rez, leska' leake'n llon ake' rez yesbán Diosen' be'nn wat ka', yesbane' be'nn ben da wen na' be'nn ben da xhinnj. ¹⁶Ke len llona' bien llona' da wen nench ka' bibi de gao xhia kia' rao Xanllo Dios, na' rao be'nnach.

¹⁷'Ba gokte zan iz da'a gateze, na' bayeda' ralla', badsana' mell btopa' nench gakrena' be'nn ya'che, leska' jasana' ye ra'ten' lo yoda'o braon'. ¹⁸Ka goken zoa' yoda'o braon' llona' kan' ne leyen', na' ba naksa' vall, kat to chop be'nn Israel za'k Asia bre'e akre' nada', kere nello llta llnnia' be'nn zan ake, kan' ne ake'n. ¹⁹Leake'n llaya'l yedsé ake' ganni gao ake' xhia, cha' bi de ke ake' kone nada'. 20 Na' cha' be'nn ka' ze gannizen' wak nne ake' cha' wroe'rao bi da xhinni bena' kan' jasia' rao bxoz wnebia' ka'. ²¹Lete to da bnia' kan' jesia' radj ake'n, besia' goll ake': "Ka nak yel koxchis kia'n llonre nna' lla, llonren dan' llejlia' wllin lla yebán be'nn ka' ba got."

²²Na' Félixen' ba nnezre' kan' nak nez kob ke Jesucriston', na' kate benre' kan' bne Pablon', na'll bkwa'nne'n gaken ye to lla yobre, lle'e leake':

—Kat yed xan waka'a ya ka' re Lisias, wnnabyollya'nna' akren' nak kerén', kana' wayej di'll da yobre.

²³Na' golle' to be'nnen' nak xan waka'a ya ka', za yo'z Pablon' rill yan', na' ga't latj cha' bi lle'nre' gone', na' we'e latj yedra'nn be'nn ka' nllie' le'en, na' gakrén ake' le'e. ²⁴Na' baza'a Félixen', na' kat gok chop chonn lla balline' ren no'r ke'e, na' no'r ke'en nake' be'nn Israel na' re Drusila. Goxhe' Pablon', na' bzenaye' kan' llaya'l wxenra'll-llo Jesucriston'. ²⁵Bixha goll Pablon' le'e, llaya'l gonllo da nak lixheje, na' bi gontekllo dan' zera'll lo yichjra'llda'ollon', na' lle'e le'e wllin lla gon Diosen' yel koxchis kello.
Na'll blleb Félixen' kwis, na'll lle'e Pablon':

—Ba gokse wayejo'. Kat ga't latj kia', na' gaxha' rwe'.

²⁶Le leska' gokra'lle' we'e Pablon' le'e mell nench yesane' le'e, ke len weltze llaxhe' Pablon' lloe'rene' le'e di'lle. ²⁷Ka' gokte chop iz, kat bill bnebia' Félixen', na' bnebia' be'nn yobre be'nn re Porcio Festo. Na' Félixen' bkwa'nne' Pablon' lo rill yan', nechkze bga'nne' wen rao be'nn Israel ka'.

Bde Pablon' rao be'nn wnebia'n nzi'i Festo

Pasto, gok chonn lla bze'e Cesarean' byeje' Jerusalén na'. ²Na' jak bxoz wnebia' ka', na' ren be'nn ka' nak be'nn gor brao ke be'nn Israel ka', jak ake' rao Feston' llao ake' xhia dan' llon Pablon'. ³Llnnab ake' gone' okré lljasane' Pablon' Jerusalén na'. Na' leake'n ba noe' ake' di'll got ake' le'e tnez. ⁴Feston' lle'e be'nn ka' ka nak Pablon' yoe' rill ya Cesarean', na' le'en le wayejte' Cesarean', ⁵na' lle'e leake':

—Lelloj balre nak be'nn wnebia', sa'renre nada' chejllo Cesarean', cha' bi da xhinnj ben be'nnen' na' gaore xhia. 255 Hechos 25

⁶Feston' bzoe' Jerusalén na', ye xo'n ga chi lla, na'll baze'e zayeje' Cesarean'. Na' batevó ka balline'n, bllie' gan' llone' yel koxchisen', na' bse'le' be'nn ka' jaxi'i ake' Pablon'. ⁷Ka bllin Pablon' rawe'n na', jabi'y be'nn Israel ka' za'k Jerusalén. Na' bzorao ake' llao ake' xhia ke Pablon', lltob akre' le'e da zan da ne ake' bene', bixha ni to da ki bi broe'n cha' naken da li. 8Leska' Pablon' llakrén kwine', bne'e:

—Bibi nna gona' da wkwa'nn nada' tore rao ley ke be'nn Israel ka', ni kon ren yoda'o braon', ni kone César be'nnen' llnebia' doxhen Roma bibi da xhinni nna gona'.

⁹Na' Feston' gokra'lle' yega'nne' wen rao be'nn Israel ka', na'll lle'e Pablon':

—¿Lle'nro' wayejo' Jerusalén na' gona' yel koxchis ko'o ganna'? ¹⁰Na' bne Pablon':

—Ba zekza' rao' ni, le nzoa rey Césaren' rwe' gono' yel koxchis, ganni llaya'l gak yel koxchis kia'n. Rwe' nnézkzero', bibi bena' ke be'nn Israel ka'. 11 Cha' bi da xhinni bena' da llaya'l gata', wakse gata', kere lleba'n. Zan ke dan' lltob akre' nada'n, ni ton bi nak da li, na' bi gak kwa'nnre nada' rallna'a be'nn ka'. Lle'nkzra' kwin rey Césaren' gone' yel koxchis kia'n chet ka'.

¹²Feston', bayoll be'rene' di'll be'nn ka' llnebia'rene' na', na'll lle'e Pablon': —Ka naken lle'nro' kwin Césaren'

gone' yel koxchis ko'on, dekz de

chejo' rao le'e.

Bde ake' Pablon' rao rey Agripa

¹³Bde chop chonn lla, reyen' re Agripa ren bi zane' no'ren' re

Berenice, bllin ake' Cesarean' jara'nn ake' Feston'. ¹⁴Ka nak bzo ake' zan lla na', be'rén Feston' le'e di'll ke Pablon', bne'e:

—Zo to be'nn bkwa'nn Félixen' rill ya. 15 Ka bya'a Jerusalén na', bed be'nn ka' nak bxoz wnebia' ak, na' be'nn gor brao ke be'nn Israel ka' rawa'n, llao ake' xhia, lle'n akre' wsa'kzie'. ¹⁶Na'll goll ake', lli'o be'nn Roma bi gak wchoyllo ke be'nne gate', cha' bi nna ga't latj nne'e gakrén kwine' rao be'nn ka' llao xhia ke'en. ¹⁷Na' kate bra' ake' ganni, bi brexha'; bateyoze le bya'tia' gan' llak yel koxchisen', na' goll ake' lljaxhi'i ake' be'nnen'. ¹⁸Na'll bed be'nn ka' llao xhian', na' llakra' cha' billre da xhinni yobre wtob akre' le'en. 19 Rencha' da llak ke dan' nao ake' na'zen', na' ke ye to be'nn ba got re Jesús, bixha Pablon' de'e ne'e nbankze'. 20 Nada' bi nnezra' ke da ka', na'll bnnabre' cha' lle'nre' wayeje' Jerusalén na', gak yel koxchis ke'en ganna'. ²¹Na' Pablon' bnnabe' tie' rao kwin Césaren', nench gak yel koxchis ke'en. Ke len na' bkwa'nne' lo rill yan', llinte katen' wse'le' rao rey César na'.

²²Na'll Agripan' lle'e Feston':

-Leska' nada' lle'nra' wzenaya' di'llen' lloe' be'nnen'.

Na'll bne Feston':

—Wxe wzenayo' xti'lle'n.

²³Bixha bateyó ka bllin rey Agripan' ren Berenicen', da nne xhen gok ka bllin ake'n, na' blle' ake' gan' llbe' Feston' llone' yel koxchisen', na' ren be'nn nak xan waka'a ya, na' bal be'nn nak be'nn brao rao yellen'. Na' bse'l Feston'

Hechos 25, 26 256

be'nn ka' jaxhi'i ake' Pablon'. ²⁴Na'll bne Feston':

-Rey Agripa, na' yeololre lla'llo txhen ganni, ni ze be'nnen', yeolol be'nn Israel ka' llao ake' xhia ke'e, ka be'nn lla'a Jerusalén, na'll be'nn ka' lla'a Cesarea, na' llchie' akre' kwis, llnnab ake' llaya'l gate'. ²⁵Na' kon ka' llakra' nada', bibi da xhinni bene' da nnello llaya'l gate'. Lete to da bnnabe' tie' rao Césaren' gone' yel koxchis ke'en. Na' llwia' wse'le'. ²⁶Bixha ka nak bibi de wzoja' chixiwe'ra' Césaren' bi ya'nnen' bene'; ke len ba breje', ba nzie' raore ni, na' rao rwe' rey Agripa, na' wakse wnnabyoll rwe', na' ga't da wzoja' Césaren'. 27 To da ke nxhia gona' cha' wse'le', na' bi yepa' Césaren' bi ken llse'le'.

Pablon' bnne'e rao rey Agripa

Na'll Agripan' lle'e Pablon':
—Bnechk nna' bixhan'
lle'nro' nne'o.

Na'll blis na'a Pablon', bzorao lloe' di'llen', ne'e:

²—Da wen kwis ba gok kia' ka nak bzia' rao'n, rey Agripa, nench wa'a di'll ke da ka' llao be'nn Israel ka' xhia kia'. ³Rwe' nnezkzro' kan' nak dan' nao neto', be'nn Israel, na' da ka' llakyollrento'. Ke len lle'nra' gakxhenra'llo' nada' wzenayo' kia'.

Pablon' be'e di'll ka bene' ka za gonlira'lle' Jesucriston'

4'Yeolol be'nn Israel ka' nnez akre' kwasro, ka bena' ka nna naktia' xkwi'de chak bzoa' ralla', leska' ka bzoa' Jerusalén na'. ⁵Leska' nnez akre', na' wakse ne ake' cha' lle'n akre', nna naktia' xkwi'de

goka' txhen ren be'nn ka' nzi'i fariseo, leake'n nao leven' klle'llo. ⁶Dan' llejlia' ke Diosen' yesbane' be'nn wat ka' kan' bchebe' ren da xozxta'oto' ka', llaklla'a ake' nada', ke len na' llao ake' xhian'. ⁷Chllinn (12) kwen ka nak veolol be'nn Israel ka', llon ake' rez yesbán Diosen' be'nn wat ka'. Ni ke len na', lloe'rao ake' Diosen' do lla do vere. Nada' leska' llona' rez ke Diosen' yesbane' be'nn wat ka', ¿bixchen llaklla'a akze', na' llao ake' xhia kia', rey Agripa? 8 Na' re' lli're llzenayre kia', ¿llákere nono gak chejle' wllin lla yesbán Diosen' be'nn wat ka'?

Pablon' be'e di'll kan' bsa'kzie' be'nn ka' llonlira'll Jesucriston'

⁹'Kana' leska' nada' llakra' llaya'l wsa'kzia' be'nn ka' llejle' ke Jesús be'nn Nazareten'. ¹⁰Na' ka' bena' Jerusalén na'. Ka benn bxoz wnebia' ka' latj, be'nn zan be'nn ka' nxenra'll Jesucriston' broa' rill ya. Na' ka bet ake' bal ake', nada' ben ake' txhen. ¹¹Na' zan ras bya'a toto yoda'o, na' bsa'kzi' ake' nench bill nnao ake' dan' nxenra'll ake'n. Ka' gok bwie akre' kwis, bya'tia' yell zi't jaray ake'.

Pablon' be'e di'll da yobre kan' gok bxenra'lle' Jesucriston'

(Hch. 9:1-19; 22:6-16)

12'Ni ke len zya' Damasco no'xtia' yich ke bxoz wnebia' ka', da llonn nada' latj nench go'xa' be'nn ka' llonlira'll Jesucriston'. 13 Bixha gok, do wawill ka zya' tnezen', bre'ra' to beni' xhen, llseni'tellen kerke beni' ke willen', byechjen nada', na' ren be'nn ka' za'a ren nada' na'.

257 Hechos 26

¹⁴Na' wix yeololto' je'tteto' rao yo, kat benra' chi'i to be'nn balwille' nada', nne'e di'll hebreo, bne'e: "Saulo, Saulo, ¿bixchen llwiero' nada', na' da'o llrayo' nada'? Llonze zi' kwino'n llono' ka', ka llon bell llche'oba' rao to da la, da lla'deba'." 15 Na'll bnia': "¿No rwe', xa?" Na'll bnne Xanllon': "Nada'n Jesús, nada'n da'o llrayo' ka naken llono' ka'. ¹⁶Na' nna' bayas bazellá, ba broe'rawa' rwe', le de to llin da lle'nra' gono', na' we'o di'll ke dan' ba bre'ro' ni, na' da za wroe'ra' rwe'. ¹⁷Nada' wse'la' rwe' gan' lla'a be'nn ka' bi nak be'nn Israel, na' yesra'a rwe' rao na'a ake', leska' vesra'a rwe' rao na'a be'nn Israel ka'. 18 Wse'la' rwe' nench lliaroe' akroe', na' xha' rao ake', re'e akre' beni' ke Diosen', na' bill cha'a ake' lo da xcholen'. Bill cha'a ake' xhnia' daxi'on, na' yella'a ake' xhnia' Dios. Na' chejle' ake' kia', na' yezi'xhen Diosen' da xhinni ke ake', na' gak ake' txhen ren be'nn ka' ba brei Diosen' nak ake' rallne'e."

Pablon' be'e di'll kan' gok bzenaye' ke Jesúsen'

19'Ka' gok rey Agripa, na' bzenaya' kan' goll Jesúsen' nada' ka nak ba broe'rawe' nada'. 20 Zga'tek be'nn Damasco ka', bzejnie'ra' xti'lle'n, na'll be'nn Jerusalén ka', na'll be'nn ka' lla'a doxhen gan' nzi'i Judea, na'tell be'nn ka' bi nak be'nn Israel. Goll ake' llaya'l wayat akre' ke da xhinnj ke ake'n, na' wzenay ake' ke Dios, na' gon ake' da wen nench wroe'n da lin' ba bayat akre' ke da xhinnj ke ake'n. 21 Ni Ke len na' be'nn Israel ka', be'x ake' nada' lo

yoda'on, na' gokra'll ake' got ake' nada'. 22 Bixha Diosen' ze'e llwie' nada', Le'en nna nzoe' nada' nbana' bllinte nna' lla, na'll llak lloe'rena' be'nn xti'lle'n ren xkwi'd ren be'nn gore. Na' kere llroe' akre' kreren', llroe' aksere' doxhen kan' ne dan' bzoj be'nn ka' be'e xti'll Diosen' kana', na' dan' bzoj da Moisésen' gak. ²³Dan' bzoj ake' ke Criston' kan' gak katen' yede'n, yellayrawe', na' gate', na' Le'en gake' be'nn nell yebán radj be'nn wat ka'. Na' we'e di'll dan' nsa'a beni' ke Diosen', ren be'nn Israel, na' ren be'nn bi nak be'nn Israel.

Pablon' lla'tyoere' rey Agripa chejle' ke Jesucriston'

²⁴Chak lloe' Pablon' di'll ki llakrén kwine', Feston' bnne'e zillj, lle'e le'e:
—Llaktonto'n, Pablo, dan' ba bsedo' da xhen na', ba btonten rwe'.

²⁵Na'll bne Pablon':

—Llapa' rwe' bara'nne, Festo, zan kere llaktonta'n, di'll lin' lloa', ke nakten na'. ²⁶ Ganni lli' reyen' nnéztere' kan' naken, na'llen' lloa' di'llen' do ra'lla', le'e nnezre' doxhen kan' goken, le kere goken to latj ga nga'chen. ²⁷ Rey Agripa, ¿kaxha llejle'o ka nak da ka' bzoj be'nn ka' be'e xti'll Diosen' kana'? Nnézkzera' llejle'o.

²⁸Na'll Agripan' lle'e Pablon':

—Ye ra'tze ke llono' nada' gan, chejlia' ke Jesucriston'.

²⁹Na'll bne Pablon':

—Gonchga Diosen', la ye ra'tze, la ye da xhen, kere rwe'zo', lle'nkazra' yeolol be'nn ka' lla'a ganni, gakre kan' naka' nada' wxenra'llre Jesucriston', kon bi llejre gden ki. Hechos 26, 27 258

³⁰Bayoll bne Pablon' ka', na' bazolla'a reyen' ren be'nnen' llnebia'n ren Berenicen', na' ren yeolol be'nn ka' blle'rén ake'n. ³¹Ka jasé ake' ye to latj yobre, lloe'rén lwellj ake' di'lle, ne ake':

—Bibi da xhinnj ben be'nnen' da nello gate', ni da choe' rill ya.

³²Na'll Agripan' lle'e Feston':

—Wakse yesanllo be'nnen' chenak bi bnnabe' tie' rao kwin Césaren'.

Bse'l ake' Pablon' yellen' nzi'i Roma

Bixha kat bllin lla wse'l ake' neto' gan' nzi'i Italia, chejto' lo barco. Na' ben ake' Pablon' ren be'nn ka' bllachrene' rill van', rallna'a to xan waka'a va re Julio, nake' txhen ren waka'a ya ka' nzi'i Augusto. ²Na' byo'to' to lo barco da za'a yellen' nzi'i Adramitio, na' zejen do gan' nzi'i Asia. Na' Aristarco be'nn Tesalónica ga nbane Macedonia, za'rene' neto' txhen. ³Bateyó bllinto' yellen' lli' lloa' nisda'o re Sidón, na' Julion', wen kwis llonre' Pablon', na' be'e latj byeje' gan' lla'a be'nn ka' nombia' le'e nench bzenia'na'a ake' le'e. 4Na' bza'to' yellen' re Sidón, zejto' lo barcon', na' bdeto' awlloze gan' lli' yellrio dan' lli' lo nisda'o dan' nzi'i Chipre. Na' dá be'n krere kana', na' yellrion' bkwe'jen neto'. ⁵Bdeto' doxhen nisda'o chla' gan' nzi'i Cilicia, na' Panfilia, bllinteto' yellen' nzi'i Mira ga nbane Licia.

⁶Mira na' jadi' xan waka'a ya ka' to barco da za'a Alejandría, na' zejen Italia, na' blle'e neto' loen'. ⁷Na' zejto' yo'to' barcon' gokte zan lla, chaora'll zej barcon', ganne bllinto' chla' yellen' nzi'i Gnido. Ka nak be'n dan krere, na' bdeto' awllo gan' ne Salmón, na' byechjto' yellrion' lli' lo nisda'o na' dan' nzi'i Creta. ⁸To ganne llak za'a barcon', zejto' awllo ga de yellrio, bllinteto' ga nzi'i Buenos Puertos, awllo ganna' lli' yellen' re Lasea.

⁹Na' zan lla ba gok, na' ba llonen nxholl kwis ko'to' nez lo nisda'on, le ba bllin lla llak zay. Llwia Pablon' ka', na' lloe'rene' leake' di'll. ¹⁰Lle'e leake':

—Re' be'nne, nxholl kwis ba llonen, cha' nna' ko'llo nez, nxholl kweyi' barcon', na' yoa' ka' nsa'n na', rente lli'o nxholl kweyi'llo.

11 Bixha be'nnen' nlan waka'a ya ka', llzenaylle' xti'll be'nnen' nlan barcon', na' xti'll xan barcon' kerke xti'll Pablo na'. 12 Na' yellen' nzi'i Buenos Puertos gan' lla'to'n, bi naken wen soto' ganna' kat llak zay, na'llen' yeolol ake' llak akre' wenkze ko' ake' nez, cha' gakte llin ake' Fenice to yell ga nbane Creta. Fenice na' bill llechjtek be', le ganna' nla' ga llra' will, na' naken wen so ake' ganna' katen' llak zayen'.

To be' xhen byechjrén lo nisda'on

¹³Kat bzorao dá to be' da'o riz dan' za'a lle'lre, na' llak akre' wakse sa'a ake' kan' ba non ake' xhbaben'. Na' bza'a ake' zjake' awllo gan' lli' Creta. ¹⁴Ker gok scha kat bllay akre' to be' xhen da re Noreste. ¹⁵Na' bzorao llli'yen barcon', na' neto' ker bi llak gonto', na' be'to' latj llsa'a be'n neto'. ¹⁶Kat bdeto' ko'llre yellrion' lli' lo nisda'on re Clauda, ganna' bi datek be'n res. Na' barcon' nxhoben

259 Hechos 27

ye to da da'o da llon llin kat bi llakre barcon', balepto' da da'on lo barcon'. 17 Bayoll balep ake' da da'on, na' bzorao llchej ake' barcon' ren do ake nench ke yeyinnjen. Be'nn ka' llsa'a barcon', lleb ake' lljacho'n lo yoxhen' gan' nzi'i Sirte. Na' baletj ake' ra'll dan' llon nench za'a barcon'. Na' bsanra'll ake' barcon' zejen kon kan' dá be' na'. ¹⁸Bateyó na' dakze be' xhen na', na' bzorao ake' llza'l ake' bal yoa' ka' nsa'a barcon' lo nisda'on. 19 Gok lilli na', bzoraokze llza'lto' kon ta'kto' xchinraz barcon' lo nisen'. 20 Gokte zan lla bi broe'kze rao willen' ren berj, na' nna dakze be' xhen na', na' lláketo' bakze blleyi'to'n. ²¹Na' ba gok zan lla bi nna gaoto', na' Pablon' bze'e radi be'nn ka', bne'e:

—Gokte wen chenak re' bzenayre kia', na' bi bro'llo nez yellrion' nzi'i Cretan', lewiakero' da xhen da ba blleyi'. ²²Na' nna' legondipra'lle, ni tollo bi kwiayi', toze barco ni kwiayi'kze. ²³Be'e llere broe'rao to angl ke Dios be'nnen' llona' xchin na'. ²⁴Na' bne'e: "Bi llebo' Pablo, dekze llino' rao rey César, Diosen' yesre'e rwe', na' ren be'nn ka' zejreno' txhen na'." ²⁵Na' legondipra'lle, nada' nxenra'lla' Diosen', na' gakte kan' ba bdixjwe're' nada'n. ²⁶Dekz de lljago'nnllo ga de yellrio.

²⁷Ba zejten chda' (14) willen' ka nak zej barcon' nlli'y be'n len, bdeteto' gan' de nisda'on nzi'i Adriático. Ba llonjen ka do ller, kat gokbe'e be'nn ka' llsa'a barcon', ba rez llin ake' ga de yo bill. ²⁸Na' bletj ake' to ya zi' nench bllix ake' art zitj naken, na' naken tapralj

(80) llit. Na' ka bza'n ye ra't, bllix ake'n ye to, na' ba naken wyon (60) llit. ²⁹Ka nak lleb ake' lljati' barcon' yej, na' bza'l ake' tap ya xhen dan' nzi'i ancla lo nisen' nench bza'yen barcon', na'll brexh ake', na' lle'ntat akre' cheni'. ³⁰Be'nn ka' llsa'a barcon', gokra'll ake' yexhonnj ake', bletj ake' barco da'on lo nisen', llon ake' ka llza'l ya zi' ka' rao barcon'. ³¹Bixha Pablon' lle'e be'nn xan waka'a ya ka', na' waka'a ya ka':

—Cha' be'nn ki bi kwexh ake' lo barcon', ni to re' bi yerá.

³²Na' bchoy waka'a ya ka' do dan' nllej barco da'on, na' bexjen lo nisen'.

³³Bixha ka baza'a cheni'n, Pablon' llchie're' be'nn ka' gao ake' ra'te, lle'e leake':

—Ba gok chda' lla, na' bi nna tasre, na' ni ra't bi nna gaore. ³⁴Legao ra't, legón to wen ke kwinre cha' lle'nere banre, ni to yich yichjllo bi kwiayi'kze.

³⁵Bayoll bne'e ka', llwiate be'nn ka' bxhie' yet xtir, na' be'e yel llioxken ke Dios, na'll bxhoxhje'n bzorao llawe'n. ³⁶Ka llwia ake'n, na' bayakxhenra'll ake', na' yeolol ake' bdao. ³⁷Na' nak chop gayoa wyon chi'ntoto' (276) lla'a lo barcon'. ³⁸Ka bayoll bdao ake' na', berj akre', na' bza'l ake' trigo dan' noa' barcon' lo nisen' nench bill gokteken zi'.

Ka gok bxhoxhj nisda'on barcon'

³⁹Ka byeni'n kere llayombie' akre' yellrion' gan' bllin ake'n, na' bre'e akre' de to latj ga llia nisen' llize, na' lloe' na', nak ra'ch lo yoxh. Na' gokra'll ake' cha' gak wlli'y ake' barcon' lloa' nisen'. ⁴⁰Na' bchoy ake'

Hechos 27, 28 260

do ka' nllej ya zi'i ka' nzi'i ancla, na' bsanra'll ake'n lo nisen'. Na'll basell ake' yay ka' dan' llsa'a ake' barcon', na' blis ake' ra'llen' nench wlli'y be'n len. Na' bzorao llbi'y barcon' gan' ba de yellrio. 41 Bixha jati'kze barcon' ga lldil nisda'on ren ye to da yobre, na' jacho' rawen' lo yoxh ga bill gokse ta nnen, na' bzorao nisda'on llxhoxhjen xhan barcon', le llebrazen' nxhobxexjen len. 42 Na'll waka'a ya ka' be'e ake' di'll got ake' be'nn ka' nche'e ake'n, nench ke waxhonni ake' waxhoa ake! rao nisen!. 43 Bixha be!nnen! nlan leake'n, bi be'e latj nench basre'e Pablon'. Na' golle' be'nn ka' llak llxhoa yeon', wakse xi't ake' lo nisda'on, na' yob walloj ake' gan' de yo bill na'. 44 Be'nn ka' yela', kon da ballel akre' lo barcon', no bray, bxhoa ake' rawen', nench balloj ake' lo nisen'. Na' ka' gok yeolol ake' balloj ake' lo nisen'.

Pablon' blline' yellrio dan' lli' radj nisda'o re Malta

Na' ka' ballojto' lo nisda'on wen kwis, ni toto' bibi goke. Na' bnnézeto' yellrion' bllinto'n nzi'n Malta, naken to yellrio da lli' lo nisda'o. ²Be'nn Malta ka' le wen ben akre' neto', bxhen ake' to yi' xhen ka nak bllinto'n, le llak yejw, na' llak zay. ³Na' Pablon' jatope' to chop xhis ye'che, na' bxoe'n rao yi'n, bixha ballojkze to bel znia, ka nak bllebba' yi'n, go'lba' ta'k Pablon'.

⁴Ka bre'e be'nn Malta ka' na'l belen' ta'k Pablon', na' lle lwellj ake':

—Be'nn wen xhia be'nnen', la'kze ba bare'e lo nisda'on, Diosen' bi lloe'kze' latj soe'. ⁵Na' Pablon' bllibe' ta'ke'n rao yi'n, na' baxho'p belen', na' bibi gokre'. ⁶Na' llbexh ake' kwe' Pablon' yi, na' sete yale' na' gate'. Ba gokte scha bexh ake', na' Pablon' bibi llakre', na' balla'a xhbab ke ake'n. Na'll ne ake', cheke Pablon' nake' to dios.

⁷Awllo ganna' de to yellrio ke to be'nn re Publio, na' Publion' nake' be'nn wnebia' ke doxhen Malta na'. Le'e brebe' neto', bzoto' rille'n chonn lla. ⁸Na' xa Publion' de'e llake' yillwe', yoe' da la res, na' yiche' goll llen. Na' byej Pablon' jawie' le'e, na' balwille' Dios. Bayoll na' bxoa ta'ke'n yichje'n, na' bayake'. ⁹Ka bre'e be'nn ka' ka', na'll kon be'nn llak yillwe' rao yellrion', byej ake' rao Pablon', na' bayak akte'. ¹⁰Leska' ben ake' wen keto', ka bllin lla baza'to'n, benn ake' yeolol da yálljeto' rao nezen'.

Pablon' blline' Roma

¹¹Gok chonn be'o zoto' Maltan'. na'll baza'to' byo'to' to lo barco da bza'a yellen' nzi'i Alejandría, leska' gan' nzi'i Malta, na' brexhen chak bde da zaven'. Na' nben le' barcon' lwa'a lsa'k ke be'nn ka' re Cástor na' Pólux. ¹²Na' ka bllinto' yell nzi'i Siracusa na', bzoto' ganna' chonn lla. 13 Na' bdeto' to lloe', to lloe' yellrion', na'll bllinto' yellen' nzi'i Regio. Bateyó dá to be' da'o za'a lle'lre, na' bza'to', ballop lla bllinteto' yellen' re Puteoli. ¹⁴Puteoli na' balláyeto' be'nn lwellito' ka' nxenra'll Jesucriston'. na' go'tyoe akre' neto' nench ga'yto'. Na' bzorén aktoe' to xhman, na'tell byejto' yellen' nzi'i Roma. 15 Be'nn

261 Hechos 28

lwelljto' ka' nxenra'll Jesucriston' lla'a Roman', bnnez akre' ka', na' bro' ake' nez badlez ake' neto' gan' nzi'i Foro de Apia, na' gan' nzi'i Chonn Tiend. Ka bre'e Pablon' leake', be'e yel llioxken ke Dios, na'll da xhen bayakxhenre'. ¹⁶Ka bllinto' Roman', be'nn xan waka'a ya ka', bene' pres ka' rallna'a be'nn wnebia' ke waka'a ya ka'. Na' Pablon' be'e ake' latj bzoe' to kere, na' ka' bzo akte' to waka'a ya bdape' le'e.

Pablon' bdixjwe're' xti'll Diosen' Roman'

¹⁷Ba gok chonn lla zo Pablon' Roman', na' goxhe' be'nn ka' nak be'nn brao ke be'nn Israel ka' lla'a Roman', na' bdop ake' lle'e leake':

—Re' be'nn bi'cha', nada' bibi da xhinni nna gona' da wlleyi' yell kellon', na' bibi nna nnia' ke da ka' nao xozxta'ollo ka', na' be'nn wrall kello ka' be'x ake' nada' Jerusalén na', na'll ben ake' nada' rallna'a be'nn Roma ka'. ¹⁸Na' be'nn Roma ka', bnnabyoll akre' nada', na'll gokra'll ake' yesán ake' nada', le bibi da xhinni bena' da nello llaya'l gata'. ¹⁹Ka gokra'll ake' yesán ake' nada'n, bi be'e be'nn wrall kello ka' latj. Ke len na' bnnaba' wde ake' nada' rao kwin rey Césaren', na' kere za'a gawa' xhia ke yell kello na'n. 20 Na'llen' ba goxha' re' nench re'ra' re', na' we'rena' re' di'lle. Nlleja' gden ki, ni ke dan' llbexha' yesbán Diosen' be'nn wat ka', ka'kze llbexh zan be'nn Israel ak.

²¹Na'll lle be'nn ka' le'e:

—Ni to yich bi nna si'to' da za'a Judean' we'n xti'llo', leska' ni to be'nn wrall kello ka', bi nna yed yedtawe' xhia, nne'e bi llono' wen. ²²Na' lle'neto' nnézeto' bixhan' nsa'o, gateze lléneto' llwie akre' da koben' nao'n.

²³Na' be'e ake' di'll dop ake' to lla. Kat bllin llan', be'nn zan jak gan' zo Pablon'. Na' bzorawe' tzirte bllinte tlle'le lloe'rene' leake' di'll kan' nak yel llnebia' ke Diosen', na' llzejnie're' leake' dan' ne ley dan' bzoj da Moisésen', na' dan' bzoj be'nn ka' be'e xti'll Diosen' kana' ke Jesús, nench chejle' ake'. ²⁴Bale' llaze di'll kan' ne Pablon', na' ye bale' bi llaz akse' xti'lle'n. ²⁵Ka nak bi llak toze di'lle, na' bzorao llallach ake'. Na' lle Pablon' leake':

—Da li kwis llakte kan' bzejnie' Spíritu ke Diosen' Isaías be'nnen' be'e xti'll Diosen' kana', nench golle' xozxta'ollo ka':

²⁶ Byej jell be'nn ka':

Da li yénere, na' bi chejnie'kzere,

da li re'tere, na' bi gakbe're bi dan'.

²⁷ Le ba nakchoch yichjra'llda'o be'nn ki,

na' nsej nay ake',

na' nchod rao ake', nench bi re'e akre',

na' bi yen akre',

na' bi chejnie' akre' lo ra'llda'o ake',

na' ni ke wayechj akse' wanao ake' nada' nench wayón ake'.

²⁸Na' nna' llaya'l nnézere, ba bse'l Diosen' yel wasrá rao be'nn ka' bi nak be'nn Israel, na' leake' wzenay, na' yesrá Diosen' leake' rao da xhinnj ke ake'n. Hechos 28 262

²⁹Bayoll bne Pablon' ka', na' ballach be'nn Israel ka', zayej ake' llak dilrén lwellj ake'.

³⁰ Pablon' bzoe' chop iz Roman' lo yo' ga bdixhje', na' brebe' yeolol

be'nn jawiá le'e. ³¹Na' llyixjwe're' kan' nak yel llnebia' ke Diosen'. Latj xhen go't nench bzejnie're' xti'll Xanllo Jesucriston', nono bze wllone'.

YICH DAN' BZOJ POSTL SAN PABLO KE BE'NN KA' LLA'A ROMA

Pablon' llwape' lliox be'nn ka' nxenra'll Jesucriston' lla'a yellen' nzi'i Roma

Nada' Pablo Ilzoja' re'. Llona! biteze da ne Xanllo Jesucriston'. Dios na' breje' nada' naka' postl ke'e, bse'le' nada' nench na' llvixiwe'ra' Di'll Wen ke'en. ²Dios na' ba bzenre' be'nnachen' Di'll Wen ke'en, bene' nench bni't be'nn be'e ak xti'lle'n kana', na' bzoj ake'n. ³Di'll Wen ke Diosen' llzejnie'n lli'o ke Xhi'nne' Xanllo Jesucriston'. Le'en gorje' goke' ka be'nnach rao dialla ke da rey David. ⁴Spíritu ke Diosen' broe'n nak Xanllo Jesucriston' dogarje Xhi'nn Dios, na' nape' yel wak, le babane' radi be'nn wat ka'. ⁵Na' neto' dan' llonlira'llto' Xanllo Jesucriston', ben Diosen' da wen keto', le breje' neto', na' bse'le' neto' llyixjwe'to' xti'lle'n, nench na' chanll be'nn wxenra'll Le'e, na' chejle' ake' ke'e, na' wzoa ake' xti'lle'n doxhente yellrio. 6Ka'n ba brej Diosen' re', nench nakre rallna'a Jesucriston'.

⁷Llzoja' da ni ke yeololre lla're Roma na', re' ba brej Diosen' nakre rallne'e, nllie're' re'. Na'll llnnaba' rawe'n ren rao Xanllo Jesucriston' gakrén akchgue' re', na' wzoa ake' yichjra'llda'ore so kwezre nbaraz.

Pablon' lle'nre' lljara'nne' be'nn ka' lla'a Roma

⁸Zga'tek nnia' re', Jesucristo na'n, zoe' llakrene' nada' nench lloa'a vel llioxken ke Diosen' ke yeololre, le be'nn ka' zjalla'a doxhen yellrio na', lloe' ake' di'll kan' nxenra'llre Criston'. ⁹Nnezkze Diosen' yo'y ras kat llalwille'n, llnnaba' gakrene' re!. Nake! be!nn nxenra!lla! do yichj do ra'lla', na' llona' xchine', lloa'a xti'll Xhi'nne' Jesucriston'. ¹⁰Na' llnnaba' rao Diosen' gonne' lati yedwia' re', le ba gok scha bi nna yeda'. 11 Lle'nra' yedwia' re', nench wzejnie'llra' re' ye ra't wxenra'llya'nnre Diosen'. 12 Nada' ren re' setipllo wtipra'll lwelljllo wxenra'll-llo Jesucriston'.

¹³Be'nn bi'che, lle'nra' nnézere da zan ras ba gokra'lla' yedwia' re', na' bi nna gak yeda'. Lle'nra' yeda' yedyena' xchin Diosen' gan' zore na', nench chanre chejle're ke Jesucristo kan' ba jena' yezikre yell ka' gan' ba bya'a. ¹⁴Da llaya'l gona' we'rena' yeolol be'nne di'll ke Romanos 1 264

Jesucriston' be'nn lla'a lyell, be'nn lla'a yi'xe, be'nn llejnie', na' be'nn bi llejnie'. ¹⁵Ke len na' lle'nra' kwis we'rena' re' zjalla'a Roman' xti'll Diosen' kan' ba jea'n do ga yobre.

Di'll Wen ke Criston' nsa'n yel wak ke Dios

16 Bi lliye'ra' dan' lloa'a Di'll Wen ke Jesucriston', le len na' nsa'n yel wak ke Dios nench yerá yeolol be'nn llejle', la'kze be'nn Israel, na' be'nn bi nak be'nn Israel. ¹⁷Na' Di'll Wen ke Jesucriston' llzejnie'n lli'o, cha' be'nn llonlira'lle Jesucriston', Dios na' gone' leake' be'nn wen, billre bi de da gonllo gakllo be'nn wen rawe'n. Kan' nyoj xti'll Diosen' nen: "Be'nnen' llonlira'll Diosen', nake' be'nn wen rawe', na' ga't yel nban ke'e."

Do'l da de ke be'nnach

¹⁸Diosen' zoe' yebán' ba broe're' be'nnachen', ke chnaren' sa'kzi' veolol be'nne bi llonlira'll Le'e. be'nn llon da xhinnj. Na' dan' llon ake' da xhinnjen', bi lle'n akre' gombia' ake' di'll li ke Diosen'. 19 Da llaya'l nnez akre' ke Diosen', ba nnez aksre'n, le Dios na'kzen' ba broe're'n leake'. ²⁰La'kze bi llre'llo Diosen', llre'llo kan' zoe' llnebie', na' nnézello de yel wak ke'e kan' bene' bxie' yellrio ni, na' yeolol be'nnach llre'e akre' da ka' ba bene' na'. Len na' bibi de wde' akre', ne ake' bi nnez akre' cha' zo Dios. 21 La'kze nnez akre' zo Diosen', bi llonlira'll ake' Le'e, ni ke lloe' akze' Le'e yel llioxken. Bibi za'k xhbab ke ake'n. na' nchol yichira'llda'o ake'. ²²Ne ake' nak ake' be'nn si'n, na' gok ake'

ka be'nn bi llejnie'. ²³Ba bkwas ake' Diosen' ka'le, la'kze nake' le zerawe be'nn za'ke, na' zoe' zejlikane. Na' ba llonlira'll ake' no lwa'a ke be'nnach be'nn llde ke, be'nn llon ake' roraz Dios, na' no lwa'a lsa'ke ba zo xire, no ba zo tap nia'na'a, na' no ba nxhob le'e.

²⁴Ke len na' bsanra'll Diosen' leake', dan' llon ake' da xhinnjen', na' kon kan' nen lo ra'llda'o ake' na', na' bale' llon ake' da llawé xpe'r ake' ren lwellj ake' da nak zdo'.
²⁵Brej yichj ake' di'll li ke Diosen', na' llonlira'll ake' da wenra'llre. Llonlira'll ake' ke da ka' ben Diosen', na' bi llejle' ake' ke Dios be'nnen' llaya'l gonlira'll-llo, gonllo xhen ke chnare. Ka'n gakchga.

²⁶Ke len na' Diosen' brej yichje' leake' dan' llon ake' da yel zdo', kon ka nen lo yichjra'llda'o ake'. Rente bal no'r ka' llon ake' da ke llaya'l gon no're, na' llko'yele lwellj ake' nench na' llonrén ake' leake' txhen, llon ake' da bi llaya'l gon ake'. ²⁷Na' ni't be'nn byio be'nn bi lle'n akre' sorén ake' no're, llawé akre' lwellj be'nn byio ake, na' darén lwellj byio ake', llon ake' da nak zdo'. Na' dan' ba blleyi' kwerp ke ake' na', naken da llaya'l sa'kzi' ake' yel wen da xhinnj ke ake' na'.

²⁸Ba brej yichj Diosen' be'nn ka' bi lle'ne wzoa xti'lle'n, na'llen' nna ni't aklle' llon ake' da ke llaya'l gon ake', kone xhbab da nak ke nxhia ke ake' na'. ²⁹Llon ake' yeolol da xhinnje, be'nn byio darén ake' no'r bi nak no'r ke ake', na' no're darén ake' be'nn byio bi nak be'nn ke ake', nak ake' be'nn xhe'e, be'nn wen da xhinnj, zera'll ake' da de

265 Romanos 1, 2

ke be'nne, nak ake' be'nn wen xhia, be'nn wachach llwie lwellje', dil ake', ziye'e ake', nak ake' be'nn bi llzenay. 30 Llasnné llaschach ake' ke be'nne, llkwas ake' Diosen' ka'le, bibi bara'nn llap ake' be'nne. Llavoe'rao kwin ake' ll-lan ake' da wen, llarjla'll ake' gon ake' bi da xhinnj, bi llzenay ake' ke xaxhna' ake'. ³¹Bi llejnie' akre', da ba bne ake' gon ake' bi llon ake'n, nono llayombia' akre', bi llazi'xhen ake' ke be'nne, na' bi llaya'chra'll ake' be'nne. 32 Ba nnez aktere' kan' ba bne Diosen' gone' yellayrao be'nn ka'. Na' la'kze nnez akre' kan' ne'e na', nao akse' llon ake' da xhinnjen', na' llawé akre' kat ba nao be'nn vobre llon ake' kan' llon leake' na'.

Diosen' zeje' lixhej llonne' da sa'kzi'llo

Re len na' DIDI GO noteze nako' rwe' be'nnach, cha' ll-lliayi'llo' be'nn yobre, le katen' ll-lliayi'llo' be'nn yobre, lllliayi'llkze kwino', le toz ka llonkzo', ka llon leake! na!. ²Nnézkzello Dios na', gone' da sa'kzi'llo, ni ke da xhinnjen' llonllo, ka da ka' ba bnia' na', na' zejkze lixhej kan' gone' na'. ³¿Na' llakro' cha' bibi gonn Diosen' da sa'kzi'o cha' ll-lliayi'llo' be'nne, na' naote'o llono' kan' llon ake'n na'? Bi llaya'l gakro' wara'o rao yel llza'kzi' ke Diosen', ka nak da ka' llono' na'. 4¿Bi llakbe'ro' Diosen' nake' be'nn cha'o, na' be'nn xhenra'lle la'kze napllo do'le? Diosen' llone' ka' nench gakbe'ro' da xhinnjen' llono', na' yeyatro'. ⁵Rwe' nako' be'nn zid kwis, bi llayatro' da xhinni ka' llono'n, na'

llonllo' bi'ch da xhinnj ko'on nench waslli'oll Diosen' da wsa'kzie' rwe' kate llin lla wchoybie' ke be'nnach. Kana' wroe'n zejkze' lixhej kan' wchoye' sa'kzi' toto be'nn ren yeolol da ben ake'. 6Kana'n gone' ke totollo kon ka ben totollo. ⁷We'e yel nban zejlikane ke be'nn ka' gon da wen la'kze biteze yellayrao ake', be'nn ka' llayirjla'lle akre gon ake' nench yedo'l akre' gan' llia Dios ke chnare, na' nench yeyazra'll Diosen' kan' gon ake' na', na' nench gone' leake' be'nn za'ke. 8Na' gaklle'e we'e yel llza'kzi' ke be'nn ka' llon kon da nen ke ake', na' bi llejle' ake' di'll li ke Diosen', llon ake' kan' ne da xhinnien'. ⁹Yeolol be'nnach llon da xhinni sa'kzi' ake' yellayrao ake', zga'tek be'nn Israel ka' yellayrao, na'tellre noteze be'nn bi nak be'nn Israel. 10 Zan be'nn ka' llon da wen. we'e Diosen' leake' yel banez ke ake', na' yel bara'nne, na' gone' so ake' wen. Zga'tek be'nn Israel ka', na'tell vezikre nollre be'nne.

¹¹Diosen' bi llale'e ke ke be'nne. ¹²Be'nn ka' bi nombia' ley dan' bzoj da Moisésen', na' llon ake' da xhinni, Dios na' gone' da kweyi' ake' la'kze bi nombia' ake' ley na', wchoybie' ke ake' le nnez akre' llon ake' da xhinni na'. Na' be'nn ka' nombia' akse' leyen', na' llon ake' da xhinni, Diosen' wchoybie' ke ake' kon ka ne ley na'. ¹³Kere dan' yénzello ley na', gaktello be'nn wen rao Dios, llaya'l gonllo kan' nen na', na'llen' gakllo be'nn wen rawe'n. ¹⁴Be'nn bi nake be'nn Israel, bi nombia' ake' ley dan' bzoj da Moisésen'. La'kze bi nombia' ake' leyen', kon lo ra'llda'o ake'

Romanos 2, 3 266

na', llwia ake', na' llon ake' da wen na', na'llen' naksen ka to ley ke ake'. ¹⁵Nnezjekze lo ra'llda'o ake'n llaya'l gon ake' ka dan' nllia leyen' bia'a gon ake' na', le llon ake' ra't wejen'. Na'llen' nneze yichjra'llda'o ake'n dan' llon ake'n, cha' naken wen o cha' naken da xhinnj. ¹⁶Kan' gak kate llin lla gon Diosen' rao na'a Jesucriston', choyrawe' ke bi da ba ben totollo la'kze da nga'che, cha' da wen o cha' da xhinnj. Kan' nia' katen' llyixjwe'ra' Di'll Wen ke Jesucriston'.

Be'nn Israel ka' bi llon ake' kan' ne ley na'

¹⁷Rwe' ne'o nako' be'nn Israel. cheke llakro' zo'o wen rao Dios, na' nxenra'llo' dan' nombia'o ley na', na' llonxhen kwino' rao Dios. 18 Na' nombia'o akren' llazra'll Diosen'. na' llakbe'ro' bin' nak da wen, na' bin' nak da xhinni. 19 Na' llakro' za'kro' ko' nez be'nn ka' bi nombia' xti'll Diosen', na' ko' beni' lo yichira'llda'o be'nn bi nombia' Dios. ²⁰Na' llakro' wak wzejnie'ro' be'nn bi llejnie', na' llakro' wak wroe' wsedro' be'nn kobe xti'll Diosen'. le ne'o nombia'o di'll li ke'en, dan' nsa'a doxhen dan' llaya'l nneze be'nne. 21 Rwe' llroe' llsedro' be'nn yobre, ¿bixchen bi llroe' llsedre kwino'? Rwe' ne'o bi llava'l kwanllo. ¿bixchen llbano' rwe'? 22 Rwe' ne'o nono gak tarén xho'r be'nne o xhyio be'nne, ¿bixchen llono' rwe' ka'? Rwe' llwiero' lwa'a da llonlira'll be'nne, ¿bixchen lljalano' gan' nkwa'a aken na'? ²³Llonxhen kwino' kwis dan' llsedo' leyen', na' lltitjro' Diosen' le bi llono' kan' nen

na'. ²⁴Ke len na' nyoj xti'll Diosen' nen: "Ni ke re'n nnechach ake' ke Diosen', be'nn ka' bi nak be'nn Israel."

²⁵Cha' llonllo kan' ne ley na', za'ksen dan' ba bzollo sen dan' nzi'i circuncisión le' kwerp kellon', dan' zeje di'll, lli'o be'nn Israel nakllo yell ke Diosen'. Na' cha' bi llonllo kan' ne leyen', bibi za'ken dan' ba bzollo sen na'. ²⁶Na' cha' be'nn la'kze bi nna soe' sen na', na' llone' kan' ne ley ke Dios na', nakse' txhen ren be'nn ka' zo sen na'. ²⁷Na' be'nn ka' llon kan' ne lev na', la'kze bi zo ake' sen dan' nzi'i circuncisión na', leake' wroe' akre' de do'l keré, le nere nzedre leven'. na' bi llonre kan' nen na'. ²⁸Kere nello nakllo dogarj be'nn Israel dan' naollo ka dan' nao leake' na', na' dan' zollo sen to ko'llre kwerp kellon'. ²⁹Gakllo dogarje be'nn Israel cha' llonlira'll-llo Diosen' do vichi do ra'll-llo. Na' dan' ne ake' zo ake' sen na', lli'o ba nakllo ka to be'nn zo sen lo yichjra'llda'o. Na' ka nak da ni, kere le' yichen' llzejnie'n lli'o gonllo da ni, Spíritu na'kzen' ba yo'n lo yichjra'llda'ollo llzejnie'n lli'o. Na' be'nnen' llon ki, llayazra'll Diosen' le'e, la'kze be'nnach yobre bi llayazra'lle' kan' llone'.

¿Bixha da wen llga'nn ke lli'o be'nn Israel, gorjllo rao dialla ke xozxta'ollo ka'? ¿Bixha da wen bga'nn dan' bzollo sen dan' nzi'i circuncisión? Da xhen da bga'nne. Le Dios na' be'e da xozxta'ollo ka' xti'lle' dan' nyoj ke yeolol be'nnach. Àkxha gak chet ka' bal be'nne bill gak ake' be'nn li ren Diosen'? ¿Len gonen bill gak Diosen' be'nn

267 Romanos 3

li? ⁴Ka'a, bi gone' ka'. Gonkze' kan' ne'e na', le yo'y ras ne Diosen' di'll li, la'kze cha' llin lla kate yeolol be'nne we'e ake' di'll wenra'lle. Ganni llak kan' nyoj xti'll Diosen' nen:

Rwe' wroe'ro' be'nnach lloe'o di'll li katen' nne'o. Na' ka nak be'nn ka', llak akre' bi llono' kan' ne'o na', wllin lla wayakbe'e akre' llonkzo' kan' ne'on.

⁵Na' cha' kate llonllo da xhinnj llroe'n ka be'nn wen nak Diosen', ¿bixha nnello? ¿Nnello Diosen' nake' be'nn wen da xhinnj dan' llonne' yel llza'kzi' kello kate llonllo da xhinnjen'? (Llnia' kan' ne to be'nnach.) ⁶Bi naken ka', chenak naken ka', ker wak gon Diosen' yel koxchis kellon' chet ka'.

⁷Na' cha' di'll wenra'll dan' nia' na', wakrenen nench na' da li ke Diosen' gakllen xhen, ¿bixchen ll-lliayi'll ake' nada' ka to be'nn wen da xhinnj? ⁸Na' chet ka' naken ka', ¿bixchen bi gonllo da xhinnj nench na' gak da wen? Na' kin' ne bal be'nn ake, nench bi wkwa'nn ake' neto' wen, ne ake' ka'n dato' llroe'to' be'nne. Na' ka nak be'nn ki llaya'l yellayrao ake', ni ke dan' ne ake' ka'.

Yeololtello de do'l kello rao Diosen'

⁹¿Akxha cha'? ¿Naklle lli'o be'nn Israel be'nn wenlle ka nollre be'nne? Ka'a, bi nakllo ka'. Le ba bre'llo toz ka nakllo lli'o be'nn Israel ren noteze be'nne, le yeololtello nonllo da xhinnj. ¹⁰Le xti'll Diosen' nyojen nen: Ni to nono zo be'nn zeje llone' da li. ¹¹ Notno llra' be'nn llejnie' gone' kan' ne xti'lle' na', notno llaviri Diosen'.

¹² Yeololte be'nnach nao ake' nez xhinnj, yeolole' ba nbeyi' ake'.

Ni to nono llra' be'nn llon da wen.

¹³ Ka to ba ke be'nn wat, da la' zban da bi neyj kwasro, ka nak yellj yen ake'n, xti'll ake'n llxoayayen be'nne, na' di'llen' lloe' ake'n naken ka yerb ke bel znia.

 14 Zre di'll yel ya' lla'a lloa' ake'n.
 15 Bi gaze llde'e akre', na' le llyob aktere' llot ake' no be'nne.

16 Gateze zjake' nsa'a ake' yel ya'ch yel zi' kan' llon ake' na'.

¹⁷ Bi lloe' ake' latj ke lwellj ake' so ake' nbaraz.

¹⁸ Na' bibi yel lleb ke Diosen' nombia' ake'.

19 Nnézkzello yeolol lli'o nombia'llo leyen', ke lli'o ya'nnen' nen ka' nench bibi de nnello, na' renkze yeolol be'nn lla'a doxhen yellrio, nak ake' be'nn wen da xhinnj rao Dios, na' dekz de ga't yel llza'kzi' ke ake'. ²⁰Le ke nak Diosen' bi yeke'e xto'l be'nn ka' ka'le, la'kze nne be'nnen' bene' kan' ne ley na', le ke nake leyen' naken to da llyixjwe'n lli'o nakllo be'nn wen da xhinni.

Yel wasran' za'n ni ke dan' wxenra'll-llo Xanllon'

²¹Na' nna' ba broe' Diosen' kan' llaya'l gonllo, nench yeke'e do'l kello, na' billbi llzoa leyen' bi da ka' llaya'l gonllo. Kwinkze ley na' Romanos 3, 4 268

llzejnie'n lli'o wllin lla gon Diosen' ka', leska' ne dan' bzoj be'nn ka' be'e xti'lle'n kana'. ²²Ne Diosen' llava'l wxenra'll-llo Jesucriston' nench yega'a bi do'l xhoa ko'll-llo. Naksen ke yeolol be'nne, le tozen' naksllo rawe'n. ²³Le veololtellon' ba benllo da xhinnje, na' ba nbi'yllo rao yel wasrá ke Diosen'. ²⁴Na' nllie' Diosen' lli'o, na' kere bi chixhilloe'n yeke'e do'l kellon', le Xanllo Jesucriston' ba bnitrawe' bi da xhinni ka' benllo. ²⁵Dios na' bse'le' Jesucriston' bzane' kwine' brarj xchene', ni ke lli'o be'nnach. Na' noteze be'nne gonlira'll ake' Le'e, wnitrawe' da xhinni ke ake'n. Diosen' bse'le' Le'e nench zeje lixhei dan' bdape' yel llxhenra'll, bazi'xhene' ke da xhinni benllo kana! ²⁶Leska! bse!le! Le!e nench broe're' zeje lixhej dan' llake'e do'l ke yeolol lli'o ba llonlira'll-llo Jesúsen'.

²⁷Bi llaya'l wayoe'rao kwinllo nnello nakllo be'nn wen. iYelloj dan' ka'le! ¿Bixchen? Le kere nello nakllo be'nn wen na', ni ke dan' benllo ka ne ley na', zan ni ke dan' bxenra'll-llo Jesucristo na'n. ²⁸Na' llayonllo xhbab, Diosen' llake'e do'l ke be'nnach dan' llxenra'lle' na', na' kere dan' llone' kan' ne ley na'.

²⁹¿Llákere cha' nak Diosen' toze Dios ke be'nn Israel ka'zen'? ¿Kere nakse Dios ke be'nn bi nak be'nn Israel? Da li nakse' Dios ke be'nn ka' bi nak be'nn Israel. ³⁰Le toze Diosen' zo, na' Le'en llake'e do'l ke yeolol-llo, kon cha' llonlira'llllo Jesucristo na', le toze ka'n llónkzere' lli'o, zo sen dan' nzi'i circuncisión, na' ren be'nn bi zo sen. ³¹¿Llákere cha' llonllo leyen' ka to da bibi za'ken dan' llonlira'll-llo Jesucriston'? Ka'a bi llonllon ka', zan llroe'llo naken da za'ke.

Kan' bxenra'll da Abraham na'

Xozxta'ollo da Abraham na', ¿bixhan' bado'le'? ²Chenak Abraham na' bne Diosen' ke'e. nake' be'nn wen ni ke dan' bene' na', za'ken wayoe'rao kwine', zan bibi de da gak wayoe'rao kwine' rao Diosen'. ³Le kin' ne xti'll Diosen' dan' nvoien: "Abraham na' benlira'lle' Dios, na'llen' bne Diosen' ke'e, nake' be'nn wen rawe'." 4Kat to be'nne llone' llin, llone' gan raxhie', na' xan llin na' bi llone' le'e okré kat lloe' raxhie' na', le da llaya'lkze si'i be'nn wen llin ke'e na'. ⁵Na' to okrén' llon Diosen' ne'e, cha' lli'o llonlira'll-lloe', nakllo be'nn wen la'kze bibi benllo da gak wayoe'rao kwinllo. Le Dios na'n llnitrawe' da xhinnj kellon' cha' nxenra'll-lloe'. ⁶Leska' bne Daviden'. nbaraz naken ke be'nn ka' llnitrao Diosen' da xhinni ke ake'n, na' bibi llwie' cha' bi da ba ben be'nne. ⁷Daviden! bne!e:

> Nbaraz ke be'nn ka' ba bazi'xhen Diosen' ke ake', bi da xhinnj ba ben ake'.

Nbaraz zo ake' cha' ba bnitrawe' do'l ke ake'.

⁸ Nbaraz ke be'nn ka', bibi do'l llxoa Diosen' ko'll ake'.

⁹ ¿Llákere cha' be'nn ka' zo sen da nzi'i circuncisión na'zen', gak so ake' nbaraz kan' bne'e na'? Kere leakze'n, renkze be'nn ka' bi zo sen na', gak so ake' nbaraz, le ba bnello Dios na', bazenia'ne'e da Abraham 269 Romanos 4

na', ni ke dan' bxenra'lle' Le'e na'. ¹⁰Bne'e ke da Abraham na', nake' be'nn wen, kan' bi nna soe' sen dan' nzi'i circuncisión na'; kere bayollre bzoe' sen na' bne'e ka'. 11 Na' bde bxenra'lle' Dios na' bzoe' sen na', na' zeje di'll bnitrao Diosen' da xhinnj ke'en, dan' ba nxenra'lle' Dios na'. Na'llen' gok Abraham na', xozxta'o yeolol be'nne llonlira'll Dios nench nnitrao da xhinni ke ake'n, la'kze bi nna so ake' sen na'. 12 Leska' nake' xozxta'o be'nn ka' zo sen dan' nzi'i circuncisión, kere dan' zo ake' sen na', zan ni ke dan' llonlira'll ake' Diosen', kan' benlira'll da Abraham na' Le'e, kan' bi nna soe' sen dan' nzi'i circuncisión na'.

Diosen' bene' wen ke da Abraham na' dan' bxenra'lle' Le'e

¹³Diosen' golle' da Abraham na', gak wen ke ake' ren be'nn za garje' rao dialla ke'e, gak ke ake' doxhen yellrion'. Ka'n bcheb Diosen' gone' ke da Abraham na', le bxenra'lle' Le'e. Na'llen' bne Diosen' nake' be'nn wen, kere dan' bene' kan' ne ley na'n. 14 Cha' Dios na' nne'e kon be'nne gon doxhen kan' ne ley na', gakte ke ake' yellrio ni, bibi zejen gonlira'll-llo Diosen' chenake, na' bibi zejen dan' bne'e gone' wen ke be'nne za garje' rao dialla ke da Abraham na'. 15 Leyen' nsa'n yel llza'kzi' ke be'nnach, le bi llon ake' kan' nen na'. Cha' bibi leyen' de, dan' ne bin' llaya'l gon lli'o be'nnach, bibi do'l kello ga'te. 16 Kan' naken, noteze be'nne llonlira'lle Diosen', none' leake' ka xhi'nn dialla ke da Abraham na', na' Diosen' gone' nench leake'

gak wen ke ake' kan' bchebe' ke da Abraham na'. Na' kere be'nn nombia' ley na'ze, gon Diosen' wen ke ake'. Da likzen' gon Diosen' wen ke noteze be'nne gonlira'll Le'e, kan' benlira'll da Abraham na' Le'e. Ka'n gone' nench wroe'n to okrén' llone' ke be'nne llonlira'll Le'e. ¹⁷ Na' llak kan' golle' da Abraham na', bne'e: "Ba nzoa' rwe' gako' xozxta'o be'nn lla'a yell zan." Diosen' be'nnen' benlira'll da Abraham na', nape' yel wak nench yesbane' be'nn wat, na' llak llone' da bi nna gak.

¹⁸Abraham na' bi bnnezre' akre gak kan' bne Diosen' gak, kon bzoe' byejle' ke Diosen', na' bzoe' rez gon Diosen' nni't be'nn zan xhi'nn dialla ke'e. Kon kan' goll Diosen' le'e: "Cha'chga xhi'nn dialla'o." ¹⁹Bzokze' byejle' kan' goll Diosen' le'e na', la'kze ba nake' be'nn gor kwis kere wakll so xhi'nne', le ye ra'tze gone' to gayoa (100) iz, na' no'r ke'e, Sara na', nake' be'nn will. ²⁰Bzoteze bzoe' bxenra'lle' Dios, na' bi gokganre' kan' goll Diosen' le'e na', bzechichkze' bxenra'lle' Dios be'rawe' Le'e. 21 Abraham na' byejle'ya'nne' kwis nap Diosen' yel wak nench gone' kan' golle' le'e na'. ²²Ke len na' bne Diosen' ke'e, nake' be'nn wen dan' benlira'lle' Le'e na'.

²³Na' dan' nyojen nen, Diosen' bne'e nake' be'nn wen dan' benlira'lle' Le'e na', kere ke Abraham na'zen' nyojen ka'. ²⁴Leze ka'kzen' nyojen ke yeolol-llo, le leska' nen ke lli'o nakllo be'nn wen rawe'n dan' nxenra'll-llo Dios, be'nnen' basbán Xanllo Jesúsen' radj be'nn wat. ²⁵Le'e bzane' kwine' bet ake' Le'e nench wnitrao Diosen' Romanos 4, 5 270

do'l kello, na' babane' radj be'nn wat nench gakllo be'nn wen rao Diosen'.

Nbaraz zollo rao Diosen' nxenra'll-llo Criston'

Ka nak lli'o, dan' ba nxenra'llllo Jesucriston', ba bne Diosen' nakllo be'nn wen, ke len na' ba zollo nbaraz rawe'n. ²Dan' nxenra'll-llo Jesucristo na', zokze Diosen' nllie're' lli'o, na' llawello ba nnézello lljazollo nbaraz kan' zo Le'e na', kat yellinllo gan' llie' na'. ³Na' kere ke lezen na'. leska' llawello kat za'kzi'llo, le nnézello cha' za'kzi'llo, llonen nench zello war, na' da ni llonen nench llakxhenra'll-llo, 4Na' cha' llonxhenra'll-llo kat bi da ll-llayraollo, nakbie'kze zello nxenra'll-llo Diosen'. Na' cha' zello llonlira'll-lloe' na', gonllo rez yellinllo gan' llie' na'. ⁵Na' dan' llonllo rez yellinllo gan' llia Diosen', bi nnello naken da wenra'lle. Le ba baslla'a Diosen' lo ra'llda'ollon' kon ren yel nllie' ke'en, dan' ba bene' zorén Spíritu ke'en lli'o.

⁶Lli'o nakllo be'nn wen da xhinnj, na' bibi llak gonllo nench yesrá kwinllo rao Diosen', zan ka bllin lla bse'l Diosen' Criston', na' be'e latj gote' ni ke lli'o nap do'le. ⁷Gaga zo be'nne we'e latj got ake' le'e roraz be'nn yobre, la'kze cha' naken roraz be'nn llon da lixheje, o cha' wllojriz be'nn yeyaxhjre' we'e yel nban ke'en got ake' le'e roraz be'nn yobre nak be'nn wen. ⁸Diosen' broe're' nllie're' lli'o, na'llen' bse'le' Criston' gote' ni ke lli'o, la'kze zollo llonllo da xhinnj. ⁹Na' dan' brarj xchen

Criston' ni ke lli'o, Diosen' ne'e nakllo be'nn wen dan' nxenra'll-lloe' na'. Ke len na' gon Criston' bi sa'kzi'llo kat llin lla wchoybia' Diosen' ke yeololte be'nne. ¹⁰Na' lli'o la'kze benllo ka to be'nn llwie Dios na', ba bazoe' lli'o nbaraz, ni ke dan' bzane Xhi'nne' Criston' gote' ni ke lli'o. Na' nna' ba bazorenlloe' wen na', na' llakbe'llo zokze Criston' wasre'e lli'o. ¹¹Na' kere da nizen', lekze ka' llawello nombia'llo Diosen' ni ke Jesucriston', le ke nak Cristo na', bene' bazorenllo Diosen' wen na'.

Adán ren Criston'

¹²Ni ke dan' bi bzenav be'nn nellen' golle Adán na', bxhe da xhinnjen' yellrio ni, na' len nsa'n yel got. Kan' gok, bzorao llat yeolol be'nnach, le yeolole'n llon ake' da xhinnj. ¹³Be'nnachen' bzorao ake' llon ake' da xhinni kan' bzo da Adán na'te, la'kze bi nna ga't ley dan' bzoj da Moisésen'. Na' gan' bibi leyen' de, nono llon xhbab, cha' llon ake' da xhinnj. 14 Kan' bzoraon ke da Adán na'te ren be'nn ka' blla'rene', bllinte kan' bzo da Moisés na', yeololte' wasa'te' la'kze leake' bi ben ake' da xhinni ka da xhinnjen' ben da Adán na'. Adán na' wsa'krébelloe' ka be'nnen' ye to za ved.

¹⁵Da xhinnjen' ben da Adán na', bi yedilen ke da wen ke Diosen'. Na' ni ke da xhinnjen' ben toze Adán na', be'nn zan got. Zan da xhenll nak yel okré ke Diosen', na' be'nn zanll yerá ni ke dan' ben toze be'nn bllie' lli'o, Le'en Jesucriston'. ¹⁶Na' da xhinnj ke to be'nnach bi gak

271 Romanos 5, 6

wsa'krébellon ka da wen ke Diosen', le ke nake xto'l to be'nnachen', bga'nnen za'kzi' yeolol be'nnach, zan ke nake da nbaraz ke Diosen', veolol lli'o be'nnach bayone' lli'o be'nn wen, la'kze da zan da xhinnj ba benllo. ¹⁷Na' chet ka' vel goten' bnebia'n ni ke da xhinnjen' ben toze be'nnach, ka'n llaya'l chejnie'llo katken' ben Diosen' bllie're' lli'o, bibi bxha'kellon' bayone' lli'o be'nn wen ren Le'e, na' ka' nnebia'renlloe' rao yel nban koben', dan' benne' kello, ka nak bse'le' Xhi'nne' Jesucriston' ni ke lli'o.

¹⁸Kan' nak dan' ben toze Adán na' da xhinnjen', na' wchoybia' Diosen' sa'kzi' yeolol be'nnachen'. Na' ni ke da wen dan' badyén toze Jesucriston', ke len na' llnitrawe' da xhinnj ke noteze ba llonlira'll Le'e, nench ga't yel nban zejlikane ke ake'. ¹⁹Le da xhinnjen' ben Adán na', kan' bdichje' xti'll Diosen', kana'n bxhe da xhinnjen' dan' llon yeolol lli'o be'nnach. Na' dan' bzoa Jesucriston' xti'll Diosen', len na' bene'n nench bnitrao da xhinnj ke be'nnach.

²⁰Kan' be'e Diosen' ley ke'en dan' bzoj da Moisésen' kana', blli'oll da xhinnj da ben be'nnach, le bi ben ake' kan' nen na'. Na' la'kze blli'o da xhinnjen', ka'kze blli'oll yel nllie' ke Diosen'. ²¹Na' ka'kzen' bnebia' da xhinnjen' dan' nsa'a yel goten', leska' ka'kzen' de yel nllie' ke Diosen' llnebia'n nench na' yesrán lli'o rao biteze do'l kello de, na' gonne' yel nban zejlikane kello, dan' ba nxenra'll-llo Xanllo Jesucristo na'.

Bill we'llo latj nnebia' da xhinnjen' lli'o

¿Bixha llaya'l gonllo nna', le ba nnézello nllie! Diosen! lli'o? ¿Wnaoll-llo gonllo da xhinnjen!, na' yezi'xhenlle' kello? ²Kere ka'n gonllo. Kan' bzorao llonlira'll-llo Cristo na', bill bnebia' da xhinnjen' lli'o. ¿Bixchen le da leze lle'nello sollo gonllo da xhinnjen'? ³¿Bi nnézere kan' zejen dan' blloallo nis? Zeje di'll nakllo txhen Xanllo Jesucristo be'nnen' got ni kello. ⁴Na' dan' blloallo nis na', nnello bga'chllo kan' bkwa'ch ake' Cristo na'. Na' kon kan' basbán Xallo Diosen' Le'e radi be'nn wat ka' kone yel wak xhen ke'e na', ka'n bene' ke lli'o, bache'e yichira'llda'ollon' nench so kwezllo gonllo da wen.

⁵Le kan' gokllo txhen ren Criston' kan' gote'n, ka'kzen' gaklloe' txhen ka naken babane'n. ⁶Ba nnézello kan' gokllo txhen ren Criston' kan' bde'e le' yay cruzen', leska' yichjra'llda'o lli'o bda'renen Le'e le' yay cruzen' nench bill gonllo da xhinnj, na' bill nnebia' da xhinnjen' lli'o. ⁷Le ke llak ke to be'nn wat. bill nnebia'll da xhinnien' le'e. ⁸Le cha' nakllo txhen ren Criston' ka naken gote'n, nnézello leska' sorenlloe' txhen ke chnare. ⁹Le nnézkzello Criston' babane' radi be'nn wat ka', na' bill gate' da yobre, bill gak nnebia' yel goten' Le'e. ¹⁰Na' kan' got Criston', tozen' gote', ni ke xto'l yeolol be'nne. Na' nna' nbane' nakrene' Diosen' txhen. ¹¹Na' ka' re', legón kwinre ka to be'nn wat rao da xhinnjen', nench na' bill sore gonren, na' banchga re' Romanos 6, 7 272

gonre kan' lle'ne Diosen', na' gakre toze ren Xanllo Jesucriston'.

¹²Ke len na' bi we'llo latj nnebia' da xhinnjen' xpe'rllon', le naken da kweyi', na' gonchekllo da xhinnjen' zera'llen na'. ¹³Bi llaya'l gon nia'na'llon' rao na'a daxi'on nench gonrenen leaken llin gak da xhinnj. Llaya'l gonllo kwinllo rao na'a Diosen', na' gonllo da wen na' lle'ne Diosen', gonllo ka to be'nn nban radj be'nn wat ake. ¹⁴Batna' ka nna zerenllo ley dan' bzoj da Moisésen', bnebia' da xhinnjen' yichjra'llda'ollon'. Zan nna' bill gak nnebia' da xhinnjen' lli'o le ba zerenllo yel okré ke Diosen'.

Be'nnen' llon da xhinnjen' nake' ka be'nn zo xan

¹⁵¿Akxhan' gonllo nna' cha'? Ke nak bill llnebia' leyen' lli'o, na' ba zerenllo vel okré ke Dios, ¿wakse gonll-llo da xhinnjen' chet ka'? iKa'a bill gak! 16 Nnézello cha' ba llzenayllo ke to be'nne llonllo biteze da ne'e, lloe'llo lati llnebie' lli'o. Kan' naksen ke lli'o cha' lloe'llo lati nnebia' da xhinnjen' lli'on, na' nnézello da xhinnjen' nsa'n yel got; zan cha' zollo llzenayllo ke Diosen', na'llen' zejkzllo llonllo da wen kan' lle'nre' na'. ¹⁷Na' nna' llioxken Dios, la'kze batna' bzenayre ke da xhinnjen', na' nna' ba bayakre rallna'a Dios, ba llzenayre do yichj do ra'llre xti'lle'n. 18 Dios na' ba babeje' re' rao da xhinnjen', na' ba nakre be'nn ke'e nench sore gonre da wen. 19 Ba bzeinie'ra' re', bia'a di'll ke bi da llak ke lli'o be'nnach nench na' chejnie're. Na'llen' llepa' re', kan' bzore bentezre da nak zdo'

ren xpe'r-re, na' benre da xhinnj kwis, ka'n llaya'l gon kwinre nna' rao na'a Dios, na' gonre da wen nench na' chazra'll Diosen' kan' llonre na'.

²⁰Kan' nna llnebia' da xhinnjen' re', bi benre da zej lixheje. ²¹ ¿Bixha banez bre're ka nak yeolol da ka' benre kana'? Na' nna' lliye're lljadinra'llren', na' llakzbánere kan' benre, le nnézere rao yel goten' lljwa'n re'. ²²Lli'o ba babej Diosen' xhnia' da xhinnjen', na' yo'llo rao ne'e na'. Len na' zejll llonllo da wen kan' lle'ne Diosen', na' gonne' lli'o yel nban zejlikane. ²³Le yel goten' gonllo gan cha' llonllo da xhinnjen', zan cha' lli'o nakllo txhen Xanllo Jesucriston', Diosen' da gonnze' yel nban zejlikane kello.

Ka to be'nn ba got nakllo rao ley ke da Moisésen'

Be'nn bi'che, da ni nia' re', le nombia'kzre ley dan' bzoj da Moisésen'. Na' nnézere kat de to da llia bia'a gon be'nnache, llaya'lkze' gone'n chak nbane'. ²Ka ke to no'r nchayna'a, kat nna nban xhyiwe', llaya'l sorene' le'e, kon kan' ne ley na' gone'. Na' cha' ba got xhyiwe'n, kana' ba bare'e rao ley dan' nllia bia'a sorene' be'nn ke'en. 3Cha' no'r na' sorene' be'nn byio yobre, na' nna nban xhyiwe'n, naken xhia ke'e ka ne ley na', na' nake' ka xtoe'. Zan cha' ba got be'nn ke'e na', billbi de gon leyen', na' wak yechayne'e ren ye to be'nn yobre, bi naken xhia ke'e.

⁴Be'nn bi'che, ka'n naken ke lli'o llonlira'll-llo Criston' ba bara'llo leyen', dan' be'e Criston' yel nban 273 Romanos 7

ke'en bet ake' Le'e le' yay cruzen'. Ke len na' ba nakllo Criston' txhen, be'nnen' babán radj be'nn wat ka', na' sollo gonllo kan' lle'ne Dios na'. ⁵Kana' nna zollo llonllo da xhinnj kon ka nen lo ra'llda'ollo. Na' kan' bnnézello kan' ne ley na', benll-llo da xhinnjen' ye ra'te, na' len benen nench sa'kzi'llo ke chnare chenake. ⁶Na' nna' ba nakllo ka be'nn ba got bill llnebia' leyen' lli'o, na' ba llonllo kan' lle'ne Diosen'; na' llonllon, kere dan' llebllo dan' ne ley na', zan llonllon dan' ba bakob Spíritu ke'en lo yichjra'llda'ollon'.

Da xhinnjen' yo' lo yichjra'llda'ollo

⁷¿Akxha nnello cha'? ¿Leven' nsa'n da xhinnj? Ka'a bi naken ka'. Le ley na'n bzejnie' nada' bi dan' bi llaya'l gona', na'llen' bayakbe'ra' llona' da xhinnj. Na'll bnnezra' bi naken wen na', sera'lla' bi da de ke be'nne, le lev na' nen: "Bi sera'llre biteze da de ke be'nne." ⁸Na' ka bnnezra' kan' ne leyen', da xhinnjen' byo'llen lo yichjra'llda'wa'n, bzera'lla' gonlla' ye ra'ten'. Da li kat bi nnézello kan' ne ley na', bi llakbe'llo cha' llonllo da xhinni. ⁹Batna' bzoa' nbaraz bi bembia' leyen'. Bixha ka bnnezra' ka nen na', babán da xhinnjen' ye ra't dan' yo' lo yichjra'llda'wa'n, na' yezikre bena' da xhinnjen' dan' blleyi' nada'. ¹⁰Na' bnnezra' ley dan' llaya'l gonn nada' yel nban na', bayollrenza'n rao yel gotre. 11 Le ke nak da xhinnjen' bxha'ken byazen le' ley na', na' bxoayayen nada', na' kone ley na'kze, bchoybia'n yellayrawa' ke chnare. ¹²Ley dan' bzoj da Moisésen' naksen ke Dios, na' toto

dan' nllian bia'a gonllo na', naksen da wen zejen lixheje. ¹³¿Akxha cha'? ¿Ley dan' nak da wen na'n lljwa'n nada' rao dan' sa'kzia'? ¡Ka'a, bi llonen ka'! Da xhinnjen' yo' lo yichjra'llda'ollo na'n, bi bennen latj gonllo kan' llaya'l gonllo, na' ke len na' blloy kellon' sa'kzi'llo ke bi da ka' ba benllon'. Na' kan' llon leyen' llroe'n lli'o llwie Diosen' da xhinnj ka' llonllo na'.

¹⁴Nnézkzello leyen' naken ke Spíritu ke Dios, na' naken da wen, bixha nada' yo' da xhinnjen' lo ra'llda'wa', na' nonen nada' ka to be'nn ba nda'o rao da xhinnjen', nench na' zoteze zoa' llona'n. 15 Bi lleinie'va'nnra' bin' llakra', bi za'kra' gona' da wen dan' lle'nra' gona'n, na' da xhinnjen' bi lle'nra' gona' na', leren llona', 16 Katen' llona' da xhinni dan' bi lle'nra' gona'n, llakra' kwis, na'll llayakbe'ra' nakse leyen' da wen. ¹⁷Le kere nada'n llona' ka', da xhinnjen' yo' yichjra'llda'wa' na'n, ll-lli'yen nada' llona' da xhinnjen'. 18 Nnézkzera' bi yo' da wen lo yichjra'llda'wa'. Le lle'nra' gona' da wen na', na' bi za'kra'. ¹⁹Bi llona' da wen dan' lle'nra' gona' na', llonlla' da xhinni dan' bi lle'nra' gona'. 20 Na' dan' llona' dan' bi lle'nra' gona'n, kere nada'n llona' ka', da xhinnjen' yo' yichjra'llda'wa' na'n, ll-lli'yen nada' nench llona' ka'.

²¹Kan' llak kia'n: katen' lle'nra' gona' da wen na', le llroe'raote da xhinnjen' yo' lo ra'llda'wa'n.
²²Llawé lo ra'llda'wa' gona' kan' ne ley ke Diosen'. ²³Na' llakbe'ra' yo' ye to da yo' lo ra'llda'wa' ll-llonen gona' da wen na', na' leren llnebia' nada' llona' da xhinnj.

Romanos 7, 8 274

²⁴ iNya'chrazen' llak kia'! ¿No gakrén nada' nench bill nnebia' da xhinnjen' kwerp kia'n, na' kweyi'n? ²⁵ iLlioxken Dios! Toze Le'e wak gone' wara'a rao da xhinnjen', ni ke dan' ben Xhi'nne' Jesucriston'. Na' kone ka' llejnie'ra' llaya'l wzenaya' ley ke Diosen', zan ka nak kwerp kia'n nna naksen ka to wen llin ke da xhinnj na'.

Spíritu ke Dios na'n llonn lli'o yel nban zejlikane

Na' nna pa nakho I-Jesucriston' txhen, billbi yel Na' nna' ba nakllo Xanllo llza'kzi' ga't kello nna', le ba llonllo txhen Spíritu ke Dios na', nench gonllo da wen, bill gonllo kan' ne da xhinnjen' dan' yo' lo ra'llda'ollo na'. ²Dan' nakllo Criston' txhen na'. Spíritu ke'en llonnen lli'o yel nban, na' ba babejen lli'o xhnia' da xhinnj dan' nsa'a yel got. ³Leyen' bzoj da Moisésen' bi bzoen yebejen lli'o rao da xhinnjen', le yo' da xhinnjen' lo ra'llda'ollon', na'llen' bibi bxha'ke leyen' gonen. Na'llen' bse'l Diosen' Xhi'nne' Jesucriston' gorje' yellrio ni, gokse' ka be'nnach. Na' Le'en bzane' kwine' ni ke lli'o, nench bill nnebia' da xhinnjen' lli'o dan' yo' lo ra'llda'ollo. 4Ka'n ben Diosen' bse'le' Le'e, nench gakllo gonllo ka nak da wen ka' nllia leyen' bia'a gonllo. Le bill llzenayllo ke da xhinnjen' yo' yichjra'llda'ollo na', zan ba zollo llonllo kon kan' nne Spíritu ke Dios na!.

⁵Le ka nak zo be'nn llon ake' da xhinnj yo' lo yichjra'llda'o ake' na', yo'teze yo' yichj ake' akre ka gon ake' da xhinnjen' llo'ra'll xpe'r ake' na'. Zan be'nnen' ba zerén Spíritu ke Diosen', yo' yichje' gone' kan' ne Spíritu ke Dios na'. ⁶Le cha' yo' yichjllo da xhinnjen' lle'ne xpe'rllon', nsa'n yel got kello. Na' cha' yo' yichjllo dan' llo'ra'll Spíritu ke Diosen', wa't yel nban kello ke chnare, na' sollo nbaraz. ⁷Le kate yo' yichjllo da xhinnjen' lle'ne xpe'rllon', Dios na'kzen' llwiello, na' ley ke'e na', bi llzenayllo, ni ke llakse wzenayllo ke. ⁸Na' be'nn ka' cha' zo ake' llon ake' da xhinnj kon kan' nen lo ra'llda'o ake' na', bi yeyazra'll Diosen' kan' llon ake' na'.

⁹Zan ka nak lli'o zo Spíritu ke Diosen' lo ra'llda'ollo, bill llonllo da xhinni dan' yo' lo ra'llda'ollon', na' zorenkze Spíritu ke Diosen' lli'o. Na' be'nn bi zo Spíritu ke Criston' lo ra'llda'we', kere da lin' nxenra'lle' Criston'. 10 Na' cha' ba zo Criston' yichira'llda'ollo, Diosen' ze ne'e ba nakllo be'nn wen, le Le'en lljazorenllo ke chnare, la'kze gat kwerp kellon' ni ke da xhinnjen' de yellrio ni. ¹¹Na' cha' lo yichjra'llda'ollon' zo Spíritu ke Diosen' be'nnen' basbán Xanllo Jesucriston' radj be'nn wat ka', leska' yesbane' kwerp kello dan' got na', ni ke Spíritu ke'e na', dan' zo lo ra'llda'ollon'.

¹²Kan' naken, bi'ch ak, llonen bien wzenayllo ke Spíritu ke Diosen'. Bi llaya'l wzenayllo ke da xhinnjen' de yellrio. ¹³Cha' sollo gonllo kon ka nen kello, na' gonllo da xhinnj na', len na' gonen nench sa'kzi'llo. Zan cha' gonllo kan' ne Spíritu ke Diosen', na' bi gonllo dan' zera'll xpe'rllo na', na'llen' de yel nban kello ke chnare.

¹⁴Le yeololte no be'nn nnawe' llone' dan' llzejnie' Spíritu ke 275 Romanos 8

Diosen', nak akse' xhi'nn Dios. ¹⁵Dios na' benne' lli'o Spíritu ke'en kan' gokre' lli'o ka xhi'nne'. Ke len na' bill llebllo Diosen' ka llebllo to be'nn znia kat llonllo xchine'. Ba llalwill-lloe' llelloe': "Xa". ¹⁶Na' Spíritu ke'e na'kze llalwillen lo ra'llda'ollo nench gakbe'llo nakllo xhi'nn Dios. ¹⁷Cha' nakllo xhi'nn Dios, kello nakse yeolol da ka' ba bchebe' gonne' lli'o, leska' txhen nakllo Criston' katen' we'e Diosen' Le'e dan' bchebe'n. Cha' wsanra'll kwinllo wsa'kzi' be'nn lli'o, ni ke Le'e, kan' bsa'kzi' ake' Le'e na', na' Diosen' gonne' lli'o yel bara'nn xhen, kan' be'e ke Criston'.

¹⁸Yellrio ni llde ya'ch llde zi'llo. Zan bi gak wsa'krebllon katek yel nbarazen' gonn Diosen' lli'o katen' lljazorenlloe' na'. ¹⁹Leska' yellrion', na' yeololte da ben Dios, llbexh aken katen' llin lla wroe' Diosen' yel banez xhen ke xhi'nne' ka'. ²⁰Le doxhen yellrion', na' da ka' lla'a rawen bxhinnjen; kere to wrazze yellrio na'n ben ka', Dios na'kzen' bchoybie' ke, gak ke kan' llak ke nna'. Na' ni'tllo bezllo wayone'n to da wenll. 21 Kana' bill kwevi' dan' de rao yellrion', ke len na' bexhen batxhan' llin lla yeyak lli'o nak xhi'nne' be'nn kobe be'nn za'ke. ²²Le nnézkzello bllinte nna' lla, ll-llavrao da ka' ben Diosen' ka ke to no'r be'nn llzo bda'o ke'e. ²³Na' kere leakzen na' ll-llayrao, renkze lli'on ll-llayraorenllo bell-llo. Lli'o ba benn Diosen' Spíritu ke'en nench na' nnézello wllin lla gak wen kello. Na' bell lo ra'llda'ollo. bexhllo baten' gon Diosen' sollo nbaraz nench wroe'n ba nzoe' lli'o

ka xhi'nne'. ²⁴Kan' basrá Diosen' lli'o, bzorao bezllo gak wen kello, len na' nna bezllo. Nono llra' be'nn nna beze gak da nnezre' ba gok. ²⁵Zan cha' bexhllo gak dan' bi nna re'llo na', llaya'l kwexhllo gaken, bi yénello.

²⁶Na' Spíritu ke Diosen' llakrenen lli'o, le bi nnézello akren' llaya'l gonllo yelwill-llo Diosen'. Spíritu ke Dios na'n llakbe'ren kat bi llallélello di'll we'renllo Diosen', na' len nnen rorazllo di'll da bi llejnie'llo. ²⁷Dios be'nnen' llwia llyi yichjra'llda'ollon', llejnie're' bin' lle'ne Spíritu ke'en katen' llnnen rorazllo, le ba breje' lli'o nakllo be'nn ke'e. Na' kon da lle'ne Le'e llnnab Spíritun' rawe'.

Diosen' zerene' lli'o na'llen' nono soe lli'o

²⁸Na' nnézello kat biteze da llak ke be'nn ka' nxenra'll Diosen', naksen da gakrén leake', le Le'en ba breje' leake' kon kan' bne'e na'. ²⁹Ka za garjtello, bnneze Diosen' gonlira'll-lloe', na' bne'e gakllo be'nn wen kan' nak Xhi'nne' na', na' bne'e gak Xhi'nne'n be'nn brao rao yeolol-llo, na' lli'o gakllo ka bi'ch lwellje'. ³⁰Kan' naken, kana'te bne Diosen' gakllo be'nn wen kan' nak Jesucristo na', na' breje' lli'o nakllo be'nn ke'e. Leska' bayone' lli'o be'nn wen ke'e, na' bene' nench gak nbaraz kello yebán'.

31 ¿Akxha ka nnerizllo ke da ni? Na' cha' Le'e zerene' lli'o, ni to notno soe lli'o. 32 Diosen' bi bllone' sa'kzi' Xhi'nne' Jesucriston', bzanre' Le'e ni ke lli'o. Len na' ba nnézello gonne' lli'o yeolol biteze da yálljello. 33 ¿Noxha terize nne bi da xhinnj Romanos 8, 9 276

ka' ba ben lli'o ba brej Diosen'? Le Dios na' ba bake'e da xhinni kellon'. 34 ¿Noxha serize wlliavi'll lli'o? Cristo na' bzane' kwine' bet ake' Le'e nench bake'e do'l kellon', na' babane' radj be'nn wa't ka', na' jallie' cha'we kwit Diosen', llnne'e rorazllo. 35 ¿Noxha gak yela'a lli'o rao xhnnez Criston' bill llie're' lli'o? ¿Yel ya' yel zi' gak kello na'n wllon? ¿Yel zoya'chen' gak kello na'n wllon? ¿Yel da wray ake' lli'o na'n wllon? ¿Yel llbil lldon na'n wllon? ¿Yel bi de xhara'n na'n wllon? ¿Yel nxholl bi da gak kello na'n wllon? ¿Cha' no lle'ne dan' got ake' lli'on wllon? 36 Ni llak kan' nyoj xti'll Diosen' nen:

Xanto', dan' llonlira'llto' rwe'n, zjalla'a be'nn lle'n akre' got ake' neto' do lla do yere. Llwia ake' neto' ka to xhi'r ba got ake'.

³⁷La'kze yeolol da ki za'k ko'll-llo, dekz de gonllo gan, le nnézello zo Criston' nllie're' lli'o. ³⁸Nnezra' kwasro billbi de da yela'a lli'o rao yel nllie' ke Diosen', ni yel got, ni yel nban, ni no angl, ni daxi'o, ni no wnebia', ni da llak kello nna', ni bi da za za'a. ³⁹Ni da zjallia le' yebá, ni da de gabil, na' billre da ben Dios bi gak yeka'n lli'o rao yel nllie' ke Diosen'. Le Le'en ba broe're' kan' nllie're' lli'o, na'llen' bse'le' Xanllo Jesucriston'.

Diosen' gokre' be'nn Israel ka' ka xhi'nne'

Nada' naka' Criston' txhen lloa'a di'll li, bi ziya'. Spíritu ke Diosen' llakrenen nada' nench nnezra' di'll lin' lloa'a.

²Llakya'chra', na' bibi wen zo lo ra'llda'wa', ni ke be'nn ka' bi llonlira'll Criston'. ³To lle'nra' gak kwas Diosen' nada' ka'le, na' wabi'ya' kwit Criston' chenak, nench gone' wen ke be'nn bi'cha' ka', be'nn ka' nak be'nn wrall kia'. ⁴Nak ake' be'nn Israel, na'llen' Diosen' gokre' leake' ka xhi'nne', be'e leake' yel bara'nne, na' bne'e gakrene' leake', be'e leake' ley dan' bzoj da Moisésen', na' broe're' leake' akren' gon ake' we'rao ake' Le'e. na' bchebe' gone' da wen ke ake'. ⁵Be'nn gor brao ka' bde kana', gok ake! xozxtalo belnn Israel ka!. Na! rao dialla ke ake' na'n, bra' Cristo be'nnen' bse'l Diosen'. Le Lekze'n nak Dios ke veololte da de. na' llaya'l we'raolloe' ke chnare. Ka'n gakchga.

⁶Bi llaya'l gonllo xhbab bi ben Diosen' kan' bchebe' gone' ren be'nn Israel ka'. Le kere veolol be'nn ka' gorj rao dialla ke Israel na'n nak dogarj be'nn Israel. ⁷Leska' kere yeolol be'nn ka' gorje rao dialla ke da Abraham na'n nake dogarje xhi'nn dialla ke'e, le kin' goll Diosen' Abraham na' kana': "Xhi'nn dialla ke Isaac na', gak dialla ko'on." ⁸Na' dan' bne'e ka'n zeje di'll Dios na'n llbeje' be'nn nak xhi'nne' kere dan' gorj ake' rao dialla ke be'nn Israel ka'n, kon be'nn llejle'n, gon Diosen' ke ake' kan' ne'e na', na' gak ake' dogarje xhi'nne'. ⁹Kin' goll Diosen' da Abraham na' gone', na' bne'e: "Katen' llin llan' ba bnia' na', na'llen' veda', kana' ba zo to xhi'nn no'r ko'o Saran'."

¹⁰Na' kere da na'zen', leska' be'e Diosen' di'll ke xhi'nn da Rebeca na', 277 Romanos 9

bi ka' gok llopte xhi'nn xozxta'ollo Isaac. ¹¹Kan' bi nna so bi kwach ka', na' bibi nna gon akbe' no da wen o da xhinnj, Dios na' broe're' llbeje' noteze be'nne, kere dan' ben ake' ka ne ley na', zan ni ke dan' brej Diosen' leake'n. ¹²Le Dios na' golle' Rebecan': "Bin' garje da nell na', wxhexj yichjbe' rao bin' na'ch na'." ¹³Na'telle nyoj xti'll Dios dan' ne: "Bllie'ra' Jacob na', na' bwiera' Esaún'."

¹⁴¿Na' nnello llon Diosen' da bi zej lixheje? iBi nnello ka'! ¹⁵Le golle' da Moisésen' kana': "Yeya'chra'lla' kon no lle'nra' yeya'chra'lla'. Na' llie'ra' kon no lle'nra' llie'ra'." 16Llbej Diosen' be'nn llaya'chra'lle', kere kon kan' lle'ne be'nnen', na' kere ni ke bi da llon ake'n. Dios na'n kon no lle'nre', le'en llaya'chra'lle'. ¹⁷Na' xti'll Dios na' nyojen kan' golle' be'nn wnebia' ke Egipton', lle'e le'e: "Nada' bena' rwe' be'nn wnebia', nench na' wroe'ra' yel wak dan' llona' ren rwe'. Llona' ka' nench nneze be'nne doxhen yellrio, nada'n zoa' llnebia'." ¹⁸Ka'n naken Dios na' llaya'chra'lle' kon no lle'nre', na' llone' war lo vichira'llda'o kon no lle'nre', na'llen' nak ake' war bi llejle' ake'.

¹⁹Na' ye'o nada': "Cha' ka' naken, bi llaya'l wtobe Diosen' be'nnachen', le nono soe wlleyi'lle' dan' lle'nre' gonllon'." ²⁰Na' llepa' rwe', ¿noxha nako' na'n, llakyollreno' Diosen' bi dan' lle'nre' gone' ren rwe'? Ka to ye's de yo, kere wak yen be'nnen' ben len na': "¿Bixchen beno' nada' ki?" ²¹Le be'nn wen ye'sen' gone'n kon ka llazra'lle', le le'en gone'n. Na' bennj na'kzen' gone' to da

nak nbaraz, na' gonte' ye to da bi nakteke nbaraz.

²²Le Diosen' gokra'lle' wroe're' ka gone', we'e yel llza'kzi' ke be'nn bi llzenay ke'e, na' leska' gokra'lle' wroe're' yel wak ke'en. Na'llen' bdape' yel xhenra'lle ke be'nn ka' bi llon da lixheje, na' ba naken kweyi' ake'. ²³Ka'n bene' nench gone' da wen xhen ke noteze wxenra'll Le'e, lli'o llaya'chra'lle'. Kana'te breje' lli'o gak da nbaraz kello katen' yellinllo gan' llie' na'. ²⁴Lli'o breje', bal-llo nakllo be'nn Israel, na' bal-llo bi nakllo be'nn Israel. ²⁵Ka'n ne le' yich dan' bzoj Oseas, be'nnen' be'e xti'll Dios kana' nen:

Be'nn ka' bi nake yell kia', nada' wsi'i ake' yell kia', na' be'nn ka' bi bllie'ra' na', yep

na' be'nn ka' bi bilie'ra' na', ye ake' nllie' akre' nna'.

²⁶ Na' yell gan' goll Diosen' be'nn ka': "Bi nakre yell kia'",

na' yezi'i ake' xhi'nn Dios be'nn nban ke chnare.

²⁷Na' da Isaías be'nnen' be'e xti'll Diosen' kana', bne'e ki ke xozxta'o be'nn Israel ka': "La'kze be'nn Israel ka' chan aklle' ka yoxh da lli' lloa' nisda'o, txhonnj akze'n yerá. ²⁸Le Diosen' gone' kan' ba nchoye' ke lli'o be'nnach, na' le gonte' doxhen kan' ba nwie' gone'n." ²⁹Gak kan' bzoj da Isaíasen' kana', nen:

Chenak Xanllo Diosen' bi bakwa'nne' to chope be'nn Israel ka',

ba blleyi'llo kan' gok ke be'nn Sodoma ka' ren be'nn Gomorra ka' chenake.

Be'nn Israel ka' bi nxenra'll Criston'

³⁰¿Akxha nnello cha'? Be'nn ka' bi nake be'nn Israel, bi bayirj ake' Romanos 9, 10 278

akre gon ake' nench nne Diosen' nak ake' be'nn wen rawe' na', zan bale' llonlira'll ake' Criston', ke len na' ba nak ake' be'nn wen rao Dios. ³¹ Zan be'nn Israel ka' bnao ake' ley dan' ne, akren' gon ake' nench gak ake' be'nn ke Dios, na' bi bxha'k akre'n. ³² ¿Bixchen gokze ka' ke ake'? Gok ke ake' ka', le llak akre' gon ake' da wen nench gak ake' be'nn wen rawe' na', na' bi gokbe'e akre' cha' be'nn wxenra'll Le'en gak be'nn wen. Na' gok ke ake' ka llak ke be'nn lljache'o to yej. ³³ Ki nyoj xti'll Diosen' ke ake':

Gan' nzi'i Sión wse'la' to be'nne,

na' nake' ka to yej da lljache'o be'nne, na' ka to yej xhen da lljati' be'nne, na' lljabixe'. Na' be'nn gonlira'll Le'e na', bi waye'e akre' ni ke dan' benlira'll ake' Le'e na'. Be'nn bi'che, do yichi do ra'lla' lle'nra' wxenra'll be'nn Israel ka' Jesucriston' nench verá ake', na'llen' llalwilla' Diosen'. llnnaba' gakrene' leake'. ²Le nnezra' da zan da llon ake', llak akre' da yewé Diosen' llon ake', zan kreren' llon ake'n, le bi nnez akre' akren' llawé Diosen'. ³Bi lleinie' akre' dan' ba ben Diosen', na' kan' gonllo nench wayakllo be'nn wen rawe'n, le llayiri ake' akre gon ake' gak ake' be'nn wen rawe'n, na' ka' bi llon ake' kan' lle'ne Diosen' gon ake' na'. ⁴Ka nak ba bra' Cristo na', ba bayoll ley dan' bzoj da Moisésen', kon cha' lli'o wxenra'll-llo Criston', na'llen' Diosen' wake'e do'l kellon'.

⁵Da Moisésen' bzoje' kan' llaya'l gon be'nne, nench gak ake' be'nn wen rao Dios, na' bne'e: "Be'nne

gone' doxhen kan' ne ley na', le'en bane' ke chnare." ⁶Na' lli'o ba bayak be'nn wen dan' nxenra'lllloe' na', bill llonllo xhbab gákello: "¿Noxhan' chep yebán'?" Le cha' ka' llonllo, llonllo ka be'nn lle'ne lljaletje' Criston' xhanre. ⁷Na' leska' bi llonllo xhbab: "¿Noxhan' yetj gan' zjalla'a be'nn wat ka'?" Le cha' ka' llonllo, llonllo ka be'nn lle'nre yelepe' Criston' radi be'nn wat ka!. 8¿Akxha ne xti'll Diosen!? Da nin' ne xti'lle'n: "Xti'll Diosen' ba zorenkzen rwe', na' ba vo'kzen lloa'o, na' lo ra'llda'o," Na' da nin' xti'll Diosen' dan' wxenra'llllon' llyixjwe'to'n. ⁹Cha' we'reno' be'nne di'll ye akoe' llonlira'llo' Jesucriston', na' cha' do lo yichjra'llda'o llejle'o Dios na'n basbán Jesucriston' radj be'nn wat ka', na'llen' yera'o. 10 Le lo ra'llda'ollon' llejle'llo, na'llen' llayakllo be'nn wen rao Dios, na' kone lloa'llo na', lloe'llo di'll ba llonlira'll-llo Criston', na'llen' llasre!e lli!o.

¹¹Le xti'll Dios dan' nyojen nen: "Yeolol be'nn llejle' ke'e, bibi yel zdo' gak ke ake'." 12 La'kze be'nn Israel, na' be'nn bi nak be'nn Israel, toz ka llon Diosen' ren yeolol-llo. Le Xanllo Jesucriston' nake' Xan yeolol be'nne, na' da xhen llonla'ye' lli'o kon cha' walwill-lloe'. 13 Le noteze be'nne walwill Xanllon'. dekz de yesre'e le'e. 14 ¿Na' akxha gon ake' walwill ake' Le'e, cha' bi nxenra'll ake' Le'e? ¿Na' akxha gon ake' wxenra'll ake', cha' bi nna yen akre' xti'lle'n? ¿Na' akxha gon ake' yen akre' xti'lle'n, cha' nono llra' wzejnie' leake' xti'lle'n? ¹⁵Na'

279 Romanos 10, 11

¿akxha gon ake' chixjwe' akre' xti'lle'n, cha' nono llra' wse'l leake' chixjwe' akre'n? Ka'kzen' nyoj xti'll Diosen' nen: "Llawello kwis kat ba za'k be'nne llyixjwe' akre' Di'll Wen ke Diosen!."

¹⁶Na' kere yeolol be'nne byejle' Di'll Wen ke Diosen', ka'kzen' bne da Isaías be'nnen' be'e xti'll Diosen' kana', bne'e: "Xana', ¿no be'nn ka' ba byejle' keto'?" ¹⁷Ke len na' dan' wxenra'll-llon', lle'nen zga'tek yénello, na' yénello xti'll Diosen'.

¹⁸Na' nia': ¿Bi nna yen akre' xti'll Criston' lla? Ba ben aksre'n, le kan' nyoj xti'll Diosen', nen:

Be'nn lla'a doxhen yellrio ba ben akre' xti'lle'n; na' doxhen ba goslas xti'lle'n. 19 Leska' nia': ¿Bi nna chejnie' be'nn Israel ka' xti'll Criston'? Ba byejnie' aksere'n, le da Moisés na', bzoje' dan' bne Diosen' ke ake', na' nen:

Gona' wen ke to yell yobre nench re', be'nn Israel ka', yexhe're leake'.

Na' gona' wen ke to yell be'nn bi llejnie', nechkze lla're leake'.

²⁰Leska' da Isaíasen' bi bllebe' bdixjwe're' kan' bne Diosen':

Be'nn ka' bi bayirj nada', ballel akre' nada'.

Na' be'nn bi bnnab akre' nada', ba broe'rawa' leake'.

²¹Na' bne'e kan' ben Diosen' ke be'nn Israel ka': "Do lla do yere goxha' be'nn bi bzenay kia', na' gok yichjra'llda'o ake'n war."

Be'nn Israel ka' nxenra'll Jesucriston'

Na' llnnaba': ¿Ba bsanra'll Diosen' be'nn Israel ka',

be'nn ka' nak yell ke'e? Ka'a bi naken ka'. Lekze be'nn Israel nada', gorja' rao dialla ke da Abraham, na' ke da Benjamín. ²Kere ba bsanra'll Diosen' be'nn Israel ka', le Lekze'n breje' leake' batna'te nench nak ake' vell ke'e. Lewiá kan' nyoj dan' bne da Elías, be'nnen' be'e xti'll Diosen' kana', bdawe' xhia ke Israelen', lle'e Diosen': 3"Xana', be'nn ki ba bet ake' be'nn ka' be'e ak xti'llo'n, na' ba bachinni ake' rao bkoy gan' llaya'l we'rao ake' rwe'n. Ye toga nada' nna zoa' llzoa' xti'llo'n, na' renkze nada', lle'n akre' got ake'." ⁴Na'll balli'i Diosen' xti'lle'n, lle'e le'e: "Nna zjani't ye gall mir be'nne ba breja', be'nn bi nna wzoa xhib ake' rao lwa'n, nzi'i Baal." 5Na' ka'kze nna nakten nna' lla, ba baga'nn ye ra't be'nn ka' ba brej Diosen' dan' nllie're' leake'n. ⁶Diosen' kere breje' neto', ni ke da llonto' da wen na'. Le chenak breje' neto', ni ke da wen na' llonto' na'. bill naken okré da llonn Diosen' neto' vel be'nn cha'o ke'e na' chenake.

⁷¿Akxha na' cha'? Dan' llayirj be'nn Israel ka', bi nna yedo'l akre'n; zan be'nn ka' ba breje' nench wxenra'll ake' Le'en, ba bado'l akre'n. Na' be'nn ka' yela' yezikre ben war yichjra'llda'o ake'. ⁸Na' llak kan' ne xti'll Diosen': "Diosen' bene' leake' nench bi chejnie' akre', na' nna' nak ake' ka to be'nn bi llre'e, na' ka to be'nn bi llene." ⁹Leska' bne da Daviden' ke

Yeololte da llawé akre' da llak rao yellrion', wayakchgan to da wllix da wzap leake', Romanos 11 280

nench lljabix ake', na' sa'kzi' ake'.

10 Na' chol akchgue' nench bill re'e akre',

na' ke chnare sa'kzi' akchgue' ka to be'nn noa' yoa' zi'i, to nleon ko'lle'.

Diosen' breje' be'nn bi nak be'nn Israel wxenra'll ake' Le'e

¹¹Na' llnnaba': ¿Nak be'nn Israel ka' ka be'nne byo' yej nia' nench bix ake'n? Ka'a bi naken ka'. Ni ke dan' bi bzenav ake' na'n, na'llen' go't latj ke be'nn bi nak be'nn Israel nench bará ake! Ben Diosen! ka' nench cha' wayón be'nn Israel ka' xhbab, na' waxenra'll ake' Le'e. ¹²Le cha' dan' ben be'nn Israel ka' da xhinnjen', ni't be'nn ka' lla'a rao yellrion' nbaraz, na' cha' dan' bxinnj be'nn Israel ka', gok wen ke be'nn ka' bi nak be'nn Israel, leska'kze gontell Diosen' wen ke be'nn Israel ka' kate llin lla wayechj ake', na' waxenra'll ake' Le'e.

¹³De to da yepa' re', re' bi nakre be'nn Israel. Dios na' bse'l nada' wzejnie'ra' re' xti'lle'n, re' bi nakre be'nn Israel. Ke len na' llona' kon ga zerao sa'kra' nench wzenav be'nn ka' ke Diosen', ¹⁴le lle'nra' gon be'nn Israel ka' sera'll ake' gon Diosen' wen ke ake', kan' llone' ke re' nxenra'll Le'e, na' yedo'l akre' vel wasrá ke Diosen'. 15 Le chet ka' dan' bkwas Diosen' be'nn Israel ka' ka'le, nench re' bi nakre be'nn Israel bazore wen rao Diosen', ka'kze nbaraz kwis wavak katen' waxenra'll ake' Diosen', gak ake' ka be'nn babán radj be'nn wat. 16 Ka llon lli'o be'nn Israel kat llonllo

yet xtir, ton lloe'llo Diosen' nench nak la'y da ka' yela'. Ka to yay, cha' roen' naken ke Diosen', leska' xho'ze ka' naken ke'e.

¹⁷Na' be'nn Israel ka' nak ake' ka xho'z yay, da ba nchoy xan yayen' to rao yay olivo wen, na' ba bni'ten chla're. Na' re' bi nak be'nn Israel nakre ka xho'z yay olivo da ze yi'xe, da ba bchoye' rawe, na' ba batile'n yay wen na', nench bayaken toze. Na' ka'n nello yay wen na'n ba no'xen re', na' ni'll ke na' nbanrenre. ¹⁸Na' bi gákere cha' nakllre be'nn wen ka be'nn Israel ka', kan' ba llak keré na'. Le kere re'n lloe're yel nban ke ro yayen', yay na'len' llonn yel nban ke re'.

¹⁹Na' nerizre: "Dios na' bene' be'nn Israel ka' ka yay dan' bchoye' xho'ze na', nench bazoe' lli'o roraz ake'." 20 Ka'kzen' gok, dan' bi benlira'll ake' Criston', ben Diosen' leake' ka xho'z yay dan' ba bchoy xane len, na' ba bazoe' re', le nxenra'llre Cristo na'. Ke len na' bi gakre be'nn ya'ra'lle, lesechich lewxenra'lle'. 21 Cha' Diosen' bi bazi'xhene' ke leake'n nak akte' ka xho'z yayen' dogarje, leska' bi si'xhene' ke re' cha' bi wxenra'lltezre. 22 Lewiaya'nn kan' nak Diosen'. Nake' be'nn wen, na' nakte' be'nn znia. Goke' be'nn znia ke naken bkwase' be'nn Israel ka', na' nake' be'nn wen kwis ke re', bi nakre be'nn Israel. Ke len na' llaya'l setezre wxenra'llre, nench ke leska' kwase' re' ka'le. ²³Na' cha' leake' waxenra'll ake' Diosen' da yobre, yeyak ake' rao ne'e, le nape' yel wak yezoe' leake' nbaraz rawe'n, na'll yeyak ake' ka xho'z yay dan'

bayone' toze kone yay xhne'e na'.

24Le cha' re' nakre ka xho'z yay
olivon' dan' ze yi'xe, na' Diosen'
bchoye' re', bazoe' re' rao xho'z yay
wen na', la'kze bi nakre dogarje
xho'ze, wawellre' yezoe' be'nn
Israel ka' le' yayen' da yobre, be'nn
ka' nakse ka dogarje xho'z yay na'.

Zan be'nn Israel ka' yeyak be'nn ke Dios

²⁵Be'nn bi'che, lle'nra' chejnie're da ni da nono nna nneze, nench bi gakre be'nn ya'ra'll, gákere za'kllre kerke be'nn Israel ka'. Diosen' be'e latj bi llzenay ake' xti'lle'n nench wayoll waxenra'llre, re' bi nakre be'nn Israel. ²⁶Wayoll na' yeolol be'nn Israel ka' yerá ake'. Gak kan' nyoj xti'll Diosen' gan' nen:

To be'nn za'a gan' nzi'i Sión, yebeje' be'nn ka' lo da xhinnjen',

be'nn ka' nak dialla ke da Jacob. ²⁷ Da ni llcheba' gona' ke ake', katen' ba baka'a da xhinnj ke ake'n.

²⁸Dan' bi llejle' be'nn Israel ka' Di'll Wen ke Diosen', na'llen' ba blli'ye' leake' chla're nench breje' re', bi nakre be'nn Israel chejle're ke'e. Zan Diosen' nllie'kzre' leake', le xozxta'o ake' ka', breje' nench bene' leake' yell ke'e. ²⁹Le Diosen' bi yeke'e bi da gonne', ni okré dan' llone' ke be'nnach bi yeyatre'n. 30 Re' batna' bi bzenayre ke Diosen', na' dan' bi gokra'll be'nn Israel ka' wzenay ake' ke'e, ba baya'chra'll Diosen' re'. 31 Ke len na' bi llzenay be'nn Israel ka' ke Diosen'. Ka'n llak nench llin lla wroe' Diosen' yeya'chra'lle' leake'

kan' llaya'chra'lle' re'. ³²Diosen' ba bchoybie' ke yeolol be'nnach de do'l ke ake' dan' bi llzenay ake'n, nench wroe're' yeya'chra'lle' yeololte be'nne.

33 Be'nn si'n kwis nak Diosen', nnezre' yeololte da llak na' da za gak. Bi gakse chejnie'llo da ka' llone'n, bi nnézello akren' llwie' gone'. 34 Le ki nyoj xti'lle'n: "¿Noxha nombia' yichjra'llda'o Xanllo Diosen' bi dan' llone' xhbaben'? Na' ¿noxha bzejnie' Le'e kan' llaya'l gone'n? 35 Na' ¿noxha lli'o ba be'llo Diosen' da nak kello, na' wchie'rizelloe' nench wayixhje' dan' ba be'lloe'n?" 36 Le Dios na'n ba bene' yeolol da de, bene' da ka' nench sie' yel bara'nne. Ke len na' llaya'l we'raollo Diosen' ke chnare. Ka'n gakchga.

Llaya'l gon kwinllo rallna'a Dios

12 Be'nn bi'che, ba baya'chra'll Diosen' lli'o, ke len na' lla'tyoera' re', legón kwinre rallna'a Dios chaga nna nbanre. Gak yichjra'llda'oren' yall kan' llazra'll Diosen'. Le ka'n llaya'l we'raolloe'.

²Na' bi gonllo kan' llon be'nn ka' lla'a rao yellrio ni. Llaya'l wcha'a xhbab kellon', na' we'llo latj yekob Diosen' yichjra'llda'ollon', na'llen' nnézello bi dan' lle'ne Diosen' gonllo. Le Le'en lle'nre' gonllo da wen, na' da llayazra'lle', na' da nak lixheje.

³Diosen' nllie're' nada', na' ba bse'le' nada' llyixjwe'ra' xti'lle'n. Ke len na' nia', bi llaya'l gon kwinllo ka to be'nn za'k, llaya'l gakbe'llo Dios na'n llakrén lli'o wxenra'lllloe', le Le'en llakrene' lli'o nench gonllo bi da gonllo. ⁴Le ka'n nak

kwerp kello na', zan kwen naken, na' kere toze llin da llon yeololen. ⁵Ka'kzen' naken ke lli'o, nakllo be'nn zan nxenra'll-llo Criston', na' yeolol-llo nakrén lwelljllo txhen ren Le'e, nakllo ka toze kwerp. ⁶Diosen' ba benne' lli'o wde wdere da gon totollo. Na' cha' ba benne' lli'o chixjwe'llo bi da bne'e, llaya'l chixiwe'llon, na' gonlira'll-llo Le'e gakrene' lli'o gonllon. ⁷Na' cha' ba benn Diosen' gakrenllo be'nne, llaya'l gakrén aklloe' do yichi do ra'll-llo. Na' cha' ba benne' wzejnie'llo be'nne, llaya'l wzejnie' akelloe'. 8Na' cha' Diosen' ba none' rallna'llo wzejnie'llo be'nne gone' da wen, llaya'l wzejnie' akelloe' gon ake'n. Na' cha' ba bne'e we'llo be'nne bi da yallire', llaya'l we'e aklloe'n do vichi do ra'll-llo. Na' cha' ba benne' gakllo be'nn brao gap wiallo lwellillo, llaya'l kwe' vichillo wia aklloe'. Cha' nonne' kellon' waya'chra'll-llo be'nn yobre, llaya'l yewello katen' waya'chra'll aklloe! na!.

Dan' llaya'l gon lli'o nxenra'll Jesucristo na'

⁹Llaya'l llie' lwelljllo do yichj do ra'll-llo, llaya'l wiello da xhinnj ka', na' gonllo da wen. ¹⁰Llaya'l llie'llo be'nne, kan' nllie' no bi'ch gorjllo. Bi tedozllo wlanllo bi da wlanllo, llaya'l gap bara'nn lwelljllo.

¹¹Llaya'l gondipra'll-llo bi gakllo be'nn ria, na' gonllo xchin Diosen' do yichj do ra'll-llo.

¹²Llaya'l sollo yewello dan' nnézello yellinllo gan' llia Diosen', na' gakxhénello bi da za'kzi'llo, na' soteze sollo yelwill-llo Diosen'. ¹³Na' gakrenllo no be'nn lwelljllo nxenra'll Dios, cha' bi da yallj akre', na' yewello wreblloe' ga zollo, cha' nake' no be'nn zi'te.

¹⁴Na' nnabllo rao Diosen' gak wen ke be'nn llsa'kzi' lli'o. Nnabllo gak la'y ake', na' kere nnabllo gak ake' de'e.

¹⁵Na' llaya'l yewerénello be'nn llawé, na' kwellrenllo be'nn bell.

¹⁶Sorenllo wen lwelljllo, bi gakllo be'nn ya'ra'lle, llaya'l gontezllo txhen noteze be'nn ya'che, bi wlanllo nakllo ka be'nn llejnie'.

¹⁷Cha' bi da llone be'nne lli'o, bi yeyechillo yelli'llo kan' llon akre' lli'on. Llaya'l gonllo wen rao veolol be'nne. ¹⁸Gonllo bi da zerao sa'kello nench sorenllo veolol be'nne nbaraz. 19 Be'nn bi'che nllie'ra' re', na'llen' nia' bi wazi're wzon cha' bi llone be'nne re'. Dios na'kze wie' ka wkwa'nne' be'nn ka' llsa'kzi' lli'on, kan' nyoj xti'll Diosen' nen: "Nada' wia' ka gona' ke be'nnen'." Ka'n ne Xanllon'. ²⁰Ke len na!: "Cha! Ilbil Ildon be!nn llwie rwe', llaya'l we'o da ye'j gawe'; ka'n llaya'l gono' nench waye're' kan' llonre' rwe'n." ²¹Bi we'llo latj nnebia' da xhinnjen' lli'o, da wen na' yelli'llo ke be'nn ka', nench na' yeyat akre' ke da xhinni ka' llon akre' lli'on.

Yeololtello llaya'l wzenayllo ke koxchis be'nn llnebia', le Diosen' bzoe' leake' nnebia' ake'.
Be'nnen' bi llzenaye ke koxchis ka' ba nzoa Diosen', Dios na'kzen' ll-lliayi'lle' chet ka', le Le'en lloe' latj llia ake'. Na' be'nn ka' bi llzenay ke koxchis ka', ba llon ake' nench wsa'kzi' ake' leake'.
3 Le koxchis

ka' kere llia ake' nench lleb be'nn ka' llon da wen na', llia ake' nench lleb be'nn ka' llon da xhinnjen'. Cha' lli'o lle'nello sollo wen bi llebllo, llaya'l gonllo da wen, na'llen' nne ake' llonllo da wen. 4Ka nak koxchis ka', zo ake' llon ake' xchin Diosen' nench sollo wen. Zan cha' llonllo da xhinni, llaya'l lleb aklloe', le nap ake' yel llnebia' da wsa'kzi' ake' be'nne, cha' llone' da xhinnj, le Dios na'n none' rallna'a ake' wsa'kzi' ake' be'nn llon da xhinni. ⁵Ke len na' llava'l wzenavllo ke ake', na' kere dan' gonn ake' dan' sa'kzi'llo na'zen', leska' llaya'l wzenayllo ke ake' nench na' so lo yichjra'llda'ollo wen. ⁶Leska' ke len na' llaya'l chixhillo kat bi da llo'tllo, na' bi da lla'ollo, le be'nn ka' llnebia' na'n, llon ake' da llaya'l gon ake', le Dios na'n nzoe' leake' gon ake'n.

⁷Na' chixhillo cha' bi da llba'yllo, cha' be'nn bi da llaya'l we'lloe', llaya'l we'lloe'n, cha' bi da llo't lla'ollo, llaya'l chixhillo rao be'nn wachixhjen'. Be'nn llaya'l gapllo bara'nn, gaplloe' bara'nne, na' be'nn llaya'l gonllo xhen, gonlloe' xhen. 8Ni to nono ba'yllo ke'e, na' llaya'l llie' lwellillo. Le be'nnen' nllie' lwellje'n, ba llonkze' doxhen kan' ne ley ke Diosen'. ⁹Ley na' nen: "Bi tarenre no'r bi nak no'r keré, na' be'nn byio bi nak be'nn keré, na' bi gakre be'nn wen xhia, bi kwanre, bi chirjla'llre xti'll be'nne, bi sera'llre bi da de ke be'nne." Na' biteze di'll yobre dan' nllia Diosen' bia'a gonllo, llayaken toze, na' nen: "Llie'ro' be'nn lwelljo' ka'kzen' nllie' kwino'." ¹⁰Le be'nne yo' yel nllie', bibi llone'

da ll-lleyi' be'nn lwellje'n. Ke len na' llonllo doxhen kan' ne ley na', cha' nllie'llo be'nne.

¹¹Legón yeolol ka da ki, na' leyeyakbe'e bin' ba za'a. Ke len na' bill llaya'l gatra'll-llo ka llon to be'nn lltasxen. Le be'nnen' nak wasrá kellon', ba zelle'e awchoch kerke kan' bxenra'll-lloe'n. 12 Ba llonen ka bale, ba zo rez cheni', ke len na' bill gonllo da xhinni ka'. Lewago' beni' ke Xanllo Diosen' lo yichjra'llda'ore, na' sollo xhnid ka llon to be'nn waka'a ya kat ze'e llape'. ¹³Llaya'l gonllo da wen, ke nak ba dallo rao beni' ke Diosen'. Bi lenllo ga lle'j llaoxen ake', bi gakllo be'nn wazó, bi tarenllo xho'r xhyio be'nne, na' bi gonllo da nak zban, na' bi tilrén lwelljllo, na' bi waxhé' lwellillo. ¹⁴Llaya'l gon kwinllo lo na'a Xanllo Jesucriston', na' gak vichjra'llda'ollon' kan' nak ke'e na', nench na' da xhinnjen' dan' zera'll xpe'rllon', bi nnebia'n lli'o.

Ka llaya'l serenllo be'nn ka' bi nna wxenra'llya'nne

Cha' to be'nn ba nxenra'lle' Criston', na' bi nna wxenra'lle' kwasro, lewrebe' gake' re' txhen, na' bi gakyollrenre' ka nak dan' bi nna wxenra'llya'nne' na'. Le zjani't be'nn nxenra'll Dios, na' llak akre' wakse gao ake' biteze yel wao, na' ni't be'nn bi nna wxenra'llya'nne kwasro, na' lleb ake' gao ake' biteze. Na' be'nn ka' llao biteze yel wao, bi llaya'l gon ake' kaze be'nn ka' bi llao ake' biteze bi yel wao, bi llaya'l gon ake' kaze be'nn ka' llao biteze, le

Romanos 14 284

Dios na' bazenia'ne'e llop kwen akte'. 4¿Noxha nako' rwe' nench wlliayi'llo' akren' llon be'nnen' ba brej Diosen' nench none' le'e ka be'nn wen llin ke'e? Dios na' nake' ka xane', na' Le'en nnezre' cha' llone' da wen o cha' llone' da xhinnj, na' lekze Le'en nape' yel wak wzoe' le'e gonlle' da wen.

⁵Ziani't be'nn llak akre' zo to lla naklle lla xhen, za'kllen rao Dios ka lla ka' yela'. Na' ni't be'nn llak akre' toze ka nakse yeololte lla ka'. Totollo llaya'l gonllon do yichi do ra'll-llo dan' chejnie'llo llaya'l gonllo. 6Be'nn ka' llake zo lla da za'kll ka lla ka' yela' na', llbej ake' to lla nench lloe'xhen ake' Dios. Na' be'nn ka' llake toze ka nakse yeololte lla na', leska' lloe'xhen ake' Dios, kon ka xhbab ke ake' na'. Na' be'nn llao biteze yel wao, lloe'xhen ake' Dios katen' llao ake'n na', le vel llioxken ke Diosen' lloe' ake' ke dan' lle'j llao ake' na'. Na' be'nn ka' bi llao biteze, bi llao ake'n dan' llon ake' xhen Diosen', na' leska' vel llioxken ke Diosen' lloe' ake'.

⁷Le ni to lli'o chak nbanllo, bi yo' lo na'llo kwinllo; leska' kate gatllo, kere yo'llo lo na'a kwinllo. ⁸Ke len na' chak nbanllo, sollo gonllo dan' lle'ne Xanllo Jesucristo na'; na' cha' gatllo, lekze kon kan' nnekze Le'en gatllo. Kon rao na'a Xanllo naksen yo'llo cha' nbanllo o cha' gatllo. ⁹Le Xanllo Criston' gote', na' babane' radj be'nn wat ka' nench na' nake' Xan yeolol be'nn, ka be'nn ban ren be'nn ba got.

10 Na' rwe', ¿bixchen ll-lliayi'llo' be'nn lwelljo'n? ¿Na' rwe' bixchen llonoe' kaze? Le yeololtellon' lljazello rao Criston' gan' gone' yel koxchisen'. ¹¹Le xti'll Diosen' nyojen nen:

Da li kwis naka' Dios, zoa' nbana',

na' yeolol be'nne yedzoa xhib ake' rawa'n,

na' yeolole' yeyombia' ake' toze nada'n za'ka' wxenra'll ake'. ¹²Kan' naken, na' yeololtellon' yedello di'll rao Diosen', cha' bi da benllo chak nbanllo.

Bi wlli'yllo be'nn lwelljllo gone' da xhinnj

¹³Ke len na' bi naken ke lli'o wlliayi'll-llo be'nn lwelljllo cha' bi da llone'. Da llaya'l gonllo, wiallo cha' lli'on bin' llonllo, na'llen' lllli'yen be'nnen' gone' da xhinnjen', na' wsanra'lle' bill wxenra'lle' Diosen', 14 Xanllo Jesucristo na' bzejnie're' nada' bnnezra' bi naken xhia cha' gaollo biteze yel wao. Zan cha' to be'nne gakre' naken xhia dan' gawe' na', naksen xhia ke'e cha' gawe'n. ¹⁵Cha' be'nn lwellillo llakre' tore dan' llaollon', na' cha' llaotezllon, bi nllie'lloe' chet ka'. Criston' be'e kwine' gote' ni ke be'nn lwellillon', na' lli'o bi llaya'l gaollo bi da gonen nench gak chope be'nn lwellillon', na' kwej yichje' Criston', na' kweyie'. ¹⁶Bi we're latj nne be'nn ka' ke da wen na' llonre. ¹⁷Le ka nak yel llnebia' ke Diosen', kere naken da ye'illon, na' da gaollon. Zan naken da zej lixheje, na' gonllo ka ni'trén be'nn lwellillo wen, na' sollo nbaraz ba yo' Spíritun' lo ra'llda'ollo. ¹⁸Le be'nnen' llon ki, le'en lloe'rawe' Criston!, Na! llawé Diosen! kan!

llone', leska' llazra'll be'nn ka' kan' llone' na'.

¹⁹Ke len na' llaya'l yeyirjla'll-llo ka sorén lwelljllo wen totollo, na' gakrenllo be'nn lwelljllo, nench na' so ake' wxenra'll ake' Criston'. ²⁰Bi wchixra'll-llo be'nn lwellillo cha' llaollo da llakre' bi naken wen gaollo. Wakse gaollo biteze yel wao, zan bi naken wen gaollon cha' len llchixra'llen be'nn lwelljllo. ²¹Naksen wen bi gaollo be're, na' bi ye'jllo xis uva da llsolle be'nne, na' billre da gonllo cha' wchixra'llen be'nne gone' da xhinnje, na' kwej yichje' bill wxenra'lle' Criston'. ²²Cha' zollo wen rao Diosen' dan' llonlira'll-lloe', lli'oze ren Dios na' nnézello. Nbarazen' zollo cha' nnézello to lo ra'llda'ollon' bibi do'l kello de. ²³Na' cha' bi da gaollo na' llakgánello, nakse xhia kello, le llákello bije llaya'l gaollo dan'. Le yeololte bi da llonllo, cha' llakgánello kat llonllon na', naksen xhyia kello.

Llaya'l llie'llo be'nn lwelljllo

Lli'o ba zello war rao xhnnez Diosen', llaya'l gapllo yel xhenra'll ren be'nn ka' bi nna chejnie' kwasro, na' bi gonllo kon ka da llazra'll lli'oze. ²Totollo llaya'l gonllo da wen da yeyazra'll be'nn lwelljllo, na' gonllo bi da gonllo nench gakrenen leake' chejle' ake' ke Diosen'. ³Ka'n gonllo, le ka'n gok ke Criston', bi bene' kon ke llazra'lle', gok ke'e kan' nyoj xti'll Diosen': "Di'll yel ya' ke be'nn ka' bwie rwe'n, bxhoan ko'lla'." ⁴Na' doxhen xti'll Diosen' dan' bzoj be'nn ka' kana', llzejnie'n

lli'o nench sello war wxenra'llllo Diosen', na' sollo rez wllin lla gon Diosen' wen kello. ⁵Dios be'nnen' llonn lli'o yel llxhenra'll nench llonllo war sechochllo rao xhnneze'n, gakrenchgue' re', gakre toze kon kan' broe' Xanllo Jesucriston' lli'o, ⁶nench toze kan' nne yeololre kat we'raore Diosen', be'nnen' nak Xa Xanllo Jesucriston'.

Diosen' lle'nre' be'nn bi nak be'nn Israel wxenra'lle' Le'e

⁷Ke len na' llaya'l wazenia'na'a lwelljre, kan' ben Criston' bazenia'ne'e lli'o nench gakxhen Diosen!. ⁸Na' ni nia' re', kan' ben Xanllo Jesúsen', bxhexj yichje' bene' ka to be'nn wen llin, nench na' gokrene' be'nn Israel ka', na' kone ka' broe're', di'll lin' be'e Diosen', golle' xozxta'ollo ka' gone' wen ke ake'. ⁹Leska' bed Criston' ke be'nn ka' bi nak be'nn Israel nench wxenra'll ake' Dios, dan' ba baya'chra'lle' leake' na', gok kan' nyoj xti'll Diosen' nen:

Ke len na' wa'a yel llioxken ko'o, kon ga zjalla'a be'nn ka' bi nak be'nn Israel,

na' gola' we'rawa' rwe'. ¹⁰Na' ye to kwen gan' nen:

Re' bi nak be'nn Israel, leyewé ren be'nn ka' ba nxenra'll Diosen'.

¹¹Na' ye to gan' nen:

Lewe'rao Xanllo Dios, re' bi nakre be'nn Israel.

Na' legonxhene', re' lla're yeololte yell.

¹²Na' ye to bne da Isaías be'nnen' be'e xti'll Dios kana':

To be'nne yede' rao dialla ke da Isaí. Romanos 15 286

Na' Le'e nnebie' be'nn ka' bi nak be'nn Israel, na' be'nn ka' bi nak be'nn Israel

na' be'nn ka' bi nak be'nn Israel kwez ake' Le'e.

¹³Diosen' llone' nench llawello dan' nnézello yellinllo gan' llie' na'. Na' llnnaba' nench gonchgue' sore nbaraz dan' llonlira'llre', na' gonchgue' nench gakrén Spíritu ke Diosen' re', yewere kwezre yellinre gan' llie' na'.

14 Be'nn bi'che, nnezra' ba nakre be'nn llon da wen, na' llejnie're, na' llak llzejnie're be'nn lwelljre.
15 Na' le' yich dan' bzoja' re' ni, ba bayaxhjra' golla' re' to chop da ka' nench ke ganra'llre, le brej Diosen' nada' yel be'nn wen ke'e na'. 16 Breje' nada' nench chixjwe'ra' xti'lle'n rao be'nn bi nak be'nn Israel. Llroe' akre' Di'll Wen ke Diosen' nench gak ake' ka to da wayazra'll Dios. Na' Spíritu ke'en gonen nench gak ra'llda'o ake'n yall.

¹⁷Le llawera' llona' xchin Diosen' dan' ba gokrén Xanllo Jesucriston' nada' llona'n. ¹⁸Bi llayaxhjra' wa'a di'll billre da ba ben be'nn yobre, na'llen' lloa'a di'll ke da ba ben Criston', le Le'en llakrene' nada' lloa'a xti'lle'n, na' billre da llona' nench zan be'nn ka' bi nak be'nn Israel ba llejle' ake' ke'e. ¹⁹Le Spíritu ke Dios na'kzen' gokrenen nada' bena' yel wak, na' billre da babane be'nne doxhente ga bya'a, le be'rén ake' xti'll Jesucriston', bzorawa' Jerusalén ballintia' gan' nzi'i Ilírico. 20 Na' be'la'lla' bia'a Di'll Wen dan' llzejnie' ke Criston' gan' nono nna gonlira'll Le'e, le bi gokra'lla' wlana' lati ke be'nn ga ba llzejnie' akre' xti'll Diosen'. ²¹Na' llonen kan' ne xti'll Diosen':

Be'nn ka' bi nna yene xti'lle'n, re'e akchguere', na' be'nn ka' bi nna nneze kan' llone'n, chejnie' akchguere'.

Pablon' llwie' cheje' Roma

²²Ke len na' bi nna yeda' yedra'nna' re', la'kze da zan ras ba gokra'lla' yeda'. ²³Batna'te lle'nra' yedwia' re', na' nna'll bayoll bena' dan' bro' Diosen' rao na' gona' do ni. ²⁴Kate cha'a gan' nzi'i España, kana' tia' wia' re'. Na' nbaraz gakra' kat yeyoll re'ra' re', na' gakrenre nada' nench na' wasyolla' cha'a gan' ba nwia' cha'a. ²⁵Na' ka nak nna' cha'a Jerusalén na', lljasana' mell da gakrenen be'nn lwelljllo ka' zjalla'a na', be'nn ka' ba brej Diosen' llonlira'll Le'e. ²⁶Le be'nn lwellillo ka' lla'a yell ka' zjalli' gan' nbane Macedonian', na' Acaya, btop ake' mell da gakrén ake' be'nn ya'ch ka' ba nxenra'll Dios, be'nn ka' lla'a Jerusalén na'. ²⁷Na' btop ake' mellen', na' bawé akre' btop ake'n, le naken to okré da llaya'l gon ake' ke be'nn Israel ka'. Le be'nn Israel ka'n be'e ake' leake' yeolol da wen da ba bzeinie' Dios leake', la'kze bi nak ake' be'nn Israel, na'llen' llaya'l gakrén ake' leake' bi da yalli akre'. ²⁸Kat ba bayoll bena' rao na'a be'nn Jerusalén ka' mellen' bdop na', kana'telle sa'a cha'a Españan', na' tia' wia' re'. ²⁹Nnezra' katen' yeda' gan' zore na', we'rena' re' Di'll Wen ke Criston', na' da xhen gonla'y Diosen' lli'o.

³⁰Na' lla'tyoera' re', be'nn bi'che, ni ke Xanllo Jesucriston', na' ni ke yel nllie' ke Spíritu ke'e na', llnnaba' gakrenre nada', yelwillre Diosen' nench gakrene' nada'. ³¹Na' lewnnab bi gaka' rao na'a be'nn Israel ka', be'nn ka' bi nxenra'll Cristo gan' nbane Judea na', leska' lewnnab ke be'nn lwelljllo ka' lla'a Jerusalén na', nench chazra'll ake' dan' we'e ake' na'. ³²Na' cha' Diosen' gonne' latj, nbaraz yeyeda' gan' zoren', na' yezi'ra'lla' yell keré na'. ³³Na' Dios be'nnen' nzoa lli'o nbaraz sorenchgue' re'. Ka'n gakchga.

Pablon' llwape' bal be'nn lla'a Roma lliox

Llnnaba' rao re', gonre wen ke no'r zanllon' re Feben', be'nnen' ben xchin Dios ren be'nn ka' lldop ll-llay llonlira'll Criston' gan' nzi'i Cencrea. ²Lewrebe' kan' llaya'l gone lwelljllo, lli'o nakllo be'nn nxenra'll Dios. Legakrene' cha' bi da yalljre', le ka'n ba gokrene' be'nn zan, na' leska' ba gokrenkze' nada'.

³Na' lewap no'ren' nzi'i Priscilan' lliox, na' ren be'nnen' nzi'i Aquila. Leake'n ba ben ake' llin ke Xanllo Jesucriston! txhen ren neto!. 4Leake! bzane vel nban ke ake' nench basrá ake' nada' rao yel got. Na' lloa'a vel llioxken ke ake' kan' ben ake' na! Leska! be!nn ka! bi nak be!nn Israel, be'nn bi'chllo ka' llonlira'll Jesucriston', lloe' ake' leake' yel llioxken. ⁵Lewap be'nn ka' lliox, be'nn ka' lldop rill Priscilan' ren Aguila, llon ake' xhen Jesucriston'. Na' lewap lliox be'nnen' nllie'ra', be'nnen' re Epeneto, le nake' be'nn nell bxenra'lle Criston' gan' nzi'i Acayan'. ⁶Na' lewap Marían' lliox, no'ren' ba ben xchin Dios gan' zore

na'. ⁷Na' lewap be'nn wrall kia' ka' lliox, be'nnen' nzi'i Andrónico, na' ren be'nnen' nzi'i Junias. Le zga'tek leake'n bxenra'll ake' Criston' ka nada', na' jacho'to' rill ya txhen. Na' yezikre postl ka' lloe' ake' di'll wen ke ake'.

⁸Lewap lliox be'nnen' nllie'ra', be'nnen' nzi'i Amplias, le ba nxenra'lle' Xanllo Criston'. ⁹Lewap be'nnen' nzi'i Urbano lliox, be'nnen' llonrén lli'o xchin Criston', na' leska' be'nn nzi'i Estaquis, be'nnen' nllie'ra'. 10 Lewap be'nnen' nzi'i Apeles lliox. Da xhen ba broe're' nxenra'lle' Criston' do vichi do ra'lle'. Leska' be'nn ka' zjalla'a rill be'nnen' nzi'i Aristóbulo, lewap ake' lliox. ¹¹Na' lewap be'nn bi'ch lwellja' nzi'i Herodión na' lliox, leska' be'nn ka' zjalla'a rill be'nnen' nzi'i Narciso, be'nn ka' nxenra'll Cristo na'. ¹²Lewap be'nnen' nzi'i Trifenan' lliox ren be'nnen' nzi'i Trifosa, no'r ka' llon xchin Xanllo Jesucriston'. Leska' be'nn zanllo nllie'llo nzi'i Pérsidan', lewape' lliox, wa ba bene' xchin Xanllon'. 13 Na' lewap be'nnen' nzi'i Rufon' lliox, nake' be'nn brao ke lli'o nxenra'll Xanllo Jesucriston'. Leska' xhne'e na', lewape' lliox, le ba none' nada' ka xhi'nne'. ¹⁴Lewap be'nnen' nzi'i Asíncriton' lliox, rente be'nnen' nzi'i Flegonte, ren be'nnen' nzi'i Hermas, ren be'nnen' nzi'i Patrobas, na' be'nnen' nzi'i Hermes. na' ren be'nn bi'chllo ka' zorén leake' na'. 15 Na' lewap be'nnen' nzi'i Filólogon' lliox ren be'nnen' nzi'i Julia, na' ren be'nnen' nzi'i Nereo, na' be'nn zane', na' be'nnen' nzi'i Olimpas, na' ren yeolol be'nn bi'chllo ka' zjazorén leake'.

Romanos 16 288

¹⁶Na' kate yedop yellayre, lewno'p na'a lwelljre kat wapre lliox, na' wroe'n nllie' lwelljre. Na' be'nn ka' lldop ll-llay llonlira'll ake' Criston' yeololte yell gan' ba bya'a na', llwap ake' re' lliox.

¹⁷Be'nn bi'che, llnnaba' rao re', lewiá bi wzenayre ke be'nn ka' nak be'nn watil be'nne, be'nn ka' llzoa da llonbe'y nench bi gonre dan' ba bsedre ke Diosen'. Bi gonre be'nn ka' txhen. ¹⁸Le bi lleile' ake' ke Xanllo Jesucriston'. llon ake' ka nen ke ake', na' llon ake' da yo' lo yichira'llda'o ake'. Na' lloe' ake' di'll da yewé be'nne nench llxoayay ake' leake'. 19 Yeololte be'nne nnez akre' llzenavre ke Diosen'. na'llen' llawera' kan' llonren'. Na' lle'nra' gakre be'nn llejnie' nench wzenayre ke da wen na', na' bi wzenayre ke da wxhiye'n. ²⁰Na' Dios be'nnen' nzoa lli'o nbaraz. wchochj wlanchgue' daxi'on, na' bi soen nnebia'n lli'o. Na' Xanllo Jesucristo na', sechgue' gakrene' re!

²¹Na' Timoteo be'nnen' llonrén nada' xchin Criston' ganni, llwape' re' lliox, na' leska' be'nn bi'ch lwellja' ka' nzi'i Lucio, na' be'nnen' nzi'i Jasón, na' rente be'nnen' nzi'i Sosípater. ²²Na' nada' Tercio be'nn wazoje, leska' llwapa' re' lliox, nonllo txhen nxenra'll-llo Xanllon'.

²³Leska' be'nnen' nzi'i Gayon' llwape' re' lliox. Nada' Pablo zoa' rille' ni, na' lekze rille' ni, lldope be'nn ka' nxenra'll Criston'. Leska' be'nnen' nzi'i Erasto be'nnen' nake' rao ne'e mell ke yell na', llwape' re' lliox, na' ren be'nn bi'che'n nzi'i Cuarto.

²⁴Sochga Xanllo Jesucriston' gakrenchgue' re'. Ka'n gakchga.

Llone' xhen Dios

²⁵We'raollo Dios. Le'en nap yel wak gakrene' re', sore wxenra'llre kan' ne Di'll Wen dan' llyixjwe'ra'n, na' llzejnie'ra' be'nne ke Jesucriston'. Na' llzejnie'ra' xti'll Dios dan' nono nna nneze kan' za xe yellriote. ²⁶Na' Diosen' ba bzejnie're' lli'o nna', bixha zejen da ka' bllia Diosen' bia'a ka nak da ka' bzoj be'nn ka' be'e xti'lle'n kana'. Na' Dios be'nnen' zo ke chnare lle'nre' chej di'll ke'en yeololte yell, nench chejle' yeolol be'nne ke Jesucriston', na' wzoa ake' xti'lle'.

²⁷Toze Diosen' za'k wxenra'llllo, toze'n nape' yel si'n. Na' bse'le' Jesucriston' gakrene' lli'o, ke len na' gonxhenlloe' ke chnare. Ka'n gakchga.

YICH NELL DAN' BZOJ POSTL SAN PABLON' KE BE'NN KA' LLA'A CORINTO

Pablon' llwape' lliox be'nn ka' nxenra'll Jesucriston' lla'a yellen' nzi'i Corinto

Nada' Pablo Ilzoja' yich ni. Dios na' byazra'lle' breje' nada' nench na' naka' postl ke Jesucristo na'. Nada' na' ren be'nn bi'chllon' nzi'i Sóstenes llwapto' re' lliox. ²Yich ni llzoja'n ke re' lldop ll-llayre llonlira'llre Diosen' yellen' nzi'i Corinto dan' llonlira'llre Xanllo Jesucristo na', ba brej Diosen' re' nakre rallne'e, kan' bene' breje' yeolol be'nn llalwill Xanllo Jesucriston', nak ake' Le'e txhen do gateze, le Lekze'n nak Xan ake' na' Xan lli'o. 3Llnnaba' rao Xallo Diosen', na' rao Xanllo Jesucriston' gakrén akchgue' re', na' wzoa ake' yichjra'llda'ore so kwezre nbaraz.

Diosen' llakrene' lli'o llonlira'll-llo Criston'

⁴Lloe'teze lloa'a yel llioxken ke Diosen' ke re', kan' llakrene' re' dan' llonlira'llre Xanllo Jesucristo na'. ⁵Na' dan' nxenra'llre' na', llakrene' re' kwis nench chejnie're yeolol dan' ba bzejnie' Diosen' re', na' nench lloe're di'll ke'e na'. ⁶Na' ka nak nna', ba bxhi're xti'll Criston', le naksen da li. ⁷Ke len na' Spíritu ke Diosen' llonen nench llak llonre yeolol dan' llaya'l gonren', chak nna bezllo yed Xanllo Jesucriston' da yobre. ⁸Dios na' gakrene' re' sotezre gonre kan' lle'nre' na', nench notno gak wxoa ko'llre do'l katen' yed Xanllo Jesucriston'. ⁹Zokze Diosen' llone' kan' bne'e gone' na', Lekze'n breje' re' nench nakre xhi'nne' Jesucriston' txhen, be'nnen' nak Xanllo na'.

Bi llak ake' toze ren lwellj ake'

¹⁰Be'nn bi'che, re' llonlira'llre Jesucriston', lla'tyoera' re', legón lwellire txhen, bill gakre chop chonn kwenre cha' bi xhbab llonre. na' cha' bi da nere. 11 Ka'n llepa' re' be'nn bi'che, le be'nn ka' zjalla'a rill be'nnen' nzi'i Cloé na', ba goll ake' nada' wa llakdilre. 12 Nia' llakdilre, le balre nere: "Neto' llonto' txhen dan' llroe' llsede Pablon'." Na' ve balre nere: "Llonto' txhen dan' llroe' llsede Apolosen'." Na' ye balre nere: "Llonto' txhen dan' llroe' llsede Pedron'." Na' ye balre nere: "Llonto' txhen dan' llroe' llsede Criston'." ¹³¿Llákere cha' ka' nla' Criston'?

1 Corintios 1 290

¿Llákere cha' nada' Pablon' gota' le' vav cruzen' ni ke re'? ¿Llákere cha' ren ra'a nada' Pablon' blloare nisen'? ¹⁴Lloa'a vel llioxken ke Dios, bi bchoa' nada' re' nis. Be'nnen' nzi'i Crispo ren be'nnen' nzi'i Gayo na'zen' bchoa' nis. ¹⁵Na'llen' nollno llra' be'nn nne bchoa ake' nis, le bi lle'nra' nne ake' nada' llchoa ake! nis. 16 Na! leska! nada! bchoa! be'nnen' nzi'i Estéfanas nis ren be'nn ka' lla'a lo yo' rille' na'. Na' bi za'ra'lla' cha' zjazoll be'nn bchoa' nis. ¹⁷Le bi bse'l Criston' nada' wchoa' be'nne nis, bse'le' nada' chixjwe'ra' Di'll Wen ke'e na'. Na' bi llayirja' no di'll da gake be'nne di'll si'n na' lloa'a, nench ke wxenra'll ake' nada', na' bill gon ake' xhbab ke dan' got Criston' le' yay cruzen', le len na' nsa'a yel wak ke Dios.

Criston' nape' yel wak ke Diosen' na' yel si'n ke'e

¹⁸Be'nn ka' ba zjazé rao nez dan' ll-lleyi' leake', llak akre' bibi za'k di'll ke Xanllon' dan' gote' le' yay cruzen'. Zan lli'o yerallo rao da xhinnjen', nnézello di'll ke dan' gote' le' yay cruzen' nsa'n yel wak ke Dios. ¹⁹Ni llak kan' nyoj dan' ne Diosen':

Wroe'ra' bibi za'k yel si'n ke be'nnach ka', Na' wlli'ya' chla're dan' ne ake' lleinie' akre'n.

²⁰¿Bixha za'k dan' nneze be'nnen' llejnie' da xhen gore? ¿Bixha za'k dan' nneze be'nnen' ba bsede'? Na' ¿bixha za'k di'll ke be'nn ka' lloe' di'll wallajllo ke da llak yellrio ni? Diosen' ba broe're' dan' nneze be'nnachen' bibi za'ken. ²¹Diosen'

nake' be'nn si'n, na' bene' nench yel si'n ke be'nnachen' bi llakrenen leake' gombia' ake' Le'e. Le Diosen' llazra'lle' kon be'nn llejle' xti'lle' dan' lloe'to' na', yerá ake' rao da xhinnj ke ake', la'kze llake nollre be'nne bibi de gon di'llen' lloe'to' na'.

²²Na' be'nn Israel ka' llnnab akre' re'e akre', kan' nak yel wak ke Diosen', na'll chejle' ake'. Na' be'nn ka' nne di'll griego, llayirj ake' billre di'll da llak akre' nakll di'll si'n. 23 Zan neto' lloe'to' xti'll Criston' kan' gok kan' gote' le' yay cruz na'. Na' be'nn Israel ka' bi llazra'll ake' di'llen' lloe'to' na', bi lleile' ake'n. Na' be'nn ka' bi nak be'nn Israel, ne ake' llaktontjeto'n. ²⁴Zan ka lli'o ba brej Diosen' nak rallne'e, la'kze cha' nakllo o cha' bi nakllo be'nn Israel, nnézkzello Cristo na'n llroe're' kan' nak yel wak ke Diosen', na' yel si'n ke'e na'. ²⁵Be'nn ka' bi llonlira'll Diosen', llak akre' bi nak Diosen' be'nn si'n dan' be'e lati got Criston' le' yay cruzen', na' llak akre' llroe'n bibi yel wak nap Diosen'. Kere ka'n, xhbab ke Diosen' nakllen da si'nll kerke xhbab ke be'nnachen', na' dan' bene'n napllen yel wak kerke dan' nap be'nnachen'. ²⁶Be'nn bi'che, lewayón ke xhbab, kan' brej Diosen' re' nakre rallne'e, bi nak zanre be'nn si'n ke be'nnach, na' kere zanren' nakre be'nn wnebia', na' kere zanren' nakre be'nn brao. ²⁷Be'nn ka' lla'a rao yellrio ni. llon ake' xhbab ke nak lli'o ba brej Diosen', bi nakllo be'nn si'n. Ka' ba ben Diosen' nench na' wsie' zdo' be'nn ka' llon xhbab nak ake'

be'nn si'n. Leska' be'nn ka' lla'a rao vellrio ni, llon ake' xhbab, lli'o ba brej Diosen' bi napllo yel llnebia'. Zan ka'n ba ben Diosen' nench na' wsie' zdo' be'nn ka' llon xhbab nap ake' yel llnebia'. 28 Diosen' ba breje' lli'o, bi nakllo be'nn brao, be'nn bi llazra'll be'nnach, na' breje' lli'o nench wroe're' be'nnen' nak be'nn brao rao be'nnachen', bibi za'k ake' rao Le'e. ²⁹Diosen' bene' ka' nench nono gak yeyoe'rao kwine' rawe' na'. 30 Dios na' ba none' lli'o txhen Xanllo Jesucriston', na' dan' nak Criston' lli'o txhen na', napllo yel si'n ke Diosen', na' nakllo be'nn wen rao Diosen', na' nakllo yall rao Le'en, na' nakllo be'nn ba basrá Dios. ³¹Ke len na' xti'll Dios dan' nyojen nen: "Bi llaya'l yeyoe'rao kwinllo, Xanllo na'n llaya'l wayoe'raollo."

Pablon' be'e xti'll Cristo be'nnen' got le' yay cruzen'

Be'nn bi'che, kan' badtixjwe'ra' re' xti'll Diosen', bi bia'a di'll nbaraz, na' di'll si'n ka da llroe' be'nn lla'a rao yellrio ni. ²Be'renkza' re' di'll ke Jesucriston'. na' kan' bene' be'e lati bet ake' Le'e le' yay cruz na', ni ke lli'o, na' bi be'rena' re' billre di'lle, 3Kan' bzorena' re' na', gokbe'ra' bi naka' be'nn war, na' bxhiza' lleba' cha' bi wzenayre kia'. ⁴Na' kan' be'rena' re' di'llen', kere be'rena' re' di'll yel si'n ke be'nnachen' nench na' wpera' re'. Zan Spíritu ke Dios na'n gokrenen nada' ren yel wak ke'e na', benen nench byejle're. ⁵Ka' bena' nench na' byejle're ke Diosen', kere dan' bénere yel si'n ke be'nnachen', zan

dan' byejle're dan' bre're yel wak ke Dios na'.

Spíritu ke Diosen' llonnen yel llejnie'

⁶Na' ren be'nn ka' ba yo'rao llzenay ke Diosen', lloe'llo di'll si'n ke Dios, bi naken ke vellrio ni, na' bi naken ke be'nn brao, na' be'nn wnebia' zjani't ganni, le sete te ke be'nn ka' kone yel si'n ke ake'n. ⁷Dios na' ba bzejnie're' neto' yel si'n na', dan' nono byejnie' kana', dan' bwie' gak kan' za xe yellriote, le kana'ten' bwie' kan' gone' nench na' sollo nbaraz ke chnare. 8Na' ni to be'nn wnebia' zjalla'a yellrio ni, bi byejnie' akre' yel si'n ke Diosen', le chenak byejnie' akre'n, bi bda'a ake' Xanllo Jesucriston' le' vav cruzen' chenake, be'nnen' nak be'nn lliarao xhen na'. 9 Na' kan' nyoj xti'll Diosen! nen:

> Diosen' ba none' xhnid da nak nbaraz ke be'nn ka' nllie' Le'en.

Notno be'nn lla'a rao yellrio ni, ba bre'e akre', na' ba ben akre' ka da ki.

Na' notno nna gon xhbab katk da nbaraz nak aken.

¹⁰Na' Diosen' bene' nench Spíritu ke'en broe'ren lli'o, le Spíritu na'n nombia' yeololte da de, na' rente da yo' lo yichjra'llda'o Dios.

¹¹Kan' naken ke be'nnachen', notno nneze bi xhbab llon be'nne, ke kellon' nnézello bi xhbab llonllo. Kan' naksen ke Diosen', Spíritu ke'e na'zen' nnezen bi xhbab llone'. ¹²Na' Dios na' ba benne' lli'o Spíritu ke'e na', na' bi naken ka dan' yo' lo yichjra'llda'o kon to be'nn lla'a rao yellrio ni, nench na' nnézello ke da wen na' ba benn Diosen' lli'o. ¹³Katen' lloe'rento' re' xti'll Criston', kere lloe'to' di'll ke yel llejnie' keto'n, di'll da bzejnie' Spíritu ke Dios na'n lloe'to', na' be'nn ba yo' Spíritu ke Diosen' lo ra'llda'we', llzejnie' aketoe' yeololte da ka' llzejnie' Spíritun' neto'.

¹⁴Na' be'nn bi yo' Spíritu ke Diosen' lo ra'llda'o ake', bi llejle' ake' ke di'll dan' llonn Spíritu ke Diosen' neto' lloe'rén aktoe', llak akre' bibi za'k dan'. Na' bi lleinie' akre' le bi yo' ake' Spíritu ke Diosen' gakrenen leake' chejnie' akre'n. ¹⁵Na' be'nnen' yo' Spíritu ke Diosen' lo ra'llda'we' na', llakbe're' biteze cha' naken da za'ke, na' notno bi llak nne ke'e. ¹⁶Xti'll Diosen' nvoien nen: "¿Noxha llra' llejnie' kan' nak xhbab ke Diosen' nench wzejnie're' Diosen'?" Zan Diosen' ba benne' lli'o Spíritu ke'en, na' chejnie'llo xhbab ke Criston!.

Gakllo txhen ren nollre be'nn llon xchin Dios

Be'nn bi'che, bi gok we'rena' Be'nn bi'cne, di gok v re' xti'll Diosen' kan' lloe'rena'n be'nn ka' llzenay ke Spíritu ke Diosen', na' be'rena' re' di'll ka lloe'rena' kon to be'nn dá rao yellrio ni di'lle. Ke len na' be'rena' re' di'll, ka llona' lloe'rena' di'll no bida'o. ²Kan' bzorao be'rena' re' xti'll Diosen' bllinte nna' lla, bi nna chejnie're da ka' lle'ne Diosen' chejnie're. Nakre ka to bida'o nna lla'll, na' bi nna gak gaore da nak war. ³Llzenayre da llarjla'llzre. Na' llwie lwelljre dilre, na' llchachre, nakbie'tekze llzenayre ke xhbab kezren', kan' llon be'nn ka' bi

nxenra'll Cristo na'. ⁴Nia' llonre ka be'nn llzenay da llarjla'llzre, le balre nere: "Dan' llroe' llsede Pablo na', nakto' txhen", na' ye balre nere: "Dan' llroe' llsede Apolos na', nakto' txhen."

⁵¿Noxha naka' nada' Pablo? Na' ¿noxha nak Apolos na'? Kon nakzto' be'nn wen xchin Diosen'. Na' gokrento' re' nench byejle're ke Xanllo na', kan' be'rento' re' xti'lle'n. Le Le'en breje' toto neto' gonto' dan' zera'lle' na'. ⁶Nada' naka' ka to be'nn goz, dan' be'rena' re' xti'll Dios da nelle. Apolos na' nake' ka be'nn llyire dan' goza'n, le le'en broe' bsedllre' re' ye ra'te. Na' toze Dios na'n llone' nench ll-lli'o dan' gozto' na'. ⁷Bibi za'ktek be'nnen' llaz na', ni be'nnen' llyir len na!. Dios na'kzen' za'kll dan' llone! nench ll-lli!o dan! llaz ake! na'. 8Be'nnen' llon ka be'nn llaz. na' be'nnen' llon ka be'nn llvir. llon ake' xchin Diosen' txhen. Na' Diosen' wavoe' totoe' kon kan' ben ake' xchine' na'. 9Neto' nakto' Diosen' txhen, na' llzejnie'to' re' xti'lle'n, na' re' nakre ka yellrio gan' llonto' llin na'.

Na' re' lldop ll-llayre llonlira'llre Criston', leska' nakre ka to yo' da llon Dios. ¹⁰Na' nnello nada' naka' be'nn wen yo' na', le nada'n bxia' ranen', le Dios na'n gokrén nada' bxia' xchine'n gan' zore na'. Na' nna' zjani't be'nn yobre llzejnie' akre' re', na' nnello leake'n llbek ze'e na'. Na' noteze be'nn llake llon ake' xchin Diosen', llaya'l gon akya'nne' xhbab cha' nao ake' llon ake' kan' lle'ne Dios na'. ¹¹Na' nollre no gak kwek ye to ran yo'n roraze dan' ba brek

Diosen', len na' nnello Jesucristo na'n, Le'en nak ka ran yo' na'. ¹²Llin da llonllo ke Criston', llonen ka ke to be'nn ll-lep to ze'e rao ran yo'. Wak gone'n de ya cha'o dan' nzi'i oro, o de ya cha'o dan' nzi'i plat, o de yej cha'o, o de yay, o de yixh, o de dod. 13 Na' llan' yed Cristo na'n wroe'n bi da ben totollo, cha! benllo da za!ke o cha! bi za!ken. Na' cha' benllo da bi za'ke, Dios na' yenitrawe'n kone yi' ke'e na', na' wroe'n akren' ben totollo. 14 Na' cha' benllo da wen, len na' bi nniten rao Diosen', na' Le'en wayonne' kello kon ka dan' benllo na'. 15 Na' cha' dan' benllo na', bi naken da wen, cheyen, na' wnitllo dan' benllo na', la'kze warallo, na' gonllo ka to be'nn llalloj lo yi'.

16 ¿Bi nnézere lli'o nakllo ka to yoda'o ke Dios, na' Spíritu ke Diosen' zorenen lli'o txhen lo yichjra'llda'ollo? ¹⁷ Na' cha' no wlleyi' yoda'o ke Diosen', Dios na'kzen' wlleyi' le'e, le yoda'o ke Diosen' nak la'yen', na' re' nakre ka yoda'o ke'e.

18 Bi siye'e kwinre gákere nakre be'nn si'n rao yellrio ni, yel si'n ke yellrion' bi gakrenen re' rao Dios. Llaya'l gonre ka be'nn bi llejnie', nench na' gonn Diosen' re' yel si'n ke'e na'. 19 Be'nn ka' bi llonlira'll Diosen', bibi za'k yel si'n ke ake'n rao Dios. Le nyoj xti'll Diosen' nen: "Be'nn ka' llake nak ake' be'nn si'n, Dios na' gonchixre' dan' ne ake' llejnie' akre' na'." 20 Na' ye to gan' nyojen nen: "Xanllo na'n nnezre' bibi za'k dan' llon be'nn si'n ka' xhbab." 21 Ke len na' bi llaya'l gonre xhen da llroe' llsede be'nnach, le

yeolol bi da yo' rao na'ren', yo'n nench gakrenen re'. ²²Nada' ren Apolos, na' ren Cefas na', yo'to' rao na're nench llakrento' re'. Na' yellrio ni, na' yel nban na', na' yel got, na' da llak nna', na' da za za'a, yeolol da ka'n yo' rao na're. ²³Na' re' nakre rallna'a Cristo, na' Cristo na' nake' rallna'a Dios.

Dan' nak rallna'a postl ka' gon ake'

Llaya'l gakbe're neto'n ba be'rento' re' xti'll Diosen'. nakto' be'nn wen xchin Cristo. Le'en ba bkwa'nne' rallna'to' wzejnie'to' be'nne da nono bnneze kana'. ²Na' llaya'l be'nn ka' llon xchine' gak ake' be'nn li, dan' bkwa'nne' rao na'a ake' gon ake'n. ³Na' ka nak nada' bibi de da wlliayi'llre nada'; ni koxchis ke yellrio ni, bibi de da wlliayi'll ake' nada', na' ni nada' kwina' bibi de wlliayi'll kwina'. ⁴Le lo ra'llda'wa' na', nnezra' bibi do'l kia' de, na' kere kone len na' nia' bibi do'l kia' de. Xanllo Jesucristo na'n nne cha' llona' kan' llaya'l gona' na' o cha' bi llona'n. ⁵Ke len na' bi llaya'l kwiaraore wlliayi'llre no be'nne. Le katen' yed Criston', kana'n nnézello da nono nneze nna', kana'n gakbe'llo kan' nak da yo' lo ra'llda'o be'nnach. Kana'n wroe' Diosen' noxhan' llon da wen na'.

⁶Be'nn bi'che, ba be'rena' re' di'll ke Apolos na', na' xti'lla' nada', kan' bzejnie'ra' re', nench na' sore gonre ka nne xti'll Dios na', le nllie'to' re', nench na' bi gakre be'nn ya'ra'lle, na' soraore gonre kaze lwelljre. ⁷¿Bixchen llákzere llonllre ye ra't ka nollre be'nne? ¿Bixha napre da bi nna gonn Diosen' re'? Rencha' Dios na'n ba benne' yeolol dan' llak llonren', ke len na' bi llaya'l gakre be'nn ya'ra'lle. ⁸Llákjere billbi yálljere, llákjere ba nakre be'nn za'k kwis rao Diosen', na' wak nnebia'tezre be'nne, na' llákere bill yálljere neto'. Yewejeto' chenak ba nakre ka to be'nn wnebia' kan' llákere na', na' rente neto' soto' nnebia'rento' re' txhen chenake. ⁹Neto' nakto' postl, llakra' Diosen' ba bene' neto' ka to be'nn le zerawe bibi za'ke, ka be'nn ba nllov ke ake' gat ake'. Na' be'nnachen' lla'a yellrio ni, ren angl lla'a yebá, llwia ake' kan' llak keto'n. 10 Na' dan' llonto' xchin Criston', be'nn zan llre'e akre' neto' ka be'nn bi llejnie'. Na' re', llre'e akre' re' ka be'nn llejnie' dan' ba llonlira'llre Cristo na', na' neto' llak akre' bibi zoeto' gonto'. Na' llak akre' re'n wak gonre veololte. Llon ake' re' xhen, na' neto' llwie akre' neto' kwis. ¹¹Llinte nna' lldeto' win. llbil lldonto', bi de xhara'nto', llakdilrén be'nne neto', na' bi zo rillto'. ¹²Le lljaxa'keto', le kone nia'na'to'n llonto' llin. Kate lla'dyi' no be'nne neto', yezi'llre llnnabto' rao Dios so ake' wen, na' kat llsa'kzi' ake' neto', llaora'llzto' bibi llon aketoe'. 13 Kat llasnnechach ake' keto', llalwillto' Diosen' gak wen ke ake'. Na' nna' nna lla'kze be'nn llon ake' neto' ka to no beb da'o, na' ka to da zban da ba bllo'nnra'll be'nne.

 14 Kere Ilzoja' da ni nench yeye'ren', Ilzoja'n nench wzejnie'ra' re', le nakre ka xhi'nna' nllie'ra'.
 15 Na' la'kze be'nn zan gakra'll wroe' wsed akre' re' ke Criston', bi cha'a zane' gak ake' ka xare. Zan nada' ka xaren' naka', le nada'n blliarawa' be'rena' re' Di'll Wen ke Xanllo Jesucriston'. ¹⁶Ke len na' lla'tyoera' re' nench nnaore gonre ka dan' llsedra' re'n.

¹⁷Ke len na' llse'la' Timoteon' gan' zore na'. Ba none' ka xhi'nna', le nake' be'nn li nxenra'lle' Xanllo Jesucriston'. Na' llse'le' nench lljasa'ra'lle' re' kan' zo beza' dan' naka' Criston' txhen, na' kan' llzejnie'ra' be'nn gateze, rente ga lldop ll-llay be'nn llonlira'll Cristo na'. ¹⁸Na' balre ba llakre be'nn ya'ra'll, llákere cha' bill yeda' gan' zore na'n. 19 Zan le yedtia' cha' Dios na' gonnchgue' latje. Na' kat yeda' na', kana' yedwia' be'nn ya'ra'll ka', cha' zorén vel wak ke Diosen' leake' o cha' kon ke ne akze'n. ²⁰Le kate Diosen' nnebie' yichjra'llda'o be'nne, yel wak ke'e na'n wroe', kere xti'll ake' na'zen' wroe' cha' llnebie' yichjra'llda'o ake'n. ²¹¿Akxhan' lle'nere gona'? ¿Yedtina' re' xhis, cha' yedyakrena' re' le nllie'ra' re'n?

To be'nne bazorene' xhna'zie', ka to xho're'

Llasné ake' radjre na' ren to be'nn lwelljre, na' ba zorene' xhna'zie'. Len naken to yel zdo' xhen, ni be'nn ka' bi nxenra'll Dios, bi ll-llin ake' gon ake' ka'. ²Na' llákere wen kwisen' nonre rao Diosen'. Llaya'l gákere, na' llaya'l yebejre be'nnen' non ka' radjre na'. ³La'kze bi zerena' re' txhen, ren spíritu na' zokzllo txhen, na' ba bchoybia' kan' llaya'l gonre ke be'nnen' non da xhinnjen'. ⁴Na' kat ndop llayre lloe'raore

Xanllo Jesucriston', legón xhbab naksllo txhen na', na' zokze Xanllo Jesucriston' llakrene' re' kone yel wak ke'e na'. ⁵Na' lekwej be'nnen' ka'le, legone' rallna'a daxi'o nench kweyi' da xhinnj ka' lla'a lo yichjra'llda'we'n. Ka'n gonre' nench na' cha' yella'a lo yichjra'llda'we'n, na' bi kweyie' ke chnare katen' llin lla yed Xanllo Jesucriston'.

⁶Bi gáksere cha' llonre wen kan' llonre na'. ¿Bi llakbe're ll-lli'o da xhinnjen' katen' lloe'llo latje, ka'n ne to di'll dan' llasné ake': "Ra'tze kwa binnen' llonen nench ll-lli'o yezjen' llaken da xhen"? ⁷Be'nn Israel ka' bi llao ake' yet xtir da nchixe kwa binn kat lla'l lnni Paskwn'. Bi lloe' ake' latje yega'nn ni ra't kwa binnen' rill ake'n rao lnnin'. Ka'kzen' ke lli'o llonlira'll Criston', bi we'llo latje cho' da xhinnjen' lo ra'llda'ollon'. Llaya'l kwejllo dan' yichjllo nench gakllo ka be'nn ba balla'a, le Criston' nake' ka to xhi'r da'o ban' bet ake' rao lnni Paskw na'. ⁸Ke len na' llaya'l kwej yichillo yeolol da xhinni kello nench gakllo ka to be'nn wen, sollo do yichj do ra'll-llo, na' gonllo da zej lixheje. Kan' gonllo na', zeje di'll lnni dan' ne Paskwn' zollo.

⁹Kana' bzoja' to yich keré, nia' bi gonre txhen be'nn ka' llasdá ke yel re'e ke ake'. ¹⁰Ker llepa' re' wabi'ytekzre chras radj be'nn ka' lla'a rao yellrio ni, be'nn ka' llon da xhinnj ren no'r ake, be'nn wzera'lle bi da de ke be'nne, be'nn wan o cha' be'nn ka' lloe'rao lwa'a lsa'ke na', le chenak naken ka', llonen bien wallojtekzllo rao yellrion' chenake. ¹¹Zan dan' nia' llaya'l gonllon',

bi gonrenllo txhen be'nnen' ne nxenra'll Criston', cha' nzoe' xtoe', na' cha' llone' billre da nak zdo' ren kwerp ke'e, na' cha' zera'lle' da de ke be'nne, na' cha' nxenra'lle' lwa'a ka', na' cha' de'e lloe' xti'll be'nne, na' cha' nake' be'nn wazó na' be'nn wan. Ni ke llaya'lze gaorenllo be'nnen' txhen be'nnen' llon ka'. ¹²Bi naken rallna'llo wchovbia'llo ke be'nn ka' bi nxenra'll Criston' cha' llon ake' da wen o cha' llon ake' da xhinni, zan lli'o lldop nxenra'll-llo Criston' llaya'lkze wchoybia'llo ke be'nn lwellillo cha' nao akteze' llon ake' da xhinnj. ¹³Dios na' wchoybia' ke be'nn ka' bi nxenra'll Criston', na' re', leyebej be'nnen' bnia' llon da xhinnjen' radjre na'.

Bi llaya'l gakdilrén lwellj lli'o ba nxenra'll Criston' rao koxchis be'nn ka' bi nxenra'll Dios

Llabanra' keré kan' llonren' dan' llao xhia ke lwellire, na' llejre lljawiare be'nn ka' bi nxenra'll Dios nench gon ake' yel koxchis kerén'. Re' ba brej Diosen' nak rallne'e, llaya'l nnabe lwelljre, nench leake' gon vel koxchis kerén'. ²¿Bi nnézere llin lla kate lli'o nak rallna'a Diosen', gonllo yel koxchis ke yezikre be'nn lla'a yellrio ni? Na' cha' ba llonllo yel koxchis ke ake'n, na' wakse gonllo yel koxchis ke bi da da'o bibi za'kteke. ³¿Bi nnézere wllin lla kat gonllo yel koxchis ke angl ka'? ¿Na' bi za'kchkello gonllo yel koxchis ke be'nn lwelljllo ka' lla'a yellrio ni? ⁴Na' kat de da gaore xhia ke lwelljre, bi chejre rao be'nn ka' bi llonlira'll Criston' gon ake'

1 Corintios 6 296

yel koxchis kerén', le be'nn ka' bibi latj ke ake' de radj be'nn ka' ba nxenra'll Criston'. ⁵Nia' ka' nench waye're dan' llonre na', nench bill gonre ka'. ¿Ni tore bi llejnie're gonre yel koxchis ke lwelljre kat bi da llak keré? ⁶¿Ke len na' lljataore xhia ke lwelljre rao koxchis, be'nn ka' bi nak txhen Cristo?

⁷Dan' llakyollrén lwelljre na'zen', llroe'n kreren' ba llonre. Wzollre nbaraz chenak llkwasre kalle chal bi llone be'nn lwellire re'. Wenre gaora'llre, na' we're lati wka'a ake' bi da de keré. 8Na' re' llka're bi da de ke lwelljre, na' da zan da llone lwelljre. 9 ¿Bi nnézkzere be'nn ka' nak be'nn wen da xhinni rao Diosen', bi yellín ake' gan' llia Diosen'? Bi we're latje no siye'e re', le zjani't be'nn zorén lwellj ake', na' bi nchayna'a ake'. Ni't be'nn llon ake' xhen lwa'a lsa'k ka', na' be'nn lljatil xho'r xhyio be'nn yobre, na' be'nn bxhej ak. 10 Na' zjani't be'nn llban, na' be'nn zera'll bi de ke be'nne, be'nn wazó, na' be'nn nnechach ke be'nne, be'nn ziye'e be'nn, nench kwane' da de ke'e. Ni to be'nn ki bi yellín ake' yebá gan' llia Diosen' llnebie'. ¹¹Balre ba benkzre ka da ki, zan nna' dan' ba nxenra'llre Xanllo Jesús na', ba bayib Spíritu ke Diosen' re', na' ba bavallre, na' ba bavonen re' rallna'a Dios nench nakre be'nn wen rawe'n.

Kwerp kello rallna'a Dios naken

12 Ne ake': "Wakse gonllo kon biteze da lle'nello gonllo." Zan kere yeolol dan' yo' rao na'llo gonllo na'n nak wen. La'kze cha' de latj gonllo biteze, bi we'llo latje nnebia'n lli'o. ¹³Na' leska' ne ake': "Lo le'llon' naken ke yel wao na', le yel wao dan' llaollon' llinten lo le'llo." Na' llepa' re', lo le'llon' ren yel wao na', llopten llin lla te ke aken. Na' kwerp kellon' bi naken da tarenllo no xtollo, na' gonllo billre da xhinnj, zan naken da gonrenllo da wen rao Xanllo Jesucristo na'. Na' Xanllo Jesucristo na'kzen' llakrene' gak wen ke kwerp kello na'. ¹⁴Diosen' basbane' Xanllo Jesucriston' radj be'nn wat ka', na' lekze wllin lla yesbane' lli'o kone yel wak ke'e na'.

15¿Bi nnézkzere txhen na' nakllo Criston', na' kwerp kello na' naksen ke'e? Na' bi llaya'l gonllo kwerp kellon' dan' nak ke Criston', rao na'a no no'r re'e ak. 16¿Bixha bi nnézeren' cha' re' zjatilre to no'r re'e, kwerp keré na' llaken toze ren kwerp ke'e na'? Le ka'n nyoj xti'll Diosen' nen: "Be'nn ka' llopte' gak ake' toze kwerp." 17Zan cha' lli'o gakllo toze kone Xanllo Jesucristo na', spíritu kello na' gaken toze kone Spíritu ke'e na'.

18 Ke len na' bi llaya'l gonllo ka da xhinnj ka' llon be'nn byio, na' no'r bi nchayna'rén lwellje. Le billre da xhinnj bi wlleyi'teken kwerp ke'en, zan be'nnen' llzoa no xto, wlleyi'te kwerp ke'en cha' ka' llone'. 19 ¿Bi nnézere Spíritu ke Dios na'n zo lo yichjra'llda'o totollo ka zo to be'nn rille'? Le Dios na'n ba bse'le' Spíritu ke'en, zon lo ra'llda'o lli'o nxenra'll Cristo na', ke len na' bi gak gonllo kon bi da nen kello, le kere lli'o llnebia' kwinllo. 20 Da za'k xhen na' bdixhj Diosen' ka nak bse'le' Xhi'nne'n badsre'e lli'o. Ke len na'

llaya'l gapllo Diosen' bara'nne lo yichjra'llda'ollo ren kwerp kello na'.

Pablon' lloe' di'll ke yel wachayna'a

Ni wallia' kerén' dan' llnnabre le' yich dan' bzojre nada'n, ni nia' re' cha' to be'nn byio bi lle'nre' sie' no're, da wenkzen' llone' chet ka'. ²Zan dan' zjalla'a be'nn darén ake' no're bi nak no'r ke ake', na' llon ake' billre da nak yel zdo', ke len na' wenre wchayna'a ake', toto be'nn byio so xho're', na' toto no're so xhyiwe'. ³Na' be'nn nak xhyio no'ren' llaya'l wzoe' di'll nonrene' xho're'n, leska' no'ren' llaya'l wzoe' di'll nonrene' xhyiwe'n. 4Le no'r na' bi gak nne'e to wrazze'n llnebie' kwerp ke'en, le renkze xhyiwe' na' llnebie' len. Na' leska' xhyiwe'n bi gak nne'e to wrazze'n llnebie' kwerp ke'en, renkze no'r ke'e na', llnebia'rene' rao kwerp ke xhyiwe'n. ⁵Kan' naken ke re' nchayna're, bi wllone lwelljre, zan cha' naken xti'll lloptere, wakse wsanre to chi'i cha' lle'nere yelwillre Diosen'. Te na' yezorén lwelljre da yobre, nench ke cha! bi zoere dan! la!a ke kerén', wko'yele daxi'on re' gonre da xhinni.

⁶Yeolol da ki ba bnia' kan' llona' xhbab dan' lle'nra' gakrena' re', na' kere nnello Dios na'n nllie' bia'a gonre kan' ba bnia' na'. ⁷Llawera' cha' yeololre so kan' zoa' nada'. Zan nnezra' nlla'a nlla'a yel waken' ba benn Diosen' totollo cha' bi da gonllo.

⁸Na' re' bi byio bi nna wchayna'a nna zo tozre, llakra' wenkzen' bi wchayna're, leska' re' no're ba got xhyiore, wenre chet ka' bi wachayna're, na' sore kan' zoa' nada'. ⁹Zan chet ka' bi gak sore tozre, wenre wchayna're chet ka', nench ke soteze so da xhinnjen' nnebia'n re'.

¹⁰Na' re' no're nchayna're, llepa' re' bi yera're be'nn kerén'. Na' kere da nia' nadza'n, Xanllo na'n nllia bia'a kan' llaya'l gonllon'. ¹¹Na' cha' to no're yera'rene' be'nn ke'en, llaya'l so toze', bi yezie' be'nn yobre o cha' wazi'xhene' ke xhyiwe'n, na' wayeje' lljazorene' le'e. Na' leska' re' be'nn byio re' nchayna'a, bi yera' ren no'r kerén'. ¹²Na' nia' re' ren yezikre be'nne, ka nak xhbab llona', la'kze cha' Xanllon' bibi bne'e ke da ki. Cha' to be'nne nxenra'lle Xanllo zorene' to no're bi nxenra'lle Criston', na' llazra'lle' sorene' le'e, bi llaya'l yera'rene' le'e. 13 Na' cha' no're zorene' to be'nn byio bi nxenra'll Cristo, na' llazra'lle' sorene' le'e, bi llaya'l yera'rene' le'e. ¹⁴Bi naken xhia rao Dios sorenre be'nn bvio bi nxenra'lle o no'r bi nxenra'll Criston', le Dios na' kwe' yichikze' lloptere dan' nxenra'll tore Le'e. Le chenak bi naken ka', xhi'nnre ka' nak akbe' ka xhi'nn be'nn bi nxenra'll Dios, zan bi naken ka', le renkze leakbe'n kwe' yichi Diosen'. ¹⁵Zan cha! be!nn keré o no!r keré bi nxenra'll Criston' lle'nre' wara'rene' re', ni ke dan' nxenra'llre Xanllo na', lewe'e latj le Diosen' bayaxhe' lli'o nench sollo nbaraz. 16 Ka'n llaya'l gonllo. Le ¿akxha llak nnezro' rwe' no're, cha' Diosen' wasre'e xhyi'on? Na' ¿akxha llak nnezro' rwe', be'nn byio, cha' Diosen' wasre'e no'r kolon?

1 Corintios 7

¹⁷Totollo llaya'l sollo gonllo dan' non Xanllo Diosen' rallna'llo gonllo kan' breje' lli'o nakllo rallne'e. Ka'n llepa' be'nne gon ake' gateze lldop ll-llay ake' llonlira'll ake' Criston'. 18 Cha' ba zore sen dan' nzi'i circuncisión kan' brej Diosen' re' nakre rallne'e, bi gonre nench yenit sen na'. Na' cha' bi nna sore sen na' kan' brej Diosen' re', bi nnabre wzoa ake' re' sen na'. 19 Bitbi gonen rao Dios, cha' nsa'llo sen ke circuncisión na', o cha' bi nsa'llon. Da naken lliarao, llaya'l gonllo dan' ba nllia Diosen' bia'a gonllo. 20 Ka'tezen' nakllo kan' brej Diosen' lli'o nakllo rallne'e, ka'tezen' gakllo so kwezllo. ²¹Cha' nda'ore nench nakre be'nn wen llin ke be'nne. bitbi gákere kan' nak kerén'. Zan cha' de lati chixhire, na' yellojre rao na'a xanren', lechixhjen nench yellojre. ²²La'kze cha' gokre be'nn wen xchin be'nne, ka to be'nn nda'o kan' brej Criston' re', nna' ba zere rao Xanllon' ka to be'nn bill nda'o. Na' lli'o bi gokllo wen llin ke be'nne ka to be'nn nda'o, Cristo na'n ba nak Xanllo nna', na' nnello wen llin ke Le'en nakllo. ²³Da xhen bele Diosen' kan' bselle! Xhilnne! ti'chen' nench bake'e lli'o rao na'a da xhinnjen'. Ke len na' bi llaya'l we'llo latj no be'nn yobre gonre' lli'o ka to be'nn wen llin, be'nn na'we'. 24 Ka'n naken be'nn bi'che, da yobre nia' re', ka'tezen' nakllo brej Diosen' lli'o nakllo rallne'e, ka'tezen' so kwezllo.

²⁵Na' kan' llaya'l gon no'r ka' bi nna wchayna'a; Xanllo Criston' bibi bllie' bia'a kan' gak ke ake'n, zan nada' nnia' kan' llakra' gon ake' na'. Le ba baya'chra'll Xanllon' nada', ke len na' za'ksen wzenayre di'llen' lloe'rena' re'. ²⁶Le ba za'a da yellayraollo nna', ke len na' llakra' wenll so kwezllo kan' ba zokzllo nna'. ²⁷Re' nchayna'a, bi yera'rén xho'r-re, na' re' bi nna wchayna'a bi we'la'lltekre wchayna're. ²⁸Bi naken da xhinnj cha' wchayna're, leska' bi naken da xhinnj cha' wchayna'a to no'r we'o. Zan be'nn ka' wchayna'n da zan da zed so ake' yellrio, len na' lle'nra' bi gak keré ka'.

²⁹Be'nn bi'che, lle'nra' yepa' re' da ki: Ye chollze de latj gonllo dan' nwia Diosen' gonllo. Ke len na' re' zo xho'r-re llaya'l sore gonre xchin Diosen', ka be'nn nono xho're' zo. ³⁰Na' re' zo ya'che, llaya'l sore gonre xchin Diosen' ka be'nn bi zo ya'ch. Na' cha' zore nbaraz, llaya'l sore gonre xchin Diosen' ka be'nn bi zo nbaraz. Na' cha' bi da si're, llaya'l sore gonre ka be'nn bibi bxhi'i. ³¹Na' cha' bi da de llonrenre llin yellrio ni, bi kwe' yichjre len, le da te ke yeolol da de yellrio ni.

³²Na' lle'nra' bi kwe' yichjre da ka' llak yellrio ni. Be'nne nono no'r zorene', na' nlatje' llbek yichje' llone' xchin Xanllo Diosen', na' zoe' llone' da llayazra'll Xanllon'.
³³Zan be'nnen' nchayna'a, lli' yichj be'nnen' da llak rao yellrio ni, le llone' xhbab akre wayazra'll xho're' na'.
³⁴Leska' bi llonen rebe ka nak ke no'ren' nchayna'n, na' ke no'r da'o bi nna wchayna'a. Le no'ren' bi nchayna'a nbek yichje' da nak ke Dios, na' zotekze' nench llone' xchin Diosen'. Zan ke nak no'ren' nchayna'a, lli' yichj be'nnen' da

de rao yellrio nga, na' llone' da llayazra'll xhyiwe' na'.

³⁵Da ni llepa' re' nench gakrena' re', kere nench ll-llona' wchayna'ren'. Llepa' re' ka' nench na' so kwezre nbaraz gonre xchin Diosen' do yichj do ra'llre.

³⁶Cha' to be'nne llakre' llaya'l we'e latj wchayna'a xhi'nne' no'ren', dan' ba llde yel we'o kebe'n, na' ba lle'nebe' wchayna'be', naksen wen gone' kan' ba bene' xhbaben', na' we'e latj wchayna'a xhi'nne'n.

³⁷Na' cha' zo be'nne llakre' wenre nono wchayna'rene', na' nnezre' wzoekzre' soe' toze', naksen wen kan' lle'nre' gone'n.

³⁸Ka'n naken, be'nnen' lloe' xhi'nne'n llchayna'be' llonkze' wen, na' be'nnen' bi lloe' xhi'nne'n llonlle' wen.

³⁹Na' noteze no'r nchayna'a, llaya'l sorene' be'nn ke'en, zan cha' ba got be'nn ke'en, wakse yezie' be'nn yobre, kon be'nn nxenra'll Xanllo Cristo na'. ⁴⁰Na' nada' llakra' wzolle' nbaraz cha' yega'nne' bi wachayne'e. Na' llakra' xhbab kia'n naken rebze ren Spíritu ke Diosen'.

Yel wao dan' ll-llia ake' rao lwa'a ka'

Akre llaya'l gonllo ke yel wao ka' ll-llia ake' rao lwa'a ka'.

Nnézello yeolol-llo llejnie'llo akren' llaya'l gonllo. Zan yel llejnie' kellon', kon llonen llonxhen kwinllo. Zan katen' nllie' lwelljllon', llayirjla'll-llo akre gonllo nench gakrenllo lwelljllon'. ²Na' cha' llákello ba byejnie'llo kwasro doxhen kan' naken na', llaya'l yeyakbe'llo bi nna llinllo ka to llaya'l chejnie'llo.

³Zan cha' nllie'llo Diosen', Diosen' nombie' lli'o.

⁴Na' ka nak yel wao dan' ll-llia ake' rao lwa'a ka', nnézello lwa'a ka' bibi za'k aken rao yellrio ni, le toze Diosen' nak. ⁵Da li zjani't da zan da llasné be'nnach nak dios ke ake', ka da de yebá, na' da de yellrio ni, na' llonlira'll ake'n ne ake' len na' nak dios ke ake'. ⁶Zan ka nak lli'o nnézello toze Xallo Diosen', na' toze Xanllo Jesucriston' za'ken wxenra'll aklloe', le Leake'n bzo ake' lli'o rao yellrio ni, na' ben ake' yeololte da zjadé yellrio.

⁷Kere yeolol be'nne llejnie' akre' da ki. Bal ake' yo'rao ake' llak akre' be'nn za'k lwa'a ka', na' kat llasa'o ake' yel wao, da ka' bllia ake' rao lwa'a ka', na' llak akre' da nak ke lwa'n llao ake'. Ke len na' lo yichjra'llda'o ake', bi zo ake' wen llakgan akre', le bi nna chejnie' akre' akren' naken na'. ⁸Ka nak yel waon' bibi de gonen nench yewé Diosen' lli'o, na' ni ke ll-llonzen yewé Diosen' lli'o cha' gaollon o cha' bi gaollon. 9Na' bal be'nne bi nna chejnie' akre', kere bi gon dan' rao Dios cha' bi da ye'j gaollo. Ni ke leake'n llaya'l wiallo kan' gonllon', nench na' bi yexj ake' rao da xhinnjen', ni ke dan' ye'j gaollo na'. 10 Re' nnézere kwasro kan' naken na'. Na' cha' to be'nne bi nna chejnie're', re're' kan' llonre llaorenre da ka', na' gakre' wakse gone' kan' llonren'. ¹¹Na' dan' nnello llejnie'llon', wakte wlleyi'llo to be'nn lwelljllo be'nn nna llakgane, la'kze cha' bzane kwin Criston' gote' ni ke le'e. ¹²Na' kat dan' llonllo na', llonen nench llzorao gatra'll lo yichjra'llda'o to be'nn za bxenra'lle. Cristo na'kzen'

llonllo da xhinnj ke'e, cha' ka' llonllo. ¹³Ke len na' nia', cha' dan' llawa' be'ren', llonen nench wlli'yen be'nn lwellja'n yexje' rao da xhinnj, kbatlle gawa'n nench ke yexje' rao da xhinnjen'.

Pablon' ne'e nake' dogarje postl

Nada' naka' postl na' wak nnaba' gónere nada' kan' llónere yezikre be'nn lloe'rén re'n xti'll Diosen'. Le nada' bre'ra' Xanllo Jesúsen', na' bena' xchine' gan' zoren', na' ke len na' llonlira'llre. ²Na' la'kze cha' bi llejle' yezikre be'nne naka' postl, re' ba llejle're naka' postl, le dan' llonlira'llre Xanllo na', llroe'n da likzen' Le'en bse'l nada'.

³Ki llallia' xti'll be'nn ka' llasné, kere Diosen' bse'l nada' naka' postl ke'en: ⁴Dekze latj kia' nnaba' da ye'j gawa'. ⁵Na' wakte wchayna'rena' to no're nxenra'll Criston' chenake, nench yechie' gan' lljena' xchin Dios na', kan' non Pedron' nchayne'e, na' kan' non postl ka' yela', na' kan' non be'nn bi'ch Xanllo na'. ⁶¿Na' llákere nada' ren Bernabén' bi gak wsanto' gonto' llin kone nia'na'to', ka llon no be'nn yobre?

⁷Gaga zo to be'nn waka'a ya cheje' rao wdile, na' chixhje' kwine' ke gaxt ke'e. Na' nono gaz yay uvas, na' bi gawe' uvas ka' kat kwian.

Leska' gaga zo be'nne gape' xhi're, na' bi ye'jrize' ra't xhi'llba' katen' wsie'n na'. ⁸Na' kere xhbab kia' nadza'n dan' nia' ka', lekze ka'kzen' ne ley dan' bzoj da Moisésen'. ⁹Ki bzoje' le' leyen': "Bi wsejre lloa' bell kate llrejchekwba' trigon' nench

lloj xhe." Na' kere bne Diosen' ka' dan' llakzedre' bell ka'. 10 Bne'e ka' nench llzejnie're' lli'o kan' llaya'l gonllo ren be'nn ka' llon xchin Diosen', ke len na' ne'e, be'nn llwa'nn bellen', na' be'nn lloncha'o trigon', llon ake' rez yezi'i ake' ra't weje dan' yerap ake' na'. 11 Na' neto' nakto' ka to be'nn ba goz xti'll Diosen' radjre na'. ¿Bixha bi gak yezi'to' ra't ke to dan' ba benla'y Diosen' re'? 12 Le cha' be'nn yobre ba be're leake' ra't ke to da benla'y Diosen' re', leska'kze neto' llaya'l gonnre neto' arke da ba benla'y Diosen! re!.

Zan bi nna wchie'to' re' na'. Na' ba bento' banez biteze da gok keto' nench na' bitbi bllon kan' be'rento' re' Di'll Wen ke Criston'. ¹³Le nnézkzere be'nn ka' llon llin lo voda'o ke Israelen', nbanrén ake' dan' lloe' be'nn Israel ka' ke yoda'on, le lljakwa'nn ake' ra't weje bayi'x ka', ban' llot ake' rao Diosen', na' llao be'nn ka' llon llin lo yoda'o na' leakba'. 14 Ka'kzen' nllia Xanllon' bia'a gonllo, be'nn llzenay xti'lle'n llaya'l we'e ake' bi da yallje be'nnen' lloe'rén leake' xti'll Jesucristo na'. ¹⁵Zan nada' bi nna nnabra' re' gonnre da valljra', na' kere llzoja' da ni ke len na'. Wenjere gata' ker ka da nnabra' re' gonnre dan' yalljra', le nada' llawera' kwis bibi gan llona' dan' llyixjwe'ra' xti'll Criston'.

¹⁶Bi nnia' okrén' llona' llyixjwe'ra' Di'll Wen ke Jesucriston', le naken da llaya'l gona'. iNya'chraz naken kia' cha' nada' bi chixjwe'ra'n! ¹⁷Ke len na' cha' lloe'rena' re' xti'll Diosen', ni ke dan' gorjen lo yichjra'llda'wa', dekze raxhja' chenake; zan llona'n le Le'en ba broe'n rallna' chixjwe'ra'n re', na' zeje di'llen' ba llonza' ke da ba bro' Diosen' lo na' gona'n. ¹⁸Na' cha' nnábere nada' bixha llkwa'nnen kia' dan' llyixjwe'ra' xti'll Diosen', na'll nnia' llkwa'nnen da llawera', le bitbi raxhja' zia' llyixjwe'ra' xti'lle'n, la'kze nakten da si'i raxhja' chenake.

¹⁹La'kze bi naka' ka to be'nn wen llin ke be'nne, llxhexj yichja' llon kwina' ka to be'nn wen llin ke veololte be'nne nench chan be'nn ak gonlira'll ake' Cristo na'. 20 Na' kan' zoa' gan' lla'a be'nn Israel ka', benteza' kan' llon ake' na'. Na' bena' kan' ne ley dan' bzoj da Moisés na' (la'kze nnezra' bibi de llon leyen') nench na' wzenay ake' kat we'rén ake' xti'll Diosen'. 21 Na' kan' zoa' gan' zjalla'a be'nn ka' bi nombia' ley dan' bzoj da Moisésen', benteza' kan' llon ake' na', le lle'nra' wzenay be'nn ka' bi nombia' ley na'. Na' bi nnello bkwasa' ka'le kan' ne Diosen'. le zoa' llona' kan' ne ley ke Cristo na'. ²²Na' kat zoa' gan' zjalla'a be'nn ka' bi nna cheile' doxhen kan' nak ke Criston', llona' kan' llon leake' na', nench na' wzenay ake' kia'. Ka'n llona' nench gak wzejnie' akllre'. Llon kwina' rebze ka yeolol be'nne nench gakrén ake', na' cha' bal ake' wxenra'll ake' Criston'. ²³Llona' yeolol da ki nench wak we'rén ake' xti'll Criston' nench na' wak sorena' nbaraz ren yezikre be'nne llzenay xti'll Criston'.

²⁴Ba nnézkzere kate llxhonnj txhonnj be'nne nench si'i ake' to da gon ake' gan, yeolole' za'do res, la'kze cha' toze'n gon gan, na' sie' da gone' gan na'. Ka'n gonre re' zore llonre xchin Diosen' do yichj do ra'llre, nench wzoe' re' nbaraz kat yellinre gan' llie' na'. ²⁵Be'nn witj ka' llon ake' banez bi llon ake' ka lle'ne kwerp ke ake'n, nench llak ake' be'nn war, le lle'n akre' gon ake' gan katen' chitj ake'n, nench si'i ake' dan' gon ake' gan na', la'kze nak dan' si'i ake'n da te ke. Na' lli'o llzenay ke Diosen' si'llo to da wenll da bi te ke. 26 Ke len na' bi gona' nada' ka to be'nn llxhonnje kon to llxhonnje', na' bi nnezre' ga yelline', o ka to be'nne dil kon ba dile', na' ni ke nnezzre' gan' kwa'lle'. ²⁷Bi llzenaya' ke da xhinnjen' kate nen gona' da xhinnj ren kwerp kia'n. Zan llona' kon ga zerao zoera' nench yeyazra'll Diosen', nench ke wnita' latjen' ba bena' gan ke nak ba bdixjwe'ra' xti'll Diosen'.

Bi llaya'l we'raollo lwa'a ka'

Be'nn bi'che, lle'nra' yeololre lljadinra'llre xozxta'ollo ka' blla'a ake' to xhan bej dan' bse'l Dios, na' yeolol ake' bla'y ake' radj nisda'on nzi'i Nisda'o Xhna. ²Na' yeolole' gok ake' txhen da Moisésen' kan' bche'e leake' gan' blliarao bejen' rao ake' na', kan' bde ake' lo nisda'on, gok ke ake' ka be'nn blloa nis lo bejen', na' lo nisda'on. ³Na' yeolole' bdao ake' toze yel wao da be'e Diosen' leake'. ⁴Na' yeolole' we'j ake' toze nis da be'e Diosen' leake'. Na' nis dan' we'j ake'n goren to le' yej, na' yejen' lle'nen nen Criston' goke' yejen' gan' gor nis na'. 5La'kze gokrén

1 Corintios 10 302

Diosen' leake', zane' bi ben ake' kan' llazra'll Diosen', ke len na' wasa't ake' lati dachen'.

⁶Na' yeolol kan' gok ke ake' ni, llzejnie'n lli'o bi llaya'l sera'll-llo gonllo da xhinnj kan' ben leake' na'. ⁷Ke len na' re', bi gonlira'llre lwa'a lsa'k ka' kan' ben leake'. Le nyoj xti'll Diosen' nen: "Blle' ake' we'j bdao ake', na' bzo ake' ben ake' lnni ke lwa'a ka'." 8 Na' leska' bi llaya'l sorenllo no'r be'nn bi nak no'r kello, na' be'nn byio bi nak be'nn kello, kan' ben leake'n kana'. Ke len na' toze lla wasa't chonnalloa mire' (23,000) yel wen da xhinni ke ake' na'. ⁹Bi llaya'l wko'yelello Xanllon' gone' da ba llwie' gone'. Le bale da xozxta'ollo ka', bi byejle' ake' kana' gakrén Diosen' leake' kan' bne'e na'. na' bse'le' bel znia betba' leake'. ¹⁰Leska' bi llaya'l tare nnere ke Diosen' kan' ben bale da xozxta'ollo ka' kana', na' bse'le' to angl ke'e be'nn bet leake'.

11 Yeolol da ki gok ke ake'n, nyojen le' xti'll Diosen' nench na' llzejnie'n lli'o akren' llaya'l gonllo zollo nna', le ba zo rez yeyoll yellrion'. ¹²Ke len na' be'nn llakre zetipe' nxenra'lle' Jesucriston', llaya'l wiaya'nne' akren' gone' nench bi yexje' rao da xhinnjen'. ¹³Re' bi nna tere rao da wallayraore ka da bi llzoe be'nnach. Le zokze Diosen' llakrene' lli'o, bi lloe' latj gak kello da bi soello. Na' llzejnie're' lli'o akre gonllo nench soello bi da ka' llak kellon'.

¹⁴Ke len na' bi'cha' nllie'ra', bi gonlira'llre be'nn non ake' ka lwa'a lsa'k ka'. ¹⁵Ba llejnie're, na' wak gonre xhbab ke da ki llzejnie'ra' re', nench na' chejnie're di'll za'ken lloe'rena' re'. ¹⁶Na' kat llnnabllo rao Diosen' gonla'ye' dan' lle'illon' kat lljadinra'll-llo kan' gok got Criston', dan' lle'illo na' llroe'n nakllo txhen Criston', na' zi'llo banez dan' bene'n kan' brarj xchene'n, na' gote' le' yay cruzen'. Leska' katen' llxhoxhjllo yet xtiren' na' llaollon, llroe'n nakllo txhen Criston', le zi'llo banez dan' bene'n kan' bzane' xpe're'n bxha'kzie' ni ke lli'o. ¹⁷Na' toze vet xtir na' llxhoxhillo llaollo ra't wejen', yo'y lli'o nxenra'll Cristo na', naksllo toze ren be'nn lwellillon', le toze yet xtir na' llaollo txhen.

¹⁸Lewiá kan' llon be'nn Israel ka', llot ake' bayi'x kat lloe'rao ake' Dios, na' noteze be'nne llao ake' xpe'rba'n, llak ake' txhen lloe'rao ake' Diosen'. 19 Na' kan' nia' ni, kere nia' lwa'a lsa'k ka'n za'k aken, na' ni kere yel wao ka' ll-llia be'nn ka' rao aken na'n za'kllen ka billre yel wao. ²⁰Na' kan' llepa' re' ni, kat to be'nne ll-llie' yel wao rao lwa'n dan' llonlira'll ake' na', rao daxi'on ll-llie'n, kere rao Diosen', na' bi lle'nra' gonre txhen daxi'o ka'. ²¹Le bi gak ye'j gaollo da lle'j llaollo katen' lljasa'ra'll-llo akre zejen dan' got Xanllo Criston', na' ye'j gaotello dan' lloe'raorén ake' daxi'o na', le bi gak ye'j gaollo llopten. ²²Wcha'llo Diosen' cha' ka' gonllo. Le kere llonll lli'o kerke Dios na'n, na' soello bi da gonre' lli'o.

Yeololte bi da gonllo llaya'l gonxhenllo Diosen'

²³Wakse gonllo biteze, zan kere yeolol dan' gonllo na'n naken da wen; la'kze cha' wakse gonllo biteze, kere yeolol dan' gonllo na'n gakrenen lli'o. ²⁴Ni tollo bi llaya'l gonllo da wen kezllo, llaya'l wiakzllo be'nn lwelljllo ka'.

²⁵Wak gaore biteze be'r da llo't ake' lao ya'a, bi wnnabre cha' bllia ake'n rao lwa'a dan' llonlira'll ake' na', nench ke gákere cha' naken xhia keré gaoren. ²⁶Le xti'll Dios dan' nyojen nen: "Yellrio ni, na' yeololte da de naksen ke Xanllo Dios."

²⁷Na' cha' to be'nne bi nxenra'll Cristo na', gaxhe' re' rille' lljataorenre', cha' ba zejre, na' gaore biteze da gonne' re', bi nnabre cha' naken da ba bllie' rao lwa'a ke'e, nench ke gákere cha' naken xhia keré gaoren. ²⁸Zan cha' to be'nne ye'e re': "Da ba bllia' rao lwa'a da ni", wenre bi gaoren nench ke gake be'nnen' bne ka', renkzren' llonlira'llre lwa'a ka', na' bi so wen lo yichjra'llda'we', le ke Xanllo na' nak doxhente yellrio, na' yeololte bi da de rawe na'. 29 Zan dan' yo' lo yichira'llda'o be'nnen' nia' ka', kere ke re'n nia' ka'. Na' ¿bixchen wlliayi'llriz be'nn yobre nada' kate llona' bi da nnezra' bi naken da xhinnj, la'kze le'en llakre'n da xhinnj? ³⁰Rencha' lloe'tia' yel llioxken ke Dios kate bi da llawa'. ¿bixchen zi'chi'll akze' nada' ke dan' llawa' na'? ³¹Kin' naken, cha' lle'i llaollo, na' biteze da llonllo, llaya'l gonllo da we'xhenllo Dios. 32 Na' bi llaya'l gonllo biteze da wxhexi be'nne gone' da xhinni la'kze be'nn nak be'nn Israel, o la'kze be'nn bi nak be'nn Israel o cha' lli'o lldop llllayllo llonlira'll-llo Diosen'. 33 Kan'

llona' nada', llayirja' ka llona' nench noteze be'nne soe' nbaraz. Bi llayirja' da gakrén kwina', llona' da gakrén be'nne nench na' yerá ake'.

Na' lla'tyoera' re' gonre kan' llona' nada', le nada' llona' kan' ben Cristo na'.

Dan' llaya'l gon no'r ka' gan' lldop ll-llayllo lloe'raollo Dios

²Na' nna' nia' re', llonre wen lljadinra'llre nada', na' llonre ka dan' bzejnie'ra' re' na'. ³Na' lle'nra' chejnie're da ni, Criston' nake' be'nn lliarao rao be'nn byio ak. Na' be'nn byio ka' nak ake' be'nn lliarao rao no'r ka'. Na' Dios na' nake' be'nn lliarao rao Criston'. ⁴Noteze be'nn byio, cha' nzoateze xhla'pe' kat llalwille' Dios gan' lldop ll-llayre llakre txhen, o kat bi da llyixjwe're' da ne Dios, bi lloe'xhene' Criston' chet ka', le Cristo na' nake' be'nn nell ka le'e. ⁵Na' cha' to no're llalwille' Dios o cha' llyixjwe're' da ne Diosen', na' bi nkwa'ch yichje', bi llape' xhyiwe'n bara'nne, le be'nn byio na'n nak be'nn nell ka le'e. Na' no'ren' llon ka', rebze llone' ka be'nn ka' nchib yichj. 6Na' cha' bi lle'ne no'ren' wkwa'ch yichje'n kan' nia' na', wenre wchibe' doxhen yich yichje'n. Na' cha' llakre' zdo' wchibe'n, wenre wkwa'che'n kan' llon yezikre no'r ka'. ⁷Na' be'nn byio ka', bi llaya'l wkwa'ch yichj ake'n, le leake'n llroe' akre' katek za'k Diosen'. Zan no'r ka', llroe' akre' katk za'k xhvio ake'n. 8Le kere llit lcho' no'r na'n ben Diosen' be'nn byion', llit lcho' be'nn byio nell na', len na' bene' no'r na'.

1 Corintios 11 304

⁹Le Diosen' bi bene' be'nn byion' gakrene' no'r na', no'r na'len' bene' gakrene' be'nn byio na'. 10 Ke len na' llaya'l wkwa'ch yichj no'r ka' nench nroe'n, be'nn byio ka'n nakll lliarao ka leake', ka'n gon ake' ni ke angl ka'. 11 Zan naksllo txhen Xanllo Jesucriston', ka no're, na' be'nn byio; na' bi llaya'l nne no'ren' bi yallire' be'nn byio, na' be'nn byion' bi nne'e bi yalljre' no'ren'. 12 Le llit lcho' be'nn byio na'n brej Diosen' bene' no'r na', leska' yeololte be'nn byio zo no're bxhan leake', na' yeololtekze bi da de naksen da ben Dios.

13 Lennechk re', ¿naken lixhej to no're llalwille' Diosen', na' bi nkwa'ch yichje'? 14 Na' lekze naken to zdo' kat to be'nn byio bi wchib yichje'n, nllie'n tonn ka llia ke no're. 15 Zan naken to bara'nn xhen na' ke no'ren' we'e latj wllia yichje'n tonn, le Dios na'n none' yich yichje'n to da wkwa'ch yichje' na'. 16 Na' ka nak yeololte di'll ka' ba be'rento' re', cha' nolre lle'nere gakyollrén lwelljre, neto' postl, na' gallre ga lldop ll-llay be'nn llonlira'll Dios, bi llonto' billre da yobre.

Kat llao ake' bi lljadinra'll ake' Criston' kan' bene' bdaorene' postl ke'e ka' xche'

¹⁷Na' de ye to da nnia' re', le bi llonre wen katen' lldop ll-llayre llonxhenre Criston', na' bi llakrenen re', le bi llonre wen. ¹⁸To da bi llonre wen, ne ake' katen' lldopre lloe'raore Criston', bi llonre txhen lwelljre, na' llakra' nakjen li kan' ne ake' na'. ¹⁹Na' ka'jen' llaya'lkze gak dan' bi llonrenre txhen lwelljre na', le len na' wroe'n noxhan' nxenra'll Criston' do yichj do ra'lle', na' non' bi nxenra'll Le'e. 20 Na' kat lladop llallayre, kere nnello llaore txhen na', nench lljasa'ra'llre yel got ke Xanllo Jesucriston'. ²¹Na' kat lldopre gaore txhen na', totore llje'xre kon da lldo'lere, ni ke bexhze lwelljre, na' balre nna donzre kat lladaoren', na' ye balre lle'i llaoxenre. 22 ¿Bi zo rillre na' gaore na'zen'? Katen' llonre ki, llkwasre chla're dan' nak ke Diosen', na' re' dan' llonre ka', llakya'che be'nn bibi de ke ake'. Len na' naken da xhinnj kwis kan' llonre na', na' bi gak nnia' wen na' llonre ka'.

Jesúsen' broe're' kan' lljasa'ra'll ake' yel got ke'en

(Mt. 26:26-29; Mr. 14:22-25; Lc. 22:14-20)

²³Xanllo Jesúsen' bzejnie're' nada', na' ba broe'ra' re'. Ka lle'n bde Judasen' Le'e rao na'a be'nn ka' bwie Le'en. Xanllo Jesúsen' be'xe' to yet xtir. ²⁴Na'll be'e yel llioxken ke Diosen', bayoll na' na'll bxhoxhje'n, na'll bne'e: "Lesi'n, Legaon. Da nin' nak kwerp kia' dan' ba bia'a ni keré. Kin' gonre lljadinra'llre nada'." ²⁵Leska' bene' ka bayoll badao ake' xche'n, bxhie' to leo da'o xis uva, na' bne'e: "Dan' yoll lo leo da'o ni, naken to da llroe'n sorao to da kob dan' bcheb Diosen' gakrene' be'nnach. Na' larj xchena'n nench gaken da li. Na' batteze kat ye'jre ka dan' llonna' lle'jre ni, lelljadinra'll kan' bena' bzane kwina' got ake' nada'." 26 Ke len na' yo'y ras kat llaore yet xtir na', na' lle'jre xis uvan', lljasara'llre kan' bzane kwin Xanllon' gote', llinte lla yede' da yobre.

Akren' llaya'l gonllo katen' ye'jllo xis uvan', na' gaollo yet xtiren' lljadinra'll-llo kan' gok got Xanllon'

²⁷Kan' naken cha' llaollo yet xtiren', na' lle'illo nis uvan' nench lljasa'ra'll-llo yel got ke Xanllon'. Zan cha' bi llapllo bara'nn kan' zejen na', katen' lle'j llaollon na', naken xhia kello, le llonllo ka to da bibi za'k kwerp ke'en, na' xchene' na'. 28 Ke len na' llaya'l gonya'nnllo xhbab cha' nak ra'llda'ollon' yall rao Diosen' ka za gaollo yet xtir na', na' ka za ye'illo xis uva na'. ²⁹Le cha' ye'j gaollo, na' bi llonllo xhbab bi zejen dan' bzane kwerp ke Xanllo gote' ni kello, kwinzllo llxoa do'l ko'll-llo, cha' ka' llonllo. ³⁰Ni ke dan' bi llapre bara'nn dan' ben Criston', zanre bi zore wen llakre no yillwe', na' ye balre ba wasa'te. ³¹Na' cha' llwiaya'nnllo akre nak yichjra'llda'ollo, bibi do'l llxoa ko'll-llo chenake. 32 Na' ka nak ba nxoa do'l ko'll-llo dan' bi llwiallo lo yichjra'llda'ollon' cha' naken yall katen' lle'j llaollo na', ke len na' Xanllon' llsa'kzie' lli'o nench na' bi wsa'kzie' lli'o ke chnare kan' gak ke be'nn ka' bi llonlira'll Le'e.

³³Ke len na' be'nn bi'che, kat lldop ll-llayre nench ye'j gaore txhen, lekwexh lwelljre, na' ye'j gaore txhen. ³⁴Cha' balre donre, llaya'l gaore lo yo' ga zore nench ke yedop yellayre, na' wxoa xhia do'l ko'llre, na' wsa'kzi' Diosen' re'. Na' da ka' yela' koa' xhnneze kat yeda' gan' zore na'.

Yel wak dan' llonn Spíritu ke Diosen' llon totollo

12 Be'nn bi'che, nna' lle'nra' nnézere ke dan' llon Spíritu

ke Diosen' llakrenen toto lli'o nxenra'll Jesucriston' nench llak llonllo xchine'n.

²Nnézkzere kan' bi nna gonlira'llre Criston', bi nnézere bi da ka' benre, na' byejle're ke lwa'a ka' da ka' bi llak nne, bxhoben re' nez yobre. ³Na'llen' lle'nra' chejnie're da ni nna'. Noteze be'nne nne: "Wa llwiera' Jesúsen!", bibi Spíritu ke Diosen' zorén be'nnen'; zan be'nn nne: "Jesúsen' nake' Xanllo", le'en yo'kze Spíritu ke Diosen' lo ra'llda'we' llakrenen le'e.

⁴Toze Spíritu ke Diosen' zo, zan nlla'a nlla'a nak dan' llonnen totollo nench na' gak gonllo xchine'n. ⁵Nlla'a nlla'a ka llon totollo xchin Diosen' la'kze toze Xanllo Jesucristo na'n nxenra'll-llo. ⁶Na' la'kze nlla'a nlla'a da llon totollo. toze Diosen' llone' nench totollo za'ke llonllo xchine'n. ⁷Nakbie'kze zorén Spíritu ke Diosen' lli'o, le totollo llak llonllo da llakrén yeololllo. ⁸Le Spíritu ke Dios na', llonen nench bal-llo llzejnie'llo be'nne yel si'n ke'e na', na' lekze Spíritu na'n llonen ye bal-llo nnézello bi da nnézello, na' llzejnie'llon be'nne. ⁹Na' toze Spíritu ke'e na'kzen' llonen nench na' bal-llo llonlira'llllo Diosen' kwis, na'll llak biteze da llnnábelloe'. Na' dan' llakrén Spíritun' lli'o, bal-llo llak llonllo nench llayak no be'nn llak yillwe'. ¹⁰Na' Lekze Spíritu na'n llonen llak llon bal-llo yel wak, na' ye balllo llak llyixjwe'llo bi da ba bne Diosen' lli'o. Na' kone Spíritu ke Dios na'kzen' llonen llakbe'llo bi da llasné be'nne, cha' za'n ke Dios o cha' za'n ke daxi'o, na' ye bal-llo,

1 Corintios 12 306

llonen nench lloe'llo wde wdere di'll da bi nsedllo, na' ye bal-llo llak llanello akre zej di'll ka' da ka' bi nsedllo. ¹¹ Zan toze Spíritu ke Dios na'kzen' llakrenen yeolol-llo nench llonllo dan' lle'nen gon totollo.

Yeolol lli'o nxenra'll Criston' nakllo ka toze be'nne

¹²Kwerp kellon' naken zan kwen, na' ngo'den naken toze. Na' ka'kze lli'o nxenra'll Criston', nakllo ka toze be'nne. ¹³Na' ka'kzen' bal-llo nakllo be'nn Israel, na' ye bal-llo bi nakllo be'nn Israel. Bal-llo nakllo be'nn zo xan, na' ye bal-llo bi zo xanllo. Zan yeololkzllon' blloa nis nench na' broe'n toze Spíritu ke Diosen' zorenen lli'o.

¹⁴Ka'kzen' kwerp kellon' nsa'n zan kwen, na' nlla'a to kwen wejen'. ¹⁵Chenak llak nne nia'llon', na' nnen: "Bi naka' kwerpen' toze, le bi naka' ne'e", na' la'kze cha' nnen ka', naksen kwerpen' toze. ¹⁶Na' chenak llak nne nayllo, na' nen: "Bi naka' kwerpen' toze, le bi naka' yejrawe'", na' la'kze cha' nnen ka', tozen naksen kwerpen'. ¹⁷Cha' doxhen kwerp kellon' naken yejraollo, ¿akxha gak yénello? Na' cha' doxhen kwerpen' naken nayllo, ¿akxha gak cho' xhi'nllo chenake? ¹⁸Zan Diosen' ba bzoe' da ka' nsa'a kwerp kellon' kon ga yalljen kan' byazra'lle'. 19 Bi nya' kwerp kellon' chenak nsa'n toz ke dan' nsa'n. ²⁰Na' la'kze nsa'n zan kwen na', na' wde wdere llon aken llin, na' toze nak aksen kwerpen'.

²¹Ke len na' yejraollon' bi gak yen na'llon': "Bi yalljra' rwe'." Ni yichjllon' bi gak yen nia'llon': "Bi yalljra' rwe'." 22 Na' la'kze cha' bal kwen kwerp kellon', llákello bi nakteken da war, zan yallikzen. ²³Na' la'kze kwe' kwe' kwerp kellon', llákello bi za'kteken, zan lli' yichillon', ke len na' llak xhara'nllo. Na' zo ga bi lle'nello re'e be'nne, na' llkwa'chllon ren xhallo na'. ²⁴Na' da nsa'a kwerp kellon' da nak nbaraz, bi yalljen wkwa'chllon. Na' Dios na' llone' lli' yichillo gan' zo da ka' bi nak nbaraz. ²⁵Na' none' kwerp kellon' toze nench kwe' kwe' llapchi'i lwellje, na' llon aken llin txhen. ²⁶Na' cha' ga zo llak, doxhen kwerp kellon' bi zo wen. Na' cha' zo ra't ga zo nbaraz, doxhenllo llawé.

²⁷Na' lli'o nxenra'll-llo Criston'. yeolol-llo ngo'dllo ka to kwerp naklloe' txhen, na' twej twejllo nakllo ka to kwen wej dan' nsa'a kwerpen', na'llen' llak llonllo wde wdere da ba ngo' Diosen' rao na'llo gonllo. ²⁸Na' ka nak lli'o lldop ll-llayllo llonlira'll-llo Criston', da nell brej Diosen' bal be'nn nak postl, na' da wllope breje' bal be'nne nench chixiwe' akre' dan' llne Diosen' leake'. Na' da wyonne breje' ye bal be'nne llroe' llsede xti'lle'n. Na' leska' breje' be'nn llon ak yel wak, na'll breje' be'nn llayón be'nn we'e, na'll breje' be'nn llakrén be'nne kat bi da yallj akre', na'll breje' be'nn llnebia' lli'o lldop ll-llayllo llonlira'll-llo Criston', na'll breje' be'nn lloe' wde wdere di'll da bi nsed ake'. ²⁹Na' ke len na' kere yeolol-llon' nakllo postl. Na' kere yo'yllon' llak llyixjwe'llo bi da ne Dios. Na' kere yo'yllon' llak llroe' llsédello be'nne xti'lle'n, na' kere yo'yllon' gak gonllo yel

307 1 Corintios 12–14

wak. ³⁰Na' kere yo'yllon' gak yeyonllo yeyak be'nn we'e. Na' kere yo'yllon' llak lloe'llo wde wdere di'll da bi nsedllo. Na' kere yo'yllon' llak llzejnie'llo akre zej di'll ka'. ³¹Lewe'la'll nench gakrén Spíritu ke Diosen' re', nench gak gonre da ka' nak da za'klle. Na' nada' wroe'ra' re' ye to da za'klle da llaya'l so kwezrenllo.

Llaya'l llie' lwelljllo

Na' cha' llakllo di'll da llak be'nnach, na' llak nnello wde wdere di'll da de yebá, na' cha' bi nllie' lwellillo, bibi nxhoe'n kello chet ka'. Na' nakllo ka to va wakwell, kon llonen llakia kat llkwelle'n, na' llonllo ka to platiy da zill. ²Na' la'kze cha' ba gokrén Spíritu ke Diosen' lli'o nench llyixjwe'llo bi da ne'e lli'o, na' la'kze cha' nnézello yeolol da nono nna nneze, na' llejnie'llo yeolol da nak da za'ke, na' la'kze cha' nxenra'll-llo Diosen' llone' biteze da nnábelloe', na' cha' bi nllie' lwellillo, bibi nxhoe' da ka' llonllon' chet ka', la'kze llonllo yeolol ka nak da ki. ³Na' la'kze we'llo be'nn ya'ch ake yeolol bi da de kello, na' la'kze we'llo latj wzey be'nn ka' llwie lli'on, bitbi nxhoe' da ka' llonllon' cha' bi nllie' lwellillo.

⁴Cha' nllie' be'nn lwelljllo, lle'nen gakxhenra'll-llo bi da llone be'nn lli'o, na' gonllo wen ke ake', bi gákello zi' cha' llak wen ke ake', na' bi gakllo be'nn llalj, na' bi gakllo be'nn ya'ra'lle. ⁵Na' cha' nllie' akelloe', bi gon akelloe' ka nen kello, bi gonllo nench chraoze lli'o yega'nnllo wen, bi gaklla'llo

be'nne, bi kwek yichjllo bi da llon akre' lli'o. ⁶Na' cha' nllie'llo be'nn lwelljllon', bi yewello cha' bi da xhinnj llone', zan cha' llone' da zej lixheje, na'llen' yewello. ⁷Na' cha' nllie'llo be'nn lwelljllon', llaora'lllo bi da llone be'nnen' lli'o, na' llejle'llo cha' bi da lle ake' lli'o, na' sollo rez gon ake' wen yo'y ras, na' llapra'll-llo cha' bi da llon akre' lli'o.

⁸Kbat te ke dan' llie' lwelljllon', zan wllin lla kate nollno chixjwe' da ka' ne Diosen', na' wllin lla kate bill we'e be'nne biteze di'lle da bi nsed ake', na' wllin lla kat bill yallj bi da chejnie'llo.

⁹Le ka nak nna' ra'tzen na' nombia'llo, na' ye ra'ten' na' llayixjwe'llo.

¹⁰Na' katen' yed kwine' na', kana' da ra'ten' nombia'llo na', bill yálljellon.

¹¹Ka gokllo bida'o be'llo di'll ka da lloe' noteze bida'o, benllo xhbab ka da llon noteze bida'o, na' byejnie'llo ka llejnie' bida'o. Na' nna' ba blli'ollo, ba bsanra'll-llon' bill llonllo kan' benllo kan' nakllo bida'o. 12 Na' nna' bi nna re'llo kwasro dan' nak ke Diosen'. Nakllo ka to be'nne llwia to lo yejwan da bi llroe'tek kwasro. Zan wllin lla kat re'llo kwasro, kana' nnézello doxhen da de, kana'n gombia'llo kwasro kan' nombia' Diosen' lli'o. ¹³Na' da ki chonnen nak aken da bi te ke: gonlira'll-lloe', na' gonllo rez gonlle' wen kello, na' llie'llo Diosen' ren lwellj be'nnachllo, Na' da llonllen bien gonllo rao da ki chonne, llie'llo Diosen' na' lwellj be'nnachllo.

Be'nn ka' lloe'rén Diosen' di'll no di'll yobre da bi nsed ake'

14 Llaya'l we'la'llre llie're
Diosen' na' ren be'nn

1 Corintios 14 308

lwelljre, na' leska' llaya'l so lo ra'llda'oren' gakrén Spíritu ke Diosen' re', na' gonre kon bi da lle'nen gonre, na' chixjwe're bi dan' ne Dios. Len na' llaya'lya'nn sera'llre gonre. ²Ka nak be'nn lloe' di'll da bi nsede', bi lloe'rene' no be'nnach di'lle, le nono llejnie' len, Dios na'n lloe'rene' di'lle. Le naken di'll da lloe' Spíritun' le'e nench lloe'rene' Diosen' di'll, na' nono llejnie' len. ³Zan be'nn llyixjwe're bi dan' ne Diosen', be'nn na'n llakrene' nench sechich ake' wxenra'll ake' Diosen', na' so ake' nbarazlle, na' yexhenra'll ake' cha' bi da llak ke ake'. 4Na' kat lloe'llo wde wdere di'll da bi nsedllo, lo yichira'llda'ollo na'zen' llakrenen. Zan cha' llyixjwe'llo bi da nne Diosen', lli'o lldop ll-llayllo llonlira'll-llo Criston' llakrenen. ⁵Yewera' cha' yeololre gak we'renre Diosen' biteze di'll da bi nsedre, zan wawellra' cha' yeololre gak chixiwe're bi da ye Diosen' re'. Len na' za'kll kerke da we'renlloe' wde wdere di'll chak ndop llayllo lloe'raollo Diosen'. Le cha' nono zo, no wazejnie' be'nn ka' akre zejen ka nak di'll dan' llonn Spíritun' nnello, bi gakrenen be'nn lwellillo sechich ake! wxenra!]] ake! Le!e. 6Be!nn bi'che, nnezra' bi gakrenen re' cha' we'rena' Diosen' wde wdere di'll da bi llejnie're kat yeda' yedra'nna' re'. Zan cha' wzejnie'ra' re' bi dan' ba bzejnie' Diosen' nada', wakrenen re'. Na' leska' wakrenen re' cha' wzeinie'ra' re' billre da nnezra' ke Diosen', na' billre da ne Diosen' nada' nench chixjwe'ra' re', na' cha' wroe' wsedra' re', akre zeje xti'll Diosen!.

⁷Leska' naken ke da ka' zill, da bi de yel nban ke, ka nak dan' nzi'i bllej, na' ka nak dan' nzi'i guitarr, cha' bi llbellen, na' bi zillen kan' llaya'l gonen na', ¿akre gak nnézello dan' llol ka nak bllejen' na' guitarren'? 8Ka to ke rao wdile, cha' bi wkwelle' trompeten' kwasro, bi chejnie' be'nn waka'a ya ka', cha' rao wdilen' llaya'l lljake'. ⁹Ka'kzen' naken ke lli'o, cha' we'renllo be'nne di'll da bi chejnie' be'nne, bi gakrenen leake', na' gonen ka be'nn lloe'rén di'll kwinze'. 10 Be'nn zjalla'a doxhen yellrio, wde wdere di'll da gorjrén ake'. Na' ni ton bi gak nnello bi chejnie' be'nne len. ¹¹Na' cha' lli'o bi llejnie'llo di'll da we'rén be'nn lli'o, nakllo ka be'nn zi't ke le'e, na' le'en nake' ka be'nn zi't kello. ¹²Na' dan' zera'llre gakrén Spíritu ke Diosen' re' nench gak gonre bi da lle'nre' gonre, ka'kzen' llaya'l sera'llre gonne' re' da gakrén lwelljre nench na' sechichre wxenra'llre Diosen'.

¹³Na' cha' Spíritu ke Diosen' gonen we'llo wde wdere di'll da bi nak xti'll-llo, llaya'l nnabllo gakrenen lli'o wazejnie'llo be'nne bi zeie di'llen' lloe'llo. 14 Le chet ka' lloe'rena' Diosen' di'll da bi nseda', spíritu kia'n llalwillen Diosen', la'kze bi llejnie'ra' bin' nia'. 15 ¿Akre llaya'l gona' cha'? Llava'l we'rena' Diosen' biteze di'll da llonn Spíritu ke'en nada', la'kze cha' bi llejnie'ra'n, leska' llaya'l we'rene' di'll da llejnie'ra'. Llaya'l gola' da we'rawa' Diosen' da llonn Spíritu ke'en nada', la'kze cha' bi llejnie'ra'n, leska' llaya'l gola' da llejnie'ra'. 16 Le cha' lloe'renre

309 1 Corintios 14

Diosen' di'lle, na' lloe're yel llioxken ke'e kone di'll dan' bi llejnie' be'nne, leake'n bi gak we'xhen ake' Diosen' txhen ren re', le bi llejnie' akre' bi di'llen' lloe're. ¹⁷La'kze cha' lloe're yel llioxken ke Diosen' kwasro, bitbi gakrenen be'nne cha' bi chejnie're' xti'llren'. ¹⁸Nada' lloa'a yel llioxken ke Diosen', lloe'renlle' billre di'll da bi nak xti'lla' kerke yeolol re'. 19 Zan kat ndop llay be'nn ka' llonlira'll Criston', wenre wa'a ga'yze di'll da chejnie' be'nne nench wzejnie' akre', kerke wa'a chi mir di'll da bi chejnie' akre'.

²⁰Be'nn bi'che, bi llaya'l cho're xhbab ke bida'o bi nna chejnie', lecho' xhbab ke be'nn ba llejnie'. Na' rao da xhinni ka', llaya'l gakre ka bida'o bi nna gon da xhinni la'kze ba nakre be'nn gore. ²¹Xti'll Dios dan' nyojen nen: "Nada' Dios we'rena' be'nn ki di'll da bi chejnie' akre', di'll ke be'nn zi'te, na' ni ka' bi wzenay akse' kia'." Ka'n ne Xanllo Diosen'. ²²Ke len na' llonn Diosen' wde wdere di'll da lloe'llo nench be'nn ka' bi nna gonlira'll ake' Le'e gakbe'e akre' zerenkze Diosen' lli'o. Na' lli'o nxenra'll-lloe', Spíritu ke'en llonen nench be'nn ka' ba breje', llayixjwe' akre' lli'o bi da ne Diosen'. ²³Na' kat ndopllo gan' llalwill-llo Diosen', na' yeololllo nnello wde wdere di'll da bi nak xti'll-llo, na' ra' bal be'nne bi chejnie' ka di'llen' lloe'llon', o cha' be'nn bi llonlira'll Le'e, leake'n nne ake' llaktontjellon'. ²⁴Na' cha' be'nn ka' bi nxenra'll Diosen', o cha' be'nn ka' bi llejnie' kan' llonllon', ra' ake' kate yeolol-llo llzejnie' lwelljllo

bi da ba bne Diosen' lli'o, na'll yeyakbe'e akre' de do'l ke ake' kat yen akre' xti'll yeolol-llo, na' kana' lljadinra'll ake' bi da xhinnjen' non ake'n. ²⁵Na' yeyakbe'e akre' Dios na', nnezre' dan' yo' lo yichjra'llda'o ake'n, na'll wzoa xhib ake' we'rao ake' Diosen', na'll nne ake': "Da likzen' zo Diosen' radj be'nn ki."

Llaya'l we'raollo Diosen' kwasro na' bi gonllo kon ganze

²⁶Be'nn bi'che, katen' lldopre lloe'xhenre Diosen' kin' gonre: Balre de da golre we'xhenre Diosen', na' balre de da wroe' wsede lwelljre, na' balre de da ba goll Spíritu ke Diosen' re', na' balre de wde wdere di'll da we're da bi nsedre, na' ye balre chixiwe're, akre zejen di'll wde wderen' ba bne be'nn lwelljre ka'. Naksen wen gonre yeolol da ki kon cha' gakrenen lwelljre sere choch wxenra'llre Criston'. 27 Na' cha' nolre we'e di'll dan' bi nsedre. do chopzre o chonnzre wak we'ren, na' twej twejre soraore, na' yeyoll na' lloj be'nne yezejnie're' akre zeje di'llen' be're na'. ²⁸Na' cha' nono llra' no yezejnie' di'llen' be're na', bi llaya'l we're di'llen' zillje gan' ndop llayre na', kon lo ra'llda'ozre lewe'rén Diosen' di'lle. 29 Na' cha' nolre de chixiwe're bi da ne Diosen', leska' do chopzre o chonnzre lloj chixiwe'ren chak ndop llayre na', na' wzenay yezikre be'nne dan' nneren' cha' lltilen xti'll Dios dan' nyoj na'. 30 Na' cha' tore ze lloe' di'llen', na' Diosen' wzejnie're' ye tore da chixjwe're', na' be'nnen' ze llaral llyixjwe're'n, le wsante' we'e latj nench na' gak chixjwe' be'nnen'

ye to. ³¹Yeololtere wak chixjwe're dan' ne Diosen' re', na' we're latj nne twej twejre nench chejnie' yeololre, na' gakrenen re'. ³²Na' re' llyixjwe' bi dan' ne Diosen', llaya'l chixjwe'ren kat llákere naken wen chixjwe'ren. ³³Le Diosen' bi nake' be'nn llonchixre' lli'o, ke len na' lle'nre' nbaraz wsa're dan' llonre kat lldop ll-llayre lloe'xhenre' na'.

Na' katen' lldop ll-llayre lloe'xhenre Criston', ³⁴ bi llaya'l we'e no'r ka' di'll lo yoda'on, le bi de latj gon ake' ka', llaya'l wzenay ake', le ka'n nllia ley ke Diosen' bia'a gon ake'. ³⁵Na' cha' bi da lle'ne no'r ka' nnez akre', na' nnab akre' xhyio ake'n kat yellín ake' rill ake', le naken to zdo' cha' to no're we'e di'll gan' lldop ll-llayre lloe'xhenre Diosen'.

³⁶Lewayón ke xhbab, kere re'n gokre be'nn nell byejle're xti'll Criston', na' kere re'zen' ba bxhi'i xti'lle'n. ³⁷Cha' nolre llákere llak llyixjwe're dan' ne Diosen', na' cha' llákere llakrén Spíritu ke Diosen' re' bi da llonre, ke len na' llaya'l gakbe're da ki llzoja' re' naken da nllia Xanllon' bia'a gonllo. ³⁸Na' cha' be'nn bi llejle' ke da ki llroe'ra' re', bi llaya'l chejle're cha' bi da ne'e.

³⁹Ke len na' be'nn bi'che, lekwek yichjre gakrén Spíritu ke Diosen' re' nench chixjwe're bi da nne'e, na' bi wllonre cha' we'e be'nne wde wdere di'll da we'e Spíritu ke Diosen' leake'. ⁴⁰Na' kwasro leko' nez dan' llonre kat lldopren'.

Criston' babane' radj be'nn wat

15 Be'nn bi'che, lle'nra' lljasa'ra'llre Di'll Wen ke

Criston' dan' ba be'rena' re'. Ba bzenayren, na' zere choch le ba byejle'ren na'. ²Na' ba nnézere wallinre gan' llia Diosen' cha' soteze sore wzenayre Di'll Wen ke'en. Na' cha' bi naore llzenayre ke'e, bibi zejen nnere llejle're chet ka'

³Criston' bzejnie're' nada' da ki da nak da lliarao, na' ba bdixjwe'ra'n re'. Criston' gote' ni ke xto'l lli'o kan' nyoj xti'll Dios na'. ⁴Na' bga'che', na' bayónn lla na', babane' radj be'nn wat ka', le ka'n nyoj xti'll Diosen'. ⁵Na'll jaroe'rawe' Pedron', na' bayoll na' jaroe'rawe' yezikre postl ka'. ⁶Bayoll na' na'll jaroe'rawe' ye ga'y gayoa (500) wde be'nne to chi'ze, be'nn nxenra'll Le'e. Be'nn zan nna nban nna', na' bal ake' ba got. ⁷Na'll jaroe'rawe' Jacobon', bayoll na' jaroe'rawe' yeololte postl ka'.

⁸Na' bayoll na' badroe'rawe' nada'. Naka' ka be'nn gorje ka bi nna llin lla garje'. ⁹Le kana' bsa'kzia' be'nn ka' nxenra'll Criston'. Ke len na' bi za'kteka' ye ake' nada' postl. ¹⁰Zan Dios na' nllie're' nada' breje' nada' naka' postl ke'e, na' ba bzenaya' ke'e, na' llonlla' xchine'n kerke be'nn lwellja' ka' yela'. Na' kere llona'n toza'n, Dios na'kzen' llakrén nada' llona'n. 11 Na' bitbi gonen cha' xti'lla'n ba bzenayre o cha' xti'll be'nn yobren' ba bzenayre, le toze ka' llyixjwe'kzto' kan' nak ke Criston', na' ka'n nak dan' ba byejle'ren'.

Yebán be'nn wat ka'

¹²Yeololte neto' llyixjwe'to' Criston' babane' radj be'nn wat ka'. 311 1 Corintios 15

Na' ¿bixchen balre nere bi yebán be'nn wat ka'? 13Le chet ka' naken kan' nere na', bi llasbán Diosen' be'nn wat ka', na' nnello bi babán Criston' chet ka'. 14 Na' cha' Criston' bi babane' radj be'nn wat ka', bibi za'k xti'lle'n dan' be'rento' re', na' bibi zejen dan' llonlira'llre' na', cha' ka' naken. 15 Ba be'rento' re' di'll wenra'll, bneto' Dios na' basbane' Criston' radi be'nn wat, cha' ka' naken di'll li dan' nere bi llasbane' be'nn ba got. 16 Le cha' bi llasbane' be'nn ba got, leska' bi basbane' Cristo na'. ¹⁷Na' cha' naken li bi basbán Diosen' Criston', bibi de gon dan' nxenra'llre' na', na' nna nakre rallna'a da xhinnien'. 18Le chenak li bi babán Criston', ba blleyi' yeolol be'nn wat ka' bxenra'll Criston! chet ka!, 19 Na! cha! dan! llonllo rez yellinllo gan' llia Criston' kat yeza'llo yellrio ni, naken da wenra'llzen', nya'chraz naken ke lli'o rao yeolol be'nne chet ka'.

²⁰Zan nna' nia' re', da likzen' basbán Diosen' Criston' radj be'nn wat ka', na'llen' Le'en goke' be'nn nell be'nn babán radj be'nn wat ka'. ²¹Le bxhe yel goten' rao yellrio ni, dan' bzo to be'nn golle Adán bene' da xhinni, na' lekze ka'kzen' gok, to be'nne re Cristo bene' nench llin lla yebanllo radj be'nn wat ka'. 22Le kan' ben Adán na' da xhinni na'n, bxhe yel goten', na'llen' llat yeolol be'nnach. Na'llen' ben Criston' ga't yel nban zejlikane ke yeolol be'nn wxenra'll Le'e. ²³Na' kan' llaya'l totollo vebanllo radi be'nn waten' nench sorenllo Criston' kon kan' ba bne'e na'. Criston' blliarawe' babane' radi be'nn wat ka', na' kat

yede' da yobre, lli'o llonlira'll Le'e, leska' yebanllo radi be'nn wat ka'. ²⁴Na' llin lla yeyoll yellrio ni. Kana' Criston' walane' yel llnebia' ke yeolol no llwie Diosen', na' yeke'e yel llnebia' ke yeololte daxi'o. Yeyoll na' yeyone' rallna'a Xe'e Diosen' yeolol da nlane' llnebie', na' yeolol non' llnebie'. ²⁵Le dekz de nnebia' Criston' llinte lla gon Diosen' nni't xhnie' yeolol be'nn ka' llwie Le'en. ²⁶Na' kat yeyoll wlleyie' yeolol bi da bi llon Le'e txhen, na'll gone' yenit yerán yel goten'. 27 Diosen' ba bene' nench yeolol da zjadé nni't aken xhnia' Criston'. Na' bi nnello ze Diosen' xhnia' Criston', le Dios na' bene' nench yeolol da de gaken rao na'a Criston'. ²⁸Na' kat ba ben Diosen' yeolol da zjadé ba naken rao na'a Criston', kana'n wroe'n Criston' yoe' rao na'a Xe'e Diosen'. Le Le'en bene' nench gok yeolol da ka' rallne'e. Na' ka' wroe'rawe yeolol bi da de naken rallna'a Dios.

²⁹ ¿Akxha zejen ke be'nn ka' lllloa ake' nis roraz be'nn ba got? ¿Bixha zejen da llon ake' ka' chet ka' bi llin lla yebán be'nn wat ke ake' ka'?

30 Na' neto', ¿bixchen llsanra'llze yel nban keto' yo'y lla chet ka'?
31 Be'nn bi'che, lloa'a di'll li, nia' yo'y lla llara'a rao na'a be'nn lle'ne got nada', na' leska' lloa'a di'll li, nia' llawera' kwis ba nxenra'llre Xanllo Jesucristo. 32 Na' wak nnello ka to bayi'x znian' bdilrena' gan' nzi'i Éfeso, le ba bda'ba'y be'nn ka' nada'. Na' bibi za'k dan' ba bllejra' yeolol da ka' dan' ben akre' nada' cha' ka' naken, bi yebán be'nn wat

1 Corintios 15 312

ka'. Na' cha' ka' naken bi yebán be'nn wat ka', wenre gonllo kan' ne be'nn ka', ne di'llen' ne ki: "Ye'j gaotegallo, le wxezen' gatllo."

33 Bi we're latj no siye'e re' kan' ne to di'll da de: "Be'nn darén txhen be'nn ka' llon da xhinnj, leska' sorao gone' kan' llon ake' na'." 34 Leyego' yichjra'llda'oren' to li, na' bill gonre da xhinnj, le balre bi nna chejnie're da nak ke Dios. Llepa' re' ka', le lle'nra' gákere zdo' ka da xhinnjen' llonre na'.

Kan' gak be'nn ka' yebán radj be'nn wat ka'

³⁵Balre llnnabjere: "¿Akren' gak yebán be'nn wat ka'? Na' ¿akre gak kwerp ke ake'n kat yebán ake'n?" 36 Ncholje vichjra'llda'oren' cha' llákere bi gak yebán ake' radj be'nn wat ka'. Nnézello to xhoa' da'o llazllo de yexhinnjen nench ra' yer da'on. ³⁷Na' kat llazllo na', bi llazllo yer da'on, xhoa' na' llazllo, na'll llaxhinnjen llayaken yer da'o. Ka'kze llak biteze da llazllo, na' llra' akten. 38 Llayoll llazllo na', Dios na' llone' llra' ke dan' llazllon', bi llra' yay yobre da bi llazllo. ³⁹Na' kere toze ka nak kwerp ke lli'o be'nnach kone ke ba zo tap nia', na' kone ke ba llia xire, na' kone ba lla'a lo nis. ⁴⁰Nlla'a kwerp da lla'a yellrio ni, na' nlla'a da ka' llia le' yebán'. Na' nlla'a yel nbaraz ke da ka' zo le' yebán', na' nlla'a yel nbaraz ke da zjazó yellrio ni. 41 Na' nlla'a ka llseni' willen', na' nlla'a ka llseni' be'on, na' lekze nlla'a ka llseni' toto berj ka'. 42 Ka'kze gak ke be'nn ka' yebán radj be'nn wat ka'. Kwerp ke ake' dan' bga'ch lo

ba na'n ba bayollen, zan kwerp kob ke ake'n kere da te ken'. 43 Kwerp ke be'nn waten' naken kwerp da bibi nakteke da za'ke, le llayollen, na'llen' lljakwa'chllon lo ba. Zan kate yebán ake' radj be'nn wat ka', yeyak kwerp ke ake'n da bi te ke, na' da war. 44 Katen' llga'ch ake'n nak ake' de be're ren llen, zan kate yebán ake' radj be'nn wat ka', ba nak kwerp ke ake'n nlla're, na' ban ake' ke chnare yebán'. Nnézello nna' nna naken de be're ren llen, na' lekze llava'l nnézello llin lla kate yeyaken da kobe kan' ne Spíritu ke Diosen!.

45 Xti'll Diosen' nyojen nen: "Adán be'nnen' gok be'nn nell bzoe' wbane' kana'." Na' nna' zo Cristo. na' za'krebe' ka Adán na', na' Cristo na'n llonn yel nban kello zejlikane. ⁴⁶Na' nna' llre'llo kere bra' da nell dan' benn yel nban kellon', be'r llen na'n gok da nell. Na'llen' bra' dan' benn yel nban zejlikane kellon'. ⁴⁷Diosen' bene' be'nn nell kone bichte yo, nench bzoe' rao yellrio ni, zan Xanllo Cristo be'nnen' nake' ka be'nn wllop, nake' be'nnen' za'a yebá. 48 Na' lli'o be'nnach nak kwerp kellon' ka kwerp ke be'nn nell na', dan' ben Diosen' kone bichte yo, ke len na' nakllo ke yellrio ni. Na' lli'o llonlira'll Cristo na', llin lla kate yeyak kwerp kellon' da kobe kan' nak kwerp ke be'nnen' za'a yebá na'. 49 Nna' nna zollo yellrio ni, nakllo ka be'nnen' ben Diosen' kone bichte yo na', zan kat llin lla lljazollo yebá na', gakllo ka Cristo be'nnen' za'a yebá na'. ⁵⁰Be'nn bi'che, ni nnia' re' bi gak yellinllo gan' llia Diosen' kone be'r

llen na', na' da llbeyi' bi gak son ke chnare yebán' ren Diosen'. 51 Lle'nra' nnia' re' to da nono bnneze kana', kere yeolol-llon' gat, zan yeolol-llon' yella'a kan' nakllo na'. 52 To seten' ka llchod llaxha' yejraollon', yella'a kan' gakllo katen' kwell trompet ke Diosen'. Na' yebán yeolol be'nn wat ka', na' yeyak kwerp ke ake'n da kobe da bill gat, na' leska' yella'a kwerp ke lli'o. 53Le kwerp kello dan' nbanrenllo yellrio ni, da te ke dan'. Naken da gat, na'llen' yeyaken da kobe da bill gat, na' bill go'llen. ⁵⁴Kat ba bakob kwerp kellon' bill gaten, kana'n ba gok kan' nyoj xti'll Diosen' gan' nen: "Diosen' bkwase' yel goten', na' llonne' yel nban zejlikane kello. 55 ¿Gann yel wak ko'on, yel got? ¿Gann yel llsa'kzi' ko'on, yel got?" 56 Da xhinnjen' nsa'n yel llsa'kzi' ke yel goten'. Na' kat ba benllo da xhinnje, za'ke leyen' ll-lliayi'llen lli'o. ⁵⁷Llioxken Diosen' bse'le' Xanllo Jesucriston' bake'e dan' ba nlleyi' lli'on.

58 Ke len na' be'nn bi'ch ak nllie'ra', llnneyoera' re', lesé war, na' leseteze, na' legonteze xchin Xanllon', le nnézkzello katen' llonllo xchin Xanllon', kere da tebrao ka'zen'.

Be'nn ka' nxenra'll Criston' lla'a Corinto lltop ake' mell gakrén ake' be'nn Jerusalén ka'

Nna' nnia' re' kan' gonre kat wtopre mell dan' gakrenen be'nn ka' nxenra'll Diosen' Jerusalén na'. Legón kan' golla' be'nn ka' lldop ll-llay llonlira'll Criston' toto yell ka' zjalli' gan' nbane Galacia. ²Yo'y lla dmio to

tore llaya'l kwejre ra't wej mell kon akre benre gan rao to xhman. Na' ko'cha'ore mellen' nench den katen' yedra'nna' re', na' bi dadozre wtopren katen' yeda' na'. ³Na'll katen' yeda' gan' zore na', kana' wzoja' to yich da yeyo'x be'nn ka' lle'nere lljasán xhmellren' Jerusalén na'. ⁴Na' cha' llonen bien cha'a, wakse cha'rén ake' Jerusalén na' chet ka'.

Pablon' llone' xhbab lljara'nne' be'nn ka' lla'a yell Corinton'

⁵Na' yeda' gan' zore na', kat yeyoll tia' gan' nzi'i Macedonia na', le llaya'l lljawia' be'nn lwelljllo ka' lla'a na'. ⁶Na' llakra' yega'nnrenjea' re' to chi'i da'o, o cha' yega'nnkza' doxhen katen' llonen zay na', na' kat yeza'a na', gakrenre nada' nench na' wasyolla' cha'a gan' llaya'l cha'a na'. ⁷Bi lle'nra' to teza' gan' zoren', llbexha' yedsorena' re' to chi'i da'o cha' Xanllo Diosen' gonne' latj. 8Na' Éfeso ni yega'nna' llinte Inni dan' ne Pentecostés. 9Le be'nn zan zjalla'a ni, be'nn lle'n akre' wzenay ake' ke Criston', na' leska' zjalla'a be'nn llwie xti'lle'n.

10 Na' cha' ra' Timoteon' gan' zore na', lewrebe' na' lewzenay ke'e nench na' soe' wen radjre na', le leska'n llone' xchin Xanllo Diosen', kan' llona' nada'. 11 Ni tore bi gónere' ka be'nn bibi za'k dan' llroe' llsedre' na', lesorene' wen, na' gakrenre' kat yeze'e na', nench wayede' gan' zoa' ni kwasro kwis, le zoto' bexhtoe' ganni ren yezikre be'nn lwelljllo ki.

¹²Go'tyoera' Apolos na', yedrene' be'nn lwelljllo ka' yedra'nn ake' re', 1 Corintios 16 314

na' bi go'nre' yede' nna', wedje' kat we'n latj ke'e.

Ye to chop di'll lloe'rén Pablon' be'nn Corinto ka'

13 Lesó si'n ka llon be'nn bi lltas yere, na' leko' to li yichjra'llda'oren' wxenra'llre Criston'. Bi llebre, leseteze legón kan' lle'ne Dios na'.
14 Na' lellie' lwelljre biteze da llonre.

¹⁵Re' be'nn bi'che, nnézere be'nn ka' zjalla'a rill Estéfanas na', gok ake' be'nn nell bxenra'll ake' Criston' gan' nbane gan' nzi'i Acaya, na' ba gokrén ake' kwis yezikre be'nn lwellillo be'nn llonlira'll Xanllon'. ¹⁶Ke len na' llnneyoera' re' wzenayre ke ake', na' gonre kan' ne ake' na', na' lewzenay ke nollre be'nn llon xchin Dios, le llakrén ake' be'nn lwellillo ka'. ¹⁷Llawera' ba bara' Estéfanas ren Fortunato gan' zoa' ni, na' ren Acaico. Leake'n ba gokrén ake' nada' nench bill llakya'chra' dan' bi zore ganni. ¹⁸Be'nn ki ba bayonxhenra'll ake'

nada' kan' ba ben akse' ke re' kana', ke len na' llaya'l bi ganra'llre be'nn ka' llon kan' llon be'nn ki.

19 Be'nn ka' lldop ll-llay llonlira'll Criston' doxhen yell ka' gan' nbane' Asia na', llwap ake' re' lliox. Na' be'nnen' nzi'i Aquila, na' ren xho're'n nzi'i Priscila, na' be'nn ka' ll-llay rill ake'n lloe'xhen ake' Cristo na', leska' llwap ake' re' lliox. 20 Na' yeolol be'nn lwelljllo ka' ganni llwap ake' re' lliox. Na' kat lldop ll-llayre na', lewno'p na'a lwellire.

²¹Kwinkza' nada' Pablo llzoja' re' ra't weje le' yich ni, llwapa' re' lliox.

²²Na' cha' nna zjarén ye balre bi nllie're' Xanllo Jesucriston', Dios na' wlleyi'chgue' be'nn ka' ke chnare. Xanto', dachga.

²³Xanllo Jesucriston' gakrenchgue' re'. ²⁴Nllie'ra' yeololre le nakllo txhen llonlira'llllo Xanllo Jesucriston'. Ka'n gakchga.

YICH WLLOPE DAN' BZOJ POSTL SAN PABLO KE BE'NN KA' LLA'A CORINTO

Pablo llwape' lliox be'nn ka' nxenra'll Jesucriston' lla'a vellen' nzi'i Corinto

Nada' Pablo naka' postl ke
Jesucriston', le ka'n byazra'll
Diosen'. Llzoja' yich ni ke re' lldop
ll-llayre llonlira'llre Xanllo Diosen'
gan' nzi'i Corinto, na' rente ke
nollre be'nn lla'a yeolol yell gan'
nbane gan' nzi'i Acaya, be'nn ka'
ba brej Diosen' nak rallne'e. Nada'
na' ren be'nn bi'chllo Timoteo na',
llwapto' re' lliox.

²Na' llnnabto' rao Xallo Diosen' ren rao Xanllo Jesucriston' gakrén akchgue' re', na' wzoa ake' yichjra'llda'ore so kwezre nbaraz.

Kan' bxha'kzi' Pablon'

³Llaya'l wxenra'll-llo Diosen', le nake' Xa Xanllo Jesucristo na'. Le Xallo Dios na' llaya'chra'lle' lli'o, na' llonne' lli'o yel llxhenra'll kat bi da llak kello. ⁴Le'en llonne' neto' yel llxhenra'll ke yeolol bi da za'kzi'to' nench na' lloe'to' yel llxhenra'll ke yezikre be'nne kate bi da za'kzi' ake'. Kan' llonxhenra'll Diosen' neto', leska'n llonto' ke no be'nne lloe' aktoe' yel llxhenra'lle.

⁵Llza'kzi'to' kwis kan' bxha'kzi' Cristo na', na' ka'n llayónn Diosen' neto' da xhen yel llxhenra'lle le nxenra'llto' Cristo na'n. 6Da zan da llak keto' dan' llroe' llsedto' xti'll Diosen', na' za'ksen nench llayonnto' re' yel llxhenra'll bi da za'kzi're, na' llakrenen re' nench yellinre gan' llia Dios na'. Diosen' llonne' neto' yel llxhenra'll kat bi llak keto' nench na' lekze neto' llayonnto' re' yel llxhenra'll kat bi da llak keré, nench na' re' soere kat za'kzi're kan' za'kzi' neto'. ⁷Bexhto' soere dan' llak kerén', le nnézeto' katen' za'kzi're kan' za'kzi' neto', leska' llayónn Diosen' re' yel llxhenra'll kan' llonkzre' neto'.

⁸Be'nn bi'che lle'neto' nnézere kan' bxha'kzi'to' kan' bzoto' gan' nbane' Asia na'. Bxha'kzi'to' kwis, llákseto' bill yezokze, na' bentekzto' xhbab gatto' na'ze. ⁹Bentekzto' xhbab lo ra'llda'oto' ba za'a yel goten'. Kan' gok keto' nench bsedren neto' bi wxenra'll kwinto', na' bsedren neto' llaya'l wxenra'llto' Dios be'nnen' llasbán be'nn wat ka'. ¹⁰Dios na' basre'e neto' bi gotto'. Na' nna' nna llasrakze' neto'. Na' nna llonto' rez wasrakze' neto' batteze,

2 Corintios 1, 2 316

¹¹cha' re' gakrenre neto' yelwill-llo Diosen' serene' neto'. Na' cha' zanre gonre ka', na'll leska' zanre we're yel llioxken ke'e kat ba gokrene' neto' na'.

Pablon' ne'e bixchen bllere' cheje' Corinton'

12 Llawera' lloa'a di'll kan' llonto' na', le nnézeto' lo ra'llda'oto' llonto' wen keré, do yichj do ra'llto', na' renkze ke noteze be'nne. Kere nello dan' nakto' be'nn si'n na' llonto' wen na', zan dan' nllie' Diosen' neto', ke len na' llakrene' neto' llonto' wen ke yeolol be'nne. 13 Yich ka' llzojto' re', naken da gak wrabre, na' chejnie're kon kan' nyojen na', na' gona' rez chejnie'ren kwasro, 14 kan' ba byejnie'ren ra't na', nench na' kat llin lla yed Xanllo Jesúsen' da yobre, yewere nakre neto' txhen, na' yewé ren neto' nakto' re' txhen.

¹⁵Na' kone len na' gokra'lla' yedwia' re' nench yellop rase sollo txhen, bena' xhbab yewere yedwia' re'. 16 Gokra'lla' tia' wia' re' kan' bdia' bya'a gan' nzi'i Macedonia, na' gokra'lla' yedia' kan' baza'a gan' bya'a na'. Na' gakrenre nada' yeya'a gan' nzi'i Judea na'. ¹⁷Do ra'lla' gokra'lla' ka', kere llona' kon ka nen kia' kan' llon be'nn bi nxenra'll Dios, kat bi da gon ake' to ne ake': "Gona'n", na' to ne ake': "Bi gona'n". 18 Nneze Diosen' kat bin' lle'neto' gonto', bi llon chope lo ra'llda'oto'n. ¹⁹Leska' Jesucriston' be'nnen' nak Xhi'nn Dios, toze ka nake' batteze, bi nne gon chopre cha' bi da bne'e gone'. Yeololte bi da ba bne'e gone', llonte'n. ²⁰Le yeolol da wen ba bne Diosen' gone', nnézkzello gonkze'n

dan' bse'le' Jesucriston'. Ke len na' kone yel llakrén ke Jesucriston', llonlira'll-llo Diosen' llelloe': "Ka'n gakchga." ²¹Dios na' breje' re' ren neto', na' llone' zello llonlira'll-llo Criston'. ²²Na' benne' lli'o Spíritun', na' zon lo yichjra'llda'ollon' nench nnézello Dios na' ba bxhie' lli'o ka no xhi'nne', na' yeolol da wen ba bne'e gone', wllin lla kat gone'n.

²³Bi nna yeda' Corinto gan' zore na', yedwia' re' kan' bnia' gona' na', bi nna yeda' nench ke yedtila' re' ke da xhinnj ka' llonre na'. Diosen' nombie' yichjra'llda'wa', na' nnezre' di'll ki nia'n naken da li.
²⁴Nnézkzere kere lle'neto' nnebia'to' lo yichjra'llda'ore; llakrenzto' re'n nench na' sore nbaraz, na' wxenra'llya'nnre.

Kan' gok bchoyra'lla' bi **badwia'** re', le gokbe'ra' chenak yedwia' re', na' gakya'chere. ²Le chenak badzoaya'cha' re', ¿noxha zo yeyón nada' yezoa' nbaraz? Le ba badzoaya'cha' re'n chet ka'. ³Na' ka'kzen' bzoja' re' nench na' katen' yeda' gan' zoren', bill gonre da xhinni dan' bzoaya'ch nada', le llaya'l gonre da yewera'. Na' beza' sore nbaraz katen' gonre dan' wzoa nada' nbaraz. 4Bzoja' re', le yoa' da zed kwis, dan' gokya'chra' kan' llonre na', na' bllellkza' keré. Na' dan' bzoja' yich ki na', kere gokra'lla' wzoaya'cha' re'n, gokra'lla' gakbe're nllie'ra' re'n.

Bne Pablo llaya'l yezi'xhen ake' ke be'nn ba ben da xhinnj

⁵Gokya'chra' kan' ben be'nnen' ben da xhinnjen', na' kere nadza'n gokya'chra'. Yeololkzren' 317 2 Corintios 2, 3

gokya'chere ra't weje kan' goken. Nia' gokya'chere ra't weje nench ke nnetka' da xhen goren' gokya'chello. ⁶Gan' ndopre na' bchoyre sa'kzi' be'nnen' ben da xhinnjen', na' to ka'tze naken wen'. ⁷Billbi gónere', leyezi'xhen ke'e, na' legonchoch ra'lle' nench soere' yel llakya'che ke'en. 8Ke len na' lla'tyoera' re', wroe'chgare yel nllie'n ba zo lo vichira'llda'oren' ren be'nnen' ben ka'. ⁹Bakze bzoja' re' batna' nench nnezra' akren' llonre, cha' llzenayre kia' yeolol dan' ba bnia' gonre na'. ¹⁰Na' noteze be'nne llazi'xhenre ke'e, leska' nada' llazi'xhena' ke'e. Na' ka' llazi'xhena' ke be'nne, cha' zo da llaya'l yezi'xhena', llazi'xhena'n rao Criston' nench llakrena' re', 11 nench ke gon daxi'on re' gan, le llwiallo kan' lle'nen siye'n lli'o na'.

Gokra'll Pablon' yedile' Titon' gan' nzi'i Troas

¹²Ka bllina' gan' nzi'i Troas gan' bdixjwe'ra' Di'll Wen ke Criston', nakbie'tekze Diosen' ba bene' nench be'nn lla'a na', gokra'll ake' wzenay ake'. ¹³Na' bzoa' xhbab kwis ke be'nn bi'chllo Titon' le bi ballayre'. Na'llen' golla' be'nn ka': "Nna yellayllo", na' baza'a baya'a gan' nzi'i Macedonia.

Zollo nbaraz dan' nombia'llo Criston'

¹⁴Llioxken Diosen', none' nench babej Jesucriston' lli'o lo na'a daxi'on, na' nbaraz yeche'e lli'o lljazorenlloe'. Na' gateze zollo Diosen' llone' nench llakbe'e be'nne, naken da wen kwis nombia'llo Criston'. ¹⁵Diosen' llawere' llonllo

nench llakbe'e be'nne naken da wen kwis wxenra'll-llo Criston', Na' bale' llakbe'e akre' na' llonlira'll ake' Le'e, leake'n de yel nban ke ake' zejlikane, na' ye bale' bi llayazra'll ake', na' bi llonlira'll ake' Le'e, be'nn ka'n kweyi'. ¹⁶Na' be'nn ka' kweyi'n, bi llawé akre' kan' llonllon', le lle aklloe' kweyi' ake'. Na' be'nn llonlira'll Le'e na', llawé akre' ba gokrén aklloe' nench yerá ake', na' ga't yel nban zejlikane ke ake'. Na' lli'o bi llakllo to wrazllo wroe'llo be'nne, ka wen na' naken gonlira'll-llo Criston'. 17 Be'nn zan llcha'a ake' di'll da lloe' ake' ke Diosen' nench yewé be'nne xti'll ake'n, na' chixhj ake' leake'. Bi llon neto' ka', do ra'llto' lloe'to' di'll rao Diosen', le txhen na' nakto' Criston' le Dios na'n bse'le neto' lloe'to' xti'lle'n.

Da koben' bne Diosen' gone' nench gakrene' be'nnach

Bi gákere cha' llayoe'rao kwinto'n ka naken lloe'to' di'll ki. Nnézkzere xchin Diosen' llonto' do ra'llto', na' bi llonen bien go'xto' yich da we'e di'll keto' nench nnézere akren' nakto', na' ni ke yallizen wzojre ye to yich da go'xto' kat chejto' ga yobre kan' llon be'nn yobre. ²Re' nakre ka to yich dan' nyoj lo ra'llda'oto' gan' lloe'n di'll kan' nakto' na'. Na' be'nn zan ba nombia' re', kan' ba ben Criston', bache'e lo yichjra'llda'oren'. ³Na' ka'n broe'n nakre ka to yich da bzoj Cristo na', dan' ba bache'e yichjra'llda'ore na', kone Spíritu ke Dios na'. Kere goken to le' yejen', lo ra'llda'ore nakzen, naken ke da nyoj. 2 Corintios 3, 4 318

⁴Llakchoch ra'llto' rao Diosen' lleto' re' ka', le Criston' zoe' llakrene' neto' nench nnézeto' llonto' kan' lle'ne Dios na'. ⁵Le bibi llak gonto' to wrazto', na' bi llejnie'to' bi gonto', le yeololte bi da ka' llonto'n, Dios na'kzen' llakrene' llonto'n, ⁶Na' Le'e ba bene' nench llak llyixjwe'to' dan' ba bne'e gone' gakrene' lli'o be'nnach. Na' da koben' bi naken ka ley dan' byoj kana', llzejnie'n lli'o be'nnach kweyi'llo yel be'nn wen da xhinni kello na', zan nna'n llonn Spíritu ke'en yel nban zejlikane ke lli'o llonlira'll-lloe'.

⁷Ka nak ley dan' bzoj da Moisésen' le' yej ra'yen', Diosen' bene' nench gokbe'e be'nn Israel ka' goken da za'ke, le radj ake' na', gok lloa'rao Moisésen' llaktit, to bi gok wia ake' lloa'rawe'n, la'kze nak yel llaktiten' bzo lloa'rawe'n to da te ke. Na' cha' ley na', dan' nsa'a yel got na' goken da za'ke, ⁸nnézello za'kll di'll kob dan' llonn Spíritu ke Diosen', nench na' ga't yel nban zejlikane kello. ⁹Le chet ka' ley dan' bzejnie' lli'o be'nnachen' nen ga't yel llza'kzi' kello, goken to da za'ke, ¿bixha bi llákere za'kll xti'll Dios dan' llzejnie'n lli'o ba bayakllo be'nn wen? 10 Le dan' nak da za'k kana', bill naken ka' nna', le ba de ye to da za'klle. 11 Le chet ka' dan' gok ke to da za'k kana' ba bde ke, za'kll dan' de nna', na' nnézello bi te ke.

¹²Na' dan' nnézeto' kere da te ke da koben' ba bdixj Diosen', ke len na' bi llebto' llyixjwe'to' xti'lle'n. ¹³Na' neto' bi llonto' kan' ben da Moisésen', bkwa'ch rawe' kone to ra'll bllall nench bi bre'e be'nn Israel ka' len, na' chaora'll baga'a ra't weje dan' llaktit lloa'rawe'n. ¹⁴Na' be'nn Israel ka' nna zo akse' nna', bi nna chejnie' akre' kat llrab ake' ley dan' byoj kana', gan' nyoj da ka' bne Diosen' gone' gakrene' leake'. Kon be'nn ka' wxenra'll Cristo na' chejnie' akre' bi zejen. ¹⁵Xte nna' llrab be'nn Israel ka' da ka' bzoi da Moisésen', nna naksen ka to da nga'ch ke leake' na' bi llejnie' akre'n. 16 Zan noteze kate nxenra'll ake' Xanllo Criston', da ka' nvoien bill naken ka to da nga'ch ke leake'. 17 Xanllo Criston' nake' toze kone Spíritu ke Diosen'. Na' kat ba zo Spíritu ke Xanllon' lo ra'llda'o be'nne, lloe'n lati soe' nbaraz rao Dios. 18 Yeolol lli'o nxenra'll-llo Criston', yel za'k xhen ke'en bill nga'chen rao lli'o, na' nakllo ka to yejwan dan' llaroe' katken' nak yel beni' ke Xanllon', le zejzell yo'llo beni' ke'en, le yo'kze Spíritu ke Xanllo Criston' lo ra'llda'ollon'.

Ke len na' bi lljachie'to', le rao yel nllie'ra'll ke Dios na'n bkwa'nne' llin ni rallna'to' gonto'n. ²Na' bibi llonto' nga'chze da nak zi waye'llo, na' bi llxoayayto' be'nne, na' bi llacha'to' xti'll Diosen' nench yewé be'nne wzenay ake' xti'llto'n. Llre'kze Diosen' llyixjwe'to' xti'lle'n kon kan' naken na', nench yeolol be'nne vene di'll dan' lloe'to'n. nnez akre' lo ra'llda'o ake' lloe'to' di'll li. ³Be'nn ka' ba nbeyi' yel ke llejle' ke ake', leakze'n bi llejnie' Di'll Wen na', lloe'rén aktoe'n. ⁴Le be'nn bi lleile' xti'll Diosen', daxi'o na' ba ncholen lo yichira'llda'o ake'n, nench na' bi chejnie' akre', na! bi wseni! Di!ll Wen ke Criston!

319 2 Corintios 4, 5

lo ra'llda'o ake' na', le toz ka nakse lo yichjra'llda'o Diosen' ren Cristo be'nnen' nsa'a beni' xhen kwisen'.

⁵Le ka nak di'll dan' llyixjwe'to'n, kere llyixjwe'to' xti'll kwinto', zan xti'll Jesucristo be'nnen' nak Xanllo na'n llyixjwe'to'. Na' dan' nllie'to' Jesucriston' zoto' llonto' biteze da llakrén re'. ⁶Le Dios be'nnen' bne ga't beni' yellrio ni gan' gok xchole, ba broe' beni' ke'en lo ra'llda'ollo nench bembia'llo Jesucristo be'nnen' nak be'nn za'ke, na' kat ba nombia'lloe' na', na'll llejnie'llo katken' nak beni' xhen ke Diosen'.

Akre gonllo sollo wxenra'll-llo Dios

⁷Kwerp kello ki naken da llat. za'kreben ka to lle' nis da nak de bennj. Na' Diosen' ba broe' beni' ke'en lo ra'llda'ollon', na' llakbe'llo bibi llak gonllo cha' bi gonne' vel wak xhen ke'en nench gak bi da gonllo. 8Ke len na' la'kze bi da zed keto' de, bi nello bi llo' xhnneze. Na' la'kze llebraz llallayraoto', bi nzanra'llto'. 9Na' llaray ake' neto', zan bi llbej yichj Diosen' neto'. Llsa'kzi' ake' neto', zan bi lloe' Diosen' lati got ake' neto'. ¹⁰Na' gateze llejto', yo'y ras llsa'kzi' be'nne neto', lle'n akre' got ake' neto' kan' bet ake' Jesús na'. Na' lloe' Diosen' lati llak keto' ka', nench nroe'n zokze Jesúsen' llakrene' neto' nna nbanto'. 11 Na' nna' nna zoto', yo'y lla ni'tkze be'nn lle'n akre' got ake' neto' ni ke dan' llyixjwe'to' xti'll Jesús na'. Na' llak keto' ka' nench nakbie' zokze Jesúsen' llakrene' neto', ka nak nna nbanrén kwerp keto' ki dan' gaten'. ¹²Kan' llak tlla tlla lle'n akre' got

ake' neto', na' re' ba ballélere yel nban keré.

13 Xti'll Dios dan' nyojen nen:
"Llonlira'lla' Dios, ke len na' lloa'a
xti'lle'n." Ka'kzen' llonlira'lltoe'
neto', na'llen' lloe'to' xti'lle'n. 14 Le
Dios na'n basbán Xanllo Jesúsen'
radj be'nn wat ka', leska'kzen'
yesbane' lli'o kat llin lla kello,
na' re' ren neto' wayejllo txhen
yellinllo gan' llie' na'. 15 Yeolol da ki
ba gok keto' ba bllayraoto' ni ke re'.
Le lle'neto' gakllo be'nn zan gakrén
Diosen' lli'o nench gonlira'll-llo
Xanllo Jesús na', na' leska' gak
zanllo we'llo yel llioxken ke'e dan'
nake' be'nn za'ke.

16Ni ke len na' bi lljachie'to'. La'kze tlla tlla zej llgor kwerp keto' ki, leska' tlla tlla llakob Diosen' yichjra'llda'oto'n. 17Na' sete te cha' bi da da'o llak kello yellrio ni. Na' da ka' za'kzi'llon' llakrenen lli'o nench lljazollo nbaraz kwis, kat lljazorenllo Diosen' ke chnare, len na' nak da za'klle ka billre. 18Na' bi wiallo da ka' nla' yellrio ni, zan wiallo da ka' bi nla' na', le dan' nla' xhej yellrio ni da te ke da ka', zan da ka' bi llre'llo yellrio ni, kere da te ke da ka', dekze dan' ke chnare.

Kwerp kellon' naken ka to yo' da bi zibia. Na' nnézello cha' ba bayinnjen, Diosen' ba none' to yo' wen kello yebá na', zeje di'llen' kwerp kello dan' sokze ke chnare. Len na' bi naken da ben be'nnach. ²Na' nna' nna zollo nbanllo yellrio ni, llonya'chllo llnnabllo lo ra'llda'ollo, zera'll-llo kwis lljazollo lo yo' dan' ba non Xanllo Diosen' kello yebá na'. ³Ke len na' la'kze yega'a xhallo da de

2 Corintios 5 320

rao yellrio ni, zeje di'll kwerp kello na'n, bi yega'nnllo ka'ze, le gonn Xallo Diosen' to da kob kello. ⁴Ke len na' nna ll-llayraollo ren kwerp kello ki, llonya'chllo lo ra'llda'ollo. Kere lle'nello yega'a xhallo na', lle'nello wayonne' lli'o to xhallo da bi te ke, nench na' banllo ke chnare. ⁵Dios na' ba breje' lli'o nench yellinllo gan' llie' na', bse'le' Spíritu ke'en zon lo ra'llda'ollo, nench na' nnézello nna dell da gonne' kello.

⁶Na'llen' bi llakgánello cha' bi llákello, le nnézello chak nna nbanllo kone kwerp kello ki, bi nna yellinllo gan' llia Xanllo Cristo na'. ⁷Na' la'kze bi nna re'llo da ka' gonne' kello na', zokzllo nxenra'lllloe'. ⁸Na' ke len na' llxenra'll-llo. le lle'nello wsanra'll-llo kwerp kello ki, nench yeyejllo gan' llia Xanllo Cristo na'. 9Ke len na' we'la'll-llo gonllo da yeyazra'lle' nench yewere' kan' llonllo chak nna nbanllo, na' ker bi gonen cha' nne'e wayejrenlloe'. ¹⁰Le llonen bien yeololtello tello rao Criston' gan' llone' yel koxchisen', na' wchoye' kello cha' sollo nbaraz o cha' sa'kzi'llo, kon akren' benllo ka nbanllo, benllo da wen o cha' benllo da xhinnj.

Be'nnachen' wak wani't ake' nbaraz rao Dios

11 Dan' ba nnézkzello yeolol-llo yedello di'll rao Xanllo Criston' ke yeolol da benllo, ke len na' lla'tyoera' be'nne wzenay ake' ke'e. Diosen' nnezre', do ra'llto' lla'tyoeto' be'nne wzenay ake' ke'e, na' zoto' bexhto' gakbe're, do ra'llto' llonto'n. 12 Kere lloe'rao kwinto' nia' ka', zan

nia' ka' nench yewere kan' llonto', na' gak yelli're xti'll be'nn ka' llnne wen ke kwin ake' to ko'llze, na' bi lloe' ake' di'll kan' nak dan' vo' lo ra'llda'o ake' na'. 13 Cha' llákere llaktontto' kan' bento' na', levevakbe'e kon kan' bne Diosen' bento'. Na' cha' llákere zocha'okze yichjra'llda'oto' na'n, legakbe'e llonto' bi da llonto' nench llakrento' re'. 14 Le nllie' Criston' lli'o, na'llen' llonto' xchine'n. Na' nnézello toze'n bzane' yel nban ke'en gote' ni ke yeolol-llo, na' naklloe' txhen, na' nnello yeololkzllon' ba gotrenlloe'. ¹⁵Criston' bzane kwine' gote' ni ke yeolol lli'o be'nnach, nench sollo gonllo kan' llazra'lle' na', na' bill sollo gonllo kon ka nen kello. Le'en gote' na' babane' radi be'nn wat ka' ni ke lli'o. ¹⁶Neto' kan' bi nna gonlira'llto' Criston', lláketo' bibi za'ke', lláketo' za'kll be'nne lla'a rao yellrio ni, cha' no nake', na' cha' bi da de ke'e. Na' nna' bill lláketo' ka' ke Criston'. ¹⁷Ke len na' be'nnen' ba nxenra'll Criston', ba bayake' ka to be'nn za gorj. Yeolol bi da bene', ba bden ka'le, na' nna' ba bayake' to be nn kobe.

¹⁸Dios na' ba bene' nench bazorenlloe' wen, na' ba bayone' lli'o ka to be'nn kobe dan' ba llonlira'll-llo Cristo na'. Ke len na' ba broe' rallna'llo yello be'nn ka' ka gon ake' nench yezorén ake' Diosen' wen. ¹⁹Ye aklloe' Diosen' bse'le' Criston' nench noteze be'nne gonlira'll Le'e, so ake' nbaraz rao Diosen', na' bill lljadinra'll Diosen' bi da xhinnj ba ben ake'. Ka'n llaya'l yello be'nne nench so ake' nbaraz rao Diosen'. ²⁰Criston' bse'le' lli'o roraze', na' ka Dios na'kzen' lla'tyoere' be'nne, ke len na' ka kwinkze Cristo na' lla'tyoeto' re': leyezorén Diosen' wen. ²¹ Criston' bibi da xhinnj bene'. Na' Dios na' bene' bxha'kzie' ni ke da xhinnj ke lli'o, nench na' none' lli'o be'nn wen dan' nxenra'll-lloe' na'.

Meto' llonrento' re' xchin Diosen' txhen. Na'llen' lla'tyoeto' re', bi gonkazre dan' ba baya'chra'lle' lli'o. ²Le nyoj le' xti'll Diosen', nen:

Kan' bllin lla go't latj, kana' bzenaya' ko'o.

Na' kan' bllin lla bexhre wasra'a re', kana'llen' gokrena' re'. Na' nna'n de latj, na' nna' naken lla llasra'a be'nne.

³Bi llonto' kon bi nen keto', da wllon ke be'nne bi nna wxenra'll Le'e, le lle'neto' bi ga't da nnechach ake' ke xchin Dios dan' llonto' na'. ⁴Ke len na' llontezto' biteze da wen nench llroe'to' nakto' wen xchin Dios. Na' llaora'llto' kat llsa'kzi' be'nne neto', na' kat billre yel zi' yel ya'ch za'k ko'llto'. ⁵Bzo kat bdin ake' neto', na' ka bro' ake' neto' rill va. na' ka ben ake' da ne xhen. Na' da zan ras bento' llin war, na' bchachto' bichgale, na' wil bdonto'. ⁶Broe'to' llonto' xchin Diosen', bitbi de da yel zdo' llonto'. Llzejnie'to' be'nne nench gombia' ake' da li na', napto' yel llxhenra'lle ke yeolol be'nne, llonto' wen ke yeololte'. Kon kan' Ilzejnie' Spíritu ke Dios na' llonto', na' do ra'llto' nllie'to' yeolol be'nne. ⁷Leska' zoto' llzejnie'to' be'nn di'll li ke Criston', na' yeolol bi dan' llonto'n naken kone yel wak ke Dios. Na' dan' llonto'n naken da

zej lixheje, llakrenen nench zoeto' dilrento' da xhinnjen'. 8Zo kat llonto' xchin Diosen', na' llayoe'rao be'nne neto', na' zo kat llwie akre' neto', na' zo kate nne ake' wen keto', na' zo kat nnechach ake' keto'. Ne ake' zive'to'n, na' neto' bi lljachie'to' lloe'kzto' di'll lin'. ⁹Na' bale be'nne bi llakbe'e akre' llonto' da za'ke, na' ye bale' llayakbe'e akre' da za'ksen llonto'. Wa bento' xhbab got ake' neto', zan nna nbanto'. Llsa'kzi' ake' neto', na' bi nna got ake' neto'. ¹⁰Da zan da llak da gakya'cheto', zan llawé lo ra'llda'oto'n. Nakto' ka be'nn nga'nnya'ch, na' llonto' nench be'nn zan so ake' nbaraz. La'kze bibi de keto', dan' nakto' Criston' txhen, yeolol bi da de naksen keto'.

¹¹Re' be'nn lla'a gan' nzi'i Corinto, ba be'rento' re' yeolol di'll da yo' lo ra'llda'oto', le nllie'to' re' kwis. ¹²Ba broe'to' kan' nllie'to' re', na' re' bi nna wroe're cha' nllie're neto'. ¹³Lla'tyoera' re' ka llon to be'nne lla'tyoere' xhi'nne', lewroe' artk nllie're nada' kan' ba broe'ra' nada' nllie'ra' re'.

Spíritu ke Diosen' yo'n lo ra'llda'o lli'o nxenra'll Le'e

¹⁴Bi llaya'l gonllo txhen be'nn ka' bi nxenra'll Criston'. Cha' Dios na' ba none' lli'o be'nn wen rawe' na', bi gak gonllo txhen be'nn wen da xhinnj ka'. Lli'o ba yo' beni' ke Criston' lo ra'llda'ollo, bi gak gonrenllo be'nn ka' txhen, be'nn ka' bi yo' beni' ke Criston' lo ra'llda'o ake'. ¹⁵Le Criston' bi gak gonrene' daxi'on txhen, ka'kze ke be'nnen' nxenra'll Criston', bi llaya'l gonrene' be'nnen' txhen be'nnen' bi nxenra'll

Le'en. ¹⁶Le bi gak gonlira'll-llo lwa'a gan' llonlira'll-llo Dios na', le lli'o ba nakllo ka yoda'o gan' zo Dios na'. Le Dios na'n bne'e:

Serén ake', na' tarén ake'. Na' gaka' Dios ke ake', na' leake' gak ake' yell kia'. Ke len na' llava'l gonllo kan' bne

¹⁷Ke len na' llaya'l gonllo kan' bne Xanllo Dios na':

> Leyelloj radj be'nn ka' bi nxenra'll nada'n, bi gonrén akre' txhen.

Na' bi gonre da xhinnj. Na'llen' serena' re'.

¹⁸ Na' gaka' Xare, na' re' gakre xhi'nna'.

Ka'n ne Xanllo Dios be'nnen'
nap yel wak xhen na'.

Kan' naken be'nn bi'cha' ak
nllie'ra', ba nnézkzere kan'
bne Diosen' gone' kello da wen
na'. Ke len na' bill llaya'l gonllo da
xhinnj dan' ll-lleyi' xpe'rllon' na'
dan' ll-lleyi' lo yichjra'llda'ollon'.
Llaya'l llebllo Diosen' wzenayllo
ke'e yeo lla, na' gakllo be'nn
xhira'll kan' lle'nre' na'.

Ba blla'a xhbab ke be'nn Corinto ka'

²Lellie' neto'. Ni tore bibi béneto'. Ni tore bi bzejnie'to' krere, na' ni tore bi bxhiye'to'. ³Kere nia' ka' nench wxoa' do'l ko'llren', le ka'n ba bnekza' kana', nllie'ra' re', la'kze banllo o la'kze gatllo. ⁴Do yichj do ra'lla' lloe'rena' re' di'll, na' llawera' ba bnnezra' ka wen na' llonre. Na' ba bayakxhenra'lla', na' nbaraz zoa' la'kze da zan da llak kello.

⁵Kan' ballinto' gan' nzi'i Macedonia na', bibi latj go't yezi'ra'llto', le bxha'kzi'to'. Bni't be'nne bchachrén ake' neto', na' lekze blleb lo yichjra'llda'oto'. ⁶Na' Dios be'nnen' llayoe' yel llxhenra'll ke be'nne, bayonne' neto' yel llxhenra'll kan' bara' Titon' gan' zoto'n. ⁷Kere dan' bara' Tito na'zen' baxhenra'llto', renkze dan' badie' di'll na'n, llawere' kan' llonre na'. Na' be'e di'll zera'llre kwis yedwiato' re' da yobre. Na' ne'e, llákere ka da ka' ba goken, na' ngo' yichjre gonre kan' bnia'n. Na'llen' bawellra' bnnezra' ka'.

⁸Na' llakbe'ra' gokya'chere kan' bnia' le' yichen' bzoja' re' na'. Na' bdere gokya'chra' kan' bena'n dan' gokya'chere na', na' nna' bill llakya'chra' dan' bse'la' yichen', le chollzen' gokya'chere. ⁹Nna' llawera' le gokrenen re', nench na' gókere ka da xhinnjen' benre, na' bayátere, le bzoya'chre kan' lle'ne Diosen'. Na' benkzen wen ke naken bzoja' re' na'. ¹⁰Le kat llzoya'chllo kon kan' lle'ne Dios na', llonen nench llayátello, na' lla't yel wasrá kello, na' billbi de gakya'chello. Zan bal be'nn kate llak akre', na' bi llayat akre' xto'l ake'n, leake'n llbeyi'. 11 Llawé Diosen' kan' benre gókere, le gokrenen re' bzera'llre benre kan' bne Diosen'. Na' bill benre txhen be'nnen' ben da xhinnjen', na' gokrenre nada', na' goklla're ka da xhinnjen' bene'n. Bllebre, na'llen' bzera'llre yedwia' re', na' do ra'llre bnaore benre kan' lle'ne Diosen'. Na'llen' be're yel llza'kzi' ke be'nnen' ben da xhinnien'. Nakbie'kze billbi do'l keré de kan' benre na'. 12 Na' ka nak yichen' bzoja' re' na', kere to ke be'nnen' ben da xhinni na'zen' blle' yichja', leska' kere to ke be'nnen'

323 2 Corintios 7, 8

bene le'e ka'. Renkzren' blle' yichja' nench gakbe're rao Diosen', nna nllie'to' re'. ¹³Na' nna' ba llaxhenra'llto' le ba bzenayre keto'.

Na' leze llaweto' kwis ka nbarazen' zo Titon', le yeololre ba bazoare Titon' nbaraz ren da yo' lo yichjra'llda'we'n. ¹⁴Bi baye'ra' golla' Titon' nakre be'nn wen, le nnezra' gonre wen. Le da lin' nake yeolol da ka' llzejnie'to' re' na', lekze ka' da li gok dan' gollto' Titon', zoto' nbaraz ka da wen na' llonren'. ¹⁵Na' nllie'llre' re' le lljadinra'lle' kan' bzenayre ke'en, na' dan' gopre' bara'nne. ¹⁶Ke len na' llawera', na' nnezra' yeyoll gonre ka dan' lle'ne Diosen' gonre.

Da go't ke ake' bzan akre'n gokrén ake' be'nne

Be'nn bi'che, lle'neto' nnézere kan' ba gokrén Diosen' to kwen be'nn ka' lldop ll-llay llonlira'll ake' Criston' toto yell gan' nbane Macedonian'. ²La'kze gok yel ya'ch yel zi' kwis ke ake', Diosen' bene' ka bni't ake' nbaraz lo ra'llda'o ake', na' bawé akre' kwis btop ake' mell xhen nench gokrén ake' be'nn bibi de ke. ³Nada' nnezra', na'llen' lloa'a di'll, be'e ake' bi da byallje be'nn yobre la'kze bibi go't ke leake'. 4Go'tyoe akre' neto' we'to' latj we'e ake' mell gakrén ake' be'nn ka' nxenra'll Diosen'. ⁵Na' ben aklle' ye ra't kan' lláketo' gon ake' na', le zga'tek ben kwin ake' rallna'a Xanllo Cristo na'. na' leska' ben kwin ake' rallna'a neto', dan' gokra'll ake' kwis gon ake' kan' lle'ne Dios na'. 6Ke len na' ba go'tyoeto' Titon' wayede' ye

to gan' zore na', nench gakrene' re' yesyollre wtopre mell dan' ba bzoraore lltopre kana'. ⁷Wen kwis llonre nxenra'llre Criston', na' llyixjwe're xti'lle'n, na' llejnie're kwasro da nak ke Diosen', na' zore llonre xchine'n, na' nllie're neto'. Leska' legón wenll, lewtope da yallje be'nne.

⁸Bi llona' bien we're mell, kon lle'nra' gonre xhbab ka llon be'nn bi da lloe' do yichj do ra'lle, na' ka' wak nnézere cha' nllie're Diosen' do yichj do ra'llre. ⁹Ba nnézkzere kan' nllie' Xanllo Jesucriston' lli'o. Na' dan' nllie're' lli'o na', bakwa'nne' yeolol da cha'o da de ke'e gan' lliarene' Dios na', na' bede' gorje' goke' ka be'nn ya'ch yellrio ni, na' badyene' nench yeolol dan' de ke'en gaken kello naklloe' txhen.

10 Na'llen' wzejnie'ra' ka dan' llakra' nak wen gonre. Wdwize bzo lo ra'llda'oren' gakrenre be'nn ya'ch, na' bzoraore btopre mell do yichj do ra'llre. 11 Na' llakra' wen na' naken wasyollre wtopren do yich do ra'llre kan' benkzre kan' bzoraore, na' we're arke zerao sa'kere. 12 Cha' to be'nne do yichj do ra'lle lle'nre' we'e bi da we'e, Diosen' wawékzere' la'kze da ra'ten. Diosen' bi llnnabe' we'llo to da bi de kello.

¹³Bi nia' gonre ke da ni, na' billbi yega'nn keré dan' be'ren ke be'nn yobre. ¹⁴Kon lle'nra' ga't da yallje yeololre. Cha' nna' de ke re', llaya'l gakrenre be'nn ka' yallje. ¿Bixha cha' wllin lla kate ga't ke leake', na' re' yálljere? Na'llen' yeyakrén ake' re', na' ga't da yallje yeololre. ¹⁵Na'llen' gak kan' nyoj xti'll Diosen'

nen: "Be'nnen' btopll da xhenlle bitbi bago'nn ke'e, na' be'nnen' btop ra'tze, bitbi byalljre'."

Ka da llon Titon' ren be'nn lwellje' ka'

¹⁶Llioxken Dios bene' nench zera'll Titon' kwis gakrene' re' kon kan' llona' nada' na'. ¹⁷Na' ka golle' yedwie' re' nench gakrenlle' re' ye ra'te, bawere' kwis, le bzo lo yichjra'llda'we'n yeyede', na' gakrenlle' re'.

¹⁸Na' llse'lto' ye to be'nn lwellillo ren Titon'. Na' to kwen to kwen be'nn ka' lldop ll-llay llonlira'll Criston', lloe' ake' di'll ke be'nnen' llse'lto' ni, ne ake' nbaraz llyixjwe're' Di'll Wen ke Jesucriston'. 19 Na'llen' brej ake' le'e, nench sa'rene' nada' kate cha'a gan' lla'a be'nn lwellillo ka', lljasana' mell dan' lltopllon'. Na' we'llo mellen' nench gonllo Xanllo Jesucriston' xhen, nench wroe're llawere llakrenre be'nn lwelljre ka'. 20 Na' llwiato' nench ke si'chi'll be'nn neto', ke nake mellen' lltopto'n. ²¹Na' llwiato' gonto' da li, kere chraoze rao Xanllo Dios na'. renkze rao be'nnach ake.

²²Na' leska' llse'lrén aktoe' ye to be'nn lwelljllo. Zan ras ba bre'to' llone' xchin Diosen' do yichj do ra'lle', na' nna' lle'nre' yede' gan' zore na', dan' nnezre' zera'llre kwis gonre kan' llazra'll Dios na'. ²³Cha' no llnnab bi llon Titon', wak ye akre' llonrene' nada' xchin Diosen' nench na' llakrento' re'. Na' cha' wnnab akre' bi llon be'nn ka' ye chope, leyé ake' be'nn ka' lladop ll-llay llonlira'll ake' Criston', brej

ake' leake', na' llse'l ake' leake'.

²⁴Ke len na' legón akre' wen, nench
nneze be'nn ka' llon Criston' xhen
toto yell nllie' akere', na' wroe'n
llonkzre wen, kan' bneto' kan' be'to'
di'll keré.

Da btop ake' nench na' gakrén ake' be'nn lwellj ake' ka'

Bi llonteken bien wzoja' re', nnia' lekwej mell da gakrén be'nn ka' nxenra'll Criston' do ga yobre. ²Nnezkzra' lle'nere gakrén akre'. Na' ba be'rena' be'nn Macedonia ka' di'll nench nnez akre', re' zore gan' nbane Acayan' lle'nere gakrenre be'nn ya'ch ka', na' ba bzoraore btopre mellen' wdwize. Na' da llonre na' ba llperen be'nn ka' zjalla'a zan yell gan' nbane Macedonian', nench na' gon ake' kan' ba llonre na'. 3Na' llse'la' be'nn ki nench ke bi yega'nna' wen, ka nak ba bia'a di'll keré nakre be'nn wen, na' nench na' sore xhnid. ⁴Le cha' sa'rén no be'nn Macedonia ka' nada' kat yeda' na', na' gakra' zdo! keré cha! bi sore xhnid katen! yeda' na', na' lekze ka' re' yeye're bi benre kan' bnia' na'. ⁵Na'llen' gokra' wen kwiarao be'nn lwelljllo ka' chonne', yed ake' gan' zore nench gakrén ake' re', wzeraore wtopre mell dan' bnere we're na'. Na'llen' we'ren do yichj do ra'llre, kere we'ren do yediaze.

⁶Lelljadinra'll kan' ne ake': Be'nn llaze ra'tze, ka' ra'tze llarape', na' be'nn llaz da xhen, da xhen yerape'. ⁷Ke len na' llaya'l we'e totore arke da llzánere we're, na' bi we'ren do yediaze, lewe'n do ra'llre, le Dios na'n llawere' be'nn zo nbaraz llzanre' bi da lloe'. ⁸Diosen' nape' yel wak, na' llakrene' lli'o biteze da yálljello. Na' llone' lla't yeolol da yálljello batteze, nench gak we'llo da yallje be'nne, na' gonllo billre da wen. ⁹Xti'll Diosen' nyojen ke be'nn llzanre' da de ke'e nen:

Ba be'e da byallje zan be'nn ya'ch.

Na' bi ganra'll Diosen' da wen na' bene'.

¹⁰Dios na'n llone' lla't no xhoa' binn da llazllo, na' billre yela' da lle'i llaollo. Lekze gonne' yeololte bi da válljere, nench na' sa'kere we're bi da we're, na' gone' chi'o ka nak dan' zánere lloe're na', na' kone Le'en chejllre gonre da wen. ¹¹Diosen' gone' ga't da cha'o keré nench wak we're do yichi do ra'llre be'nn bi da llyallire'. Na'll kat we'to' be'nn ya'ch ka' dan' ba btopre na', na' we'e ake' yel llioxken ke Diosen'. 12 Le dan' we're da yallje be'nn nxenra'll Jesucriston' do ga yobre, be'nn zan we'e yel llioxken ke Diosen'. ¹³Na' kate si'i be'nn ya'ch ka' mellen' lltopren', na' wroe'n llzenayre Di'll Wen ke Criston' do yichi do ra'llre. Na'll we'e leake'n yel llioxken ke Diosen' dan' wse'lre mell dan' gakrén leake'n, na' dan' llakrenre yeolol belnn nxenralll Criston!, 14 Leskal yelwill ake' Diosen' dan' nllie' akre' re', na' wnnab akre' Dios gakrenlle' re' ye ra'te, le ba broe'n nllie' Diosen' re' kwis. ¹⁵Llioxken Diosen', kateken' za'k dan' llone' kellon'.

Diosen' broe' rallna'a Pablon' bzejnie're be'nne

Nada' Pablo lla'tyoera' re' ren di'll cha'o, kan' ben

Criston', be'e di'll cha'o, Le'e goke' be'nn xhenra'll, na' be'nn cha'o. Bal be'nne llasné ake', to llebza' tila' re' kat zorena' re' txhen, na' kat zoa' zi'te na', llayaxhjra' llzoja' re', na' dila' re' le' yich ka' llzoja'n. ²Lla'tyoera' re' gonre da wen nench kat yeda'n, bi yalljen tila' re', le dekze de tila' be'nn ka' llake llona' ka dan' nen kia'. 3Le la'kze zoto' yellrio ni, nakto' be'nnach, kate dilrento' da xhinnjen', bi dilrento'n ka dil to be'nnach rao vellrio. 4Na' bi dilrento'n kone vel wak keto'. Dios na' benne' neto' yel wak, nench na' tilrento' dan' llon daxi'on, nench na' wchochj wlanto' yel wak ken, na' yel wxhiye'e ken. ⁵Dios na'n llakrén neto' nench llxhexi yichira'llda'o be'nne, llzenay ake' ke Criston', na' llbej yichj ake' xhbab xhinnj ke ake'n, na' billre da ll-llon gombia' ake' Dios. 6Na' kat yeyoll wroe'n yeololre ba llzenayre ke Diosen', kana' ba nwiato' ka gonto' ke be'nn ka' bi llzenav.

⁷Lewiá ka dan' llre're llonto' na!. Cha! nol re! llákere nakre Criston' txhen, leyeyón xhbab kere re'zre'n, renkze neto'n naktoe' txhen. 8Bi yeye'ra', we'renkza' re' di'llen' ye ra'te kan' ba bia'n na', le llawera' le Xanllo Criston', bse'l neto' nench na' gakrento' re', na' chejnie're Di'll Wen ke'en, kere da wlleyi' re'n. ⁹Bi lle'nra' no gake cha' dan' llzoja' re' ni, naken nench wcheba' re'n. 10 Be'nn ka' llasnnechach kia', ne ake' kat zoa' zi'te, llzoja' re' llonra' re' znia kwis ka to be'nn wnebia': na' ne ake' bibi llak bi nnia', kate zorena' re' txhen, na' bi lloa'a di'll

da za'k da wzenayre. ¹¹Be'nn ka' nnechach kia'n, llaya'l nnez akre' kan' lleto' re'n, kan' llzojto' re' katen' zoto' zi'te, leska'kze gonto' kat yedsorento' re'.

¹²Bi lle'neto' gakrebeto' be'nn ka' llayoe'rao kwin. Llak akre' wenllen' llon leake', le totoe' kon llwia lwellj ake', nench nne ake' llon aklle' wenll kerke kan' llon be'nn lwellj ake' ka', na' bi llayakbe'e akre' bin' llon ake'. ¹³Neto' bi llayoe'rao kwinto', kon lloe'to' di'll ke da ka' gokrén Diosen' neto', da ka' bento' gan' bse'le' neto' na', na' leska' ba bse'le' neto' gan' zore na'. 14 Na' bi zive'to' kat lloe'to' di'll ke dan' ba bento' gan' zore na', le nakto' be'nn nell bzeinie'to' re' Di'll Wen ke Criston'. Chenak bibi bento' gan' zore na', di'll wenra'llzen' lloe'to' chet ka'. 15 Na' bi llonto' llali we'to' di'll ke da ben be'nn yobre, bento' xchine' kon gan' bse'le' neto'n. Nna bexhto' gonlira'll-llre Criston' nench na' gonllto' xchin Diosen' gan' zore na', kon ke nak da bkwa'nn Diosen' lo na'to' gonto'. 16 Na' lle'neto' chixjwe'to' Di'll Wen ke Criston' ga nakll zi't ka gan' zore na'. Na' lle'neto' chixjwe'to'n ga nono nna chixjwe' len, nench ke wlanto' ka nak da ba ben be'nn yobre.

¹⁷Bi llaya'l wayoe'rao kwinllo bi da ba benllo, toze Xanllo Dios na'n llaya'l wayoe'raollo dan' ba bene' na'. ¹⁸La'kze cha' to be'nn nne'e llone' wen, bi chejle'llo. Zan cha' Xanllo Dios na', nne'e llone' wen, na'llen' nnello da lin' nake' be'nn wen.

Pablon' Ilzejnie're' akre nak be'nn ka' ziye'e ne ake' nak ake' postl ke Cristo

Lle'nra' wzenayre ye to chop di'll wen da wa'a kia'kza'. la'kze cha' llákere di'll da bibi za'ken. Lewzenay kia'. ²Nada' bzeinie'ra' re' xti'll Criston' da nelle nench na' benlira'llre, ni ke Dios na'n nllie'ra' re' do yichi do ra'lla'. Na' lle'nra' llie're toze Cristo na', nench sa'ke gona' re' rallne'e, gakre ka to no'r we'o, no'r nna napchi'i kwine'. ³Llak nxhollra' siye'e be'nne re', na' bill gonlira'llre Criston' do ra'llre, na' bill llie're toze Le'e. Ka'n ben bel ban' nak ba xi'o, bxhiye'ba' no'r nellen' golle Eva. ⁴Kate llra' be'nne gan' zore na', nlla're llzejnie' akre' re' ke Jesúsen' kan' ba bzejnie' neto' re', na' llzejnie' akre' re' nlla're ke Spíritu ke Diosen', na' ren Di'll Wen ke'e na', na' le llzenayteren do ra'llre. ⁵Ba non akre' ka postl keré, na' llonre leake' xhen, rencha' nada' za'klla' ka leake'. ⁶La'kze bi za'kra' we'rena' re' di'll kwasro. ba bre'kzere da ka' ba bento'n, na' nnézkzere llejnie'to' xti'll Diosen' kwasro.

⁷¿Llákere bi bena' wen dan' bi bxhi'i raxhja' kan' be'rena' re' xti'll Diosen'? Bena' kwina' ka to be'nn bibi za'k, dan' bi bxhi'i raxhja' nench bena' ka sore nbaraz. ⁸Bxhia' mell da benn be'nn ka' lldop ll-llay llonlira'll Criston' lla'a do ga yobre nench be'rena' re' xti'll Diosen'. ⁹Na' kan' bzorena' re', la'kze byalljra' bi da byalljra', bi bnnabra'n re'. Be'nn ka' zaya'k Macedonia na', benn ake'

327 2 Corintios 11

da byalljra' nench bi benra' re' zede, na' bexha' bi gonra' re' zed gonnre da yalljra'. ¹⁰Llawera' llak llepa' re' ka', le nnezra' llakrén Criston' nada' lloa'a di'll li, na' nono be'nn ka' lla'a doxhen gan' nbane Acayan', gak yeka'a ake' yel llawé kia'n. ¹¹¿Bixchen llepa' re' ka'? ¿Llákere bi nllie'ra' re'n? Nnezkze Diosen' nllie'ra' re'.

¹²Na' ka'kze gona' bibi wchixhja', nench na' bibi de wde' be'nn ka' nne ake', kan' llon leake'n ka'kzen' llon neto'. 13 Leake'n bi nak ake' dogarje postl. Kon di'll wenra'llzen' llzejnie' akre', na' llonre' akre' re', nench gákere Criston' bse'l leake'. ¹⁴Bi vebánere kan' llon ake'n, le ka'kzen' llroe'rao daxi'on lli'o. llayón kwinen ka to angl llseni', nench gákello naken to angl za'a yebá gan' llia Diosen'. 15 Ke len na' bitbi llak akre' dá ake' ziye'e ake', llon ake' ka be'nn dá lloe' di'll li. zan wllin lla, sa'kzi' ake' ke chnare yel wen da xhinnj ke ake' na'.

Kan' bxha'kzi' Pablon' dan' nake' postl na'

16 Ni nia' re' da yobre, bi gákere nada' ka to be'nn bi llejnie'. Na' cha' llákere llona' xhbab da bi za'ke, lewzenay ke wa'a to chop di'll wen kia'kza'. ¹⁷ Wa'a di'll wen ke kwina', la'kze cha' nnezra' bi benn Xanllo Criston' rallna' gona'n. We'kera'n ka ke to be'nn llon xhbab da bibi za'ke, be'nn bi llejnie'. ¹⁸ Be'nn zan lloe' xti'll kwin ake' cha' bi da ba ben ake', ka'kzen' gona' nada'. ¹⁹ Ba non kwinre ka to be'nn si'n, ke len na' llawere llzenayre ke be'nn llaso'n xhbab da bibi za'ke'. ²⁰ Llzenayre

ke be'nn ka' ba ben ake' re' ka to be'nn wen llin ke ake'. Lloe're latj ziye'e ake' re', nench lloe' akre' bi da de keré, na' llontezre kon bi ne ake', na' llbiacha' ake' re'. Na' lloe're latj llgo' ake' ke xa'yre, llsa'kzi' ake' re'. ²¹ Balátere lla be're latj ben akre' re' ka', rencha' neto' bi bayáxhjeto' góneto' re' ka'.

Le chet ka' noteze be'nne llayaxhjre' lloe' di'll wen ke kwine', leska' wayaxhjra' nada' wa'a di'll wen ke kwina', la'kze gona' ka to be'nn bi llejnie'. ²²Leake' ne ake' nak ake' be'nn Hebreo, leska' be'nn za'a rao dialla be'nn Hebreo ka'kze nada'. Leake' ne ake' nak ake' be'nn Israel. leska' be'nn ganna'kze nada'. Na' leake' ne ake' nak ake' xhi'nn dialla da Abraham, leska' xhi'nn dialla da Abraham nada!. ²³ Llasné ake! bse'l Criston' leake' nench gon ake' xchine'n. Lekze Le'en bse'l nada', na! ba benlla! xchine!n ker ka leake!. Si'xhenre dan' lloa'a di'll ka llon to be'nn bi llejnie'. Ba benlla' llin war ker ka leake', da zan ras bdin koxchis nada! dan! lloa!a xti!ll Dios na!. Na! zan ras ba bwie be!nne nada! bro' akte' nada' rill ya, ker ka leake'. Na' zan ras ba be'x ake' nada', na' gokra'll ake' got ake' nada'. ²⁴Ga'y kwen twaljalloa (39) ras weje bdin be'nn Israel ka' nada' kone sot de yid. ²⁵Chonn ras bdin koxchis ka' nada' xhis. Na' to bchekw ake' nada' yej. Na' ka zya' to lo barco, chonn ras bxhinnj barcon' lo nisda'on, na' ganne bara'a. Na' chnia bllia' tlla chyere lo nisda'on. ²⁶Zan ras ba bya'a yell zi'te jatixjwe'ra' xti'll Criston'. Zan ras ganne gok bdia' yeo ka', na' zo ka bdia' ga zjalla'a be'nn wan ake, na'

zo kat be'nn wra'll kia' ka' gokra'll ake' got ake' nada', na' zo kat be'nn bi nake be'nn Israel, leska' gokra'll ake' got ake' nada'. Na' bzoa' nxholl do yell ka', na' do ga nono be'nn llra', na' do lo nisda'o ye ra'tze ke gota'. Na' bllach be'nn bxhiye'e ake' ne ake': "Nakllo txhen," na' gokra'll ake' got ake' nada'. ²⁷ Zan ras bena' xchin Diosen' to baxa'kra', na' zan ras bi go't latj tasa'. Nombia' yel llbil lldon, le zan ras bi go't da ye'j gawa'. Na' zan ras bayaya' bi go't xhara'na'.

²⁸Da zanllre da bxha'kzia' da bi lloa'a di'lle, na' leska' yeo lla llakzedra', akre llak ke be'nn lwelljllo ka' lldop ll-llay llonlira'll Criston' toto vell ka'. ²⁹Na' cha' llakre villwe'. wa llakya'chra' kwis, llaktekzera' nada'n llaka' yillwe'n. Na' leska' kat no be'nn llko'yelre' re' gonre da xhinnj, llake lo ra'llda'wa', llaklla'a cha' ba llonre kan' ne ake' na'. 30 Na' cha' llonen bien we'lla' di'll ke kwina'. llaya'l wa'a di'll ke dan' llroe'n bibi de gona' to wraza'. ³¹Na' Dios be'nnen' lloe'raollo ke chnare, nnezre' lloa'a di'll li. Le'en nake' Xa Xanllo Jesucristo na'. ³²Na' ye to da gok kia', kan' bzoa' yell gan' re Damasco, be'nnen' gokrén be'nn wnebia'n nzi'i Aretas, bzoe' be'nn ak bdap ake' gan' llde be'nn ka' gan' zo ze'e dan' nechj yell na', nench go'x ake' nada' kate yelloja' na'. ³³Na' be'nn lwelljllo ka' bro' ake' nada' to lo wit, na' baletj ake' nada' ko'llre ze'e dan' nechj yell na', na' bara'a lo na'a be'nn ka' gokra'll go'x nada'.

Da bre'da'we Pablon'

12 Bibi lliara'lla' cha' wne wen ke kwina', zan wa'a di'll

ke dan' ba bre'da'ora'n, na' da ka' ba bzejnie' Xanllo Criston' nada'. ²Ba nombia' to be'nn nao nxenra'll Criston', ba gok chda' (14) iz byeje' yebá. Bi nnezra' cha' byeje' ren kwerp ke'e na', o cha' kere ren len na', Dios na' nnezre'. ³Na' nombia' be'nnen' byej yebá na'. Bi nnezra' cha' ren kwerp ke'en o cha' kere ren len na', Dios na' nneze. ⁴Na' blline' gan' llia Diosen', na' benre' lloe' be'nn ka' di'll da za'ke da nono be'nnach nna gak we'e ka di'll ki. ⁵Ka nak be'nn ni wayoe'rawa', zan ka nak nada' bibi de da wayoe'rawa' kwina'. Kon wa'a di'll ke da ka' ba gok kia', dan' llroe'n bi llak bi gona' to wrazza'. 6Na' chenak lle'nra' wayoe'rao kwina', da zan da wen ba bena' da nak zi wa'a di'll chenak, da nak di'll li, kere di'll wenra'lle. Zan bi wa'a di'll ke da wen ka' ba bena'n, le bi lle'nra' no yeyoe'rao nada'. Wenre gon ake' xhbab cha' za'k dan' llre'e akre' llona' na', na' ka dan' llen akre' lloa'a xti'll Dios na!.

⁷Nench bi gona' xhbab za'klla' nada' dan' bre'da'ora'n, na' dan' bzejnie' Xanllo Criston' nada', Dios na' be'e lati ll-llayrawa' zo to da zo lla'd kwerp kia'n, ke ga lla'de ye'ch, le ka'n lle'ne daxi'on gak nench wsa'kzi'n nada'. 8Chonn ras ba bnnabra' Xanllo Criston' veke'e dan' ll-llayraorena' kwerp kia'n. ⁹Na'll goll Xanllon' nada': "Yel nllie' kia'n zerenen rwe'. Lezen na' yalljro'. Le kat bi za'kro' bi gono', kana'llen' gakbe'ro' llakrena' rwe' nench gono' bi da llaya'l gono'." Ke len na' llawera' we'lla' di'll. ke dan' llroe'n bibi llak gona', le lle'nkazra' yel wak ke Criston' sorenen nada'.

10 Ke len na' llawera' biteze da llak kia' nench na' gak Criston' xhen, na' llroe'n yalljra' gakrene' nada'.

Na' llawera' kate lltitje be'nne nada', kat bi da yalljra', kate llraydo be'nne nada', na' kate billre da llayrawa'. Na' kat llak kia' ka', kana'n llakrenll Criston' nada' kone yel wak ke'e na'.

Pablon' blle' yichje' ke be'nn ka' nxenra'll Criston'

¹¹Ba bia'a di'll bavoe'rao kwina' ka llon be'nn bi llejnie'. Re'n llaya'l we're xti'lla'n naka' be'nn za'ke, na' bi llonre ka'. Ke len na' benkza' bien bia'a di'llen' ka'. Le nxenra'llre be'nn ka' ba nonre ka postl keré. Na' nada' llakra' toz ka za'ka' kon kan' za'k leake', la'kze llakbe'ra' bibi za'kteka' cha' bi zorén Diosen' nada'. ¹²Ba bre'kzere naka' dogarje postl, le kan' badsorena' re', broe' Diosen' zorén yel wak ke'en nada', na' bene' nench gok billre da za'k yebane be'nne, na' gokrene' nada' nench bdaora'lla' yeolol da gok kia' chak bena' xchine'n gan' zore na'. ¹³Lesi'xhen cha' brekyi'lla' re', dan' bi benna' latj gakrenre nada', kan' ben be'nn ka' yela' be'nn ka' ba llonlira'll Criston'.

Pablon' llyixjwe're' leake' lljara'nne' leake' da wayonne ras

¹⁴Lle'nra' wayónn ras yeda' yedwia' re', na' bi gonra' re' zed kat yeda' na'. Le bi lle'nra' gonnre nada' bi da de keré, kon lle'nra' wzenayre, na' gon kwinre rallna'a Criston'. Ka llon to bida'o, bi llaya'l we'be' da yallje xaxhna'be', xaxhna'be' na'len' we'e lebe' cha' bi da yálljebe'. ¹⁵Le nada' do ra'lla' llzanra' bi da de kia', na' rente kwina' llzanra' nench na' gakrena' re'. Na' la'kze cha' nllie'ra' re', llakbe'ra' bi nllie'tekere nada'.

16 Na' balre la'kze llakbe're bibi zed benra' re' bi da byalljra', nere bxhiya' re'n. 17 ¿Bixha llákere bxhiya' re'n kan' bse'la' be'nn lwelljllo ka' gan' zore na'? 18 Go'tyoera' Titon' badwie' re', na' bse'lrene' ye to be'nn lwelljllo. ¿Bxhiye'e Titon' re'? Le'e ren nada' toz ka llonkzto', na' toz kan' lle'neto' gakrento' re'.

¹⁹¿Llákere llayoe'xhento' re'n kan' ba gollto' re' na'? Rao Diosen' na' rao Cristo na', lloe'to' di'll li nench na' wxenra'llre Diosen', lloe'rento' re' di'll ki le nllie'to' re'. 20 Na' to ba lleb xhiza' kate yedra'nna' re', cha' wroe'n bi llonre wen kan' lle'nra' gonre na'. Na' cha' ba llonre da xhinnj, bi chazra'llre kan' gona'n. Lleb xhiza' nxholl lla're dilre, na' llaxhé' lwelljre, llrok lwelljre, na' lle'nere re'ze gak wen keré. Na' bi ne bi zill ke lwelljre, na' lltitjre de di'lle, na' nakre be'nn ya'ra'lle, na' bibi xhnneze yo' kerén'. 21 Leska' lleb xhiza' katen' yedra'nna' re'n da yobre, Diosen' gone' gakra' zdo' kan' llonre. Na' kwella' kan' llonre, ka nak nna llonre da xhinnj, kan' llonre kan' batna'te, na' bi nna yeyátere da yel zdo'n llonre, nzoa no xtore, na' zorenre be'nn bi nak be'nn keré, na' no'r bi nak no'r keré.

Pablon' ne'e llaya'l sa'kzi' cha' no llon da xhinnj

13 Nna' gak chonn ras yedwia' re'. Katen' gaollo xhia ke

2 Corintios 13 330

noteze be'nne, wroe'n nape' do'le cha' vetilen kan' llasné chop chonn be'nne lloe' ak di'll kan' goken. ²Ka di'll ka' be'rena' re' kan' bzorena' re', na' nna' nia' re' da wllope, llonteza' ka be'nn zerén re'. La'kze bi zia' gan' zeren', llzoja' re' da yobre, bi yeya'chra'lla' be'nn ka' ben da xhinnjen' cha' bi yeyat akre'. ³Llwiare gona' to da re'tere da wroe'n, Cristo na' nne'e nada'. Na' kere nnello nake' ka to be'nn bibi llak llon na'. Za wroe're' vel wak xhen ke'en, na' gone' nench sa'kzi're ka da xhinnien' nonre na'. ⁴Na' la'kze ben Criston' ka be'nn bibi llak gon kan' bet ake' Le'e le' yay cruzen', zoe' nna' dan' nape' yel wak xhen ke Diosen'. Leska' neto' nakto' Criston' txhen, ben kwinto' ka be'nn bibi llak gon, na' wroe'to' re' zorén vel wak ke Diosen' neto' nench za'ke wzenia'na'to' re'.

⁵Lewiaya'nn cha' li nxenra'llre Jesucriston'. ¿Bi llakbe're Xanllo Jesucriston' zerenkze' re'? Lete cha' ba gonra'llre bi da gok keré kana'n, na'llen' bill llakbe're cha' zerene' re'. ⁶Na' zoa' rez gakbe're, neto' bi nna wsanra'llto' yel wxenra'll Le'en la'kze ll-llayraoto'. ⁷Na' llalwillto' Diosen' nench gakrene' re', na' llnnabto' billbi da xhinnj gonre, kere nench gakbe're neto' za'kllto', zan nench na' sore gonre da wen na'. Le toz ka llonen ke neto', cha' llayakbe'e be'nne naoto' nxenra'lltoe' o cha'

ni ke llakbe'e akzre'. ⁸Bitbi gak nnello ke da lin', lete da llaya'l gonllo serenllo da lin' txhen. ⁹Llaweto' gonto' ka be'nn bibi llak gon, nench na' re' wxenra'llre do yichj do ra'llre. Na' zokzto' llalwillto' Dios, llnnabto' gakrene' re' wxenra'llre do yichj do ra'llre. ¹⁰Da kin' ba bzoja' re' ka za yedra' yedwia' re', nench yeyátere da xhinnj kerén', nench bi gonra' re' znia. Le Cristo na'n bse'l nada' naka' postl ke'e, na' benne' nada' yel llnebia' da gakrena' re', kere da wlleyia' re'.

Pablo llwape' lliox be'nn ka' nxenra'll Criston'

11 Be'nn bi'che, llnnaba' gakchga wen keré. Lekwek yichjre gonya'nnre yeolol dan' lle'ne Diosen' gonre. Legakxhenchaze cha' bi da llak keré. Legak toze ren lwelljre nxenra'llre Criston', na' lesó kwasro ren be'nn lwelljre. Le Dios na'n nllie're' lli'o, na' nzoe' lli'o zo bezllo nbaraz ren da yo' lo ra'llda'ollo, na'llen' llnnaba' sorenchgue' re'. ¹²Na' kat yellayre lewno'p na'a lwelljre. ¹³Yeolol be'nn ka' nxenra'll Criston' do ni, llwap ake' re' lliox.

¹⁴Na' llnnaba' rao Xanllo Jesucriston' gakrenchgue' re'. Na' yel nllie' ke'e, sorenchgan re', na' gonchga Spíritu ke Diosen' nench xhbab kerén' gaken toze ren ke'e na'. Ka'n gakchga.

YICH DAN' BZOJ POSTL SAN PABLON' KE BE'NN GALACIA KA'

Pablon' llwape' lliox be'nn ka' nxenra'll Jesucriston' lla'a gan' nzi'i Galacian'

Nada' Pablo naka' postl, kere be'nnachen' brej nada' gona' xchin Diosen', Jesucriston' ren Xe'e Dios na'n, be'nnen' basbán Le'e radj be'nn wat ka', leake'n brej ake' nada'. ²Nada' na' ren yeolol be'nn lwellillo ka' ni't ganni, llzojto' re' lldop ll-llayre llonlira'llre Criston' yell ka' zjalli' gan' nbane Galacia na'. ³Na' llnnaba' rao Xallo Diosen' ren rao Xanllo Jesucriston' gakrén akchgue' re', na' wzoa ake' yichjra'llda'ore so kwezre nbaraz. ⁴Jesucristo na' bsanra'll kwine', ni ke xto'l-llon' nench bill gonllo txhen da xhinnjen' llak rao yellrio ni. Bene' ka' le ka'n byazra'll Xallo Diosen', ⁵be'nnen' llaya'le gonllo xhen ke chnare. Ka'n gakchga.

Billbi ye to di'll yobre de da gak nnello naken Di'll Wen ke Dios

⁶Llabanra' dan' ba brej yichjre Diosen', be'nnen' brej re' dan' nllie' Criston' lli'o, na' llzenayre ke ye to da llákere nakllen di'll wen. ⁷Kere nello de ye to di'll da za'kllen'. Nia' ka' le zjani't be'nn llonchix akre' re', na' leska' lle'n akre' gonchix akre' di'll da nak ke Cristo na'. ⁸Na' cha' neto' o cha' to angl za'a yebá, lloe' ye to di'll da bi nak Di'll Wen ke Criston', llnnaba' rao Diosen', wenkre wlleyie' be'nnen' chet ka'. ⁹Na' kan' ba bnekza' na', na' da yobre llepa' re', cha' nollre be'nne lloe' xti'll Criston' nlla're kan' ba nsedre na', wlleyi'chga Diosen' le'e chras.

10 Kere llayirjla'lla' nench nne be'nn ka' wen kia'n. Llayirjla'lla' nench na' nne Diosen' wen kia', na' leska' bi llayirjla'lla' yega'nna' wen rao be'nnachen', le chet ka' nna' llayirja' yega'nna' wen rao leake'n, bill naka' ka to be'nn wen llin ke Cristo na' chet ka'.

Diosen' breje' Pablon' na' bse'le' le'e nench goke' postl

¹¹Be'nn bi'che, lle'nra' nnézere ka Di'll Wen ke Criston' ba be'rena' re', kere da nake xhbab ke be'nnachen'. ¹²Kere da bxhia' ke be'nnachen', ni kere be'nnachen' bzejnie' nada', kwin Jesucristo na'n bzejnie're' nada' Di'll Wen ke'en.

¹³Ba bénkzere kan' bena'n kan' bnawa' dan' llonlira'll neto' be'nn Israel.

Gálatas 1, 2 332

Le bsa'kzia' be'nn ka' llon Criston' xhen nench venit verán ake'. 14 Na' blle' yichja' kwis ka nak benlira'lla' dan' benlira'll da xozxta'wa' ka', na' bnaolla'n klle'llo ka be'nn lwellja' be'nn Israel ka'. ¹⁵Bixha ka za garjtia', bllia Diosen' bia'a gona' xchine'n. Breje' nada' nench gona'n, le nllie're' nada'n. Na' ka bllin lla bene' kan' nchoybie' gone' na', ¹⁶na'll bene' nench bembia' Xhi'nne' Jesúsen', na' bzejnie're' nada' nench llyixjwe'ra' xti'll Jesúsen' gan' lla'a be'nn ka' bi nak be'nn Israel. Na' nollno bnnabra' wzeinie're' nada'. ¹⁷Na' bi bya'kza' Jerusalén na', wroe' wsede postl ka' nada', be'nn ka' brej Diosen' gon ake' xchine'n kan' za gona'n nada'. Na' le bya'tia' gan' nzi'i Arabia, na' baza'a Arabia na' ballina' yell kia' gan' nzi'i Damasco.

¹⁸Na' bde gok chonn iz, na'll ballina' Jerusalén na', kana' bembia' Pedron', na' bzorene' ye chi'no (15) lla. ¹⁹Na' nollno postl ka' bre'ra' be'nn ka' yela', toze Jacobo bi'ch Xanllo na' bre'ra'. 20 Nnezkze Diosen' dan' llzoia' ni, naken da li.

²¹Bde na' na'll baya'a yell ka' zjalli' gan' nzi'i Siria na' ren Cilicia. ²²Na' be'nn ka' lldop ll-llay llonlira'll Criston' vell ka' zialli' do Judea na', bi bembia' ake' nada' kana'. 23 Kon ba ben akre' llasné ake! kia!: "Be!nnen! bsa!kzi! neto! kana'n, ba de'e llyixjwe're' be'nne llaya'l wxenra'll-llo Criston', la'kze kan' batna' gokra'lle' nono gonlira'll Criston!" 24 Na' ben ake' Diosen' xhen. ka ben akre! kan! llona!n.

Postl ka' yela' byazra'll ake' kan' llon Pablon'

Na' ka gok chda' (14) iz bya'a Jerusalén na' da yobre, bya'rena' Bernabén', na' leska' bchia' Tito na'. ²Na' bya'a le bzejnie' Diosen' nada' llaya'l cha'a. Na' btopa' be'nn ka' nak be'nn brao ke be'nn ka' llonlira'll Jesucriston', na' leakze' bzejnie'ra' bin' llyixjwe'ra' be'nn ka' bi nak be'nn Israel kate lloe'rena' leake' Di'll Wen ke Criston', le gokra'lla' nnez akre' nench ke nne ake' bibi za'k dan' llona'n, na' dan' bena'n. ³Ka goken bi ben ake! bien so be!nnen! sen dan' nzi'i circuncisión, be'nnen' nake' nada' txhen re'e Tito la'kze bi nake' be'nn Israel. ⁴Kan' gok la'kze blla'a ren bal be'nn lwelljllo, be'nn ka' kere do ra'll ake'n benlira'll ake' Criston', kon to blle'nao ake' nench wlliayi'll ake' lli'o, dan' bi naollo klle'llo yeolol dan' nyoj le' ley ke be'nn Israel ka'. Le leake'n gokra'll ake' gon ake' bien nnaoto' veolol da ka' nao leake'n nak ake' be'nn Israel. ⁵Na' neto' ni ra't bi bzenayto' ke ake', le gokra'llto' bi ga't da wllon wzenayre Di'll Wen ke Criston' dan' nak da li na'. ⁶Na' ka nak be'nn ka' gok be'nn brao ke be'nn ka' llonlira'll Criston' Jerusalén na', bi gokra'll ake' yexoa ye ra't ke ake' kan' llsed llroe'ra' ke Criston'. (Le bibi de wroe' dan', cha' gok ake' be'nn brao o cha' bi gok ake' be'nn brao, le rao Dios na'n toz ka za'k yeololte be'nne.) ⁷Le gokbe'e akre' ngo' Diosen' rao na', llyixjwe'ra' Di'll Wen ke Criston' rao be'nn ka' bi nak be'nn Israel. kan' none' ke Pedron' ngoe' rao ne'e llvixiwe're' xti'll Criston' rao be'nn ka' nak be'nn Israel, 8Le Diosen' be'nnen' bse'l Pedron' nench chixiwe're' xti'll Criston' rao be'nn

333 Gálatas 2

Israel ka', Lekze'n llakrene' nada' nench llyixjwe'ra' xti'll Criston' rao be'nn ka' bi nak be'nn Israel.

⁹Ke len na' Jacobon' ren Pedron' ren Juan na', be'nn ka' nakll be'nn brao rao be'nn ka' llonlira'll Criston' Jerusalén na', kate gokbe'e akre' kan' llakrén Diosen' llona' xchine'n, na'll be'x ake' ta'ka', na' ren ta'k Bernabén' nench broe' akre' neto' llon ake' neto' txhen, na' byazra'll ake' kan' llonto' na'. Le llak akre' wenkzen' gonto' xchin Diosen' rao be'nn ka' bi nak be'nn Israel, na' leake' gon ake' xchine'n rao be'nn Israel ka'. ¹⁰Toz dan' goll ake' neto' gonto', gakrento' be'nn ya'ch ak. Na' da likze lli' yichja' llona' ka'.

Pablon' bdile' Pedron' rao vellen' nzi'i Antioquía

¹¹Na' kan' bed Pedron' yellen' nzi'i Antioquían' bdile' kan' llone'n, le broe'rawe llone' dan' bi llaya'l gone'. ¹²Ka blline' Antioquía na', lle'i llaorene' be'nn ka' llonlira'll Criston! txhen la!kze bi nak ake! be'nn Israel. Na' bde na' bllin be'nn Jerusalén ka' bse'l Jacobon', na'll bill gokra'lle' ye'j gaorene' txhen be'nn ka' bi nak be'nn Israelen'. Le bllebe' si'chi'll be'nn ka' le'e, be'nn ka' ne, noteze be'nn llonlira'll Criston', llaya'l so ake' sen dan' nzi'i circuncisión. 13 Na'll vezikre be'nn Israel ka' llonlira'll Criston' leska' wix ake', na'll bill we'j bdaorén ake' be'nn ka' bi nak be'nn Israel ka' txhen, na'll bko'yelrén aktere' Bernabén' nench na' rene' wixrene'. bene' kan' llon ake' na'. 14 Gokbe'ra' bi llon ake' kan' llaya'l gon lli'o nombia'llo di'll li ke Criston'. Na'

ke len na' bdila' Pedron' rao yeolol be'nn ka' ndopen', na' golle': "Rwe' nakte'o be'nn Israel, na' ba brej yichjo' ka dan' nao be'nne Israel ka', nench na' llono' txhen be'nn ka' bi nak be'nn Israel. Na' nna', ¿bixchen llchie'zro' be'nn ka' bi nak be'nn Israel gon ake' kan' nak dan' nao be'nn Israel ka'?"

Be'nn llonlira'll Jesucriston' llak ake' be'nn wen rao Diosen'

15 Neto' gorj radj be'nn Israel ka', bi gorjto' radj be'nn wen da xhinnj ka' bi nombia' Dios. 16 Na' ba nnézkzeto' Diosen' bi ne'e nakto' be'nn wen rawe'n, ni ke dan' llonto' kan' ne le' ley dan' bzoj da Moisésen'. Le ne'e kon be'nn nxenra'll Jesucriston', nak akse' be'nn wen rao Diosen'. Na'llen' ren neto' ba llonlira'llto' Criston' nench nne Diosen' keto' naksto' be'nn wen rawe'n. Ne'e ka' kere dan' llonto' kan' ne ley na', le nono zo be'nn nak be'nn wen rao Diosen', ni ke dan' llone' da ka' llia le' ley na'.

¹⁷Neto! ba llonlira!llto! Criston! nench non Diosen' neto' be'nn wen. Ke len na' llakbe'to' toz ka' nakto' ren noteze be'nn wen da xhinni. ¿Llákere Criston! llone! lli!o be!nn wen da xhinnjen'? Cha' ka' llake no be'nne, kreren' llon ake' xhbab. ¹⁸Na' ba brej yichja' leyen' dan' bi bzoe yeyonen nada' be'nn wen, na' cha' yezorawa' yenawa'n da yobre, da xhinni xhen gona' chet ka. 19 Le dan' bi bxha'kra' gona' kan' ne leyen', na' ba naka' ka be'nn ba got rao leyen', na' nna' nbana' yo'kze yichja' soa' wzenaya' ke Diosen'. ²⁰Criston' gote' le' yay cruzen', na'

Gálatas 2, 3 334

naka' ka be'nn got ren Le'e txhen. Bill zoa' ka zo to be'nn zo ka'ze, le nna' ba zoteze zorén Criston' nada'. Na' dan' llona' na', llona'n kon kan' ne Xhi'nn Dios be'nnen' llonlira'lla' na'. Le Le'en nllie're' nada' be'e latj gote' ni kia' nada'. ²¹Bi wzia' chla're dan' nllie' Diosen' lli'o. Le chenak leyen' bxha'ken bayonen lli'o be'nn wen rao Diosen', bibi za'ken got Criston' chet ka'.

Zi'llo Spíritun' cha' ba nxenra'll-llo Criston'

Re' be'nn Galacia, nchol yichjra'llda'oren'. ¿Noxha bxhiye'e re', na' bsanra'llre bill bveile're da li ke Diosen'? Ba bzejnie'ra' re' kwasro dan' got Criston' le' yay cruzen' ni ke lli'o. ²Toz dan' lle'nra' nnabra' re': ¿Badsó Spíritu ke Diosen' lo yichira'llda'ore dan' llonre kan' llia le' ley dan' bzoj da Moisésen' o cha' dan' benlira'llre Cristo na'n? ³Zi'tere nakre. ¿Bi llejnie'kzeren'? Spíritu ke Diosen' byo'n lo yichira'llda'oren' kan' bzorao llonlira'llre Criston'. ¿Llákere lle'nllen gonre billre da vobre nench yevoll gakre kan' llazra'll Dios na'? ⁴Da zan da bsa'kzi' be'nn ka' re' dan' llonlira'llre Criston'. ¿Na' bixha zejen na' bdaora'llre da ka' cha' llákere llaya'l gonre bi da gonre nench yerare? ⁵Nnézkzere Dios na' ba benne' Spíritu ke'en zorenen re', na' llone' yel wak da llre'tere ni ke dan' llejle're xti'll Criston', kere llak llonre da ki ni ke dan' llonre bi dan' ne ley na'.

Di'll da be'rén Diosen' Abraham na'

⁶Da Abraham na' benlira'lle' Diosen', na'llen' bne Diosen' goke' be'nn wen rawe'n. ⁷Ke len na' llaya'l nnézere, yeolol be'nn gonlira'lle Diosen', Diosen' none' leake' ka xhi'nn dialla da Abraham na'. ⁸Batna' Diosen' bllie' bia'a noteze be'nn gonlira'lle Le'e, gone' leake' be'nn wen rawe' la'kze bi nak ake' be'nn Israel. Ke len na' nyoj xti'lle'n llian golle' da Abrahamen' di'll wen ki: "Dan' llonlira'llo' nada', na' gona' wen ke be'nn lla'a yeololte yell ka'." ⁹Na' ka'n llon Diosen' wen ke be'nne llonlira'll Le'e nna', kan' bene' wen ke da Abraham be'nnen' benlira'll Le'e.

¹⁰Na' noteze be'nne llakre gake' be'nn wen rao Diosen' dan' llone' dan' llia le' lev dan' bzoi da Moisés na', kweyi'chgue' ke chnare chet ka', le nyoj xti'll Diosen' llian: "Gakchga de'e ke be'nn, cha' bi soteze soe' gone' yeolol kan' llia le' lev na' batteze." ¹¹Na' nnézello Diosen' bi llone' lli'o be'nn wen rawe' dan' llonllo dan' ne leyen', le xti'll Diosen' nyojen nen: "Be'nnen' llonlira'll Diosen' nake' be'nn wen rawe', na' ga't yel nban ke'e." 12 Na' ley na' bi llsedren lli'o cha' llaya'l gonlira'll-llo Dios, kon nen: "Noteze be'nne cha' llone' doxhen kan' ne ley na', ga't yel nban ke'e."

13 Cristo na' bnitrawe' do'l kellon' dan' ba nchoybia' ley na' kwiayi'llo. Be'e latj ben akre' Le'e dan' llaya'l gak ke lli'on chenake. Gok ke'e kan' nyojen na', gan' nen: "Ba nak be'nnen' de'e, be'nnen' bda'a ake' le' yay." 14 Kan' gok nench renkze be'nn ka' bi nak be'nn Israel gonlira'll ake' Criston', na' so ake' nbaraz kan' bzo da Abraham na' dan' benlira'lle' Diosen'. Na'llen'

335 Gálatas 3

dan' gonlira'll-llo Xanllo Jesucristo na', wse'l Diosen' Spíritu ke'en zorenen lli'o kan' bne'e gone' na'.

Ley dan' bzoj da Moisésen' na' dan' bne Diosen' gone' ren da Abraham na'

¹⁵Be'nn bi'che, ni wzejnie'ra' re' dan' llak yellrio ni: Kat to be'nne llkwise' to yich ga llkwa'nnrene' to be'nn bi da nape', kate ba bayoll na', llchi'che'n xhbene', na' nollno gak wachinni len o wlliallen da zanll kan' llian na', la'kze naken to da llon be'nnach. 16 Na' ka nak dan' goll Diosen' Abraham na', gone' da wen ke'e, na' ren ke xhi'nn dialle'e, xti'll Diosen' dan' nvoien bi lloe'n di'll nen, be'nn zan dialla da Abraham na', kon lloe'n di'll ke toze', na' nello Cristo na'kzen'. ¹⁷Na' dan' goll Diosen' Abraham na', gone' gak da wen ke'e na', llonen ka ga llkwis to be'nn yichen', le Diosen' bi bache'e kan' bne'e gone'n. Na' bde tap gayoa chilloa (430) iz kan' bcheb Diosen' gone' da wen ke da Abraham na', kat bene' nench bzoi da Moisésen' ley ke'en. Na' la'kze Diosen' be'e le'e leven', bi nnello bill gone' kan' bne'e gone' ke da Abraham na', na' ren xhi'nn dialle'e ka! 18 Cha! llákello llonen bien na! gonllo kan' ne ley na', nench si'llo dan' bcheb Dios na' gonne' lli'o, bill nxenra'll-llo dan' bcheb Diosen' gonne' lli'o chet ka'. Le Dios na' gonne'n lli'o ka'ze, le ka'n bchebe' rao da Abraham na'.

¹⁹Cha' ka' naken, ¿bixchen byallj ley dan' bzoj da Moisés na'? Diosen' be'en da xozxta'ollo be'nn Israel ka', nench gokbe'e akre' bi llon ake' dan' nllia Diosen' bia'a gon ake' na'. Na' bllie' bia'a gonen llin llinte lla yed be'nnen' bne Diosen' garje' rao dialla da Abraham na', ke Le'en be'e Diosen' di'll kan' bne'e gone' wen ke xhi'nn dialle'e. Na' ka nak leyen', Diosen' bene' nench be'e angl ka' da Moisésen' len, nench na' bzejnie're' da xozxta'ollo be'nn Israel ka' kan' llian na'. ²⁰Na' kan' goll Diosen' da Abrahamen' gone' wen ke'e, kwinkze bzejnie're' da Abrahamen', na' bill byalljre' be'nn yobre wzejnie're' le'e kan' gone'n.

Dan' Ilzejnie' leyen' lli'o

²¹¿Bixha wak nnello kreren' llon ley dan' bzoj da Moisésen' ren dan' bcheb Diosen' gone'? Bi naken ka'. Le chenak leyen' nsa'an yel nban zejlikane, wak gonllo kan' ne ley na', na'll gakllo be'nn wen rao Diosen' chenake. ²²Na' xti'll Diosen' dan' nyojen llian yeolol be'nnach, ba nbeyi' ake' ke chnare, ni ke do'l ke ake' ka', na' kon be'nne llonlira'lle Jesucristo na', wnitrawe' do'l ke ake'n, nench na' be'nn ka' wxenra'll Jesucriston', wak si'i ake' dan' ba bcheb Diosen' we'e leake'.

²³Na' ka bi nna yed Cristo na', leyen' bnebia'n be'nn ka' bllinte lla bnnézeto' llaya'l gonlira'llto' Criston'. ²⁴Le ley na' benen ka to be'nne llwia xhi'nn be'nne, llinte lla yed Criston' nench be'nn gonlira'll Le'e, gak ake' be'nn wen rawe' na'. ²⁵Na' ka nak ba bed Criston', bill nak leyen' ka be'nn llwia llyi neto'.

²⁶Na'llen' yeololte lli'o llonlira'llllo Xanllo Jesucriston', naksllo xhi'nn Dios. ²⁷Na' notezllo cha' ba blloallo nis dan' llroe'llo Gálatas 3, 4 336

nakllo Criston' txhen, ba bayak yichjra'llda'ollon' kan' nak yichjra'llda'we' na'. ²⁸Ke len na' bibi llroe'n cha' nakllo o cha' bi nakllo be'nn Israel, na' cha' nakllo o cha' bi nakllo be'nn wen llin zo xan, na' cha' nakllo be'nn byio o cha' nakllo no're. Le yeolol-llo naksllo toz be'nne dan' nxenra'll-llo Xanllo Jesucristo na'. ²⁹Na' dan' nakllo txhen Criston', rao Dios na'kzen' nakllo xhi'nn dialla Abraham, ka' gonkze Diosen' wen kello kan' ba bne'e gone' ke xhi'nn dialla Abraham na'.

Lli'o ba nakllo xhi'nn Dios bill nakllo ka to be'nn wen llin zo xan

Leska' nia': To be'nn wnia' cha' zo xhi'nne', lebe'n gak rao na'be' yeolol da de ke xabe'n. Na' chak nna nakbe' bida'o, nna nakbe' ka to be'nn wen llin, la'kze wllin lla gak rao na'be' yeolol dan' de ke xabe'n. ²Le lo yo'n llwia llyi akebe', na' llgo' akebe' nez chak nna ll-lli'obe', na' chak llin lla gon xabe'n rao na'be' dan' de ke'e na'. ³Ka'n gok ke neto' kan' bi nna yed Criston', gokto' ka xhi'nn be'nne. na' bnebia' dan' llzejnie' akre' neto' rao yellrio ni. ⁴Na' ka bllin lla bllia Diosen' bia'a bse'le' Xhi'nne'n yellrio ni, bxhan to no're Le'e. Na' gorie' radi be'nn ka' llnebia' leven' leake'. ⁵Na' bede' badsre'e lli'o nench bill llonen bien nnaollo dan' nyoj le' ley ke be'nn Israel ka', na' bene' nench yeolol lli'o llonlira'lllloe' ba non Diosen' lli'o ka xhi'nne'.

⁶Na' nench nnézello ba non Diosen' lli'o ka xhi'nne', ba bse'le' Spíritu ke Xhi'nne' Criston' zon lo yichjra'llda'ollo, na' Spíritun' llakrenen totollo nench llalwill-llo Diosen' llelloe': "Xa". ⁷Na' dan' non Diosen' lli'o ka xhi'nne', bill llaya'l sollo ka to be'nn zo xan dan' llsa'kzi' leyen' lli'o; none' lli'o ka xhi'nne', na' dan' ba zerenllo Criston' si'llo yeolol dan' bcheb Diosen' gonne'.

Pablon' llakzedre' akren' llaya'l gon be'nn ka' nxenra'll Criston'

⁸Kan' bi nna gombia're Diosen', benlira'llre lwa'a lsa'ke da ka' bi nak Dios, da ka' bi llaya'l we'raollo, na' leaken na' bnebia'n yichjra'llda'ore. ⁹Zan nna' ba nombia're Diosen' o cha' wenll nello Diosen' ba nombie' re'. ¿Na' bixchen llayechjzre, na' yeyonlira'llre da benlira'llre kana', na' lloe're latj llnebia'n re'? ¹⁰Ba llayonre xhen no lla nba'nn ka', no be'o, no bi da ka' llak rao to iz weje. ¹¹Lleba' cha' bendadza' xchina'n, cha' bill wzenayre ke dan' ba broe' bsedra' re' na'.

¹²Be'nn bi'cha', lla'tyoera' re' legón nada' txhen kan' bena' nada' re' txhen, goka' ka be'nn bi nombia' ley ke be'nn Israel ka'. Na' kan' badsorena' re' kana', bitbi nia! bénere nada!. 13 Nnézkzere badsorena' re' da nelle dan' goka' yillwe', na' be'rena' re' Di'll Wen ke Criston'. ¹⁴Na' dan' goka' yillwe'n goken to da bre're. Na'llen' bi bénere nada' kaze, na' do yichi do ra'llre brebre nada' ka ga brebe to angl ke Dios o cha' ka ga brebe kwin Jesucriston'. 15 Nbaraz bzore kan' bzorena' re' kana'. ¿Bixchen bill llawere nna!? Wakte wa'a di'll

337 Gálatas 4

rao noteze be'nn dan' gókere nada'. Chenak benen bien, bzántere da de kere, na' rente kwin yejraore bzánere gonnre nada' chenake. ¹⁶Na' nna', ¿llákere llwiera' re'n dan' lloe'rena' re' di'll li ni?

¹⁷Ka nak be'nn ka', le lli' yichj ake' re', kere llon ake' wen keré ka'zen', llon ake' ka' nench yebej ake' re', bill lenre neto'n, na' nench yeyoll na' kwe' yichjre leakze'. ¹⁸Naksen wen kwe' yichi be'nn ka' re', kon cha' do ra'll ake'n llon ake'n. Na' naksen wen kwe' yichj ake' re' batteze, kere katen' zerena' re' na'zen'. 19 Xhi'nna' da'o, ka ll-llayrao to no'r zan, ll-llayrao lo ra'llda'wa' da yobre ni keré, llinte lla kat gakll yichjra'llda'oren' ka nak yichjra'llda'o Cristo na'. ²⁰Yewera' kwis chenak gak sorena' re' nna'stek, na' gak we'rena' re' di'll, le llak zozé lo yichjra'llda'wa' ni keré.

Di'll dan' llsede lli'o kan' gok ke da Agar na' ren da Sara

²¹Re', lle'nere gonre xhen ley dan' nyoj ke be'nn Israel ka', ¿bi nna yénere kan' ne dan' nyojen? ²²Nen bzo chop xhi'nn da Abraham na' bi byio ak, tobe' bzo rao be'nn no'ren', gok be'nn wet ke'e, be'nnen' gok be'nn wen llin ke'e, na' ye tobe' bzo rao no'r kekze', be'nnen' bi bene' ka be'nn wen llin ke'e. ²³Na' xhi'nn no'ren' gok be'nn wen llin ke'e, gorjbe' dan' bzorén da Abraham na' no'ren', zan xhi'nn no'r kekze', be'nnen' bi none' ka be'nn wen llin ke'e, gorjbe' ni ke dan' bcheb Diosen' san no'r ke'en. ²⁴Na' dan' gok ke no'r ki llzejnie'n

lli'o ke chop dan' bne Diosen' gone' nench gakrene' be'nn Israel ka'. No'r wet na', be'nnen' golle Agar, nake' ka ley ke Diosen' dan' bzoj da Moisésen' rao ya' Sinaí. Na' be'nn ka' nao len na', nak ake' ka be'nn ka' zo xan. ²⁵Na'll Agaren' za'krebe' ya' gan' nzi'i Sinaí gan' nbane Arabia, na' leska' za'krebe' ka Jerusalén na' gan' lla'a be'nn Israel ka' nna' lla. Leake' nak ake' ka to be'nn zo xan. ²⁶Na' zo ye to Jerusalén dan' zo yebá, na' naken rall be'nn ka' bi llnebia' da bnao be'nn gor ka' kan' batna', na' lli'o ba nakllo ka xhi'nn be'nn Jerusalén na' dan' zo yebá. 27 Kin' llia xti'll Diosen' nen:

Bawé no'r will, no'r bi llzo xhi'nne',

besia' yel llawé, rwe' bi nna gako' bes ke yel llzo xhi'nne'n.

Le no'ren' bsanra'll be'nn ke'e le'e.

nni'tll zan xhi'nne' ker ka no'r zokze xhyio.

²⁸Be'nn bi'che, xhi'nn da Abraham na' bin' re Isaaken', gorjbe' dan' goll Diosen' Abraham na' san no'r ke'en, la'kze goke' no'r will. Na' ka'kze lli'o gonlira'll-llo Criston', Diosen' none' lli'o ka xhi'nn da Abraham be'nn gorj nench gok dan' bcheb Diosen' gak. ²⁹Bixha xhi'nn da Agaren', bin' gorj ka bzorén da Abrahamen' le'e, bsa'kzi'be' Isaaken' bin' ben Spíritu ke Diosen' nench bxhan da Saran'. Na' ka'kzen' llak nna' lla, be'nn ka' nao dan' ne leyen' llsa'kzi' ake' lli'o. 30 ¿Na' bixha ne xti'll Diosen'? Dan' nyojen nen: "Babej no'r wet ko'on, be'nnen'

Gálatas 4, 5 338

llnebia'o ren xhi'nne' na', le bi wa'abe' dan' bcheba' wa'a bin' bzo ke no'r ko'o na'." ³¹Ke len na' be'nn bi'che, nnézello nakllo ka xhi'nn da Sara na', no'ren' bi zo xane', kere nakllo ka xhi'nn no'ren' zo xan na'.

Bill llaya'l nnaollo ley dan' bnao xozxta'ollo ka' le naken ka to da lle'ne nnebia' lli'o

Kan' benlira'll-llo Criston', Le'e babeje' lli'o rao yeolol da llonllo llákello llawé Diosen' lli'o dan' benllo na'. Ke len na' lesellá bill we're lati wchie' akre' re' yenaore da ka' bi za'k rao Diosen'. ²Nada' Pablo llepa' re' to da lliarao. Cha' sore sen dan' nzi'i circuncisión na', bibi za'ken dan' ba bzoraore llonlira'llre Criston'. ³Lle'nra' yepa' re' da vobre, noteze be'nne soe' sen dan' nzi'i circuncisión, lekze llaya'l gone' yeolol dan' llia le' ley dan' bzoi da Moisésen'. ⁴Na' cha' llákere gonre doxhen dan' ne ley na', nench gakre be'nn wen rao Diosen', ba llzoare Criston' chla're cha' ka'n llákere, na' bi llayonre xhbab kan' nllie' Diosen' lli'o, ⁵Na' lli'o dan' llonlira'll-llo Jesucriston'. zokze Spíritu ke Diosen' lo yichjra'llda'ollon', na' llpen lli'o zello bexhllo, nne'e Diosen' nakllo be'nn wen rawe'n. ⁶Ke len na' lli'o llonlira'll-llo Xanllo Jesucriston'. bitbi llonen rao Diosen' cha' ba zollo sen dan' nzi'i circuncisión o cha! bi zollon. Le da naken lliarao xhen rao Diosen', soteze sollo llie' lwellillo dan' llonlira'll-lloe'n.

⁷Zjazetere wen kan' llonre llzenayre ke Diosen'. ¿Noxhan' ba ben nench bill llzenayre di'll li ke'en? ⁸Dios be'nnen' breje' re' nakre rallne'e, kere nello Le'en llon nench llzenayre di'll yobre. ⁹Legón xhbab kan' ne di'll ni: "Ra'tze kwa binn llponpen doxhen yezjen'." ¹⁰Na' zoa' rez gon Xanllo Jesucriston' nench bill gonre xhbab krere, na' Diosen' we'e yel llza'kzi' ke be'nnen' llonllejla'lle re', noteze nake'.

11 Be'nn bi'che, ka nak nada' chenak nna llroe' llsedra' nia' yeolol be'nn byio, llaya'l soe' sen dan' nzi'i circuncisión nench nni't ake' wen rao Diosen', ¿bixchen nna llsa'kzi' be'nn ka' nada' chet ka'? Zan dan' nia' got Criston' le' yay cruzen' nench sollo wen rao Diosen', ke len na' bi llazra'll ake' xti'lla'n.

12 Ka nak be'nn ka' llon chix akre' re', yewera' chenak leake' wchoy kwin ake' ye ra'te.

13 Be'nn bi'che, Dios be'nnen' brej lli'o, lle'nre' nnézello bill llonen bien nnaollo kan' ne leyen' nench gakllo be'nn wen rawe' na'. Na' kere nello dan' ne'e ka'n, wak gonllo biteze da xhinnj nen lo ra'llda'ollo na'. Dan' llaya'l gonllon', llaya'l gakrén lwelljllo bi da llak ke totollo, na' llie' lwelljllo. 14 Na' doxhente ley dan' nyojen' llzejnie'n lli'o ki: "Llaya'l llie' lwelljllo ka nllie' kwinllo." 15 Zan cha' llakyollrén lwelljllo, na' cha' zi'chi'll lwelljllo, ll-lliayi'kze lwelljllon' chet ka'.

Ka llon be'nn ka llzenay ke Spíritu ke Diosen' na' be'nn ka' bi llzenay ke Spíritu ke'en

¹⁶Yepa' re' to da gonllo, llaya'l soteze sollo gonllo kan' lle'ne Spíritu ke Diosen'. Na' bill 339 Gálatas 5, 6

wzenayllo ke da xhinnjen' yo' lo yichjra'llda'ollon'. ¹⁷Kate llonllo da xhinnjen' kon kan' ne lo ra'llda'ollo na', bi llonnen latje wzenayllo ke Spíritu ke Diosen'. Na' kate llzenayllo ke Spíritu ke Diosen', bi llonllo kon kan' nen kello. Na' llakdil lo ra'llda'ollon', bi llak gonllo kan' lle'nello na'. ¹⁸Zan cha' llzenayllo ke dan' llsed llzejnie' Spíritu ke Diosen' lli'o, bill llnebia' ley dan' bzoj da Moisésen' lli'o.

¹⁹Nakbie'kze be'nn ka' llzenay ke da xhinnjen' yo' lo ra'llda'o ake'n, llon ake' biteze da xhinni ki: darén ake' xhyio xho'r be'nne; zorén lwelli ake' na' bi nchayna'a ake'; na' llon ake' da nak zi wave'llo, na' da nak zdo': 20 llonlira'll ake' lwa'a lsa'ke; llon ake' yel walla'a; llwie lwellj ake'; bi ni't ake' wen ren no lwellj ake'; na' llaxhé' lwellj ake'; llcha'a lwellj ake'; llakyollrén lwellj ake': na' llxe ake' wdil: na' llra' lwellj ake'; ²¹llaxhé' akre' bi da de ke be'nne; llot ake' no be'nne; nak ake' be'nn wazó; na' zjake' no lnni gan' llon ake' bi da ke nxhia; na' llon ake' billre da xhinni da nak ka da xhinni ki da ka' ba bnekza'. Na' llepa' re' da yobre kan' ba bnekza' na', nono yellín gan' llia Diosen' llnebie' cha' llone' da xhinni ka' nak ki. ²²Zan cha' llzenayllo ke Spíritu ke Dios, len llakrenen lli'o: llie'llo lwellillo; sollo nbaraz; sollo wen lo yichjra'llda'ollo; gapllo yel llxhenra'll ren lwellillo; gonllo wen ke yezikre be'nne; gakllo be'nn cha'o rao yeolol be'nne; wxenra'lltezllo Diosen' gonllo da lixhej bi da yo' lo na'llo gonllon; ²³na' gakllo be'nn nexjra'lle; na'

nnebia' kwinllo. Na' cha' llonllo da wen kon kan' lle'ne Spíritu ke Diosen', bibi ley de da nen llonllo da xhinnj. ²⁴Na' be'nn ka' ba nak txhen Criston', ba bda'a ake' le' yay cruzen' yeololte bi da xhinnj ka' zera'll lo yichjra'llda'o ake'n. ²⁵Na' cha' nna' ba zollo llonllo kon kan' ne Spíritu ke Dios na', llaya'l we'llo latj gonllo kan' lle'nre' na'. ²⁶Na' bi llaya'l gonxhen kwinllo, na' bi wlokllo lwelljllo, na' bi llaya'l yexhé' lwelljllo.

Llaya'l gakrén lwelljllo

Be'nn bi'che, cha' to be'nn lwelljllon' ba bre'lloe' bene' da xhinnj, lli'o llzenayllo ke Spíritu ke Diosen', llaya'l gakrenlloe' yeyatre' nench yezoe' wen rao Dios. Na' llaya'l wia kwinllo, le nxholl lekze ka' lli'o bixllo gonllo da xhinnjen'. ²Totollo llaya'l gakrén be'nn lwelljllo biteze da llak ke ake', na' kone ka' llonllo kan' nllia Criston' bia'a gonllo.

³Na' cha' gonllo xhbab nakllo be'nn wen la'kze bi nakllo ka', llziye'ze kwinllon' chet ka'. ⁴Ke len na' totollo llaya'l wayonllo xhbab cha' dan' ba benllon' naken da wen. Na' yewello cha' benllo da wen, na' bi gonllo xhbab, wenlle ba ben lli'o kerke no be'nn yobre. ⁵Le totollon' llaya'l gonllo dan' bkwa'nn Diosen' rallna'llo gonllo.

⁶Na' cha' no wroe' wsede lli'o xti'll Diosen', llaya'l we'lloe' cha' bi da cha'o da wen da ba benla'y Diosen' lli'o.

⁷Bi we're latj siye'e kwinre, bi gak wkwa'chllo dan' llonllo rao Diosen'. Na' zeje di'll dan' ne: Kon da gazllo Gálatas 6 340

len na' yerapllo. ⁸Le be'nn gone' kon kan' ne da xhinnjen' yo' lo ra'llda'we' na', wllin lla kat kweyie' ke chnare; zan be'nnen' gone' kan' llazra'll Spíritu ke Diosen', Spíritu na' we'n yel nban ke'e ke chnare. ⁹Na' bi llaya'l wedllo gonllo da wen na', le wllin lla kate Diosen' wzoe' lli'o nbaraz kwis, kon cha' bi kwej yichjllo gonllo dan' llazra'lle' na'. ¹⁰Ke len na' llaya'l gonllo da wen rao yeolol be'nn kate gonnen to latj, na' nakllen lliarao gonllo wen ke be'nn ka' ba llonlira'll Criston'.

Ye to chop dan' lle Pablon' leake'

¹¹Lewiakero' ke letr yel ki llzoja' re', le kwina'n llzoja'n. ¹²Be'nn ka' lle'n akre' gon ake' bien sore sen dan' nzi'i circuncisión, nench na' yega'nn ake' wen rao be'nn Israel ka'. Llayirj ake' akre gon ake' nench nono wsa'kzi' leake', dan' llejle' ake' ke Criston' gote' le' yay cruzen' ni ke lli'o. ¹³Le be'nn ka' llasné llaya'l sore sen na', ni leake' bi llaso'n ake' kan' ne ley na'. Kon lle'n akre' sore sen na', nench yeyoe'rao kwin

ake' rao be'nn Israel ka'. 14Ka nak nada', bi yeyoe'rao kwina', zan wayoe'rawa' Xanllo Jesucriston' dan' gote' le' yay cruzen' ni ke lli'o. Bill zoa' nench na' gona' kan' ne be'nn ka' lla'a yellrio ni, na' ba naka' ka to be'nn wat ke da de rao yellrio ni. ¹⁵Le lli'o ba llonlira'll-llo Xanllo Jesucriston', nnezra' bibi llonen cha' zollo sen dan' nzi'i circuncisión o cha' bi zollo sen na', zan dan' nnezra' za'k kwis dan' ba bakob Diosen' yichira'llda'ollon'. ¹⁶Rao Diosen' nakllo dogarje be'nn Israel cha' ba llonlira'll-llo Criston'. Na' llnnaba' gakrén Diosen' yeolol re' ba llzenayre ke'e, nench na' gone' so kwezre lo yichjra'llda'ore nbaraz ren yel nllie' ke'e na'.

¹⁷Na' nna[†] llnnabchga' bill gonre chla're ka di'll ka' ba be'rena' re'n, le kwerp kia' ni, nsa'n yill ke dan' bsa'kzi' be'nn ka' nada' dan' lloa'a xti'll Xanllo Jesucristo na'.

¹⁸Be'nn bi'che, llnnaba' sochga Xanllo Jesucriston' gakrenchgue' re' lo yichjra'llda'oren'. Ka'n gakchga.

YICH DAN' BZOJ POSTL SAN PABLO KE BE'NN KA' LLA'A ÉFESO

Pablon' llwape' lliox be'nn ka' nxenra'll Jesucriston' lla'a yellen' nzi'i Éfeso

Nada' Pablo naka' postl ke Jesucriston' kan' byazra'll Diosen', na' llzoja' re' lla'a Éfeso, re' nak rallna'a Dios llonlira'llre Xanllo Jesucristo na'. ²Na' llnnaba' rao Xallo Dios ren Xanllo Jesucristo na', gakrén akchgue' re', wzoa ake' yichjra'llda'oren' so kwezre nbaraz.

Diosen' llakrene' lli'o dan' nxenra'll-llo Criston'

³Llaya'l gonllo Diosen' xhen be'nnen' nake Xa Xanllo Jesucristo na', lli'o nakllo Criston' txhen, ba benn Diosen' lli'o yeolol da yallje yichjra'llda'ollo, yeolol da de yebá gan' zoe' na'. 4Le brej Diosen' lli'o kan' za xete yellrion' nench na' gakllo rallna'a Cristo, na' sello rao Diosen' gakllo ra'llda'o yalle, bibi do'l gapllo rawe'n. ⁵Ba nllie' Diosen' lli'o kan' bi nna sotello. Na'llen' none' lli'o ka xhi'nne' kan' byazra'lle' na', ke len na' bse'le' Jesucriston' ni ke lli'o. ⁶Llaya'lkze sollo gonllo Diosen' xhen kateken' nllie're' lli'o na', le bse'le' Jesucristo be'nnen' nllie're' na' gokrene' lli'o. ⁷Kan' got Cristo na'n, brarj xchene' ni ke da xhinnjen' benllo. Na'llen' bazi'xhen Diosen' ke da xhinnj kellon' le nllie're' lli'on. ⁸Na' llone' wen kello, llonne' lli'o doxhen yel si'n, na' yel llejnie' ke'en. ⁹Na' bzejnie're' lli'o dan' llwie' gone' na', dan' nono bnneze kana', le yel be'nn wen ke'en ba benen nench bed Criston' rao yellrio ni. ¹⁰Le bne'e wllin lla kat yeolol be'nn lla'a yebá ren be'nn lla'a yellrio, wzenay ake' ke Criston' gak ake' rallne'e.

¹¹Ka nak lli'o nakllo Cristo txhen, kana'te brej Diosen' lli'o nench gak rallna'llo dan' lle'nre' gonne' lli'o. Na' Le'e gone' nench gak yeolol kan' bllie' bia'a gone'. ¹²Le Le'en gokra'lle' zga'tek neto'n bxenra'llto' Criston', na' brej Diosen' neto' nench sorentoe' txhen gontoe' xhen dan' nake' be'nn za'k kwis. 13 Leska' re', kate bénere Di'll Wen ke Criston' dan' nak da li. bnnézere Le'en wasre'e lli'o. na'llen' benlira'llre', na' ba naksre Criston' txhen. Na' ba benne' re' Spíritu ke'en zon lo ra'llda'ore kan' bne'e gone' na'. 14 Spíritu ke'e na'n dan' ba benne' lli'on naken

Efesios 1, 2 342

ka to da bkwiarawe', na' naken to da llroe' lli'o gonnkze Diosen' lli'o dan' ba bchebe' na', kana'n yekobe' xpe'rllon', na' gone' lli'o yell ke'e, be'nn ba bkwa'nnrene' yeolol da nak ke'e, nench na' we'raolloe', le nake' be'nn za'k kwis.

Pablon' bnnabe' we'e Diosen' yel si'n ke be'nn llonlira'll Criston'

¹⁵Ke len na' ka benra' di'llen' llonlira'llre Xanllo Jesúsen', na' kan' nllie're' yezikre be'nn llonlira'll Le'e, ¹⁶na'llen' ni ke llsanza' lloa'a yel llioxken ke Dios, ni ke re' katen' llalwille'n. ¹⁷Dios be'nnen' llon Xanllo Jesucriston' xhen, be'nnen' nak Xe'e be'nn za'ke. Le'e llalwilla'. Na' llnnabre' gone' cho' yel si'n na' lo ra'llda'ore, na' chejnie're xti'lle'n, na' gombia're' kwasro. ¹⁸Na' llnnaba' cho' beni' ke'en lo ra'llda'ore, nench na' nnézere bi da wen na' bexhllo gone' ke lli'o ba breie' nakllo rallne'e. Na' llnnaba' nench nnézere ka da wen na' nak yeolol da ka' za gonne' gak ke lli'o. ¹⁹Leska' llnnaba' cho' beni' ke'en lo ra'llda'ore nench nnézere ba napre yel wak xhen ke'en, re' ba llonlira'll Le'e, kon ka ba broe're' lli'o vel wak xhen ke'e na'. 20 Ka'n bene' kan' basbane' Criston' radi be'nn wat ka'. Bde na' brekwe' Le'e kwite gan' llie' yebán', na' llnebia' ake'. ²¹Na' Criston' llnebia'lle' nna' rao yeolol angl, na' rao yeolol be'nnach, na' rao yeolol daxi'o, na' rao yeolol biteze da llonlira'll be'nne, na' noteze wnebia'. Na' leska' llnebie' da za za'a. ²²Na' ba bene' rao na'a Criston' yeolol be'nne, na' billre da de nench Le'en llnebia!. Na' ba

bzoe' Criston' nake' Xanllo be'nn llnebia' yeolol da de. ²³Na' lli'o llonlira'll-lloe' nakllo ka to kwerp, na' Cristo na' nake' ka yichj kwerp na'. Na' nnello nya' Criston' ren lli'o llonlira'll-lloe', Le'en zoe' llnebie' doxhente

Diosen' nllie're' lli'o

Kana' nna nat yicigia mak ke nak bentezre da xhinnj Kana' nna nat vichjra'llda'oren' rao Diosen', na' nna' ba bakob yichjra'llda'oren' ka nak ba llayonlira'llre Criston'. ²Ba bdare benre da xhinni ka llaso'n be'nn ka' bi nonlira'll Dios, dan' bzenayre ke daxi'o dan' nechi be'nnach. Na' nna' llnebia' daxi'on vichira'llda'o be'nn bi llzenay ke Dios. ³Ka'kzen' bzo yeolol-llo bentezllo bi da bnen kello bi da bzera'll xpe'rllon', na' da bawé lo yichjra'llda'ollo. Na'llen' bchoye' kello sa'kzi'llo ke chnare kan' gak ke be'nn ka' bi lleile' ke xti'll Diosen'. ⁴Na' Diosen' bava'chra'lle' lli'o dan' ba nllie're' lli'o. ⁵La'kze gokllo ka be'nn wat, ni ke da xhinnjen' benllo na', na' benne' vel nban kello dan' nakllo txhen Cristo na'. Diosen' basre'e lli'o dan' nllie're' lli'o, 6Dan' nakllo Criston' txhen wak nnello rente lli'o basbán Diosen', kan' basbane' Le'e radi be'nn wat ka', na' nakllo ka be'nn ba lliarén Xanllo Jesucriston' txhen gan' llie' yebá na'. ⁷Kan' gokrén Diosen' lli'o nench da za za're wroe'llre' lli'o katken' nllie're' lli'o na', na' katk wen na' llone' ke lli'o nakllo txhen ren Xanllo Jesucriston'. 8 Dan' nllie' Diosen' lli'o, benne' yel wasrá kello, kan' benlira'll-llo Cristo na', na' kere

343 Efesios 2, 3

basre'e lli'o nnello benllo da wen na', zan naken to da gokrene' lli'o.

⁹Na' Diosen' basre'e lli'o kere ni ke bi da wen benllo, ke len na' notno llaya'l gonxhen kwine'. ¹⁰Diosen' bene' lli'o, na' ka benlira'll-llo Xanllo Jesucriston', bayone' lli'o be'nn wen nench gonllo da wen dan' ba nonkze Diosen' xhnid gonllo.

Be'nn ka' ba nxenra'll Cristo ba zo ake' nbaraz

¹¹Ke len na' lewayón ke xhbab kan' gok keré kana', re' gorjre na' bi nakre be'nn Israel. Na'll lle ake' re': "Bi zore sen dan' nzi'i circuncisión" (sen dan' llzoa be'nn Israel ka' kwerp ke bida'o byio ak). ¹²Lelljadinra'll kan' bzore batna', bi nombia're Criston', bi nakre yell ke Dios kan' nak be'nn Israel ka', na'llen' bi bne Diosen' gakrene' re' kan' bne'e gakrene' be'nn Israel ka'. Na' bi bzore rez lljazorenre Diosen'. ¹³Bixha Criston' bzane' yel nban ke'e, bet ake' Le'e brarj xchene'n ni ke lli'o. Na' nna' ba llonlira'llre', na' ba nakre txhen Xanllo Jesucriston! Na' ba nakre toze ren be'nn Israel ka', la'kze gokre ka be'nn zi'te. ¹⁴Criston' bayone' lli'o toze, bkwase' da benbe'ye lli'o, le kana' bwie lwelljllo, le bi nakllo toze, le nak neto' be'nn Israel, na' re' bi nakre be'nn Israel. 15 Kan' bzane' kwine' gote', bkwase' ley dan' bzoj da Moisésen' ka'le, ren yeolol dan' nen llaya'l gonllo nench bzoe' lli'o nbaraz, na' bayone' lli'o toze yell kobe ke'e. 16 Na' dan' bzane' kwine' gote' le' yay cruzen', nzoe' lli'o nbaraz rao Diosen', na' rao llopte

yellen' bayakllo toze bill llwie lwelljllo.

¹⁷Kan' bed Criston' yellrio ni, badye'e di'll rao yeolol be'nnach, bne'e wak yeni'tllo nbaraz, re' lla'a zi't, na' neto' be'nn Israel lla'a awlloze. 18 Ke len na' neto' be'nn Israel llonlira'll Criston', na' re' bi nakre be'nn Israel, wak walwill-llo Xallo Diosen', le Spíritu ke'e na'n llakrenen yeolol-llo. 19 Na'llen' bill nakre ka be'nn zi't rao Diosen', re' bi nakre be'nn Israel. Yeolol lli'o ba llonlira'll Criston' ba nakllo txhen. le ba non Diosen' lli'o ka be'nn lla'a lo vo' ke'e. ²⁰Lli'o llonlira'll Diosen' nakllo ka to yo'. Na' postl ka' ren yezikre be'nne lloe' xti'll Cristo, nak ake' ka ran yo' na'. Na' Jesucristo na' nake' ka yej skin ke yo' na'. ²¹Na' lli'o nakllo txhen Criston', nakllo ka yej da ba nkwa'a ga llak yo' de yej ka'. Na' llkwa'nn ka nak zej lla'a yo' na'. Ka'kzen' nak lli'o nakllo Xanllo txhen ren lwellillo, na' ba nakllo ka to yoda'o gan' zo Diosen'. 22 Re' na' ren nollre be'nne llonlira'll Criston', ba nakllo ka yoda'o gan' zo Diosen', le ba zo Spíritu ke'en lo ra'llda'ollo.

Pablon' jatixjwe're' xti'll Diosen' be'nn bi nak be'nn Israel

Ke len na' nada' Pablo, yoa' lo rill ya, ni ke dan' lloe'rena' re' xti'll Xanllo Jesucriston', re' bi nake be'nn Israel. ²Na' ba llaya'l nnézere nllie' Diosen' nada', na' ba bkwa'nne' rallna' wzejnie'ra' re' xti'lle'n. ³Ba bzejnie're' nada' da nono bnneze, ka'n ba bzoja' re' to chop di'll le' yich ni. ⁴Kate wrabre yich ni, gakbe're llejnie'ra' dan'

Efesios 3, 4 344

nono byejnie' kana' ke Criston'. ⁵Le kana' bi bzejnie' Spíritu ke Diosen' be'nne, na' nono bnneze ke Criston'. Zan nna' ba bzejnie'n neto' nakto' postl ke'e, rente nollre be'nn ba breje' we'to' xti'lle'n, neto' ba nakto' rallna'a Dios. ⁶Dan' bzejnie'n lli'o, llroe'n be'nn ka' bi nak be'nn Israel ren be'nn ka' nak be'nn Israel, si'i ake' dan' bcheb Diosen' gonne' ke lli'o nakllo rallne'e, ni ke dan' llejle'llo ke Di'll Wen ke Xanllo Jesucriston', na' nakllo ka toz be'nne, na' to chi'ze llakrén Diosen' lli'o kan' ba bnekze' gone'.

⁷La'kze bi za'kteka', kone yel wak ke Dios na', breje' nada' chixjwe'ra' Di'll Wen ke'e na'. 8La'kze nada' naka' le zeraoze be'nn da'o, bibi za'ke rao yeolol be'nn ka' ba brej Diosen', nak rallna' chixjwe'ra' be'nn ka' bi nak be'nn Israel, ka da wen na' gone' ke yeolol lli'o llonlira'll Criston'. ⁹Diosen' bene' rallna' wzejnie'ra' yeolol be'nn dan' ba nchoye' gaken. Kan' bxhe yellriote, nono bnneze dan' bllie' bia'a gaken, toze Le'e nnezre', Diosen' be'nnen' ben yeolol da de. ¹⁰Ka'n gok nench be'nn ka' lldop ll-llay llonlira'll Criston', gon ake' nench angl brao ka', na' angl wnebia' ka' lla'a yebá na', nnez akre' ka yel si'n nap Diosen' ke yeolol da llone'. 11 Diosen' llone' kan' bne'e gak kana'te, kan' bi nna xe yellriote, bne'e kan' gone' ke Xanllo Jesucriston! 12 Nakllo txhen Xanllo Jesucriston' dan' nxenra'll-lloe' na'. Na'llen' bi llebllo Diosen', na' llawello nnézello llak lloe'renlloe' di'lle. ¹³Ke len na' lla'tyoera' re', bitbi gákere dan' llak kia' ni,

za'kzia' dan' lloe'rena' re' xti'll Jesucriston'. Na' naken da yewere, le ni ke re'n llak kia' ka'.

Nxenra'll-llo Criston' le Le'en bllie're' lli'o

¹⁴Ke len na' llzoa xhiba' rao Xa Xanllo Jesucriston'. 15 Le Le'en bxie' yeolol dialla ke lli'o zollo yellrio ni, na' ke be'nn lla'a yebá. 16Llnnaba' rao Diosen' be'nnen' za'k kwis. gonne' re' Spíritu ke'en cho'n lo ra'llda'oren' ren yel wak ke'e na'. ¹⁷Llnnaba' sorenteze sorén Criston' re', dan' llonlira'llre'. Na' llnnaba' serén yel nllie' ke Diosen' re', na' gaken da lliarao rao yel nban keré, ¹⁸nench chejnie're, ren yezikre be'nne nak rallna'a Dios, katek nllie' Criston' lli'o. Ga zeraoze ga bi yeyoll yedokze nllie're' lli'o. ¹⁹Na' llnnaba' chejnie're kan' nllie're' lli'on, nench na' gakre ka to be'nn ba bxhi'i yeolol bi da de ke Dios. Le Le'en nllie're lli'o da xhen gore, nono chejnie'kze katken' nak yel nllie! ke!en.

²⁰Diosen' llak llone' yeololte, na' llonnlle' ye ra't ka dan' llnnabllon', na' da llonllo xhbab gonne'. Ke len na' lloe'llo yel llioxken ke'e, le yel wak ke'e na'n zorenen lli'o. ²¹Na' lli'o lldop ll-llayllo llonlira'll-llo Xanllo Jesucriston', llaya'l gonllo xhen Diosen' ke chnare. Ka'n gakchga.

Tozen' nakllo ren be'nn ka' llonlira'll Criston'

A Nada' yoa' rill ya, ni ke dan' lloa'a di'll ke Xanllo Jesucristo na'. Na'llen' lla'tyoera' re' sore gonre wen, kan' llaya'l gonllo dan'

345 Efesios 4

brej Diosen' lli'o nakllo rallne'e. ²Lla'tyoera' re' gakre be'nn ra'llda'o nexira'lle, na' gakre be'nn cha'o. Legap yel llxhenra'll ke be'nn lwelljre kone yel nllie' ke Dios na'. ³Spíritu ke Diosen' nonen lli'o toze, na' legón ga zerao sa'kere nench gakre be'nn wen ren lwelljre. 4Le nakllo ka toze be'nne, na' toze Spíritun' zo yichjra'llda'o yeolol-llo. Na' ka'n brej Diosen' lli'o nench toz da llonllo rez, gone' wen ke yeololllo. ⁵Toze Jesucriston' nak Xanllo, na' toze ka gonlira'll-lloe', na' toze ka zejen ka choallo nis. ⁶Toze Diosen' nxenra'll-llo be'nn nak Xa yeolol-llo. Le Le'en llnebia' yeololllo, na' zerene' lli'o kat llonllo xchine'n, na' zekze' llakrene' lli'o rao yeololte bi da llonllo.

⁷Criston' llakrene' lli'o, na' wde wdere da none' gon totollo kon ka byazra'lle'. ⁸Ke len na' nyoj xti'll Diosen' nen:

gon toto ake'.

Kan' bayepe' yebá na', zanche'te' yeololte bi da llonbe'ye lo yichjra'llda'o be'nnach. Na' be'e ke ke be'nnachen' da

⁹Dan' bayepe' yebá na', zejen nnello zga'tek betje' badsoe' yellrio ni, bde na' gote' bga'che'. ¹⁰Be'nnen' betj yebá na', Lekze'n bayep yebá gan' llia Diosen', na' nna' llnebie' doxhente. ¹¹Lekze Le'en none' ke bal-llo nakllo postl, na' ye bal-llo chixjwe'llo bi da ba bne'e, na' ye bal-llo llje'renllo Di'll Wen ke'en be'nn bi nna yene len, na' ye bal-llo llwia llyillo be'nn llonlira'll Le'e, na' ye bal-llo llroe' llsédello be'nne. ¹²Kan' ben Criston' nench lli'o nakllo be'nn ke'e wak

gonllo xchine'n, nench na' zjazell gakrenllo be'nn ka' lldop ll-llay llonlira'll Criston', gak ake' kan' lle'nre' na'. 13 Lle'nre' yeolol-llo gakllo toze gonlira'll-llo Xhi'nne'n do yichi do ra'll-llo, na' gombia'lloe' kwasro. Na' gakya'nnllo kan' llaya'l gakllo be'nn wen, kan' nak Cristo na'. ¹⁴Na' bill gakllo ka xkwi'de, chejle'tezllo na' nnaollo da llonlira'll toto be'nn da llarjla'llze', le nak ake' be'nn wenra'lle nench llonllejla'll ake' lli'o. ¹⁵Llaya'l we'renllo be'nne di'll cha'o di'll li, gakllo be'nn cha'o rao be'nne nench chejle' ake' nllie' akelloe'. Ka'n gonllo nench zjazelle gakllo be'nn cha'o be'nn wen kan' nak Cristo be'nnen' llnebia' lli'o. ¹⁶Kan' nak to kwen to kwen da nka' kwerp kellon', no'x lwellje ren xpe'rllo ren llit yo'llo, na'll za'ke llon doxhen kwerp kellon' llin kan' llaya'l gonen. Ka'n nakse ke lli'o dil-llo nakllo txhen llonlira'll-llo Criston' nench gon totollo dan' non Diosen' gonllo, na' yeolol-llo zjazello txhen gakllo be'nn cha'o llie' lwellillo.

De to yel nban kob kello dan' nxenra'll-llo Criston'

¹⁷Ganni nnia' re', Xanllo Jesucriston' lle'nre' wzejnie'ra' re': bi llaya'l sollo gonllo da ke nxhia kan' llon be'nn ka' bi llonlira'll Dios. ¹⁸Nchole lo ra'llda'o ake'n. Na' bi nap ake' yel nban dan' noe' Diosen', na' ni ke llejnie' akzere', yel llon war lo yichjra'llda'o ake'n. ¹⁹Na' bibi yel zdo' nombia' akre', llon akteze'n la'kze da nak zi waye'e akre', na' nna zera'll aklle' gon aklle' da xhinnj. ²⁰Zan ka nak Efesios 4, 5 346

re' ba nsedre kan' ne Criston', na' ba nnézere bi llaya'l gonre da xhinnjen', ²¹cha' da li ba bénkzere di'llen' broe' lo ra'llda'oren', zeje di'lle ba llejnie're di'll li ke Jesúsen'. ²²Na' llaya'l wlli'yllo chla're bi da xhinni zera'll lo ra'llda'ollo gonllo, kan' benllo kana' kan' yel wzera'll kellon' bxhiye'n lli'o, nench bentezllo da xhinnj. ²³Zan nna' llaya'l wacha'llo bi xhbab llonllo lo ra'llda'ollo. ²⁴Na' llaya'l we'llo lati yekob Diosen' yichira'llda'ollon', nench na' gonllo da zej to li, kan' llon Le'e na', na' gakllo be'nn ra'llda'o yalle kan' llazra'lle' na'.

²⁵Ke len na' bill llaya'l siye'llo, zan we'renllo be'nn lwelljllo di'll li, le txhen na' nakllo ka toze be'nne.

²⁶Cha' llaklla're, bi gonre da xhinnj. Llaya'l yeyakxhénere na' bi sore gaklla're do lla. ²⁷Bi we'llo latj ke daxi'on gonllo da xhinnj.

²⁸Na' be'nn yo'rawe' llbane' bill llaya'l kwane'. Llaya'l gone' llin da nak wen kone nia'ne'e, nench na' ga't da gakrene' be'nn yallje.

²⁹Na' bi llaya'l we'llo di'll ke nxhia, llaya'l we'renllo yeolol be'nn di'll cha'o, di'll da xhenraz kon ka yallje totoe', nench na' gakrenen leake'. Ka'n gonllo nench gak xti'll-llon' di'll xhenraz kat wzenay be'nn len.

³⁰Na' bi gonre da wzoaya'ch Spíritu ke Diosen', le Dios na'n ba bzoe'n lo yichjra'llda'ollon', na' gapchie' lli'o llinte llan' yedxhie' lli'o kat llin lla.

³¹Llaya'l kwej yichjllo yeolol dan' llone lli'o llwie llrello, leska' bill gaklla'llo, na' bi rokllo, na' bi gonllo da nne xhen cha' bi da da'o llak kello. Bi llaya'l chachrén lwelljllo, na' bill llaya'l gonllo biteze da xhinnj. ³²Zan llaya'l gakllo be'nn cha'o, na' yeya'chra'll lwelljllo. Na' llaya'l yezi'xhen ke lwelljllo biteze da llon akre' lli'o, kan' bazi'xhen Diosen' kello kan' bxenra'll-llo Cristo na'.

Kan' llaya'l sollo nakllo xhi'nn Dios

Llaya'l sollo gonllo kan' llon Diosen', le xhi'nne' lli'o na' nllie're' lli'o. ²Llaya'l nni'tllo llie' lwellillo kan' nllie' Criston' lli'o, bzane' yel nban ke'e gote' ni ke lli'o. Na' llawé Diosen' kan' bene'n. ka llawé to be'nne to da la' xhix. ³Na'llen' bill llaya'l sorenre no'r cha' bi nchayna'renre', na' bi gonre billre da nak zdo' ren kwerp kerén', na' bi gakre be'nn wzera'll. Le lli'o ba nxenra'll-llo Diosen', bill llaya'l gonllo da ki, ni gaz da wa'l-llo ka da zban ki. ⁴Bi llaya'l we'llo di'll da nak zdo', na' billre di'll da nne re'llo, na' di'll da bibi za'ke, bi llaya'l we'llo di'll ka' nak ka'. Zan llaya'l sotezllo we'llo yel llioxken ke Dios. ⁵Le ba nnézere zjalla'a be'nn byio ak zorén ake' no'r, na' bi nchayna'a ake', na' lla'a be'nn llon da nak zdo', na' lla'a be'nn zera'll bi da de ke be'nne. (Ka be'nn wzera'll ki, rebze llon ake' ka be'nn ka' nxenra'll lwa'a lsa'k ka'.) Na' be'nn ka' llon da ki, ba nnézkzere bi yellín ake' yebá gan' Ilnebia' Criston' ren Diosen'. ⁶Notno siye'e re' bi di'll wenra'lle. Le ka nak be'nn ka' llon ka', Dios na' we'e yel llza'kzi' ke be'nn ka' ke chnare, le bi llzoa ake' xti'lle'n. ⁷Ke len na' bi llaya'l gonrenllo txhen ka be'nn ka' llon ka da ka'.

⁸Kana' nna nchol yichjra'llda'ollo, zan nna' ba yo'llo beni' dan' ba 347 Efesios 5

nakllo txhen Xanllo Criston', na' llaya'l sollo gonllo da wen, le ba yo'llo beni' ke Xallo Diosen'. 9Le Cha' ba byo' beni' ke Criston' yichjra'llda'ollo, gakllo be'nn cha'o, na' chejllo nez li. 10 Na' llaya'l chejnie'llo nench nnézello kan' lle'ne Xanllo Criston' gonllo. ¹¹Na' bi llaya'l gonllo txhen ka da ka' llon be'nn ka' nchole yichjra'llda'o, llon ake' da xhinni da bibi za'ke. Na' llaya'l wroe' akelloe' da xhinnjen' llon ake'n. 12 Le naken to zdo' we'llo di'll ke da ka' llon ake' llillize. 13 Kat cho' beni' ke Criston' lo ra'llda'o ake'n, na'll wayakbe'e akre' bin' llon ake' cha' naken da xhinni, le beni' ke'e na'n llzeinie'n be'nnach cha' llon ake' da wen o cha' llon ake' da xhinnj. 14 Na'llen' nyojen nen ki:

Babán, rwe' taso', nako' ka be'nn wat dan' bi llono' kan' ne xti'll Diosen'.

Na' Criston' kwe' beni' ke'en lo ra'llda'o.

¹⁵Len na' llaya'l sollo wiallo dan' llonllon'. Sollo ka zo be'nn si'n, kere sollo ka zo be'nn bi llejnie'. ¹⁶Na' yeo lla llaya'l gonllo da yeyazra'll Diosen', le yeo llan' zekze da xhinnjen' lle'nen wlleyi'n lli'o. ¹⁷Na' bi gonllo ka llon be'nn bi llejnie'. Llaya'l chejnie'llo gonllo kan' llazra'll Diosen' gonllo. 18 Na' bi llaya'l gakllo be'nn wazó, le be'nn gwazón' ll-lleyi' kwine'. Zan lli'o llaya'l we'llo lati cho' Spíritu ke Diosen' lo ra'llda'ollo. ¹⁹Na' llaya'l we'rén lwelljllo no xti'll Dios, na' gol-llo we'raollo Diosen', na' billre da ne Spíritu ke Diosen' gol-llo. Na' gol-llon do vichi do ra'll-llo

we'raollo Xanllo Jesucriston'. ²⁰Na' kone Xanllo Jesucriston' soteze sollo we'llo yel llioxken ke Xallo Diosen', ke yeolol dan' llonne' llakrene' lli'o.

Kan' llaya'l sorenllo be'nn lla'a lo yo' rill-llo

²¹Dan' llapllo Diosen' bara'nne, llaya'l wzoa xti'll lwelljllo. ²²Re' no're, nchayna're, llaya'l wzoare xti'll xhyioren' kan' llonre llzoare xti'll Xanllo Cristo na'. ²³Dios na' none' xhyioren' ka be'nn lliarao rao re' no'r ak, kan' non Criston' lliarawe' rao lli'o, lldop ll-llayllo llonlira'll-lloe'. Na' nakllo ka kwerp ke Cristo na', le Le'en nake' wasrá kello. ²⁴Na' kan' llon lli'o lldop ll-llay llonlira'll-llo Criston', na' llzoallo xti'lle'n, ka'n gon re' no're, wzoare xti'll xhyioren' rao yeololte.

²⁵Na' re' be'nn byio, re' nchayna'a, lellie' xho'r-ren' kan' nllie' Criston' lli'o, bzane' yel nban ke'en gote' ni ke lli'o ba lldop ll-llayllo llonlira'lllloe', ²⁶nench broe' lli'o rallna'a Diosen', na' bayibe' ra'llda'ollon' kan' benlira'll-llo xti'lle'n, ²⁷Ka'n bene' nench yewello kat yellinllo gan' llie' na', bibi do'l kello de, na' bibi da xhinni yo' lo ra'llda'ollo, na' nak ra'llda'ollon' yall yellinllo rawe'n. ²⁸Ka'kze re' be'nn byio, llaya'l llie' xho'r-re kan' nllie'kze kwinre, le be'nnen' nllie' xho're', kwinkze' nllie're chet ka'. ²⁹Le gatga zo be'nn llwiere kwine', yeololtello nllie'llo kwinllo, na' llapllo kwerp kellon'. Kan' llon Criston' nllie're' be'nn ka' llonlira'll Le'en. ³⁰Na' nakllo ka to kwen wej da no'x kwerp ke'en, na' ka llit dan'

Efesios 5, 6 348

yoe', na' xpe're' dan' da'a llit na'.

3¹ Na' xti'll Diosen' nen: "Ke len na'
be'nn byion' wsanra'll xaxhne'e, sie'
xho're', na' gak ake' ka toze be'nne
llopte'." ³²Di'll ni naken to da nono
byejnie' len kana'. Len na' lloe'n
xti'll Criston', ren ke lli'o lldop llllayllo llonlira'll-lloe' na'. ³³Ke len
na' re' be'nn byio, lellie' xho'r-ren'
ka nllie' kwinre, leska' re' no're,
legap xhyiore bara'nne.

Re' xhi'nna' da'o, lewzenay ke xaxhna're, le ka'n llaya'l gon lli'o ba nxenra'll-llo Xanllon'. ²Ki ne di'll bia'a nell ke Diosen', dan' nsa'a to da wen dan' gone' kello cha' gonllon: "Legap xaxhna're bara'nne, ³nench na' gak wen keré na' banre scha yellrio ni."

⁴Na' re' ni't xhi'nnre, bi wlok akrebe', leyesgor akbe' kwasro, lewzejnie' akebe' di'll cha'o, nench wxenra'll akbe' Xanllo na'.

⁵Na' re' llon xchin be'nne, lewzenay ke xan llin kerén' do ra'llre, leyeyirjla'll ka gonre da yeyazra'll totoe', legonteze xhbab xchin Cristo na'kzen' llonre.

⁶Lewzenay do yichj do ra'llre, kere chak llwia ake' re' na'zen', gonre wen nench yeyazra'll ake' kan' llonren', le naksre be'nn wen llin ke Cristo na', na' ka'n yeyazra'll Diosen' gonllo. ⁷Na' kate gonre llin ke be'nnen', legonen do yichj do ra'llre, legonteze xhbab xchin Xanllo na'n llonre, kere kon ka yeyazra'll be'nnach. ⁸Le ba nnézello biteze da wen na' gonllo, wllin lla kat gon Xanllo Criston' gak da wen ke lli'o, nakllo be'nn wen llin ke be'nne, ren lli'o bi nakllo be'nn wen llin ke be'nne.

⁹Na' re' nakre be'nn xan llin, legone be'nn wen llin keré ka' wen. Bi wchachrén akre', le Xanllo Diosen' zokze' yebán' llwiakze' kan' llonren'. Leze ka'kzen' llwie' kan' llon be'nn wen llin keré ka', na' toze ka'n llónkzere' yeolol be'nne noteze nake'.

Ka'n gonllo nench ke gon daxi'on lli'o gan

¹⁰Be'nn bi'che, dan' nakllo Criston' txhen, llaya'l sello war gonlira'll-lloe', Le Le'en nape' yel wak xhen llakrene' lli'o. ¹¹Llaya'l si'llo yel wak yel llnebia' ke Diosen' nench tilrenllo daxi'on, kate llayirjen siye'n lli'o. ¹²Le kere dilrenllo be'nn de be'ren' yoll llen na', zan dilrenllo daxi'o ka', da ka' bayak ak da xhinni, na' billre da llnebia' be'nn lla'a yellrio, be'nn nchole da xhinnjen' lo ra'llda'we'. Na' dilrenllo yeolol spíritu wen da xhinni ka' gateze llazen. ¹³Na'llen' llaya'l gakllo war doxhen kan' lle'ne Dios na', nench na' kate lla lle'ne daxi'on tilrenen lli'o, bi soen lli'o. Na' kat ba benllo kan' lle'ne Diosen', na'll wak sellallo. ¹⁴Na' sello war we'llo di'll li ke'en batteze. Na' gakrenen lli'o ka ke to da ngo' le' be'nn waka'a ya. Na' llaya'l gonllo da wen batteze, le cha' gonllo da wen na', gaken ka xha be'nn waka'a yan', dan' nak de ya dan' nkwe'j lchoe'. 15 Na' llaya'l sello xhnid we'renllo be'nne Di'll Wen ke Criston', dan' llzejnie' lli'o ka sorenllo Diosen' nbaraz. Na' cha' sello xhnid, gakrenen lli'o, kan' llakrén xher be'nn waka'a ya le'e dan' nreje'n. ¹⁶Na' rao yeolol da ki

349 Efesios 6

llaya'l wxenra'll-llo Diosen', nench na' gak wkwe'jen lli'o kat bi da za'a lle'nen wlleyi'n lli'o, ka llon to ya ra'y, da llonrén be'nn waka'a ya llin, llakrenen le'e llchoyen yi' ke dan' látit dan' lla'lnninn zjazén chidjen kwerp ke'en. ¹⁷Na' wxenra'll-llo Criston' be'nnen' yesrá lli'o, nench gakrenen lli'o ka llakrén to ra'p de ya, da llonrén be'nn waka'a ya llin kat lleje' rao wdil. Na' leska' xti'll Diosen' dan' ben Spíritu ke Diosen' nench nyojen, lewxenra'llen nench gaken ka to spad da llonrén be'nn waka'a yan' llin. ¹⁸Na' llaya'lteze llaya'l yelwill-llo Diosen', na' wnnabllo Le'e, na' ga'tyoelloe' ren Spíritu dan' benne' lli'o, na' seteze sello ga'tyoelloe' wnnabllo ke be'nn ka' ba nxenra'll Le'e na'. 19 Na' lennab kia' gonn Diosen' di'll wa'a kat wa'a xti'lle'n, na' lennab bi lleba' wa'a di'llen' katen' wzejnie'ra' be'nne Di'll Wen ke Criston' dan' nono

nna chejnie'. ²⁰Bse'l Diosen' nada' ka roraze' nench bia'a xti'lle'n, ke len na' yoa' rill ya ni. Na' lennab gakrene' nada' gona' ra'll-lloy, bi lleba' wa'a xti'lle'n kan' llaya'l gona' na'.

Pablon' lloe'ltipe' be'nn ka'

²¹Llse'la' be'nn bi'chllo Tíquicon' we'rene' re' di'll nench nnézere kan' llak kia' na', ren da llona'. Nllie'llo Tíquicon', le llone' lli'o txhen nxenra'll-llo Criston', na' llonteze xchin Xanllo Criston' kan' llaya'l gone' na'. ²²Na'llen' llse'le' nench nnézere kan' llak keto'n, na' wtipra'lle' re'.

²³Llnnaba' rao Xallo Diosen' ren rao Xanllo Jesucriston', gon akchgue' nench yeololre so kwezre nbaraz, na' llie' lwelljre, na' sotezre wxenra'llre'. ²⁴Sochga Diosen' gakrenchgue' yeolol be'nn ka' nllie' do yichj do ra'll ake' Xanllo Jesucriston'. Ka'n gakchga.

YICH DAN' BZOJ POSTL SAN PABLON' KE BE'NN KA' LLA'A FILIPOS

Pablon' llwape' lliox be'nn ka' nxenra'll Jesucriston' lla'a yellen' nzi'i Filipos

Nada' Pablo na' ren Timoteo, nakto' be'nn wen llin ke
Jesucriston', llzojto' re' lla'a Filipos na', yeolol re' nak rallna'a Dios nxenra'llre Xanllo Jesucriston'.
Leska' llzojto' re', ze llwia llap be'nn ka' lldop ll-llay llonlira'll
Le'en, na' re' nbej ake' llakrén akre'.

LInnaba' rao Xallo Diosen' ren rao
Xanllo Jesucriston' gakrenchgue' re', na' wzoa ake' yichjra'llda'oren' so kwezre nbaraz.

Pablon' llnnabe' rao Dios gakrene' be'nn ka' nxenra'll Criston' lla'a yellen' nzi'i Filipos

³Yo'y ras kate lljadinra'lla' re', lloa'a yel llioxken ke Diosen' ba llonre txhen nxenra'll-lloe'. ⁴Na' yo'y ras kat llalwilla' Diosen' llawera' llnnaba' gakrene' re'. ⁵Le nakllo txhen llejle'llo Di'll Wen ke Jesucriston', bzoraozen kan' benlira'llre, na' bllinte nna' lla. ⁶Na' da ni nnezra', Diosen' bzorawe' llone' to da wen lo yichjra'llda'oren', na' ka'kze gone' nench yeyoll yeyak

yichjra'llda'oren' kan' llazra'lle'n, llinte lla yed Jesucriston' da yobre. ⁷Ka'n llaya'lkze gona' xhbab keré, le bi llanra'lla' re'. Le kan' jachoa' rill ya na', na' kan' bdixjwe'ra' Di'll Wen ke Criston' rao be'nn bi byejle' ke'e, na' bzejnie' akre' naksen da li, zerenkzre nada' dan' ba yo' yel nllie' ke Diosen' lo yichjra'llda'ore. ⁸Nneze Diosen' nllie'ra' re' kwis veololtere, le Jesucriston' llone' nench nllie'ra' re'. ⁹Na' llnnaba' rao Diosen' llie'llere', na' gonne' re' yel si'n ke'en, nench chejnie're bixhan' llazra'lle' gonre. 10 Ka'n llnnaba' nench na' nnézere bin' llaya'l gonre kan' llazra'll Diosen', na' gak yall yichjra'llda'oren', na' bibi do'l keré de katen' llin lla ved Criston' da yobre. 11 Na' gakrén Jesucriston' re' gonre da wen, na' ka' si'i Diosen' doxhen yel bara'nnen'.

Pablon' ne'e Criston' nake' yel nban ke'e

¹²Be'nn bi'che, lle'nra' nnézere yeolol dan' ba gok kia'n, ba gokrenen nench be'nn zanll bzenay ake' Di'll Wen ke Criston'. ¹³Na' dan' yoa' rill ya ni, ba gokrenen nench ba bia'a xti'll Xanllo Jesucriston' 351 Filipenses 1, 2

rao yeololte be'nn waka'a ya ke be'nn wnebia'n, na' noteze be'nn yobre. ¹⁴Na' be'nn zan be'nn lwelljllo lla'a do ni, ba bxhi'ltip ake', ba llonlira'll aklle' Xanllo Criston', dan' ba bre'e akre' kan' llak kia' yoa' rill ya ni. Na'llen' ba llayaxhj akre' lloe' ake' xti'll Diosen', bill lleb ake'.

¹⁵Da li bal ake' lloe' ake' xti'll Criston' dan' llaxhé' akre' nada', na' dan' lle'n akllre' gak ake' be'nn braoll ka nada', zan ye bal be'nn ak llyixjwe' akre'n do ra'll ake'. ¹⁶Ka nake be'nn ka' lloe' ake' xti'll Criston' nench gak ake' xhen, kere llon ake'n do ra'll ake'n. Lle'n akre' wzoava'ch aklle' nada' lo rill va ni. na'llen' llon ake' ka'. ¹⁷Na' yezikre be'nne llyixjwe' akre'n dan' nllie' akre' Criston', na' nllie' akre' nada', le nnez akre' yoa' rill yan', ni ke dan' llzejnie'ra' be'nn bi llejle' Di'll Wen ke Criston', llep ake' naken di'll li. 18 ¿Bixha gonen kia' nada' cha' llyixjwe' akre'n do ra'll ake' o cha! bi llon ake!n do ra!ll ake!n? Kon dan' llawera' lloe' ake' xti'll Criston' dan' nak di'll li na'.

Na' llawellra', ¹⁹le nnezra' yelloja' wen kan' llak kia'n, ni ke dan' llnnabre gakrén Diosen' nada', na' ren dan' llakrén Spíritu ke Jesucriston' nada'. ²⁰Len na' zoa' nxenra'lla' gakrén Diosen' nada', na' bi gona' krere da gakzbanra', le lle'nra' si'i Criston' yel bara'nnen' chak nbana' o la'kze cha' gata'. ²¹Le cha' nbana', lle'nra' wa'a Criston' yel bara'nne, na' cha' gata' wenren' gak kia' chet ka'. ²²Na' cha' dan' solla' yellrio ni, gona' xchin Xanllo Criston', wyanll be'nn

gonlira'll Le'e, bi nnezra' noren' na' nakll da wen chet ka'. ²³Naken to bni' nnezra' noren' na' nakll wen, to llakra' nakllen wen waya'a lljazorena' Criston', na' gaklle nbaraz kia' nada' chet ka'. ²⁴Na' leska' llona' xhbab, yálljere nada', na'llen' llaya'l bana'. ²⁵Ke len na', nnezra' wzorenlla' re' ye to chi'i nench gakrena' re' chejnie'llere, na' sore nbaraz gonlira'llre Criston'. ²⁶Na' katen' ba zorena' re' da yobre, kana'll yezikre yewere, na' we'raore Xanllo Jesucriston'.

²⁷Na' lesoteze legón da wen kan' llaya'l gonllo lli'o ba nneze Di'll Wen ke Criston'. Legón da wen ka', nench cha' yeda' yedwia' re' o cha' la'kze zoa' zi'te, yenra' di'lle keré, naksre toze ren lwelljre, llonre ga zerao za'kere nench wzenay vezikre be'nne xti'll Criston' dan' ba nxenra'llre na'. ²⁸Bi llebre cha' bi gone be'nn llwie re'. Na'll gakbe'e akre' ba rez kweyi' ake', na' sa'kzi' ake'. Na' leze ka'kzen' gakbe'e akre' Diosen' yesre'e re'. Le Dios na'n gone' kan' ba bne'en. ²⁹Diosen' bene' wen keré, dan' benne' lati benlira'llre' na', na' kere dan' benlira'llre' na'zen', renkze dan' wallayraore, ni ke Le'e na'. ³⁰Le toz ka dan' llakdilrenkzllo. Ba bre'kzere kan' gok kia' kana', na' nnézkzere kan' llak kia' nna'.

Criston' llake' xhen dan' bzane' yel za'k ke'e nench bede' yellrio ni

Cha' re' zore nbaraz dan' llonlira'llre Criston', na' cha' yel nllie' ke Criston' llonen llakxhenra'llre, na' cha' zorén Spíritu ke'en re', na' cha' nllie'

Filipenses 2 352

lwelljre, na' cha' llaya'chra'llre be'nne, ²wawellra' cha' nnezra' naksre toze, yeololte re' ren lwelljre, na' ka' toze ka zore llie' lwelljre, na' toze ka gonre xhbab, na' toz ka ye'nere gak. ³Bibi llaya'l gonre da llroe' llaxhe're be'nne, na' gonxhen kwinre, zan llaya'l yexjra'll-llo wayonllo xhbab za'kll be'nn lwelljllo ka' kere ka lli'o. ⁴Na' bi llaya'l kwek yichjllo chraoze ke kwinllo, llaya'lkze kwek yichjllo ka gakrenllo be'nn lwelljllo ka'.

⁵Llaya'l gonllo xhbab, ka xhbab da ben Xanllo Jesucriston'. 6Le la'kze nake' ka Dios na'kze, bzanre' yel llnebia' ke'en, na' yel bara'nn xhen ke'e dan' nape', dan' nake' toze ren Xe'e Diosen'. ⁷Bkwase' ka'le yeolol da ka' za'k da go't ke'e, na' ben kwine' ka to be'nn wen llin ke Dios, kan' bede' gorje' radj be'nnach. 8Na' ba nake' be'nnachen' bxhexi yichje' nench bene' kon kan' bne Xe'e Diosen'. Bzoe' xti'lle', na' bzane' yel nban ke'en gote' le' yay cruzen'. ⁹Ke len na' ben Diosen' Le'e xhen kwis, na' bene' Le'e be'nn brao rao yeolol be'nne, ¹⁰nench na' kat yen akre' ra Xanllon', yeolol ake' wzoa xhib ake' rawe'n, ka be'nn lla'a yebá, ren be'nn lla'a yellrio, na' be'nn zjalla'a xhanre yellrio. ¹¹Na' yeolol ake' nne ake' Jesucriston' nake' Xanllo, gak ka' nench Xallo Diosen' sie' yel bara'nne.

Be'nn nxenra'll Criston' nak ake' ka beni' ke be'nn ka' lla'a rao da xcholen'

¹²Be'nn bi'che, kan' ba bzore bzenayre xti'lla' kan' bzorena' re', ka' legonkze nna' la'kze bill zorena' re'. Na' lesó legón kan' lle'ne Dios be'nn ba basrá re', do xhizre do llebre. ¹³Le Dios na'n llgoe' yichjra'llda'ore dan' lle'nre' gonre da llayazra'lle', na' lekze' Dios na' llakrene' re' llonren'.

¹⁴Na' kat bi da gonre, bi gaore xhia, na' bi gakyollrén lwelljre, ¹⁵nench nneze be'nne llzoare xti'll Diosen', na' bibi do'l keré ga'te, na' gakre dogarje xhi'nn Dios, radj be'nn ka' nna yo' da xhinnjen' lo ra'llda'o ake', na' nna llon ake' krere. Na'llen' gakre ka to berj da llseni' ke be'nn lla'a yellrio ni. 16 Lesoteze lesó wxenra'llre di'll ke Cristo da nsa'a yel nban zejlikane, nench kate yed Criston' da yobre, vewera' kwis kan' benren', na' nnezra' bi bendadza' xchin Diosen'. ¹⁷Re' nxenra'llre Diosen' llonre xchine'n. Ke len na' llawera', na' zanra' yel nban kia'n biteze gak kia', ni ke dan' lloa'a xti'll Jesucriston' nench gak doxhen kan' lle'ne Diosen'. Na' dan' llak kia'n naken ka to da Ilrarj ake' rao Dios kate llon ake' Le'e xhen. ¹⁸Leyewerene nada', na' lesó nbaraz kan' zoa' nada!.

Timoteo ren be'nnen' nzi'i Epafrodito

¹⁹Llbexha' gakrén Xanllon' nada', na' le wse'ltia' Timoteon' gan' zore na', nench yewera' kat yenra' di'll ke re' ka wen na' llonre. ²⁰Le nollre no zo be'nn yobre wse'la', be'nn kwe' yichje' gak wen keré kan' llon Timoteo na'. ²¹Le nollre be'nn yobre kon lli' yichj ake' chraoze ke leake', na' bi llon ake' kan' lle'ne Xanllo Criston'. ²²Na' ba nnézkzere zo Timoteon' llone' da za'ke, na' 353 Filipenses 2, 3

kan' gokrene' nada' bdixjwe'ra' xti'll Diosen' gateze. Na' ba gokrene' nada' ba bzoe' ka to xhi'nna'. ²³Ke len na' llona' rez gak wse'le' gan' zore na', kat ba bnnezra' akre gak kia' ganni. ²⁴Na' nxenra'lla' Xanllo Criston' gakrene' nada', gonne' latj le yedtia' yedwia' re'.

²⁵Llakra' lekze llonen bien wase'la' be'nn lwellillon' re Epafrodito gan' zoren', le ba gokrene' nada' llonto' xchin Diosen', na' txhen ba gokdilrento' da xhinnjen'. Re' bse'lre' ganni gokrene' nada' ren bi da yalljra'. ²⁶Lle'nre' kwis re're' re', le llakre' dan' bnnézere llake' yillwe'n. ²⁷Da likzen' goke' yillwe', ye ra'tze ka gote', zan baya'chra'll Diosen' le'e, na' kere toze le'en baya'chra'll Diosen', renkze nada' baya'chra'lle' bayone' le'e, le biteze ba gok kia', na' nya'chraz zoa' chenak gote'. ²⁸Na'llen' lle'nra' wse'le' gan' zore na', nench yewere re're' da yobre, na' bill gákere ke'e. Na' rente nada' bill soya'cha'. 29 Lewrebe' na' leyewerene' dan' nake' lli'o txhen dan' nxenra'll-llo Xanllo Criston'. na' llaya'l gapre' bara'nne noteze be'nn llon kan' llon le'e na'. 30 Le ye ra'tzen' ke gote' gokrene' nada' bento' xchin Criston', bzane' yel nban ke'e, ka' gonkze re' chenak zorenre nada' ganni.

So kwezllo gonllo ka lle'ne Dios

Na' nna' re' be'nn bi'cha', llaya'l sollo nbaraz gonlira'llllo Xanllo Criston', bibi zed llakra' llzoja' re' da yobre, ka da ka' ba bzojkza', le nnezra' da gakrén re'n nia'. ²Lewiá, bi chejle're ke

be'nn ka' llon ka bayi'xe, llaral akllre' llon ake' da xhinnj, na' ne ake' llaya'l sore sen dan' nzi'i circuncisión dan' wchoy ra't kwerp kerén'. ³Ke nak Diosen' benne' lli'o Spíritu ke'en. Len naken ka to sen da ba benne' lli'o da nak dogarje da za'k rao Dios. Ke len na' lloe'raolloe' do yichi do ra'll-llo, na' llawello llonlira'll-llo Xanllo Jesucriston', le lli'o bi nxenra'll-llo bi da gone kwinllo ren kwerp kellon'. ⁴Chenak nada' nxenra'lla' bi da llon kwina'. da xhen de da wxenra'lla' chenake. Na' da xhenll de da wxenra'llya'nna' kerke no be'nn yobre. ⁵Naka' be'nn Israel gorja' rao dialla ke Benjamín, to xhmanzra', bzo ake' nada' sen dan' nzi'i circuncisión. Na' goria' gan' nne ake' di'll hebreo, le xaxhna' ka' nak ake' dogarj be'nn Israel. Na' bseda' doxhen ley dan' bzoj da Moisésen' kon kan' llzejnie' be'nn ka' nzi'i fariseo ak. ⁶Na' bnawa' klle'llo leyen', to braya', na' bsa'kzia' be'nn ka' llonlira'll Criston'. Bena' kan' ne leven' to notno gok bi nne kia'.

⁷Kana' llakra' da xhen za'k da ka' bena'n, zan nna' ba breja'n yichja', le llakbe'ra' bibi de gonrena'n ka nak ba llonlira'lla' Cristo na'. ⁸Na' nna' yeolol billre da yobre llakra' bitbi za'ken, le bi lladilen ke ton za'k dan' nombia' Jesucriston'. Le Le'en nake' Xana', na' dan' nllie'ra' Le'en, ba brej yichja' yeolol da ka' bxenra'lla', na' ba nona'n ka beb nench gak gombia' toze Criston'. ⁹Lle'nra' kwis gaka' Criston' toze, na' lle'nra' nne Diosen' naka' be'nn wen rawe' na'. Na' nnezra' bi llonen nada' be'nn wen dan' llona' dan' llia le' ley dan' bzoj

da Moisésen', zan Diosen' ne'e naka' be'nn wen dan' ba nxenra'lla' Cristo na'. Le kon be'nn ka' nxenra'llkze Cristo na', leakze'n billbi do'l ke ake' de, na'llen' nak ake' be'nn wen. ¹⁰Na'llen' lle'nra' gombia' Criston', na' gombia' yel wak ke'e dan' nape', ka naken babane' radj be'nn wat ka', na' llsanra'lla' kwina' sa'kzia' kan' bxha'kzi' Le'e na', na' gote'. Ka'n lle'nra' gon kwina' ka to be'nn wat, nench na' bill gona' da xhinnjen'. ¹¹Na' zoa' llbexha' yesbane' nada' radj be'nn wat ka' kat ba gota'.

Pablon' lle'nre' gak yichjra'llda'we' kan' nak yichjra'llda'o Criston'

¹²Bi nnia' ba nak yichira'llda'wa' kan' llaya'l gaken na', le bi nna gaken kan' nak ke Xanllo Jesucristo na'. Na' nna' naolla' llona' ga zerao za'kra' nench llina' kan' nak yichjra'llda'o Le'e na', le ke len na' breje' nada'. ¹³Be'nn bi'che, bi nna yedo'lra' gona' yichjra'llda'wa'n kan' llaya'l gaken na'. To da llona', llsanra'lla' yeolol da ka' ba bena' xhbab za'ken kana', na' nna' ba llwia' da za za're, da gonn Diosen' kia'. ¹⁴Ka llon be'nn llyitje llaralre', bi llatra'lle', le lle'nre' gone' gan, leska'n llona' nada' nench do'lra' dan' gonn Diosen' nada' dan' naka' txhen Xanllo Jesucriston'.

¹⁵Lli'o ba nxenra'llya'nnllo Xanllo Jesucriston', llaya'l gontezllo xhbab ka da ka' ba bnia' na'. Na' cha' billre xhbab yobre llonre, Dios na'kze wzejnie're' re' chet ka'. ¹⁶Na' dan' ba bzejnie' Diosen' lli'o, len llaya'l sotezllo gonllon'.

¹⁷Be'nn bi'che, legón kan' llona' ni, na' lewiá kan' llon yezikre be'nn ka' ba bzejnie'to' na', nench gonre kan' llon ake' na'. ¹⁸Le ba gollkza' re' da zan ras, na' nna' to bella' llnia'n da vobre, zjani't be'nn zan llwie akre' Criston' be'nnen' bzane vel nban ke'e, gote' le' yay cruzen'. ¹⁹Wllin lla kweyi' be'nn ka' chras, be'nn ka' kon lli' yichj ake', llawé akre' ye'j gao akze' kerke da we'rao ake' Diosen'. Llawé akre' we'e ake' di'll ke da llaya'l gak akre' zdo', na' lli' yichi ake' chraoze da llak yellrio nize. ²⁰Zan lli'o ba naken yellinllo yebá, le ganna' ba nak rall-llo. Le yebá na' za'a Xanllo Jesucriston', be'nnen' nak wasrá kello. ²¹Kana' yeche'e kwerp kellon', le naken to da llbeyi', na' wayone'n to da cha'o, da nak ka ke Le'e na'. Na' gone'n ka', le nape' yel wak llnebie' yeolol da zjadé.

Llaya'l yewello wxenra'll-llo Criston'

A Na' nna' be'nn bi'che, nllie'ra' re', zera'lla' re'e lwelljllo da yobre. Re'n nakre ka to da benn Diosen' nada', na' nbaraz zoa' ni ke re'. Lesoteze lewxenra'll Xanllo Jesucriston'.

²Na' lla'tyoera' rwe' Evodia, leska' rwe' Síntique, toz ka legón xhbab, legak txhen gonlira'llre Xanllon'.

³Na' ka nak rwe' be'nn lwellja', rwe'n benreno' nada' xchin Diosen' do yichj do ra'llo' kana', na' llnnaba' rwe' gakreno' no'r ki, le leake'n ba benrén ake' nada' xchin Diosen', na' ren Clemente na', na' ren yezikre be'nn lwelljllo ka'. Na' le' yich gan' llia ra be'nn ga't yel nban ke chnare, ganna' ba nyoj ra be'nn ki.

⁴Lesoteze leyewé dan' nxenra'llre Xanllo Jesucriston'. Ni nnia' re' da 355 Filipenses 4

yobre leyewé. ⁵Legón nench yeolol be'nne gombia' akre' re', nakre be'nn cha'o, le ba rez yed Xanllon' da yobre.

⁶Bi gak zozé lo yichjra'llda'ore cha' bi llak keré, legonen rallna'a Diosen', leyelwille' lewnnab gakrene' re', na' lewe'e yel llioxken ke'e. ⁷Na'llen' wzoa Diosen' re' nbaraz, to yel nbaraz da ni ke chejnie'zere gonn Diosen' re', na' billbi da zed cho' yichjra'llda'oren', dan' ba nakllo txhen Xanllo Jesucriston'.

Llaya'l gonllo xhbab da nak da wen

⁸Na' da zerawe llepa' re' be'nn bi'che, lekwek yichjre di'll lin', na' da nak zi gap be'nn re' bara'nne, na' da zeje lixheje, na' da bi nsa'a da xhinnj, na' da wayazra'll noteze be'nne, na' da za'k yewé noteze be'nne. Na' biteze da nak da wen da llazra'll Dios, yeolol da ka'n lekweken yichjre.

⁹Da ka' ba bzejnie'ra' re', na' yeolol dan' ba bénere bnia' na', na' da ka' ba bre're llona', yeololen legón. Na' Dios be'nnen' llon nench so yel nbarazen' lo yichjra'llda'oren', sokze' gakrene' re'.

Kan' ben be'nn Filipos ka' gokrén ake' Pablon'

10 Llawera' rao Xanllo dan' lli' yichjre llakrenre nada' da yobre. Nnezra' bzere llonre xhbab kia', na' bi go't latj gakrenre nada'. ¹¹Kere nia' da ki, le yalljra' billre da yobren', le ba llejnie'ra', zoa' nbaraz kate deteze da yalljra', na' kate bibi de. ¹²Yo'rawa' yel ya'ch yel zi', na' yo'rawa' yel cha'o. Na' Diosen' ba bzejnie're' nada' soteza' nbaraz biteze da llak kia', kate de da ye'j

gawa', na' kate bil dona', kate de billre da yalljra', na' kat bibi de. ¹³Llak llona' biteze da llaya'l gona', le zo Criston' llakrene' nada'. ¹⁴Na' benre wen bse'lre da gokrén nada', nench na' gokre nada' txhen ka nak dan' ll-llayrawa' ni.

¹⁵Na' re' be'nn Filipos, nnézkzere, kan' bzorawa' llroe'ra' xti'll Diosen' ga vobre, kan' baza'a Macedonia na', nollno be'nn bi'chllo ka' llonlira'll Criston' gokrén nada', zeraoze re' bse'lrenre nada' bi da byalljra'. ¹⁶Kan' nna zoa' Tesalónica na', da zan ras bse'lre bi da byalljra'. ¹⁷Na' kere lle'nra' bi da gonnre nada'n, lle'nra' gonre ka' nench ga't yel wnia' keré rao Diosen'. 18 Na' ba bxhia' dan' bse'lre kia', na' ba benre da xhenllre ka to da llaya'l gonre. Na' billbi yallira', le ba bayónn Epafroditon' dan' bse'lre kia'n, naken ka to llen yar da la' xhix da llzey bxoz ka' rao Dios, le Dios na'n llawere' kan' benre na'. ¹⁹Na' Dios kia' na'n gonnkze' yeololte da yallje re' dan' nxenra'llre Xanllo Jesucriston', le yeololten yo' rallne'e. ²⁰Na'll we'raollo Xallo Diosen', le Le'en llaya'l si'i yel bara'nnen' ke chnare. Ka'n gakchga.

Pablo llwape' leake' lliox

²¹Lewap lliox yeolol be'nn ka' yo' rallna'a Diosen', na' nxenra'll ake' Xanllo Jesucriston'. Be'nn lwelljllo ka' zjazorén nada' ganni llwapto' re' lliox. ²²Leska' yeolol be'nn ka' nak rallna'a Dios llwap ake' re' lliox, ren be'nn ka' llon llin ke César, be'nnen' nak le zerawe be'nn wnebia' llia Roma.

²³Na' llnnabto' Xanllo Jesucriston' gakrenchgue' re'. Ka'n gakchga.

YICH DAN' BZOJ POSTL SAN PABLO KE BE'NN KA' LLA'A COLOSAS

Pablon' llwape lliox be'nn ka' nxenra'll Jesucriston' lla'a yellen' nzi'i Colosas

Brej Jesucriston' nada' Pablo nench na' naka' postl ke'e, le ka'n lle'ne Diosen'. Na' llwapa' re' lliox ren be'nn lwelljllo Timoteo na'. ²Llzoja' re' lla'a Colosas, re' llonlira'll Criston', na' nakre rallna'a Dios. Na' llnnaba' rao Xallo Diosen' ren rao Xanllo Jesucriston', gakrén akchgue' re', na' wzoa ake' yichjra'llda'oren' so kwezre nbaraz.

Pablo llnnabre' Diosen' we'e yel si'n ke'en be'nn ka' lla'a Colosas

³Yo'y ras kat llalwillto' Dios be'nnen' nak Xa Xanllo Jesucriston', lloe'to' yel llioxken ke'e kan' llonre na'. ⁴Le ba béneto' di'll kan' llonlira'llre Xanllo Jesucriston', na' kan' nllie're yezikre be'nn ka' nak rallna'a Dios. ⁵Llonre ka', dan' zore rez yellinre gan' llia Diosen'. Na' byejnie're gak keré ka', kan' bzorao llzenayre xti'll Dios dan' nak da wen na' da li. ⁶Na' xti'll Dios dan' ba bdixjwe'to' re', ba goslasen doxhen, na' be'nn zan ba llejle' ake'. Na' lekze ka' ba llon leake'n wen, kan' bzorao llon re', kan' byejnie're di'll li dan' llzejnie' nllie' Diosen' re', na' nna' naotere llonre wen nna' lla. ⁷Kan' ba bzejnie'kze Epafrasen' re', le'e nake' be'nn nllie'to', na' nake' neto' txhen llonto' xchin Diosen', na' leska' zeteze ze'e llakrene' re'. ⁸Le'en ba golle' neto' ba ben Spíritu ke Diosen' nench nllie're be'nn lwelljre.

⁹Ke len na' ka bnnézeto' ka wen na' llonre, na' bzoraoto' yo'y ras kat llalwillto' Diosen' llnnabto' gakrene' re'. Llnnabto' gonn Spíritu ke'en re' yeololte yel si'n, na' ren yel llejnie'n nench nnézere akre ya'nnen' lle'nre' gonre. 10 Na'llen' gak gonre kan' llaya'l gon lli'o nombia' Xanllon'. Na' yewere' yeolol dan' llonren', na' llnnabto' gakrene' re' gonre zan kwen da wen, ka ke to yay da llbia daxhix wen, na' zjazell gombia're'. ¹¹Llnnabto' gakrén Diosen' re' kone yel wak xhen ke'en, na' sere war, na' soere biteze da gak keré, na' gapre yel llxhenra'll biteze da llak keré. 12 Na' sore nbaraz we're yel llioxken ke Xallo Diosen', le Le'en ba breje' lli'o, nench nakllo txhen ren be'nn ka' nak rallne'en, na' yellinllo gan' llie' na', gan' yo' beni'

357 Colosenses 1

xhen ke'e na'. ¹³Le Le'en babeje' lli'o rao na'a da wxhiye'n dan' nak ka da xcholen', na' nna' llnebie' lli'o, na' bawe' lli'o rao yel llnebia' ke Xhi'nne' Jesucriston' be'nnen' nllie're'. ¹⁴Le Le'en bzane' yel nban ke'en gote', nench bake'e da xhinnj kellon' na' llazi'xhen Diosen' kello.

Criston' bazoe' lli'o wen rao Dios

¹⁵Criston' nake' kan' nakya'nne Xe'e Dios, be'nnen' nono llre'e. Criston' ba zokze' ka za xe yellriote. ¹⁶Le Dios na' ren Cristo na', ben ake' yeolol da de yebá, na' da de yellrio nga, da nla', na' da bi llak llre'llo. Bene' nench ni't angl wnebia' ka', na' da ka' bayak daxi'o, na' billre da ka' llnebia' yichjra'llda'o be'nn ka'. Na' Criston' bene' yeolol da ka' nench gake' xhen. ¹⁷Criston' ba zokze' ka za ga't yeolol da de vellrio ren le' vebá. Na' veololte biteze da zjadé, nak aken kan' llaya'l gaken na', le Criston' llone' nench ga't yeolol bi da de. ¹⁸Na' yeolol lli'o ndop llayllo llonlira'lllloe', nakllo ka to kwerp, na' Le'en nake' yichi kwerpen', ka yichillo llnebia'n kwerpen', kan' nak Criston'. Le Le'en bxie' yel nban zejlikanen', na' nake' be'nn nell babane' radi be'nn wat ka'. Ke len na' nake' le zerawe be'nn brao, na' llnebie' yeolol be'nne, na' billre da de. ¹⁹Byazra'll Xallo Diosen' gak Criston' ka Le'e. Na'llen' nak Criston' doxhen kan' nak Diosen'. ²⁰Na' leska' byazra'll Diosen' gone' nench yeololte be'nn lla'a yebá, na' be'nn lla'a yellrio ni, yezorén ake' Le'e wen, ke len na' Criston' bzane' yel nban ke'e brarj xchene'n le' yay

cruzen', nench yeni't be'nne nbaraz ren Dios na'.

²¹Kana' bi nombia're Dios. Benre ka be'nn llwie Le'e dan' benre da xhinnj. Zan nna' ba bazoa Criston' re' wen ren Diosen', ²²le bzane' yel nban ke'en ni ke lli'o, kan' bet ake' Le'e na'. Na' bayibe' lli'o nench billbi do'l xhia kello de, na' nono zo wlliayi'll lli'o kat yellinllo rao Diosen'. ²³Na' lli'o llaya'l sollo gonlira'll-llo Criston', na' gontezllo rez yellinllo gan' llie' na', kan' bzera'll-llo gak kello kan' bzorao bzenayllo xti'lle'n da nellte, na'llen' bibi do'l kello de kat yellinllo rao Diosen'. Na' Di'll Wen ke'en ba goslasen doxhen vellrio nench wzenay be'nnach len, na' Diosen' breje' nada' Pablo chixjwe'ra'n beinne.

Diosen' breje' Pablon' bzejnie're' be'nn ka' nxenra'll Criston'

²⁴Nna' llawera' da zan da llllayrawa' ni ke dan' llyixjwe'ra' re' xti'll Criston', na' ll-llayrawa' yeolol dan' lle'ne Criston', le naken da gakrén re', nakre ka kwerp ke'e lldop ll-llayre llonlira'llre'. Na' ka' llaka' txhen Criston' kan' bllayrawe'n. ²⁵Dios na' bzoe' nada' nench na' gaka' be'nn wen llin ke'e rao yell ke'en. Na' wzejnie'ra' re' xti'lle'n, nench gakrenen re' lldop ll-llayre llonlira'llre Jesucriston', nench wzejnie'ra' re' doxhen kan' zeie xti'lle'n. ²⁶Kana' nono nna nneze ka da wen na' llon Diosen' ke be'nn nxenra'll Le'e, dan' ba nonkze' xhnid kan' batna'te, na' nna' ba bzejnie're'n lli'o nakllo rallne'e, ²⁷Diosen' lle'nre' nnézello

Colosenses 1, 2 358

llone' wen ke noteze be'nn, la'kze bi nak ake' be'nn Israel. Le ba broe're' lli'o dan' gok ka to dan' nga'chen', le Cristo na' goke' ka dan' bga'che, na' nna' ba zerene' lli'o, na'llen' zollo rez yellinllo gan' llie' na', gan' yo' beni' xhen ke'e na'. ²⁸Na' lloe'rena' yeolol be'nn di'll ke Criston', lla'tyoe akre' yeolole' gon ake' kan' ne'e na', na' yeolole' llzejnie'ra' xti'lle'n nench chejnie' akre' kwasro, le lle'nra' yeolol be'nn gonlira'll ake' Criston', na' yeolole' gak ake' kan' lle'ne Dios na'. 29 Ke len na' llona' kon ga zerao sa'kra' llzejnie'ra' be'nne xti'll Diosen', le Lekze'n llakrene' nada' kwis kone yel wak xhen ke'en.

zerao za'kra' nench llakrena' re', ren be'nn lwellillo ka' zjalla'a gan' nzi'i Laodicea, na' yezikre be'nn bi nna re'e nada'. ²Lle'nra' yexhenra'll yichjra'llda'oren' gakre toze, na' llie' lwelljre, na' nnezya'nnere kan' llaya'l gonre xhbab, nench chejnie're kan' ba bzejnie' Diosen' lli'o ke Cristo na', dan' nono bnneze do kana'. ³Le Le'en nse'e doxhen yel si'n, na' doxhen yel llejnie' ke Dios nench wzejnie'ren lli'o. ⁴Nia' ka' nench notno siye'e re' ren di'll da llákere nak nbaraz. 5La'kze zoa' zi't bi zorena' re', yo' yichja' re' dan' zorén Spíritu ke'en lli'o, na' llawera' llnnezra' llonre kan' llaya'l gonre, zechichre llonlira'llre Criston'.

⁶Ke len na' dan' ba bxhi're Criston' yoe' lo yichjra'llda'ore, ka' leseteze lewxenra'lle'. ⁷Lesoteze legonlira'll Criston' kan' ba bsedre na', na'll gakre ka to yay da ba nyin roen' zitj, na' lesó lewe'chga yel llioxken ke Diosen' kan' llakrene' re' na'.

Criston' ba bache'e yichjra'llda'ollon'

⁸Lewiá ke no wko'yele re', nnaore di'll da llzejnie' krere da de rao yellrio ni. Be'nn lla'a yellrio ni, llzejnie' akre' da zan da ne ake' gonllo da bibi za'ke, na' bi llzejnie'n lli'o da nak ke Criston'.

⁹Le doxhen kan' nakya'nne Dios na'n nak Criston', na' yel wak ke Criston' leska' naken ka ke Le'e na'. ¹⁰Na' nna' ba nakllo ka to be'nn nya' ba badil-llo, dan' nxenra'll-llo Criston', le Le'en llnebia'lle' biteze da nap yel wak. ¹¹Leska' dan' ba nakrenllo Criston' toze, ba nakllo ka to be'nn ba zo sen dan' nzi'i circuncisión, dan' ba bacha'a Criston' lo yichjra'llda'ollo nench bill nnebia' da xhinnjen' lli'o. Na' bi naken ka sen dan' bzoa be'nn ka' kwerp ke ake'. 12 Na' dan' blloallo nis kan' benlira'll-lloe' na', zejen kon kan' got Criston' ni kello, leska' lli'o ba nakllo ka to be'nn wat rao da xhinnjen' nench bill gonllon. Na' nakllo ka to be'nn bga'ch kan' bga'ch Xanllo na'n, na' leska' nnello Dios na'n balis basbane' lli'o radi be'nn wat ka', dan' ba llejle'llo basbane' Criston' kone yel wak ke'e na'. ¹³Kana' gokllo ka to be'nn wat, ni ke da xhinnj kellon', na' dan' bi bzollo sen ke be'nn Israel ka'. Na' nna' kone Criston' ba benne' lli'o yel nban, ka naken bazi'xhene' da xhinni kello ka'. ¹⁴Na' bnit yel za'k ke yich dan' xhoa llao xhia kello batna', na' ll-lliayi'llen lli'o. Le Cristo na'n bake'en kan' gote'

359 Colosenses 2, 3

le' yay cruzen'. ¹⁵Na'llen' kan' got Criston' le' yay cruzen', bake'e yel llnebia' ke yeololte biteze da llnebia', na' broe're' be'nnachen' ba bchochj blane'n.

Kwe' yichjllo da nak da za'k rao Dios

¹⁶Bi chejle're ke be'nn ka' lllliayi'll re' kat bi da lle'j llaore, na' be'nn nnechach keré dan' bi llonre txhen no lla lnni, na' be'nn ne ake' be'o lle'n na', llaya'l gonllo lnni, na' no be'nn ne ake' lla ni o lla na' nak aken lla nba'nne. 17 Yeolol da ka' ba bde, bzejnie'n lli'o ra'tze ka nak da za za'a, goken ka to bxenze, zan nna' ba bed Criston', bill naken ka to bxenze le ba nombia'lloe'n. 18 Bi we're latj wlliayi'll be'nn ka' re', be'nn ka' llon ka ra'llda'o nexjra'lle, na' ne ake' llaya'l we'raore no angl, na' gonre bi da nne ake' bre'da'o akre', na' llonxhen kwin ake' kone di'll dan' llarjla'll ake' na'ze. ¹⁹Na' bi llzenay ake' ke Criston', le Le'en nake' yichj kwerpen', na' lli'o nakllo toze, nzap lwellillo ka to kwerp, na' kone Le'en zi'ltipllo, na'll zejze gak gonllo kan' lle'ne Diosen' gakllo.

²⁰Le ka nak ke lli'o nakllo txhen ren Criston', wak nello Criston' ba none' lli'o ka to be'nn wat rao da xhinnjen' nench bi gonllon. Len na' bi llaya'l wzenayllo ke be'nn nne'e billre da gonllo nench sollo nbaraz rao Dios, le bill nakllo be'nn ke yellrio ni. ¿Bixchen nna llzenayzre ke be'nn ka' lla'a rao yellrio ni, llxoa ake' to da zi'i ko'llre? ²¹Ne ake': "Bi go'xre da ni", "Bi ye'j gaore da na'", "Bi kanre da na'". ²²Na' yeolol da ka' llasné ake' ka',

naken da llon llin chollzen', na'll llde ke. Na' dan' ne ake' llaya'l gonllo na', naken to da llarjla'llze lo ra'llda'o leakze'n. ²³ Na' dan' ne ake' llaya'l gonllon, wakte gonllo xhbab naken da si'n, dan' ne ake' gakllo ka be'nn nexjra'llre, na' dan' we'llo latj biteze da sa'kzi'llo, na' gákello wakrenjen lli'o yelwill-llo Diosen'. Zan ka nak da ki, bi zoen gakrenen lli'o bi gonllo da xhinnj.

■ Kan' ben Diosen' basbane' Criston' radj be'nn wat ka', ka'kzen' bache'e lli'o kan' nakllon', na'llen' llaya'l kwek yichjre gonre kan' llawé Criston', be'nnen' llia chla' cha'we kwit Diosen' be'nnen' llia vebá na'. ²Na' lekwek vichire da nak da za'k rao Dios, kere da nak da za'k rao be'nnach yellrio ni. ³Na' dan' nakllo txhen ren Criston'. none' lli'o ka to be'nn wat rao da xhinnjen' nench bi gonllon, na' yel nban kellon' ba nkwe'j Diosen' len kone Cristo na'. ⁴Criston' nake' yel nban kello ke chnare. Na' katen' yede' da yobre, kana' wroe'rao kan' gakllo, dan' gaklloe' txhen katen' ze'e, ren beni' xhen ke'e na'.

Kan' benllo kana' na' kan' llaya'l gonllo nna'

⁵Ke len na' llaya'l kwej yichjllo da xhinnj dan' nen gonllo ren kwerp kellon', ka da ka' zjadé rao yellrio ni, dan' ne: bi wzoallo xtollo, bi gonllo billre da nake yel zdo' ren kwerp kellon', na' bi yewello bi da nak yel zdo'. Bi sera'll-llo gonllo biteze da xhinnj, na' bi sera'll-llo da zan da ga't kello, le da ni leska' naken ka llon to be'nn llonlira'll lwa'a lsa'ke ren yej wzan ake.

Colosenses 3 360

⁶Wllin lla kate we'e Diosen' yel llza'kzi' ke chnare ke be'nn ka' llon ka'. ⁷Renkze re' bzore benre ka da xhinnj ka', kan' bi nna gombia're Xanllo Jesucriston'. 8Na' nna' leska' lekwej yichjre yeolol da xhinnj ki. Bi lla're lwelljre, bi rokre, bi gakre be'nn wen da xhinnj ren lwelljre, bi nnere di'll yel ya' ke lwelljre, na' bi we're di'll zban da ll-llach lloa're. ⁹Na' bill we'rén lwellire di'll wxhiye'e, le ba brej yichjre da xhinni ka' bnebia' re' kana', na' veolol da ka' benre kana'. 10 Re' ba nakre ka to be'nn kob, na' ka to be'nn ba balla'a. Na' nna zej llalla're, na' gakre kan' nak Dios na', le Dios na'n bene' re' kan' nak Le'e na', nench na' re' wak gombia're doxhen kan' nak Le'e na'. 11 Na' bitbi nroe'n cha' nakllo o cha' bi nakllo be'nn Israel, na' cha' zollo sen dan' nzi'i circuncisión o cha' bi zollon, na' bibi nonen cha' nakllo be'nn zi't, na' cha' za'llo ga lla'a be'nn bi llejnie', na' bibi nonen cha' nakllo o cha' bi nakllo be'nn wen llin ke be'nne. Dan' nak da brao. Cristo na' zerene' lli'o, le Le'en ze radj yeolol da nak ke Dios.

¹²Lli'o ba brej Diosen' nakllo rallne'e na' nllie're' lli'o. Ke len na' llaya'l yeya'chra'll-llo be'nne, gakllo be'nn cha'o rao yeolol be'nne. Gakllo be'nn nexjra'lle, na' gakllo be'nn maxh da'o, na' gapllo yel llxhenra'll rao yeolol be'nne.

¹³Na' llaya'l wnitraollo cha' bi da llak kello ren no be'nn lwelljllo, na' yezi'xhenllo cha' bi da ba bene no be'nne lli'o, yezi'xhenllo kan' ben Xanllo na', bazi'xhene' kello. ¹⁴Na' ye to dan' za'kll gonllo ka da ka'

yela', llaya'l llie' lwelljllo nench gakrenen lli'o gakllo toze. ¹⁵Na' yel nbaraz ke Diosen' nnebia'chgan lo yichjra'llda'ore, le ke len na' ba bazenia'ne'e lli'o. Na' gakllo toze ren lwelljllo, na' sotezllo we'llo vel llioxken ke'e. ¹⁶Na' sotezllo kwe' yichjra'llda'ollo xti'll Cristo na', na' leska' wzejnie' lwelljllo, na' wnneyoe lwelljllo ren yel si'n ke Diosen', nench yeolol-llo gonllo da wen. Na' gol-llo xti'lle'n, na' we'raollo Xanllon' lo ra'llda'ollo kon kan' ba bzejnie're' lli'o na', na' billre da nak da we'raollo Dios. ¹⁷Na' biteze da gonllo, na' biteze di'll we'llo, llaya'l gonllon, ni ke dan' ba nombia'llo Xanllo Jesúsen'. na' we'llo vel llioxken ke Diosen' kone ra Xanllo Jesús na'.

Kan' llaya'l gone lwelljllo

¹⁸Re' no're nchayna're, lewzenay ke xhviore, le kan' llava'l gon re' no'r nxenra'll Xanllo Jesucriston'. ¹⁹Leska' re' be'nn byio nchayna'a, lellie' no'r kerén', bi gonre' zid znia. ²⁰Na' re' bida'o ak, lewzenay yeolol bi da nne xaxhna're, le ka'n lle'ne Xanllon' gonre. ²¹Na' re' nake xaxhna' bida'o ak, bi wlokre xhi'nnre ka'. Cha' gonre ka', bi nnen ke akbe' wzenay akbe' keré. 22Re' be'nn wen llin zo xanre, legón kon kan' ne xan llin kerén'. Legonen wen, kere toz katen' ze'e llwie' re' na'ze, nench yeyo'ra'lle' dan' llonre na', zan legonen do ra'llre, legákteze zekze Diosen' llre're' re'. ²³Na' kon biteze da gonre, legonen do ra'llre ka yewé Xanllo Cristo na', kere ka yewé be'nnach. ²⁴Na' nnézkzere kat llin lla, Xanllon'

361 Colosenses 3, 4

gonne' re' da llaya'l si'llo, le xchin Xanllo na' llonllo. ²⁵Na' cha' llonllo da xhinnj, Xanllo Diosen' gonne' yel za'kzi' kello dan' benllo na'. Le Le'en chixhje' yeolol be'nn kon ka da ben ake'.

Na' re' nak xan llin, legone wen be'nn wen llin keré ka', ka llon to be'nn llon da zej lixheje, le leska' re' zo to Xanre be'nn zo yebá. ²Leseteze lewalwill Diosen', legón ka be'nn llnna' yere, na' lewe'e yel llioxken ke'e. ³Lennab rao Xanllo Diosen' gakrene' we'rento' be'nne xti'll Criston', da bi nna chejnie' akre', le ni ke len na' yoa' lo rill ya ni. ⁴Na' lennab rao Dios gakrene' nada' akre we'rena' be'nn ka' xti'lle'n.

⁵Llaya'l sollo gonllo wen ren be'nn bi nna gonlira'll Xanllo, chaga nna de latje. ⁶Na' llaya'l we'llo di'll cha'o di'll nyejnie'ra'lle ren yeolol be'nne, na' gonllo xhbab akre yelli'llo xti'll ake'n.

Pablo llwape' lliox be'nn ka' nombie're'

⁷Be'nn lwelljllo Tíquico ye'e re' yeolol kan' llak kia' na'. Nllie'lloe' le zoe' llakrene' nada' llonto' xchin Criston'. ⁸Ba bse'le' gan' zore na', nench nnézere kan' llak keto'n nench wtipra'lle' re'. ⁹Na' za'rene' Onésimon' txhen be'nn lwelljllo nllie'llo na', be'nnen' nak be'nn wrall keré. Be'nn ki chop we'rén ake' re' di'll yeolol dan' ba llak ganni.

¹⁰ Aristarcon' yo'rene' nada' txhen rill yan' ganni, llwape' re'

lliox. Leska' Marcos be'nnen' nake bi'ch lwellj Bernabé llwape' re' lliox. Na' ba bnekza' kan' llaya'l gónere Marcosen' wen katen' yede' gan' sore na'. 11 Na' leska' Jesús be'nnen' lle ake' Justo, leze llwape' re' lliox. Le zeraoze be'nn ki be'nn Israel llakrén ake' nada', ke nak llyixjwe'ra' yel llnebia' ke Diosen'. Na' da xhen lltipra'll ake' nada!, 12 Leska! belnn wrall kerén! re Epafras llwape re' lliox. Llone' xchin Xanllo Jesucriston', na' yo'y ras kat llalwille' Diosen', llnnabe' kwis wzejnie' Diosen' re', yeolol dan' lle'nre' gonre na', nench seteze sere gonren. 13 Na' nada' nnezera' da li zoe' llalwille' Dios, ni ke re' llonlira'll Criston', re' zjalla'a gan' nzi'i Colosas na', na' yell gan' nzi'i Laodicea, na' yellen' nzi'i Hierápolis. ¹⁴Na' be'nn wen rmellen' re Lucas, be'nnen' nllie'llo, llwape' re' lliox, leska' be'nnen' nzi'i Demas.

¹⁵Na' be'nn ka' lla'a Laodicea na', lewap akgalle' lliox, ren be'nnen' nzi'i Ninfas, na' be'nn ka' lldop rille'n lloe'rao ake' Dios. ¹⁶Na' kat yeyoll wrabre yich ni, lewe'n be'nn ka' lldop ll-llay llonlira'll Criston' gan' nzi'i Laodicea, na' wrab ake'n. Na' leska' lewrab dan' wase'l be'nn Laodicea ka' keré. ¹⁷Na' leyé be'nnen' nzi'i Arquipon', wiachgue' wzerawe' gone' yeolol xchin Dios dan' bro' Xanllo Criston' rallne'e gone'.

¹⁸Kwinkza' nada' Pablo llzoja' ra't da ni, llwapa' re' lliox. Bi ganra'llre nada' gan' yoa' lo rill ya ni. Dios na' gakrenchgue' re'. Ka'n gakchga.

YICH NELL DAN' BZOJ POSTL SAN PABLO KE BE'NN KA' LLA'A TESALÓNICA

Pablo llwape' lliox be'nn ka' nxenra'll Jesucriston' lla'a yellen' nzi'i Tesalónica

Nada' Pablo Ilzoja' re' Ildop Il-llayre Ilonlira'llre Xanllo Jesucriston' gan' nzi'i Tesalónica, na' nakre txhen Xallo Diosen'. Na' nada' ren Silvano ren Timoteo Ilnnabto' rao Xallo Diosen' ren rao Xanllo Jesucriston', gakrén akchgue' re', na' wzoa ake' yichjra'llda'oren' so kwezre nbaraz.

Be'nn Tesalónica ka' broe' akre' llejle' ake' ke Jesucriston'

²Yo'y ras kat llalwillto' Xallo Diosen', lloe'to' yel llioxken ke'e ke yeololre. ³Na' kat llalwilltoe'n, lljasa'ra'llto' yeolol da wen na' dan' llonre, dan' llonlira'llre Diosen', na' dan' nllie're'. Na' lljasa'ra'llto' kan' zechichre bexhre dan' yed Xanllo Jesucriston' da yobre. ⁴Be'nn bi'che, nnézeto' nllie' Diosen' re', na' ba breje' re', nakre rallne'e. ⁵Na' Di'll Wen dan' bzejnie'to' re' ke Jesucriston', kere nnello naken to di'llzen'. Kone Spíritu ke Dios na'n

gokrenen neto' bzejnie'to' re' ren yel wak ke'e na', le nnézeto' di'll dan' bzejnie'to' re'n naken da li. Nnézkzere kan' bento' da wen chak bzorento' re' nench gokrento' re'.

⁶Na' re' zore llonre da wen kan' ben neto', na' kan' ben Xanllo Jesucriston'. Bzenayre di'll be'rento' re' ke Le'e, na' Spíritu ke Diosen' llonen bzore nbaraz llzenayren, la'kze da zan da ba bxha'kzi're bzenayre ke'e. ⁷Na' dan' zore llontezre da wen na', ba bre'e be'nn yell ka' gan' nzi'i Macedonia ren be'nn lla'a gan' nzi'i Acaya kan' llonre na', na' ba nao aklle' llonlira'll ake' Criston', 8 Bxhi'zen gan' zore na', goslas xti'll Xanllo Jesucriston', na' kere be'nn lla'a Macedonia na' ren Acaya na'zen', gateze be'nn ake, ba nnez akre' kan' llonlira'llre Diosen', na'llen' bill yalljen we'to' di'll, akren' gon ake' wxenra'll ake' Le'e. ⁹Na' be'nn zan lloe' ake' di'll ka wen na' benrenre neto' kan' badwiato' re', na' lloe' ake' di'll kan' benre brej yichjre bill llonlira'llre lwa'a keré ka', na' ba llonlira'llre Dios dogarje be'nn

zo ke chras. ¹⁰Na' lloe' ake' di'll zore bezre katen' yetj Xhi'nne' Jesúsen' yebán', yede' yellrion' da yobre, be'nnen' basbán Diosen' radj be'nn wat ka'. Na' dan' llonlira'll-llo Jesúsen', ba basre'e lli'o nench bi sa'kzi'llo kat llin lla.

Dan' ben Pablon' kan' bzoe' Tesalónica

Be'nn prene, re badwiato' re', bi bden ka'ze. Be'nn bi'che, re' nnézere dan' ²Na' nnézkzere kan' bxha'kzi'to' kan' byejto' gan' nzi'i Filipos, na' kan' bzi'chi'll be'nn ka' neto'. Na' Dios na' gokrén neto' nench bi bllebto' bdixjwe'to' Di'll Wen ke'en raore, la'kze be'nn zan bllon ake' chixjwe'to'n. 3Le kan' go'tyoeto' re' wzenayre ke Diosen', bi bzejnie'to' re' krere, ni kere gokra'llto' gonto' da xhinni, ni kere gokra'llto' siye'to' re'. 4Zokzto' lloe'to' di'll kan' lle'ne Dios, be'nnen' bse'l neto' chixjwe'to' Di'll Wen ke'en. Na' ka nak dan' llyixjwe'to'n, kere llontekto' bien nench yewé be'nne, zan nench yewé Diosen' be'nnen' nneze bi yo' lo yichjra'llda'ollon'. ⁵Nnézkzere kan' bento', ni chnia gaze bi nna we'to' di'll wallajllo nench yewere xti'llto'n, na' bi bxhiye'to' re' nench gonnre neto' bi da de keré. Nnezkze kwin Diosen' ka'n naken. 6Na' kere llayirjla'llto' akre gonto' nench gon be'nn neto' xhen na' o gonre neto' xhen, o yezikre be'nn gone' neto' xhen. Na' wak wchie'to' re' gonto' ka wzenayre keto' da bse'l Criston' neto' lloe'to' xti'lle' na', na' bi llonto'n. ⁷Nllie'to' re' ka'kze nllie' to no're xhi'nne' da'o ak llasgore'. ⁸Na' dan' nllie'to' re' na', be'rento'

re' Di'll Wen ke Diosen'. Na' kere da na'ze da bento', leska' bsanra'll kwinto' bento' ga zerao bxha'keto' nench gokrento' re', le nllie'to' re'. ⁹Be'nn bi'che za'ra'llkzere kan' bzorento' re', bento' llin kwis ga zerao bzoeto'. Bento' llin do lla do yere nench bibi gaxt bzoato' re', chak badtixiwe'to' re' xti'll Diosen'.

10 Renkzren' nnézere na' ren Diosen' nnezre', kan' bzorento' re', bzoto' do ra'llto' radj re' llonlira'll Jesucriston'. Bento' kan' llazra'll Diosen' nench nono bne napto' do'le. 11 Nnézkzere kan' go'tyoeto' re' gonre da wen na', kan' btipra'llto' re'. Bento' ka llone to be'nne xhi'nne'. 12 Na' gollto' re' gonre da wen kan' llaya'l gon lli'o nakllo rao na'a Diosen', le ba breje' lli'o nench nnebia'renlloe', na' nench gone' gak wen kwis kello katen' lljazorenlloe' gan' llie' na'.

13 Ke len nat zoteze zotot lloe'to' yel llioxken ke Dios dan' ba bzenayre xti'lle' na', kan' bdixjwe'to'n re'. Zakbe'kzere bi naken xti'll be'nnach, naken xti'll Dios dan' lloe'to' na'. Na' xti'll Dios dan' lloe'to' na', llejle're na' llcha'n xhbab da yo' lo yichjra'llda'oren'. ¹⁴Be'nn bi'che, ba gok keré kan' gok ke be'nn ka' lldop ll-llay llonlira'll ake' Xanllo Jesucriston' gan' nbane Judea na'. Bsa'kzi' be'nn wrall ke ake' ka' leake', na' ka'kzen' basa'kzi' be'nn wrall kere ka' re'. ¹⁵Na' be'nn wrall ke ake' ka', baso't ake' Xanllo Jesúsen', na' ka'kze ben akre' be'nn ka' be'rén leake' xti'll Diosen' kana'. Na' leska'n ben akre' neto' baraydo ake' neto'. Na' lla'a ake' llon ake' da bi llazra'll Diosen', na' llwie akre'

yeolol be'nnach, ¹⁶le ll-llon ake' wzejnie'to' yezikre be'nne bi da llaya'l gonllo nench yerallo rao da xhinnjen'. Na' lla'teze lla'a ake' llon ake' ka', na'll llzan aklle' do'l ke ake'n, ke len na' ba llsa'kzi' Diosen' leake'.

Pablo lle'nre' lljawie' be'nn ka' lla'a Tesalónica da yobre

¹⁷Neto', be'nn bi'che, la'kze ba baza'to' gan' zoren', na' bill llre'e lwelljllo, dekz de lljadinra'llto' re', na' zera'llto' kwis yedwiato' re' da yobre. ¹⁸Na' to chop ras gokra'lla' yeda', na' daxi'o na' bi bennen latje. ¹⁹Llaweto' llonre wen, ke len na' zoto' bexhto' soto' nbaraz kat yed Xanllo Jesucriston' da yobre, Le'e yewere' dan' bzejnie'to' re' llzenayre ke'en. ²⁰Da li re' llonre nench llaweto' na' nench zoto' nbaraz.

Na' bill bzoeto' dan' bill llre'e lwellillo na'. Na' bachoyra'llto' yega'nnto' gan' nzi'i Atenas. ²Na' bse'lto' be'nn lwelljllo Timoteon' gan' zore na'. Na' Timoteo na' llone' xchin Diosen', na' llonrene' neto' txhen llyixjwe'to' Di'll Wen ke Criston'. Na' bse'ltoe' badye'tyoere' re' bi soya'chre, na'llen' badwie' re' nench sechichre gonlira'llre Criston'. ³Bse'ltoe' gan' zoren' nench ni tore bi gak débere bixchen ll-llayraore. Nnézkzere lli'o llonlira'll-llo Criston', llaya'le sa'kzi'llo yellrio ni. 4Kan' bzorento' re' na', bzéneto' re', dekz de tello vel llza'kzi', na' nna' llwiare ba llak kan' bneto'n. ⁵Na' bi bxhenra'lla', le bi nna nnezra' akre llakre, na'llen' bse'la' Timoteo na', gan' zoren'

nench nnezra' cha' do ra'llren' llonlira'llre Criston'. Le bena' xhbab gokra' cha' daxi'o na'n ba bzoen bxhiye'n re', na' benre'n re'. Le cha' ba bzoen benre'n re', ba bendadto' xchin Diosen' radjre na' chet ka'.

⁶Na' nna' bara' Timoteon' ba bede' gan' zore na', na' ba be'rene' neto' di'll xhen raz, bne'e zokzre llonlira'llre Criston', na' nllie're yeolol be'nne. Na' leska' ne'e lljadinra'llre neto', na' zera'llre re're neto', leska'kzen' zera'll neto'. ⁷Ka'n naken be'nn bi'che. ll-llayraoto' na' biteze za'kzi'to', na' ba bayakxhenra'llto', ba bnnézeto' zoteze zore llonlira'llre Criston'. ⁸Di'll likze nbaraz zoto', le zechichre llonlira'llre Xanllo Cristo na'. ⁹Na' ke len na' llaweto' rao Diosen' kan' llonren', na' ka' zetezto' lloe'to' yel llioxken ke'e kan' llonre na'. ¹⁰Na' llalwilltoe' do lla do yere, llnnábetoe' gone' yedil yellay lwellillo da yobre, nench wzejnie'lleto' re' akren' llaya'l gonre nench wxenra'llva'nnre.

11 Na' llnnábeto' Xallo Diosen' ren Xanllo Jesucriston' gakrén akchgue' neto' yedwiato' re'. 12 Na' llnnábeto' Xanllon' gone' llie'lle lwelljre, na' gone' llie'llere yeolol be'nnach ka'kzen' nllie' neto' re'. 13 Llnnabkzto' gone' sechichre gonlira'llre', na'llen' gak ra'llda'oren' yall rao Xallo Diosen', na' bibi do'l xhia gapre katen' yed Xanllo Jesucriston' da yobre, na' nche'e yeolol be'nn ka' ba brej Diosen' nak ake' rallne'e.

Pablon' bzejnie're' kan' lle'ne Diosen' so kweze be'nne

Mna' be'nn bi'che, ba broe' bsédeto' re' gonre kan' llazra'll

Diosen', na' ba naore llonren'. Kan' ne Xanllo Jesúsen', lla'tyoeto' re', nnaollre gonre dan' llazra'll Diosen'.

²Ba nnézkzere bi ka da ka' blliato' bia'a gonren', na' nak aken dan' ne Xanllo Jesús na'. ³Diosen' lle'nre' soteze sollo gakllo be'nn ra'llda'o yalle. Bi lle'nre' lljatil-llo no're bi nak no'r kello o cha' no're lljatile' be'nne bi nake xhyiwe'. ⁴Lle'ne Diosen' nneze totore kan' llaya'le sorén xho'r-re, bibi do'l gapre, na' gone lwellire ka to be'nn za'ke. ⁵Bi gonre kan' llon ak be'nne bi nombia' ak Dios, kon llzorén ake' noteze no're choll weje, na' llon ake' kan' llza'ra'll lo ra'llda'o ake' na'. ⁶Ni to re' bi gonre da bi llaya'l gonre, siye'rizre no be'nn lwelljre, na' sorenre no'r ke'e. Bakze be'rento' re' di'll kan' basníseto' re'. kan' gon Xanllo Diosen' da sa'kzi' be'nn llon ak yeolol da xhinni ka' nak ka da ki. ⁷Diosen' breje' lli'o nench gakllo be'nne ra'llda'o yalle, kere nench gonllo da xhinni ki. ⁸Na'llen' cha' re' bi llzoare di'll ke da ki ba bzejnie'to' re', kere xti'll be'nnachen' bi llzoare, xti'll Diosen' bi llzoare. Le'en benne' lli'o Spíritu ke'en.

⁹Bi llonen bien wzoja' re', kan' llaya'le llie' lwellj lli'o be'nnach gonlira'll-llo Jesucriston'. Dios na'n ba bzejnie're' re' nench llie' lwelljre. ¹⁰Na' da li ba nllie're yeolol be'nne lwelljre ka', zjalla'a doxhen gan' nzi'i Macedonia. Nna' lla'tyoeto' re' be'nn bi'che, lellie' akllre'. ¹¹Na' totore leyeyirjla'll bi llin gonre, nench na' so kwezre kwasro kan' nlliato' bia'a na', na' bi tare wiare bi llaso'n be'nn yobre. ¹²Legón kan'

ba bnia' na', nench gakbe'e be'nn ka' bi non lli'o txhen llonkzre wen, na' len gakrenen re', bibi yálljere da gonrenre llin.

Dan' gak kate yed Criston' da yobre

13 Lle'neto' nnézere be'nne
bi'che, kan' gak ke be'nn
benlira'll Jesucriston', na' ba got ake'. Lle'neto' nnézere nench ke soya'chre, kan' llon be'nne bi llone rez cha' yere'e rao da xhinnjen'.
14 Llonlira'll-llo got Jesúsen', na' babane' radj be'nn wat ka'. Na' lekze llonlira'll-llo Diosen' gone' nench Jesúsen', kat yede' da yobre, zanche'e be'nn ka' ba got benlira'll Le'e yellrio ni.

¹⁵Na' llzéneto' re' di'll ni, naken dan' bsede Xanllo Jesúsen' lli'o. Cha' nna nbanllo kat yede' da yobre, bi nnello yoblle kwiaraollo kerke be'nn ka' ba wasa'te. 16 Na' ka nake Xanllo Jesúsen' kwine'n yetje' le' yebán', na' nne'e zillje, na' to angl brao na' nne'e, na' yénello kwell trompet ke Diosen'. Na' be'nn ka' wasa't benlira'll ake' Criston', zga'tek leake' yebán ake' radj be'nn wat ka'. ¹⁷Yeyoll na', lli'o llonlira'lllloe', cha' nna nbanllo yellrio ni, gon Diosen' yeyeprén aklloe' txhen le' yebán' lo bej ka', na' yellayllo Xanllo Jesúsen' le' yebá na'. Na' lliazorenlloe' ke chnare. ¹⁸Ke len na' lewasnise lwelljre kan' gak na'.

Be'nn bi'che, bill llonen bien wzoja' wzenra' re', bi lla yed Xanllo Jesúsen' da yobre. ²Ba nnézkzere kwasro kat llin lla, yed Xanllon' ka ke to be'nn wan, be'nn dá tlle'lre. ³Kat nne no be'nn ak: "Nbaraz zollo bibi

llak kello", kat llinkze lla kweyi' ake'. Ka llak ke to no're llak bes so bida'o ke'e, ka'kzen' gak ke ake', bi gak wxhonnj ake', na' kweyi' ake'. 4Na' lli'o be'nn bi'che, bi nchole yichjra'llda'ollon', na'llen' bi gak kello ka ke to be'nn lljaran ake' bi da de ke'e. ⁵Na' nombia'llo Diosen', na' beni' ke'en ba llseni'n kello ka ke be'nn dá tella, na'llen' bi nchole yichira'llda'ollon'. ⁶Ke len na' bi llaya'l gatra'll-llo ka llon be'nn yobre, na' sollo gonllo kan' llazra'll Dios na'. ⁷Le be'nn ka' lltas. tlle'len' lltas ake', na' be'nn ka' llzolle, tlle'len' llzoll akre'. ⁸Zan ka nak lli'o nakllo ka be'nne dá tella. Llava'l sollo gonllo kan' llazra'll Diosen'. Llaya'l gonlira'll-lloe', na' llie' lwellillo, na' yewello dan' nnézello yesrá Diosen' lli'o. Cha' gonllo yeolol da ka', gakllo ka be'nn waka'a ya, be'nne nake to de ya da nkwe'j le'e, nench bibi gakre' kat cheje' rao wdile. ⁹Kere nbej Diosen' lli'o nench sa'kzi'llo ke do'l kello na'n, nbeje' lli'o nench gonlira'll-llo Xanllo Jesucriston', na' yerallo rao da xhinnjen'. ¹⁰ Jesucriston' bzane' yel nban ke'e, baso't ake' Le'e ni ke lli'o, nench yellinllo gan' llie' na', la'kze nna nbanllo o cha' ba gotllo kat yede' da yobre. 11 Na'llen' legón kan' ba llonkzre, na' leserén lwellire, na' legakrenlle lwellire, nench na' sotezre gonlira'llre Jesucriston!.

Pablon' bzejnie're' be'nn ka' llonlira'll Jesucriston' kan' llaya'l gon ake' na'

¹²Be'nne bi'che, lla'tyoeto' re', gapre bara'nn be'nn ka' llon xchin

Xanllo Jesucristo na', le leake'n llwia llyi ake' re', na' llzejnie' akre' re'. ¹³Llaya'l gap akre' bara'nne, na' llie' akere' ka llin na' llaso'n ake'n. Na' sorén lwelljre kwasro.

¹⁴Ka'kzen' lla'tyoera' re', be'nn bi'che, letil be'nne bi lle'ne gon ak llin, lewpé be'nne llatra'lle, na' lewzejnie' be'nne bi nna chejnie' da nak da llaya'l gon ake'. Na' lesó legape yel llxhenra'll ke yeolol be'nne.

¹⁵Cha' bi da llone be'nn re', bi wayechjre yedilrén le'e. Na' lennao legón da wen ren lwelljre, na' lekze ka' lennao, legón da wen ren noteze be'nne.

¹⁶Lesoteze lesó leyewé. ¹⁷Lesoteze lesó leyelwill Dios. ¹⁸Lewe'e yel llioxken ke Dios biteze da llak keré, le ka'n lle'nre' gon lli'o llonlira'll-llo Xanllo Jesucriston'.

¹⁹Bi wllonrizre gon Spíritu ke Diosen' dan' lle'nre' gone keré. ²⁰Bi gónere kaze di'll da we'e be'nne lloe' di'll da ba goll Diosen' le'e. ²¹Na' lewiaya'nn ke di'llen' lloe' ake'n, na' sore wzenayre da ka' nak da wen. ²²Lekwe'yi'll biteze da nak da wlleyi' re'.

²³Dios na' llone' ka zo bezllo kwasro kone xhbab kello yo' lo ra'llda'ollo. Na' llnnaba' gone' gak lo ra'llda'oren' yalle. Na' leska' gonchgue' bibi da xhinnj gonre lo yichjra'llda'ore, ni kwerp keré, nench na' bibi xhia keré ga't kat yed Xanllo Jesucriston' da yobre. ²⁴Dios be'nnen' ba brej lli'o nakllo rallne'e llone' kon da ba bne'e, ke len na' gone' lli'o gak ra'llda'ollon' yalle.

Pablon' bnnabe' gakrén Diosen' be'nn Tesalónica ka'

²⁵Be'nn bi'che, lesó lennab gakrén Diosen' neto'. 367 1 Tesalonicenses 5

²⁶Na' kat ga yellay lwelljre, lewno'p na'a lwelljre, na' wroe'n nllie' lwelljre.

²⁷Llnnabra' re' wrabre yich ni, nench yene be'nne lwelljre ka' zjalla'a gan' zore na', le ka'n lle'ne Xanllo Jesucriston' gonre. ²⁸Na' sochga Xanllo Jesucriston' gakrenchgue' re'. Ka'n gakchga.

YICH WLLOPE DAN' BZOJ POSTL SAN PABLON' KE BE'NN KA' LLA'A TESALÓNICA

Pablon' llwape' lliox be'nn ka' nxenra'll Jesucriston' lla'a vellen' nzi'i Tesalónica

Nada' Pablo llzoja' re' lldop ll-llayre llonlira'llre Xanllo Jesucriston' gan' nzi'i Tesalónica, na' nakre txhen Le'e, na' ren Xallo Diosen'. ²Na' nada' ren Silvano, na' Timoteo, llnnabto' rao Xallo Diosen', na' rao Xanllo Jesucriston' gakrén akchgue' re', na' wzoa ake' yichjra'llda'oren' so kwezre nbaraz.

Diosen' we'e da wsa'kzi' be'nn llon da xhinnj

³Be'nn bi'che, neto' llaya'l soteze soto', we'to' yel llioxken ke Dios kan' llonre na'. Ka'n llaya'l gonto' we'to' yel llioxken ke'e, dan' nna zjazellre llonlira'llre Diosen', na' zjazellre nllie' lwelljre. ⁴Len na' llaweto' lloe'to' xti'llren' ren yezikre be'nn ka' ba brej Diosen' lldop ll-llay ake' llon ake' Jesucriston' xhen ga yobre. Lloe'to' di'll ka wen na' llonre llonlira'llre Jesucriston', la'kze da zan da llsa'kzi' be'nn re'. ⁵Ke len na'

nnézello Diosen' zeje' lixheje, na' lloe' latj sa'kzi're nench yedo'lere yebá gan' llie' llnebie' na'.

⁶Diosen' zeje' lixhej dan' we'e yel llza'kzi' ke be'nn ka' llsa'kzi' re', ⁷na' gonne' yel wazi'ra'll keré, na' ka'kzen' gonne' keto', ka da ka' za'kzi'llo nna'. Gonne'n katen' re'llo yetj Xanllo Jesúsen' le' yebá na', ren angl ke'e ka', be'nn ka' nsa'a yel wak. ⁸Yetje' nechje' bel yi'. Na' we'e yel llza'kzi' ke be'nn ka' bi llayombia' Dios, na' bi llejle' ake' Di'll Wen dan' llzeinie' ke Xanllo Jesucriston'. 9Leake'n sa'kzi' ake' ke chnare, ni ke yere'e akzre' Xanllo Jesucristo, be'nnen' le zeraoze za'ke nape' yel wak xhen. ¹⁰Katen' llin lla yed Jesucriston' da yobre, lli'o llonlira'll-lloe' nakllo rao ne'e, wroe'llo nake' be'nn za'k xhen, na' yebánello ka yel be'nn wen ke'en. Na' nakto' txhen ren re', dan' ba llejle're ka di'll dan' ba be'rento' re' na!.

¹¹Na'llen' zoteze zoto' llnnabto' rao Diosen' gakrene' re', gonre wen nench yewere' re', re' ba breje' nench nakre rallne'e. Na' llnnabto' gakrene' re' kone yel wak ke'e na', nench na' wayoll gonre yeolol da wen dan' ba bchoyra'llre gonre, dan' llonlira'llre na'. ¹²Llnnabto' gonre gak Xanllo Jesucriston' xhen, rao biteze da gonre, na' Le'e gone' gakre xhen, le Dios kello na', ren Xanllo Jesucristo na', zo akse' llakrén ake' re'.

Chas be'nn bi wzoa xti'll Dios

Be'nn bi'che, nna' da yobre nia' re' kan' gak katen' yed Xanllo Jesucriston' da yobre, yetope' lli'o lljazorenlloe' txhen. ²Bi wxoayay ake' re', cha' no yede' yedye'rene' re' di'lle, siye'e ne'e Spíritu ke Diosen' nen, ba bllin lla yed Jesucriston' da yobre. Na' bi xoayayre cha' bi da yénere, cha' ra' no yich da nyoj di'll wenra'lle nen da bse'l neto'n, siye'n nen ba bllin lla yed Jesucriston' da yobre. ³Bi we're latj no siye'e re', cha' bi nne ake' o cha' bi da gon ake'. Le kate za yed Xanllo Jesúsen' da yobre, be'nn zan chas wie akre' Diosen'. Leze kana' lloj to be'nn xi'o, be'nn bi wzoa xti'll Diosen'. Be'nn na'n ba naken yeyeje' lo yi' gabil. 4Gake' be'nn ya'ra'lle, na' wiere' da nak ke Diosen', leska' wiere' biteze da llonlira'll be'nne. Na' lljachie' lo yoda'o ke Diosen' ga ye'nre' gake' xhen, na' ye'nre' gone' ka Dios, na' kwinze nne'e: "Dios nada'", nench gon be'nn zan le'e xhen.

⁵¿Bi za'ra'llre kan' bzorena' re', na' bzejnie'ra' re' kan' gak kat yed Jesucriston' da yobre? ⁶Nnézkzere bi dan' ll-llon lloj be'nn xi'on be'nn wxhiye'n, ke nake nna', bi nna llin lla lloje'. ⁷Na' ba zjani't be'nn bi llzoa xti'll Diosen' nna', na' nna nga'ch da ka' llon ake'n. Zan llin lla bill so dan' wllon na'. ⁸Kana'llen' lloj be'nn xi'on, be'nnen' bill wzoa xti'll Diosen'. Na'llen' yed Xanllo Jesúsen' nse'e beni' xhen na', na'll we'e Xanllon' di'll, na' kone be dan' lloj lloe' na', gote' be'nn xi'on. Ka'n gone' yenitrawe'n. ⁹Na' kat wroe'rao be'nn xi'on, kone yel wak ke daxi'o na', gone' da yebane be'nne nench wxoayaye'n leake'. 10 Yeololte da xhinni gone'n, wxoayaye'n be'nn ka' ba naksen kweyi' ke chnare. Kweyi' ake', le bi gokra'll ake' chejle' ake' di'll li na', nench na' yerá ake'. 11 Na'llen' we'e Diosen' lati sive'n leake', nench na' we'rao ake' di'll wenra'lle. ¹²Na' sa'kzi' ake' ke chnare, le bi byejle' ake' di'll li ke Xanllon', bawé akllre' zre da xhinnj na'.

Diosen' llbeje' be'nn yerá ake'

13 Be'nn bi'che, nllie' Xanllo Jesucriston' re'. Na' neto' llaya'l soteze soto' we'to' yel llioxken ke Diosen' dan' breje' re', na' re' gokre be'nn nell bxenra'llre Criston' nench na' yerare. Na' ka' gok, le byejle're di'll li ke Diosen', na'llen' bse'le' Spíritu ke'en nench gakre be'nn ra'llda'o yalle. 14 Ni ke len na' brej Diosen' re', le byejle're Di'll Wen ke Jesucristo na', dan' be'rento' re', na'll wllin lla gon Diosen' sore nbaraz kwis gan' zo Xanllo Jesucristo na'.

¹⁵Ke len na', be'nn bi'che, lesé war, lewzenay do yichj do ra'llre ka da ka' bzejnie'to' re', kan' be'rento' re' xti'lle'n, na' da ka' bzojto'. ¹⁶Xallo Diosen' nllie're' lli'o. Kere da te ke

dan' bene' nench bayonxhenra'lle' lli'o, na' sollo wxenra'll-lloe' gone' wen kello, le nllie're' lli'on. ¹⁷Na' llnnaba' rao kwin Xanllo Jesucristo, na' ren Xallo Diosen', gakrenchgue' re' nench yeolol dan' gonren', na' di'llen' we're na', gak aken wen.

Bnnab Pablon' yelwill ake' Dios gakrene' le'e ren be'nn lwellje' ka'

Nna' be'nn bi'che, yelwillchgare Diosen' gakrene' neto', nench na' yob lljadixjwe'to' xti'll Xanllo Jesucriston' doxhente. nench na' chejle' yezikre be'nne, na' gap ake'n bara'nne, kan' ba ben re'. ²Lekze lennabchga rao Diosen' vesre'e neto' rao be'nn ka' llwie lli'on, be'nn ka' nao da llon krere. le kere yeolol be'nne llonlira'll Jesucriston'. 3Xanllo Jesucriston' zokze' llone' ka dan' ne'e gone', na' gakrene' re' nench sechichre gonlira'llre'. Lekze wkwas wkwe'je' re' rao da xhinnjen'. ⁴Na' nxenra'llto' llakrenkze Xanllon' re', na' llonre dan' ba gollto' re' gonren', nench na' nni'ttezre gonren. ⁵Na' llnnaba' rao Xanllo Jesucriston' gakrene' re', nench gombia're yel nllie' ke Diosen', na' yel llakxhenra'll ke Criston'.

Llaya'l gon ake' llin

⁶Be'nn bi'che, llyixjwe'to' re' kan' ne Xanllo Jesucriston', bi llaya'l gonre txhen be'nn lwelljllo ka' be'nn ka' bi lle'ne gon llin, le bi llon ake' ka dan' broe' bsed aketoe' na'. ⁷Benkz neto' llin kan' bzorento' re', na'llen' nnézere kan' llaya'l gonre na'. ⁸We'e bdaokze keto', bllayraoto'

bento' llin do lla do yere nench we'j bdaoto', na' bibi bnnábeto' re' bi da byálljeto' gonrento' llin. ⁹Naksen nnábeto' re' da ye'j gaoto' chenake chak bento' xchin Diosen' gan' zore na', na' bi bento' ka', na' ka' broe'to' re' kan' llaya'l gonre na'. 10 Kan' bzorento' re' bchoybia'to' bneto': "Cha' no bi gon llin, bi llaya'l gawe'." 11 Na' nna' ba béneto' di'llen', llasné ake' balre bibi llin llonre, kon dare, na' llawere di'lle. ¹²Na' cha' nol re' llon ka', lla'tyoera' re', na' llasnisra' re', gonre kan' ne Xanllo Jesucriston', na' bill tare ka', leyezorao chaze leyeyón llin nench ga't da ye'j gaore.

¹³Na' re' be'nn bi'che, bi lljachie're gonre da wen na'. ¹⁴Na' cha' no be'nn bi llazra'lle' ka dan' ba bzojto' ni, lewiaya'nne non' llon ka', na' bill gonrenre' txhen nench waye're' kan' llone' na'. ¹⁵Zan bi wiere', lewzejnie're' di'll kwasroze, le nake' be'nn lwelljre.

Pablon' bnnabe' rao Diosen' gakrene' be'nn Tesalónica ka'

¹⁶Nna' llnnaba' rao Xanllo Jesucriston', be'nnen' nzoa lli'o so kwezllo kwasro lo yichjra'llda'ollo, gonchgue' so kwezre nbaraz yeo lla biteze da llak. Na' llnnabra' Le'e serenchgue' yeololtere.

¹⁷Na' nada' kwinkza' Pablo llzoja' ra't da'o le' yich ni, llwapa' re' lliox kan' llonkza' le' yeolol yich ka' dan' llse'la', llona'n kone ta'ka' ni, nench nroe'n nadkza'n llse'la'n, le ba nombia'kzre ka di'll ka' llzoja'n. ¹⁸Xanllo Jesucriston' gakrenchgue' yeololtere. Ka'n gakchga.

YICH NELL DAN' BZOJ POSTL SAN PABLON' KE TIMOTEO

Pablon' llwape' lliox be'nnen' nzi'i Timoteo

Nada' Pablo Ilzoja' yich ni, ko'o rwe' Timoteo naka' postl ke Jesucristo, le Dios na' ren Xanllo Jesucristo na', brej ake' nada' gona' xchine'. Dios na' nake' wasrá kello, na' Xanllo Jesucriston' nake' be'nn bexhllo yesre'e lli'o. ²Llzoja' rwe' Timoteo, rwe' nako' ka dogarje xhi'nna', le bzejnie'ra' rwe' llonlira'llo' Cristo na'. Na' llnnaba' so Xallo Diosen' ren Xanllo Jesucriston', gakrén akchgue' rwe', na' yeya'chra'll ake' rwe', na' wzoa ake' yichjra'llda'o so kwezo' nbaraz.

Zjani't be'nn lloe' di'll wenra'lle

³Kan' bza'a Éfeson', bya'a gan' nzi'i Macedonian', go'tyoera' rwe' nench go'yo' Éfeson', na' wia'o nench ke wzejnie' be'nn ka' di'll da nak da wxhiye'e. ⁴Na' bi wzenay ake' di'll da bi llayoll lladó, ke da ben xozxta'o ake' ka'. Le ka nak di'll ki kon llonllejla'llen be'nne, na' bi llakrenen leake' gon ake' ka dan' bro' Diosen' rao na'a lli'o llejle' xti'lle' na'.

⁵Lla'tyoera' llepa' re' ka', le lle'nra' nni'tllo llie' lwelljllo ka llon be'nn nak ra'llda'o yalle, llaya'l gonllo dan' nnézello nak wen yeo ras, na' llaya'l chejle'llo di'll li ke Diosen' do yichj do ra'll-llo. ⁶Bal be'nn ka' ba brej yichj ake' di'll li na', na' lloe' ake' di'll da bibi za'ke. ⁷La'kze lle'n akre' wzejnie' akre' ley dan' bzoj da Moisésen', ni ke llejnie' akzere' di'llen' lloe' ake'n, na' ni ke llejnie' akzere' da ka' ne ake' llaya'l gonllon'.

⁸Nnézkzello ley na'n nak wen kon cha' gonrenllon llin dogarje. ⁹Na' nnézkzello bi ll-lliayi'll leyen' be'nn ka' llon da wen, zan ll-lliayi'llen be'nn ka' llon da xhinnien', ren be'nn bi llzoa di'll dan' ba llia bia'a gonllo. Leska' ll-lliayi'llen be'nn ka' bi llzoa xti'll Diosen', be'nn zoteze zoe' llone' da xhinnj, be'nn bi llape Diosen' bara'nne, na' bi llonlira'lle Le'e, be'nn llayot xaxhne'e, na' yezikre be'nn wen xhia. ¹⁰Leska' be'nn lljatile no'r yobre none' le'e xtoe' o no'r lljatile be'nn bi nak xhyiwe', na' be'nn lljatile be'nn bxheje, na' be'nn llban be'nn, na' llje'te' leake', na' be'nn ka' ziye'e, na' be'nn lloe' di'll wenra'lle do rao koxchis nench gone' gan, na' nollre be'nn llon da zej krere rao di'll da

1 Timoteo 1, 2 372

ba bzejnie' Diosen' lli'o. ¹¹Na' Di'll Wen dan' bzejnie' Diosen' za'ken, na' Dios nak la'y na', ba broe'n rallna' chixjwe'ra'n be'nne.

Lloe' Pablon' yel llioxken ke Diosen' ren ke Jesucristo

12Lloa'a yel llioxken ke Xanllo Jesucristo be'nnen' lltipra'll nada' llyixjwe'ra' xti'lle'n. Llioxkene'n llakre' nada' gona' xchine' kan' lle'nre' na', na' ke len na' breje' nada' gona'n. 13 Brejkze' nada' gona'n la'kze bwiera' di'll bia'a ke'en kana', na' bdilrena' be'nn llonlira'll Le'e, na' la'kze bena' ka', baya'chra'llkze Diosen' nada', le bi nna chejnie'ra' kana', na' bi nna gakbe'ra' cha' kreren' llona'. 14 Na' Xanllo Jesucriston' nllie're' nada' kwis, na' gokrene' nada' nench benlira'lle', na' nllie'kzre'.

¹⁵Da nin' naken to di'll li da za'k chejle'llo: Xanllo Jesucriston' bede' yellrio ni, nench basre'e lli'o be'nn wen da xhinni, na' ka' nada' naklla' be'nn le zeraoze byan xto'le. 16 Na' la'kze naka' le zeraoze be'nn wen da xhinnj, baya'chra'llkze Jesucriston' nada', bazi'xhene' kia' nench na' broe're' nape' yel llxhenra'lle. Ka'n bene' nench gakbe'e be'nn za za'k, Le'en nape' yel llxhenra'll xhen nench gonlira'll ake' Le'e, na' ga't vel nban zeilikane ke ake'. 17 Llava'l we'raollo Dios be'nnen' nake' be'nn wnebia' kello ke chnare. Kere be'nn te ke'en, zokze' la'kze bi llre'lloe', le Le'en zeraoze nake' be'nn si'n. Toze Le'en gonllo xhen, gaplloe' bara'nne ke chnare. Ka'n gakchga.

¹⁸Xhi'nna' Timoteo, brek yichjo' ke di'llen' be'e be'nn ka' bzene rwe'

kan' bne Diosen' ko'o kana'. Na' kan' ba goll ake' rwe' gono' xchin Dios na', lekze ka'n llepa' nada' rwe' gono'n do yichi do ra'llo', na' bi gakzedro' gono'n. 19 Bzechich, benlira'll Xanllo Diosen', na' bzoteze benen, nench na' gakbe'e lo ra'llda'on bitbi da xhinni llono'. Bal be'nne llon akse' da xhinni, la'kze cha' nnez aktere' bi llaya'l gon ake'n, leake'n ba blleyi' bill llonlira'll ake' Dios. ²⁰Ka'n gok ke be'nnen' nzi'i Himeneo na' ke Aleiandro. Ke len na' ba bnnaba' rao Dios gak ake' rao na'a dan' llnebia' daxi'o ka', na' gonen leake' ka lle'nen, na' wsed ake' bi llaya'l tilrén ake! Dios.

Bi da ka' llaya'l nnábello Diosen' kate llalwill-lloe'

Da na' nake marao xuen gon lli'o nxenra'll Diosen': llaya'l Da na' nake lliarao xhen gon nnábello Diosen' gonne' da válljello, na' nnabllo gakrene' yeolol be'nne, na' we'llo yel llioxken ke'e, ka nak da wen na' llone' kello. ²Na' llava'l nnabllo ke no wnebia' brao ak, na' ren no be'nn wnebia' zerén re'. nench na' so kwezllo kwasro, na' nono wllon wxenra'll-llo Diosen'. leska' nono wllon billre da lle'nello gonllo da llaya'l gonllo. ³Da ni naken wen, na' ka'n llazra'll Diosen', be'nnen' nak wasrá kello. ⁴Le Le'en lle'nre' yerá yeolol be'nne rao da xhinnjen', na' lle'nre' chejnie' akre' di'll li ke'e na'. ⁵Toze Diosen' nake' be'nnen' za'k wxenra'll yeolol be'nne, na' lekze toze be'nnen' zo llde xti'll-llon' rao Diosen', Le'en re Jesucriston' be'nnen' gorje goke' be'nnach. ⁶Jesucristo na' be'e latje

373 1 Timoteo 2, 3

gote' ni ke da xhinnj ben yeolol be'nnach, na' ka bllin lla bllia Diosen' bia'a, kana'llen' bnneze be'nnach kan' bene' kellon'. ⁷Na' Diosen' breje' nada' naka' postl, nench llsedra' be'nne xti'lle'. Lloa'a di'll li, bi ziya', le txhen na' naka' Criston', breje' nada' nench llzejnie'ra' be'nn bi nake be'nn Israel di'll li ke'en, nench wxenra'll ake' Le'e.

⁸Na' dan' lle'nra' gak doxhente, yedop yellay be'nn ka' yelwill ake' Dios, gak ake' be'nn ra'llda'o yalle, nench wlis na'a ake'n rawe', na' bi gaklla'a ake' be'nne, na' bi wchachrén ake' be'nne. 9Na' ka nak no'r ka' llonlira'll Jesucriston'. llaya'l gak xhara'ne da nla' xhej de bara'nne, ka llon be'nn zej lixheje, kere te aktere' yeyón yich yichj ake'n nbaraz, na' wllia akrize' ya cha'o dan' nzi'i oro o de yej cha'o dan' nzi'i perla, na' ra'll xha da za'k lsa'ke gore. 10 Zan llaya'l gon ake' da wen kan' lle'ne Diosen' gon ake'. kan' llon no'r be'nn nxenra'll Le'e. ¹¹Leska' no'r ka' llaya'l so ake' llize wzenay ake' ke be'nn llroe' llsede xti'll Diosen', gon ake' kon kan' ye ake' leake'. 12 Nada' bi lloa'a lati wzejnie' no'r ka' be'nn byio, na' bi lloa'a lati nnebia' ake' be'nn byio ka'. Llaya'l so ake' llize. 13 Le kate ben Diosen' be'nnach, zga'tek Adán na' bene', na' za benre' Eva na'. ¹⁴Na' daxi'on kere bxhiye'n Adán na'n, Eva na'n bxhiye'n nench bene' da'n nllon Diosen' gone', na'llen' bavake' be'nn wen da xhinnie. ¹⁵Na' la'kze no'r ka' llzo xhi'nn ake' za'kzi' ake', yerá ake' cha' nni'tteze nni't ake' wxenra'll ake' Diosen', na' llie' akre' Le'e, na' cha' nni't ake' gon ake' kan' llazra'll Diosen', na' gon xhira'll lo yichira'llda'o ake'.

Kan' llaya'l gon be'nn ka' llwia llyi yezikre be'nn llonlira'll Dios

De to di'll li da ne: Be'nn lle'ne wia wyi yezikre be'nn nxenra'll Dios, da wenkzen' llwie' gone'. ²Na' be'nnen' lle'nre' wlane' gone' llin dan' nak ka', llaya'le' soe' gonteze' da wen yeo lla bibi gonkze' da til-lloe'. Na' llaya'l so toze no'r ke'e, na' llaya'l gake' be'nn yo' xhbab, na' llaya'l gape' kwine' gone' da wen, na' llaya'l gake' be'nn llon da zej to li nench gap be'nne le'e bara'nne. Na' llaya'l yewere' wrebe' be'nne lo yo' rille', na' llaya'l gake' be'nn llak llzejnie' xti'll Diosen' kwasro. ³Be'nn nake be'nn wazó bi gak wlane' ka llin na'. Bi llaya'l gake' be'nn wachach. Bi llaya'l gake' be'nn wzera'lle. Llaya'l gake' be'nn cha'o, be'nn llone be'nne wen, bi llaya'l gake' be'nn znia, na' bi sera'lle' gone' gan mell xhen. ⁴Na' llaya'l gake' be'nn llak llgo' xhnneze da de lo yo' rille', na' llaya'l nnezre' ka gone' nench wzenay xhi'nne' ka' ke'e, na' gap ake' le'e bara'nne. ⁵Le cha' bi llak kwe'e xhnneze ke xhi'nne' wzenay akbe' ke'e, na' bi llak kwe'e xhnneze bi da de lo yo' rille', bi gak kwe' xhnneze ke be'nn yobre be'nn lldop ll-llay llonlira'll Dios. ⁶Bi kwejre be'nn za llzorao llonlira'll Diosen' wie' be'nn ka' nxenra'll Diosen', le nna nake' be'nn kobe nxholl yewere' yeyonxhen kwine', na' gak ke'e kan' gok ke dan' Ilnebia' daxi'o ka' kana', 1 Timoteo 3, 4 374

na' we'e Diosen' le'e yel llza'kzi' ke'e. ⁷Na' be'nnen' kwejre na', llaya'l soe' gone' da wen radj be'nn ka' bi non re' txhen, nench ke bixe', na' nne be'nn ka' ke'e, na' daxi'on wko'yelen le'e gone' da xhinnjlle ye ra'te.

Be'nn ka' llgo' xhnnez da de lo yoda'o

⁸Na' leska' kat kwejre be'nn ka' ko' xhnnez da de lo yoda'o, lekwej be'nn llon wen, nench gap aklloe' bara'nne. Leze llaya'l gak ake' be'nn lloe' di'll li da chejle'llo, be'nn bi yo'rao lle'je', na' be'nn bi zera'lle' yel wnia' dan' gone' xchin Dios na'. 9Llaya'l gak ake' be'nn llejle' doxhen kan' bzejnie' Diosen' lli'o ke Jesucriston', dan' nono bnneze do kana', na' llaya'l gon xhira'll lo yichira'llda'o ake'. 10 Na' ka za kwejtere be'nn ka' ko' xhnnez bi da de lo yoda'o, lewiaya'nne kan' llon ake' na', na'll wroe'n cha' llon ake' wen, bi llka'a ake' ga yobre, na'tellen' kwej akre'. ¹¹Na' no'r ka' gon xchin Diosen', lekze llaya'l gon ake' ka gap aklloe' bara'nne. Bi kwejre no'r nnechach ke be'nne o no'r lle'je', zan lekwej no'r ka' ni't llon kon ka lle'ne Diosen'. ¹²Leze kat kwejre be'nn byio ko' xhnneze da de lo yoda'o, lekwej be'nn zo toze no'r ke'e, na' be'nn llgo' xhnneze ke xhi'nne', na' nollre be'nn zjani't lo yo' rille' ga zoe'. ¹³Le be'nn ka' llgo' xhnneze da de lo yoda'o, llon ake' nench llap be'nn leake' bara'nne, nni't ake' nbaraz gonlira'll ake' Xanllo Jesucriston!

Da li da baroe'rawe

¹⁴Llzoja' rwe' da ki dan' llaya'l gono' la'kze ba llona' xhbab yeda' gan' zo'o. ¹⁵La'kze cha' llera' kon ba nnezro' akren' llaya'l gon be'nn ka' nake dialla Diosen', le lli'o lldop ll-llayllo llonlira'll-llo Jesucriston', nakllo dialla ke Dios be'nnen' zo ke chnare, na' naollo llonllo ka gombia' be'nn xti'll Diosen' naken da li. ¹⁶Da likze dan' ba broe'rao Diosen' lli'o naken da za'k kwis, kana' nono bnneze da ki ba bzejnie're' lli'o ke Jesucriston' nen:

> Diosen' bede' gorje' radj be'nnach,

na' Spíritu ke Diosen' broe'n nake' be'nn wen kwis.

Na' be'nn ka' nak angl ke Diosen', badwia ake' Le'e.

Na' be'nn ka' lloe' xti'lle'n, ba be'rén ake'n be'nn ka' lla'a yellrio zi'te,

na' zan be'nn lla'a rao yellrion', ba llejle' ake' ke'e.

Na' ba bazie' Le'e radj yel nbaraz ke'en.

Bale be'nn kwej yichj ake' di'll li ke Diosen' kate llin lla

Ba be'e Spíritu ke Diosen' di'll li, nench chejle'llo wllin lla kate bale be'nne kwej yichj ake' di'll li ke Diosen' dan' llejle'llon', na' chejle' ake' ke da gon daxi'o ka' nench wxoayay aken leake'. ²Na' nni't be'nn ka' wzejnie' di'll wenra'lle, na' billbi gak akre' kat siye'e ake' be'nne. 3Wllon ake' wchayna'a be'nne, na' wllon ake' ye'j gaollo bal yel wao, la'kze naken da ba ben Diosen' nench gaollon, lli'o nxenra'll-llo Criston' nombia'llo di'll li ke'en, na' lloe'llo yel llioxken ke'e. 4Yeolol dan' ben Diosen' naken da wen, naksen da llaya'l

si'llo kon cha' we'llo yel llioxken ke'e, katen' gaollon na'. ⁵Le kone lloa' xti'll Dios na', na' dan' lloe'llo yel llioxken na', llayaken yall nench llak llaollon.

Kan' llaya'l gon be'nn gon xchin Diosen'

⁶Ka nak be'nn lwellj lli'o nxenra'll Jesucristo na', cha' wzejnie' akroe' ka da ki ba bnia' rwe' na', na' gakrén akoe', na'll gako' to be'nn wen llin wen ke Jesucriston'. Lekzen gonen lachra'llo' cha' wzejnie'ro' be'nn xti'll Diosen' dan' llejle'llo na', le naken to di'll wen, da ba bzenayo' ke. ⁷Bi wzenayo' ke di'll wenra'lle da llarjla'll be'nn bi nxenra'll Dios. Bzoteze be'la'll gono' kan' llazra'll Dios na'. ⁸Nnézkzello kat Ilta nia'na'llo, llakrenen kwerp kellon' ra'te. Na' kat llonllo kan' llazra'll Dios na', llakrenllen lli'o nench zo bezllo kwasro, llinte lla kat lliazorenlloe' ke chnare. ⁹Na' di'll li naken da ni, za'ken chejle'llon, na' za'ken wzenayllon do yichi do ra'll-llo. 10 Ke len na' llonllo xchine'n, na' llaora'll-llo kat zi'chi'll no be'nn lli'o, le nnézkzello Diosen' zoe' ke chnare, na' sollo rez gone' wen kello, Le'en lle'nre' yesre'e yeolol be'nnach, na' ka'n naksen gone' ke be'nn llonlira'll Jesucriston'.

¹¹Na'llen' bzejnie' be'nne da ka' ba bnia'n, na' goll ake' wzenay ake' ke yeololkzen. ¹²Bi go'o latj gon akre' rwe' kaze dan' nna nako' bi llaban. Yeolol bi da llono', ben nench re'e be'nn ka' llonlira'll Jesucriston' kan' llaya'l gon ake' na'. Broe' akre' kan' ne'o, na' kan' nako' be'nn wen, na' kan' nllie'ro' be'nne, na' kan' zechicho' llonlira'llo' Diosen', na' kan' nako' be'nn ra'llda'o xhira'lle. ¹³Na' chak za yeda' na', brek yichjo' wrabo' xti'll Diosen', rao be'nn ka' lldop ll-llay nxenra'll Jesucriston', na' bnneyoe akre' wzenay ake'n, na' bzejnie' akre' akren' zejen'. ¹⁴Na' bi gatra'llo' ke dan' bro' Diosen' rao na'o gono', kan' bxoa ta'k be'nn gor brao ka' yichjo'.

15 Llaya'l se'o do yichj do ra'llo', gono' dan' brej Diosen' rwe' gono', nench re'e yeolol be'nne zejkzo' llono' da wen. 16 Na' wia'o kan' so kwezo' nench soteze so'o gono' kan' lle'ne Dios na', leska' soteze so'o wzejnie'ro' be'nne xti'll Diosen' kan' naken. Na' ka'n gono' nench gakrenen rwe', na' leska' gakrenen be'nn ka' llzenay xti'llo'n, nench na' yerare rao da xhinnjen' kate llin lla keré.

Kan' llaya'l gone lwelljllo lli'o ba nxenra'll-llo Cristo

Cha' to be'nn gor byio llone' bi da xhinnj, bi gonroe' znia, bzejnie're' nench kweje'n yichje', benre' ka no xa'o. Na' cha' to bi we'o llonbe' da xhinnj, be'renbe' di'll kwejbe'n yichjbe', bénebe' ka to no bi'cho'. ²Na' cha' no no'r gore llone' bi da xhinnj, be'rene' di'll kweje'n yichje'n, kon bentezre' ka llonro' xhna'on. Na' cha' no no'r kwi'de llonbe' bi da xhinnj, be'renbe' di'll kwejbe'n yichjbe', bénebe' ka to no zano'. Llaya'l wia'o da ki nench gako' be'nn wen rao ake'.

³Llaya'l we'llo da yallje no'r ka' nak no'r wazebe, cha' dogarje bi da 1 Timoteo 5 376

yalljre'. ⁴Zan cha' ni't no xhi'nn ake' no xhosoa ake', bzejnie' akre' llaya'l we'e ake' da yallje xhna' ake'n, le ba basgore' leake'n, le ka'n lle'ne Diosen' gon ake' da wen. ⁵Na' no'r ka' nono llra' gakrén leake' we'e ake' leake' bi da yalli akre', be'nn ka'n nake dogarje no'r wazebe, bez ake' we'e Dios bi dan' yalli akre'n, na' llalwill ake' Dios do lla do yere nench gakrene' leake'. 6Na' no'r wazeb ka' llon kon kan' ne lo yichjra'llda'o ake'n, nak ake' ka to be'nne ba got la'kze nna nban ake'. ⁷Goll ake' gon ake' ka dan' nia' ni, na' bi gon ake' da xhinni da nak zi til akre'. 8Cha' no be'nne bi llakrene' nench ga't bi da vallie no be'nn nak dialla ke'e, ba bkwase' xti'll Diosen' ka'le dan' lleile'llo na', ba llonlle' da xhinnill ye ra't kerke be'nn ka' bi nna wxenra'll Jesucristo na'.

⁹Cha' to no'r wazeb ba gokre' wyon (60) iz, na' bzo toze be'nn ke'e, wllia akoe' yich gan' llia ra no'r wazeb ka' llakrenllo. ¹⁰Kwejre no're nnézere cha' bene' da wen, ka da ki: cha' basgor xhi'nne' kwasro, cha' benre' wen be'nn bllin rille', cha' gokrene' be'nn nxenra'll Dios, cha' gokrene' be'nn za'kzi' o cha' ba benlle' billre da wen.

¹¹Na' no'r wazeb llaban ka', bi wllia akoe' yich, le wllinje lla gon ake' kon kan' nen ke ake', na' wsanra'll ake' Cristo na', na' ye'n akre' yechayna'a ake' da yobre. ¹²Na' wsanra'll ake' xchin Criston' dan' ba bcheb ake' gon ake'n, na' gap ake' do'le. ¹³Leska' bi naken wen cho'rao ake' la'll ake' toto yo', nench ke gak ake' be'nn ria, na' gak ake' be'nn wao di'lle, na' we'e ake' di'll da bi llaya'l we'e ake'. ¹⁴Ke len na' lle'nra' yechayna'a no'r wazeb llaban ka' da yobre, na' san aklle', na' yesgor xhi'nn ake', na' gapchi'i rill ake' kwasro, na' ka' bi we'n latj nne be'nne kello. ¹⁵Ka'n nia', le ni't bal no'r wazeb xkwi'd ake ba brej yichj ake' Criston', na' ba nao ake' daxi'on na'le.

16 Cha' no be'nn nonlira'll Criston', na' zjani't no'r wazebe dialla ke ake', llaya'l we'e ake' da ye'j gao ake', nench bibi zed gon akre' be'nn ka' lldop ll-llay llonlira'll Criston'. Na'll sa'ke gakrenllo no'r ka' nono llra' ke ake'.

¹⁷Na' ka nak be'nn ka' llnebia' be'nn ka' lldop nxenra'll Criston' toto yell, cha' llwia ake' be'nn ka' kwasro, da xhen llaya'l gak be'nn ka' xhen. Na' za'kllen' gak ake' xhen cha' llyixjwe' akre' xti'll Diosen', na' llzejnie' akre' be'nne akren' zejen. ¹⁸Le nyoj xti'll Diosen' nen: "Bi wsejre lloa' bellen' nench gaoba' kate llrej llchekwba' trigon' nench lloj xhe." Leska' nen: "Be'nn wen llin na', llaya'l si'i raxhje'."

19 Bi chejle'o cha' to be'nne za'ze llxoe' do'l ko'll to be'nn gor brao, cha' bi za'rene' ye chop chonn be'nn lloe' di'll li. 20 Na' cha' da li ba bene' da xhinnj, llaya'lkze tiloe' rao be'nn ka' lldop ll-llay llonlira'll Criston', nench lleb yezikre be'nn, na' bi gon ake' da xhinnje. 21 Lla'tyoera' rwe' rao Xanllo Diosen' na' rao Jesucriston', na' rente rao angl ka' ba breje' na', nnao' gono' kan' ba bnia', na' bi yela'o be'nne, na' gonxhenzo' balze'. 22 Bi kwejo' kon ganze be'nnen' gape lwellj

ake'n, nench kere reno' gapo' do'le cha' be'nnen' brejo'n gone' da xhinnj. Bwia nench ke gako' be'nn wen da xhinnj.

²³Na' dan' llak le'o, bi ye'jo' toze nis, we'j ra't xis uva.

²⁴Bal be'nne nakbie' xhej da xhinnjen' llon ake'n, na' llakbe'kze be'nne bin' llon ake', la'kze bi nna llin lla yellayrao ake'. Na' ye bal ake' llon ake' da xhinnjen', na' zoe akre' llkwa'ch ake'n, na' bi llakbe'e be'nne, zan wllin lla kate re'e akre'n. ²⁵Leska' naken ke be'nn ka' llon da wen na', nakbie'kzen cha' da wen na' llon ake', na' ye balen bi llroe'rawe da wen na' llon ake', zan bi ten ka'ze.

Be'nn ka' nxenra'll Criston'. na' nak ake' be'nn wen llin ke be'nne, llaya'l gap ake' bara'nne be'nn ka' nak xan llin ke ake'n. nench nono bi nne ke dan' naollo ke Diosen', na' dan' llzejnie'llo na'. ²Be'nn ka' zo xan ake', na' xan ake' na', nak ake' be'nn nxenra'll Criston', bi llaya'l wsanra'll ake' yel gap leake' bara'nne dan' nak ake' ka bi'chllo. Na' llaya'l gon ake' xchin be'nn ka' do ra'll ake', na' llaya'l llie' akre' leake', le nak ake' txhen nxenra'll ake' Criston'. Da ni bzejnie' akre', na' go'tyoe akre' kan' llaya'l gon ake'n.

Llaya'l sollo nbaraz ke da de kello

³Ni't be'nn llzejnie' akre' xhbab ke akse', na' bi llroe' llsed akre' di'll li ke Xanllo Jesucriston', na' llejnie' akre' krere, ne ake' kere llonen bien gonllo kan' ne Dios na'. ⁴Be'nn ka' llon ka' lle'n akre' gak ake' xhen, na' bibi llejnie' akre'. Na'

chach ake' ke no di'll o billre da ke za'ke, na' llaxhé' lwelli ake', na' llakyollrén lwellj ake', zi'chi'll lwellj ake', na' llak akre' llaxhé' be'nn leake'. ⁵Na' ni ke llayoll lladoze llasdil llaschach ake', le da xhinnj na'n bayo' lo yichjra'llda'o ake'n, le bi nombia' ake' di'll li ke Diosen'. Na' llak akre' wroe' wsed akre' xti'll Diosen' gak akte' be'nn wnia'. Bi gono' be'nn ka' txhen be'nn ka' llon ka'. ⁶Da likze nbaraz zollo kat gonllo kan' lle'ne Diosen', na' kat zollo nbaraz llonllo banez bi da da'o de kello. ⁷Le to ka'zllon' bra'llo yellrio ni, na' to ka'zllo yeza'llo. ⁸Na' cha' de da lle'j llaollo, na' cha' de xhara'nllo da llakllo, kone len llava'l sollo vewello. ⁹Be'nn ka' zera'll gak ake' be'nn wnia', llon ake' zre da xhinnj, leake'n darén ake' daxi'o. Na' da zan da zera'll ake' ga't ke ake' da te ke, na' ka nak dan' zera'll ake'n. llkwa'ntonten leake', na' wllin lla kweyi' ake'. ¹⁰Le be'nnen' zera'll mellen' llone' biteze da xhinnj. Na' llbej yichj ake' di'll li ke Diosen' yel llzera'll ke ake'n, na'll da zan da llallayrao ake'.

Llaya'l kwek yichj Timoteon' gone' xchin Criston'

¹¹Ka nak rwe' Timoteo, bi gono' kan' llon be'nn ka', le Dios na' ba breje' rwe' gono' xchine'n. Brek yichjo' gono' dan' zej lilla, ben kon kan' llazra'll Dios na', sokzo' wxenra'lloe', bllie' be'nne, bdaora'll kat de da llsa'kzi' rwe', gok be'nne cha'o. ¹²Brek yichjo' ben ga zerao sa'kro', nench na' gono' yeolol dan' lle'ne Dios na'. Bawé lljazoreno' Diosen' ke chnare, le ba brej

1 Timoteo 6 378

Diosen' rwe' lljazorenoe', na' ba be'o di'll rao be'nn zan, lle akoe' llonlira'lloe'. 13 Dios be'nnen' lloe' vel nban ke yeolol da de rao yellrio, na' Jesucristo be'nnen' be'e di'll li rao Poncio Pilato, leake'n nnez akre' nada'n lla'tyoera' rwe' 14 wzenayo' ke yeolol dan' ba bnia' ni, na' bi wxinnjo', na' bi gatra'llo' gono' da no tile rwe'. Na' ben yeolol da ka' ba llia' bia'a gono'n, llinte lla yed Xanllo Jesucriston' da yobre. ¹⁵Le kat llin lla wllia Diosen' bia'a. na'tellen' yede' da yobre. Toze Dios na'n llnebie' doxhente, na' zoe' nbaraz kwis. Le ya'nnen' nake' Rey ke yeololte rey ak, na' nake' Xanllo be'nn llnebia' vezikre be'nn wnebia'. ¹⁶Toze Diosen' nake' be'nn bi gatkze'. Na' beni' xhen yo' gan' zoe'n, na' ni to nono gak lljabi'ye' awllo gan' zoe' na'. Nono llra' yellrio ni, be'nn ba bre're' Diosen', na' ni ke no gakze' re'e Le'e. Llaya'l wxenra'll-lloe', le Le'en llnebie' ke chnare. Ka'n gakchga.

¹⁷Na' ka nak be'nn ka' nak be'nn wnia' yellrio ni, goll ake' bi gak gake' be'nn ya'ra'lle. Na' ye akoe' bi gak nni't ake' nbaraz dan' nak ake' be'nn wnia' na', le wde ke veolol dan' nap ake'n. Na' ve akoe' gon ake' rez, so ake' nbaraz rao Dios be'nnen' zo ke chnare. Toze Le'en llonne' yeolol da wen da yálljello, na' llonne' latj si'llo banez. ¹⁸Ye akoe' nni't ake' gon ake' da wen, gon ake' yeololte da llazra'll Dios, na' leska' ye akoe' zan akre' da de ke ake', gakrén ake' be'nne, na' yewé akre' gon ake'n. 19 Cha' gon ake' ka', na' gaken ka to yel wnia' da bi te ke, le lle'ne Diosen' gakrene' be'nne, na' yeni't ake' nbaraz kat lljazorén ake' Le'e ke chnaren', cha' gon ake' ka'.

Pablon' llze'e di'll le' yich ni

²⁰Timoteo, brek yichjo' ka da ki ba bzejnie' Diosen' rwe'. Bi wzenayo' ke be'nn ka' lloe' di'll da bibi za'ke, ni ke be'nn ka' lloe' di'll dan' bi zeje rebe kone di'll li ke Dios. Ziye'e ake' ne ake' lloe' ake' di'll si'n. ²¹Be'nn ka' ba bzenay di'llen' nak ka', ba brej yichj ake' di'll li ke Diosen' dan' llejle' lli'o bill llonlira'll ake'n.

Llnnaba' kwis gakrenchga Diosen' rwe'. Ka'n gakchga.

YICH WLLOPE DAN' BZOJ POSTL SAN PABLON' KE TIMOTEO

Pablon' llwape' lliox be'nnen' nzi'i Timoteo

Nada' Pablo naka' postl ke
Jesucriston', le Dios na'n
byo'ra'lle' wse'le' nada', ka nak
bchebe' we'e yel nban zejlikane
ke noteze be'nn gake txhen Xanllo
Jesucriston', na'llen' llona' xchine'n.

Na' llzoja' rwe' Timoteo, ba
nona' rwe' ka xhi'nna'. Llnnaba'
rao Xallo Dios ren rao Xanllo
Jesucriston', gakrén akchgue' rwe',
na' yeya'chra'll akchgue' rwe', na'
wzoa ake' lo yichjra'llda'o so kwezo'
nbaraz.

Llaya'l we'llo di'll ke Jesucriston'

³Nxenra'lla' Diosen' do yichj do ra'lla' kan' ben da xozxta'wa' ka', na' nnezra' lo yichjra'llda'wa' llona' kan' lle'ne Diosen'. Na' yo'y ras kate llalwilla' Diosen', do lla do yere lloa'a yel llioxken ke'e, ke da ka' llono'n. ⁴Lljadinra'lla' bllello' ka baza'a gan' zo'on, na' zera'lla' re'e lwelljllo da yobre, na' yewera' kwis cha' ka'. ⁵Na' llona' xhbab kwis kan' nxenra'llo' Diosen' do yichj do ra'llo', le ka'kze ben zga'tek xhna' goro' Loida, na' xhna'o Eunice, len

na' nnezra' lekze ka'n llono' rwe' nna'.

⁶Ke len na' llasnisra' rwe' da yobre, na' basa'ra'll gono' dan' bro' Diosen' lo na'o gono', kan' bxoa ta'ka'n vichjo'n. ⁷Diosen' benne' Spíritu ke'en lli'o yo'n lo yichjra'llda'ollon', llakrenen lli'o nench bi llebllo, na' llonnen lli'o yel wak nench gonllo kan' lle'ne Dios na'. Leska' llakrenen lli'o nench nllie' lwelljllo, na' nench ke gonllo bi da nen kello. 8 Na'llen' llepa' rwe', bi waye'ro' go'o xti'll Xanllo Jesucriston', na' bi waye'ro' kia' la'kze yoa' lo rill ya ni, dan' llzenaya' ke Jesucriston' dan' llyixjwe'ra' xti'lle' na'. Na' llaya'l gono' kan' llona', na' gako' war cha' bi da gak ko'o, katen' chixjwe'ro' Di'll Wen ke'e na', le zokze Diosen' llakrene' lli'o kone yel wak ke'e na'. ⁹Le Diosen' ba basre'e lli'o, na' ba breje' lli'o nench nakllo rallne'e. Bene' ka', dan' nllie're' lli'o, kere nello bi da wen benllo. Kan' za xe yellrio na'te, broe' xhnneze wse'le' Xanllo Jesucriston' nench gakrene' lli'o. ¹⁰Na' nna' ba broe' Diosen' lli'o nllie'kzere' lli'o, le ba bse'le' Jesucriston' be'nn wasrá kellon'. Na' bchochj blan Jesucriston' yel

2 Timoteo 1, 2 380

wak ke yel goten', na' bene' nench bembia'llo Di'll Wen ke'en, nench na' ga't yel nban zejlikane kello.

¹¹Na' brej Diosen' nada' naka' postl ke'e, na'll bse'le' nada' nench chixjwe'ra' Di'll Wen ke Jesucriston', na' llroe' llsedra' be'nne bi nake be'nn Israel. ¹²Na' ke len na' lllayrawa' ka da ki llak kia' ni, na' bi llaye'ra' ke, le nombia' Dios be'nnen' llonlira'lla'n. Na' ba ben kwina' rao ne'e, na' nnezra' nape' yel wak wkwe'je' nada' llinte lla yed Jesucriston' da yobre.

¹³Sechicho' wzejnie'ro' be'nne di'll dan' za'ken, kan' ba benro' llzejnie'ra' na', na' seteze se'o gonlira'llo' Xanllo Jesucriston', na' llie'roe' do yichj do ra'llo'. ¹⁴Na' kone yel okré ke Spíritu ke Diosen' dan' ba zo lo yichjra'llda'ollo na', wzejnie'ro' be'nne di'll li ke'en dan' ba broe' rallna'o na'.

15 Nnezro' be'nnen' nzi'i Figelo ren be'nnen' nzi'i Hermógenes, na' yezikre be'nn nake nada' txhen lla'a Asia, ba brej yichj ake' nada'. 16 Na' llnnaba' gakrenchga Xanllo Diosen' Onesíforo, ren be'nn ka' lla'a lo yo' rille'n, le bi baye're' kia' kan' yoa' lo rill ya ni, da zan ras bede' btipra'lle' nada'. 17 Le kan' bede' Roma ni, bene' bien bayirje' nada' to balléltere' nada'. 18 Na' llnnaba' rao Xanllo Diosen' gakchga wen ke'e, katen' llin lla yed Xanllo Jesucriston' da yobre. Nnézkzero' da zan ras bede' gokrene' nada' kan' bzoa' gan' nzi'i Éfeso.

Llaya'l gaora'll-llo ka to be'nn waka'a ya cha' bi da za'kzi'llo

2 Xhi'nna' da'o, llnnaba' sechicho' wxenra'llo' Xanllo Jesucriston', le Le'en ba benla'ye' rwe'. ²Na' yeolol da ka' ba benro' bdixjwe'ra' rao be'nn zan, bzejnie'ren be'nn yobre, be'nn wzenay len do yichj do ra'll ake', nench na' wak wzejnie' akre'n no be'nn yobre.

³Na' bdaora'll bi da sa'kzi'o chak llono' xchin Jesucristo na'. Ben ka llon to be'nn waka'a ya, be'nn bi llebe cha' bi da lljatie'. ⁴Le to be'nn zeje de be'nn waka'a yan', bi gak gon xchine' chak zeje' rao wdilen', llbeje'n yichje' nench gone' bi dan' lle'ne xane'n gone'. ⁵Rebe kwis ka ke be'nn llej witje, cha' bi gone' kan' llaya'l gone' na', kere gone' gan dan' sie'n cha' ka'. ⁶Leze be'nn llon llin yi'xe, nench na' gak yezie' daxhix nell da kwia rao yay ke'e na', zga'tek llaya'l gone' llin. ⁷Bayón ke xhbab kwasro ka da ki ba bnia' rwe', na' Xanllo Jesucristo na', gakrenchgue' rwe' chejnie'ro' veololen.

⁸ Jadinra'll ke Jesucriston' be'nnen' babán radi be'nn wat ka', nake' xhi'nn dialla Rey da David. Le len na' llzeinie'ra' katen' lloa'a Di'll Wen ke'en. ⁹Na' dan' llyixjwe'ra' Di'll Wen ke'e na', llsa'kzi' ake' nada' ka naken yoa' lo rill ya ni, ka yo' to be'nn wen da xhinnj. Na' kere nello rente xti'lle' na'n yo' lo rill yan'. ¹⁰Na'llen' llaora'lla' biteze da llak kia', kon we'kza' xti'll Diosen', le nllie'ra' yezikre be'nn ka' ba brej Diosen', nench yesre'e leake' dan' ba nak ake' txhen Xanllo Jesucriston', na' lljazorén ake' Le'e ke chnare, gan' gak wen ke ake' na'. ¹¹Di'll ki nak da li:

381 2 Timoteo 2

Cha' gatllo ni ke dan' llonlira'llllo Criston', leska' lljazorenkzllo Le'e txhen.

¹² Na' cha' yellayraollo, lekze gakrenlloe' txhen katen' nnebie'n.

Na' cha' nnello bi nakllo be'nn ke'e, ka'kze nne Le'en bi nakllo be'nn ke'e.

¹³ La'kze cha' lli'o bi gonllo kan' ba bnello na', zan Le'en gonkze' kon kan' ne'e gone'

le Le'en bi gak wtebrawe' gone' da ba nllie' bia'a gone'.

Be'nnen' llon xchin Diosen' kwasro

¹⁴Jasara'll be'nn ka' nxenra'll Jesucriston' da ka' ba bzejnie'ra'n. Leska' yesnis akroe' bi naken wen rao Xanllo Dios yesdil yeschach ren lwellj ake' ke bi gaze di'lle. Bi naken wen gon ake' ka', le kat be'nn ka' lle'ne til chach ake', len na' gon bi chejle' be'nn yob akre' xti'll Diosen'. 15 Ben ga zerao sa'kro', nench yewé Diosen' kan' llono' na', ka llon to be'nn wen llin, bibi de sie' yel zdo' cha' llone' da lixheje. Ka' gono' rwe', wroe' wsedro' xti'lle'n lixheie. 16 Bi gonreno' be'nn ka' txhen be'nn ka' lloe' biteze di'll da bibi za'ke, di'll da bibi zejen ke Dios, le be'nn ka' llon ki, zejzell llbix ake' rao da xhinnjen'. ¹⁷Di'll dan' nak ka' ll-lleyi'n be'nn ka', naken ka to we'e gore, kan' gok ke be'nnen' nzi'i Himeneo ren be'nnen' nzi'i Fileto. ¹⁸Brej yichj ake' di'll li. Na' Llroe' llsed akre' ne ake' bi gonllo rez yebanllo radj be'nn wat ka', ne ake' ba bde ke dan'. Na' bal be'nn ka' ba nxenra'll Criston' ba llakchix akre',

ni ke xti'll be'nn ka' ne ka'. ¹⁹Zan ka lli'o zekzllo nxenra'll-llo di'll li ke Criston', na' llon Diosen' nench bi kwej yichjllon'. Len na' naken ka to ran yo' da none' da war. Na' nyojkze xti'll Diosen' nen: "Dios na' nnezre' no be'nn ka' zjayo' lo ne'e." Na' lekze nyojen gan' nen: "Noteze be'nne ne'e llonlira'lle' Xanllo Diosen', llaya'l kwej yichje' billbi da xhinnj gone'."

20 To rill be'nn wnia', de no leo ye'nne, na' no ye's leo de ya cha'o dan' nzi'i oro, na' de ya cha'o dan' nzi'i plat. Leze de no ye'se leo de bennj, na' de no yayra', na' billre de yay. Balen llonrén ake' llin, llon ake'n ka to da za'ke, na' ye balen bi gaze llon akre'n. ²¹ Kan' naken ke lli'o, cha' kwej yichjllo da xhinnjen', na'll gonrén Xanllo Diosen' lli'o llin, ni ke dan' llonllo da zan da wen dan' lle'nre' gonllo na'. Na' cha' ka' gonllo, nakllo ka to leo de ya cha'o dan' nzi'i oro.

²²Na' ka nak rwe', llaya'l kwej yichjo' biteze da xhinni da zera'll lo ra'llda'on gono', ka da zera'll no be'nn we'o gon ake'. Bayirjla'll akre gono' nench gako' be'nn wen rao Dios, nench sechicho' wxenra'lloe' nench llie'ro' Diosen', na' nench so kwezo' kwasro ren be'nn lwelljo' ka'. Na' ben txhen yeolol be'nn llnnab okré rao Xanllo Dios, be'nn ka' nake be'nn ra'llda'o yalle. ²³Bi gono' txhen be'nne bi llejnie', be'nne chach lloe' ake' di'll ke nxhia, na' xti'll ake'n llxen wdile ke be'nne. ²⁴Lli'o llon xchin Dios bi llaya'l tilrenllo be'nne. Llaya'l gakllo be'nn wen be'nn cha'o rao yeolol be'nne, llaya'l gakllo wzejnie' 2 Timoteo 2, 3 382

akelloe' ke Diosen', na' llaya'l gapllo yel llxhenra'll ke leake'. ²⁵Na' kat yego'llo nez be'nn bi lle'ne wzenay di'll li ke Criston', llaya'l we'rén aklloe' di'll cha'o, na' sollo wiallo cha' Diosen' gakrene' leake', wcha'a yichjra'llda'o ake'n, na' so ake' wzenay ake' ke di'll li ke'en. ²⁶Ka'n gonllo nench yelloj ake' rao na'a daxi'on, le len na' llonen nench llon ake' kon kan' llazra'llen na'.

Ka gon yichjra'llda'o be'nnach kate ba zo rez yed Jesucriston' da yobre

Leska' llaya'l nnezro' da ni: • kat llin lla ba rez yed Xanllo Jesucriston' da yobre, sorao gak da nxholl. ²Be'nn zan yeyoe'rao kwin ake', na' be'nn zan so yichira'llda'o ake' ga't mell xhen ke ake'. We'e ake' di'll ke da wen na' llon ake', na' gak ake' be'nn ya'ra'lle. Nnechach ake' ke Dios, na' bill wzoa ake' xti'll xaxhna' ake'. Bi yeyazra'll ake' bi da gon Dios, bill gap ake' Le'e bara'nne. ³Bi yeya'chra'll ake' be'nne, bi yezi'xhen ke lwellj ake', nnechach ake' ke be'nne, gon ake' kon da nen ke ake', gak ake' be'nn zban, na' wie akre' da nak da wen. ⁴Wlliayi'll lwellj ake' rao be'nne llwie leake', bill lleb ake' gon ake' da xhinnj, gon ake' xhbab za'k ake' kwis, na' gon ake' da wpé leake', na' bill lljadinra'll ake' Dios. ⁵Lekze da zan da gon ake', nench na' gake be'nne le nxenra'll be'nn ki Dios. zan bibi yel wak ke Diosen' zorén leake!.

Bi gonreno' be'nn ka' txhen, be'nn ka' llon kan' ba bnia' na'. ⁶Ka be'nn ki llon ka', lljake' do rill no'r ka' llejle' da'ze, na' llonre' akre' leake', kone di'll ke ake' ka'. Na' no'r ka' de do'l ke ake' kwis, le llon akteze' kon da nen ke ake', da nak da xhinnj. ⁷Na' ka nak no'r ki, lla'teze lla'a ake' llzenay ake' kat no llzejnie' leake', na' bi llado'l akre' chejnie' akre' di'll li ke Diosen', 8Kan' gok kana', be'nnen' nzi'i Janes, na' be'nnen' nzi'i Jambres, bwie akre' da Moisésen', bi gokra'll ake' wzenay ake' di'll li dan' be'rene' leake'n, na' ka'kzen' nna', nna ni't be'nn wxhiye'e ka', nna' lla, llwie akre' di'll li ke Diosen'. Le nchole lo yichi ake'n yel wen da xhinni ke ake' na', na' llsan ake' bill nxenra'll ake' Diosen'. 9Na' ka nak be'nn ki, bi gak kwejrao ake' ye scha, sete llin gak ke ake' kan' gok ke Janes na' ren Jambres, llin lla kat gakbe'e be'nn zan, kreren' llzejnie' akre' yel ke llejnie' ke ake' na'.

Di'll zerao be'rén Pablon' Timoteon'

¹⁰Na' rwe' Timoteo, nnézkzero' kan' ba bzejnie'ra' rwe'n, na' kan' zoa' llona' da wen. Na' nnézkzero' lli' yichja' gona' yeolol kan' ne Dios na!, Na! zediakza! nxenra!lla! Dios biteze da llak kia'. Na' napa' yel llakxhenra'll ren lwellj be'nnacha', na' nllie' aksere'. ¹¹Na' bi llbej yichja' xchin Dios dan' llona', la'kze da zan da bsa'kzi' be'nne nada'. Na' nnézkzero' kan' ben akre' nada'n. kan' bzoa' gan' nzi'i Antioquía, na' kan' bya'a yell gan' nzi'i Iconio ren yellen' nzi'i Listra, na' kan' bllayrawa'. Na' Xanllo Jesucristo na', basre'e nada' rao yeolol dan' gok kia' na'. ¹²Da li nni'tkze be'nn wsa'kzi' lli'o nxenra'll-llo Xanllo Jesúsen', lli'o lli' yichjllo llzenayllo

383 2 Timoteo 3, 4

xti'lle' na'. ¹³Be'nn wen da xhinnj ka', na' be'nn waxoayay ka', zjazé akse' llon ake' da xhinnjen', siye'e ake' be'nne, na' leska' llejle' ake' ke di'll wenra'll da llayoe' be'nn yobre.

¹⁴Na' rwe' Timoteo, llaya'l setezo' wzenayo' ke da ka' llejnie'ro' ke Criston', nnézkzero' naken di'll li, nnezkero' kan' nak be'nn ka' bzejnie' rwe'. ¹⁵Le kan' nako' bida'oten', ba nombia'o xti'll Diosen' dan' nyojen. Xti'lle' na'n llzejnie'n lli'o llaya'l wxenra'll-llo Xanllo Jesucristo nench yesrá Diosen' lli'o. ¹⁶Kwin Dios na'n bzejnie're' be'nn ka' bzoj ake' xti'lle'n, nench na' bzoj ake'n kan' lle'nre' na'. Na'llen' doxhen xti'll Dios dan' nyojen, za'ken dan' llzejnie'n lli'o ke Diosen', na' llago'n lli'o nez cha' llonllo da xhinnje, na' llzejnie'n lli'o akren' gonllo to da wen rao Diosen'. ¹⁷Na' lli'o nxenra'll Diosen', llzejnie' xti'lle'n lli'o yeolol da llaya'l nnézello nench sollo gonllo yeolol da wen.

Xanllo Jesucriston' yede' da yobre nench yedyene' yel koxchis ke yeolol be'nnach, ke be'nn ban, rente ke be'nn ba got. Kat yede' na', na' sorao nnebie'. Ke len na' llasnisra' rwe' rao Xanllo Jesucriston', na' rao Dios nench gono' da ki. ²Soteze so'o chixjwe'ro' xti'll Diosen'. Na' be'rén be'nn ka' di'll nench gakbe'e akre' llon ake' da xhinnje, bdil ake' ka da xhinnjen' llon ake'n, nench na' yeyat akre'n, na' bdap yel llxhenra'll katen' wzejnie' akroe' dan' llaya'l gon ake'n. ³Wllin lla kat bill ye'n akre' wzenay ake' xti'll Diosen', dan' llzejnie' lli'o dan' nak da li, na'

wtop ake' be'nne wzejnie' leake' ye to di'll vobre da chazra'll leakze'. ⁴Kwej yichj ake' bill wzenay ake' ke di'll lin', na' wzenay ake' ke di'll da llayirjla'll be'nne. ⁵Zan ka nako' rwe', llaya'l gako' be'nn yo' xhbab, na' bdap vel llxhenra'll ke veololte da za'kzi'o, na' soteze so'o we'o Di'll Wen ke Xanllo Jesucriston' do yichi do ra'llo'. Ben yeololte dan' bro' Diosen' rao na'o gono'. 6Na' ka nak nada', ba rez got ake' nada', ni ke dan' bena' xchin Dios na', da li ba ll-llin lla lljazorena' Diosen'. ⁷Na' llawera' wak nnia' do yichi do ra'lla', ba bdilrena' dan' bi llazra'll Dios na'. Ba bena' yeolol da bro' Diosen' rallna' gona', ba bzechicha' bxenra'lla' Jesucriston'. 8Na' kat lljazoa' gan' zo Diosen', na' wzoe' nada' nbaraz dan' bena' da wen chak wbana'. Na' Xanllo Jesucriston' zeje' lixheje, le wllin lla wchoybie', kon kan' nak da li ke'e na', akre gak ke yeolol be'nne, kere nadza'n wzoe' nbaraz, renkze nollre be'nne llawé zo ake' bexh ake' baten' yede' da yobre.

Dan' lle'ne Pablon' gon Timoteon'

⁹Ben to bien le yedtegazo' yedwia'o nada'. ¹⁰Le be'nnen' nzi'i Demas na' ba bsanra'lle' nada', na' ba zeje' zjate'e yellen' nzi'i Tesalónica, de'e llirje' bi da ga't ke'e yellrio ni. Na' be'nnen' nzi'i Crescente na', ba zeje' gan' nzi'i Galacia, na' Tito na' ba zeje' yellen' nzi'i Dalmacia. ¹¹Ye toga Lucas na' nna nga'nnrén nada'. Na' te'o wche'o Marcosen' katen' yedo' na', nench gakrene' nada' ke xchin Dios dan' llona' ni. ¹²Ka nak Tíquicon',

2 Timoteo 4 384

ba bse'le' Éfeso. ¹³Na' lle'nra' go'xo' xhadon kia', dan' bkwa'nna' yellen' nzi'i Troas rill be'nnen' nzi'i Carpo, katen' za'o na', na' leska' go'xo' yich ka' nyoj, da lliaraolle go'xo' yich ka' nak de yid da ka' ba nyoje.

¹⁴Alejandro be'nn wachekw ya na', le ba bkwa'nntonte' nada'. Xanllo Dios na' we'e le'e da sa'kzie' kan' bene'n. ¹⁵Na' bi gatra'llteko' kat lljatiloe', le zejteze zeje' llone' krere ke xti'll Diosen' kan' lloe'llon na'.

16 Kan' bde ake' nada' rao koxchis ka' da nelle, nokz no llra' gakrén nada', yeololte be'nn ka' llakra' gakrén nada', to bsanra'll akze' nada'. Dios na' yezi'xhenchaze' ke ake' dan' bi gokrén ake' nada'n.
17 Zan Xanllo Jesucriston' bzerene' nada' gokrene' nada', nench bia'a xti'lle'n rao yeolol be'nn ka' zjalla'a na', be'nn ka' bi nak be'nn Israel.
Na' basre'e nada' rao yel got, ka'kze

be'nn bará lloa' bell yi'xe, gok kia'.

18 Na' wasrakze Xanllo Jesucriston'
nada' rao yeolol bi da gak kia', na'
wakrenkze' nada' chak nna zoa'
llinte lla lljazorene' gan' llie' llnebie'
na'. Na' llaya'l wxenra'll-lloe' ke
chnare. Ka'n gakchga.

Pablon' llwape' ye to chope' lliox na' llnnabe' gakrén Diosen' leake'

¹⁹Wapgo' Priscan' lliox ren Aquilan', leska' be'nn ka' lla'a lo yo' ke Onesíforo. ²⁰Eraston' baga'nne' yellen' nzi'i Corinto, na' bkwa'nna' be'nnen' nzi'i Trófimon' gan' nzi'i Mileto, ni ke dan' goke' yillwe'. ²¹Na' ben bien yedo' kat za llin lla llak zay. Na' be'nn ka' nzi'i Eubulo, Pudente, Lino, Claudia na' yezikre be'nn nxenra'll Jesucriston' ganni, llwap ake' rwe' lliox.

²²Llnnaba' sorenchga Xanllo Jesucriston' rwe', na' gakrenchga Diosen' yeololre. Ka'n gakchga.

YICH DAN' BZOJ POSTL SAN PABLON' KE TITO

Pablon' llwape' lliox be'nnen' nzi'i Tito

Nada' Pablo llona' xchin Diosen'. na' naka' postl ke Jesucristo, nench gakrena' be'nn ka' brej Diosen' wxenra'll Le'e, nench nnez akre' kan' ne di'll li ke Diosen'. Na' len llzeinie'n lli'o kan' gonllo, na' dan' llazra'lle'n, ²na' llzejnie'n zollo llonllo rez yellinllo gan' llia Diosen' ke chnare. Ka za xe yellrio na'te, bcheb Diosen' we'e yel nban zejlikane ke noteze be'nn wxenra'll Le'e, na' Diosen' bi siye'e biteze da ne'e. ³Na' nna' ba llak dan' bllie' bia'a gak, dan' ba llzejnie'ra' be'nne xti'lle'n, le Dios be'nnen' llonn yel nban kello zejlikane broe' lo na', chixjwe'ra' xti'lle'n rao be'nn ak. ⁴Llzoja' rwe' Tito nako' ka dogarje xhi'nna'n, ba bzejnie'ra' rwe', na' nakllo txhen nxenra'll-llo Jesucriston', Xallo Dios na', na' Xanllo Jesucristo be'nn nak wasrá kello, gakrén akchgue' rwe', na' yeya'chra'll ake' rwe', wzoa ake' lo yichjra'llda'on so kwezo' nbaraz.

Dan' llon Titon' gan' nzi'i Creta

⁵Ke len na' bkwa'nna' rwe' yellrio dan' nzi'i Creta, dan' lli' lo

nisda'o, nench na' ka' wasyollo' ko' xhnnezen' ka nak dan' nna llyalljen, na' toto yell kwejo' be'nn gor brao, kon kan' golla' rwe' na', be'nn wzejnie', na' wia wyi ake' yezikre beinne nxenraill Jesucristoni, 6Nai be'nn goren' kwejo'n, llaya'l gone' da wen, na' bibi de wde' akre' yesné ake' da xhinnje llone', na' llaya'l gake' be'nn zo toze no'r ke'e, na' cha' lla'a xhi'nne', llaya'l wxenra'll akbe' Cristo, na' bi llasdá akbe' llon akbe' da xhinnje. ⁷Le llonen bien na', be'nnen' llwia llyi be'nn ka' llonlira'll Criston', gak ake' be'nn wen. Bi kwejo' be'nn ya'ra'lle, na' be'nn nake be'nn rok, na' be'nn wazó. Bi kwejo' be'nne llawé kwek yel wdile, ni be'nn zera'll gone' da xhinnje, nench gone' gan' mell xhen. ⁸Be'nnen' kwejo'n, llaya'l gake' be'nn llawé wrebe' be'nn zi't rille'. Llaya'l gake' be'nn zoteze zoe' llawere' gone' da wen, na' be'nn yo' xhbab, be'nn llon da zeje lixheje, be'nn gon ka chazra'll Dios, na' be'nn llon kon ga zerao sa'kre llone' bi da nne Dios. ⁹Llaya'l gake' be'nn ze do ra'lle', llzenaye' di'll li ke Dios dan' bzejnie're'n, nench na' wzejnie're' be'nn yobre Di'll Wen

Tito 1, 2 386

na', na' wtipra'lle' leake' nench nni't ake' chejle' ake' dan' nak da li, na' gak wroe' akre' be'nn ka' nne chach ke di'll li ke Diosen', nench na' nnez akre' kreren' llon ake'.

10 Da na'n nia' gono', le zjani't zan be'nn Israel ka', na' ye bale be'nn yobre llasné ake' llon ake' lli'o txhen, na' bi llzenay ake' ke Diosen'. Bibi za'k xti'll ake'n ka dan' llzejnie' akre'n, kon ziye'e ake' be'nne.

11 Dan' llon ake'n, lle'n akre' gon ake' gan mellre, ke len na' llzejnie' akre' da zej krere. Llaya'l gon akroe' znia, nench wani't ake' llize bill wzejnie' akre' di'll wenra'llen', le kreren' llon ake' ka'. Na' be'nn zan, ren be'nn lo yo' ke ake', llak chop akre' ke xti'll Diosen' ni ke leake'.

¹²Kana' bzo to be'nn bayixjwe're' ke Dios, goke' be'nn Creta, na' bne'e ke be'nn wrall ke'e ka': "Be'nn Creta ka' nakteze nak ake' be'nn wenra'lle, nak ake' ka bell znia yel wen da xhinni ke ake' ka'. Nak ake' be'nn waoxen, na' nak ake' be'nn ria." ¹³Da likze kan' bne'en. Ke len na' til akoe' ka da xhinnjen' llon ake' na', nench na' sechich ake' chejle' ake' xti'll Criston'. 14 Ka' gono' nench bill wzenay ake' ke di'll wenra'llen' llarjla'll be'nn Israel ka', na' bill wzenay ake' ke nollre be'nn ba brej yichj di'll li ke Diosen!.

¹⁵Diosen' ba bene' yichjra'llda'ollon' yalle, na' bibi ll-llonen gak yichjra'llda'ollon' yalle. Zan ka nak be'nn yichjra'llda'o wen da xhinnj ka', be'nn ka' bi nxenra'll Criston', bibi de da nak xhira'll ke be'nn ka'. Le llon ake' xhbab da nak da xhinnj, na' bibi lljadinra'll ake' kat llon ake' da xhinnjen'. ¹⁶Ne ake' nombia' ake' Dios, zan kon ka ne akze'n, le ne llon akteze' da xhinnje. Llon ake' da bi llazra'll Dios, nak ake' be'nn llwie xti'lle'n, na' bi llak gon ake' da wen.

Xti'll Diosen' dan' llaya'l wroe' wsédello

Na' rwe', Haya'ı waşı-be'nne gon ake' kan' ne di'll li ke Diosen'. ²Bzejnie' be'nn byio gor ka', bi gak ake' be'nn wazó, na' gak ake' be'nn de bara'nne, nench gap be'nn ka' leake' bara'nne. Bzejnie' akre' totoe' llaya'l nnebia' kwin ake', nench nni't ake' gon ake' da wen, bzeinie' akre' llava'l sedia ake' wxenra'll ake' Diosen'. Llaya'l llie' akre' be'nne, na' gap ake' yel llxhenra'll biteze da llak. ³Leska' bzejnie' no'r gor ka', nench na' gak ake' be'nn de bara'nne, na' bi nne ake' ke be'nne, na' bi ye'j ake' da llsolle be'nne. Llaya'l nni't ake' nnao ake' da wen na', nench na' nneze yezikre be'nne kan' llaya'l gon ake'n. ⁴Na' no'r gor ka', llaya'l wzejnie' akre' no'r xkwi'd ka', nni'trén ake' kwasro be'nn xhyio ake' ka', na' llie'rén akre' xhi'nn ake' ka'. ⁵Na' wzejnie' akroe' nnebia' kwin ake', na' gon ake' da wen nench gak ake' be'nn ra'llda'o yalle, na' gape wia rill ake' kwasro, gak ake' be'nn cha'o, na' wzenay ake' ke xhyio ake', nench nono nne ke xti'll Diosen'.

⁶Leska' llaya'l wzejnie'ro' be'nn byio llaban ka', nnebia' kwin ake', na' gon ake' ka llaya'l gon ake'. ⁷Na' rwe' biteze da gono', ben kon da nak wen nench re'e yezikre be'nn, 387 Tito 2, 3

akren' llaya'l gon ake'. Katen' llroe' llsedro' be'nne, bzejnie' akre' do ra'llo', na'llen' wroe'n llapo' Diosen' bara'nne. ⁸Na' bzo broe' bsede di'll lin', nench notno nne nake' di'll xhinnj. Le cha' soteze so'o wroe' wsedro' di'll lin', na'llen' waye'e be'nn ka' nnechach ko'on, bill yellel akre' bi da nne ake' kello.

⁹Na' goll be'nn wen llin ka', wzenay ake' ke xan ake'n, gon ake' biteze da ye'e leake', bi yelli'i ake' le'e di'lle. ¹⁰Bi kwan ake' bi da de ke xan ake'n, cha'a ake' do ra'll ake' nench re'e yezikre be'nne ka da wen na' llon ake', na' gakbe'e akre' xti'll Diosen' naken da wen, Dios be'nnen' nak wasrá kello.

¹¹Diosen' nllie're' lli'o be'nnach. na' ba broe're' lle'nre' yesre'e yeolol be'nne. ¹²Na' len na' llzejnie'n lli'o llaya'l kwej yichjilo yeolol da llonllo da bi llazra'lle', na' yeolol da zera'llllo gonllo da bi nak wen. Totollo so kwezllo nnebia' kwinllo nench gonllo da za'ke, na' gonllo da zej lixheje, na' sollo wxenra'll-llo Dios yellrio ni. ¹³Le chak zollo yellrio nin', zollo nbaraz chak bexhllo llin lla yed Jesucriston' da yobre, nse'e beni' xhen ke'en, nake' Dios kello be'nn nxenra'll-llo, na' be'nn nak wasrá kello. ¹⁴Le'en be'e latj bet ake' Le'e, nench bnitrawe' do'l kello, na' bayibe' yichjra'llda'ollon' rao da xhinni na', nench na' nakllo be'nn ke'e. Ka'n bene' nench yewello gonllo da wen.

15 Ka'n llaya'l wzejnie'ro' be'nne, na' ka'n llaya'l wtipra'llo' be'nne nench gon ake' da wen, na' tilo' be'nne llon da xhinnje, le Dios na' ba bse'le' rwe', na' ba benne' rwe' yel llnebia' nench wzejnie' akroe'. Bi we'o latje gono' billre da gon akzre' rwe' kaze.

Ka llaya'l gon be'nn ka' ba nxenra'll Jesucriston'

Basa'ra'll be'nn ka' ba nxenra'll Jesucriston', llaya'l wzenay ake', na' wzoa ake' xti'll koxchis, na' ke be'nn wnebia' ke ake' ka' batteze, na' llaya'l gon ake' da wen. ²Wzen akroe' bi llaya'l nne ake' ke be'nne. Bi llaya'l yesdile yeschach ake', llaya'l gak ake' be'nn cha'o, na' gap ake' yel llxhenra'll rao yeolol be'nne.

³Le lli'o bi byejnie'llo kana', na' bi bzoallo xti'll Diosen'. Bveile'llo di'll wenra'lle, na' bentezllo bi da xhinnje da bzera'll lo ra'llda'ollo. Bdallo benllo kon da bawello. Bzollo bchachrén lwellillo. Bwie be'nne lli'o, na' bwie lwellillo. ⁴Bixha bllin lla Diosen' be'nnen' nak wasrá kello, broe're' lli'o katek be'nn cha'o nake', na' katek nllie're' lli'o be'nnach, ⁵Na' basre'e lli'o kere bi da wen benllo, zan baya'chra'lle' lli'on. Na'llen' bayibe' yichjra'llda'ollon' ke da xhinnj ka' benllo, na' Spíritu ke'en bakoben yichjra'llda'ollon', na' ba bayakllo ka to be'nn kobe. ⁶Diosen' bse'le' Spíritu ke'en zorenen lli'o, le Jesucristo na'n be'nnen' nak wasrá kello na' bnnabe'n. ⁷Na' ka' basre'e lli'o rao do'l kellon', le bllie're' lli'on bayone' lli'o be'nn wen rawe'n nench sollo kwezllo, le nnézello wllin lla yellinllo gan' llie' na' ke chnare.

⁸Da ki ba bnia' ni, naken da li, na' gono' bien wzenay be'nn ka', Tito 3 388

wzejnie'ro'n len na'. Le be'nn ka' ba llonlira'll Dios, llaya'l kwek yichj ake' gon ake' da wen. Na' da ki ba bnia'n naken da wen, na' gakrenen noteze be'nne. ⁹Bi gono' txhen be'nn ka' llasdil llaschach ake' ke bi gaze bi di'll da'o. Na' bi kwek yichjo' di'll da bi za'ke ke dialla da xozxta'ollo ka'. Bi gono' txhen be'nn dile llaschach ake', akre zejen dan' nyoj le' ley dan' bzoj da Moisésen', le ka nak di'll ki, bi llakrenen be'nne, na' bi naken da za'ke.

¹⁰Na' cha' ren be'nn radj be'nn ka' lldop llonlira'll Jesucriston', llone' leake' chopre, bdil ake' bill gon ake' ka', na' cha' ba bdil akoe' to chop ras, na' bi llzenay ake', babej ake' ka'le. ¹¹Dan' bi llzenay ake' na', na'llen' nnézello ba nbeyi' ake', le nap ake' do'l ke da xhinnjen' llon ake' na'.

Kan' llaya'l gon Titon'

¹²Kate wse'la' be'nnen' nzi'i Artemas o cha' Tíquico gan' zo'o na', ben bien ga zerao sa'kro' yedo', nench yellayllo yellen' nzi'i Nicópolis, le ba bachoyra'lla' soa' na'ze doxhente be'o ka' llak zay. ¹³Na' ben yeolol da gak gono', nench gakreno' be'nnen' nzi'i Zenas, be'nnen' nzed ley na', na' Apolos na', na' kat yeza'a ake' gan' zo'o na', be'e ake' bi da gonrén ake' llin, nench ke bi yallj akre' tnez. ¹⁴Na' be'nn lwelljllo ka' nxenra'll Criston', llaya'l we'la'll ake' gon ake' da nak wen, na' gakrén ake' be'nn yallje bi da yalljre'. Le llaya'l gakllo be'nn llon da za'ke.

Be'nn lwellj Pablon' llwape' Titon' lliox

15 Yeolol be'nne llaso'nrén nada' xchin Diosen' txhen ganni, llwap ake' rwe' lliox. Na' llnnaba' wapchgo' lliox be'nn ka' zoreno' na', be'nn ka' nllie' lli'o, dan' nakllo txhen nxenra'll-llo Criston'. Dios na' gakrenchgue' yeololre. Ka'n gakchga.

YICH DAN' BSE'L POSTL SAN PABLO KE FILEMÓN

Pablon' llwape' lliox be'nnen' nzi'i Filemón

¹Nada' Pablo yoa' rill ya ni, dan' llyixjwe'ra' xti'll Jesucriston'. Timoteon' be'nn lwellillo na' ren nada' llzojto' rwe', llwapto' rwe' lliox lláketo' rwe' dan' nakllo txhen llonllo xhen Dios na'. ²Na' lekze llwapto' lliox be'nn ka' lldop ll-llay llonlira'll Jesucriston' rillo' na'. Na' leska' rwe' Apia, nako' ka be'nn zanto', na' rwe' Arquipo, llono' neto' txhen llonllo xchin Diosen'. leska' llwapto' rwe' lliox. 3Llnnabto' rao Xallo Diosen', na' rao Xanllo Jesucristo gakrenchgue' re', na' wzoa ake' yichjra'llda'oren' so kwezre nbaraz.

Filemón na' nxenra'lle' Jesucriston' na' nllie're' be'nn lwellje'

⁴Na' rwe' Filemón, yo'y ras kate lljadinra'lla' rwe' chak llalwilla' Diosen', lloa'a yel llioxken ke'e kan' ba llono' na'. ⁵Le ba benra' di'llen' kan' nxenra'llo' Xanllo Jesucriston', na' kan' nllie'ro' be'nn lwelljllo ka' be'nn ka' ba nxenra'll Jesucriston'. ⁶Na' llnnaba' gakrén Diosen' be'nn ka' ba llonlira'll Jesucriston', dan'

be'rén akoe' di'll kan' llono' rwe' llonlira'lloe'. Llnnaba' gakrene' leake' nench nnez akre', yeolol da wen na' llon Diosen' lo yichjra'llda'o lli'o nxenra'll Le'e. ⁷Be'nn bi'che, llawera' na' llakchochra'lla' bnnezra' nllie'ro' be'nn lwelljo' ka' llonlira'll Jesucriston', le llakrén akoe' nench nni't ake' nbaraz.

Pablon' bnnabe yezi'xhen Filemón na' ke Onésimo

⁸Ke len na' dan' naka' postl ke Criston', napa' yel llnebia' nench na' llepa' rwe' bin' llaya'l gono'. ⁹Zan nakllen wen na' ga'tyoera' rwe', ni ke dan' nllie'ro' Criston', le nada' Pablo ba naka' be'nn gor, na' lekze ka' yoa' rill ya ni, dan' llyixjwe'ra' xti'll Jesucristo na'. ¹⁰Na' llnnaba' okré rao rwe', ni ke Onésimo ni, be'nnen' ba nona' ka xhi'nna'. Le chak yoa' lo rill ya nin', broe' bsedre' nench gonlira'lle' Jesucriston'.

¹¹Kana' bi goke' be'nn wen llin wen ko'o, zan nna' ba nake' be'nn wen llin wen ko'o, na' lekze ka' kia' nada'. ¹²Na' ba llase'le' rao' da yobre, benchgare' kan' llonkzro' nada'. ¹³Zera'lla' kwis yega'nnrene' Filemón 390

nada' nench gakrene' nada', gone' dan' llaya'l gono' chak yoa' lo rill ya ni, dan' llyixjwe'ra' xti'll Jesucristo na'. 14 Zan bi lle'nra' bi da gona' to wrazza', le naken ko'o rwe' nne'o akre gona', nench do ra'llo' gono' cha' bi da wen gono', kere no zo wchie're rwe'n. ¹⁵Dios na'n be'e latj baza'a Onésimon' rillo'n choll, nench yezore txhen ke chnare. 16 Na' nna' bill gonroe' ka llonro' kon to be'nn wen llin ko'o, le nna' ba nake' ka bi'cho' dan' nake' lli'o txhen llonlira'll-llo Xanllo Jesucriston'. Nada' nllie're', na' rwe' llaya'l-ll llie'roe', kere kan' nllie'ro' noteze be'nnach, zan kon kan' nllie'ro' be'nn lwellio' llonlira'll Xanllo na'.

¹⁷Na'llen' cha' llakro' nada' ka to bi'cho', ni ke dan' nxenra'll-llo Jesucriston', bazenia'na'we' kon kan' llonkzro' nada'. ¹⁸Na' cha' bi da xhinnj benre' rwe' o cha' bi llba'ye' ko'o, nada' wayixhja'n. ¹⁹Kwinkza' nada' Pablo llzoja' da ni, nada' wayixhja' cha' bi da llba'ye'. Na' bitbi nia' dan' llba'yo' rwe' kia', ke dan' ba de yel nban ko'o ke chnare. ²⁰Be'nn bi'che, dan' nxenra'll-llo Jesucriston', lle'nra' gono' dan' llnnaba' ni, ka to okré kia'. Benchga ka soa' nbaraz, le nakllo txhen ren Cristo na'.

²¹Zoa' beza' wzenayo' kia', na' gonllo' ye ra't ker ka dan' nia' rwe' ni, ke len na' llzoja' rwe'. ²²Na' ye to da llnnaba', lle'nra' yedsoa' rillo'n kat yeda' gan' zoren'. Le ba beza' yob yedwia' re', kan' llnnabre rao Diosen' katen' llalwillre' na'.

Be'nn ka' lla'a ren Pablon' llwap ake' Filemón na' lliox

²³Epafras yo'rene' nada' txhen rill ya ni, dan' llyixjwe're' xti'll Xanllo Jesucriston', llwape' rwe' lliox.
²⁴Na' leska' be'nn ka' llakrén nada' rao xchin Diosen', be'nn ka' nzi'i Marcos, na' Aristarco, na' Demas, na' Lucas, llwap ake' rwe' lliox.

²⁵Xanllo Jesucriston' gakrenchgue' re'. Ka'n gakchga.

YICH DAN' NYOJ KE BE'NN HEBREO KA'

Diosen' bse'le' Xhi'nne' nench be'rene' be'nnach di'lle

Kana' Diosen' be'rene' da xozxta'ollo ka' di'll da zan ras. ka nak bse'le' be'nn ka' jatixjwe' xti'lle'n, na' nlla'a nlla'a be'e toe' toe' len. 2Na' nna' ba bllin lla ba be'rén Diosen' lli'o di'll, dan' bse'l Xhi'nne'n bzejnie're' lli'o. Le Xhi'nn Dios na'n bene' yebá na' yellrio. Na' wllin lla gak rallne'e yeolol da de. ³Na' ka nak Le'en, llroe're' ka be'nn za'ken nak Diosen', le ka ya'nnen' nak yichjra'llda'o Xe'e Dios na'n, nak yichira'llda'we'n. Na' Xhi'nn Dios na', llone' nench yeolol da de bi te ke, le nape' yel wak nench llak kon ka ne'en. Le'en bzane' kwine' gote' nench baxhí bayall lli'o, ni ke da xhinnj kello na'. Bayoll na' bayepe' yebán', jallie' kwit Xe'e Diosen' chla' cha'we, na' llnebia'rene' Le'e.

Xhi'nn Diosen' naklle' be'nn brao ka angl ka'

⁴Xhi'nn Diosen' za'klle' ka angl ka', be'nn ka' llon llin ke Diosen'; na' Dios na' be'e to re'e da nakll de bara'nne xhen ka angl ka'. ⁵Le Diosen', ni to angl ka', bi nna ye'e kan' golle' Xhi'nne'n, lle'e Le'e:

Rwe' nako' Xhi'nna';

nna' lla ba broe'ra' non' nako'. Na' bi nna nne'e ka di'll ki ke noteze angl, kan' bne'e ke Xhi'nne'n, bne'e:

Nada' gona' nench wroe'n naka' Xe'e,

na' gona' nench wroe'n nake' Xhi'nna'.

⁶Na' Xhi'nn Diosen' nake' be'nn le zerawe za'ke. Ke len na' kan' bse'le' Le'e yellrio ni, bne'e:

Yeololte angl kia' ka', llaya'l wxenra'll ake' Le'e.

⁷Na' bne'e ke angl ka':

Angl kia' ka' be'nn ka' llon xchina', gak ake' ka be' da llechj,

na' gak ake' ka bel yi'.

⁸Zan ke Xhi'nne' na' be'e di'll, bne'e: Rwe'n nako' Dios, na' nnebia'o ke chnare.

Na' ka wen na' llono' llnebia'on, llono' da zej lixheje.

⁹ Llawero' da zej lixheje, na' llwiero' da xhinnj.

Ke len na' brej Diosen' rwe', ba bzoe' rwe' nbaraz ka noteze be'nne. Hebreos 1, 2 392

¹⁰Na'll ne xti'll Diosen' ke Xhi'nne'n:

> Xana' Dios, beno' yellrion' ka bzoraoten',

na' yeolol dan' llre'llo le' yebá na', da benkzo' rwe'n.

¹¹ Na' wllin lla kate te ke yeolol da ka' llre'llo le' yebán', na' yellrio ni,

zan rwe' bi te ko'o, zokzo' ke chnare.

Na' le' yebán' ren yellrion', yeyoen ka llayoe to ra'll da ba nllin.

¹² Na' le' yebán' ren yellrion', gono'n ka llon to be'nne kat llatobe xhe'e.

Zan ka nak rwe', toze ka nakso' ke chnare, kbat llin lla te ko'o.

¹³Ni to angl ka', bi nna ye Diosen' kan' golle' Xhi'nne' na', lle'e Le'e: Blle' kwita' cha'we ni, nnebia'llo txhen,

na' gona' nench yeolol no llwie rwe', yedlle' ake' xhnia'o ni, wxhexj yichj ake' rao'.

14 Na' ka nak angl ka', yeolole' nak ake' be'nn wen xchin Dios, na' llse'le' leake' llakrén ake' lli'o ba basrá Diosen'.

Llaya'l wzenayllo ke Dios nench yeke'e do'l kellon'

Dan' nak Xhi'nn Diosen' be'nn za'kll ka angl ka', llaya'l wzenayllo xti'lle'n do yichj do ra'll-llo ka dan' ba bénkzello na', le wanra'll-llon cha' bi wzenayllon do yichj do ra'll-llo. ²Gokra'll Diosen' wzenay da xozxta'ollo ka' ke ley ke'e dan' bdixjwe' angl ka'. Ke len na' be'e Diosen' yel llza'kzi' ke

ake' da llaya'l gak ke totoe', dan' bi bzenav ake' ke'e na', ben ake' kon da bnen ke ake'. ³Kere da yerallo, bi si'llo yel llza'kzi' dan' gonne' kellon', cha' bi wzenayllo xti'll Xanllo Jesúsen', Le'e bene' da za'k nench basre'e lli'o. Kwine' bdixjwe're' da nelle, na' be'nn ka' bene kan' bne'e na', ba broe' akre' lli'o naken da li. ⁴Leska' ni ke Dios na'n ben ake' da yebánello, na' be'e leake' zan yel wak, na' kone Spíritu ke'e na', ben ake' zan da wen. Na' da ka' yeololen gok kon kan' bne Dios na', nench bnnézello xti'll Xanllon' naken da lixheje.

Jesucriston' goke' ka lli'o be'nnach

⁵Kere angl ka' nnebia' kat llin lla ga't yellrio koben' dan' lloe'llo xti'll na'. ⁶Na' nyoj ra't le' xti'll Diosen' gan' be'rén to be'nne Le'e di'lle, bne'e:

¿Noxha nak neto' be'nnachen', lli' yichjo' neto'?

Na' ¿bixchen badzenia'na'o llakreno' neto'?

⁷ Na' angl ka' nak akte' ye ra't be'nn brao ka be'nnache.

Beno' nench be'nnachen' nake' be'nn za'ke nench llake' xhen, na' gap ake' le'e bara'nne.

Na' beno' nench gak yeolol da zjadé rao na'a be'nnach.

⁸Na' ben Diosen' nench ni't yeolol da de xhnia' be'nnache, bibi bkwa'nn Diosen' da bi broe' rao na'a be'nnache, la'kze bi nna re'llo gak yeololen rao na'a be'nnachen'. ⁹Na' yeololte ba yo'kze rao na'a Jesúsen', la'kze chak bzoe' yellrio ni, gokll angl ka' brao ka Le'e. Na' nna' 393 Hebreos 2, 3

ba bzane' kwine' gote', na'llen' ba ben Diosen' llaklle' xhenll ka leake' nench nakbie' nake' be'nn za'ke. Le dan' nllie' Diosen' lli'o be'nnach, ke len na' be'e latj got Jesúsen'.

¹⁰ Diosen' bene' be'nnache, na' yeolol da zjadé, nench wxenra'll-lloe'. Na' bene' wen ke lli'o, le lle'nre' be'nn zan gak ake' xhi'nne', na' yellín ake' gan' llie' na', gan' yo' beni' xhen, na' bllie' bia'a bxha'kzi' Jesúsen' nench basre'e lli'o ke chnare. ¹¹ Jesúsen' ba bene' lli'o rallna'a Dios, na' nakllo Jesúsen' txhen nakllo xhi'nn Dios. Na'llen' bi llaye'e Jesúsen' ye'e lli'o nakllo bi'ch lwellje'. ¹² Da nyojkze, Jesúsen' golle' Diosen':

We'rena' bi'ch lwellja' xti'llo', na' ren be'nn ka' ndop nxenra'll ake' rwe', gola' gona' rwe' xhen.

¹³Na'll bne Jesúsen':

Nada' zoa' nxenra'll-lla' Diosen'. Na'll ne'e da yobre:

Ganni zoa' txhen ren be'nn ka' bro' Diosen' rao na', be'nn ka' ba nake ka xhi'nna'.

14Lli'on ba bxhi'i Diosen' ka no xhi'nne', nakllo be'nn de be're ren llen, ke len na' gorjkze Jesúsen', nake' be'nn de be're ren llen. Na' dan' gote' na'n bzoere' bzoe' daxi'on chla're dan' nap yel waken' ll-lleyi'n be'nnachen'. 15 Na' bene' da bill llebllo gatllo kan' lleb yezikre be'nnach ka', nna zo ake' nban ake', lleb ake' gat ake'. 16 Na' dan' bede' yellrio ni, kere bede' gakrene' angl ka'n, bede' nench gakrene' lli'o nakllo xhi'nn dialla Abraham na'. 17 Ke len na' benen bien goke' doxhen kan' nak lli'o

be'nnach, nench goke' bxoz brao kello rao Dios, na' baya'chra'lle' lli'o. Bzane kwine' ballayrawe', ni ke da xhinnj kellon', nench na' wazi'xhen Diosen' kello. ¹⁸Na' dan' bllayrawe' kan' bko'yele daxi'on Le'e gone' da xhinnj, na' bi bene' da xhinnj, na'llen' nnezre' akren' gakrene' lli'o kat llko'yele daxi'on lli'o gonllo da xhinnj.

Za'kll Jesúsen' ka da Moisésen'

Be'nn Di'Che, Da Day,
lli'o nakllo rallne'e, na' llaya'l lliadinra'll-llo Xanllo Jesucristo be'nnen' bse'le'. Nake' bxoz brao kello be'nnen' llonlira'll-llo. ²Jesúsen' bene' kon ka va'nnen' bne Dios. be'nnen' bse'l Le'e chak bde'e yellrio ni, ka'kzen' ben da Moisésen' kan' gokrene' da xozxta'ollo ka' kana', be'nn ka' gok dialla ke Dios. ³Na' Jesúsen' llaya'l si'lle' yel bara'nn ka da Moisésen', ka to be'nn llon to yo', llaya'l si'lle' yel bara'nn kerke be'nnen' zo chelteze lo yo' na'. ⁴Le yeololte yo' ak, zo be'nn ben len, na' Dios na'kzen' ben yeolol da de. ⁵Da Moisésen' goke' ka to be'nn wen llin ke Dios, bene' kon kan' bne Dios na', nench gokrene' da xozxta'ollo be'nn ka' gok dialla ke Dios na! Na! le'en be'e di'll ke da ka! za chixjwe' Diosen'. ⁶Na' Criston' nake' Xhi'nn Dios, na'llen' bzoe' xti'lle'n, na' nake' xan veolol lli'o nak dialla ke Dios. Na' ka'n naken cha' sechichllo wxenra'll-llo Diosen' doxhente, na' llawello nnézello gak wen kello.

Wzokzllo nbaraz rao Dios

⁷Ke len na' llaya'l wzenayllo kan' ne Spíritu ke Diosen' gan' nyoj di'llen' nen: Hebreos 3, 4 394

Cha' re' yénere kate nne Diosen' re',

8 bi gakre be'nn ra'llda'o war, kan' baso'n be'nn ka' kana', bi bzoa ake' xti'lle'n kan' bda'ba'y ake' Diosen' latj dachen'.

⁹ Na' bda'ba'y xozxta'ore ka' nada',

la'kze bre'e aktere' kan' ben akre' rao choa (40) iz.

¹⁰ Na'llen' goklla'a be'nn ka' blla'a ganna', na' bnia':

"¿Gara dara yichjra'llda'o ake'n, bi lljadinra'll ake' nada'? Na' bill nao ake' xhnneza'n, gon ake' kan' lle'nra' na'."

¹¹ Na'llen' blla'a ake', na' bdichjbia' ke ake' bnia':

"Kbat si'i ake' banez yezi'ra'll ake' kan' llazi'ra'lla' nada'."

12Be'nn bi'che, lewiá ke we're latj nnebia' da xhinnjen' re', nench ke lloj yichjre bill wxenra'llre
Dios be'nnen' zo ke chnare. 13 Nna' chak nna de latj wxenra'll-llo
Dios, lewnneyoe lwelljre yeo lla, nench ke siye'e da xhinnjen' re', na' gakre be'nn ra'llda'o war. 14 Da li gakllo Criston' txhen, cha' nna zollo nxenra'll-lloe' kate llinte lla gatllo, kon cha' nxenra'll-lloe' kan' bxenra'll-lloe' da nellte.

15 Xti'll Diosen' nyojen nen:
Cha' yénere kate nne Diosen' re',
bi gakre be'nn ra'llda'o war
kan' baso'n da xozxta'ore ka'
kana', bi bzoa ake' xti'lle'n.
16 Na' dan' nen ka', lloe'n di'll ke da
xozxta'ollo ka' babej da Moisésen'
gan' nzi'i Egipto. Ben akre' kan' goll
Diosen' leake', na' bi bzenay ake',
bdilrén ake' Diosen'. 17 Ke len na'

goklla'a Diosen' leake' choa iz, ni ke da xhinnjen' ben ake' na', na' wasa't ake' kan' nna lla'a ake' latj dachen'. ¹⁸Be'nn ka', bi bzoa xti'll Diosen', bdichjbia' Diosen' ke ake', bne'e bi si'i ake' yel nbarazen', yezi'ra'll ake' kan' llazi'ra'll Dios na'. ¹⁹Na' llroe'n bi byejle' ake' ke Diosen', ke len na' bi gok so ake' nbaraz yezi'ra'll ake' kan' llazi'ra'll Le'e.

Na' lekze ni ke lli'on bne Diosen', be'nn chejle' xti'lle'n nni't ake' nbaraz yezi'ra'll ake' kan' llazi'ra'll Le'e. Ke len na' llaya'l bi gakllo wedenay rao Diosen'. ²Lli'o ba bénello Di'll Wen na', nench gak yerallo rao da xhinnjen', ka di'll dan' bene da xozxta'ollo ka' kana', na' di'll dan' ben akre'n, bibi de benen ke ake' le bi byejle' ake' ke'e. ³Na' lli'o llejle'llo kan' ne Dios na', ba zokzllo nbaraz llazi'ra'll-llo kan' llazi'ra'll Le'e. Na' nyoj dan' bne'e ke da xozxta'ollo ka', bne'e:

Na'll goklla'a ake' bdichjbia', bnia':

"Kbat si'i ake' banez yezi'ra'll ake' kan' llazi'ra'lla' nada'." Diosen' bzorao llazi'ra'lle' kan' bayoll bxie' yellrion'. ⁴Na' zo ra't gan' nyoj xti'll Diosen' kan' bene' lla gallen', nen:

Kat bllin lla gallen', billbi ben Diosen', kon bzoe' nbaraz bazi'ra'lle'.

⁵Na' leska' nyoj kan' bne'en, nen: Kbat si'i ake' banez yezi'ra'll ake' kan' llazi'ra'lla' nada'.
⁶Na' nna naken da li, bal be'nn bi nna chejle' ake' xti'll Diosen', na' ni't ake' bi nna so ake' nbaraz yezi'ra'll ake', kan' llazi'ra'll Le'e, na' be'nn ka' bene Di'll Wen ke'en 395 Hebreos 4, 5

kana' bi byejle' ake', na' bi gok yezi'i ake' banez yezi'ra'll ake', yel bi bzenay ke ake' na'. ⁷Bde na' bne Diosen' da yobre: "Nna' wak yezi're banez yezi'ra'llre." Na' bene' nench bzoj da rey Daviden' da ni, nen:

Cha' nne Diosen' re' nna', bi gakre be'nn ra'llda'o war. ⁸Da Josuén' bche'e da xozxta'o be'nn Israel ka', gan' bxhi'i ake' vellrio dan' be'e Diosen' leake', na' bibi gok gone' nench nni't be'nn ka' nbaraz yezi'ra'll ake'. Ke len na' bdere be'e Diosen' di'll, bne'e wllin lla cha'a be'nn yezi'i ake' banez yezi'ra'll ake'. 9Ke len na' ba brej Diosen' be'nne nench gak ake' rallne'e, leake'n nni't ake' nbaraz vezi'ra'll ake' ka nbarazen' bzo Le'en. ¹⁰Na' be'nn ka' ba llazi'ra'll ake', bill llon ake' ka nen ke ake', llazi'ra'll ake' kan' llazi'ra'll Diosen', ka bayoll bxie' yeolol da zjadé. ¹¹Na'llen' llaya'l we'la'll-llo chejle'llo xti'll Diosen' do yichj do ra'll-llo, nench yezi'llo banez yezi'ra'll-llo kan' llazi'ra'll Dios na', bi gak kello kan' gok ke be'nn ka' bi byejle' xti'lle'n kan' ben da xozxta'ollo ka'.

12 Xti'll Diosen' napen yel wak yekoben yichjra'llda'o be'nn llzenay len. Llazen lo yichjra'llda'ollo, na' llonllen ka to spad da nla llop la' rawe, le llroe'n lli'o cha' llzenayllo ke Diosen' o cha' ke kwinllo, na' llzejnie'n lli'o ka xhbab da yo' lo yichjra'llda'ollon', na' ren yeolol da zera'll-llo cha' naken da wen o cha' naken da xhinnj. 13 Bibi de da nga'ch rao Diosen'. Le'en nnezre' yeololte da yo' lo ra'llda'ollo, na' wllin lla kat nnabyollre' lli'o ke yeolol da benllo.

Jesúsen' nake' bxoz brao kello

¹⁴Jesúsen' be'nnen' nak Xhi'nn Diosen' ba bayepe' yebá, na' llie' gan' llia Dios na'. Nake' bxoz brao kello be'nn le zerawe za'ke'. Ke len na' llava'l seteze sello wxenra'll-lloe' kan' ba bnello gonllo na'. 15 Jesúsen' be'nnen' nak bxoz brao kellon'. llakbe're' bi da ka' nak da zed kello, le daxi'on gokra'llen wko'yelen Le'e gone' da xhinni, na' la'kze bllayrawe' ka ya'nnen' llayrao lli'o, na' bi bene' da xhinnj. ¹⁶Ka naken nake' bxoz brao kello, na' llaya'chra'lle' lli'o, na'llen' llaya'l yelwill-llo Diosen' gan' llie' na', bi llebllo we'renlloe' di'lle, nnabllo yezi'xhene' kello, na' gakrene' lli'o, le nllie're' lli'on.

Yeolol be'nn ka' ba gok bxoz • brao ke yell Israelen', be'nn brej lwellj be'nnach ake, gok rao na'a ake' lljasán ake' bi da lljasán ake' rao Dios na', baso'te' bayi'x ak, brarj ake' xchen akba' nench bazi'xhen Diosen' do'l xhia ke da xozxta'ollo ka'. ²Na' bxoz ka' bdap ake' yel llxhenra'll ke be'nn bi nna chejnie' kan' llaya'l gon ake' na', na' ren be'nn ka' ba nxoayay da xhinnjen' leake', le lekze be'nnach be'nn wen da xhinnj leake'. ³Ke len na' benen bien, bxoz ka' baso'te bayi'x ak, na' brarj ake' xchenba', nench bnnab ake' yezi'xhen Diosen' da xhinnj ke ake'n ren da xhinnj ke yezikre be'nne.

⁴Na' ni to bxoz ka' bi bayoe'rao kwin ake', na' bi brej kwin ake' gak ake' bxoz brao, Dios na'kzen' llbej leake', totoe' gak ake' bxoz brao kan' bene' breje' da Aarón. Hebreos 5, 6 396

⁵Ka'kzen' gok ke Criston', bi bayirje' akre gone' nench gake' xhen, ni ke brejze kwine' gake' bxoz brao, Dios na'kzen' breje' Le'e, na' golle' Le'e: Rwe'n nako' xhi'nna', nna' lla ba broe'ra' bzoa' rwe'.
⁶Na' ga yobre nyoj ye to da bne'e: Rwe' nako' bxoz ke chnare, kan' gok bxoz be'nnen' re

Melquisedec. ⁷Na' Criston' chak bde'e yellrio ni, balwille' Xe'e Diosen' be'nnen' nape' yel wak nench yesre'e Le'e bi gate', na' bnne'e zillje bllelle' bnnabe' gakrene' Le'e. Na' bxhexi vichi Criston', bene' kan' bne Xe'e na', na'll Xe'e Diosen' bzenaye', na' gokrene' Le'e nench bi bllebe' yel goten'. 8 Na' Criston' la'kze nake' Xhi'nn Dios, bllayraokze' yeolol da ka' gok ke'e, na' bzoe' xti'll Diosen' nench byejnie're' kan' llak ke lli'o be'nnache. ⁹Na' bayoll gok ke'e yeolol da gokra'll Diosen', na'llen' gope' yel wak, be'e yel llasrá ke yeolol be'nn wzenay ake' ke'e. 10 Kan' naken Dios na'n, breje' Le'e nake' bxoz brao, nake' ka bxoz Melquisedec.

Llaya'l wiallo nench ke ganra'll-llo xti'll Diosen'

¹¹Nna dell da nnia' re' ke da ki, na' to bni' naken nnia'n, na' chejnie'ren, le bill lle'nere wzenayren. ¹²Da xhen ba gok nxenra'llre Criston'. Ba go'l wzejnie're be'nne xti'll Diosen' chenake, na' latj wzejnie'ren na', nna yálljzere no wzejnie' re' da yobre, ka da ka' bsedre nellte. Ke len na' nakre ka to bida'o nna lla'll, latje ba llaya'l gaobe' yel

wao. ¹³Na' be'nn ka' nna yallj wsed akre' leake', nak ake' ka to bida'o nna lla'll, bi nna chejnie' akre' xti'll Diosen' kwasro, nench gon ake' da zej lixhej rao Dios. ¹⁴Na' dan' ne xti'll Diosen' da nakll bni', naken ka to yel wao da llao be'nn gore. Na' be'nnen' ba llejnie' len na', wayakbe're' kat bi da yenre' cha' naken da wen o cha' naken da xhinnj, le ba yo'rawe' llzenaye' ke Dios.

Ke len na' ba llaya'l garllo, kere le da leze wiallo ka da ka' bsedllo kan' bxenra'll-llo Xanllo Jesucriston', na' bill wabi'llo wiallo akre zejen dan' llayate be'nn, o cha' akre gak ke be'nn llon da xhinnj, na' akre llaya'l wxenra'll-llo Diosen', ²na' akre zejen dan' llchoa' be'nn ka' nis, na' dan' llxoa ta'kllo yichj be'nne llnnabllo gakrén Diosen' le'e. Bill yalljen wsedllo kan' gak kat yesbán Diosen' be'nn wat ka', na' katen' choybie' sa'kzi' be'nn ka' ben da xhinnje. ³Na'llen' chejll-llo chi'ollo cha' Diosen' gonne' latj.

⁴Ni't be'nn ba byo' beni' ke Criston' yichjra'llda'o ake', na' ba llakbe'e akre' kan' nak yel nban dan' llonn Criston', na' zo Spíritu ke Diosen' lo yichjra'llda'o ake'. ⁵Ba nnez akre' xti'll Diosen' naken da wen, na' ba nombia' ake' yel wak ke Diosen' dan' wroe'llre' be'nnache. ⁶Cha' llin to lla wsanra'll ake' chras, na' bill gonlira'll ake' Criston', na' kwej vichj ake' xti'lle'n to chi'ze, kere waklle wayat akre' ke dan' ba brej vichj ake' Le'en, le lo ra'llda'o ake' na'n, ba llon ake' txhen be'nn ka' bda'a Xhi'nn Diosen' le' yay cruzen', na' llon ake' nench be'nn

397 Hebreos 6, 7

yobre wie' Le'e. ⁷Llaya'l gak yichjra'llda'ollon' ka to yellrio cha'o ga llaz be'nne. Llayoll llak yejen' doxhen, na'll llak bi da llaz ake'. Na' llak da yallje be'nn ka' llaz na'. Na'll ba benla'y Diosen' yellrion' nak ka'. ⁸Zan be'nn ka' bi lle'ne wzenay xti'll Diosen', nak ake' ka to yellrio ga llra' yay ye'che, na' billre yi'x da bi llon llin. Yellrion' nak ka' bibi za'ken, na' ba lle'ne xane'n kweje'n yichje', na' yi'x dan' llachj rawe na', wllin lla wzeye'n.

Sello war le llonllo rez yellinllo gan' llia Diosen'

⁹Re' be'nn bi'che, nllie'ra' re', la'kze ba bia'a di'llen' ka', llakra' bije gonre kan' llon be'nn ka' llsanra'll xti'll Diosen', na' gonjere wen, le ba basrá Diosen' re' rao da xhinnjen'. 10 Diosen' zeje' lixheje, bi ganra'lle' kan' ba benre xchine'n, na' ka yel nllie'n zo lo vichira'llda'ore, na' kan' nna llonre nna', llakrenre vezikre be'nne nxenra'll Le'e. 11 Na' zera'llto' totore nnaore gonre bi da ka' llaya'l gonre do yichi do ra'llre, chaga bi nna llin lla gatre, nench nnézere vellinre gan' llia Dios na'. 12 Lle'neto' bi gakre be'nn xhawatraz ka dan' ne Dios na'. Na' lle'neto' gonre kan' ben be'nn ka' blla'a kana', bxenra'll ake' Dios, byejle' ake' gon Diosen' kan' golle' leake' na', na' bdap ake' yel llxhenra'll bllinte lla bene'n.

13Kan' goll Diosen' da Abraham na', be'nn zan gak xhi'nn dialla ke'e, bzoa kwine' gak kan' bne'e na', le nollno zo be'nn napll yel llnebia' ka Le'e. ¹⁴Na' bne'e: "Da li gonkza' nench gak wen ko'o, na' cha'a be'nn

zan xhi'nn dialla'o." ¹⁵Na' Abraham na' bdape' yel llxhenra'll chak breze', na'll bllin lla bzorao llak kan' bne Diosen'. 16 Be'nnach ka' yo'rao ake' llzo ake' Diosen' kat bi da ne ake', le llnebia'll Diosen' ka leake'. Kone ka' billbi de da gakyollrén ake' leake', ¹⁷Na' bzoa Diosen' kwine' nench nneze be'nn ka' nak xhi'nn dialla ke da Abraham na', kere da te ke dan' bne'e gone'n. 18 Diosen' bene' chop da ki: bne'e kan' gone', na' lekze' bzoa kwine' nench nnézello Le'en gak gone' kan' bne'e na', na' kere da te gon bi gak kan' bne'en. Na' lli'o ba llejle'llo xti'lle'n, ba bazi'xhene' kello, na' yewello nnézello vellinllo gan' llie'n, na' Diosen' bi llak we'e di'll wenra'lle. ¹⁹Na' nnézello Le'en gone' kan' ba golle' lli'o. Ke len na' zello choch, ka lli' to barco kat nllejen to ya zi'i, na' lloa' xti'lle'n nen de to latj kello yebá gan' llie' llnebie'n. ²⁰Jesúsen' ba blliarawe' byoe' gan' zo Diosen', gan' nono be'nnach gok cho', na' bene' nench lli'o gak cho'llo. Le nake' bxoz brao ke chnare, nake' kan' gok bxoz Melquisedec.

Jesúsen' nake' kan' nak bxoz Melquisedec

Melquisedec na' goke' be'nn wnebia', na' bnebie' gan' nzi'i Salem, na' Dios be'nnen' nake zeraoze be'nn brao, breje' le'e goke' bxoz. Na' Abraham na' zaze'e rao wdile gan' jene' gan ga'y be'nn wnebia', na' Melquisedeken' jatile' le'e, na' benla'ye' le'e. ²Na' kan' zaza'a Abraham na', zanse'e da jatope' da bene' gan rao wdil na', na' bene'n chi kwen, na' be'e to

Hebreos 7 398

kwen ke bxoz Melquisedeken'. Na' Melquisedec na' zeje di'll "be'nn wnebia' zej lixheje". Na' goke' be'nn wnebia' ke be'nn ka' lla'a gan' nzi'i Salem, zeje di'llen' "be'nn wnebia' ke be'nn zjani'te nbaraz". ³Bi nyojen cha' no gok xaxhna' Melquisedeken', na' cha' no gok xozxta'we', na' ni ke nyojzen bat gorje' na' bat gote'. Na'llen' nello Melquisedeken' nake' ka rebze Xhi'nn Diosen', na' nake' bxoz ke chnare.

⁴Na' lewiá ke ka be'nn braon' gok bxoz Melquisedeken'. Ke len na' brej da xozxta'ollo Abraham na', to kwen rao chi kwen dan' iatope' rao na'a be'nn wnebia' ka'. na' be'en bxoz Melquisedeken'. ⁵Na' da xozxta'ollo be'nn ka' gorje rao dialla ke da Levín', be'nn ka' gok bxoz ke yell Israel na', bchixhj ake' to kwen weje rao chi kwen yeolol bi da go't ke yezikre be'nn wrall ke ake' ka', le ka'n nyojen le' ley dan' bzoj da Moisésen'. Na' yeololkze gok ake' dialla ke da Abraham, bxoz ka' na' yezikre be'nne. ⁶Na' Melquisedeken' la'kze bi gorie' rao dialla ke da Levín'. Abraham na' be'e le'e to kwen weje, rao chi kwen da ka' jatope' na', na' Melquisedeken' benla'ye' da Abraham na', be'nnen' bcheb Diosen' gonla'ye'. ⁷Na' nnézello be'nnen' llak llonla'ye' be'nn yobre, za'klle' kerke be'nnen' llak la'y na'. 8 Na' be'nn ka' nak bxoz kan' ne ley dan' bzoj da Moisésen', lloe' ake' leake' to kwen weje rao chi kwen rao yeolol bi da de ke ake', na' bxoz ka' nak ake' lwellj be'nnachllo be'nn llat. Na' ke bxoz

Melquisedeken', xti'll Diosen' lloe'n di'll ke'e ka to be'nn nna nbankze'.

Na' dan' be'e Abraham na' le'e da ka', wak nnello da Leví na'n be'e Melquisedeken' to kwen weje rao chi kwen da ka'.

Levín' rao dialla ke da Abraham na', na' Leví na'n goke' xozxta'o be'nn ka' gok rao na'a ake', btop ake' da ka' be'e be'nn Israel ka' ke Diosen'.

¹¹Diosen' be'e be'nn Israel ka' ley ke'en kana', na' bxoz ka' gorj rao dialla ke Leví, be'nn ka' gok xhi'nn dialla ke be'nnen' golle Aarón na', benrén ake'n llin. Bixha bxoz ka' bibi gok gon ake' nench gak yichjra'llda'o be'nnachen' yall rao Dios. Ke len na' byalli yed ye to be'nn nak bxoz kello ke chnare, na' Le'en nake' ka bxoz Melquisedec na', kere ka da bxoz Aarón, ¹²Na' ka nak ba zo bxoz ke chnare kello, ke len na' leska' byalljen blla'a leyen'. ¹³Le Xanllo Jesúsen' be'nnen' nak bxoz kello, bi gorje' rao dialla ke da Levín', le nono gok bxoz rao yeolol be'nn gorje lo yo' rill Jesúsen'. ¹⁴Le nnézello Xanllo Jesúsen' gorje' rao dialla ke da Judá, na' da Moisésen' bi bzoje' le' leyen' gan' nen be'nn garje rao dialla ke da Judán' gake' bxoz.

¹⁵Na' nakbie'kze ba blla'a leyen', le ba zo be'nnen' nak bxoz kob kello, na' nake' ka bxoz Melquisedec na'. ¹⁶Bi gorje' rao dialla ke da Leví kan' gok bxoz ka', be'nn ben llin kan' ne leyen', zan ka nake bxozen' bne Diosen' yede', naplle' yel wak le chras bi gate'. ¹⁷Kin' nyoj dan' bne Diosen' ke'e, nen:

Nako' bxoz ke chnare, kan' nak bxozen' re Melquisedec. 399 Hebreos 7, 8

¹⁸Na' bxoz ka' bne Diosen' bni't kana', bill noe' latj so ake' nna', le dan' bllia leyen' bia'a gon ake', bi gok yeka'n da xhinnj ke be'nnach to chi'ze. ¹⁹Na' lekze bi gok gon leyen' gak yall yichjra'llda'o be'nnach rao Diosen'. Zan nna' ba llakll wen kello, le ba zo bxoz kello, be'nn ba baka'a do'l xhia kello to chi'ze, nench llak lljabi'yllo gan' zo Diosen'.

²⁰Bzoa Diosen' kwine' nench nnézello da li zokze Jesúsen', na' nake' bxoz kello. ²¹Le bi bzoa kwin Diosen' kan' bwa'le' xhi'nn dialla ke Aarón na', gak ake' bxoz. Le nyojen kan' golle' Jesúsen' nen:

> Diosen' ba bzoa kwine' nne'e da li bi wche'e kan' golle' Le'e gone':

"Nako' bxoz ke chnare, kan' nak bxoz be'nnen' re Melquisedec."

²²Ke len na' zo Jesúsen' llone' nench nnézello gakrén Diosen' lli'o ke chnare kan' bne'e gone' na'. Kan' bne'e gakrene' lli'o nna', za'kllen ka dan' golle' xozxta'ollo ka' kana'. ²³Na' be'nn ka' gok bxoz kan' ne ley dan' bzoj da Moisés na', gok ake' be'nn zan, le ka got tweje', le bazoa akte' roraze' be'nn yobre. ²⁴Zan ka nak Jesúsen' zoe' ke chnare, ke len na' nake' bxoz kello ke chnare. ²⁵Na'llen' llak llasre'e lli'o, na' wak nnabllo rao Diosen' yezi'xhene' kello, ni ke dan' zokze' ke chnare llnnabe' okré kello rao Diosen'.

²⁶Jesúsen' nake' be'nn yálljello, gak bxoz brao kello nench gakrene' lli'o, le nake' be'nn ra'llda'o yall. Bibi da xhinnj none', na' bibi do'l nape'. Nlla're nake' ka be'nnach be'nn llon da xhinnj. Jesúsen' ba

bayepe' llie' gan' llia Dios na'. ²⁷Bi nake' ka bxoz brao ka' blla'a kana', be'nn ka' tlla tlla baso'te bayi'x, brarj ake' xchenba' nench llnnab ake' yezi'xhen Diosen' ke do'l xhia ben ake'. Llayoll na' na'll llnnab ake' ke yezikre be'nn Israel ka'. Na' Jesúsen' chniaze bzane kwine', ni ke xto'l be'nnach, bet ake' Le'e le' yay cruzen'. 28 Be'nn ka' gok bxoz brao kan' ne ley dan' bzoj da Moisésen', gok ake' be'nn wen da xhinni kan' nak nollre be'nne. Na' kan' ba gok zan iz bzoj da Moisésen' ley na', na'll bzoa kwin Diosen' da li to chi'ze zokze Xhi'nne' Jesúsen'. nake' bxoz brao kello. Na' Le'e zoe' ke chnare, na' nak vichira'llda'we'n kan' llazra'll Dios na'.

Jesúsen' bene' bzorao llak da kob da bne Diosen' gakrene' lli'o

Da ni llonllen rao yeolol da ka' ba bnia' na': zo bxoz brao kello be'nn nakya'nne kan' lle'ne Dios na', na' ba llie' yebán' llnebia'rene' Diosen' txhen, be'nnen' nake' le zerawe be'nn za'ke. ²Llone' llin gan' llia Diosen', to lati la'ye ga noncha'o Diosen', na' kere lo yo' da ben be'nnach ga we'rao ake' Le'e. ³Le yeolol bxoz brao ke be'nn Israel ka', zo ake' lloe' ake' Diosen' bi da lloe' ake', na' llot ake' bayi'x llrarj ake' xchenba' rao Diosen'. Na' dan' nak Jesúsen' bxoz brao kellon'. benen bien be'e kwine', bet ake' Le'e brarj xchene'n, ni ke da xhinnj kello na'. 4Chenak Jesúsen' nna nake' be'nnach ke yellrio ni, bi gak gake' bxoz, le zjazó bxoz ke be'nn Israel ka', lljasán ake' bi da lljasán ake' rao Diosen', kon kan' ne ley dan' bzoj

Hebreos 8, 9 400

da Moisésen'. ⁵Na' ka nak dan' llon bxoz ka' lla'a yellrio ni, llon ake'n gan' nak ka lwa'a ke dan' zo yebá gan' llia Dios na'. Na' nnézello naken ka lwa'a ke yebán', le kan' za gon da Moisésen' yoda'o dan' lladobte gan' ben bxoz ka' llin ke Diosen' kana', na' goll Diosen' le'e: "Yeolol dan' ba bnia' gonre na', legonen kon kan' ba broe'ra' rwe' kan' bzollo rao ya' na'." 6 Na' da llon Jesúsen', da xhen za'kllen ka dan' llon bxoz ke be'nn Israel ka'. Na' kan' bcheb Diosen' gakrene' lli'o dan' ba be'e kwin Jesúsen', ni ke xto'l-llo na', lekze da xhen za'kllen ka dan' golle' da xozxta'ollo ka' kana'.

⁷Le chenak ley nell na', bxha'ken nench da xozxta'ollo ka' gon ake' da wen, na' bi byalljen chixjwe' Diosen' to da kobe. ⁸Diosen' bre're' bi gok nnao ake' xti'lle'n, na' bne'e:

Wllin lla kate nnia' to da kob da gona' gakrena' re', nakre xhi'nn dialla ke be'nn ka' blla'a Israel.

na' ren be'nn ka' nak xhi'nn dialla ke be'nn ka' blla'a Judá.

Nada' naka' Xanre Diosen' nia' ka'.

9 Nlla'ren golla' da xozxta'ore ka',
gona' gakrén ake' kana',
bllie' akre', na' bena' nench
ballach ake' rao na'a be'nn
Egipto ka'.

Leake' bi ben ake' kan' goll ake' na', nench gak wen ke ake'. Na' ke len na' bsana' bill gokrén ake', nada'n naka' Xanre Diosen' nia' ka'.

¹⁰ Na' kin' gona' gakrena' xhi'nn dialla kere ka', nakre be'nn Israel katen' llin lla: Nada' Xanre Dios gona' nench cho' yichj ake' dan' nllia' bia'a gon ake' na'.

Na' gona' gaken ka to da nyoj lo yichjra'llda'o ake',

na' toz nada' wxenra'll ake', na' leake' gak ake' yell kia'.

¹¹ Na' ni ke yalljzen wzejnie' lwellj ake' gombia' ake' nada',

na' ni ke yalljzen wzejnie' akre' no bi'ch lwellj ake',

le kana' yeolole' gombia' nada', no xkwi'd no be'nn gore.

¹² Kana'n yezi'xhena' da xhinnj ke ake'n, na' bill lljadinra'lla' da xhinnj ka' ba ben ake' na'.

¹³Diosen' be'e di'll ke da koben' dan' bne'e gone' gakrene' lli'o, ke len na' ba nnézello ba blli'ye' ka'le dan' golle' xozxta'ollo ka' kana'. Na' da goren' dan' ba bkwase' ka'le ba rez yeranen.

Yoda'o da zo yellrio na' dan' zo yebá gan' llia Dios

Diosen' golle' da xozxta'ollo ka' kana', gakrene' leake' nench gak wen ke ake' cha' gon ake' kan' ne lev ke'e na'. Na' chak nna llon da nellen' llin, dan' golle' leake' kana', goll Diosen' leake' akren' gon ake' wxenra'll ake' Le'e, na' akren' gon ake' yoda'o gan' wxenra'll ake' Le'e yellrio ni. ²Ben ake' yoda'on, na' brej ake'n chop kwenre, na' to kwenen goken gan' llo' bxoz ka', na' ganna' bzoa ake' to kandler, na' to mes ga bkwa'a ake' yet xtir da nak ke Dios. Na' bsi'i ake'n Latj La'ye. ³Na' bze ake' to ra'll lo yo' na', nench goken chopre, na' dan' ye to na', bsi'i ake'n Lati gan' Llroe'rao

401 Hebreos 9

Dios. ⁴Na' lo da wllope na', bze ake' ye to mes de ya cha'o dan' nzi'i oro, ga bzey ake' yare, na' ye to kaj da bwazj ake' ya cha'o dan' nzi'i oro doxhente. Na' lo kaj na' bro' ake' to ye's de ya cha'o nzi'i oro, ga bro' ake' ra't vet xtir dan' nzi'i maná, na' bro' ake' xhis ke da Aarón na', dan' baga'a. Na' leska' bro' ake' yej ra'y ka', dan' byoj yeolol di'llen' bne Diosen' gon ake' nench gakrene' leake'. ⁵Na' ko'll kaj na', bzoa ake' chop angl be'nn llroe'rao da nak ke Dios, nench nroe'n zokze Diosen' gan' xhoa kajen'. Na' nna' bi llonen bien we'llo doxhen di'll kan' nak da ki.

⁶Bayoll ben ake' yoda'o na', bni't ake' da ka' loe na', na'll byo' bxoz ka' yeo lla lo lati la'y nell na', dan' le zote kate llo'llo, le chop kwenren' brej ake' yo'n, na' ben ake' kan' goll Diosen' leake' gon ake' we'xhen ake' Le'e. ⁷Na' loe da wllope na', toze bxoz brao na' gok byoe' loen' tweje rao twiz. Na' ka byoe' loe na', benen bien be'xe' llen ke bayi'x ka', bllie'n rao kajen' nench bazi'xhen Diosen' ke do'l ke'e, na' bazi'xhente' ke be'nn yobre be'nn Israel ka', ni ke da xhinni ke ake' dan' ben ake' bi gokbe'e akre' na'. 8 Na' dan' bi de lati cho' noteze be'nne lo da wllope na', Spíritu ke Diosen' llzejnie'n lli'o, bi nna gak cho' be'nnach gan' nak Latj gan' Llroe'rao Diosen', cha' nna llon yoda'o nell na' llin yellrio ni. 9Na' yeolol dan' llon bxoz ka' lo yoda'o na', llroe'n lli'o zollo nna' kan' llak yebá gan' zo Diosen'. La'kze da zan da lloe' be'nne Diosen', na' bayi'x zan llot ake' lloe'xhen ake' Le'e, bibi yel

wak nsa'a da ka' nench nnez akre' bibi do'l nap ake' rao Dios. ¹⁰Na' ka nak dan' llon be'nn Israel ka' lo yoda'on, naken ke no yel wao, no nis, na' llayib kwin ake', na' billre da za'k ke kwerp ke ake' na'ze. Na' ba benen llin chak bi nna yecha'a Diosen' dan' bnao ake', na' koe' da kob na'.

¹¹Na' nna' ba ben Criston' to da wen kello, ka naken ba nake' bxoz brao kello. Na' zoe' yebán' nake' bxoz kello rao Dios, na' gan' zoe'n za'kllen ka yoda'o da ben be'nnach yellrio ni. ¹²Na' bi be'xe' llen ke no chib no bell da'o, kan' byoe' bnnabe' nench bazi'xhen Diosen' do'l kello ka', kwinkze' be'e lati bet ake' Le'e, brarj xchene'n ni ke lli'o to chi'ze le' yay cruzen', ka'n gok byoe' gan' llia Diosen', na' bake'e do'l kellon' ke chnare. 13 Ley dan' bzoj da Moisésen' nyojen, nen lle'nen wlli' bxozen' be'nn Israel ka' no xchen chib, na' no xchen bell, na' llchix ake'n de, da llaga'nn kat llzey ake' to vak da'o. Len llayiben leake' chde'jze. ¹⁴Zan xchen Criston' dan' badrarje' ni ke lli'o, za'kllen ka xchen bayi'xe, le len na' llayonen yichira'llda'ollon' yall ke da xhinni ba benllo. Ke len na' bill nlloy kellon' gatllo ni ke da xhinni kello, na' sokzllo we'raollo Dios be'nnen' zo ke chnare. Spíritu ke'e na' gokrenen Criston' bzane' kwine', na' bake'e da xhinnj kellon', na' bibi do'l ke Criston' de.

¹⁵Criston' badrarj xchene'n nench bzorao llak da koben', dan' bne Diosen' gone' nench sollo nbaraz rawe' na'. Na' ba bxie' da koben' nench balteze be'nnen' ba breje', Hebreos 9, 10 402

yellín ake' gan' llie' na' ke chnare. Na' dan' got Criston' badrarj xchene' na', na'llen' wnitrawe' do'l xhia ke dan' ben be'nn ka', chak nna llon llin dan' bdixjwe're' da nell, dan' bne'e gone' na'. 16 Kat to be'nne ba blise' to vich da de lloe' di'lle, kat ba go'tbia' ba got be'nnen' ben dan' lloe' di'll na', kana'll gak kan' nen na'. ¹⁷Le to da de lloe' di'll, bi gak kan' nen na', chak nna zo be'nnen' ben len na'. Kat ba gottelle', kana'llen' gak kan' nen na'. 18 Na' ka'n gok ke da nell dan' goll Diosen' da xozxta'ollo ka' gakrene' leake'. Ke len na' bllie' bia'a brarj ake' xchen bayi'x nench bxhen. 19 Ka bayoll be'rén da Moisésen' da xozxta'ollo ka' di'll ke veolol dan' bne Diosen' gon ake' kan' ne ley ke'e na', na'll blli' da Moisésen' leake' xchen bell da'o, na' xchen chiv da'o dan' nchix nis. Bllie'n leake', na' benrene' llin vich xha xhi're da nben da xhna, na' ren to xhis yi'x da'o dan' nzi'i hisopo. Leska' bllie'n rao yich ka' gan' nyoj ley ke'e na'. 20 Na'll goll da Moisésen' leake': "Llen ni llroe'n gaken da li kan' ba bne Diosen' gone' gakrene' re'." ²¹Leska' bene' bllie' llen na'. lo voda'on, na' billre da ka' benrén ake' llin gan' be'rao ake' Diosen'. ²²Leyen' bzoj da Moisésen' nllian bia'a wlli' bxozen' llen rao yeololte bi da llonrén ake' llin, nench gaken yall rao Diosen'. Leska' ne leyen' cha' bi nna larj llen, bi yezi'xhen Diosen' ke do'l ke be'nnachen!.

Criston' brarj xchene' nench bake'e do'l ke be'nnache

²³Ka'n gok byalljen wlli' ake' xchen bayi'x lo yoda'on, na' bayonen yall bi da ka' llonrén ake' llin lo yoda'on, nench ben ake' llin rao Dios na', na' yoda'on naken ka to da llzejnie'n kan' nak yebá na'. Na' dan' de yebá na', byalljen to llen da za'kll. 24 Gan' byo' Criston' kere naken to voda'o da ben be'nnach, dan' llroe' kan' nak yebán'. Le'en bayepe' yebán', na' bayoe' gan' llia Dios na', nench nne'e rorazllo rawe' na'. ²⁵Bxoz brao ke be'nn Israel ka', llo' ake' yoda'on twej rao to iz gan' nzi'i Lati gan' Llroe'rao Dios, na' ll-lli' ake'n xchen bayi'xe, zan Criston' tozen' be'e lati bet ake' Le'e brari xchene'n kere da zan ras. ²⁶Chenak bvallien brari xchene'n zan ras, ba gote' zan ras kan' bxhe yellriote chenake. Tozen' badrari xchene'n kan' bne Diosen' ba bllin lla ke'e, nench llak llake'e do'l ke be'nnach. ²⁷Kan' ba bdixi Diosen' len ke be'nnachen', tozen' gate', na'll te na' nne Diosen' ke totoe' cha' sa'kzi'e o cha' vezie' banez. 28 Ka'n gok ke Criston' be'e lati gote' nench llake'e do'l ke be'nnach. Na'll llin lla yede' da yobre, kere nench yeke'e do'l ke be'nnach, zan nench yesre'e be'nn ka' bexh Le'en.

Ley dan' bzoj da Moisésen', kon bzejnie'n lli'o ra't da'o ke da wen na' ba llak kello nna' ba bed Criston'. Bi gok yecha'n yichjra'llda'o be'nn ka' bxenra'll Diosen', la'kze brarj ake' xchen bayi'x yo'y iz. ²Chenak bayak yichjra'llda'o ake'n wen, kan' bet ake' bayi'x ka', na' kan' blli' bxozen' leake' xchenba' ni ke da xhinnj ke ake' ka', ba bnitrao xto'l ake'n to chi'ze chenake, na' bill gake lo

403 Hebreos 10

yichjra'llda'o ake'n cha' da xhinnjen' ben ake', na' bill benen bien got ake' bayi'x ka' yeo iz chenake. ³Na' dan' llot ake' bayi'x ka', na' billre da llon ake', ni ke da xhinnj ke ake' ka', na' llasa'ra'll ake' do'len' nap ake' to iz to iz. ⁴Le xchen no bell da'o, na' chiv da'o ka', bi gak yeka'n da xhinnj ke be'nnach.

⁵Kan' bed Criston' yellrio ni, golle' Diosen':

Dan' llot ake' bayi'x, na' dan' lladwa'a ake' bi da lladwa'a ake' rao' na', kere da na'n lle'nro'.

Zan beno' gorja' naka' be'nnach.

6 Dan' llot ake' bayi'x ka' llzey
akeba' rao', na' yeolol da ka'
llon ake' nench yezi'xheno'
ke ake', kere da na'n lle'nro'.

7 Ke len na' bnia' kan' nyojen gan'

"Dios kia' ba za'a ganni, zadyena' kan' lle'nro' na'."

⁸Zga'tek goll Criston' Diosen': "Dan' llot ake' bayi'x ka', na' dan' lladwa'a ake' bi da lladwa'a ake' rao' na'. na' dan' llzey ake' bayi'x ka' nench yezi'xheno' ke ake', kere da ka'n zera'llo', na' kere da ka'n llawero'", la'kze ne leyen' da ka'n llaya'l gon ake'. 9 Na'll golle' Diosen' da yobre: "Ganni za'a zadyena' kan' llazra'llo' na'". Ke len na' ba nnézello ba bkwase' dan' ka'le dan' gotllo bayi'xen', nench na' yezi'xhene' kello; roraz len na' brarj xchene'n nench bake'e da xhinni kellon'. 10 Na' dan' ben Jesucriston' kan' lle'ne Dios na', kan' bzane kwine' bet ake' Le'e toze kana', ke len na' ba bayak yichjra'llda'ollo yall rao Dios, lli'o llonlira'll Le'e.

¹¹Na' twej twej bxoz ka', nao akse' llot ake' bayi'xen' yeo lla, na' llrarj ake' xchenba'n kan' ne leyen' llaya'l gon ake' na', la'kze cha' len bi llak yeka'n da xhinnj ke be'nnachen'. ¹²Zan Jesucriston' toze'n bzane' yel nban ke'en, na' za'ken yesrán be'nnach ke chnare. Bayoll na' jallie' kwit Diosen' cha'we gan' llnebia'rene' Le'e. ¹³Na'n llie' bexhe' llin lla, wxhexi yichi yeolol be'nn ka' llwie Le'e, na' wzenay ake' ke'e. ¹⁴Na' dan' bsanra'll kwine' bet ake' Le'e toze kana', bene'n ni ke lli'o gakllo rallna'a Dios bayall-llo rao Le'e. ¹⁵Na' Spíritu ke Diosen', lekze benen nench nnézello kan' naken na', le nvoien nen:

¹⁶ Kin' gona' gakrén ake' kat llin lla na'.

Nada' Xanre Dios gona' nench cho' ra'llda'o ake' dan' nllia' bia'a gon ake' na'.

Na' gona' gaken ka to da nyoj lo yichjra'llda'o ake'.

¹⁷Leska' ne'e:

Nna' bill lljadinra'lla' da xhinnjen' ba ben ake'n. ¹⁸Na' kat ba bnitrao do'l kellon', bill yalljen gotllo no bayi'x, ni ke da xhinnj kellon'.

Llaya'l wxenra'll-llo Dios bi llebllo

¹⁹Be'nn bi'che, nna' wak cho'llo gan' zo Diosen' bi llebllo, le Jesucriston' brarj xchene'n, na' bake'e da xhinnj kellon'. ²⁰Na' wak nnello bsarje' to nez kobe, to da llonn lli'o yel nban zejlikane, le dan' gote' ni ke lli'o, wak cho'llo gan' zo Diosen', na' bill naken ka ke yoda'o da nga'ch kone ra'll da ze gan' nono gak cho'. ²¹Na' zo

Hebreos 10 404

bxoz brao kellon' nake' be'nn za'ke, na' nake' Xan lli'o brej Diosen' nxenra'll-lloe'. ²²Na' llava'l sollo wxenra'll-llo Diosen' do yichj do ra'll-llo bi llebllo, na' llaya'l chejle'llo, xchen Jesucristo na'n baka'a da xhinni kellon', le nnézello ba blloallo nis dan' llonlira'lllloe'n. ²³Na' kan' bzoraollo be'llo di'll bnello yellinllo gan' llie' na', ka'kzen' llaya'lkze gonllo batteze, na' da likzen' yellinllo gan' llia Dios na', le zokze' llone' kan' bne'e na'. ²⁴Na' llaya'l yeyirillo akre gonllo gakrén lwellillo nench llie' lwellillo, na' gonllo da wen. ²⁵Na' bi kwej yichillo dan' llaya'l lldop ll-llayllo lloe'xhenllo Dios kan' llon bal be'nn llbej vichj ake'n. Llaya'l wasnise lwelljllo wxenra'll-llo Criston', ke nake nna' ba rez te ke yellrio ni.

²⁶Cha' nna naotezllo llonllo da xhinnjen' la'kze ba nnézello di'll li ke Criston', billre bi de da gon llin nench yezi'xhen Diosen' da xhinnj kellon'. ²⁷Na' cha' nna naollo llonllo da xhinni, llaya'lkze llebllo Diosen', le Le'en gone' da yellayraollo cha' ka', yeyejllo lo yi' gabil ga kweyi'llo ren veolol be'nn llwie Dios na'. ²⁸Kana' baso't da xozxta'ollo ka' noteze be'nne bi bzenay ke ley dan' bzoj da Moisésen', bi baya'chra'll ake' leake', kon cha' bni't chop chonn be'nne, toz ka bne ake' ke da xhinnjen' none' na'. 29 Nya'chraz kwis gak kello cha' wiello Xhi'nn Diosen', na' gákello bibi za'k xchene'n dan' brarje' bake'e da xhinni kellon', na' cha' nnello ke Spíritu ke Dios be'nnen' nllie' lli'o. Le kan' brarj xchen Cristo na'n, bzorao llak da kob dan' bne Diosen'

gone' gakrene' be'nn wxenra'll Le'e. ³⁰Nnézkzello kan' bne Diosen': "Nada' yellia' da xhinnj dan' llon ake'n, na' nada' gona' da sa'kzi' ake'." Na' leska' nyojen nen: "Xanllo Diosen' wchoybie' akre gak ke be'nn ka' nak yell ke'en." ³¹Naksen da llebllo cha' lli'o nna llonllo da bill llaya'l gonllo rao Dios be'nnen' zo ke chnare.

32 Lelliasa'ra'll kan' bdaora'llre biteze da bxha'kzi're kan' bayoll byo' beni' ke Criston' lo ra'llda'ore. ³³Tweje bzi'chi'll ake' re' rao yeolol be'nn yell, na' tweje ka bchachrén ake' re', na' billre da bsa'kzi' ake' re', na' gókere kwis kan' ben akre' be'nn lwelljre ka'. ³⁴Baya'chra'llre be'nn lwelljre ka' be'nn ka' lla'a rill ya, na' gokrén akre', na' bzore nbaraz la'kze bwie be'nne re', na' bka'a ake' bi da go't keré, le ba nnézere de da za'klle keré yebán' da bi te ke. 35 Ke len na' bi kwej yichjre wxenra'llre Diosen', bi llebre, le wllin lla kat sore nbaraz. 36 Llaya'l gaora'llre kat llza'kzi're nench yeyoll gonre yeolol dan' zera'll Diosen', na' te na' wazoe' re' nbaraz ke chnare kan' bne'e na'. ³⁷Kan' nyoj xti'll Diosen' nen:

Le llinte lla yed be'nnen' se'la' gan' zore na', bill llere'.

³⁸ Na' be'nn ka' nak be'nn wen, ga't yel nban ke'e ke chnare, le nxenra'll ake' nada'n.

Na' cha' bill wxenra'll ake' nada', bill wayazra'lla' kan' llon ake'n.

³⁹Na' lli'o bi nakllo ka be'nn ka' bill nxenra'll Le'e, be'nn ka' ba naken kweyi'. Zan lli'o zokzllo nxenra'lllloe', na' yellinllo gan' llie' na' ke chnare. 405 Hebreos 11

Dan' wxenra'll-llo Dios

Cha' nxenra'll-llo Diosen', nnézello wak da wen dan' bexhllo gak na', na' nnézello gon Diosen' gak kan' ne'e na', la'kze cha' bi nna re'llon. ²Bal be'nn xozxta'ollo ka' ba bde, bayazra'll Diosen' leake', le bxenra'll ake' Le'e.

³Dan' nxenra'll-lloe' na'n, llejle'llo kan' bnne Diosen', na' gok yebán' ren yellrio na'. Na' bi benrene' llin dan' llre'llo kan' bene' yeolol da ka' llre'llo na'.

⁴Kana' da xozxta'ollo Abel benlira'lle' Diosen', ke len na' Abelen' be'e Diosen' to da nakll da wen, kerke dan' be'e be'nn bi'che' Caín na'. Na' dan' bawé Diosen' dan' be'e Abelen' Le'e na', na'llen' bnneze Abelen' nake' be'nn wen rao Diosen'. Na' la'kze ba got Abelen', dan' bzoe' benlira'lle' Dios na', nake' ka to be'nn nna zo llnneyoe lli'o sollo wxenra'll-llo Dios.

⁵Na' lekze da xozxta'ollo Enoc bzoe' bxenra'lle' Dios, na' ke len na' bazi'i Diosen' le'e ka nna nbane'. Na' bi bre're' yel got, na' nollno bre'e le'e. Na' nyoj xti'll Diosen' nen, Diosen' bawere' kan' ben Enoken' chak bzoe' yellrio ni. ⁶Diosen' bi llawere' be'nn bi nxenra'll Le'e. Le noteze be'nn yelwill Diosen' llaya'l chejle' zokze', na' chejle' Dios na'n, we'e yel nban zejlikane ke noteze be'nn nnaben' do yich do ra'lle.

⁷Leska' da Noén', bxenra'lle' Dios, na' ka bdixjwe' Diosen' le'e ka da ka' za gak na', byejle' Noén' kan' goll Diosen' le'e na', na' bzenaye' bene' to barco gan' byoe' ren be'nn ka' lla'a ren le'e lo yo' ke'en, nench bi got ake' kan' babia nisen'. Na' dan' byejle' Noén' kan' bne Dios na', broe're' yezikre be'nn lla'a na', nap ake' do'le dan' bi bzenay ake' ke Dios. Na' lekze dan' bxenra'lle' Dios na', bne Diosen' ke'e, nake' be'nn wen rawe' na'.

⁸Da Abraham na' leska' bxenra'lle' Dios. Na'llen' bzenave' kan' balwill Diosen' le'e, na' golle' le'e cheje' ga de to yellrio zi'te da gak ke'e. Na' byejle' la'kze bi nombie' latjen'. ⁹Na' Abraham na' dan' bxenra'lle' Dios na', jasoe' rall be'nn zi'te ga bne Diosen' gak ke'e. Na' bzoe' to lo yo' da lladobte, na' lekze lo yo' dan' lladob na', bzorene' xhi'nne' Isaaken', na' xhi'nn xhosoe' Jacoben', be'nn ki leska' goll Diosen' leake' gak yellrion' ke ake!. 10 Abraham na! bzoe! breze! rao yellrion', le bnnezre' wllin lla yelline' gan' llia Diosen' gan' nak to vell wen da ben Dios da bi te ke.

11 Na' Sara no'ren' nak no'r ke Abraham na', la'kze nake' be'nn will, na' ba nake' be'nn gore nench so xhi'nne', Dios na' bene' to yel wak nench bzo xhi'nne', le byejle' gonkze Diosen' kan' bne'e na'.

12 Ka'n gok bzo xhi'nn da Abraham na', la'kze ba nake' be'nn gor kwis.

Na'llen' gok xhi'nn dialla ke'en be'nn zan kan' nak berj ka', na' kan' nak yoxh da lli' lloa' nisda'o da nono llak wrab len.

13 Yeolol be'nn ka' nxenra'll Diosen', bllin lla got ake'. Na' la'kze bi bxhi'i ake' da ka' goll Diosen' leake' na', bi gokllejla'll ake', na' blla'a ake' nbaraz byejle' ake' wllin lla gon Diosen' kan' bne'e na'. Na' ka' be'e ake' di'll nak ake' Hebreos 11 406

be'nn zi'te rao be'nn ka' lla'a rao yellrion', na' bibi rall ake' bzo yellrio ni. ¹⁴Na' dan' be'e ake' di'll bibi rall ake' zo yellrio ni, broe'n bzera'll ake' yellín ake' ga yobre gan' gak rall ake' na'. ¹⁵Chenak ben ake' xhbab yell gan' gorj ake' na', naksen rall ake', na' go't latj jayake' chenake, zan bi ben ake' xhbab ka'. ¹⁶Bzera'll ake' yellín ake' yebán', byejle' ake' na'len' nakse rall ake', bnnez akre' nakllen wen ka yellrio ni. Na'llen' bi lliye'e Diosen' gake' Dios ke ake', na' ba bencha'we' to yell ga lla'a ake'.

17 Na' Abraham na' bxenra'lle'
Diosen', na' bzoe' di'll kan' goll
Diosen' le'e, le Dios na'n bwie' cha'
gone' kan' golle' le'e, llaya'l got
xhi'nne' Isaaken' rawe' na', nench
gonxhene' Le'e. Na' ba zete' gote'
xhi'nne'n la'kze bnnezre' goll
Diosen' le'e: 18 "Gona' nench nni't
xhi'nn dialla ko'o be'nn gak xhi'nn
dialla ke Isaaken'." 19 Abraham na'
bachoyra'lle' gotebe', le nnezre'
llak llasbán Diosen' be'nn wat. Na'
Diosen' bi be'e latj gotebe'. Na' wak
nnello basbanebe' radj be'nn wat
la'kze bi gotbe'.

²⁰Bde na' benlira'll Isaaken' Dios. Na'llen' bne Isaaken' Diosen' gone' wen ke xhi'nne' Jacob na' ren Esaú. ²¹Leska' da Jacoben' benlira'lle' Dios. Na'llen' kan' ba rez gate' na', bne'e Diosen' gone' wen ke xhi'nn xhosoe' ka', bi ka' gok xhi'nn da José. Na' blle'ke' bxhexj yichje'n be'xhene' Diosen' nchi'chteze to yay da'o. ²²Da Josén' bxenra'lle' Dios, na' byejle' wllin lla yellach be'nn wrall ke'e ka' gan' nzi'i Egipton' kan' bne Dios na'. Na'llen' ka ba rez.

gate' na', golle' leake' yesa'a ake' llit ke'en kat yellach ake' na'.

²³Kan' gorj da Moisésen', na' bxenra'll xaxhne'e ka' Dios, bi blleb ake' ka nak bi ben ake' kan' bne reyen' gon ake'n, bne'e llaya'l got ake' bida'o ke ake'n. Na' chonn be'o bkwa'ch akebe', le gokbe'e akre' nakbe' to bida'o wallejllo. ²⁴Na' bi no'ren' nak xhi'nn rey na', bazie'be' basgorebe'. Na' ka ba blli'o da Moisésen', bi gokra'lle' gon ake' le'e ka xhi'nn bi no'r ke rey ke Egipto na', le benlira'lle' Dios. ²⁵Ke len na' byazra'lle' bllayraorene' be'nn wrall ke'e ka', yeolol dan' bsa'kzi' be'nn Egipto ka' leake', na' bi gokra'lle' gonrene' be'nn Egipto ka' txhen, le nnezre' sete te ke yel llawé ke da xhinnj ka' llon leake'n. ²⁶Byazra'lle' bllayrawe' kan' bllayrao Cristo na', nench bene' kan' lle'ne Dios na', bi bzera'lle' gak ke'e yeolol yel wnia' ka da ka' de ke be'nn Egipto ka', le bnnezre' wllin lla gon Diosen' yezie' banez. ²⁷Na' dan' bxenra'lle' Dios na', bi bllebe' reyen' kan' ballach ake' gan' nzi'i Egipton', la'kze goklla'a reyen' leake', kon bzeteze bzenave' ke Dios, le nnezre' zokze Diosen' la'kze bi llre'lloe'.

²⁸Moisésen' bxenra'lle' Diosen', na'llen' golle' da xozxta'ollo ka', be'nn lla'a toto yo' bet ake' to xhi'r da'o, na' blli' ake' xchenba'n lloa' reyj yo' ke ake'n, nench angl be'nnen' nsa'a yel goten', bibi gok gonre' bi byio nell ke toto yo' gan' blli' ake' llen na'. ²⁹Na' da xozxta'ollo ka' blla'a kana', dan' bxenra'll ake' Dios na', na'llen' ben Diosen' gok Nisda'o Xhnan' chopre, na' bara' yo bill kllolen' nench gok

407 Hebreos 11, 12

bla'y ake'n. Na' be'nn Egipto ka', kan' gokra'll ake' wla'y ake' nisda'o gan' bla'y be'nn ka', baseje' nisen' gan' llde ake'n, na' got ake' we'j ake' nis.

30 Leska' dan' bxenra'll da xozxta'ollo ka' Dios na'n, na' byechj ake' yellen' nzi'i Jericó, na' byal ze'e dan' nechj doxhen yellen', kan' byechj ake'n yeo lla rao gall lla.
31 Na' da no'ren' golle Rahab, no'ren' gok no'r re'e, leska' bxenra'lle' Dios, na'llen' bi blleyi'rene' be'nn Jericó ka', be'nn ka' bi ben kan' ne xti'll Dios na', le brebe' chop da xozxta'ollo ka' rille'n kan' jawiá jayí ake' ralle' na'.

³²Ba blla'll be'nn zanlle be'nn bxenra'll Dios, na' bi de latj wa'a di'll ke dan' ben be'nnen' golle Gedeón, na' be'nnen' golle Barac, na' be'nnen' golle Sansón, na' be'nnen' golle Jefté, na' be'nnen' golle David, na' be'nnen' golle Samuel, na' yezikre be'nn be'e xti'll Dios kana'. 33 Dan' bxenra'll ake' Dios na', blloj ake' ben ake' gan rao wdile ren no be'nn wnebia' ak, na' bal ake' ben ake' da wen, ye bale' bre'e akre' ben Diosen' bi da wen dan' bne'e gone' ke ake', ye bale' ben Diosen' bi bdao bell znia leake! 34 Leska! dan! bxenra!ll ake! Dios na', bale' bi byey ake' kan' bza'l be'nn ka' leake' lo yi', ye bale' bará ake' kan' gokra'll be'nn ka' got ake' leake' kone spad, ye bale' bayón Diosen' leake' be'nn war kan' bill bzoe akre', ye bale' gokrene' leake' gok ake' be'nn waka'a ya war, nench gon ake' gan kat tilrén be'nn waka'a ya be'nn zi't ka' leake'. ³⁵Na' blla'a no'r ak, dan' bxenra'll

ake' Diosen', na'llen' basbán Diosen' be'nn wat ke ake' ka' radi be'nn wat ka'. Na' bni't be'nn yobre, dan' bxenra'll ake' Dios na' wasa'te, bi gokra'll ake' yerá ake' rao na'a be'nn wen da xhinnj ka'. Be'e ake' lati bsa'kzi' ake' leake', le bnnez akre' wllin lla yelis yesbán Diosen' leake' radj be'nn wat ka', nench yellín ake' gan' llie' na'. ³⁶Bni't ye bal be'nn bzi'chi'll be'nn leake', na' bdin ake' leake', na' bchej ake' leake' gden, na' bro' ake' leake' rill va. ³⁷Na' be'nn ka' bwie leake'n baso'te leake', bale' bda'a ake' leake' yej, ye bale' bxhoxhj ake' leake' kone sierr, ye bale' baso'te kone spad. Na' bal be'nn ka' bxenra'll Diosen', bene bien bllach ake' yi'xre, nak ake' no xha xhi're, no xha chib. Bibi go't ke ake', nya'chraz gok ke ake' kan' bsa'kzi' be'nn ka' leake'. ³⁸Bllach ake' goslas ake' do latj dach, do ya'da'o, do ga ze broj, na' do ga zo rill bayi'xe. Yeolol da ka'n gok ke be'nn ka' bxenra'll Diosen'. la'kze be'nn ka' lla'a rao yellrio ni, bwie akre' leake', ke len na' bi za'k ake' cha'rén ake' leake' txhen. ³⁹Dios na' bawere' yeolol be'nn ka' bxenra'll Le'e, na' chak bzo ake' na', bi nna gone' yeolol da wen dan' bne'e gone' ke xhi'nn dialla ke da Abraham na'. 40 Le gokra'lle' gone' gak ke lli'o zollo nna', yeolol da wen dan' bne'e gone' na', nench yeyoll gakllo txhen ren be'nn ka' bxenra'll Le'e kana', gakllo kan' llazra'lle' na'.

Llaya'l sollo gonllo xhbab ke Jesúsen'

Ba bni't be'nn zan ben ake' da wen, ni ke dan' benlira'll

Hebreos 12 408

ake' Dios na', na' dan' ben ake' na', llzejnie'n lli'o kan' llaya'l gonllo na'. Ke len na' llaya'l wkwasllo ka'le dan' ll-llon gonllo kan' llazra'll Dios na', na' kwej yichllo bi da xhinnj llonllo, le da xhinnjen' ziye'kzen lli'o. Na' llaya'l sokzllo gonllo kan' ne Dios na' bi yellie'llo. ²Jesús na' bene' nench bzorao llxenra'll-llo Diosen', na' gakrene' lli'o nench sokzllo wxenra'll-lloe' yellintello gan' llie' na'. Na' llaya'l sollo gonllo xhbab ke Jesúsen', kan' bdaora'lle' dan' bxha'kzie' kan' bda'a ake' Le'e le' yay cruzen'. Bi bda'ba'ye' bi dan' ben akre' Le'e, da zan da naken da zban kwis, le bnnezre' za gon Diosen' da vewere'. Na' nna' ba llia Jesúsen' llnebia'rene' Le'e.

³Llaya'l gonllo xhbab kan' bdaora'll Jesúsen' yeolol dan' bene be'nn wen da xhinnj ka' Le'e. Na' ka'kzen' llaya'l gaora'll-llo gonllo kan' lle'ne Diosen', la'kze cha' llákellon da war bi yellie'llo. ⁴Da zan da ba bllayraore dilrenre da xhinnjen', zan bi nna wrarj xchenre. ⁵¿Ba gonra'llre kan' ne Diosen', llnneyoere' lli'o ka llon be'nn llnneyoe xhi'nne'? Kan' nyoj xti'll Diosen' nen:

Xhi'nna' da'o, bi gakro' bibi
zejen dan' llonn Diosen'
rwe', dan' za'kzi'o kat llono'
bi da xhinnj,
na' bi gakro' kat dile' rwe'.

6 Le Xanllo Diosen' llzejnie're'
yeolol be'nn nllie're',
na' lloe' da za'kzi' be'nn ba
none' ka xhi'nne' kat llon
ake' da xhinnj.

7 Llaya'l gaora'll-llo katen' llonn

Diosen' lli'o da sa'kzi'llo, le llonre'

lli'o ka llon be'nnachen' ren xhi'nne'. Le yeololte bida'o, llon xabe'n zi' kebe' kate llcha'be' le'e. ⁸Na' cha' bi llonn Diosen' da sa'kzi'llo kat llontezllo da xhinnjen', zeje di'll bi nakllo xhi'nne', le veolol be'nne ba none' ka xhi'nne', lloe' le'e da sa'kzie' kat llonkze' da xhinnj. 9Yeololte xaxhna'llo basgore' lli'o yellrio ni, na' bago' ake' lli'o nez kat bi da xhinnj benllo, na' bdap aklloe' bara'nne, le ka' llaya'lkze gon ake'n. Bixha nna' yezikre llaya'l wzenayllo ke Xallo Diosen', nench na' ga't yel nban zejlikane kello. 10 Xaxhna'llon' chollzen' basgor ake' lli'o, na' bago' ake' lli'o nez kon ka lle'n akre'. Zan Dios na'n nnezre' bi da nak wen ke lli'o, na' dile' lli'o llonne' da sa'kzi'llo, nench gakrenen lli'o sollo gonllo da wen, na' gak ra'llda'ollon' yalle kan' nak ke Le'en. 11 Na' biteze da za'kzi'llo, chak llaken na', bi llazra'll-llo, zan kat ba bden na', llakrenen lli'o gonllo da zej lixheje, na' llakrenen sollo nbarazlle lo yichjra'llda'ollo.

Diosen' gonne' da sa'kzi'llo cha' bi wzenayllo ke'e

¹²Ke len na' lesó legón kan' llazra'll Diosen' bi yellie're. ¹³Lesó legón da wen nench gakrenen be'nn ka' nna llakllejla'lle, akre gon ake' nench wzenay ake' ke Dios, bi kwej yichj ake' xti'lle'n.

¹⁴Leyeyirj ka gonre sorenre yeolol be'nn kwasro, na' lewzenay ke Dios nench gak ra'llda'oren' yalle, le nono yellín gan' llia Diosen' cha' bi nak ra'llda'we'n yalle. ¹⁵Legakrén lwelljre nench ni tore bi ganra'llre 409 Hebreos 12

kan' nllie' Diosen' lli'o, le kat sollo bi gonllo kan' ne Diosen', llakllo ka to yay yi'x da bi lloe' latj chi'o bi da nazllo, na' ll-lli'oll da xhinnjen', na' ka' wakte be'nn zanll gon da xhinnj. ¹⁶Bi lljatilre no're bi nak no'r keré, na' be'nn byio bi nak be'nn keré. Na' bi wiere da nak da za'k rao Dios kan' ben be'nnen' golle da Esaú, bche'e ren yel wao, yel nak la'y dan' be'e Diosen' le'e dan' gorje' goke' be'nn nelle. ¹⁷Nnézkzere bde na' gokra'lle' yezie' dan' bene' rao na'a be'nn bi'che'n, na' billbi gok gone' yeyake'n rao ne'e, la'kze to bllelle' billbi gok gone'. ¹⁸Nlla'ren llak ke lli'o nna', kan' gok ke da xozxta'ollon' kana', kan' be'e Diosen' leake' ley ke'en. Kan' betje' rao ya' gan' nzi'i Sinaí, byechj bel yi' rao ya'n blle' llen, bayak xchole, na' bda be'. 19 Ben akre' bllell trompeten', na' ben akre' be'rén Diosen' leake' di'lle. Na' blleb ake' kwis, na' go'tyoe akre' Moisésen' bill we'rén Diosen' leake' di'lle. ²⁰Blleb ake' kwis, le ba goll Diosen' leake' noteze cha' lljabi'y rao ya' na', llaya'l got ake' le'e wda'a ake' le'e yej, leska' gon ake' la'kze no bayi'xe. 21 Na' da nllebraz xhen na' gok rao ya'n, rente da Moisésen' bne'e: "Lleba' kwis, na' to xhiztita' kan! llaken."

²²Lli'o llonlira'll-llo Criston', ba naksllo txhen Dios be'nn zo zejlikane, na' ren yeolol angl ke'e ka' lla'a yebá llonxhen ake' Le'e, be'nn ka' nak be'nn zan kwis. Na' wak nnello ba jabi'yllo rao ya' gan' nzi'i Sión, leska' nzi'n Jerusalén da lli' yebá gan' zo Dios na'. ²³Na' nakllo txhen yeolol be'nn lldop ll-llay llonlira'll ake' Jesucriston' gateze, be'nn nyoj ra ake' yebá na', le' libr ke Diosen'. Na' yeolol lli'o llonlira'll-lloe' na', nakllo ka to bi nell lo yo', bi si'i bien ke xaxhna'be'. Na' nakllo txhen Dios be'nnen' choyrawe' ke yeolol be'nnach cha' de do'l ke ake'. Leska' nakllo txhen be'nn ba wasa'te, be'nn gok be'nn wen rao Dios na', nna' ba nak ake' kan' lle'ne Dios na'. ²⁴Na' nakllo txhen Jesúsen' be'nnen' brarj xchen, nench bzorao llak da koben' bne Diosen' gak gakrene' be'nnach. Na' brarj xchene'n nench bnitrao Diosen' do'l kellon'. Na'llen' za'kll xchen Jesúsen', ka xchen da Abelen' dan' brarie' kan' bet bi'che'n le'e.

²⁵Da xhinni kwis naken cha' bi wzenayllo ke Diosen' kate nne'e lli'o. Bene' nench bxha'kzi' da xozxta'ollo ka', kan' bi bzenay ake' xti'lle'n dan' be'rén da Moisésen' leake' yellrio ni kana', na' wsa'kzi'lle' lli'o cha' bi wzenayllo xti'lle'n, dan' lloe'rene' lli'o gan' zoe' yebá na'te. 26 Le bxho' kan' betj Diosen' rao ya' Sinaín' nench be'rene' da xozxta'ollo ka' di'lle. Na' nna' ba bne'e: "Wllin lla kat gona' xo' ye to yellrio ni, na' kere yellrio nizen' xo', rente da llre'llo le' yebá na'n xiz aken." ²⁷Na' dan' ba bne'e gone' xo' ye to, zejen te ke yeolol da ka' ben Diosen' dan' llre'llo, zan bi te ke Diosen', na' ke yeolol da wen da llone' da bi llre'llo. 28 Ke len na' llaya'l we'llo yel llioxken ke Diosen', dan' gone' lljazollo nbaraz gan' llnebie' na', na' kere da te ke da wen na' gak kello gan' zoe' na'. Leska' llaya'l gakbe'llo be'nn za'k nak Diosen', nench wxenra'll-lloe'

Hebreos 12, 13 410

do yichj do ra'll-llo kan' lle'nre' na'.

²⁹Le Dios kellon' nake' ka to bel yi',
na' ll-lleyie' da bibi za'ke.

Dan' lle'ne Diosen' gonllo

Sochga yel nllie' lo yichjra'llda'ore. ²Na' bi ganra'llre dan' llaya'l wrebre be'nn za'k zi't rillren'. Bal xozxta'ollo ka' breb ake' be'nn zi'te rill ake'n, na' breb ake' angl ke Dios, ni ke gokbe'e akzere'.

³Llaya'l lljadinra'llre ke be'nn lwelljllo ka' lla'a rill ya nench gakrén akre'. Llaya'l gonre xhbab, gákere renkze re'n yo're rill yan'. Na' bi ganra'llre be'nn lwelljllo ka' bi da llsa'kzi' be'nne leake'. Na' llaya'l gonre xhbab, gákere renkze re'n llak ke re', kan' llak ke be'nn ka'.

⁴Na' re' nchayna're yeololre lesó do ra'llre rao no'r keré, na' rao be'nn keré, bi tarenre be'nn yobre, le Dios na' wsa'kzie' be'nn lljatile be'nn yobre.

⁵Bi sera'll-llo, llaya'l sollo yewello bi da da'o de kello, le Diosen' ba bne'e: "Bi ganra'lla' re', na' bi kwej yichja' re'." ⁶Ke len na' bibi de da llebllo, na' wak nnello:

Xanllo Diosen' zoe' llakrene' nada'.

Bi lleba' cha' bi da gone be'nnach nada'.

⁷Lelljadinra'll be'nn ka' blla'a be'rén re' xti'll Diosen'. Lewayón xhbab kan' ben ake'n, lenni't lewxenra'll Dios kan' ben leake' na'.

⁸Na' Jesucriston' lekze kan' nej nnase, ka'kze nake' nna' lla, na' ka'kze gake' ke chnare. ⁹Bi we're latj siye'e be'nn re', bi di'll yobre da llzejnie' akre' re', le da xhen nlla'a llroe' llsede bale'. Zan nbaraz naken dan' llroe' Diosen' lo ra'llda'ollon', ni ke dan' nllie're' lli'o, len na' llakrenen lli'o, ker da ka' llasné be'nne ye'j gaollo. Ka nak da ka' ne ake' llaya'l ye'j gaollo nench yewé Diosen' lli'o, bi nna gakrenen be'nn ka' ne ka'.

10 Bxoz ka' be'e ake' da llaya'l we'e ake' kan' batna', na' bdao akte' bayi'x ka' bet ake'n. Na' dan' got Criston' ni ke lli'o, ba zi'llo yel nak la'y ke Diosen' ke dan' bene' na'. Na' bxoz ka' bi gak si'i ake'n. ¹¹Na' be'nn ka' nak bxoz brao ke be'nn Israel ka', twej rao to iz llot ake' bayi'x, nench lljwa'a ake' xchenba'n lo yoda'on gan' nzi'i Latj Ga Llroe'rao Dios, nench llnnab ake' yezi'xhene' do'l ke ake'. Na' llzey ake' bayi'x ka' lloa' yellte. ¹²Na' ka'n gok ke Jesúsen' dan' bet ake' Le'e lloa' yell Jerusalén na', bzane kwine' nench na' bake'e do'l kellon' ren xchene' dan' brarje' na'. 13 Na'llen' llaya'l wxenra'll-llo Jesúsen', na' kwej yichjilo yeolol bi da benllo batna', la'kze cha' wie no be'nn lli'o kan' llonllon'. ¹⁴Gateze zollo da te ke yellrio ni, zan llonkzllo rez yellinllo gan' llie' na', yell dan' bi te ke na'. 15 Dan' ba baka'a Jesucriston' do'l kellon', llaya'l we'llo yel llioxken ke Dios chak nna nbanllo, na' we'xhenlloe' kate we'llo xti'lle'n. 16 Na' bi gatra'll-llo gonllo da wen, na' we'llo arke sa'kello we'llo gakrenllo be'nn bi de ke, le ka'n llazra'll Diosen', na' llonxhenlloe' kat llonllo ka'.

¹⁷Lewzenay ke be'nn ka' lle re' kan' lle'ne Diosen' gonre, na' legón

411 Hebreos 13

kan' ne ake' gonre, le leake'n llwia llyi ake' re' nench gakrén ake' yichjra'llda'oren', na' leake' wadé ake' di'll rao Diosen', cha' akren' ben ake'. Lewzenay ke ake' nench yewé akre', na' dan' llon ake'n bi gaken da zede, le cha' bi wzenayre ke ake', bibi da wen gak keré.

¹⁸Lennab nench gakrén Diosen' neto'. Nnézeto' llonto' kan' llazra'lle' na', na' lle'neto' gontezto' da wen. ¹⁹Na' lla'tyoera' re' yelwillre Dios, nnabre gonne' latj le yedtia' gan' zore na'.

Llnnabe' rao Diosen' gakrene' leake'

²⁰Na' nna' zo Diosen' nzoe' lli'o nbaraz. Le'en balis basbane' Xanllo Jesucriston' radj be'nn wat ka', le dan' brarj xchene'n le' yay cruzen', bzorao llak da kobe da bne Diosen' gone' gakrene' be'nn wxenra'll Le'e. Na' kere da te ke dan' bne'e gone'n. Na' dan' nllie' Xanllo Jesucriston' lli'o, nake' ka to be'nn llap xhi're,

be'nn llon da wen kwis ren xhi'r da'o ke'e ka'. ²¹Na' llnnaba' gakrén Diosen' re' biteze da yálljere nench sore gonre yeolol kan' lle'nre' na', na' gone' yichjra'llda'ollon' kan' lle'nre', dan' nombia'llo Jesucristo na'. Lewxenra'll Jesucriston' to chi'ze. Ka'n gakchga.

²²Be'nn bi'che, llnnabchga' bi gákere zed dan' bzoja' llnneyoera' re' ni, le ra'tzen' ba bzoja' re'.

²³Na' llyixjwe'ra' re', be'nn bi'chllo Timoteon' ba balloje' rill yan', na' zoa' bexhe' ganni. Na' cha' ba byob bare'e ni, na' wchie' katen' yedwia' re' na'.

²⁴Ka nak nada', llwapa' re' lliox ren be'nn brao ka' be'nn ka' llzejnie' re', na' llwia llyi ake' re', na' leska' nollre be'nn nxenra'll Dios yeolol akte' llwapa' lliox. Be'nn lwelljllo ka' za'k gan' nzi'i Italia, leska' llwap ake' re' lliox.

²⁵Dios na' gakrenchgue' re'. Ka'n gakchga.

YICH DAN' BZOJ SANTIAGO

Santiagon' llwape' lliox be'nn ka' naslas zan yell

Nada' Santiago naka' be'nn wen llin ke Dios, na' ke Xanllo Jesucriston'. Llwapa' re' lliox, re' nakre chllinn (12) kwe' xhi'nn dialla da Israel, re' nxenra'llre Jesucriston' na' naslasre yellrio ni.

Akre nnézello kan' lle'ne Diosen' gonllo

²Be'nn bi'che, llaya'l yewello kwis kat llak bi da llak kello. ³Na' kate llak bi da llak kellon', llroe'n cha' zello da war nxenra'll-llo Diosen'. Na' cha' ka' llonllo na', nnézello wakrenen lli'o nench gapllo yel llxhenra'll ke biteze da llak kello. ⁴Ke len na' llaya'l gapre yel llxhenra'll biteze dan' llak ke re', na' sere war wxenra'llre Diosen' nench gakre kan' lle'nre' na'.

⁵Cha' noteze re' bi nnézere akren' lle'ne Diosen' gonllo, lewnnab wzejnie're' re', na' wzejnie'kzere' re', le llawere' llakrene' lli'o, na' bi dile' lli'o kat llnnabllo gakrene' lli'on. ⁶Na' kate nnabllon na', llaya'l gonlira'll-llo gonnkze'n, na' bi gakgánello. Le be'nn llakganre cha' we'en le'e, ba llone' ka to

nisda'o llej lljata'n, to ni to na', kat llde to be' rawe na'. ⁷Be'nn llakganre cha' we'e Diosen' dan' nnabe' na', bi kwexhe' cha' we'e Diosen' dan' llnnabe'n, le bi llejle' ke Dios. ⁸Be'nn llon ka' bi nnezre' bi xhbaben' llone', bi llakbe'e yichjra'llda'we'n bin' lle'nre'.

⁹Be'nn bi'chllo nxenra'll Dios, cha' nake' be'nn ya'ch, llaya'l soe' nbaraz, le nake' be'nn za'k rao Diosen'. ¹⁰Na' be'nnen' nak be'nn wnia' llaya'l soe' nbaraz kat llxhexj yichje' rao Diosen', le yel wnia'n naken da te ke, kan' llak ke yej da'o zjalla'a yi'xe. ¹¹Kat nna' willen' znia kwis, le llkwadte yi'x ka', na' llyinnj xhla'y yejen', na' bill nla'n nbaraz. Ka'n llak yej da'o ka', na' lekze ka'n gak ke be'nn wnia' ka', yenit yerán ake' rao xchin ake'.

Sediallo wxenra'll-llo Jesucriston' biteze da llak kello

12 Cha' llaora'll-llo bi da llak kello, na' zediallo wxenra'll-llo Dios, na'llen' zollo nbaraz. Na' kat te dan' za'kzi'llon', kana'n banrenllo Diosen' ke chnare kan' bne'e gak ke yeolol lli'o nllie' Le'e. ¹³Na' kat lli'o nen gonllo da xhinnjen', bi nnello Dios na'n llko'yele lli'o gonllo da

413 Santiago 1, 2

xhinnjen', le Diosen' bi llko'yelre' be'nne gone' da xhinnj, leska' Le'e bibi de wko'yelen Le'e gone' da xhinnj. ¹⁴Yel llzera'll kello dan' yo' lo yichjra'llda'ollon', llonen nench llzera'll-llo llonllo da xhinnj. ¹⁵Na' cha' lli'o ba llonllo ka dan' zera'll lo yichjra'llda'ollon', na' zollo llonllo da xhinnjen', na'llen' wllin lla kwej yichj Diosen' lli'o, bill yellinllo gan' llie' na'.

¹⁶Be'nn bi'che, bi siye'e kwinre.
¹⁷Dios be'nnen' zo yebá, Le'en llse'le' da wen na' llak kello, na' bi da de kello. Xallo Dios be'nnen' ben will, be'o, na' berj ka' nench llseni'n kello, llone' nench gak wen kello, na' bi llache'e ka gone' kello, zotez zoe' llone' wen. ¹⁸Byazra'll Diosen' bakobe' yichjra'llda'ollon' kan' byejle'llo ke di'll li ke'en. Na' bakobe' yichjra'llda'ollon' nench lliaraorenllo be'nn nell ka' byejle' ke'e.

Kan' gonllo nench yewé Diosen' lli'o

¹⁹Ke len na' be'nn bi'che, llaya'l zga'tek wzenayllo, na' llaya'l gonllo xhbab kat za nnello, na' bi yóbello gaklla'llo. ²⁰Le kat llaklla'llon', bi llak llonllo wen kan' lle'ne Dios na' gonllo. ²¹Ke len na' llaya'l kwej yichjllo yeolol da xhinnj ba benllo, na' yeolol da llwie Diosen', da blli'o bxhe lo yichjra'llda'ollo ka bi nna wxenra'll-lloe'. Len na' llaya'l wxhexj yichjllo wzenayllo di'll li ke Diosen', dan' ba yo'kze lo yichjra'llda'ollo na', len wasrá lli'o.

²²Na' llaya'l gonllo dan' ne di'll li ke Diosen' gonllo, kere kon yénzello kan' nen na'. Le cha' kon llénello kan' nen na', na' bi gonllon, kwinzllon' ba llaziye'e kwinllo cha' ka' llonllo. ²³Be'nn llene di'll li ke Diosen', na' bi llone' kan' nen na', ba llone' ka to be'nn llwia lloa'rawe' lo yejwan. ²⁴Le kon llwie' kan' nak lloa'rawe'n, na' llayoll llwie'n na', le llayanra'llte' kan' nake' na'. ²⁵Zan be'nnen' zokze llzenaye xti'll Diosen' do yichj do ra'lle', na' llone' kan' nen na', bi llayanra'lle'n, be'nn na'n zoe' nbaraz, le xti'll Dios na'n llakrenen le'e biteze da llone'.

²⁶Cha' no llake llonkze' kon ka ne Diosen', na' bi llwie' ka kwell nne'e, kwinze' ziye'e kwine'. Le cha' bi nak xti'lle'n wen rao Dios, bi za'k dan' ne'e nxenra'lle' Diosen'. ²⁷Cha' lle'nello gonllo kan' llawé Xallo Diosen', llaya'l gakrenllo no xkwi'd wazebe, na' no no'r wazeb ak, cha' bi yallj akre', na' kwej yichjllo bill gonllo da xhinnj da llon be'nn bi nombia' Dios.

Toz ka' llaya'l gónello yeolol be'nne

Be'nn bi'che, Xanllo Jesucriston' nake' be'nn zerawe za'ke, na' cha' wxenra'lllloe', toz kan' llaya'l gónello noteze be'nne, kere balze'n gonllo xhen, na' ye bale gónello kaze. ²Cha' ra' chop be'nne gan' lldop ll-llayllo llonllo Jesucriston' xhen, na' toe' nake' be'nn wnia' nake' ra'll cha'o nak nbaraz, na' ngo' xhbene' to ya cha'o dan' nzi'i oro, na' be'nnen' ye to nake' be'nn ya'ch, na' nake' to ra'll da wllin kwis, ³na' cha' gonllo xhen toze be'nn wnia' na'ze yelloe': "Rao siy nile blle' ga kwe'o kwasro", na' yello be'nn ya'chen': "Na'le jasé", o cha' yelloe': "Blle'teze rao yo na'ze", ⁴bi naken wen rao Diosen', le cha'

Santiago 2 414

ka' llonllo, ba llala'llo be'nne, na' ba llroe'llo noren' za'ke, na' noren' bibi za'kteke. Ke len na' bi llonllo wen, le bi nak yichjra'llda'ollo wen na'.

⁵Be'nn bi'che, ba brej Diosen' zan be'nn ya'ch, nak ake' rallne'e, na' llonlira'll ake' Le'e. Na' nni't ake' nbaraz kat yellín ake' gan' llie' na' llnebie', kan' gak ke noteze lli'o nllie' Le'e. ⁶Zan re' llonre be'nn ya'ch ka' ka be'nn bibi za'ke. Na' llonre be'nn wnia' ka' xhen kwis ka to be'nn za'ke. Rencha' leake'n llsa'kzi' ake' re', llxhoblle'o ake' re' do rao koxchis. ⁷Lekze leake'n llalli'i llasné ake' da nak krere ke Jesucristo be'nnen' nxenra'll-llo, be'nnen' nak be'nn za'k.

⁸Ley dan' nak lliarao rao yeolol xti'll Diosen' nen: "Lellie' lwelli be'nnachre ka nllie' kwinre." Cha' da li llonre kan' nen na'. llonre wen. ⁹Na' ley ke Diosen' llchoyraon keré, napre do'le cha' balze be'nne llonre xhen, na' ye bale' llónere ka be'nn bibi za'ke. 10 Le cha' to be'nne nawe' llone' yeolol kan' ne ley na', na' cha' to da da'o ba bxinnje', ke doxhenkze ley na'n ba bxinnje' cha' ka'. 11 Dios na'kzen' bne'e: "Bi tarenre no'r bi nak no'r keré, na' be'nn byio bi nak be'nn keré", leska' bne'e: "Bi gotre be'nne". Na' la'kze cha' bi darenllo no'r yobre, o be'nn byio bi nak be'nn kello, cha' ba nakllo be'nn wen xhia, naksen xhia kello rao ley na'. 12 Xti'll Diosen' llakrenen lli'o nench bi wzenayllo ke da xhinnjen'. Na' llaya'l we'llo Di'll Wen, na' sollo gonllo billre kan' nen na', le Diosen' gonne' da sa'kzi'llo cha' bi llonllo kan' nen na'. ¹³Diosen' we'e da wsa'kzi' be'nn ka', bi llaya'chra'll lwellj be'nnache. Zan be'nn ka' llaya'chra'll lwellj be'nnache, ka'kze yeya'chra'll Diosen' leake'.

Bibi zejen nnello de di'llze nxenra'll-llo Jesucriston'

¹⁴Be'nn bi'che, cha' to be'nne nne'e nxenra'lle' Jesucriston' de di'llze, na' bi llone' da wen, ¿wak dan' nxenra'lle' na'ze wasrán le'e rao da xhinnien'? 15 Gonkello xhbab chet ka' zjani't bal be'nn lwellillo nxenra'll ake' Jesucriston', na' bi de da ye'j gao ake', bi de no xhara'n ake'. ¹⁶Na' cha' yezlloe': "Lelljayakze wen wen, Dios gakrene' re' llélere da ye'j gaore", na' bi we'e aklloe' bi da ka' llyallj akre', ¿bixha zejen na' cha' to ka'ze ye aklloe'? ¹⁷Len na' cha' kon to nnezllo nxenra'll-llo Jesucriston', na' ni ke llonzllo da wen, bikzbi zejen dan' nnello nxenra'll-lloe'.

18 Zjani't be'nne llasné ake':
"Rwe' nxenra'llo' Jesucriston', na'
nada' llona' da wen." Broe'chk
nada' dan' nxenra'llo'n, na' bi
gono' da wen, na' nada' wroe'ra'
rwe' dan' nxenra'lla'n kone da wen
ka' llona'n. 19 Rwe' llejle'o toze
Diosen' zo, llonkzo' wen. Leska'
llejle' daxi'o ka', toze Diosen' nake'
be'nn za'ke, na' xhiz aken lleb
aken. 20 ¿Bi nnezro' bibi za'k dan'
nello nxenra'll-llo Jesucriston' cha'
bi llonllo wen? Kere wakrenen
lli'o cha' nnello ka' de di'llze
nxenra'll-lloe'.

²¹Da xozxta'ollo Abraham na', broe're bxenra'lle' Dios dan' bzenaye' ke'e, bzanre' xhi'nne' 415 Santiago 2, 3

Isaaken' gotebe' nench gone' xhen Diosen'. Na' dan' bzoe' xti'll Dios na', na'llen' bne Diosen' ke'e, nake' be'nn wen rawe'. ²²Na' nnézello kan' ben da Abraham na', kere to bxenra'llze' Diosen' ka'zen', bene' yeolol da golle' le'e. Na'llen' broe'n bxenra'lle' Dios. ²³Ke len na' gok dan' nyoj xti'll Diosen' ke le'e, nen: "Abraham na' bxenra'lle' Dios, na'llen' bne Diosen' ke'e, nake' be'nn wen rao Le'e." Na' leska' nyoj ke Abraham na', goke' migo ke Dios.

²⁴Na' llre're na', Diosen' ne'e nakllo be'nn wen rawe', ni ke dan' llonllo na', kere dan' nello nxenra'll-lloe' na'zen'. 25 Lekze ka' gok ke da Rahab goke' to no'r re'e. na' bzenaye' ke Dios dan' brebe' be'nn chop ka' jawiá ralle' na'. Na' bawe' leake' jayake' ye to nez yobre, nench bi je'x be'nn waka'a ya ke rey na' leake'. Na' dan' gokrene' be'nn ka', broe'n llonlira'lle' Dios, Na' bwia Diosen' nake' be'nn wen rawe' na'. ²⁶Le kin' naken: Cha' to be'nne billbi bich yoe', ba nakse' be'nn wat. Ka'kzen' naken ke lli'o, cha' nello llonlira'll-llo Diosen', na' bi llonllo da wen.

Roll-llon' llonrenllon da xhinnj

Be'nn bi'che, neto' llroe' llsédeto' xti'll Diosen' be'nn yobre, wza'kzi'llto' cha' bi gonto' kan' nen na'. Na'llen' nia' re', kere le gakte rao na're wroe' wsédere be'nn yobre xti'll Diosen'. ² Yeololtello llonllo da xhinnj, zan cha' to be'nne bi llone' da xhinnj rao xti'lle' na', nakse' be'nn wen, na' wzoekzere' nnebia' kwine' cha' ka'. ³ Kate llgo'llo to ya lloa' kabay

nench llonnba' latj llo'xlloba', na' llejba' gateze lle'nello chejrenlloba'. ⁴Leska' be'nn ka' llsa'a barco xhen ka', llonrén ake' llin to yay da'oze da llsa'a ake'n nench chejen gateze lle'n akre', la'kze cha' ll-lli'y to be' xhen len. 5Ka'kzen' naken ke roll-llon'. To da da'o rizzen' naken, na' llak nnerenllon di'll za'ke. Na' ka nak to yi' da'o riz, wak wzeyen to ya'da'o xhen, ka'kzen' naken ke roll-llon' kate nnerenllon di'll xhinnj. ⁶Roll-llon' naken to da llonll da xhinni xhen rao doxhen kwerp kellon'. Roll-llon' naken ka to bel yi' da llra' to ni na'ze, llzeven biteze da de, le cha' lloe'llo di'll xhinnj, llonen gan nench sollo gonllo da xhinni doxhente nbanllo. Na' katen' nnello, naken ka da za'a gabilen'. ⁷Llak llnebia'llo yeololte bayi'xe, ba zo tap nia'na'a, ba zo xire, ba nxhob le'e, na' ba lla'a lo nis. Ba bzo be'nn maxh leakba'. ⁸Zan ka nak roll-llon' nono zo be'nn soe len, nench bi we'renllo di'll xhinnj. Le zoteze zon lloe'n di'll xhinni, na' di'll xhinni dan' lloe'n, na' naken ka yerb ke to bel znia. 9Ren rollllo na' llonllo xhen Dios be'nnen' nak Xallo. Na' lekze kone roll-llo na', nello yel ya' ke lwelljllo, be'nn ka' ben Diosen' kan' nak Le'e na'. ¹⁰Lloa'llo na' ll-lloj di'll wen kat llalwill-llo Diosen', na' lekze na' ll-lloj di'll xhinnj kat nnechachllo ke lwellj be'nnachllo. Be'nn bi'che, da ni bi llaya'l gonllo. 11 Nnézello ga llar nisen', bi gare nis da nak sia gan' llar nis zbapj. ¹²Be'nn bi'che, leska' to yay higo bi llbian daxhix nzi'i aceituna, na' yay uvas ni ke kwiazen higo. Na' leska' gan' llar

Santiago 3, 4 416

nisen', kere ware nis da nak sia ga llare nis zbapjen'.

Ka gonllo cha' ba benn Diosen' lli'o yel si'n ke'en

¹³Cha' nol re' nnere nakre be'nn si'n llejnie're xti'll Diosen', llava'l gonre yeolol kan' llazra'll Dios na'. Llaya'l gonre da wen, na' bi yeyoe'raoze kwinre, na'llen' nroe'n nakre be'nn si'n. ¹⁴Zan cha' llwie lwelli be'nnachre, na' lle'nere gakre be'nn braoll ka be'nn lwelljre ka', bi llaya'l nnere nakre be'nn si'n, le ziye'zren cha' ka' nere. 15 Bi napre yel si'n da za'a yebá, le xhbab keré na' za'n ke daxi'on, na' nna llonre da xhinni kon kan' ne ra'llda'ore na', kan' llon be'nn ka' bi nombia' Dios. ¹⁶Le gan' llwie lwellillo, na' llakyollrén lwelljllo, ganna' llroe'n bi llejnie'llo kan' llonllo, na' llonllo biteze da xhinnje. ¹⁷Kat llonn Diosen' lli'o yel si'n ke'en, lle'nello gonllo yeolol da wen. Lle'nello sorén lwellillo nbaraz, na' nakllo be'nn xhenra'lle, na' wxhexj yichillo nench wzenay ke lwellillo. Na' leska' yeya'chra'll lwellillo, na' gonllo da wen ke ake', na' toz ka gónello noteze be'nne. Na' biteze da gonllo, gonllon do ra'll-llo. ¹⁸Na' cha' llawello so kwez be'nne nbaraz, na' llakrenllo yezikre be'nne, nench so kwez ake' nbaraz, na' llakrenen nench gon be'nn ak da wen.

Bi gonllo ka llon be'nn ka' bi nombia' Dios

4 ¿Bixchen llakdilre llchachrén lwelljre? Llonre ka' dan' yo' nyaz da xhinnjen' yichjra'llda'ore, llnebia'n re' nench llonre ka nen

keré. ²Zera'llre kwis bi da ga't keré, na' dilre chachrén lwelljre, na' lle'ntere got lwelljre nench na' ga't dan' zera'llre na'. Na' kere bi ga't keré dan' lle'neren', ka naken llonre da xhinnjen', na' bi llnnabre rao Dios nench gonne' ga't dan' válljere na'. ³Na' kate llnnabre rao Diosen' nench gonne' bi dan' lle'nere ga't keré, kere gonne'n, le to lo ra'llda'oren' lle'nere ga't dan' zera'llre, nench gonre ka nen keré. ⁴Ba llonre ka to no'r zo xto, no'r bill llejle' ke xhyiwe'. Dan' llzenayre ke dan' ne xhbab keré na', llonre txhen be'nn ka' bi nombia' Dios, na' ll-lliayi'llre Diosen'. Na' cha' lle'nello gonrenllo be'nn wen da xhinnj ka' txhen, ba ll-lliayi'll-llo Diosen', bill nllie'lloe' ka llaya'le. ⁵Llonjere xhbab bibi za'k xti'll Diosen' gan' nen: "Spíritu ke Diosen' dan' zo lo yichira'llda'ollon', zera'llen kwis wzoallo xti'll toze Diosen'." ⁶Diosen' llakrene' lli'o kwis, nench na' llzenayllo ke toze Le'e. Na'llen' nyoj xti'll Diosen' nen: "Diosen! llwiere! be!nn ka! llayoe'rao kwin, na' llakrenkze' be'nn ka' nak nexjra'lle'." ⁷Ke len na' llaya'l serenllo Dios, na' gonllo war bi wzenayllo ke daxi'on. Cha' ka' gonllo, wkwaskze daxi'on ka'le. ⁸Lesó leyelwill Diosen', na'll soe' gakrene' re'. Llaya'l kwej yichjre da xhinnj ka' llonre. Na' cha! llákere wakse wxenra!ll-llo Diosen', na' gontezllo bi da za'ra'll lo ra'llda'ollon', kreren' llonre xhbaben' chet ka', na' llaya'l we're latj yeyón Diosen' yichjra'llda'oren' valle. 9Legakzede, na' legake, na' lekwell. Yel llawé kerén' lewacha'n

417 Santiago 4, 5

yel bell, na' yel zo nbaraz kerén' leyezoya'che. ¹⁰Llaya'l wxhexj yichjre rao Xanllo Diosen', na'll Diosen' gone' nench gakre xhen.

Bi llaya'l wlliayi'll lwelljllo

¹¹Be'nn bi'che, bi llaya'l nnechachllo ke lwelljllo. Be'nn nnechach ke lwellje' na', ll-lliayi'lle lwellje'n, be'nn na'n nne'e ke ley ke Dios, llzoe' leyen' ka'le. Na' be'nn ka' llon ka', bi llzoe' di'll kan' ne ley na'n. Llone' ley ke Diosen' ka to da bi za'ke. ¹²Toze Dios na'n bdixje' leyen', na' toze Le'en za'ke wchoyrawe' ke totollo cha' de do'l kello. Na' toz Le'e za'k yesre'e be'nn lo yi' gabil, na' lekze Le'en za'k nench yese'le' be'nn lo yi' gabilen'. Zan lli'o nono nakllo nnello ke be'nn lwelljllo nape' do'le.

Bi nnézello bi gak wxe willje

13 Na' nna' lewiá ke, re' nere:
"Nna' ren wxe, chejllo yell zi'te,
na' lljasollo to iz, na' ga'ollo bi da
wayo'tllo, na' gonllo gan." 14 Na' ni
ke nnézzere bin' gak keré wxe. Le
¿akre nak yel nban kellon'? Da li
naken ka to bej da llroe'rao chollze,
na' le llaranten. 15 Llaya'l nnere:
"Cha' Xanllo Diosen' gonne' yel
nban, na'll gona' da lle'nra' gona'."

16 Zan da xhinnjen' llonre llayoe'rao
kwinre, ba llwiare akre gonre. 17 Na'
be'nnen' nnezre' akren' llaya'l gone'
da wen, na' bi llone'n, naken xhia
ke'e rao Dios.

Da xhinnj kwis gak ke be'nn wnia' ka' bi lljadinra'll Dios

Ka nak re' be'nn wnia', re' bi lljadinra'llre Diosen' legosia'

lekwell, ke da ba za'a wsa'kzi' re'. ²Ka nak rao Diosen' dan' de kerén' naken ka to da ba llbeyi', na' ra'll cha'o kerén' naken ka to da ba llde. ³Na' xhmellre na' dan' nak de ya cha'o nzi'i oro ren dan' nzi'i plat, ba naken ka da ba llbia re. Len na' kat llin lla yellayraore kwis lo yi' gabil. Ba blle' yichjre toze da wpa're mell xhen, ka'kze ba zo da gon Diosen' keré sa'kzi're. 4Llaya'l wayonre xhbab ka bénere no be'nn wen llin keré, be'nn ya'ch ben wrap keré. Ka nak da bi bdixhj akre' ka llaya'le. Ke len na' nonen re' be'nn wen da xhinnj. Len na' llaklla'a Diosen', llzenaye' kan' llosia' be'nn wen llin ka', Dios be'nnen' nape le zerawe yel wak xhen. ⁵Na' zotez zore lle'i llaore kwasro, na' llonditjere da de keré llonre kon ka nen keré. Na' dan' llonre ka'n, nakre ka to bayi'x ba llonchie' yeyakba' ba za, kat llin lla goteba'. ⁶Na' dan' ga lli're llonre yel koxchis, ba bse'lre be'nn bet ake' be'nn ben da wen, na' bi bda'ba'y ake! re!.

Kwezllo baten' yed Xanllo Jesucriston' da yobre na' yelwill-llo Diosen'

⁷Ka nak re' be'nn bi'che, legap yel llxhenra'll bi da llak keré, le ba rez yed Xanllo Jesucriston' da yobre. Be'nn ka' llaz lla'nne, llzo ake' bexh ake' gak dan' naz ake'n, le dan' naz aken' naken da za'ke. Na' llap ake' yel llxhenra'll bexh ake' llde rinnen', le kate ba brexh yej na', na'tellen' yetop ake' dan' goz ake'n. ⁸Ke len na'n bitez da llak keré, llaya'l gapre yel llxhenra'lle, na' gondipra'llre wxenra'llre Xanllo Jesucriston', le

Santiago 5 418

ba zo rez yede' da yobre. ⁹Be'nn bi'che, bi gao xhia ke lwelljre cha' bi dan' llak keré, nench ke wzanll Diosen' do'l keré, le Le'en nake' be'nn gon yel koxchis, na' ba rez yede' da yobre. 10 Lewayón xhbab ke be'nn ka' be'e xti'll Xanllo Diosen' kana'. Bitez bi da bsa'kzi' be'nne leake', na' bdaora'll ake'. ¹¹Na' neto' lláketo' nbaraz ke be'nn ka' bzo akteze benchochra'll ake'. bxenra'll ake' Dios la'kze bllayrao ake'. Na' ba bénere xti'll be'nnen' golle Job kan' bdaora'lle' benlira'lle' Diosen', la'kze da zan da bxha'kzie'. Na' ka bde dan' bxha'kzie' na', bzoall Diosen' le'e nbarazlle kerke kan' bzoe' da nellte. Ka'n nak Diosen' na' llakrene' lli'o, leska' llaya'chra'lle' lli'o.

¹²Na' ke nake da ki be'nn bi'che, kbat wzoazre yebán', ni yellrio ni, na' billre da yobre di'll lin' lloe're. Cha' nnere waken, waksen; cha' nere bi gak, bi gaksen na', nench ke wxoa Diosen' do'l ko'llre.

¹³Notezre kat bi da llak keré, llaya'l yelwillre Dios. Na' notezre kat zore nbaraz, llaya'l golre gonre xhen Dios. ¹⁴Cha' no llak no yillwe', llaya'l gaxhe' be'nn ka' llap llwia be'nn ka' llonlira'll Jesucriston'. Na' wtop ake' ra't ceit yichj be'nnen' llak yillwe'n, yelwill ake' Dios nnab ake' yeyake' kone vel wak ke Xanllo Jesucriston'. ¹⁵Na' kat yelwillre Xanllo Diosen', llaya'l chejle're ke'e, na' Xanllo na' walise' le'e; na' cha' bi da xhinnj ba bene', wazi'xhenkze' ke'e. 16 Ke len na' llaya'l wxoarapllo rao be'nn lwelljllo, na' yelwill-llo Dios wnnab ke lwelljllo nench yezollo wen cha' bi dan' llak kellon'. Le cha' nakllo be'nn wen rao Dios, Diosen' lléntere' kate yelwill-lloe', na' llone' da zan da wen da llnnábelloe'. ¹⁷Lewiá ke Elías belnneni bele xtiill Dios kana'. Goke' ka lli'o be'nnach. Na' balwille' Diosen' do yichi do ra'lle', na' bnnabe' bi gak yejw, na' bzoa Diosen' xti'lle', bi gok yejen' chonn iz ye achje. 18 Na'll da yobre balwille' Diosen', bannabe' yese'le' yejen' da yobre, na'll base'l Diosen' len, na' bayak bi da goz be'nn ka' da yobre.

¹⁹Be'nn bi'che, kat to be'nn lwelljllo ba brej yichje' dan' nak da li dan' bzejnie' Diosen' lli'o, llaya'l gakrenlloe' nench yeyatre' da xhinnj ke'en bene'n. ²⁰Lle'nra' nnézere, kat llonllo nench noteze be'nne yeyatre' do'l ke'en, llakrenlloe' nench yesrá Diosen' le'e rao yel got ke chnaren'. Na' wazi'xhene' xto'le'n la'kze cha' da zan da ba bene'.

YICH NELL DAN' BZOJ POSTL SAN PEDRO

Pedro llzoje' yich ni ke be'nn ka' naslas nxenra'll Criston'

Nada' Pedro naka' postl ke Jesucriston', na' llzoja' yich ni ke re', naslasre gan' nzi'i Ponto, na' gan' nzi'i Galacia, na' gan' nzi'i Capadocia, na' gan' nzi'i Asia, na' gan' nzi'i Bitinia. Lli'o llonlira'll-llo Jesucriston' nakllo ka be'nn zi'te, ren yezikre be'nne lla'a yellrio ni. ²Kon kan' broe' xhnneze kana'te, Xallo Diosen' breje' lli'o nench bacha'a Spíritu ke'en yichjra'llda'ollon', na' bro'n lli'o rao na'a Diosen'. Ka'n bene' nench llzenayllo ke Diosen', na' nench Jesucriston' zoe' llayone' yichjra'llda'ollon' yalle, dan' brarj xchene'n le' yay cruzen' ni kello. Llnnaba' rao Diosen' gakrenchgue' re', na' wzoe' yichjra'llda'oren' so kwezre nbaraz.

Sollo rez yellinllo gan' llia Diosen'

³Llaya'l we'raollo Diosen' le Le'en nak Xa Xanllo Jesucriston'. Le Diosen' llaya'chra'lle' lli'o, na'llen' bakobe' yichjra'llda'ollo, na' bene' nench sollo rez yellinllo gan' llie' na', le Jesucristo na' babane' radj be'nn wat ka'. ⁴Dios na' gone' ga gak da wen kello, to da nbaraz kwis da bi yenit da bi te ke, to da ngo'cha'we' gaken kello kat yellinllo yebá na'. ⁵Kone yel wak xhen ke Diosen', llkwe'jen lli'o rao da xhinnjen' dan' llonlira'll-lloe' na', ka'n llone' chak bi nna llin lla re'llo da nbarazen' gonne' kello kat yellinllo gan' llie' na'.

⁶Ke len na' sore nbaraz la'kze da zan da ll-llayraore to chi'i weje. ⁷Dan' nxenra'llre na' naken ka ya cha'o nzi'i oro, le kat cheyen na', yeroe'n da nak wen, na' yelloj da bi nak wen. Kan' nakse dan' llonn Diosen' latj llak keré. Na'llen' nakbie' llonlira'llre kat bi llak keré. Na' dan' nxenra'llre na', za'kllen ye ra't ka ya cha'o dan' nzi'i oro. Na' katen' yed Jesucriston' da yobre, Diosen' we'e di'll nne'e benre wen, na' gonne' yel bara'nn xhen keré.

⁸La'kze bi nna re're Jesucriston', nllie're'. Na' nxenra'llkzre' la'kze bi llre're' nna'. Ke len na' zokzre nbaraz kwis. Na' katek nbaraz zore na', to ni ke llakzre we're di'll ren be'nn ka' katken' llawere na'. ⁹Na' dan' llonlira'llre Jesucriston', wllin lla yesrá Diosen' re'. 1 Pedro 1 420

¹⁰Be'nn ka' be'e xti'll Diosen' kana', bsedvoll ake' kan' yeya'chra'll Diosen' lli'o zollo nna'. ¹¹Spíritu ke Criston' bzorenen leake', bzejnie'n leake' yed Criston' yellrio ni, na' sa'kzie', na' yeyoll na', wroe' Diosen' nake' be'nn za'k kwis. Na'llen' bsed akya'nne', na' bayirjyoll ake', noxha ya'nnen' wse'l Diosen' gakrene' lli'o, na' batxhan' yede'. ¹²Na' bzejnie' Diosen' leake' ke da ka' bzoj ake'n, nench byejnie' akre' gaken ke lli'o lla'a nna', na' kere ke leake'. Na' nna' Spíritu dan' za'a gan' zo Diosen', ba benen bni't be'nn badtixjwe' re' Di'll Wen ke Criston', na' di'll ke'en naken rebe ren dan' bzoi be'nn ka' be'e xti'll Diosen' kana'. Na' rente angl ke Diosen' lle'n akre' chejnie' akre' akren' llakrén Diosen' lli'o.

Diosen' llayaxhe' lli'o gak yichjra'llda'ollon' yalle

¹³Ke len na' llaya'l cho' yichjre gonre ga zerao sa'kere nench gonre kan' llazra'll Diosen'. Llaya'l sore yewere gon Diosen' gak wen keré kat llin lla ved Jesucriston' da vobre. ¹⁴Na' dan' nakre xhi'nn Diosen' llaya'l wzoare xti'lle', na' bill gonre da xhinnjen' byo' ra'llda'oren' kana', kan' bi nna chejnie're ke Diosen'. ¹⁵Dios na' ba breje' lli'o nak rallne'e, na' Le'e nake' be'nn ra'llda'o valle. Na' kon ka nak Le'e be'nn ra'llda'o yalle, lekze ka'n llaya'l gakllo be'nn ra'llda'o yall rao yeolol bi da llonllo. ¹⁶Le xti'll Diosen' nyojen': "Legak be'nn ra'llda'o yall kan' naka' nada', naka' be'nn ra'llda'o yalle."

¹⁷Re' llalwillre Diosen' na' llere': "Xato' Dios", Diosen' be'nnen' llwia

ka gone' ke totollo lli'o cha' napllo do'le kon kan' nak dan' llonllo, na' toz kan' llonkze' ke yeolol-llo, ke len na' llaya'l llebllo bi gonllo da bi llazra'll Diosen' chak nna zollo yellrio ni. 18 Nnézkzello ba babej Diosen' lli'o rao da ka' bzejnie' da xozxta'ollo ka' lli'o, da ka' bibi za'ke. Na' re' nnézkzere kwasro ka nak dan' bdixhje' nench basre'e lli'o, bi bdixhje'n ren da llde ke, ka nak no mell plat, na' no mell de oro. 19 Cristo na' ya'nnen' bse'l Diosen' badrari xchene'n da za'ke, na' bzane' yel nban ke'e gote' nench babeje' lli'o rawe dan' bibi za'ken. Criston' nake' ka to xhi'r da'o, ba bibi yillwe' da'a, ba bibi llake. ²⁰Za xe yellrio na'ten' brej Diosen' Criston', na' bse'le' Le'e ganni nna' ba rez yeyoll yellrion', nench gakrene' lli'o. ²¹Ni ke Cristo na'n zollo llonlira'll-llo Dios. Dios na'n basbane' Criston' radi be'nn wat ka', nench broe'n nak Criston' be'nn za'ke. Na'llen' zollo llonlira'll-llo Diosen', na' llonllo rez gon Diosen' wen kello.

²²Na' da llakrén Spíritu ke Diosen' lli'o, ba llzenayllo di'll li ke Diosen', na' llonllo kan' nen na'. Ke len na' ba bayall ra'llda'ollon', na' do ra'll-llo ba nllie'llo yezikre be'nn nxenra'll Jesucriston'. Na' ka'kze llaya'l gonllo, llaya'l llie' lwelljllo do yichj do ra'll-llo, kere de di'llzen' nnello ka'.
²³Xaxhna' lli'o zollo yellrio ni, nak ake' be'nn llat, na' kere dan' gorjllo ke leake'n nakllo xhi'nn Diosen', naksllo xhi'nne' le bakobe' yichjra'llda'ollon', kan' byejle'llo xti'lle' na'. Na' xti'lle'n naken ke chnare, kere da te ken'.
²⁴Llak kan' nyojen, nen:

421 1 Pedro 1, 2

Yeolol be'nnach llde ke ake' ka llde ke yi'xe,

na' yeolol dan' llawé be'nnach yellrio ni, da llak akre' za'ken, naken ka to yej yi'xe. Llyech yi'xen', na' llyechrente yej ke na'.

²⁵ Zan xti'll Diosen' naken ke chnare, kere da te ken'. Na' xti'lle' na' naken Di'll Wen dan' ba bdixjwe'to' re'.

Ke len na' llaya'l kwej yichjllo yeolol da xhinnj llonllo. Bi siye'llo, bi gonllo nench gake be'nne lli'o be'nn wen, bi yexhe'llo be'nne, bi nnello di'll yel ya' ke be'nne. ²Na' llaya'l gonllo ka to bida'o za llarjte, lle'nebe' ga'llbe' xhi'lle', ka'n llaya'l gon lli'o sera'lllo yénello xti'll Diosen', le naken da wen, na' kate llénellon na', llakrenen lli'o nench llonllo kan' llaya'l gon lli'o ba de yel wasrá kello, ³ka nak ba bembia'llo yel nllie' ke Xanllo Cristo na'.

Criston' nake' ka to yej da yo' skin yo'

⁴Llaya'l lljabi'yllo gan' ze Xanllo Jesucriston', be'nnen' llonn yel nban zejlikane kello. Be'nn zan llwie Le'e, la'kze Diosen' breje' Le'e nench llakrene' lli'o, na' Le'en za'ke rao Diosen'. Ke len na' Jesucriston' nake' ka to yej wen da brej be'nne, nench gaken yej skin rille'n, bixha be'nn wen llin ka', bi byo'ra'll ake'n, na' baka'a ake'n chla're. ⁵Na' lli'o napllo yel nban dan' llonlira'll-llo Jesucriston'. Ke len na' naklloe' txhen, na' nakllo ka yej da ba nkwe'e ga llone' yo'. Na' nakllo ka rill Dios gan' zorene' lli'o. Leska'

nakllo ka bxoz be'nn ka' nak rao na'a Dios, le nakllo rao na'a Diosen', na' llakrén Jesucriston' lli'o, nench sokzllo wxenra'll-llo Diosen' kon kan' llazra'lle' na'. ⁶Na' nyoj xti'll Diosen', nen:

Wse'la' to be'nne yell Sión na', na' nake' ka to yej da za'ke, da brej be'nne nench gaken yej skin rille'.

Na' be'nn gonlira'll Le'e, kbat yeyatre' dan' bxenra'lle' Le'e.

⁷Na' ke lli'o llonlira'll-llo Jesucriston' nake' be'nn za'ke. Zan be'nn bi llonlira'll Le'e, nyojkze da ni ke ake', nen:

Yej dan' bi byo'ra'll be'nn wen yo' ka', gonrén ake' llin, len na' ba naken yej skin.

⁸Na' leska' nen:

Naken ka to yej da lljache'o be'nne, na' ka to yej da llgo' nie', ll-llixen le'e.

Lljache'o be'nn ka', le bi llejle' ake' xti'll Diosen'. Na' Diosen' bllie' bia'a gak ke ake' ka'.

Lli'o llonlira'll-llo Diosen' nakllo rallne'e

⁹Lli'o ba brej Diosen' llonlira'll-lloe'. Na' kone Le'e ba nakllo ka to be'nn llnebia', na' ba none' lli'o ka bxoz. Breje' lli'o nench nakllo yell xhen ke'e, na' naktello ka no dialle'e, le lle'nre' chixjwe'llo ka da wen xhen na' llone' na'. Le'en babeje' lli'o rao da xhinnjen' benllo na', na' broe' beni' xhen ke'en lo yichjra'llda'ollo, nench na' sollo gonllo da wen. ¹⁰Kana' bi nxenra'llre Diosen', na' bi gokre yell ke'e, zan nna' ba nakre yell ke'e.

1 Pedro 2, 3 422

Kana' bi nna yeya'chra'lle' re', zan nna' ba baya'chra'll Diosen' re'.

Llaya'l gonllo da llazra'll Diosen'

¹¹Nllie'ra' re' be'nn bi'che, lla'tyoera' re' gonre xhbab, yellrio ni bi naken rallre. Len na' bi gonre biteze da xhinnj da nen ke xpe'rren', le cha' ka' gonre, wllonen so yichjra'llda'ore nbaraz rao Diosen'. ¹²Lesó legón da wen nench be'nn ka' bi llonlira'll Diosen', re'e akre' re' llonre da wen, la'kze ll-lliayi'll ake' re' nna', ne ake' nakre be'nn wen da xhinnj, na' wllin lla re'e akre' llonre da wen, na' gon ake' xhen Diosen' kat llin lla choybie' ke totoe'.

¹³Dan' llonlira'llre Xanllo Criston', lewzenay ke yeolol be'nn ba bzoa be'nnach nench nnebia' ake' re'. Lewzenay ke be'nn llnebia' doxhen gan' zollon'. ¹⁴Na' leska' lewzenay ke be'nn wnebia' ka' llse'l reyen', le leake'n nak rallna'a ake' we'e ake' be'nn wen da xhinnj ka' yel llza'kzi' ke ake', na' gon ake' xhen be'nn ka' llon kan' llaya'l gon ake' na'. ¹⁵Diosen' lle'nre' gonllo da wen nench na' be'nn ka' bi llejnie', be'nn nchol yichjra'llda'o ake', bi llel akre' di'll da nne ake' kello.

¹⁶Llaya'l sollo nbaraz dan' bill yo'llo rao na'a daxi'on, na' bi gonllo xhbab wakll gonllo bi da xhinnj. Zan gonllo da wen le ba yo'llo rao na'a Diosen'. ¹⁷Llaya'l gapllo bara'nne yeolol be'nne. Na' llaya'l llie'llo be'nn lwelljllo be'nn nxenra'll Jesucriston'. Llaya'l llebllo Diosen', na' gapllo be'nn llnebia' lli'o bara'nne.

Criston' bdaora'lle' dan' bxha'kzie'

¹⁸Re' llon xchin be'nne, lewzenay ke xanren', legap ake' bara'nne.

Kere ke be'nn ka' nak be'nn wenzen' wzenayre ke, renkze be'nn nak be'nn znian' wzenayre ke ake'. ¹⁹Cha' bibi da xhinnj nonre, na' llsa'kzi' ake' re', wawekze Diosen' cha' llonre banez bi da llon akre' re'. ²⁰Zan bibi za'ken cha' ba benre da xhinnj, na' ba llsa'kzi' ake' re'. Zan cha' llonre to da wen, na' llsa'kzi' ake' re', len na' za'k rao Dios. ²¹Le Diosen' breje' lli'o nench bi wayechillo kat bi gone be'nne lli'o, leska'n bxha'kzi' Criston' ni ke lli'o, bene' banez bi da gok ke'e. bxha'kzie' nench na' wiallo kan' gonllo. ²²Criston' bibi da xhinnj bene', ni to di'll wenra'll bi bne'e. ²³Kan' bchachrén ake' Le'e, bibi di'll ballie' leake'. Kan' bsa'kzi' ake' Le'e, bi bne'e yeyakte ke be'nn ka', kan' llon akre' Le'en. Kon ben kwine' rao na'a Diosen', le nnezre' Dios na'kze wchoye' akre gone' ke be'nn ka' llon ka'. ²⁴Criston' bzane' yel nban ke'en bet ake' Le'e le' yay cruzen', na' zanoe' yeolol da xhinni kello ka'. Ke len llaya'l gakllo ka to be'nn wat rao da xhinni de rao yellrio ni, na' sollo gonllo da wen. Na' dan' goke' we'e na', bayone' lli'o. ²⁵Le lli'o gokllo ka xhi'r da'o ba bnite xanba', zan nna' ba bayakllo ka ba ballele xan, le Cristo na' llap llwie' lli'o, yo'llo rao ne'e.

Dan' llaya'l yeso'n be'nn ka' nchayna'a

Leska' re' no're nchayna're, llaya'l wzenayre ke xhyiore, le bal ake' bi nna nnez akre' xti'll Diosen', na' cha' re' llzenayre, gakbe'e akre' xti'll Diosen' naken da wen, na' wxenra'll ake' Diosen',

423 1 Pedro 3

²kate re'e akre' llap akre' bara'nne, na' nak ra'llda'oren' yall rao Dios. ³Na' kere tetere yezocha'ore, na' wapa' yichjraore, na' wlliarize kwinre ya cha'o nzi'i oro, na' gakre no ra'll cha'o. Bibi de gakrén dan' re', nench gak yichjra'llda'oren' yall. ⁴Dan' nak lliarao, gak ra'llda'ore wen. Na' za'kllen rao Dios gakre be'nn nexira'lle, ke da ki bi te ke. 5Kana' blla'a no'r ak be'nn benlira'll Dios, na' ben kwin ake' rao ne'e. Leake'n gok ake' be'nn nexira'lle, na' bzoa ake' xti'll xhyio ake'n, bi da goll ake' leake'. 6Kan' ben da Sara, no'r ke da xozxta'ollo Abraham, bzoe' xti'll xhyiwe'n, na' golle' le'e: "Xana'". Na' re' cha' sotezre gonre da wen, na' bi llebre. na'll nne ake' nakre xhi'nn da Saran', le llonre kan' bene' na'.

⁷Leska' re' be'nn byio, leska' llaya'l gakre be'nn wen rao no'r keré, na' gap akre' bara'nne, le bi nak ake' be'nn war ka re' be'nn byio. Le yeololkzllon', nllie' Dios llonne' yel nban kello, kan' nonnkze' ke leake'. Na'llen' llaya'l gon akere' wen nench bibi wllon kat yelwillre Diosen'.

Kan' gonllo cha' llsa'kzi' ake' lli'o la'kze llonllo da wen

⁸Yeolol-llo llaya'l toz ka gakllo, na' llaya'l yeya'chra'll-llo cha' bi llak ke be'nn lwelljllo. Llaya'l llie'lloe' do ra'll-llo ka no be'nn bi'ch lwelljllo, na' llaya'l gakllo be'nn cha'o rao be'nn lwelljllo, na' bi gonllo xhen kwinllo. ⁹Cha' bi da xhinnj llone be'nne lli'o, bi wnnabllo yeyakte da xhinnj ke'e. Cha' no be'nn llchache' kello, bibi yelli'llo ke'en, yezillre

nnabllo gak da wen ke ake', le ka'n ba bzoa Diosen' lli'o gonllo, nench gonnen latj sollo nbaraz. ¹⁰Ka'n gonllo, le nyojen nen:

Be'nn lle'ne so kweze nbaraz, llaya'l wsa'ke' yel nne, na' bill we'e di'll xhinnj, na' bill we'e di'll wenra'lle. 11 Llaya'l kwej yichje' da xhinnj ka', na' gone' da wen. Llaya'l kwe' yichje' gone' ga zerao sa'ke', nench sorén

be'nn lwellje' wen. ¹² Le Xanllo Diosen' zoe' llwie' be'nn llon da li,

na' llzenaye' kat llalwill ake' Le'e.

Zan be'nn wen da xhinnj ka', ba nwia Diosen' gone' da sa'kzi' ake'.

13 ¿Noxha gak wkwa'nntont re', cha' zotezre llonre da wen do vichi do ra'llre? 14 La'kze cha' bi da llsa'kzi' be'nne lli'o, dan' naollo da zej to li, nbaraz wzoa Diosen' lli'o. Na' bi llaya'l llebllo be'nn ka', na' bi gakgánello. ¹⁵Zan llaya'l wxenra'll-llo Criston' lo ra'llda'ollo, le nake' Xanllo. Na' batteze llaya'l sollo kwexhllo nench yelli'llo xti'll be'nne cha' nnabre' lli'o, bixchen zollo rez yellinllo gan' llia Diosen' ke chnare. Na' llaya'l gap aklloe' bara'nne, we'rén aklloe' di'll cha'o. ¹⁶Na' llaya'l gonllo nench nnézello lo ra'llda'ollo bibi do'l kello de rao Dios, na'llen' kat bi da nne ake' kello dan' nxenra'll-llo Criston', na' nnez akre' llonllo wen, na' waye'e akre'. ¹⁷Wenre sa'kzi'llo ni ke dan' llonllo da wen na', cha' ka'n lle'ne Diosen' gak kello, kerke da sa'kzi'llo llonllo da xhinnj.

1 Pedro 3, 4 424

¹⁸Le Criston' lekze bxha'kzie'. La'kze bnawe' da zej da li rao Dios, be'e latj gote' ni ke xto'l be'nnach chniaze, na' dan' bene' ka' za'ken ke chnare. Gote' nench bzoe' lli'o nbaraz rao Dios. Na' la'kze bet ake' Le'e, babankze' radj be'nn wat ka' rao Spíritu. 19 Rao Spíritu ke'e na', byeje' jatixjwe're' xti'll Diosen' rao be'nn ka' zjalla'a ba neyj ake' gan' sa'kzi' ake' ke chnare. ²⁰Leake'n bi bzenay ake' ke Diosen' kana', la'kze bdape' yel llxhenra'lle ke leake', breze' wzenay ake' kan' ben Noén' to barco xhen na'. Na' to chopgue' byo' loen', na' bi blleyi' ake', xo'n akze' byo' lo barcon' bará ake' lo nisen'. ²¹Na' dan' gok ka' llonen ka ke lli'o ll-lloa nis nna', le ba barallo rao da xhinnjen'. Na' kere blloallo nisen' nench bayakte kwerp kellon' yalle, zan bnnabllo bayone' yichjra'llda'ollon' yalle, nench nnézello bibi do'l kello de. Na' ba nak ra'llda'ollon' yalle nna', dan' babán Jesucriston' radj be'nn wat ka'. 22 Na' nna' ba bayep Jesucriston' yebá gan' jallie' cha'we gan' llia Diosen', na' llxhexi yichi yeololte angl, na' yeololte no nap yel llnebia' llzenay ake' ke'e.

Gonrenllo llin kon ka nak da benn Diosen' lli'o

Criston' goke' be'nn de be'r llen, na' bxha'kzie' yellrio ni, len na' llaya'l gonllo kan' bene', na' gonllo war kat sa'kzi'llo. Le cha' ba bxha'kzi'llo, llakrenen bill llzenayllo ke da xhinnjen'. ²Na' bill sollo gonllo da xhinnjen' chak nna nbanllo, bill gonllo kon da nen ke lli'o be'nnach, zan sollo gonllo

da llazra'll Dios na'. ³Kana' benre ka llon be'nn ka' bi nxenra'll Dios. Benre da nak zdo', benre kon da bzera'll ra'llda'ore, bzóllere, benre llakia ga llonre no lnni, na' we'jre, na' benlira'llre no lwa'a keré, no vej wzan da ka' bne Diosen' bi llaya'l wxenra'll-llo. ⁴Na' ke len na', be'nn ka' nna nao llon da xhinnj ka', llabán akre' bill llonrén akre' txhen, na' nnechach ake' ke re'. ⁵Zan wllin lla kat nnabyolle Diosen' leake' yeolol da ka' ben ake', Le'en beze wchoybie' akre gak ke be'nn nna nban, ren be'nn ba wasa'te. ⁶Le ke len na' bse'le' be'nn bdixjwe' Di'll Wen ke'en rao be'nn ba wasa't. Diosen' gokra'lle nni't be'nne nbaraz ke chnare kan' zo Le'e, la'kze nchoye' de yel got ke yeolol be'nnach yellrio ni.

⁷Ba zo rez yeyoll yellrion'. Len na' llaya'l sollo gonllo da wen, na' gonllo ka be'nn llnna' yere, na' sotezllo yelwill-llo Dios. ⁸Na' da nakll lliarao, llie' lwellillo do yichi do ra'll-llo, le kat nllie' lwellillo, llazi'xhenllo ke be'nn kat biteze da llon akre' lli'o. ⁹Na' llaya'l wrebllo no be'nn lwellillo kate yed ake' gan' zollon', na' bi yelli'lloe'. ¹⁰Kon kan' ba gokrén Diosen' totollo, na' llonne' lli'o bi da llak llonllo, na' llaya'l gonrenllon llin gakrén lwellillo, le nlla'a nlla'a de da nonne' ke totollo llonllo. 11 Cha' Diosen' nonne' kello chixjwe'llo xti'lle'n, na' llaya'l chixjwe'llon. Na' cha' nonne' kello gakrenllo be'nne, llaya'l gakrén aklloe' do yichi do ra'll-llo, le kone Dios na'kzen' llak llakrén aklloe'. Kate bi da gonllo, gonllon ka gak Diosen' xhen dan'

425 1 Pedro 4, 5

bse'le' Jesucriston' kello. Za'ken gonlloe' xhen zejlikane, na' za'ken nnebie' zejlikane. Ka'n gakchga.

Wa't da sa'kzi' lli'o llonlira'll Criston'

¹²Nllie'ra' re' be'nn bi'che, na' lle'nra' bi gakgánere kan' llak kerén' llsa'kzi' be'nne re' kwis. Bi naken da yebánere, da llaya'lkze gaken. ¹³Ke len na' llaya'l yewere katen' llza'kzi're dan' nxenra'llre Criston', le llak keré kan' gok ke Criston' kan' bxha'kzie'. Leska' yewere sore nbaraz kate llin lla yed Cristo be'nnen' za'k kwis. ¹⁴Nbarazen' llak keré katen' zi'chi'll be'nne re', dan' llonlira'llre Criston', le Spíritu ke Diosen' dan' za'ken llakrenen re'. Be'nn ka' llsa'kzi' re'n, ll-lliavi'll ake' Criston', zan re' llonre' xhen. ¹⁵Na' cha' sa'kzi're, wenre gaken ni ke dan' llonre da wen na', kere ni ke dan' nakre be'nn wen xhia. be'nn wan, be'nn wen billre da xhinni o cha' llchix xhbab keré radi bi da llak ke be'nn yobre. 16 Le cha' sa'kzi're ni ke Cristo na', bi waye're kan' llak kerén', zan lewe'rao Diosen' da ba llonlira'llre'n.

17 Ba bllin lla sorao gak yel koxchis ke Xanllo Diosen' lo yo' rille', gan' lldop ll-llay be'nn ka' llonlira'll Le'e. Na' cha' ba bzorao yel koxchis ke'en ren lli'o, ¿akre' gak ke be'nn ka' bi llzenay lloa' xti'll Diosen'? 18 Na' ka nak be'nn wen ka' zjak lixhej ganne yerá ake', na'll be'nn ka' bi nxenra'll Diosen', na' nao akse' llon ake' da xhinnj, ¿akre wayollrén be'nn ka' da xhinnj ke ake' ka' lla? 19 Ke len na' kate sa'kzi'llo dan' llonllo kan' lle'ne Diosen', llaya'l sokzllo gonllo da

wen, na' gon kwinllo rao na'a Dios, le Le'en bene' lli'o be'nnach, na' zokze' llakrene' lli'o.

Lewiá be'nn ka' ba llonlira'll Criston'

Lla'tyoera' re' be'nn gor ake, nllojre nench llyi llwia lwelljre llonlira'llre Criston'. Nada' leska' nlloja' llwia llyia' be'nn ka' ba nxenra'll Xanllon', na' bre'ra' bxha'kzi' Criston', na' lloe'rena' be'nne di'll kan' goken, na' lekze nnezra' wllin lla yellina' gan' llie', gan' yo' beni' xhen ke'e na'. ²Legap lewiá be'nn ka' ben Diosen' rao na're, ka llon to be'nn lla'a xhi'r da'o ke'e na' llapeba'. Legonen do yich do ra'llre kan' lle'ne Dios na', na' bi gonre gákere no llchie' re' gonren na', na' bi gonren nench gonre gan mell, leyewé legonen do yichi do ra'llre. ³Na' ka nak be'nn ka' wiare na', bi gon akere' zi'd znia nench wzenay ake' keré, legonteze kan' lle'ne Dios na', nench re'e akre' kan' llonre na', na' wia ake' lekze ka'n llaya'l gon leake'. 4Xanllo Jesucriston' nake' ka xan yeololte gop xhi're. Na' kate yede' da yobre, kana' wzoe' re' nbaraz kwis cha' benre xchin Diosen' do ra'llre, na' kere da yeyoll yedó ka dan' gonne' re'n.

⁵Na'll leska' re' bi llaban ak, lewxhexj yichjre rao be'nn ka' nbeje llwia re'. Na' yeololre lewxhexj yichjre wzenay ke lwelljre, le:

Diosen' bi llazra'lle' be'nn ya'ra'll ka', zan llakrene' be'nn nak be'nn

nexjra'lle.

⁶Llaya'l gakllo be'nn nexjra'lle rao Dios be'nn yel wak xhen na', 1 Pedro 5 426

nench llin lla gone' gakllo xhen.

⁷Na' yeolol bi da zed kello, llaya'l
wkwa'nnllon rao na'a Diosen', le
Le'en llape' lli'o.

⁸Llaya'l gonllo bien gonllo da za'ke, na' sollo bi gatra'll-llo, le dateze daxi'on lli'naon, lle'nen ko'n lli'o nez xhinnjen', le llawén wlleyi'n lli'on, na' llayirjla'llen akre gonen, llonen ka llon to bell yi'x znia, llosia'ba' yirjba' ba gaoba'. ⁹Llaya'l sello war, bi wzenayllo ke daxi'on, na' sello war wxenra'llllo Jesucriston', le nnézello be'nn bi'chllo ka' nxenra'll ake' Le'e doxhen yellrio, lekze ka'n za'kzi' ake' doxhenkze kan' llak kello ni. ¹⁰Zan kate ba bde dan' za'kzi'llo choll yellrio ni, Dios na'kze gone' gak yichjra'llda'ollon' kan' lle'nre' na', nench soello gonlira'll-lloe', na' sello war. Le nllie' Diosen' lli'o, na' llakrene' lli'o biteze da llak kello, na' ba breje' lli'o llonlira'llllo Criston', nench yellinllo gan' llie' na', gan' yo' beni' xhen ke'e

na'. ¹¹Llaya'l sollo gonlloe' xhen ke chnare, le ya'nnen' za'ke, na' llnebia'lle' ka nollre. Ka'n gakchga.

Pedron' llwape lliox be'nnen' llwia llol yichen'

12 Be'nn bi'chllo Silvano na', le'en nllie'ra' kwis, zeteze ze'e llone' kan' llaya'l gone' na', ba bzoje' xti'lla'n le' yich ni. Na' le' yich ni lla'tyoera' re' sokzre gonre wen, na' llzejnie'ra' re' kan' ba gokrén Diosen' re', nench nnézere nllie'kzere' re'. Ke len na' wxenra'llkzre'.

13 Be'nn ka' ba brej Diosen' lldop ll-llay llonlira'll ake' Xanllo Jesucriston' gan' nzi'i Babilonia, llwap ake' re' lliox. Na' leska' Marcos be'nnen' nona' ka xhi'nna', llwape' re' lliox. 14 Na' katen' lladop llallayre, lewno'p na'a lwelljre katen' wap lliox lwelljren', nench wroe'n nllie' lwelljre.

Na' llnnaba' so kwezchgare nbaraz, re' nxenra'll Criston'. Ka'n gakchga.

YICH WLLOPE DAN' BZOJ POSTL SAN PEDRO

Pedron' bzoje' yich ni ke be'nn ka' nxenra'll Jesucriston'

Nada' Simón Pedro Ilona' xchin Jesucriston', bse'le' nada' naka' postl ke'e. Llzoja' re' ba llonlira'llre Jesucriston'. Le'e bene' nench nxenra'llre' kan' llon neto', le zeje' lixheje nake' Xanllo Dios be'nn wasrá kello. ²Llnnaba' gakrenchga Diosen' re', na' wzoe' yichjra'llda'oren' so kwezre nbaraz dan' nombia're Jesús be'nnen' nak Xanllon'.

Dan' llaya'l gon lli'o nxenra'll-llo Criston'

³Dan' nap Diosen' yel wak xhen na', ba llonne' lli'o yeolol da yálljello, nench na' de yel nban kello, na' gonllo kan' lle'nre' na'. Llonne' da ka' le ba nombia'llo Criston', na' Cristo be'nnen' brej lli'o, nake' be'nn za'k be'nn cha'o. ⁴Na' dan' nake' be'nn za'k na', na'llen' ba bne'e gakrene' lli'o, na' gone' da wen kello. Za'k dan' bne'e ka', le kan' bne'e na' llakrenen lli'o, nench yeyak yichjra'llda'ollon' wen kan' nak ke Le'e, na' gak kwej yichjllo da xhinnj dan' ll-

lleyi' be'nn bi nxenra'll Dios, llon ake' kon ka nen ke xpe'r ake'. ⁵Ke len na' lli'o nxenra'll-llo Jesucriston', llaya'l gonllo ga zerao sa'kello nench gonll-llo wen ye ra'te, na' nench chejnie'llello. ⁶Na' gonllo ga zerao sa'kello nench bi nnebia' da xhinnien' lli'o. Llava'l setezllo wxenra'll-llo Dios kat bi da za'kzi'llo, na' llaya'l sokzllo gonlloe' xhen. ⁷Na' llaya'l llie'llo be'nn lwelljllo be'nnen' llonlira'll Jesucristo na', na' lekze llie'llo yeololte be'nne. ⁸Le cha' naollo llonllo yeolol da ki, na'llen' gakllo kan' llaya'l gak lli'o nombia'llo Xanllo Jesucriston', na' bi nnitrao dan' ba nxenra'll-lloe'n, 9Na' no be'nne bi llon da ki ba bnia' gonllo na', nchol yichjra'llda'we'n, na' bi nna chejnie're' kan' llaya'l gone' na'. Nakbie' ba gonra'lle' ba bayib Diosen' ra'llda'we'n bi da xhinni ka' bene' do kana'. 10 Be'nn bi'che, len na' gonllo ga zerao sa'kello, nench na' chejle'llo da li ba brej Diosen' lli'o llonlira'll-lloe'. Na' cha' gonllo ka', kbat kweyi'llo. ¹¹Na' nbaraz wareb Diosen' lli'o kate yellinllo gan' llia Xanllo Jesucriston' llnebie' ke chnare, be'nnen' nak wasrá kello. 2 Pedro 1, 2 428

12 Ke len na' bi gatra'lla' yo'y ras we'rena' re' di'lle ke da ka' ba bnekza' re', nench lljadinra'llre, la'kze ba nnézere kan' bnia' na', llgoa' ltip re' wxenra'llre di'll li ke Diosen' dan' ba nnézkzere.

13 Na'llen' llakra' chak nna nbana', yepa' re' da ki nench lljadinra'llre.

14 Nnezra' wyobjelle gata' nada', le ka'n ba bzejnie' Xanllo Jesucriston' nada'.

15 Ke len na' gona' kon ga zerao sa'kra' nench lljadinra'llre kan' bnia' da ki kat ba gota'.

Postl ka' bre'e akre' kan' ben Diosen' broe're' yel za'k ke Criston'

16Ka nak dan' bzejnie'to' re' ke yel wak ke Xanllo Jesucriston', na' ke dan' yede' da yobre na', kere di'll da bdirjla'll neto' postlen', le bre'kze yejraoto' kan' broe' Diosen' yel za'k ke Jesucriston'. 17Bre'toe' kan' be'e Xallo Diosen' Le'e yel bara'nn xhen na', na' kan' bzechj Dios be'nnen' za'k xen na' Le'e to beni' xhen, na' bne'e: "Be'nn nin' xhi'nna' nllie'ra' llawere', na' llaza'kra'lla' kan' nake'n." 18Neto' béneto' kan' bne Dios be'nnen' zo yebán', kan' zerento' Xanto'n rao ya' gan' gok ka'.

19 Napkzllo xti'll Diosen' dan' bzoj be'nn ka' be'e xti'll Diosen' kana', na' nnézello naken da li. Na' gonkzre wen cha' chejle're da ka' bzoj ake'n, na' wseni'n lo yichjra'llda'ore ka llon to yi', llseni'n ga nak xchole. Bi llaya'l lljachie'llo, wzenayllo yeo lla chak llin lla yed Criston' da yobre, na' ko'lle' beni' ke'en lo yichjra'llda'ollon'. Na' katen' yede' na', gonen ka llak kat llra' berj

xsiren' kat ba lleni'. ²⁰Na' da ni naken da lliarao xhen chejnie'llo: di'll dan' bzoj be'nn ka' be'e xti'll Diosen' kana', ni ton bi chejnie'llon to wrazllo. ²¹Le ni to da ka' bzoj ake'n, bi naken xhbab ke leakze'. Zan nak ake' be'nn gok rao na'a Dios, na' bne ake' dan' goll Spíritu ke Diosen' leake', na' bzoj akte'n.

Be'nn ka' llzejnie' xti'll Diosen' krere (Judas 4-13)

Kana' Diloj var pe in ____ bxhiye'e ake', basné ake' lloe' Kana' blloj bal be'nn Israelen' ake' xti'll Dios, na' ka'n gonkze no be'nn ak wzejnie' akre' re' di'll wenra'llen' wxe willje. Yeyirjla'll ake' ka gon ake' wzejnie' akre' re' di'll dan' wlleyi' re', ni ke gakbe'zere. Wkwas ake' ke Xanllo Jesucriston' ka'le, be'nnen' basrá lli'o, zan wllin lla kweyi' ake'. ²Be'nn zan nnao leake', gon ake' ka nen ke ake' no da xhinni. Na' ni ke leake' lloj be'nne ne ake' bibi za'k Di'll Wen ke Diosen' dan' llroe' dogari nez wen na'. ³Na' be'nn wenra'll ka' sera'll ake' wka'a ake' xhmellre. Len na' wzejnie' akre' re' da garjla'll leakze', nench we'e akre' mell. Bixha kana'te nchoybia' Diosen' ke ake' kweyi' ake'.

⁴Bi bazi'xhen Diosen' ke angl ka', kan' ben ake' da xhinnjen', lo yi' gabil bse'le' leake' gan' nak xchole, na' zjalla'a ake' nllej ake' gden chak llin lla we'e leake' yel llza'kzi' ke chnare. ⁵Leska' bi bazi'xhene' ke be'nn ka' blla'a yellrio ni kana', kan' bzo da Noé. Ben Diosen' to yejsi'o xhen da blleyi' leake'. Bdixjwe' da Noén' leake' kan' llaya'l gon ake' da zej lixhej. Na'llen' basrá Diosen'

429 2 Pedro 2

le'e ren ye gall be'nn lwellje'. ⁶Na' bachoyra'll Diosen', lekze blliayie' yell gan' bsi'i ake' Sodoma, na' ren yell gan' bsi'i ake' Gomorra kana', yel wen da xhinni ke be'nn ka' blla'a yellen'. Bzeye'n bayakten de. Na' bene' ka' nench llasnisre' be'nn ka' za za'k, we'e yel llza'kzi' ke ake' cha' bi wzoa ake' xti'lle'n. ⁷Na' ka blliayie' yell ka', na' basre'e be'nnen' golle Lot be'nnen' gok be'nn wen rawe' na', le Lot na'n goke lo ra'llda'we' ka da xhinni ka' ben be'nn ka blla'a yell ka'. ⁸Loten' goke' to be'nn wen, na' bllayrawe' lo ra'llda'we' ka nak bre're', na' benre' yeo lla ka dan' ben be'nn ka' da bi llaya'l gon ake'. ⁹Xanllo Dios na' nnezre' akre gone' yesre'e lli'o nxenra'll-lloe', ka nak da ka' za'k, lle'nen kwej yichilloe', na' nnezre' akre gone' nench be'nn ka' bi nak be'nn wen rawe' na', so ake' sa'kzi' ake' kat llin lla wchoye' ke ake' ke chnare.

10 Dios na' we'e da sa'kzi' be'nn ka' llon akteze' kon da nen ke xpe'r ake'. Leake'n bibi bara'nn llap ake' Xanllo Dios. Ni ke lleb akze' llon ake' kon da nen ke ake', nnechach ake' ke yeololte wnebia' ake. 11 Na' ka nak angl ke Diosen', la'kze nak aklle' be'nn warll ka lli'o be'nnach, na' nap ake' yel llnebia' xhenll ka lli'o, na' leake'n bi llayaxhj akre' bi da nne ake' ke no be'nn za'k rao Dios.

¹²Na' ka nake be'nn ki llzejnie' akre' di'll wenra'llen', nnechach ake' ke da ka' bi llejnie' akre'n. Nak ake' ka bayi'xe, le bayi'xen' kon llon Diosen' llarj akba', na' lljaxen be'nnach leakba' llaso'teba'.

Ka'kzen' kweyi' be'nn ka' llzejnie' di'll wenra'llen'. ¹³Ba llayrao ake' kan' bsa'kzi' ake' be'nn yobre. Na' llase'j llasaoxen ake' yeo lla. Na' kat lladopren' llzore lnni, leake'n za'k ake' gan' lla'ren', bill lliye'e akzre' cha' bi llon bi ne ake', le ka'n ziye'e da xhinnjen' leake'. Llak akre' zo ake' nbaraz, llon ake' kon da nen ke ake'.

¹⁴Kate llre'e akre' no're, zera'll ake' gonrén ake' leake' da xhinnj, bi lljachie' akre' llon ake' da xhinnj. Na' llko'yel akre' be'nne bi nna gombia' Jesucristo, nench gonrén ake' da xhinnjen'. Be'nn ka' llzejnie' di'll wenra'llen', bayo'rao ake' zera'll ake' bi de ke be'nne. Len na' llwie Dios kan' llon ake'n. 15 Le ba bsanra'll ake' nez li ke Diosen'. Ba bka'a ake' nez xhinnj na'le, kan' ben da Balaam be'nnen' be'e xti'll Diosen' kana', be'nnen' gok xhi'nn da Beor. Balaam na' gokra'lle' chixhi ake' le'e, nench nnabe' sa'kzi' be'nn ak. ¹⁶Na' to burr ba bi llak nne, ben Diosen' bnneba' ka to be'nnach, na' bdilba' le'e ke yel ke llejnie' ke'en, nench na' bill gone' da xhinni ke'en.

17 Be'nn ki nak ake' ka to bej yeche ga bibi nis llia, na' nak ake' ka to bej ze yebá da ll-lli'y to be' xhen. Na' nlloyen ke ake' sa'kzi' ake' lo gabilen' ke chnare ga nak xchol kwis. 18 Le lloe' ake' di'll wallojllo kwis llayoe'rao kwin ake', na' llko'yel akre' be'nn za ballach lo da xhinnjen', nench gon ake' da xhinnj yobre da nakll zdo', da lle'n akre' gonrén xpe'r ake'n, ka da llonkze no be'nne bi nombia' Dios. 19 Be'nn ka' llzejnie' di'll wenra'llen' lle

2 Pedro 2, 3 430

ake' leake', wzo aklle' nbaraz gon ake' biteze da nen ke ake', la'kze nak ake' ka to be'nn wen llin ke no da nak yel zdo'. Le yeololkzllo nakllo ka to be'nn wen llin ke da xhinnjen' kat llonllo kon da nen kello. ²⁰Na' be'nn ka' ba nombia' Xanllo Jesucristo be'nnen' basrá lli'o, ba balloj ake' rao da xhinnj ka' nak zdo' rao yellrio ni, na' cha' da xhinnjen' gonen leake' gan da yobre, we'e ake' latj gon ake' da xhinnille, ka'kze yellayrao aklle' kerke kan' gok rao dan' balloj ake' da nell na'. ²¹Wenre chenak bi bembia' akse' xhnnez Diosen' dan' zej lixhej na', kerke da brej yichj ake' nez wen na', dan' bllia Diosen' bia'a gonllo. ²²Ba benen ke ake' ka ke to di'll dan' ne: "Be'kwn' bayaoba' da bayebba', na' kuchen' ba bwazje'n, ba jallo'ba' lo bennj da yobre."

Jesucriston' yede' da yobre

Be'nn bi'che, nllie'ra' re', yich wllopen' dan' llzoja' re' ni.
Na' llopten' ba bzoja' dan' lle'nra' gonre xhbab lixheje. ²Lelljasa'ra'll di'll dan' bzoj be'nn ka' gok rallna'a Dios be'e ake' xti'lle'n kana'. Leska' lelljasa'ra'll dan' nllia Xanllo bia'a gonllo, be'nnen' nak wasrá kello, di'll dan' ba bzejnie' postl ka' re'.

³Da ni naken to da lliarao chejnie'ren'. Ka naken ba zo rez yeyoll yellrio ni, lloj be'nn wtitj akre' xti'll Diosen', gon ake' kon kan' nen ke ake'. ⁴Na' wtitj akre' da nak ke Diosen' nne ake': "¿Batxhan' gak kan' bne Diosen' dan' yed Criston' da yobre? Ba got xozxta'ollo ka', na' toz ka nna llakse kan' bxhe yellriote." ⁵Be'nn

ka' llasné ka', bi lle'n akre' gon ake' xhbab kan' ba ben Diosen'.
Kan' bxhe yebá ren yellrio, to bneze' gaken, na' le gokten kan' bne'en. Bxhe yellrion' radj nisda'on, na' nechjen doxhenen. ⁶Na' da ka' bene'n, bllin lla ka blliayie'n kone yejsi'on gok kan' babia nisen' doxhen yellrio. ⁷Na' yebán' ren yellrion', nllia Diosen' bia'a nak aksen kan' naken kana', na' kat llin lla gak yel koxchisen', kana' wzeye'n katen' gone' da sa'kzi' be'nn wen da xhinnj ka' ke chnare.

⁸Na' re' be'nn bi'che, nllie'ra' re', na' lle'nra' bi ganra'llre da ka' nia'n, le Xanllo Diosen' toz ka llakre' tlla, ka to mir iz, na' to mir izen' llakre'n ka tlla. ⁹Bal be'nne llak akre' ba blle Xanllo Jesucriston', bi nna yede' da yobre kan' bne'e kana'. Kere nello ll-llere'n, nna llape' yel llxhenra'll ke lli'o be'nnachen', na' lle'nre' ni tollo bi kweyi'llo. Lle'nre' yeolol-llo yeyátello da xhinnj kellon'.

¹⁰Na' Xanllo Jesucriston' yede' da yobre ka bi gakbe'e be'nne, ka llon to be'nn wan kat lloe' lo yo' ga lljalane', na' bi llakbe'e akre'. Kana' gak to llakia llebraz, na' kweyi' yeolol da ka' llre'llo le' yebán', kweyi' aken lo yi' xhen na', leska' yellrion', na' da zjadé rawe na', chey aken.

¹¹Na' kan' llwiallo te ke yeolol bi da de, llaya'l wiallo ka da ka' llonllo, na' sollo gonllo da wen, na' wxenra'll-llo kwis Xanllon'. ¹²Na' llaya'l so kwezllo batxhan' llin lla gon Diosen' gak yel llza'kzi', na' gonllo ka yob gaken. Ka lla na' ga'lnninn le' yebán', na' dan' llre'llo 431 2 Pedro 3

le' yebá na', ga'lnninn aken, na'll yerán aken. ¹³Zan lli'o zollo rez yekobe' le' yebán' ren yellrio na', kan' ba bne Dios na', ga ga't da zej lixheje.

¹⁴Ke len na' be'nn bi'cha' nllie'ra', chak bezllo da ki gak na', llaya'l gonllo ga zerao sa'kello nench na' sollo nbaraz rao Dios, nench bibi do'l ga't kello da gon lli'o be'nn wen da xhinnj. ¹⁵Na' llaya'l gakbe'llo Xanllo Diosen' nape' yel llxhenra'll ke lli'o be'nnach nench yesre'e lli'o. Leska'n ba bzoj be'nn bi'chllo Pablo be'nnen' nllie'llon', lloe' di'll ke yel si'n na', ba be'e Diosen' le'e. ¹⁶Na' yeolol yich ke'e ka', lloe'n di'll ke da ka' ba bzoja' na', la'kze bzoje' bal

da nak bni' chejnie'llo. Na' be'nn bi nna chejnie're' xti'll Diosen' kwasro, na' bi nna wxenra'llya'nne' Le'e, llejnie' akre' da ka' nlla're, ka'n llon ake' llchok ake' xti'll Diosen', na' billre da ka' nyoj na', na' len na' ngo'n leake' nez da wlleyi' leake'.

17 Ke len na' be'nn bi'che, nllie'ra' re', ba nnézere da ka' bzoja' re'. Na' lewiá bi chejle're xti'll be'nn ka' bi llzoa xti'll Diosen', be'nn llon da zej krere, nench ke bixre bill gonre kan' lle'ne Dios na'. ¹⁸ Na' legakbe'lle kan' llakrén Xanllo Jesucriston' re' na' gombia'llre', Jesucristo be'nnen' basrá lli'o ke chnare. Llaya'l gonlira'll-lloe' nna', na' ke chnare. Ka'n gakchga.

YICH NELL DAN' BZOJ POSTL SAN JUAN

Di'll dan' nsa'a yel nban zejlikane

Llyixjwe'to' re' ke be'nnen' nzi'i xti'll Dios, be'nnen' lloe' yel nban zejlikane ke be'nn llonlira'll Le'e. Ba zokze' kan' bxhe vellriote. Na' neto' Postl bzenayto' xti'lle'n, bre'toe' na' bdantoe'. ²Le'en gorje' radj be'nnach na' bre'toe', na'llen' lloe'to' xti'lle'n. Llyixjwe'to' re', Le'en be'nnen' nsa'a yel nban zejlikane, zorenkze' Xallo Diosen', na' ba broe'rawe' neto'. ³Llyixjwe'to' re' ke be'nnen' bre'to'n, na' be'nnen' bzenayto' ken', nench na' gonrenre neto' txhen. Le ka nak neto! ba nakto! toze ren Xallo Diosen', ren Xhi'nne' Jesucristo na'. ⁴Na'llen' llzojto' re' le' yich ni, nench na' sore yewere.

Diosen' nake' beni'

⁵Neto' bzenayto' ka be'e Xanllon' di'lle, na' llyixjwe'to' re', Diosen' nake' beni', na' bibi da xchol de rawe'. ⁶Na' cha' nnello llonllo txhen Diosen', na' llonkzllo da xhinnje, bi lloe'llo di'll li. Na' dan' llonllon' bi zejen to li. ⁷Ka nak Diosen' nake' ka beni', na' cha' lli'o dallo rao beni' ke'en, na'llen' nakllo toze,

na' yichjra'llda'ollon' yega'nnen yalle, le Xhi'nne' Jesucriston' brarj xchene'n nench na' bake'e yeolol da xhinnj benllo.

⁸Cha' nnello bitbi do'l kello de, ziye'e kwinllo, bi lloe'llo di'll li. ⁹Zan cha' lli'o wxoarapllo rao Diosen', Le'e nake' be'nn li, be'nn cha'o, na' wazi'xhenkze' yeolol dan' llonllon', wnitrawe' yeolol da xhinnj kellon'. ¹⁰Cha' nnello bitbi da xhinnj nonllo, llonllo Diosen' ka to be'nn wenra'lle, le bi llejle'llo di'll li ke'e na'.

Llnnab Criston' gakrén Diosen' lli'o

Re' nakre ka xhi'nna' da'o ak, llzoja' re' di'll ki nench na' bibi da xhinnj gonre. Na' cha' no gon da xhinnjen', zokze Jesucristo be'nnen' llon dan' zej lilla, na' llnnabe' yezi'xhen Xallo Diosen' kello. ²Jesucriston' brarj xchene'n ni ke lli'o llon da xhinnj nench bake'e xto'l-llon', na' ker ke balzllon' brarj xchene'n, ke yeololkze be'nn lla'a yellrion' brarje'n.

³Na' cha' llonllo kan' ne Dios na', na'llen' wak nnello ba nombia'lloe'. ⁴Na' cha' nello ba nombia'lloe', na' bi llonllo kan' ne'e na', ziye'zllon' 433 1 Juan 2

cha' ka', na' bi nna cho' di'll li ke'en lo yichjra'llda'ollo. ⁵Cha' llonllo kan' ne'e na', ba nllie'llo Diosen' kan' llaya'l llie'lloe'n. Na'llen' nnézello ba naklloe' txhen. ⁶Na' noteze lli'o cha' nello nakllo txhen Diosen', llaya'l sollo gonllo ka da wen na' ben Jesucristo na'.

Da koben' nllia Diosen' bia'a gonllo

⁷Re' be'nn nllie'ra', dan' llzoja' re' gonre ni, bi naken to da kobe. Naken to di'll da ba be'renkza' re' kan' bzoraore llonlira'llre Jesucristo na', le naken di'll dan' ba bénkzere. ⁸Zan dan' llepa' re' gonre na', naksen ka to da kobe, le ba broe' Criston' re' naken da za'ke, na' lekze re' llroe're naken da za'ke. Ba bzorao llde ke yeolol da ka' llwie Diosen'. Na' ba bzorao llre'llo da wen na' llon Diosen', naken ka to beni' da llseni'.

⁹Noteze la'kze cha' nnello dallo rao beni' ke Diosen', na' llwie lwelljllo, nna ncholkze lo yichjra'llda'ollon'. ¹⁰Noteze cha' nllie' lwelljllo, da li dallo rao beni' ke Diosen', billbi de da wlli'y lli'o rao da xhinnjen'. ¹¹Na' cha' llwie lwelljllo, nchole lo ra'llda'ollon', kon to zejllo ka ga zeje to be'nne lchol, be'nn bi llre'e garen' cheje', le da xhinnj na' ba ncholen lo yichjra'llda'ollon'.

¹²Ganni llzoja' re' nakre ka xhi'nna' da'o, ka nak Dios na', ba bazi'xhenkze' keré dan' llonlira'llre Jesucriston'. ¹³Ba bzoja' da ki ke re' be'nn gore, le ba nombia're Jesucriston' be'nnen' ba zokze kan' bxhe yellriote. Ba bzoja' da ki ke re' be'nn we'o llaban, le ba bzoere bi ben daxi'o re' gan. Da yobre nia' re', ba bzoja' da ki ke re', nakre ka xhi'nna' da'o, le ba nombia're Xallo Diosen'. ¹⁴Ba bzoja' da ki ke re' be'nn gore, le ba nombia're Jesucristo be'nnen' ba zokze ka bxhe yellriote. Leska' ba bzoja' da ki ke re' bi we'o llaban, le ngo' yichjre xti'll Diosen', na'llen' ba bzoere bi ben daxi'on re' gan.

15 Bi yewere da xhinnjen' de rao yellrion'. Cha' yewello da xhinnjen' de rao yellrion', zeje di'lle bi nllie'llo Xallo Diosen'. 16 Le yeolol da xhinnj da de rao yellrion', ka nak yel zera'll da xhinnjen' lle'ne xpe'rllon', na' da xhinnj ka' zera'll yejraollon', na' yel llaljen', ker ka da ka'n lle'ne Xallo Diosen' gonllo. Da kin' naksen da xhinnj da de rao yellrio ni. 17 Na' da te ke dan' de yellrio ni, na' dan' llzera'll be'nne bi llzenay ke Dios. Zan be'nnen' llon kon kan' ne Dios na', wbankze be'nnen' ke chnare.

Za za'a be'nn wlliayi'll Criston'

¹⁸Re' nakre ka xhi'nna' da'o ak, ba rez llin lla yeyoll yellrio ni. Neto' ba bzéneto' re', wllin lla yed be'nn wlliayi'll Criston', le nna', be'nn zan ba za'k ll-lliayi'll ake' Criston'. Ke len na' ba llroe'n ba zo rez llin lla yeyoll yellrio ni. ¹⁹Radjllo nizen' blloj be'nn ka' blliayi'll Criston'. Le kere do ra'll ake'n benrén ake' lli'o txhen llonlira'll-llo Criston'. Le chenak do ra'll ake' ben ake' txhen, nna zo aklle' llonrén ake' lli'o txhen chenake. Na' dan' ba balloj ake' na', nakbie'kze bi nak ake' be'nn llon lli'o txhen.

²⁰Zan ka nak re', Cristo na' ba benne' re' Spíritu ke Diosen', na'llen' 1 Juan 2, 3 434

yeolol-llo nnézello kan' ne di'll li ke Diosen'. ²¹Llzoja' re' da ni, le ba nombia're di'll li ke Diosen', kere nnello bi nna gombia'ren na', na' leska' nnézkzere ni to di'll wenra'll bi ren di'll li ke'en.

22¿Noxha be'nn nak be'nn wenra'lle? Be'nn wenra'llen' nak be'nnen' nne'e kere Diosen' bse'l Jesúsen', be'nnen' nak Cristo nench nnebie'. Be'nnen' ne ka' llwiere' Criston', na' llzoe' Xallo Diosen' chla're ren Xhi'nne' Cristo na'.

23 Na' no be'nne lloe' di'llen' nne'e notno Jesucristo bse'l Diosen', le'en bi zerén Xallo Diosen' le'e. Na' be'nnen' lloe' di'll nne'e Dios na' bse'le' Jesucriston', zorenkze Xallo Diosen' le'e.

²⁴Na' ka nak re', lesó lewzenay ka da ka' ba bzéneto' re', kan' bzoraore llonlira'llre Cristo na'te. Na' cha' wzoatezre di'll ke'en, na' ka' sorenkze Xallo Diosen' re' ren Xhi'nne' Cristo na'. ²⁵Na' Jesucriston', dan' ba bne'e gonne' na', gonne' yel nban zejlikane kello.

²⁶Ba bzoja' re' da ni, ba bia'a di'll ke be'nn ka' lle'ne siye'e re'.

²⁷Jesucriston' ba benne' Spíritu ke Diosen' cho'n lo ra'llda'oren', wzejnie're'n re' yeolol dan' llaya'l chejnie're na'. Na' ka nak Spíritu ke Diosen' lloe'n di'll li, bi ziye'n. Na' dan' zorenen re' llzejnie're'n re', na' bill yálljere no wzejnie' re' bi da ka' nak da li. Ke len na' lewzenay dan' bzejnie' Spíritun' re', na' lesorenteze Jesucriston'.

²⁸Na' nna' xhi'nna' da'o, llaya'l sotezllo wzoallo xti'll Criston' nench bi lleblloe' katen' yede' da yobre, na' bi si'llo zdo' katen' re'llo ba bre'en. ²⁹Na' ba nnézello Xanllo Diosen' zeje' llone' kan' llaya'l gone'n, leska' llaya'l nnézello cha' zejllo llonllo kan' llaya'l gonllo na', naksllo xhi'nn Dios.

Akren' gonllo cha' nakllo xhi'nn Dios

Legakbe'e kan' nllie' Xallo Diosen' lli'o dan' ne'e nakllo xhi'nne'. Na' ka nak be'nn ka' bi llonlira'lle Diosen', bi llayombia' akre' lli'o, le bi nombie' akre' Diosen'. ²Bi'cha' da'o ak nllie'ra'. ba nakllo xhi'nn Dios, na' bi nna wroe'n akren' gakllo. Zan nnézello katen' yed Jesucriston' da yobre, kana'n re'lloe' akren' nake' na', na' yeyak yichira'llda'ollon' kan' nak yichjra'llda'we' na'. ³Na' veololte be'nn ze bexhe' baten' yede' da yobren', llaralre' llayib lo yichjra'llda'we'n nench yeyaken yalle, kan' nak ra'llda'o Jesucriston' naken valle.

⁴Noteze be'nne zoe' llone' da xhinnie, bi llone' kan' ne Diosen' gonllo, le kat llonllo da xhinnjen', llyichillo dan' nllia Diosen' bia'a gonllo na'. ⁵Nnézkzello bed Jesucriston' yellrio ni nench yeke'e xto'l lli'o be'nnach, na' ka nak Le'e, bibi da xhinni none'. ⁶Na' cha' lli'o llzoatezllo xti'lle'n, bibi da xhinnj llonllo, zan cha' lli'o zokzllo llonllo da xhinnjen', bi llejle'llo ke'e, bi nna gombia'lloe'n cha' ka' llonllo. ⁷Xhi'nna' da'o, bi we're latje no siye'e re'. Cha' llonllo da wen kan' llaya'l gonllo na', zejkzllo lilla kan' zej Xanllo na'. 8Na' cha' zollo llonllo da xhinnje, naksllo xhi'nn daxi'o, le daxi'o na'n zokzen llonen da xhinni ka bxhe yellriote. Ke len

435 1 Juan 3, 4

na' bed Xhi'nn Diosen' yellrio ni nench wchochj wlane' dan' llon daxi'on.

⁹Cha' norllo ba non Diosen' lli'o ka xhi'nne', bill llaya'l gonllo da xhinnj, le ba bakobe' yichjra'llda'ollon', na' bill gonllo da xhinnjen', le ba nakllo xhi'nn Dios. ¹⁰Na' gannin' llroe'n noxhan' nake xhi'nn Diosen', na' noxhan' nake xhi'nn daxi'on: cha' noteze be'nne bi zoe' llone' da wen, na' bi nllie're' be'nn lwellje', bi nake' xhi'nn Dios chet ka'.

Llaya'l llie' lwelljllo

11 Ba bénkzello da ni kan' bzoraollo llonlira'll-llo Jesucristo na': llaya'l llie' lwelljllo. 12 Bi gakllo kan' gok da Caín, goke' txhen daxi'on bayot bi'che'n. ¿Nnézere bixchen bete' le'e? Yel be'nn wen da xhinnj ke'e na'n bene' ka', na' be'nn bi'che' na' bzoe' bene' da wen.

¹³Na' bi yebánere, be'nne bi'che, kate be'nn ka' bi llonlira'lle Diosen' wie akre! re!. 14 Nnézkzello bill llnebia' yel goten' lli'o, na' ba de yel nban zejlikane kello, le ni'tllo nllie' lwelljllo. Zan be'nnen' bi nllie' lwellje', ba llnebia' yel goten' le'e. ¹⁵Noteze be'nne cha' llwie lwellje', nakse! be!nn wen xhia rao Dios. Na' nnézkzello be'nn wen xhia ka', cha' bi wayat akre' ke da xhinni ke ake'n, bi de yel nban zejlikane ke ake'. 16 Jesucriston' bzanre' yel nban ke'en ni ke dan' nllie're' lli'on, ke len na' llaya'l nnézello kan' gon lli'o, zane yel nban kellon' ni ke be'nn lwellillo. ¹⁷Na' cha' bi da de kello, na' nnézello be'nn lwelljllon' yallire'n, cha' lli'o bi llaya'chra'lllloe', bi gak nnello: "Nllie'ra' Diosen'." ¹⁸Xhi'nna' da'o ak, bi llie' lwelljllo de di'llze. Llaya'l llie' lwelljllo do yichj do ra'll-llo, na' sollo wia lwelljllo.

19 Cha' llonllo kan' bnia' na', nnézello llonllo txhen Dios be'nnen' lloe' di'll li na', na' gakbe'llo lo yichjra'llda'ollo ni'tllo wen rao Dios. ²⁰Na' cha' llákello lo yichjra'llda'ollo nakllo be'nn wen da xhinni rao Diosen', Diosen' za'klle' kerke yichjra'llda'ollo, na' Le'en nnezre' yeololte. ²¹Kan' naken be'nn bi'cha' nllie'ra', cha' llakbe'e lo ra'llda'ollon' bibi do'l kello de, bi de llebllo Diosen'. ²²Na' Le'en gonne' biteze da nnábelloe'. le llzoallo di'll bia'a ke'en dan' ne'e gonllo na', na' llonllo kan' llazra'lle' na'. ²³Na' da ni nllia Diosen' bia'a gonllo, gonlira'll-llo Xhi'nne' Jesucriston' do vichi do ra'll-llo, na' llie' lwellillo, kon kan' nak di'll bia'a ke'e na'. ²⁴Na' cha' llonllo kan' nak di'll bia'a ke'e na', zerenkzllo Diosen', na' Dios na' zerenkze' lli'o. Na! kin! nnézello Diosen! zerene! lli'o: ka nak Spíritu ke'en ba benne'n yo'n lo ra'llda'ollo.

Spíritu ke Diosen' na' ren dan' llwie Criston'

Re' bi'cha' nllie'ra', bi chejle're cha' no be'nne nne ake' lloe' ake' di'll da goll Spíritu ke Dios leake'. Zga'tek lewiá cha' naken di'll da bzejnie' Dios o cha' bi naken ka'. Lewiá, le ba ll-llach be'nn zan be'nn ziye'e ne ake' lloe' ake' di'll da goll Diosen' leake'. ²Na' ki gak nnézello cha' da lin' bzejnie' Spíritu ke Diosen' leake' ka di'llen'

1 Juan 4 436

lloe' ake'n: yeolol be'nne we'e di'll ne ake' Jesucriston' nake' be'nn bse'l Dios, na' gorje' radj be'nnach, nnézello yo' Spíritu ke Diosen' lo yichjra'llda'we' na'. ³Na' be'nn ka' lloe' di'll ne ake' Jesucriston' bi nake' be'nn bse'l Diosen', bibi Spíritu ke Dios yo' yichjra'llda'o be'nn ka'. Be'nnen' ne ka' lloe' di'll da ll-lliayi'll Criston'. Ba bénere yed da wie Criston'. Na' nna' ba bra'n ba llwieren Le'e.

⁴Xhi'nna' da'o ak, ba nakre Diosen' txhen, ba benre gan rao be'nn wenra'll ka', le Diosen' zorén re', naklle' be'nn yel wak kerke dan' zo ren be'nn ka' lla'a yellrion'. ⁵Be'nn ka' bi llzoa xti'll Diosen' lloe'rén ake' be'nn ak di'll ke da llak yellrio, na' llawé be'nn ka' lla'a rao yellrio ni, llzenay ake' ke ake'. ⁶Ka nak lli'o, ba nakllo Diosen' txhen, na'llen' yezikre be'nn nombia' Diosen', llzenay ake' di'll ka' lloe'rén aklloe'n, na' be'nn ka' bi nak be'nn ke Dios, bi llzenav ake' di'll kellon'. Na'llen' nnézello non' yo' Spíritu ke Diosen' llzejnie'n le'e di'll li, na' non' yo' spíritu da lloe' di'll wenra'll.

Diosen' nllie're' be'nnach

⁷Re' nakre be'nn nllie'ra', llaya'l nni'tllo llie' lwelljllo, le Dios na'n zokze llone' nench nllie' lwelljllo. Na' be'nnen' nllie' lwellje' nakbie' nake' xhi'nn Dios, na' nombie're' Diosen'. ⁸Be'nnen' bi nllie' lwellje' bi nnezre' kan' nak Diosen', le ba nnézello Diosen' nake' be'nn nllie'. ⁹Ka'n ben Diosen' broe're' kan' nllie're' lli'o, bse'le' Xhi'nne'n yellrio ni nench banllo ke chnare,

cha' lli'o gonlira'll-lloe'. ¹⁰Ki nak yel nllie' dogarje: Bi nnello lli'on bllie'llo Diosen', Lere'n bllie're' lli'o, na'llen' bse'le' Xhi'nne' Jesucriston' nench brarje' xchene' ni ke lli'o llon da xhinni nench bake'e xto'l-llon'.

¹¹Re' be'nn nllie'ra', dan' nllie' Diosen' lli'o, leze ka'kzen' gon lli'o llie' lwelljllo. ¹²Ni to be'nne bi nna re're' Diosen'. Zan cha' lli'o nni'tllo llie' lwelljllo, nakbie' zorenkze Diosen' lli'o, na' nllie'lloe' kan' llaya'l llie'lloe' na'. ¹³Nnézello zerenllo Diosen', na' ka' zerén Le'en lli'o, dan' ba bse'le' Spíritu ke'en zon lo ra'llda'ollo na'. 14 Na' neto' ba bre'to', na'llen' lloe'to' di'll nnézeto' bse'l Xallo Diosen' Xhi'nne'n nench vesre'e be'nnach rao da xhinnien'. ¹⁵Na' cha' lli'o llejle'llo, na' lloe'llo di'll nello Jesucriston' nake' Xhi'nn Dios, Diosen' zerenkze' lli'o, leska' lli'o zerenllo Diosen'.

¹⁶Na' ka nak lli'o ba nnézello, na' llejle'llo nllie' Diosen' lli'o. Diosen' zokze' nllie're' be'nnach, le ka'n nak yichjra'llda'we'. Na' cha' zollo nllie' lwellillo, na'llen' zerenllo Diosen', na' Le'e zerene' lli'o, ¹⁷Dios na' zokze' llakrene' lli'o nench llie' lwellillo kan' llaya'l llie' lwelljllo na', ka'n llon Diosen' nench ke lleblloe' kate llin lla gone' yel koxchis ke yeolol be'nnach. Le lli'o lla'llo rao yellrio ni, nllie' lwelljllo kan' llon Jesucristo na'. ¹⁸Cha' nllie'llo Diosen' kan' llaya'le, bibi de llebllo. Yel nllie' dogarje llaka'n yel lleben' ka'le. Cha' llebllo, naksen da llsa'kzi' lli'o chet ka', na' cha' nna llebllo, llroe'n bi nna llie'llo Diosen' kan' llaya'l llie'lloe' na'.

¹⁹Lli'o nllie'llo Diosen', le zga'tek Le'en bllie're' lli'o. ²⁰Na' cha' norllo 437 1 Juan 4, 5

nello: "Nada' nllie'ra' Dios", na' llwie lwelljllo, da na'n naken da wenra'lle. ¿Akre gonllo llie'llo Diosen' be'nn bi llre'llo, cha' bi nllie' lwelljllo be'nn llre'tello? ²¹Na' ba bllie' bia'a kan' llaya'l gonllon': cha' nllie'llo Le'e, leska' llaya'l llie' lwelljllo.

Wkwasllo da xhinnjen' ka'le

Cha' lli'o llejle'llo Jesucriston' nake' be'nne bse'l Dios, naksllo xhi'nn Dios. Na' cha' nllie'llo Xallo Diosen', ka'kzen' llaya'l llie' lwellillo, le be'nn lwellillon' xhi'nn Dioskzen'. ²Kate zollo nllie'llo Diosen', na' llonllo kan' ne di'll bia'a ke'e na', na'llen' nnézello leska' nllie'llo yezikre be'nn ka' nak xhi'nn Dios. ³Cha' nllie'llo Diosen', llonllo kan' ne di'll bia'a ke'e na'. Na' di'll bia'a ke'e na', bi naken da bni' gonllon. ⁴Yeolol be'nn ba nak xhi'nn Diosen', zoe akre' llkwas ake' da xhinnjen' de yellrion' ka'le. Na' dan' nxenra'll-llo Jesucristo na'n, zoello llkwasllo da xhinnjen' ka'le, na' bill llonllon, ⁵Nollre no llzoe wkwase da xhinnjen' de vellrio ni ka'le, le zeraoze be'nnen' llejle' ke Jesús be'nnen' nake' dogarj Xhi'nn Dios, leake'n llzoe akre! llkwas ake! da xhinnjen' ka'le.

Diosen' lloe' di'll ke Jesucriston' nake' Xhi'nn Dios

⁶Kin' ben Jesucriston' chak bede' yellrio ni, blloe' nis na' brarj xchene'. Kere nello to nis na'zen' blloe', rente xchene' na'n brarjrene'. Ka'n ne Spíritu ke Diosen', le Spíritu na' lloe'n di'll li. ⁷Na' zjani't

chonn be'nne llgo' da li yebán', lloe' ake' di'll ke Jesucriston': Xallo Diosen', ren be'nnen' nzi'i Xti'll Dios, na' ren Spíritu ke Dios na'. Na' be'nn chonn ki, tozen' nak akse'. ⁸Leska' chonn da llgo' da li rao vellrio ni ke Jesucriston': Spíritu ke Dios na', na' dan' gok kan' blloe' nis, na' dan' gok kan' brarj xchene' na'. Na' yonnte da ki goken toz ka lloe' ake'n di'lle. ⁹Le chet ka' llejle'llo xti'll be'nnachen', za'ktelle xti'll Diosen' si'llon, le Diosen' ba be'e di'll ke Xhi'nne' Jesucriston'. ¹⁰Na' cha' llejle'llo nak Jesucriston' Xhi'nn Dios, zokze xti'll Xanllo Diosen' lo ra'llda'ollo. Na' cha' lli'o bi lleile'llo ke Diosen'. na' llonlloe' ka to be'nn wenra'lle dan' bi llejle'llo di'll dan' lloe' ke Xhi'nne' na'. ¹¹Xti'll Dios na'n llzejnie' lli'o wa't yel nban zejlikane ke be'nnachen' cha' gonlira'll ake' Xhi'nne' Jesucriston'. 12 Kin' naken cha' lli'o llonlira'll-llo Jesucriston', dekze yel nban zejlikane kello. Na' cha' bi llonlira'll-lloe', bibi yel nban zejlikane de kello.

Kan' bayoll bzoj postl San Juan be'nn ka'

¹³Llzoja' re' di'll ki, re' llejle're Jesucriston' nake' Xhi'nn Diosen', nench nnézere de yel nban zejlikane keré.

¹⁴Na' bi llebllo llalwill-llo Diosen', le nnézello zie' xti'll-llon' kate llnnabllo rawe'n da llazra'lle'. ¹⁵Na' kate nnézello zie' xti'll-llon' biteze da llnnábelloe', na' nnézello gonne' da ka' ba bnnabllo na'.

¹⁶Cha' llwiallo be'nn lwelljllo llone' da xhinnj da bi lljasán le'e 1 Juan 5 438

rao yel got ke chnare, llaya'le nnabllo rao Diosen' gakrene' le'e nench yezoe' wen rao Diosen' da yobre, kon cha' naken da xhinnj da bi lljasán le'e rao yel got ke chnare. Le de yel got ga kweyie' ke chnare. Len bi naken zi nnia' nnabre gakrén Diosen' leake'.

17 Cha' llonllo biteze da xhinnj napkzllo do'le, zan kere yeolol da xhinnjen' llonllo na'n wsa'n lli'o rao yel goten'.

¹⁸Nnézello cha' ba bacha'a Xallo Diosen' yichjra'llda'ollon', bill sollo gonllo da xhinnjen', le zo be'nnen' nake Xhi'nn Diosen', llkwase' lli'o rao daxi'on, ke len na' bi zoen wlleyi'n lli'on.

19 Nnézello zerén Dios lli'o, na' be'nn ka' bi llzoa xti'lle'n, daxi'on llnebia'kzen leake'. 20 Nnézello ba bed Xhi'nn Diosen', na' badzejnie're' lli'o nench bembia'llo Xe'en, be'nnen' nake dogarje Dios. Na' ni'tllo toze ren be'nnen' nake dogarje Dios, na' nakllo toze ren Xhi'nne' Jesucriston'. Le'en nake' dogarje Dios, na' llonne' yel nban zejlikane ke be'nne llonlira'll Le'e. 21 Xhi'nna' da'o ak, lewiá ke wxenra'llrizre lwa'a lsa'k ka'. Ka'n gakchga.

YICH WLLOPE DAN' BZOJ POSTL SAN JUAN

Juan na' llwape' lliox

¹Nada' naka' be'nn gore brao, na'llen' llzoja' rwe', no're. Rwe'n ba brej Diosen' llzenayo' xti'lle'n, na' ren xhi'nno' ka'. Da lin' nllie'ra' re', na' kere nadza', renkze yeolol be'nn nombia' ak di'll li ke Diosen', nllie' akre' re'. 2Nllie'to' re' dan' yo' di'll li ke Diosen' lo ra'llda'ollo, na' zon gakrenen lli'o ke chnare. ³Xallo Diosen', na' ren Xhi'nne' Xanllo Jesucriston', gakrén akchgue' re', yeya'chra'll ake' re', na' wzoa ake' yichjra'llda'oren' so kwezre nbaraz, le ba nombia're di'll li ke Diosen'. na' ba nllie' lwelljre. 4Le bawera' ka bnnezra' xhi'nno' ka', ba zjani't akbe' llaso'n akbe' kan' ne di'll li ke'en, da ka' ba bllia Xallo Diosen' bia'a gonllo. ⁵Na' nna' lla'tyoera' rwe' no're, kere llzoja' rwe' di'll bia'a koben', le da ba bénkzello kan' bzoraollo llonlira'll-llo Jesucriston' dan' ne: llaya'l llie' lwellillo. 6Cha' nllie'llo Diosen', na' gonllo kan' ne di'll bia'a ke'e na'. Na' ba nnézkzere kan' nllie' bia'a llie' lwellillo, le kan' bzoraore llonlira'llre Jesucristo na'te, bzejnie'to' re' llaya'l llie' lwellillo.

Wra' be'nn siye'e ak

⁷Be'nn zan ba bllach yellrio ni, llzejnie' akre' krere, le llroe' akre' ne ake', kere be'nn bse'l Dios Jesucriston' be'nnen' bed gorje radj be'nnachen'. Noteze be'nn ne ka', be'nn wxhiye'e aken', na' llwie akre' Cristo na'n. ⁸Lewiaya'nn nench na' si're dan' llaya'l si're, ke nak dan' ba benre na', le nxholl bi si're dan' ba llwia Diosen' gonne' re'.

⁹Cha' kon to lli'o llzoallo dan' broe' bsed Criston' ka'le, na' llzenayllo billre da llzejnie' be'nne, bill zerén Diosen' lli'o cha' ka' llonllo. Na' cha' zotezllo llzenayllo dan' bzejnie' Criston', Xallo Dios na' ren Xhi'nne' Cristo na', zorenkze' lli'o. ¹⁰Na' cha' no be'nn yede gan' zore, na' lle'nre' we'rene' re' da bi nake xti'll Cristo na', bi wrebre' rillren', ni lliox bi wapre. ¹¹Le cha' wrebre', na' nnello ba llonrenre' txhen llonre da xhinnjen' llone' na'.

Zera'lle' yedwie' leake'

¹²Nna dell da zan da nnia' re', na' bill lle'nra' wzoja'n le' yich ni. Le llbexha' yeda' gan' zore na', na' we'rena' re' di'll lloa' nench sollo nbaraz kwis. 2 Juan 440

¹³Xhi'nn be'nn biro'n, no'ren' be'nnen' brej Diosen' nench wzenaye' ke'e, llwap ake' re' lliox. Ka'n gakchga.

YICH WYONNE DAN' BZOJ POSTL SAN JUAN

Juan na' llwape' lliox be'nnen' nzi'i Gayo

¹Nada' naka' be'nn gore brao, na'llen' llzoja' di'll ki ko'o rwe' nllie'ra', Gayo. Do ra'lla' llakra' rwe'.

²Be'nn bi'che, llnnaba' rao Diosen' gak wen ko'o, na' so'o wen rao yel nban ko'o, kan' ba zorén yichjra'llda'o na'. ³Bawera' kwis ka bara' to chope be'nn lwelljllo ka', lloe' ake' di'll kan' llono', na' kan' zoteze zo'o llono' wen, dan' llzenayo' di'll li ke Diosen' do yichj do ra'llo'. ⁴Na' billre bi de da llawellra' llnnezra' llzenay be'nn ka' di'll li ke Diosen' do yichj do ra'll ake', be'nn ka' nak ka xhi'nna'.

⁵Bi'cha' nllie'ra', llono' wen llakreno' be'nn lwelljllo ka', na' katek wen na' llonro' be'nn zi'te ka'. ⁶Neto' lldop ll-llayto' ganni llonlira'llto' Jesucriston', leake' ba be'rén ake' neto' di'lle kan' bllie' akroe'n. Na' kat yed ake' da yobre gan' zo'o, gakrén akchgoe' nench yego' ake' nez da yobre, le leake'n llon ake' xchin Diosen'. ⁷Leake' ba bllach ake' lloe' ake' xti'll Criston', le ba nxenra'll ake' Le'e. Na' bi nna

wze ta'k ake', bi si'i ake' ke be'nn ka' bi llejle' ke Criston'. ⁸Ke len na' llaya'le wrebllo be'nn ka', kone ka' gakrén aklloe' gon aklle' nench gaslas xti'll Diosen'.

Be'nnen' nzi'i Diótrefes llone' da xhinni

⁹Ba bzoja' re' lldop ll-llayre llonlira'llre Jesucriston', zan ka nak Diótrefes na', lle'nre' gake' be'nn brao ga zeraoze, na' bi llzenaye' keto'. ¹⁰Ke len na' kate yeda' yedwia' re', na' tile', le de'e ll-lliayi'lle' neto', na' lloe' di'll wenra'lle keto'. Na' kere da na'zen' dan' llone'n, na' lekze ka' bi llrebe' be'nn lwelljllo ka' za'k zi'te rille'n, na' kate no be'nn lwelljllo ka', lle'n akre' wreb ake' leake', na' llabejte' leake' ka'le radj be'nn ka' lldop ll-llay llonlira'll Jesucriston'.

Be'nnen' nzi'i Demetrion' llone' da wen

¹¹Bi'cha' nllie'ra', bi gono' txhen be'nn ka' llon da xhinnjen', zan benrén txhen be'nn ka' llon da wen na'. Be'nn ka' zoteze zoe' llone' da wen, leakse'n nombia' ake' Dios, na' be'nn ka' zoteze zoe' llone' zre da xhinnj, leake'n bi nombia' ake' Dios. 3 Juan 442

¹² Yeololze be'nn lloe' ake' di'll wen ke Demetrion', to nakbie' zeje zejrene' di'll li ke Diosen'. Lekze ka' neto' lloe'to' di'll llone' da wen, na' nnézere lloe'to' di'll li.

Kan' bayoll bzoje' yich ni ¹³Nna dell di'll zan we'rena' re', zan bill lle'nra' wzoja'n le' yich ni. ¹⁴Le llbexha' yellayllo, na' we'llo di'll kat ba zollo txhen. ¹⁵Sochga yichjra'llda'ore nbaraz. Be'nn ka' nllie' rwe'n zjani't ganni, llwap ake' rwe' lliox. Leska' llnnaba' lewap lliox twej twej, be'nn ka' nllie'llo gan' zo'o na'.

YICH DAN' BZOJ SAN JUDAS

Judasen' llwape' lliox

¹Nada' naka' be'nn wen llin ke Jesucristo, na' naka' be'nn bi'ch Jacobo. Llzoja' re' ba brej Xallo Diosen' nench nakre be'nn ke'e, re' nkwe'j Xanllo Jesucriston' rao da xhinnjen' dan' nakre' txhen na'. ²Llnnaba' rao Xallo Diosen' waya'chra'lle' re', na' wzoe' yichjra'llda'oren' so kwezre nbaraz, na' gakbe're nllie're' re'.

Be'nn ka' llroe' llsede di'll wenra'lle (2 Pedro 2:1-17)

³Be'nn bi'che nllie'ra', gokra'lla' kwis wzoja' re', na' wzejnie'ra' re' kan' ben Xanllo Jesucriston' nench basre'e lli'o. Ba benen bien llzoja'n, na'll llnneyoera' re' gondipra'llre, na' chejle're di'll li ke Diosen' da bzejnie're' lli'o to chi'ze, lli'o nakllo rallne'e. ⁴Ni't bal be'nne ziye'e ake' nench llåkere llon ake! re! txhen. Bi llzenay ake' ke Diosen', ne ake' nllie'kze Diosen' lli'o, na' wakse gonllo dan' nen kello, llazi'xhenkze' kello. Na' llkwas ake' ke Diosen' ka'le, be'nnen' llaya'l wzenay yeolol be'nnach ke'e, na' ren Xanllo Jesucriston'. Kana'te byoj xti'll Diosen' nen, be'nn ka' llon ka'

yellayrao ake' kwis, ni ke da xhinnj ke ake' ka'.

⁵La'kze ba bnnézere yeolol kan' goken, lle'nkzera' lljadinra'llre Xanllo Diosen' be'nnen' basrá da xozxta'o be'nn Israel ka' rao na'a be'nn Egipto ka', bde na' blleyie' yeolol be'nn bi byejle' ke'e. ⁶Na' zan angl ka' bi gokra'll ake' gon ake' dan' bllia Diosen' bia'a gon ake', na' gokra'll ake' gak ake' be'nn braoll. Na'll bllach ake' gan' bllia Diosen' bia'a so ake'n. Na'll bse'l Diosen' leake' gan' nak xchole, na' zjadé ake' nllej ake' gden ke chnare, nench sa'kzi' ake' kat llin lla wchoybia' Diosen' ke ake'. ⁷Ka nakse be'nn ka' blla'a yell gan' bxhi'i Sodoma ren yell gan' bxhi'i Gomorra, na' yezikre yell nechj to kwite, leake'n ben ake' kon da nen ke xpe'r ake'n, bzorén ake' be'nn bxhej, ben ake' leake' ka no xho'r ake'. Len na' nak da xhinni, na'llen' bse'l Diosen' yi' da jazey yell ka', na' blleyi' ake'n. Na' ka'n bene' na', llasnisre' lli'o be'nnach ga't yel llza'kzi' ke chnare lo yi' gabil ke be'nn ka' bi llzenay ke'en.

⁸Leska'kze be'nn ka' llroe' llsede re' di'll wenra'llen', llebia'kze zjani'te llon ake' da xhinnj ne ake' Judas 444

ba bre'da'o akre', na' ne ake' nakse wen dan' llon ake'n: llon ake' da nen ke xpe'r ake', bi lle'n akre' wzenay ake' ke Xanllo Diosen', na' llasnnechach ake' ke angl ka', be'nn ka' nak be'nn za'ke. ⁹Na' nlla're ben angl ke Diosen', le kana' gok chnia ka angl braon' re'e Miguel gokyollrene' daxi'on, le gokra'll daxi'on yeyoa'n da Moisésen' kan' gote'n. Na' la'kze Miguelen' nake' angl brao ke Diosen', bi bayaxhire' wchachrene' daxi'on, to gollze'n: "Xanto' Diosen' tilrene' rwe'." 10 Na' ka nak be'nn ki nnechach ake' ke biteze da bi llejnie' akre', na' nao akse' llon ake' kon da nen ke xpe'r ake'n, ka llon bayi'x ba bi llejnie', na' da ka' llon ake'n ll-lleyi'n leake'.

¹¹Nya'chraz gak ke ake' dan' zo ake' llwie lwelli ake' kan' ben da Caín, na' lloe'la'll ake' llon ake' da xhinni, nench gon ake' gan mell kan' ben da Balaam. Yichi ake' xti'll be'nn ka' brej Diosen' nnebie' leake', ka'kze bi bzenay be'nnen' golle da Coré kana'. Kan' blleyi' da Corén' yel bi bzenay ke'e, ka'kzen' kweyi' be'nn ki. ¹²Na' kate re' lle'j llaore txhen, nakbie'kze nllie' lwellire. leake' na' llaoxen ake' ka nen ke ake', lati gon ake' wen ke be'nn lwellj ake'. Bibi za'k dan' llon ake'n, dan' llon ake' na', naken ka bzi'o da dop le' ra'll lliche, nak ake' ka to be'nn gop xhi're, na' bi lloe'la'll ake' gap ake' xhi'r ka'. Leska' nak ake' ka to bej da nray be' dan' bi nsa'a vei, na' ka to yay xhix da bibi llbia kat ll-llin lla kwian, na' lati kwian na', llyechen, na' llachjen llje'ten rao yo. ¹³Nak ake' ka nisda'o da llas lletj, na' llallo'nnen blli'n ga nak

rao yo lloa' nisda'on. Na' nak ake' ka berj da bill llia ga llaya'l kwian, le Dios na' ba nyixje' ke ake', sa'kzi' ake' ke chnare gan' nak xchole kwis.

¹⁴Na' Enoc be'nnen' gok be'nn galle rao dialla Adán na', leska' be'e di'll da bzejnie' Diosen' le'e ke be'nn ka' llroe' llsede di'll wenra'lle, kan' bne'e: "Bre'ra' za'rén Xanllo Diosen' angl zan kwis ke'en. ¹⁵nench choybie' sa'kzi' yeolol be'nn nap do'le. Yeolol be'nn ka' bi bzenay ke'en, sa'kzi' ake' ke chnare dan' ben ake' da xhinni kwis bi bzenay ake', na' dan' bnnechach ake' ke'e." 16 Na' ka nak be'nn ka' llroe' llsede re' di'll wenra'llen', zoteze zo ake' llakbe'y akre' ke Diosen', bibi llazra'll ake'. Llon akteze' kon bi nen ke ake'. Ren xti'll ake'n llayoe'rao kwin ake', na' llpe aktere' be'nn yobre nench llon ake' gan mell.

Judas na' lle'e be'nn ka' nxenra'll Jesucriston' kan' llaya'l gon ake'

¹⁷Zan re' be'nn bi'cha' nllie'ra', llaya'l yesa'ra'llre di'll ka' be'e postl ka' brej Xanllo Jesucriston'. ¹⁸Bne ake': "Katen' ba zo rez yed Xanllo Jesucriston', nni't be'nn bi chejle' ke Diosen', na' wtitj akre' Le'e, na' gon ake' kon da nen ke ake' da nak zdo'." ¹⁹Na' be'nn ki llon ake' nench re' bi llak re' toze. Llon ake' xhbab da zera'll xpe'r ake', le bi yo' Spíritu ke Diosen' lo yichjra'llda'o ake'.

²⁰Zan re' be'nn bi'cha' nllie'ra', llnneyoera' re' gondipra'llre sere war, chejle're di'll li ke Diosen' dan' za'k na'. Na' leyelwill Diosen' kon kan' wzejnie' Spíritu ke'en re'. ²¹Na' lesó legakbe'e nllie' Diosen' re'. Na' dan' llaya'chra'll Judas Judas

Xanllo Jesucriston' lli'o, gonne' yel nban zejlikane kello. Ke len na' lesó lekweze baten' gak kan' gone'n.

²²Bal be'nne llakgan akre' akren' gon ake' kan' ne Dios na', na' lewzejnie' akre'. ²³Legón ga zerao sa'kere nench yelloj ake' rao nez xhinnjen', na' bi kweyi' ake'. Na' be'nn ka' llon da xhinnjen', leska' llaya'l yeya'chra'll aklloe', do llebllo do llwiello dan' llon ake'n, na' wiallo nench bi gonrén aklloe' txhen.

Judas na' nxenra'lle' Dios

²⁴Na' Dios be'nnen' zerao nap yel wak, llkwe'je' lli'o nench ke bixllo, na' llwie' bibi do'l kello ga't kat yellinllo rawe' gan' yo' beni' ke'e na'. Kana' yewello. ²⁵Le toze Dios na'n, Le'en nake' be'nn si'n, na' nake' be'nn wasrá kello. Nake' xan yeolol be'nnach, na' billre da zjadé. Llaya'l gonxhenlloe' ke chnare. Ka'n gakchga.

JESUCRISTON' BZEJNIE'RE' SAN JUAN NA' KE DA KA' ZA GAK

Diosen' bzejnie're' Jesucriston' di'll ki

Diosen' bzejnie're' Jesucriston' di'll ki nench wroe're' be'nn ka' llonlira'll Le'en dan' ba zo gak. Na'll ba bse'le' to be'nne nak angl ke'e, nench bzejnie're'n nada' Juan, naka' be'nn llon xchine'. ²Na' llzoja' di'll li ke'en, na' yeolol da ba bre'ra', na'llen' nnezra' da li bne Diosen' ki gak, le Jesucristo na'n bzejnie' nada'.

³Nbaraz ke be'nn ka' wrab dan' llzoja' ni, na' be'nn ka' yene di'll ka' da ka' za gak, na' gon ake' kan' nen na', le ba zo rez gak kan' nen na'.

Juan na' llzoje' be'nn ka' nxenra'll Jesucriston' rao galle yell ka'

⁴Nada' Juan Ilzoja' re', zjalla'a galle yell gan' nbane Asia, Ildop Il-llayre llonlira'llre Jesucriston'. Diosen' ren Spíritu ke'en gonla'y ake' re', na' wzoa ake' re' nbaraz, Diosen' zokze', na' ba zokze' ka za xe yellriote, na' zokze' ke chnare. Na' Spíritu ke'en naken ka galle Spíritu zen rawe' gan' Ilie' Ilnebie' na'. ⁵Na' Jesucriston' gonla'ye' re', nake' be'nn lloe' di'll li ke Dios.

Nake' be'nn lliarao babane radj be'nn wat ka', na' bill llnebia' yel goten' Le'e. Na' llnebie' yeolol wnebia' lla'a yellrio ni. Na' nllie're' lli'o bzane' kwine', bet ake' Le'e brarj xchene'n, nench na' basre'e lli'o ke da xhinnj benllo. ⁶Na'llen' ba breje' lli'o nnebia'renlloe', na' gakllo ka to no bxoz, na' sollo wxenra'll-llo Xanllo Diosen'. Le'en gonllo xhen ke chnare, le zokze' llnebie' ke chnare. Ka'n gakchga.

⁷Nna wiákere kat yede' lo bej na', yeolol be'nne re'e akre' Le'e, rente be'nn ka' baso't Le'e. Na' be'nn zjalla'a toto latj yellrio ni, ka re'e akre' Le'en, na'll yesbell ake'. Kan' ba bnia' na'n gak. Ka'n gakchga.

8"Nada' naka' ka ti'ch di'll nelle, na' ka ti'ch di'll ga llayollen, ka to be'nn bxe bi da bxie', na' wasyollte'n." Ka ne Xanllo Diosen' be'nnen' nap yel wak xhen na', be'nn zokze, na' ba zokze' kan' bi nna xe yellrion', na' zokze' ke chnare.

Juan na' bre'da'ore' Criston' nake be'nn za'ke

⁹Nada' Juan, ni ke dan' nona' txhen Cristo na', naka' re' txhen llonllo kan' ne Jesús na', na' llnebia' Diosen' lli'o, toze ka llone be'nn ka' lli'o, llsa'kzi' ake' lli'o ni ke xti'lle' na', na' llakrén Jesucriston' lli'o nench llakllo war bi da llak kello. Na' dan' ba bia'a xti'll Diosen' ren dan' ba bia'a da li ke Jesucriston', ke len na' be'x ake' nada' yoa' rill ya gan' re Patmos, gan' nak to yellrio da lli' lo nisda'o. ¹⁰Na' to lla nak la'y ke Xanllon', ben Spíritu ke Diosen' bre'da'ora', na' ko'llra' benra' ke to chi'i be'nn bnne zillj kwis. ¹¹Na' golle' nada':

—Nada' naka' ka ti'ch di'll nelle, na' naka' ka ti'ch di'll gan' llayollen, ka to be'nn lliarao, na' naktia' ka be'nn za naore. Bzoj to le' yich da ki re'ro'n, na' wse'lo'n rao be'nn ka' lla'a galle yell ka' zjalla'a gan' nbane Asia, gan' lladop ll-llay be'nn ka' llonlira'll nada', yell ka' nzi'i Éfeso, Esmirna, Pérgamo, Tiatira, Sardis, Filadelfia, na' Laodicea.

¹²Na' bayechja' bwia' noxhan' bnne nada', na' bre'ra' gall kandler de ya cha'o dan' nzi'i oro. 13 Na' kllol kandler gall ka' bre'ra' to be'nn nak ka be'nnach. Nake' to ra'll tonne ballinten xhnie', na' ngo' lloa' lchoe'n to baydon da nak de ya cha'o dan' nzi'i oro. ¹⁴Na' yich yichje'n naken da lliche ka xhi're ka beye. Na' yejrawe'n naken llaktit ka yi' da lla'lnninne. 15 Na' nie' ka' llaktiten, bre'ra'n ka to ya da xhoa rao yi' llarjen. Na' chie'n nenen ka ga de to yeo kat yollen da xhen. ¹⁶Na' ne'e cha'we na', no'xe' gall berj, na' lo lloe' na', ll-lloj to spad da nla llop la' rawe. Na' lloa'rawe' na' naken llaktit, ka ga nna' will kat nna'n znia.

¹⁷Na'll ka bre're'n, byala' xhnie'n bacholra'lltia'. Na'll bli ne'e cha'wen' bxoe'n yichja', na' ne'e:

—Bi llebo'. Nada' naka' ka be'nn lliarao, na' naktia' ka be'nn za naore. 18 Naka' be'nn nsa'a yel nban. Gota' kana', na' babana' radi be'nn wat ka', na' zokza' ke chnare. Na' no'xa' xhiya ke yel goten', na' xhiya ke gan' llayej be'nn ba got. 19 Na' nna' bzoj da ka' ba bre'ro'n, na' di'll ke da ka' llak nna', na' ke da ka' za gak. ²⁰Le nono nna nneze bi zejen ke berj gall ki no'xa' na', na' ke gall kandler de ya cha'o dan' nzi'i oro, na' kin' zejen: berj gall ka' zeje di'll gall be'nne lloe'rene xti'lla'n, gall kwen be'nn ka' lldop ll-llay llonlira'll nada' gan' nbane Asia. Na' ye galle kandler ka' zejen gall kwen be'nn ka' llonlira'll nada'.

Dan' bne Jesucriston' ke be'nn ka' nxenra'll Le'e rao gall yell ka': Dan' golle' be'nn Éfeso ka'

'Ki wzojo' be'nnen' bse'la', 2 'Ki wzojo' be'nnen' bse'ıa lloe' xti'lla' ren be'nn ka' lldop ll-llay llonlira'll nada' gan' nzi'i Éfeson': "Nada' no'xa' berj gall ka' lo na'a cha'wen', na' da'a kllol kandler gall ka' dan' nak de ya cha'o dan' nzi'i oro, na' llepa' re': ²Nnezyollra' ka wen na' llonre na', zere da war llonre xchina'n. Na' nnezra' bi llrebre be'nn llon da xhinni, le ba bre'kzere kan' llon be'nn wenra'll ka', llasné ake' nak ake' postl kia', nnézkzere kere dogarje postl aken'. ³Na' ba ballayraore, na' ba gokxhenra'llre, na' ba benre xchina' do ra'llre, ni ke dan' nllie're nada', na' bi nna gatra'llre. ⁴Zan nna' de to da bi

Apocalipsis 2 448

llazra'lla' kan' llonren': bill nllie're nada' kan' bllie're nada' kana'. ⁵Ke len na' lewayón xhbab kan' ba benren', na' lewayate lewayón kan' benre kana'. Cha' bi wayátere da ka' llonren', weda' yedka'a re', bill gakre kandler kia' cha' ka'. ⁶Leska' de to da llayo'ra'lla' kan' llonren': llwiere da xhinnjen' ka da ka' llon be'nn ka' nzi'i nicolaítas, be'nn ka' llasné ake' wakse gontezre da xhinni, leska' bi llazra'lla' nada' kan' llon ake'n. ⁷Re' zo nayre da llene, lewzenay kan' ne Spíritu ke Diosen', llen re' lldop ll-llayre llonlira'llre nada' gateze: Re' soere bi kwej yichjre xti'lla' ni, nada' gonna' da gaore da Ilbia rao yay ke Xanllo Diosen', dan' zo latj nbaraz dan' lloe' yel nban."

Dan' golle' be'nn Esmirna ka'

8'Na' ki wzojo' be'nnen' bse'la', lloe' xti'lla'n ren be'nn ka' lldop ll-llay llonlira'll nada' gan' nzi'i Esmirna: "Nada' naka' be'nn lliarao. na' naktia' ka be'nn za naore, be'nn ba got, na' babane' radi be'nn wat ka', na' llepa' re: ⁹Nnezyollra' ka wen na' llonre na'. Nnezra' za'kzi're. Nnezra' nakre be'nn va'che, zan re' nakre ka be'nn wnia!. Na' nnezra' katke nnechach beinn Israel kai keré, na' ne ake' ba brej Diosen' leake' nench gone' wen ke ake'. Rencha' bi breje' ka be'nn ka', le bi llonlira'll ake' Le'e, nak ake' be'nn nak txhen dan' nak xan daxi'o ak. ¹⁰Bi llebre da ka' za gak kerén', le dan' nak xan daxi'o ka'n, gonen nench ko' ake' balre rill ya, nench na' wroe'n cha' soen wsanra'llre xti'lla'n. Na' rao do chi lla wsa'kzi'

ake' re'. Lesoteze lewzoa xti'lla'n la'kze cha' got ake' re', nada' gonna' yel nban keré ke chnare. ¹¹Re' zo nayre da llene, lewzenay kan' ne Spíritu ke Diosen', llen re' lldop ll-llayre llonlira'llre nada' gateze: Re' soere bi kwej yichjre xti'lla' ni, bi gak keré kan' gak ke be'nn ka' sa'kzi' ke chnare, dan' ne'e yel got wllope."

Dan' golle' be'nn Pérgamo ka'

¹²'Na' ki wzojo' be'nnen' bse'la', lloe' xti'lla'n ren be'nn ka' lldop ll-llay llonlira'll nada' gan' nzi'i Pérgamo: "Nada' no'xa' spad dan' nla llop la' rawe, na' llepa' re': ¹³Nnezvollra' ka wen na' llonren'. Na' nnezra' zore gan' llnebia' daxi'on, na' zore llzoare xti'lla'n. Bi llbej vichjre xti'lla'n dan' llejle'ren', na' ni ke brej yichjzre' kan' baso'te Antipas be'nnen' be'e xti'lla'n gan' zore na', gan' lla'a be'nn zan be'nn ka' llon txhen dan' nak xan daxi'o ka'. ¹⁴Zan de to chop da llonre da bi llazra'lla'. Ni't balre llzejnie' lwelljre wakse gontezre bi da xhinnj. Kan' nakse dan' bzejnie' da Balaam ke be'nnen' nzi'i Balaken' kana', dan' bko'velre' be'nn Israel ka' nench bdao ake' yel wao da llia rao lwa'a dios ke ake' na', nench benrén xpe'r ake' da lle'n akre' da nak zdo'. 15 Leska' ni't balre naore dan' llwiera' nada', dan' llroe' llsede be'nn ka' nzi'i nicolaítas. ¹⁶Len na' lewayate ke da xhinnjen' llonren'. Cha' bi yeyáteren', ba za'a na' yedtilrén ake' kone dan' ll-lloj lo lloa' ni, naken ka to spad. ¹⁷Re' zo nayre da llene lewzenay ke dan' ne Spíritu ke Diosen', llen re' lldop llllayre llonlira'llre nada' gateze: Cha' nol re' soere bi kwej yichjre xti'lla' ni, na' gonna' re' to yet nga'che da za'ke da nono nna re'e yellrio ni, ka dan' ne maná, na' gonna' tweje yej llich keré, ga nyoj rare da nak to da kobe da nono nombia', toze re' gaken keré gombia'ren."

Dan' golle' be'nn Tiatira ka'

¹⁸'Na' ki wzojo' be'nnen' bse'la', lloe' xti'lla'n ren be'nn ka' lldop ll-llay llonlira'll nada' gan' nzi'i Tiatira: "Nada' naka' dogarje Xhi'nn Dios, na' nak yejrawa'n llaktit ka ga lla'Inninne, na' nia' ka' llaken ka to ya da nak llel-llibe llaktiten, na' llepa' re': ¹⁹Nnezyollra' ka wen na' llonre na', nnezra' zore nllie're nada', nxenra'llre nada', llonre xchina'n, na' llonre banez biteze da llak keré, na' nnezra' ba llonllre wen ye ra't kerke kan' llonre batna'. 20 Zan de to da llonre da bi llazra'lla': dan' lloe're latj ren no'ren' llon ka da Jezabel no'ren' bnebia! kana!. Lle'e re! nake! be'nn llroe' llsedre' xti'll Dios, rencha' da wenra'llzen' ziye'ze be'nn ka', nench na' gonrén ake' yel zdo' xpe'r ake'n, na' gao ake' yel wao da Il-llia ake' rao lwa'a ke dios ke ake! llonlira!ll ake!. 21 Ba breza' cha' yeyate no'ren' ka dan' llone'n, na' bi llsanra'lle'n, na' bi llbej yichje' ka zdo'n llone'n. ²²Ke len na' gona' gake' to yillwe' da sa'kzi'rene' rao gan' llxhoe'n, na' leska' sa'kzi' be'nn ka' llonrén le'e vel zdo', nara'chek cha' bi wsanra'll ake' dan' llzejnie're' leake'n dan' lle'e leake' wak gon ake'. ²³Na'll gona' yesa't xhi'nne' ka', nench

gakbe'e yeolol kwen be'nn ka' lldop ll-llay llonlira'll nada' gateze, na' wayakbe'e akre' nada' nnéztera' bi xhbab yo' lo yichjra'llda'o ake', na' gona' so totoe' nbaraz o cha' sa'kzi' ake' kon kan' nak dan' ba ben ake' na'. ²⁴Na' re' zore Tiatiran' bi llonre kan' llroe' llsede no'r wenra'llen', na' bi nsedre dan' ne ake' llzejnie' akre' ke daxi'on dan' nono nombia', bi nnia' billre da gonre da yobre. ²⁵Kon sokzre gonre da wen kan' llonkzre llinte lla yeda' da yobre. ²⁶Notezre be'nne cha' bi kwej yichje' xti'lla'n, na' cha' soere' soteze gone' kan' nllia' bia'a na', kat yeda' da yobre, gona' nnebia'rén ake' nada' yell ka' zjalli' vellrion'. ²⁷Kan' ba benn Xa'n nada' yel llnebia' na', gona' nnebia' ake' yell ka' war kwis. Na' be'nn ka' bi llzenay, wlleyi' ake' leake' ka llxhoxhje' to ye's de yo. 28 Na' wa'a lati ke ake' serén ake' be'nnen' nak ka berj rsire. 29 Re' zo nayre da llene, lewzenay kan' ne Spíritu ke Diosen', llen re' lldop ll-llayre llonlira'llre nada' gateze."

Kan' golle' be'nn Sardis ka'

Leska' ki wzojo' be'nnen' bse'la', lloe' xti'lla'n ren be'nn ka' lldop ll-llay llonlira'll nada' gan' nzi'i Sardis: "Nada' napa' Spíritu ke Dios dan' nak ka galle spíritu, na' no'xa' berj ka' galle, na' llepa' re': Nnezyollra' kan' llonre nere nbanre, zan nakre ka be'nn wat. ²Lewayón xhbab kan' llonre, na' lewxenra'll-ll nada', legón kan' nia' na', chaga bi nna llin lla kweyi're, le bi nak dan' wen dan' llonre na', na' bi yewé Diosen' ka'. ³Lesó lelljadinra'll

Apocalipsis 3 450

xti'lla' dan' bzejnie' be'nn ka' re', na' dan' bénere kana'. Na' lewzenayen, nench wayátere da xhinni kerén'. Le chet ka' bi yebanra'llre, yeda' gan' zeren' ka za'a to be'nn wan, na' ni ke nnézzere baten' yeda'. 4Zan zjarenkze balre be'nn Sardis, bi benre bzi'o ra'llen' benn Diosen' re'. Na' kat llin lla gonna' to ra'll llich gakre, tarenre nada', le ba za'kre tarenre nada' gonre nada' txhen. ⁵Na' cha' soere bi kwej yichjre xti'lla'n, la biteze gak keré rao yellrio ni, na' gonna' ra'll llichen' gakre, na' kbat yelana' raren' le' yich kia'n gan' nyoj ra yeolol be'nn nape yel nban zejlikane, na' we'rena' Xa'n di'll, na' ren be'nn ka' nak angl ke'e ka', nakre nada' txhen. ⁶Re' zo nayre da llene, lewzenay kan' ne Spíritu ke Diosen', llen re' lldop ll-llayre llonlira'llre nada' gateze."

Kan' golle' be'nn Filadelfia ka'

7'Na' ki wzojo' be'nnen' bse'la', lloe' xti'lla'n ren be'nn ka' lldop ll-llay llonlira'll nada' gan' nzi'i Filadelfia: "Naka' Be'nn La'y, na' llonteza' kan' bnia' gona'n. Na' no'xa' xhiya ke da David be'nnen' bnebia'. Kate llsarja' cho' be'nne gan' llia Diosen', ni to nono gak yeseje', na' kate llseja', bi gak cho' be'nne, na' ni to nono gak wsarje, na' llepa' re': 8Nnezyollra' ka wen na' llonre na', na'llen' ba bsarja' to ga tere ga nono gak yeseje. Na' la'kze bi nar-re, ba llzoare xti'lla', bi brei vichiren' kan' biteze baso'n akere! re!. 9Bal be!nn Israel ka! zjalla'a gan' zoren', llasné ake' ba brej Diosen' leake', na' gone' wen

ke ake'. Non ka ne akze'n, bi breje' leake', le bi llonlira'll ake' Le'e. Nak ake' be'nn wxhiye'e nao ake' ke xan daxi'o ka'. Na' wllin lla kat gona' gap ake' re' bara'nne, nench gakbe'e akre' nllie'ra' re'. ¹⁰Ni ke dan' bi brej yichjre xti'lla'n, la'kze bsa'kzi' ake' re', ke len na' vellojre wen kate llin lla sa'kzi' yeolol be'nnach. Kana'n wroe'n ke toto be'nnach, cha' bxenra'll ake' nada' o cha' bi bxenra'll ake' nada'. ¹¹Ba rez yeda' da yobre, lesotip lewxenra'll nada' nench nono yeka'a ke nak dan' ba nwia' gonna' re'. 12 Cha' re' ba bzoere bi kwej yichjre xti'lla'n, wllin lla gona' re' choch, na' gona' re' ka to bdop ke yoda'o brao ke Diosen', le yellinre gan' zo Dios na'n, na' yega'nnrenre' ke chnare. Na' totore wzoja' roxhgaren' ra Dios kia', na' ra yell ke'en, Jerusalén dan' nake da kobe da yetj yebá, na' totore wzoja' roxhgaren' ra'a nada' da nak da kobe. ¹³Re' zo nayre da llene, lewzenay kan' ne Spíritu ke Diosen', llen re' lldop ll-llayre llonlira'llre nada' gateze."

Kan' golle' be'nn Laodicea ka'

14'Na' ki wzojo' be'nnen' bse'la', lloe' xti'lla' ren be'nn ka' lldop ll-llay llonlira'll nada' gan' nzi'i Laodicea: "Llona' nench llak kan' zera'll Diosen', lloa'a di'll li da naken. Naka' txhen ren Diosen' kan' bxhe yellriote, na' llepa' re': 15 Nnezyollra' kan' llonren', ni ke nakzre ka to da zay, ni ke nakzre ka to da la. Nia' ka' le ni ke lloe'la'llzre wxenra'llre nada', na' ni ke llatra'llzre. Wéntere chenak

nakre ka to da zay o chenak nakre ka to da la. 16 Na' ni ke dan' nakre ka to da ba'l, na' bi nakre ka to da zay, na' ni ke nakzre ka to da la, waxheja' re' ka'le. ¹⁷Re' nere: Be'nn wnia' nakto' na' ba nnia'to', na' bibi llválljeto'. Na' bi llakbe're nakre be'nn zban rao Dios. Bi llakbe're nakre ka to be'nn lchole, na' ka to be'nn dá gal yid. 18 Ke len na' llepa' re', llaya'l si're da gonna' re', da nak da za'klle ka ya cha'o dan' nzi'i oro dan' ba bzey ake' nench baga'nnen dogarje. Si're da gonna' re', nench da li sore nbaraz. Na' lennab yezi'xhena' keré nench gak ra'llda'oren' yalle, kan' nak xhara'n be'nn nak ra'll llich kwis. Ka'n gonre nench bill re'ra' re' ka to be'nn dá gal yid, be'nn llaya'l gake zdo' ke. Na' leyecha'a yichjra'llda'oren', na' bill gakre ka to be'nn lchole, be'nn yalli yejrawe'n rmell nench yere're. 19 Kon be'nn nllie'ra' na', dile' na' llsa'kzie'. Ke len na' llaya'l kwek yichjre, na' leyeyate ke da xhinnj kerén'. 20 Na' ganni nia' re', llona' ka to ke be'nn zellá lloa' yo' keré, nne'e zillje, na' cha' nol re' yénere, na' wsarjre choa', na' wzenayre kia', na'll gaorena' re' xche' txhen, na' re' gaorenre nada' txhen. 21 Na' cha' soere bi kwej yichjre xti'lla' ni, wllin lla yedlle'renre nada' gan' llia' llnebia' na'. Ka'n bena' nada', bzoera' bena' gan kan' bne Xa' na', na'llen' ba llia' llnebia'rene' txhen. ²²Re' zo nayre da llene, lewzenay kan' ne Spíritu ke Diosen', llen re' lldop ll-llayre llonlira'llre nada' gateze."

Be'nn lla'a yebá llon ake' Diosen' xhen

Bde na', bre'da'ora' nyarj le' yebán', naken ka to lloa' yo' ke be'nne. Na' benra' da yobre bnne be'nn bne da nelle zillj kwis, ka'kze bell to trompet, golle' nada':

—Byep gan' zoa' ni, nench na' wroe'ra' rwe' da ka' za gak.

²Na'll le bente Spíritu ke Diosen' bre'da'ora' yebá gan' llia be'nnen' llnebie'. ³Na'll le bre'tera' be'nnen' llia llnebia'n, nake' llaktit ka'kze llaktit yej kese dan' nzi'i jaspe ren dan' nzi'i cornalina. Na' to da nak ka to bchit byechjen gan' llie' llnebie'n, na' naken llaktit ka llaktit to vei dan' nzi'i esmeralda. 4Na' kwit Diosen' gan' llie' na', zjalli' ye tapalloa (24) be'nn nak be'nn brao, be'nn llnebia'rene'. Nak ake' ra'll lliche, na' zjando's yichj ake'n twej corona de ya cha'o da nzi'i oro. ⁵Na' gan' llia Diosen', llep yes llak llakia na' llachj. Na' rawe gan' llie' na', zjani't galle yi' da lla'lnninne, yi' gall ka' nak aken Spíritu ke Dios. ⁶Na' doxhen rawe gan' llie' na', nllirj to da llaktit da nak ka yej kes, na' nla'n ka ga de nis xhen.

Na' zjani't ye tap be'nn nechj ake' Le'e. Na' zjallia da zan yejrao ake' do ko'll ake' do rao ake'. ⁷Be'nn nellen' nake' ka to bell yi'xe, na' be'nn wllope na', nake' ka to belle, na' be'nn wyonne na', nak lloa'rawe'n ka be'nnach, na' be'nn wdape na', nake' ka to bsia ba ze rao lla. ⁸Na' be'nn tap ka', zjazó xir ake' xop wejen', na' zjallia zan yejrao ake' do lo xir ake' do lo ko'll

xir ake'. Na' do lla do yer llasné ake':

> Nakla'ye', nakla'ye', nakla'ye', Xanllo Diosen' be'nnen' nap le zeraoze yel wak xhen. Ba zokze', na' zokze' kan' za xe yellriote, na' zokze' ke chnare.

⁹Na' yo'y ras kat be'nn tap ka' lloe' ake' di'llen' kan' nak Dios be'nnen' llia llnebia'n, be'nnen' za'k kwis, be'nnen' zo ke chnare, na' llon ake' Le'e xhen, na' lloe' ake' yel llioxken ke'e, ¹⁰na'll be'nn tapalloa ka', lla't ake' slloa're rao Diosen', llon ake' Le'e xhen gan' llie' na', na' llni't corona ke ake'n xhnie'n, llasné ake':

11 Xa Dios, za'ko' wxenra'llto' rwe', soto' gapto' rwe' bara'nne na', we'to' di'll ke yel wak xhen ko'on,

le rwe'n beno' yeolol bi da de, na' rwe'n byazra'llo' ka', na'llen' ni't aken, na' gok aken.

Txhonnj yich dan' ndobe na' to be'nn nake ka xhi'r da'o

Na' bre'ra' be'nnen' llia llnebia'n, kone ne'e cha'we na', no'xe' to yich da ndoblol, na' llop la'ten nyoje ke rawe ke ko'lle, na' neyjten nyi'chen ren galle sey. ²Na' bre'ra' to angl war, na' bnne'e zillje, ne'e:

—¿No nake be'nn za'k wche'ze sey ki, nench llach yichen' lla'n na'?

³Na' ni to nono llra' wchache yich ka', ni yebá, ni yellrio ni, ni gan' lla'a be'nn wat ka', ni to nono bllelkze wche'ze'n, na' wia ake'n akre naken. ⁴Na' bllella' kwis, le nono zo be'nn za'k wchache' yich

ka' wrabe'n, na' ni ke llakze wia ake'n akre naken. ⁵Na' to be'nn nake be'nn brao golle' nada':

—Bi kwello'. Wiachek, na' zo be'nnen' gorj rao dialla ke Judá, na' gok da xozxta'we' da Daviden', na' dan' nape' yel llnebia' xhen na', nake' ka to bell yi'x. Na' Le'e za'ke' wxhoxhje' sey ka' gallen', na' wchache' yich ka'.

⁶Na' bre'ra' gan' lli' be'nnen' llnebia' radi be'nn tap ka' zjallia xiren', na' kllol gan' lla'a be'nn tapalloa ka' (24). Bre'ra' ka to xhi'r da'o ban' ba bet ake', ka xhi'r ba llia gall loze, na' gall yejraoba'. Na' yejraoba' gallen' zejen zokze Spíritu ke Diosen' doxhen vellrio, llonen kan' ne'e na'. ⁷Na' be'nnen' bre'ra' ka to xhi'r da'on, jaxie' yichen' no'x be'nnen' ne'e cha'we, be'nnen' lli' llnebia' na'. 8Na' ka jaxie' yich na'n, be'nn tap ka', na' ren be'nn tapalloa ka', le go't akte' slloa're rawe'n. Na' twej arpa zjano'x be'nn brao ka', na' twej ye's de ya cha'o dan' nzi'i oro ga llzev ake' yare, na' yar na' zeje di'llen', lloe'rén ake' Diosen' di'll kat llalwill ake' Le'e, be'nn ka' nxenra'll Le'e. ⁹Na'll bel be'nn ka' to da kobe dan' ne'e:

Za'ko' jaxi'o yichen', na' bxhoxhjo' seyen' nyi'chen na', le bzane yel nban ko'o, bet ake' rwe'.

Brarj xcheno' nench bnitrao' da xhinnj keto',

nench nakto' rallna'a Dios, nakto' be'nn wde wdere yell xhen, na' wde wdere yell da'o, na' wde wdere dialla keto', na' llakto' wde wdere di'll da de rao yellrio. 10 Na' brejo' neto' nench nakto' ka to be'nn wnebia',

na' zoto' nxenra'llto' Diosen' ka bxoz,

na' ka llin lla, nnebia'to' rao yellrio ni.

¹¹Na'll bwia' na' benra' chi'i angl zan kwis, ni ke bzoezra' wrab ake'. Zjazellá angl ka' to kwit be'nnen' llia llnebia' na', na' ganna' zerén be'nn tap ka' zjallia xire na', ren be'nn brao tapalloa ka'. ¹²Na' benra' lloe' ake' di'll zillje, ne ake':

Be'nnen' nak ka xhi'r da'on, bzane kwine' ni ke lli'o be'nnach, na' za'ke wxenra'll-lloe', le Le'en llnebie' doxhente, na' yo' rao ne'e yeololte da zjadé. Nake' be'nn si'n war, na' nape'

yel wak xhen. Llaya'le we'lloe' yel bara'nne, na'

we'llo di'll nake' be'nn za'ke.

13 Na' lekze benra' yeolol be'nn
zjalla'a yebán', na' yellrio ni, na' be'nn
zjalla'a xhanre yellrio, na' be'nn zjalla'a
lo nisda'o. lloe' ake' di'll ne ake':

Lloe'raoto' Dios be'nnen' llia llnebia'n,

na' be'nnen' nake ka xhi'r da'o, nape' yel bara'nn, na' nake' be'nn za'ke.

Na' nape' yel wak xhen kwis nna', ren ke chnare.

¹⁴Na' be'nn tap ka' zjallia xiren', ne ake':

-Ka'n gakchga.

Na' be'nn tapalloa ka' le go't akte' slloa're, be'xhen ake' Dios be'nnen' zo ke chnare.

Sey gall ka' lla'a loe gan' ndoben na'

6 Ka nak sey gall ka', bre'ra' be'nnen' nak ka xhi'r da'on

bxhoxhje' sey nellen', na' be'nn tap ka' zjallia xiren', toe' bnne'e zillj kwis ka'kze ga llachj to yi'wzi'o, bne'e:

—Da, na' wia da ni.

²Na' ka bwia' na', bre'ra' to kabay lliche, na' be'nnen' llia ko'llba' na' no'xe' to arco. Na' bzoa ake' to corona yichje' ka to be'nn brao, na' ba zeje' zjatilrene' be'nn ka' llwie le'en, na' wa lljene' leake' gan.

³Be'nnen' nak xhi'r da'o na', bxhoxhje' sey wllopen', na' benra' bnne be'nn wllopen' llia xir na', bne'e:

—Da, na' wia da ni.

⁴Na'll blloj ye to kabay, na' nakba' ba xhna, na' be'nnen' llia ko'llba' na', gok rallne'e gone' bill cha'a be'nn ka' lla'a yellrion' nbaraz yeso't lwellje', na' be'e ake' le'e to spad xhen.

⁵Na' be'nnen' nak ka xhi'r da'o na', bxhoxhje' sey wyonnen', na'll benra' bnne be'nn wyonnen', be'nnen' llia xir na', bne'e:

—Da, na' wia da ni.

Na'll bwia', na' bre'ra' to kabay gasje, na' be'nnen' llia ko'llba' na', no'xe' to xhgo'nse. ⁶Na'll benra' bnne to be'nne do gan' lla'a be'nn tap ka', be'nn ka' zjallia xir na', golle' be'nnen' llia ko'll kabay gasjen', lle'e le'e:

—Byej jalliayi' nbaz trigon' ren xhoa' dan' nzi'i cebada nench na' bi gaken wen, na' gaken win, na' xop ya nbaz trigon' sa'ken ka to raxhj ake' da gon ake' gan ke tlla llin, na' xop ya xhoa' cebadan' sa'ken ka to raxhj ake' da gon ake' gan tlla llin, zan bi wlleyi'o ceiten' ren xis uva.

⁷Na' be'nnen' nak xhi'r da'on, bxhoxhje' sey wdapen', na' benra' bnne be'nn wdapen' llia xiren', bne'e:

—Da, na' wia da ni.

⁸Na' bwia', na' bre'ra' to kabay gache, na' be'nnen' llia ko'llba'n nzie' Yel Got, na' be'nnen' nzi'i Latj Gan' Lla'a Be'nn Wat, zeje' nawe' le'e, na' gok rallne'e ra't yellrion' nench na' bxie' wdile, na' gat be'nn zan, na' bene' win. Na' bene' yillwe' nench wasa't ye zanlle', na'll bene' wasa't be'nn zanlle kone ba znia zjalla'a yellrio betba' leake'.

⁹Na' be'nnen' nak xhi'r da'on bxhoxhje' sey ga'ye, na' bre'ra' gan' lla'a be'nn ka' yebán', na' xhan bkoy na', bre'ra' be'nn ka' baso't ake', ni ke dan' bzenay ake' xti'll Diosen', na' dan' be'e ake' di'll, bne ake' nxenra'll ake' Jesucristo na'. ¹⁰Na' be'nn wat ka' bnne ake' zillje, ne ake':

—Xa Dios, rwe' nako' be'nn nak la'y kwis, na' llontezo' kon kan' bne'o na'. ¿Batxhan' gono' yel koxchis ke be'nn ka' zjalla'a yellrion', be'nn ka' bet neto' na'? ¿Baten' wasa'kzi' akoe' dan' brarj ake' xchento' na'?

¹¹Na'll be'e xha totoe' da llich da gok ake'. Na' lle'e leake' yezi'ra'll aklle' ye choll chak yeza'a be'nn llaya'l yesa't kan' got be'nn ka' bxenra'll Criston', be'nn nak ka bi'ch ake.

¹²Na' be'nnen' nak xhi'r da'on, bxhoxhje' sey wxhopen', na' bwia', na' le bxho'te to da xhen, le gokte willen' gasje ka to ra'll gasje da llak be'nn zo yel wan, ni ke dan' de yel got ke'e na', na' doxhen be'on bayaken xhna ka'kze llen. ¹³Na' berj ka' bexj akten rao yellrio, ka llyinnj no higo llia rao yay, kate dá to be' xhen da llchinnj len. ¹⁴Na' le' yebá na', bayaktekzen ka to yich da ndoblol, na' ya' ka' yeololen, no yellrio da'o ka' zjalli' lo nisda'on, bcha'a xhichne ake. ¹⁵Na' yeolol be'nn lla'a yellrion', yeolol be'nn wnebia', yeolol no xan be'nn waka'a ya, yeolol be'nn brao be'nn wnia' ak, yeolol be'nn llon xchin be'nne, na' ren nollre yezikre be'nne, yeolole' bkwa'ch ake' do xhan broj, do radj yej xhen da zjallia rao ya' ka'. ¹⁶Na' lle ake' ya' ka' ren yej ka':

—Lewka'chga bdinnj, bixen wkwa'chen neto' nench bi re'e Diosen' neto', be'nnen' llia llnebia'n, nench ke gonn be'nnen' nak xhi'r da'o da sa'kzi'to'. ¹⁷Le ba bllin lla sa'kzi' yeolol be'nne, na' nono soe ke dan' gaken.

Be'nn Israel ka' nyi'ch sey ke Dios

Bde na' bre'ra' tap angl ak, zjazé ake' tap skin ke yellrion', bza'y ake' be'n nench bi wyechjen yellrion', na' ren rao nisda'o, na' ren gan' lla'a yay ak. ²Na' bre'ra' ye to angl be'nn za'a gan' llra' willre, na' no'xe' to sey ke Dios be'nnen' zo ke chnare. Na'll bnne anglen' zillje, balwille' angl ka' ye tap, be'nn ka' ba bene' rao na'a ake' lljalleyi' ake' yellrio ren lo nisda'o. ³Na'll lle'e leake':

—Bi wlleyi're yellrion', ni nisda'o, ni yay ka' wayolltelle wchi'chto' sey ke Dios kellon' roxhga be'nn ka' nxenra'll Le'e.

⁴Na' benra' bal be'nn ka' nak, be'nn ka' bchi'che' seyen' be'nn za'k rao yeolol lkwe' be'nn Israel ka', na' yeolole' gok ake' to gayoa tapayon mire (144,000). 455 Apocalipsis 7

⁵ Chllinn mire (12,000) za'k rao dialla ke da Judá,

chllinn mire rao dialla ke da Rubén,

chllinn mire rao dialla ke da Gad,

⁶ na' chllinn mire rao dialla ke da Aser,

chllinn mire rao dialla ke da Neftalí,

chllinn mire rao dialla ke da Manasés,

⁷ na' chllinn mire rao dialla ke da Simeón,

chllinn mire rao dialla ke da Leví.

chllinn mire rao dialla ke da Isacar.

⁸ na' chllinn mire rao dialla ke da Zabulón,

chllinn mire rao dialla ke da José,

chllinn mire rao dialla ke da Benjamín.

Be'nn zan zjanak ra'll lliche

⁹Na' bayoll na' bwia' da yobre, na' bre'ra' zjazé be'nn zan rao Diosen' gan' llie' na', na' gan' ze be'nnen' gok ka xhi'r da'o, na' nak ake' be'nn zan kwis. Ni ke llakze no wrab leake', be'nn wde wdere yell xhen, wde wdere yell da'o, na' wde wdere dialla be'nn ak, na' nak ake' be'nn llak wde wdere di'll da de yellrion'. Na' yeolole' nak ake' ra'll llich, na' no'x ake' zi'n. ¹⁰Na' llawé akre' besia' ake' zillje, llasné ake':

Dios kello be'nn lli' llnebia'n, na' Jesucristo be'nn nak ka xhi'r da'o,

leake'n ba basrá ake' lli'o.

¹¹Na' yeolol angl ka' nechj, zjazellá ake' kwite gan' llie' na', na' be'nn brao tapalloa ka' (24), na' ren be'nn ye tap ka' zjallia xire, yeolole' le go't akte' slloa're rao yon', llon ake' Diosen' xhen, ¹²ne ake':

Llak kan' llaya'l gaken, Dios keto'.

Za'ko' wxenra'llto' rwe' ke chnare, nako' be'nn za'k kwis,

nako' le zerawe be'nn si'n, za'ko' gonnto' rwe' yel llioxken,

na' gonnto' rwe' yel bara'nn ke chnare,

llia'o llnebia'o doxhen, na' napo' yel wak xhen.

Ka'n gakchga.

¹³Na' to be'nn braon' nak be'nn tapalloa ka' txhen, golle' nada':

- —¿Nnezro' no nake be'nn ki nak ra'll llichen', na' gan' zaya'k ake'? ¹⁴Na'll llepa' be'nnen':
- —Rwe' nnezro', bi nnezra' nada'. Na'll ne'e:

—Be'nn kin' ballayrao rao na'a be'nn ka' bsa'kzi' leake' rao yellrio ni, na'llen' ba nak ake' ra'll llichen', le bxenra'll ake' be'nnen' brari xchen ka xhi'r da'o. ¹⁵Ke len na' ni't ake' rao Diosen' gan' llie' llnebie'n, llon ake' Le'e xhen do lla do yere. Na' Dios be'nnen' llia llnebia'n, zoe' llape' leake'. 16 Bill llbil lldon ake', na' willen' bill llzeyen leake', ni ze'y bill llak akre'. ¹⁷Le be'nnen' nak ka xhi'r da'o na', ze'e rao Diosen' kllole gan' llie' llnebie' na', na' Le'en llwia llyi leake', wche'e leake' gan' llra' nis dan' nsa'a yel nban zejlikane, na' Dios na' gone' nench bill ra! nis rao ake.

Sey gallen'

Kate bxhoxhj be'nnen' nak O ka xhi'r da'on sey gallen' da nyi'ch yich na', na' gok lli yebán' ka achi hor. ²Na' bre'ra' gall angl ka', zjazellá ake' rao Diosen', na' be'e leake' twej trompet. ³Na'll badsellá ye to angl lloa' bkoy dan' ze rao Diosen'. Na' no'x anglen' to ye'nn yare de ya cha'o dan' nzi'i oro gan' lla'a yar zan, na' bllie'n rao yi' barjen' dan' llia rao bkoy na'. Ka'n ben anglen' nench bene' txhen chi'i be'nn ka' lloe'rao Diosen' llalwill ake' Le'e batteze. 4Na'll bzolla'a llen ke yaren' no'x anglen', bllie'n rao Diosen' kone xti'll be'nn ka' lloe'rao Le'en. ⁵Na'll bxhi'i anglen' yi' dan' llia rao bkoyen' blle'en lo ye'nn yare, na'll bza'len rao yellrion', na' gochi, na' gok llakia, byep yes na'll bxho'.

Llkwell ake' trompet ka'

⁶Na' angl gall ka' zjano'x trompet ka', le bze akte' xhnid wkwell ake'n.

⁷Angl nellen' bkwelle' trompet ke'en, na'll le blle'te yej se'de nchixen yi' rente llen da bzale' rao yellrion'. Na' ye ra'tze ke gok achj yay lla'a rao yellrion' byey aken, leska' byey doxhente yi'x ga' da zjadé rao yellrion'.

⁸Na' le bkwellte trompet ke angl wllopen', na' to da nak ka to ya', bra'llen lla'lnninnen jaye'tten lo nisda'on. Na'll ye ra'tze ke gok achj nisda'on bayaken llen. ⁹Na' ye ra'tze ke gok achje ba, zjalla'a lo nisda'on wasa'tba', leska' ye to kat barco ka' llasdá rao nisda'on blleyi' aken. 10 Na'll bkwell trompet ke angl wyonnen', le bra'llte to berj xhen le' yebán', lla'lnninnen ka to yi' yell yay. Jaye'ten lo yeo zan, ye ra'tze ke gok achje yeo ka' ren gan' llar nisen'. 11 Berj na' nzi'n Da Nak Zla'. Na' ye ra'tze ke gok achj nisen' goken zla', na' be'nn zan wasa't dan' wase'j ake' nisen' nak zla'n.

¹²Na'll bkwell trompet ke angl wdapen', na'll ye ra'tze ke gok achj willen' kweyi', leska' ye to kat be'on blleyi'n, na' leska' ye ra'tze ke gok achj berj ka' kweyi' aken. Na' da ka' blleyi'n bill bseni'n. Ke len na' to bacholze ye ra'tze ke gok achj lla achj yere, na' gok xchole.

¹³Na'll le bwiatia', na' bre'ra' to angl dá rao lla kllol yebá na', na' benra' bnne'e zillj kwis, ne'e:

—iNya'chraz ke re' be'nn lla'a yellrio, ka nak za wkwell trompet ke angl ka' ye chonne!

Na'll bkwell trompet ke angl wga'yen', le bre'tera' bra'll to berj le' yebán', jaye'tten rao yellrion'. Na'll le be'te Diosen' len xhiya, nench wsarjen yell zitj dan' nak lo yi' gabil. ²Na'll bsarjen vellen', na' bzolla'a to llén xhen ka llak lo horn kat lla'den yi'. Na' bkwe'j llén na' rao will, ren rao lla na'. ³Gan' bzolla'a llén na', bllach bichsoa zan, zjakba' rao yellrion', zjatill akba' be'nne, ka llon xhban leo, ba ll-llach rao yellrio. ⁴Na'll goll Diosen' leba' bibi góneba' yi'x ya' ka', ni da naz ake', ni yay lla'a rao yellrio, na' be'e lati chill akba' be'nn ka' bi nyi'ch sey ke Dios roxhga ake'. ⁵Na' bi be'e latje gotba' leake', kon cha'a akba' ga'y be'o, wsa'kzi' akba' be'nn ka'. Na' kat

chillba' be'nn ka', la ake' ka llrallo kat yill xhban leo lli'o. ⁶Na' kat yeso'n akba' ka', na'll nnab be'nn lla'a yellrio gat ake', na' bi gat ake', ye'n akre' bill so ake' yellrio, na' bi gak ka dan' llnnab ake'n.

⁷Ka nak bichsoa ka' bre'ra'n, nak akzba' ka kabay ba lljak rao wdilre, na' yichj akba'n naksen ka ba nzoa corona de ya cha'o dan' nzi'i oro, na' lloa'rao akba'n naksen ka lloa'rao be'nnre. 8Na' llia yichi akba' ka yich yichi no'r, na' lay akba'n naksen ka lay bell yi'xre. ⁹Na' nak akba' to da nak de ya da llakrén kwerp ke akba'n, na' xir akba'n llonen llakia ka ga zjak kabay zan, ba nxhob karret ba zjak rao wdile. 10 Na' rao xhban akba'n zjazón xhle'chba', naken ka ke xhban leo nench chillba' be'nne. na' be'e latj wsa'kzi' akba' be'nne rao ga'y be'o. ¹¹Na' dan' llnebia' bichsoa ka', naken angl dan' ll-lleyi' da za'a lo yi' gabile, len na' nzi'n Abadón di'll Hebreo, na' leska' nzi'n Apolión di'll griego.

¹²Ba bde yel llza'kzi'n to kwen na', na' za za'a ye chopen dan' wlleyi'n.

¹³Na'll bkwell trompet ke angl wxhopen', na' benra' bnne to be'nne gan' zo bkoy de ya cha'o dan' nzi'i oro, dan' ze rao Diosen', bkoy da llia loze dap skinte. ¹⁴Na'll balwille' angl wxhopen' no'x trompeten', lle'e le'e:

—Basell dap angl ka' nllej lloa' yeo dan' nzi'i Eufrates.

¹⁵Na'll baselle dapte angl ka', be'nn ka' ba bllie' bia'a, bi iz, bi be'o, na' bi lla, yeso'te be'nnach, ye ra'tze ke gak achj weje be'nn lla'a rao yellrio. ¹⁶Na' benra' lla'a ka chop gayoa millón (200,000,000) be'nn waka'a ya ke ake' zjallia ko'll kabay ake.

¹⁷Kin' gok bre'da'ora' kabay ka', na' be'nn ka' zjallia ko'll akba'n, nak ake' to de ya da nkwa'ch lcho' ake', na' ya na' nla'n ka klor ke yi', na' da sul, na' da gache. Na' yichi kabay ka', nak aken ka yichi bell yi'xe, na' lo lloa' akba'n, ll-llachen yi' ren llén, na' ren dan' nzi'i azufre da lla'Inninne. ¹⁸Ye ra'tze ke gok achje be'nn lla'a yellrion' wasa'te kone yi', na' ren llén, na' ren azufre dan' bllach lo lloa' kabay ka'. ¹⁹Na' benrén lloa' akba' na' llin, na' ren xhban akba' nench bet akba' be'nnach, xhban akba'n goken ka bel znia, zote yichj akba' nench bdi'nnen be'nne.

²⁰Na' be'nn ka' baga'nn bi goten', ni ke bayat akzre', ni ke bsan akze' dan' lloe'rao ake' daxi'o ka', na' lwa'a ke ake' ka', da nake de ya cha'o dan' nzi'i oro, de ya cha'o dan' nzi'i plat, de yan' nzi'i bronce, de yej, na' de yay, la'kze bi llre'e lwa'a ka', na' bi nne aken, na' bi llak sa'a aken. ²¹Ni ka' bi bayat akzre' yel kan' llon ke ake'n, ka dan' llot ake' be'nne, na' da llonrén ake' txhen be'nn walla'a ake, na' ren da llonrén xpe'r ake' yel zdo', ni dan' llban ake' da de ke be'nne.

Angl be'nnen' no'x yich da'on ndoben'

10 Na' bre'ra' ye to angl be'nn nak war betje' yebán', na' nechje bej, na' zo to bchit yichje'n, na' lloa'rawe'n naken llaktit ka llak will, na' nie' ka' naken ka bdop da lla'lnninne. ²Na' no'xe' to yich da'o

da ba bse'se'. Na' le bzoate chla' nie' cha'wen' lo nisda'on, na' dan' ye chla' rbese na', bzoe'n rao yellrio. ³Na'll besie' zillj kwis, ka llosia' ban' nzi'i bell yi'xe. Na' ka besie' na', bnne yi' wzi'o gall ras, na' toto yi' wzi'o ka' benen ke ga bnne ake'. ⁴Bayoll gok ka', gokra'lla' wzoja' di'll ka' benra' chak bnne yi' wzi'o ka', kat benra' bne to be'nne zo yebán' nada':

—Bi wzojo' di'llen' benro' chak bnne wzi'o ka', bkwa'chen lo ra'llda'o.

⁵Na'll le bliste na'a anglen' yebáre, be'nnen' nzoa chla' nie' cha'we lo nisda'on, na' ye chla'n rao yellrio. ⁶Na'll bne'e, da li wak kan' bne Dios be'nnen' zo ke chnare, be'nnen' ben yebá, na' yeolol da llia le' yebá na', na' bene' yellrio, na' yeolol da zjani't rawe na', bene' nisda'o, na' yeolol ba lla'a lo nisda'o, na' da zjani't loe na'. Na' bne'e:

—Bill llere Diosen' gone' bi da ka' lle'nre' gone' na'. ⁷Kate llin lla wkwell angl wgallen' trompet ke'en, kana'llen' gak dan' ba bne Diosen' gak, kan' ba golle' be'nn ka' be'e xti'lle'n, dan' nono bnneze kana'.

⁸Na'll da yobre bnne be'nnen' zo yebán' nada', bne'e:

—Byej jaxhi'i yich da'on no'x angl be'nnen' zellá na', be'nnen' nzoa chla' nie'n rao nisda'on, na' ye chla'n rao yellrio.

⁹Na'll bya'a gan' ze anglen' jannaba' yichen'. Na'll goll anglen' nada':

—Be'xen bdaon. Na' lo lloa'o na', gakro'n xhix ka blli'nda'o ke beser, na' lo le'o na', yeyaken zla'.

¹⁰Na'll be'xa' yichen' no'x anglen' bdawa'n. Na' lo lloa' na', gokra'n

xhix ka blli'nda'o ke beser, bixha ka bllinen lo lia' na', bayaken zla'. ¹¹Na'll goll anglen' nada':

—Llaya'l we'o xti'll Diosen' da yobre, na' chixjwe'ro' kan' gak ke zan yell da'o ka', na' ke yell xhen ka', na' ke be'nn nne wde wdere di'll da de yellrio ni, na' ke zan be'nn wnebia' ak.

Chop be'nn be'e di'll li ke Diosen'

Na'll benn anglen' nada' to xhis yia da nak ka da llonrén ake' llin ga ll-llix ake' yo, na'll lle'e nada':

—Byej jallixe yoda'o braon', na' bkoy gan' llzey ake' bi da lloe'rao ake' Dios, na' wrabo' bale be'nn zjalla'a nxenra'll Le'e. ²Zan bi wllixo' lia're, le ba naken rallna'a be'nn bi nak be'nn Israel, be'nn bi nxenra'll Dios, leake'n yeso'n ake' ka lle'n akre' rao yell ke Diosen', rao chopayon (42) be'o. ³Na' wse'la' chop be'nne we'e xti'lla'n, na' gak ake' ra'll gasj, ka be'nn zo yel wan, na' chixjwe' akre' xti'lla'n rao to mir chop gayoa wyon (1,260) lla.

⁴Be'nn ka' chopen' nak ake' ka yay olivos ka' chope na', na' ka chop kandler ka' zjazó rao Dios, be'nnen' nake xan yellrio. ⁵Na' cha' no lle'ne bi gonre leake', le llojte yi' lo lloa' ake', na' wzeyen be'nn ka' lle'ne bi gone leake'. ⁶Be'nn ka' we'e xti'lla'n, wak gon ake' bi gak yejw chak chixjwe' akre' xti'lla'n, na' wakte gon ake' yeyak nisen' llen batteze lle'n akre', gon ake' gak bi da yellayrao be'nn lla'a yellrio. ⁷Na' kat yeyoll we'e ake' xti'lla' na', na'll lloj to bell xi'o lo gabil gan' nake lo yell zitj, go'xba' leake',

tilrenba' leake', gotteba' leake'. 8Na' kwerp ke ake' ka', wni't ake'n lao va'a ke vell brao gan' baso't ake' Xanllo Jesucriston'. Yellen' naken ka Sodoma ren Egipto. ⁹Na' chonn lla choa will be'nn za'k zan yell da'o, na' zan yell xhen, na' be'nn nak wde wdere dialla, na' be'nn ka' llak wde wdere di'll da de yellrio ni, wia ake' be'nn wat ka', na' bi we'e ake' latj ga'ch ake'. 10 Be'nn ka' zjalla'a yellrio ni, yewé akre' dan' wasa't be'nn ka' chope, na'll we'e lwelli ake' bi da we'e lwelli ake', le yewé akre' dan' bill ni't be'nn ka' llak akre' llsa'kzi' leake' dan' lloe'rén ake' leake' xti'll Diosen', le llakbe'v akre' leake'n. 11 Na' bde chonn lla choa will na', bre'da'ora' basbán Diosen' be'nn ka' chopen', bazellá ake' da yobre, na' yeolol be'nn ka' bre'e leake'n, blleb ake'. ¹²Na' llopte be'nn ka' ben akre' goll Diosen' leake' zillje:

-Ledá, lewayep nile.

Na' bre'e be'nn ka' llwie leake'n, bayep ake' lo bejen', zjayake' yebán'. ¹³Na' ka bayep ake' le' yebá na'n, le bxho'te, na' blleyi' ra't yellen', gall mir be'nn wasa't kan' bxho' na'. Na' be'nn ka' baga'nnen' blleb ake' kwis, na'll balwill ake' Diosen' kwis, be'nnen' zo yebán'.

¹⁴Ba bde yel zi' wllopen', na' za za'a da wyonnen'.

Ka gok kan' bkwell angl gallen' trompet ke'en

¹⁵Na' bkwell trompet ke angl be'nn gallen', na' benra' bal be'nn ka' zjalla'a yebán', bnne ake' zillje, bne ake':

Doxhen yel llnebia' ke yellrion',

ba naken rao na'a Xanllo Diosen',

ren Cristo be'nnen' breje' llnebia' ke chnare.

¹⁶Na' be'nn tapalloa ka' (24) zjalli' kwit Diosen', le go't akte' slloa're rao yon', lloe'xhen ake' Diosen', ¹⁷bne ake':

Llonto' yel llioxken ko'o Xa Dios, rwe' nako' be'nn yel wak xhen. Ba zo'o ka bi nna xe yellrio, na' ba bzorao llnebia'o ren yel wak xhen ko'o, nench gak kan' llazra'llo' na'.

¹⁸ Be'nn yell ka' lla'a yellrio ni, goklla'a ake' rwe'.

Na' ba bllin lla wsa'kzi' akoe'. Ba bllin lla gono' yel koxchis ke yeolol be'nn ka' ba wasa'te.

Na' gono' nench nni't be'nn ka' nbaraz, be'nn ka' llon xchino'n,

ren yeolol be'nn ka' brejo' nak be'nn bxenra'll rwe'.

Yeololte be'nn bxenra'll rwe' nni't ake' wen, no be'nn gore no xkwi'de.

Leska' ba bllin lla kweyi' be'nn ka' blleyi' da de rao yellrio.

19 Na'll byarj yoda'o braon' zo yebá gan' lloe'rao ake' Diosen', na' bre'ra' kaj la'y gan' blla'cha'o ake' xti'lle'n, dan' goll Diosen' be'nn Israel ka' gon ake' nench gakrene' leake'. Na' bre'ra'n byep yes, gok llakia gochj, na' bxho' na' blle' yej se'de.

No'ren' ren bel ba zo galle yichj

Bre'da'ora' to da yebánello le' yebán', bre'ra' to no're nechje' willen', na' naken ka xhe'e. Na' nreje' lo be'on, na' nzoe' to

corona da llia chllinn (12) berj. ²Na' no'r na' noe' bda'o, na' llosie', llake' bes ke yel san. 3Na' bre'ra' ye to da nak zi yebánello le' yebán', bre'ra' to bel xi'o ba zo galle yichj to ba xhen kwis nakba'. Nakba' ba xhna, na' llia chi lozba', na' toto yichjba'n xhoan twej corona. ⁴Na' kone xhbanba' na', blle'lle'oba' ra't berj da ka' llia yebán', na' bza'lba'n rao yellrion'. Na'll le brezteba' xhnie' no'ren', ba rez so bda'o ke'e na', nench gaoba' bda'o ke'en kate ra'be'n. ⁵Kat le bxhante no'ren' to bida'o byio, bi nnebia' yeolol yell ka', na' gonbe' wzenay ake' kebe'. Na' le bazi'te Diosen' lebe' gan' llie' llnebie' na'. ⁶Na'll baxhonnie no'ren' belen', bayeje' to latj dach ga bencha'o Diosen' ke'e, ga we'e ake' da ye'j gawe' rao to mir chop gayoa wyon (1,260) lla.

⁷Bde na' gok to wdile yebán', le angl brao re Miguel ren angl ka' llakrén le'e, bdilrén ake' bel xi'o ban' llia galle yichjen', ren angl ke belen', be'nn ka' bayak daxi'o. ⁸Na' belen' ren daxi'o ka' bi bzoe akre'n angl be'nnen' nake be'nn ke Diosen', na' billbi latj go't ke belen' yebán'. ⁹Na' angl ke Diosen' bza'l ake bel xi'on rao yellrio, ban' nak xan daxi'o ka', ban' zo kana'te nakba' ba wxhiye'e, na' leba'n Satanás, na' nna zokzba' nna', ziye'ba' be'nne. ¹⁰Na'll benra' bnne to be'nn zo yebán' zillj kwis ne'e:

—Ba bllin lla yesrá Dios kellon' be'nn ka' llonlira'll Le'en, ba bllin lla llakbe'llo nap Diosen' yel wak xhen, ba bllin lla llnebie' nench gak kon da llaya'l gak. Ba bllin lla Cristo be'nnen' breje' nnebia'n, ba llnebia'rene' Le'e. Gak da llaya'l gak, le daxi'o dan' ba bzo rao Diosen' do lla do yer, blliayi'llen be'nn llonlira'll Criston', ba babej ake'n ko'llre. 11 Be'nn ka' benlira'll Criston' ben ake' gan, le bzoe akre' gopra'll ake', kan' be'e ake' di'll dan' byejle' ake' ke Jesucriston', na' byejle' ake' dan' brarj xchene', ni ke lli'o goke' ka xhi'r da'o, na' bi blleb ake' cha' biteze gok ke ake', na' bzo ake' xhnid la'kze gat ake'. ¹²Ke len na' llaya'l yewé be'nn lla'a yebá, llaya'l gosia're yel llawé, zan re' lla'a yellrion' nya'chraz gak keré, ren re' lla'a nisda'o, le ba betj daxi'on gan' zore, na' llaklla'n le ye chollzen' de latj ke.

¹³Na'll ka gokbe'e bel xi'on bza'l akeba' rao yellrion', gokra'llba' wrayba' no'ren' bxhan bida'o byion'. ¹⁴Bixha be'e Diosen' chop xir no'ren' da xhen, ka xir bsia nench byeje' latj dach ga bill gok chej belen', lati gan' bencha'we' ke'e gan' we'e da ye'j gawe' chonn iz ye achje. 15 Na' blloj nis xhen lo lloa' belen' goken to yeo xhen, bllinen gan' zo no'ren', na' wa'chachen le'e. ¹⁶Bixha Diosen' bene' byarje rao yellrion', gokrenen no'ren' we'n nisen' blloj lo lloa' belen'. 17 Na'll goklla'a belen' no'ren', na' byejba' jatilrenba' yezikre xhi'nn xhosoe' ka', dan' llzoa ake' xti'll Diosen'. llon ake' kon kan' bllia Diosen' bia'a, na' zo ake' nxenra'll ake' xti'll Jesucriston!

Chop bell xi'o ba bre'e Juan na'

Na' bzia' lloa' nisda'on, na' bre'ra' blloj to bell xi'o lo nisda'on. Zo galle yichjba', na' llia

461 Apocalipsis 13

chi lozba', na' toto lozba' nzoan twej corona. Na' toto yichjba'n nvojen raba' da lltitje Dios. ²Bellen' nakba' ka ba znia ban' nzi'i leopardo, na' nia'na'ba'n naken ka nia'na'a ban' nzi'i oso, na' lloa'ba'n naken ka lloa' bell vi'xe. Na' bel xi'o ban' zo gall yichj, be'ba' bellen' yel wak, na' yel llnebia' keba'n nench bnebia'ba'. ³Na' bre'ra' to yichj bellen' naken we'e, naken ka da gatrenba', na' bayakba'. Na' yeolol be'nne babán akre' dan' bayakba' na', na' benrén akeba' txhen. 4Yeololze be'nn be'rao ake' belen' dan' be'ba' yel llnebia' ke bell xi'on, na' leska' be'rao ake' bell xi'on, bne ake:

—Nono llra' be'nn nape yel llnebia' xhen ka bell ni, na' nono soe tilrén leba'.

⁵Na' be'e ake' latje ke bellen' benxhen kwinba', na' bnneba' zban ke Diosen'. Na' gok rallna'ba' nnebia'ba' chopayon (42) be'o. ⁶Na'll bnneba' zban ke Diosen'. na' ke latj le' yebán' gan' zoe' na', na' ren ke yezikre be'nne zjalla'a yebá na'. ⁷Na' go't latj ke bell xi'on bdilrenba' be'nn ka' nak rallna'a Dios, na' bi bzoe akereba'. Na' be'e lati bnebia'ba' yeolol yell xhen, yeolol yell da'o, yeolol dialla be'nn, na' yeolol be'nn llak wde wdere di'll da de yellrio ni. ⁸Na' yeolol be'nn zjalla'a rao yellrio, be'nn bi nyoj ra ake' le' yich ke be'nn ka' ga't yel nban ke ake', bxenra'll ake' bellen', le ka bxhe yellriote bzoj be'nnen' nak ka xhi'r dao, ra yeolol be'nn nnezre' ga't yel nban zejlikane ke ake' le' yich ke'en, le'e nake' xhi'r da'on baso't ake'.

9 Cha' no zo nay, lewzenay dan' nia' ni. 10 Be'nnen' ba naken go'x ake' wsej ake' le'e, go'x akse' le'e na' cheyje'. Na' be'nnen' ba naken gate' kone spad, kone spad na' gate'. Ke len na' llaya'l sechoch lli'o ba brej Diosen' nak rao ne'e, gapra'll-llo bi da llak kello, na' seteze sello wxenra'll-lloe'.

¹¹Bde na' bre'ra' ye to bell xi'on ba blloj lo yo. Na' zo chop lozba' da nak ka loz xhi're, na' bnneba' kan' bnne bel xi'o ban' zo gall yichi na'. ¹²Na' bell xi'o nellen' benba' nench nnebia' bell xi'o wllopen' ka leba', na' bell xi'o wllopen' benba' nench yeolol be'nn lla'a yellrio, wxenra'll ake' bell xi'o nellen' ban' bayak we'e keba' dan' nak zi gatrenba'. ¹³Na' bell xi'o wllope na', benba' da zan da babane be'nne kone yel wak keba' na', na' benba' nench ra'll yi' le' yebán', yexjen rao yellrio, re'e be'nne. ¹⁴Na' benba' da ka' gan' zo bell xi'o nellen', bxhiye'ba' be'nn lla'a yellrio nench ben akeba' txhen. Na' gollba' be'nn ka', ben ake' to lwa'ba' da nak ka bell nell na', bell ban' gok yichiba' we'e kone spad, dan' nak zi got leba', na' bayakba'. 15 Na' gok rallna'a bell wllopen' gonba' nne lwa'a lsa'kba'n, na' gokte bnnen, na' blliaba' bia'a baso'te be'nne bi wxenra'll len. ¹⁶Na' bell xi'o wllopen' leska' benba' bien bzo yeolol be'nne sen ke bellen', na'a ake' cha'we o cha' roxhga ake', no be'nn gore no bida'o ak, na' be'nn wnia', be'nn ya'che, no be'nn nak be'nn wen llin ke be'nne, na' be'nn bi nak be'nn wen llin ke be'nne. ¹⁷Na' be'nn bi soe' sen ke bellen' o raba' o ka to

nbab raba' na', bibi gok bi sie' bi da sie', na' bibi gok go'te. ¹⁸ Yálljello yel si'n na', nench chejnie'llo da ki. Be'nne chejnie're wak wie' ka to nbab raba'n, le to ka'tzen' nbab ra to be'nnach, na' naken xop gayoa wyon xope (666).

Dan' bel be'nn to gayoa tapayon mir ka'

Ka bwia' na' bre'ra' be'nnen' nak ka xhi'r da'on, zelle'e rao ya' dan' nzi'i Sión, na' ren to gayoa tapayon mir (144,000) be'nn yobre. Nyoj roxhga ake'n ra xhi'r da'on ren ra Xe'e. ²Na' benra' llak llakia yebán', ka ga de yeo xhen, na' ka nen kat llachj yi'wzi'o, na' ka ga lla'a be'nn zan, llsill ake' dan' ne arpa to chi'ze. 3Na' bel ake' to da kobe rao Diosen', na' rao be'nn tap ka' zjallia xir na', na' rao be'nn brao tapalloa ka' (24) gan' llia Dios na'. Nollre no be'nne gok gol len, zerao be'nn to gayoa tapayon mir ka'ze, gok bsed ake' dan' bel ake'n, leake'n basrá Criston' chak nna ni't ake' yellrio. 4Be'nn ka' bel ake'n nak ake be'nn bi jatil no're, bdapchi'i kwin ake' nench gok ake' yall rao Diosen'. Nao akteze' xhi'r da'on gateze zeje', na' basre'e leake' nench nak ake' be'nn ke'e, na' be'nn ke Dios. Na'llen' nak ake' ka to da llarap ake' da nelle, da be'e ake' Diosen' ren xhi'r da'on. ⁵Gaga be'e ake' di'll wenra'lle, na'llen' bibi do'l de ke ake! rao Dios.

Da bdixjwe' chonn angl ka'

⁶Na'll bre'ra' ye to angl le' yebán' de'e rao lla. Na' bdixjwe're' Di'll Wen ke Diosen' da bi te ke rao be'nn zjalla'a yellrio, ren be'nn wde wdere yell xhen, na' wde wdere yell da'o, na' wde wdere dialla ke be'nnach, na' be'nn llak wde wdere di'll da de yellrio. ⁷Bnne'e zillje, lle'e leake':

—Lelleb Diosen', na' lewe'xhene', le ba bllin lla gone' yel koxchis ke be'nnach. Lewxenra'll Dios be'nnen' ben yebán', na' yellrio, na' nisda'o, na' do ga llar nis.

⁸Ye to angl za'a ko'llre, bne'e:

—Ba bllin lla kweyi' yellen' nzi'i
Babilonia dan' nak da brao. Ba bllin
lla kweyi' yell ke be'nn ka' bkwas
ake' ka'le ke Diosen', na' bpe akre',
na' bko'yel akre' yeolol be'nne bnao
ake llon ake' kan' llon leake' na', na'

ake llon ake' kan' llon leake' na', n nnello gok ake' ka be'nn bzollre', le benrén ake' le'e txhen rao da xhinnj ke'en.

⁹Na'll ye to angl zej ko'lltere be'nn wyonne, na' bnne'e zillje, na' bne'e:

—Cha' no be'nne wxenra'lle bell xi'on ren lwa'a keba' na', na' we'e ake' latje so ake' sen ke bell xi'on roxhga ake' o na'a ake', 10 Diosen' ba bllie' bia'a sa'kzi' ake' gan' lla'lnninn dan' nzi'i azufre rao be'nn ka' nak angl ke Dios, na' rao be'nnen' nak ka xhi'r da'o na'. ¹¹Ke chnare chas llén ke yi' gan' sa'kzi' be'nn ka' nxenra'll bell xi'on ren lwa'a keba' na', na' be'nne zjazó sen keba'n roxhga ake' o na'a ake'n, bi yezi'ra'll ake' ke yel llza'kzi'n do lla do yere. ¹²Ke len na' llaya'l gakxhenra'll-llo, lli'o nakllo rallna'a Diosen', na' llzoallo di'll dan' nllie' bia'a gonllo na', na' bi llbej yichillo dan' nxenra'll-llo Jesúsen'.

¹³Na'll benra' to be'nn zo yebán' na' bne'e:

—Bzoj da ni: "Nbaraz ke be'nn ka' nxenra'll Xanllon' llinte lla gat ake'." Na' Spíritu ke Diosen' nen:

—Da li kwisen' nni't ake' nbaraz, le yezi'ra'll ake' rao xchin ake', na' xchin ake' da ka' ben ake' na', len wroe'n yeolol da wen da ba ben ake'.

Yetop Diosen' be'nne bi llzoa xti'lle' sa'kzi' ake'

¹⁴Na'll bwia' da yobre, na' bre'ra' to bej lliche le' yebán', na' ko'll bej na' llia to be'nne nake ka Be'nnen' Gorj Radj Be'nnach. Na' nzoe' to corona de ya cha'o dan' nzi'i oro, na' no'xe' to ya da látit lloe' dan' nzi'i hoz. ¹⁵Na' blloj ye to angl loe gan' lloe'rao ake' Diosen' yebá na', na' bnne'e zillje, llalwille' be'nnen' llia ko'll bejen':

—Bxhi'i ya da látit ko'on, na' barap, le ba bllin lla yetopo' dan' bllia rao yellrion', le ba byechen.

¹⁶Na' be'nnen' llia ko'll bejen', le be'xte' ya dan' látit rawen', na' batope' dan' bllia rao yellrion'.

17 Na'll blloj ye to angl loe gan' lloe'rao ake' Diosen' yebán', na' leska' no'xe' ye to da látit rawe.

18 Na'll blloj ye toe' be'nn yo' rallne'e yi' da lla'le kwit bkoy gan' lloe'rao ake' Diosen'. Na' angl na' bnne'e zillje, na' balwille' be'nnen' no'x ya da látiten', na' lle'e le'e:

—Ba we uvas dan' llia rao yellrion'. Bachoyen kone ya ko'o dan' nlátit na', nench yetopllon.

¹⁹Na'll bachoy anglen' uvas dan' llia rao yellrion' kone ya dan' látit ke'e na', dan' no'xe' na', na'll batope'n bza'le'n to lo da nak ka cha' xhen ga llsi ake'n lloj xise. Zeje di'll Dios na', batope' be'nn ka' bi bzoa xti'lle'n, na' broe' leake' ga sa'kzi' ake' yellayrao ake'. ²⁰Na' gan' bxha'kzi' ake'n naken lloa' yell, na' lo dan' nak ka cha' xhen gan' blle'e uvas ka', brarj llen xhen dan' nak xchen ake' na', na' bllinen ka to sibe lloa' kabay, na' bllirjen chonn gayoa mir (300,000) metr.

Angl ka' yo' rao na'a ake' galle yel zi' da zerao gak

Na' bre'ra' le' yebán' to da yel wan xhen da nak zi yebánello. Bre'ra' galle angl be'nne gon ake' gall yel zi', nench yeyoll wroe' Diosen' ka gone' dan' llaklle'e be'nn ka' llon da xhinnjen'. ²Leska' bre'ra' to da nllirj da nak ka yej kes, na' nla'n ka ga de nis xhen, na' nchixen yi'. Lloa' nisda'o na', zjazellá be'nn ka' bzoe bi bxenra'll ake' bell xi'on, na' lwa'a dan' nak ka leba', na' bi be'e ake' latje wzoaba' leake' sen keba'n, na' ka to nbab raba' na'. Na' zjano'x ake' tweje dan' ne arpa da be'e Diosen' leake'. ³Na' lloe'xhen ake' Dios llol ake' to da bsede da Moisésen' be'nn Israel ka', be'nnen' ben xchin Dios kana'. Leska' llol ake' to da naken da bsede xhi'r da'o leake', nen:

Xa, Dios, yeolol dan' beno' ren yel wak xhen ko'o na', naken da wen kwis, na' da nak zi yebánello.

Yeolol dan' llono'n zejen lixheje, na' naken da za'ke.

Rwe'n llnebia'o yeolol yell ka'.

Nono llra' be'nn bi llaya'l llebe rwe', Xanto'.

Nono zo be'nn bi llaya'l wxenra'll rwe'.

Toze rwe' nako' be'nn nak la'y. Na' be'nn lla'a yeolol yell, yed ake' rao'n wxenra'll ake' rwe',

le ba bre'e akre' dan' ba beno', na' ba nnez akre' zejkzen lixheje.

⁵Bde benra' da na', na'll bwia', na' bre'ra' byarj yebán' gan' lloe'rao ake' Diosen', lati la'y zeje di'll Dios na'n ze ganna'. ⁶Na' bre'ra' gall angl ka', blloj ake' gan' lloe'rao ake' Diosen' yebá na', zjano'x ake' da gon ake' galle yel zi' yellrio ni. Angl ka' nak ake' ra'll lliche xhi're, ra'll cha'o ga zeraoze, na' yeolole' ngo' lloa' lcho' ake' twej baydon da nak de ya cha'o dan' nzi'i oro. ⁷Na' bre'ra' be'nn tap ka' zjallia xiren', ni't ake' rao Diosen', na' toe' be'e angl gall ka' twej leo da'o de ya cha'o dan' nzi'i oro, da zjayoll balla'te da llon yel zi' rao yellrion', na' zejen da llon Dios be'nnen' zo ke chnare ke be'nn ka' bi llzenay ke'e. ⁸Na' doxhen gan' lla'a ake' yebán', lloe'rao ake' Diosen' blle' ka llén xhen ni ke yel nbaraz ke Diosen', da nsa'a yel wak xhen ke'e na', na' nono gok cho' gan' lloe'rao ake' Le'en, le bi nna yeyoll gak yel zi' ka' gallen' dan' nsa'a angl gall ka!.

Leo gall ka' na' yel zi' ka' gok yellrion'

Benra' bnne to be'nn zillj kwis, zoe' gan' nak latj la'yen', lle'e angl gall ka':

—Lelljak lelljararje dan' yoll lo leo kerén' rao yellrion', na' gona' sa'kzi' ake'.

²Na'll byej angl nellen', jararje' dan' yoll lo leo ke'en rao yellrio, na' yeolol be'nn ka' zjazó sen ke bell xi'on, na' nxenra'll ake' lwa'a dan' nak ka leba', bllia ake' we'e xhen we'e zban, na'll bra ake' kwis.

³Na'll jararje angl wllopen' dan' yoll lo leo ke'en lo nisda'on, na' bayak nisda'on llen ka llen ke be'nn wat, na' wasa't yeolol ba lla'a lo nisda'on.

⁴Na'll jararje angl wyonnen' dan' yoll lo leo ke'en lo yeo ka', na' yeolol ga llar nis, na' leska' bayaken llen. ⁵Na'll benra' bnne angl be'nnen' llap nis dan' de rao yellrion', lle'e Diosen':

—Rwe'n nako' Dios be'nn nak lixheje, ba zokzo' ka za xe yellriote, yel be'nn li ko'o ba nchoybia'o da ka' llak ni. ⁶Le be'nn lla'a yellrio ni, ba baso'te' be'nn ka' be'e xti'llo'n, na' ba baso'te' nollre be'nn bxenra'll rwe'. Na'llen' ba beno' ye'j ake' llen ni, dan' brarj ake' xchen be'nn ka'. Na' ka' llaya'lkze gak ke ake'n kan' llak ke ake' nna'.

⁷Na'll benra' bnne to be'nne lloa' bkoyen', bne'e:

—Xa Dios, rwe'n napo' le zerawe yel wak xhen, llono' dan' llaya'l gono', na' llono' da zej lixheje kat bi da llchoybia'o ke be'nne.

⁸Na'll jararje angl wdapen' dan' yoll lo leo ke'en rao willen', na' bzey willen' be'nnach ka'. ⁹Na' be'nn ka' byey ake', na' bi bayat akre' ni ke bayoe'xhen akze' Dios, yezikre blliayi'll ake' Diosen', be'nnen' be'e latje llak da ki.

10 Na'll jararje angl wga'yen' dan' yoll lo leo ke'en gan' lli' bell xi'on llnebia'ba'n, na' doxhente bayak xchol gan' llnebia'ba'n, be'nnach ka' to llyi'nn roll ake' katken' llallayrao

ake'n. ¹¹Na' bi bsan akse' bill gon ake' da xhinnjen', blliayi'll aklle' Diosen' be'nnen' llia yebá na', la'kze llallayrao ake'.

¹²Na'll jararje dan' yoll lo leo ke angl wxhopen' lo yeo xhen dan' nzi'i Eufrates, na' bayo'j yeon' nench byarj to nez ga te be'nn wnebia' ka' za'k do gan' llra' willre.

13 Na' bre'ra' chonn daxi'o da nak ak ka loll bcheko. Ton bllojen lo lloa' bel xi'on zo gall yichj na', ye ton bllojen lo lloa' bell xi'o na', na' ye ton blloj lo lloa' be'nnen' lloe' di'll wenra'll na', nench nxenra'll ake' bell xi'o na'. 14 Na' daxi'o ki ben aken yel wak da babane be'nne, na' jatop aken yeolol be'nn wnebia' ka' zjalla'a do gateze yellrio ni, nench tilrén ake' Dios be'nnen' nap le zerawe yel wak xhen kat llin lla.

—Ba rez yeda' da yobre, ka llin to be'nn wan llillize. Nbaraz ke be'nn ka' zjani't bez ake' nada' kat yeda', llon ake' ka be'nn llap xhara'n, nench ke ta ake' gal yid ake', na' re'e be'nn ka' yel zdo' ke ake'n.

¹⁶Na'll daxi'o ka' batop ake' be'nn ka' nak wnebia' lla'a yellrio ni, to latj gan' nzi'i Armagedón di'll Hebreo.

¹⁷Na'll jararj angl wgallen' dan' yoll lo leo ke'en rao lla, na'll benra' bnne Diosen' latj la'yen' zillje, gan' zoe' lloe'rao ake' Le'e yebá gan' llie' na', bne'e:

-Ba gok da llaya'l gak.

¹⁸Na' byep yes, gok llakia, na' gochj, na' bxho'. Bxho'lle da xhenll ka to llxho'kze chak ba blla'a be'nn yellrio ni. ¹⁹Na' yell dan' nakll da brao yellrion' goken

chonnre, leska' blleyi' yezikre yell da zjalli' rao yellrio ni. Diosen' jadinra'lle' yell Babilonian', na' ka da xhinnj ka' baso'ne' nench na' wsa'kzie' leake'. ²⁰Na' ka da xhen na' bxho'n, barante yeolol yellrio dan' zjalli' lo nisda'on, na' yeolol ya' ak. ²¹Na' blle' yej se'd yele rao yellrion', da nak ka do tap rrob wej btekon be'nne. Na'll blliayi'll be'nn ka' Diosen' ke dan' ballayrao ake'n, ke nak yej se'd xhen ka' bsa'kzi' leake'n.

Diosen' be'e yel llsa'kzi' ke yell xhen na' nak ka no'r re'e

17 Na'll bed to angl gall ka' no'x ake' leo de ya cha'o, na' lle'e nada':

—Da ke, wroe'ra' rwe' kan' gon Diosen' sa'kzi' no'r bra'on lli' lo nisda'o ka', no'ren' nak no'r re'e. ²Yeolol be'nn wnebia' lla'a yellrio, ba bawé akre' bzenay ake' ke'e, na' nnello nak ake' ka xtoe', na' leska' yeolol be'nn lla'a yellrio, bawerén akre' le'e, na' gok ake' ka be'nn bzollre', le benrén ake' le'e txhen rao da xhinnj ke'en.

³Na' chak ben Spíritu ke Diosen' bre'da'ora' da ki, bche'e anglen' nada' to latj dache. Ka bllina' na', bre'ra' to no're llie' ko'll bell xhna ban' llia gall yichj na', na' llia chi lozba', na' doxhen kwerp keba'n nyojen di'll da dilrén Dios. ⁴No'ren' nake' to ra'll dan' nchix da morad na' da xhna, na' none' nbaraz kone ya cha'o dan' nzi'i oro, ren yej cha'o, ren yej dan' nzi'i perlas. Na' no'xe' to leo de ya cha'o dan' nzi'i oro, balla'te yollen to da zejen llawere' llone' da nen ke xpe're', na' billre

da llwie Dios. ⁵Na' roxhgue'e na', nyojen di'll da nen akre nake', di'll da bi byejnie' be'nnach, nen: "Naka' yell Babilonia, na' naka' be'nn brao. Naka' xhna' no'r re'e ake, na' xhna' da zban da de rao yellrion'." ⁶Na' bre'ra' zolle no'ren', bawe'je' xchen be'nn ka' nake be'nn ke Dios, be'nn ka' be'e di'll nxenra'll ake' Jesúsen'. Na' ka bre'ra' no'ren', na'll babanra'. ⁷Na'll goll anglen' nada':

—¿Bixchen llabanro!? Wzeinie'kzera' rwe' bi zeien dan' bre'ro' no'ren' llia ko'll bell xi'on zo gall yichj, na' llia chi lozba'. ⁸Bellen' bre'ro'n bzoba' bnebia'ba' choll, zan bill nnebia'ba' nna', yellojba' lo yell zitjen' dan' nak lo gabil gan' yo'ba'n. Te na' yeyo'ba' sa'kzi'ba' ke chnare. Ka bxhe yellriote bzoj Diosen' ra be'nn ka' nap yel nban zejlikane le' yich ke'e na'. Na' be'nn ka' bi nvoi ra ake' le' yich ke'e na', yebán akre' kat re'e akre' vebán bell xi'on, ban' bzo batna', na' nna' bi zoba', na' soba' da yobre. 9 Yálljello yel si'n na', nench chejnie'llo da ni. Da gall yichj bellen' naken gall va' gan' lli' no'ren'. 10 Na' leska' zejen gall be'nne wnebia'. Ga'ye' ba bzo ake' bnebia' ake', na' ba bnit yel llnebia' ke ake'n. Toe' llnebia' nna', na' be'nnen' ye to bi nna re'lloe'. za yede' yednnebie', na' kat yede'n chollze yednnebie'. 11 Na' bell ban' bzo kana', na' bill zoba' nna', zejen ye to be'nn wnebia', be'nn xo'ne. Nake' to be'nn ka' galle bnebia' ake', na' nnebie' da yobre, na' Diosen' gone' kweyie', na' sa'kzie' ke chnare.

¹²'Na' chi lozba' ka' bre'ro'n, zejen chi be'nn wnebia' ka' be'nn za za'ke nench nnebia' ake'. Na' nnebia'rén ake' bellen' txhen chollze. ¹³Na' yeololte be'nn chi ka', toz ka gon ake', ko' ake' rao na'a bellen' yel llnebia' ke ake'n, na' billre da llak llon ake'. ¹⁴Na' tilrén ake' be'nnen' nak ka xhi'r da'on, na' be'nnen' nak ka xhi'r da'on gone' gan rao wdilen', le Le'en nake' Xanllo, be'nn llnebia' rao yezikre be'nn wnebia', na' nake' Rey, be'nn llnebia' rao yeololte rey. Na' be'nn ka' non le'e txhen na', nak ake' be'nn ba brej Diosen', be'nn ka' nxenra'll akya'nne' Le'e biteze da gak.

¹⁵Na'll goll anglen' nada':

-Nisda'o ka' bre'ro' gan' lli' no're re'e na', zejen be'nn zan kwis, be'nn yell, na' zan yell xhen ake, na' be'nn llak wde wdere di'll de vellrio. ¹⁶Na' be'nn ka' nak ka chi loz bell xi'o, wie akre' no'ren', na' wsanra'll ake' le'e yekwa'nn akte' gal yidze, te yeyoll na', gao ake' xpe're'n, na' wzeyrén akte'n lo yi'. ¹⁷Le Dios na'n we'e latj gak ake' toze, gon ake' veolol da ka' nne bell xi'o na', na' gon ake' yel llnebia' ke ake'n rao na'a bellen', nench na' gak yeolol da ka' ba bne Diosen'. ¹⁸Na' no'ren' bre'ro'n nake' vell brao kwis da llnebia' be'nn wnebia' ka' zjalla'a doxhen yellrio.

Kan' gak kat kweyi' yell Babilonian'

Bde na' bre'ra' betj ye to angl be'nn bza'a yebán' rao yellrion', na' gok rao ne'e yel llnebia' xhen na', nench gok kan' bne'e na', byeni' yellrion' kone beni' ke'en nse'e na'. ²Na' bnne'e zillje, bne'e:

—Ba bllin lla kweyi' Babilonian' yell brao na'. Ba bllin lla yeyaken

467 Apocalipsis 18

xhichna' daxi'o. Ba bllin lla yeyaken ga cha'a ba llia xire ba xi'o ake. ³Kweyi'n, le be'nn ka' lla'a yell Babilonia na'n, le bko'yel akre' be'nn zjalla'a yeolol yell ak, na' gok ake' ka be'nn bzollre', le benrén ake' leake' txhen rao da xhinnj ke ake'. Na' be'nn wnebia' lla'a yellrio ben ake' da llawé xpe'r ake' ren be'nn Babilonia ka', na' be'nn ka' llo't bi da llo't, gok ake' be'nn wnia', le be'nn Babilonia ka' benditje akre' da go't ke ake'.

⁴Na'll benra' ye to be xhnne da za'a yebá, na' bne'e:

—Re' nak xhi'nna', lelloj yell Babilonian' nench bi gonrenre be'nn ka' da xhinni, nench ke sa'kzi'rén akre'. 5Le do'l xhen de ke be'nn Babilonia ka', na' Diosen' lljadinra'lle' yeolol bi da xhinnj ba ben ake'. 6Sa'kzi' akchga no'r re'en, zeje di'll be'nn yell Babilonia, dan' ba bsa'kzi' ake' be'nne. Yellayraochgue' da xhenll ka da ba benre' be'nne. ⁷Lewe'chgue' yel llza'kzi' ke'e, katken' bene' kan' go't da wen da cha'o ke'e, le lo ra'llda'we' na' bne'e: "Kere da te ke yel llnebia' kia' ni, ni ke yega'nnza' ka no'r wazeb, ni ke llojze nis bell rawa'." ⁸Ke len na' toze lla gak dan' llakre' bi tekze ke'e. Be'nn zan gat, na' be'nn zan kwell ake', na' bil ton ake', na' chey ake' lo yi', le Xanllo Diosen' nape' yel wak xhen, wsa'kzie' leake' ke da xhinnjen' ba ben ake'n.

⁹Be'nn wnebia' ka' zjalla'a yellrio, be'nn bnao be'nn Babilonia ka' ben ake' da xhinnj, na' ben ake' ka da nen ke ake', leake'n kwell ake', na' yebán akre' kat re'e akre' chas llén dan' chey yellen'. ¹⁰Na' lljasé ake' zi'tre wia ake' kan' llak ke be'nn Babilonia ka', lleb ake' kwis, na'll nne ake':

—iNya'chraz llak ke yell brao, Babilonian', yell braoll ka yeololte yellen'! Ba bllin lla kweyi'n choll da'oze.

¹¹Na' be'nn we't ka' zjalla'a yellrion' kwell ake', na' yebán akre' kat kweyi' yellen', le nollno llra' si'i dan' go't aken'. 12 Dan' llo't ake'n naken de ya cha'o nzi'i oro, de ya cha'o dan' nzi'i plat, de yej za'ke, na' de yej cha'o dan' nzi'i perla, na' ra'll cha'o de lino, na' de sed, na' ra'll morad, na' ra'll da xhna, na' yeololte da nak de yay la' xhix, na' billre yay za'ke, na' ren da nak de llit da nak nbaraz da nzi'i marfil. na' de ya cha'o dan' nzi'i kobr, na' de ya, na' de yej cha'o dan' nzi'i mármol. 13 Nollno si'i no kner ke ake'n, no ceit xhix, no yare, na' da la' xhix dan' nzi'i mirra, na' ye to da la' xhix dan' nzi'i olíbano, no xis uva, no ceit ke yel wao, no yezje, no trigo, no burr, no blli'n, no xhi're, no kabay, no karret, no be'nne ba nda'o nak be'nn wen llin ke to chi'ze. 14 Na' be'nn we't ka' nne ake' ke yellen':

—Ba bde ke yeolol daxhix ka', na' yeolol da ka' byazra'll be'nn Babilonia ka' si'i ake' kone yel wnia' ke ake'n, kere no si'll da ka' nna'.

¹⁵Na' be'nn we't ka', be'nn ka' be't da bxhi'i be'nn Babilonia ka', se ake' zi'tre lleb ake' kan' llallayrao be'nn ka', na' yebán akre' yesbell ake'. ¹⁶Na'll nne ake' zillje, ne ake':

—iNya'chraz ba gokrize ke yell braon'! Be'nn blla'a yell ni, gok ake' ra'll cha'o ra'll za'ke, no ra'll morad, no ra'll xhna. Wa bzocha'o ake' nbaraz kone ya cha'o ren yej za'ke da llaktit, na' ren yej cha'o nzi'i perla. ¹⁷ Na' nna' choll da'oze blleyi' yeolol da cha'o ke ake'n.

Na' yeololte xan barco ka', na' yeololte be'nn lljak lo barco, ren be'nn llon ak llin lo barco, na' nollre be'nn llon ak llin lo nisda'on, yeolole' se ake' zi'tre. ¹⁸ Na' re'e akre' llas llén, na' lley yellen', na'll nne ake':

—Bi nna kwe' ye to yell yobre ka yell ni doxhen yellrio.

¹⁹Na'll wllia ake' yo bichte yichj ake' yel llabane, na'll kwell ake' nne ake':

—iNya'chraz gokrize ke yell brao ni! Ren yel wnia' ken, le gok ake' be'nn wnia', yeololte no xan barco, yeololte no be'nn llon llin lo nisda'on, na' nna' choll da'oze blleyi' yellen'.

²⁰Na' re' lla're yebán', leyewé, re' bse'l Diosen' gokre postl ke'e, na' re' bse'le' be're xti'lle'n, na' yezikre re' nak be'nn ke'e, leyewé le Dios na' ba bchoyrawe' kweyi' be'nn ka' bsa'kzi' re'.

²¹Na'll ye to anglen' nap yel waken' broe' ye to yej xhen da nak ka yej yich, bza'len lo nisda'on, bne'e:

—Kan' gak ke yell Babilonian', yeranen kan' barán yej xhen ni, bza'la'n lo nisda'o na', kbatlle re'llon da yobre. ²²Kbatlle yénello gol dan' ne arpa yellen', kbatlle wkwell wakwell ka' no bllej no trompet. Kbatlle ller be'nn nsed gone' xchinrazre da gonrene' llin, ni llakia ke be'nn llot bi da llote' lo

yej yich yénello yellen'. ²³Kbatlle re'llo beni' ke dan' llseni'n, na' kbatlle yénello lnni ke be'nn llon yel wachayna'a. Kweyi' be'nn ka' llo't lla'o rao yellen', be'nn ka' nak be'nn brao rao yellrion', le be'nn Babilonia ka' ba bxhiye'e ake' be'nn zjalla'a yeolol yell kone yel walla'a ke ake'n.

²⁴Be'nn Babilonia ka', bet ake' be'nn be'e xti'll Diosen', na' nollre be'nn brej Diosen' gak ake' be'nn ke'e. Na' rao yell na' baroe'rawe bet ake' yezikre be'nne.

Lloe'xhen ake' Dios yebá

19 Bde na' benra' be'nn zan kwis lla'a yebán', lloe'rao ake' Dios, ne ake' zillj:

iGakxhenchga Diosen'! Nake' wasrá kello, na' nake' be'nn za'ke, na' nape' yel wak xhen.

² Le yel koxchis ke'en naken da li. Ba bchoybie' kweyi' yell brao na' dan' nak ka to no'r re'e na',

le na'n zjalla'a be'nn ka' bko'yele be'nn lla'a doxhen yellrio,

nench bi bzoa ake' xti'll Diosen'. Ba bchoybie' kweyi' be'nn Babilonia ka',

llaya'l sa'kzi' ake' dan' bet ake' be'nn ka' bxenra'll Le'e.

³Na'll bne ake' da yobre:

—iGakxhenchga Diosen'! Ke chnare chas llén gan' chey yellen'.

⁴Na' be'nn tapalloa ka' (24) ren be'nn ye tap ka' llia xiren', le go't akte' slloa're rao yon', lloe'rao ake' Diosen' gan' llie' na', ne ake':

—iKa'n gakchga! iGakxhenchga Diosen!! ⁵Na' nen bnne ye to be'nn gan' llia Diosen', ne'e:

Yeolol lli'o llon xchin Diosen' llaya'l wxenra'll-lloe', lli'o lleblloe', no be'nn gore no bida'o ak.

Yel wachayna'a ke be'nn nak ka xhi'r da'on

⁶Na'll benra' be xhnne ke be'nn zan lloe'rao ake' Diosen', na' nen ka ga de yeo xhen ake, na' ka ga llachj yi'wzi'o, ne ake':

iGakxhenchga Diosen'!
Le le'en nape' yel wak,
na' ba bzorao llnebie'.

7 Yewello sollo nbaraz kwis
we'raolloe'.

Le ba bllin lla gak yel wachayna'a ke be'nnen' nak ka xhi'r da'on.

Ba zo no'ren' sie' xho're'.

⁸ Ba be'e ra'll cha'o da nake', ra'll lliche xhi're.

Na' ra'll cha'o da llich na', zeje di'll da wen dan' llon be'nn ka' ba brej Diosen', nak ake' ka no'ren' za wchayna'a na'.

⁹Na'll goll anglen' nada' da yobre: —Bzoj da ni: "Nbaraz ke be'nn ka' ba goxhe' lljak katen' gak lnni ke yel wachayna'a ke be'nnen' nak ka xhi'r da'on."

Na'll bne anglen':

—Di'll nin' goll Diosen' nada' naken di'll li.

¹⁰Na'll bzoa xhiba' xhnie' anglen' nench we'rawe', na' bi benne' latje, bne'e:

—Bi gono' ka'. Nada' naka' be'nn wen xchin Dios kan' nakso' rwe' ren be'nn lwelljo' ka', be'nn bi llbej yichje' xti'll Jesús na'. Benxhen Dios na'. Na' be'nn lloe' xti'll Jesúsen', zokze Spíritu ke Diosen' llzejnie'n leake' nench lloe' ake' xti'lle'n.

Be'nnen' llia kabay lliche

¹¹Na' bre'ra' yebán' ka to da nyarje, na' bre'ra' to kabay lliche, na! llia to be'nne leba!. Be'nnen! llia leba'n na' nzie' Be'nn Llon Kon Kan' Ne'e, na' Lloe' Di'll Li. Zeje' lixheje kan' llchoybie' sa'kzi' be'nn ka' bi llon kan' ne'e na', na' dilrene' da xhinnj na'. 12 Na' bre'ra' yej rawe' ka' naken llaktit ka yi' da lla'lnninne, na' zan corona zjazó vichje'n, na' nyoj ye to re'e roxhgue'en da nombia' toze Le'e. 13 Na' nake' to ra'll da dop llen, na' nzie' Xti'll Dios. ¹⁴Na' be'nn nak be'nn waka'a ya ke Diosen' nao ake' Le'e, nak ake' ra'll cha'o da nak llich yalle, na' llia ake' twej kabay lliche. 15 Na' lloe' na' ll-lloj to spad da nlátit rawe' da gone' we'e yell ka' bi llzoa di'll kan' ne'e na'. Na' kat nnebie' na'. wsa'kzie' leake', na'll wzenay ake' ke'e. Na' wdie' leake' ka to le' yay yetj, na' sa'kzi' be'nn ka' ba ben da xhinnjen', le Dios be'nnen' nap yel wak xhen na', llaklle'e kan' ba ben ake'n. 16 Na' le' xhe'e na', na' le' xhichje' na', nyoj di'll ki nen: "Naka' Rey ke yeololte rey ak, na' naka' Xan yeololte be'nn wnebia'."

¹⁷Na'll bre'ra' to angl zelle'e lo willen', na'll besie' balwille' yeololte chod ak llasdá le' yebán', lle'eba':

—Ledá, leyedope ganni gaore to xche' xhen da gonn Diosen' keré. ¹⁸Ga't xpe'r be'nn wnebia' ak, xpe'r no xan be'nn waka'a ya ak, xpe'r no be'nn war ak, xpe'r kabay ak, na' ren ke be'nn wllia leba', na' ke yeololte be'nne, no be'nn gok be'nn wen llin ke be'nne, na' rente be'nn bi ben xchin be'nne, na' no xkwi'de, na' no be'nn gore.

¹⁹Na' bre'ra' bell xi'on, ren yeolol be'nn wnebia' ka' zjalla'a yellrio ren be'nn waka'a ya ke'e ka', ba badop ake' nench tilrén ake' Jesús be'nnen' llia ko'll kabay llichen', ren be'nn waka'a ya ke'e ka'. 20 Na' bellen' gokba' rallna'a Jesúsen', na' leska' gok ke be'nnen' be'e di'll wenra'llen', be'nnen' ben yel wak nench bxenra'll be'nne bell xi'on. ren lwa'a keba' na', na' bzo ake' sen keba'n. Llop akteba' gok rao na'a Jesúsen' rente be'nnen' be'e di'll wxhive'e na', nna nbanteba' bza'l akeba' lo yi' gabil gan' lla'lnninn dan' nzi'i azufre, na' naken to vi' xhen dan' nak ka to nisda'o. ²¹ Jesúsen' be'nnen' llia kabay llichen' bete' yezikre be'nn ka' nao bell xi'on kone spad dan' blloj lloe' na', na'll yeolol chod ka' to berj akeba' bdao akba' xpe'r ake'n.

Kan' gak rao to mir iz

Bayoll na' bre'ra' to angl be'nn zo yebá, betje' no'xe' xhiya ke yell zitj dan' nak lo gabil, na' no'xe' to gden xhen. ² Anglen' be'xe' bel xi'on, ban' bra' kana'te. Leba' llnebia'ba' daxi'o ka', na' leba'n Satanásen'. Anglen' bchejeba' gden to mir iz. ³ Bayoll bchejeba' na', le bza'lteba' lo yell zitj gabilen', na' le bsejte' lloa' yell zitjen', na' bchi'chte'n to sey nench bill siye'ba' be'nnach chak llin to mir iz. Kat te to mir izen', kana'll yeselleba' gden na' nench yellojba' ye choll.

⁴Na' bre'ra' gan' lljachia be'nn ka' llnebia', na' bllia ake' rawe na', be'nn ka' bro' Diosen' rao na'a ake' gon ake' yel koxchis ke be'nnach. Na' bre'ra' be'nn ka' bchoy ake' yen, ni ke dan' be'e ake' xti'll Jesúsen', na' ni ke dan' bxenra'll ake' Diosen', na' bi be'rao ake' bell xi'on, ren lwa'a keba' na', na' leska' bi be'e ake' lati so sen keba' roxhga ake' o na'a ake' na'. Na' basbán Diosen' leake' radi be'nn wat ka', na' nnebia'rén ake' Criston' to mir iz. ⁵Be'nn ki gok be'nn nell babán ake' radi be'nn wat ka'. Na' bi babankze be'nn ka' yela', bllinte gokll to mir iz, kana'llen' babán ake'. ⁶Nbaraz nni't be'nn ka' basbane' radi be'nn wat ka' da nelle, be'nn ka' ba brej Diosen' nak be'nn ke'e. Bi gak ke ake' kan' gak ke be'nn ka' yellayrao ake' ke chnare bi da xhinni ba ben ake', da na'n nello yel got wllope. Len na' ni't ake' nxenra'll ake' Dios. na' nxenra'll ake' Cristo na', na'llen' gak ake' bxoz, na' nnebia'rén ake' Criston! to mir iz.

⁷Kate ba gok to mir iz na', we'e Diosen' latje velloj xan daxi'o ka' lo yell zitj lo gabil na', gan' bseyje' na'. ⁸Na' yellojen na' siye'n be'nne da yobre, be'nn zjalla'a yeolol yell ka' lla'a yellrio. Siye'n be'nn ka' nzi'i Gog na' Magog, yetopen leake' tilrén ake' Criston', gak ake' be'nn zan kwis ka yoxh da lli' lloa' nisda'o, da nono llak wrabe. ⁹Na' bre'da'ora' be'nn zan llebraz ka', bza'a ake' doxhen rao yellrio, na' jake' gan' lli' yell dan' nllie' Diosen', gan' zjalla'a be'nn ka' ba breje' nak ake' be'nn ke'e. Na't ka byechj ake' yellen', le bente Diosen' bexi yi'

le' yebán' bzeyten leake'. ¹⁰Na' ka nak xan daxi'o ka' dan' bxhiye'e be'nne lla'a yellrio, angl ke Dios na' bza'le'n lo yi' gabil gan' lla'lnninn dan' nzi'i azufre, na' yi' xhen na' naken ka to nisda'o, gan' bza'l ake' bell xi'on ren be'nnen' be'e di'll wenra'll, nench bxenra'll be'nnach bell xi'o na'. Na'll yellayrao ake' ke chnare.

Gok yel koxchis ke be'nn ba got

¹¹Na'll bre'ra' gan' llia Diosen' naken to da xhen da nak da llich kwis. Na' yellrion' rente yebán' baranten chras nollno bre'kze len, gallga gokse yezi'ra'llen ga yobre. ¹²Na' bre'ra' be'nn ba got, be'nn gore be'nn xkwi'de, na' no bda'o, zjazellá ake' rao Diosen'. Na'll bse's Diosen' yich ka' dan' nyoj yeolol da ben totoe'. Bayoll na' bse'se yich gan' nyoj ra be'nn ka' de yel nban zejlikane ke. Na'll bene' yel koxchis ke ake' kon ka ben ake', chak bzo ake' yellrio, le yeolol da ben ake' na', nyojen le' yich. 13 Yeolol be'nn wasa't lo nisda'on, balloj ake' zjazellá ake' rao Diosen', na' yeolol be'nn wasa't ga yobre, leska' balloj ake' zjazellá ake' rawe'n, nench na' bene' yel koxchis ke totoe' kon ka ben ake' chak bzo ake' yellrio. ¹⁴Na'llen' yel got gan' lla'a be'nn wat ka', Diosen' bza'len lo vi' gabil dan' nak da xhen ka to nisda'o. Na' dan' got be'nn ka' blla'a lo yi' na', len na' vel got wllope ke ake'. ¹⁵Yeolol be'nn bi bzoa xti'll Diosen', yeolol be'nn bi nyoj ra ake' gan' nyoj ra be'nn, de yel nban zejlikane ke ake', bza'l Diosen' leake' lo yi' na!.

Yebá kobe ren yellrio kobe

Bde na' bre'ra' le' yebán' ba bayaken da kobe leska' yellrion', le yebán' da gok da nelle na', na' yellrio da nell na' ba barán aken. Leska' billbi nisda'o go'te.

²Nada' Juan bre'ra' yell ke Diosen', Jerusalén kobe dan' lli' yebán' gan' zo Diosen', betjen rao yellrio. Nonen nbaraz ka ke to no're ba bayone' nbaraz wchayne'e.

³Na' do gan' llia Dios na', benra' bnne to be'nn zillje, ne'e:

—Wiacheke, ba betj Diosen' zorene' be'nnach, na' sorenteze' leake', le breje' leake' nench nak ake' yell ke'e. ⁴Dios na' gone' bibi gak ke ake' da soya'ch ake', da kwellrén ake', nollno gat, nollno chey la, le ba bde ke yeolol da ka' go't yellrio nellen'.

⁵Na'll bne be'nnen' llia llnebia'n, ne'e:

—Lewiá ke, nada' llakoba' yeololte bi da zjadé.

Leska' bne'e:

- —Bzoj di'll ki ba benro' na', le naken di'll li, na' gak kan' bnia' na'.
 - ⁶Bayoll na' bne'e nada':
- —Ba gok da llaya'l gak. Nada' naka' ka ti'ch di'll nelle, na' naktia' ka ti'ch di'll ga llayollen, ka to be'nn bxe bi da bxie', na' wasyollte'n. Be'nne bile, nada' we'e nis da ye'je' dan' nsa'a yel nban, na' bitbi sa'kren. ⁷Be'nne nxenra'll nada', cha' ba bzoere' bi wsanra'lle' xti'lla'n, da wen gak ke'e ka di'llen' ba be'kza' na', nada' gaka' Dios ke'e, na' le'e gake' xhi'nna'. ⁸Na' ka nak be'nn ka' blleb xhnneza', na' be'nn bi llonlira'll nada', na' be'nn ka'

Apocalipsis 21 472

llaso'n dan' bi llazra'lla', na' be'nn wen xhia ka', na' be'nn darén ak no'r yobre o be'nn byio yobre, na' be'nn llon txhen yel walla'a, na' be'nn llonlira'll lwa'a ak, na' yeolol be'nn lloe' di'll wenra'lle; yeolol be'nn ka'n llaya'l sa'kzi' ake' ke chnare lo yi' xhen dan' nak ka to nisda'o, lo yi' gabil gan' lla'lnninn dan' nzi'i azufre. Na' dan' gak ke ake' na', len na' nello yel got wllope.

Yell Jerusalén dan' nak da kobe

⁹Na'll bre'ra' to angl gall ka' be'nn ka' be'x leo ka' galle, da ka' yollte da brarj ake', nench gok yel zi' le zerawe yellrion'. Badbi'ye' gan' zia' na', na' lle'e nada':

—Da ke, wroe'ra' rwe' be'nnen' nak ka to no'r za wchayna'a, na' Jesucristo be'nnen' nak ka to xhi'r da'on bet ake', na' nnello Le'en si'i no'ren'.

¹⁰Na' Spíritu ke Diosen' benen nench bache'e anglen' nada' to rao va' xhen da nak sibe, na' broe're' nada' yell Jerusalén na', dan' nake yell ke Dios. Zon yebá na', na' lletjen rao vellrion'. ¹¹Na' vellen' goken llaktit kone beni' dan' nsa'a Diosen'. Na' llaktit ken naken ka to yej da za'ke, ka yej dan' nzi'i jaspe dan' llre'llo ka yej kes. 12 To ze'e sib xhen nechj yellen', na' zjazó chllinn (12) kwen ga nak zi cho'llo, na' toto gan' nyarj na', zjazé twej angl. Na' le' gan' cho'llo na' nyoj ra chllinn kwe! be!nn ka! bxe chllinn kwe! dialla be'nn Israel ka'. 13 Na' le' ze'e dan' zo chla' yellen' gan' llra' willre zjazó chonne gan' nak zi cho'llo, na' gan' llen willre zo ye chonnen, na' vichire zo ye chonnen, na' lle'lre zo

ye chonnen. ¹⁴Na' ze'e dan' nechj yellen', yo' chllinn yej xhen rane, na' le' vej ka' nyoj ra chllinn be'nn ka' nak postl ke Jesucristo be'nnen' nake ka xhi'r da'o na'. 15 Na' angl be'nnen' be'rén nada' di'll na', no'xe' to ya da nak de ya cha'o dan' nzi'i oro da gonrene' llin wllixe' yell na', ren ze'e na', na' lloa' gan' nak zi cho'llo. 16 Yellen' toz ka naken de zra'ye ren de zdonre. Anglen' bllixe' yellen' kone yan' no'xe' na', na' goken chop mir chop gayoa (2,200) dan' nzi'i kilómetro chla' weien'. ka tonn nake zra'ye na', ka to sib naken. 17 Na'll bllixe' ze'e dan' nechj yellen', na' goken to gayoa tapayon (144) tchit dan' nombia' be'nnache. len na' benrén anglen' llin bllixe'n.

¹⁸Ze'e dan' nechj yellen' naken de yej da za'ke da nzi'i jaspe, na' doxhen yellen' naken de ya cha'o, na' nla'n ka to yej kes da nak yalle. ¹⁹Na' yej dan' lla'a ran ze'e dan' nechj yellen' nonen len nbaraz.

Da nellen' naken de yejen' nzi'i jaspe;

- da wllope na' naken de yejen' nzi'i zafiro;
- da wyonne na' naken de yejen' nzi'i ágata;
- da wdape na' naken de yejen' nzi'i esmeralda;
- ²⁰ da ga'ye na' naken de yejen' nzi'i ónice;
 - da wxhope na' naken de yejen' nzi'i cornalina:
 - da galle na' naken de yejen' nzi'i crisólito;
 - da xo'ne na' naken de yejen' nzi'i berilo;
 - da ga na' naken de yejen' nzi'i topacio;

crisopraso;
da chnej na' naken de yejen'
nzi'i jacinto;
na' da chllinn na' naken de
yejen' nzi'i amatista.

²¹Na' gan' nak zi cho'llo da

da chi na' naken de yejen' nzi'i

chllinn kwen ka', nak aken chllinn yej cha'o dan' nzi'i perla, toton naken de yej cha'o nzi'i perla. Na' nez ke yellen' naken de ya cha'o dan' nzi'i oro, na' naken ka yej kes da nak yalle.

²²Na' bibi yoda'o bre'ra' yellen', le be'nn ka' zjalla'a yell na', ni't ake' rao Xanllo Dios, be'nnen' nape yel wak xhen, na' rao Jesucristo be'nnen' nak ka xhi'r da'o, leake'n nxenra'll be'nn ka' lla'a yellen'. ²³Be'nn ka' lla'a yellen', bibi will bibi be'o yalli akre' wseni'n yellen', le beni' dan' nechj Dios na', llseni'n ke ake' rente beni' da nsa'a be'nnen' nak ka xhi'r da'o. ²⁴Na' beni' ke Dios na' wseni'n ke be'nn za'k yeololte yell zjalla'a yellrio, be'nne llonlira'll Dios, na' be'nn wnebia' lla'a yellrio we'xhen ake' Dios, we'e ake' Le'e bi da za'ke da cha'o da de ke ake', ren no yel bara'nn xhen ke ake'. ²⁵Bi cheyj gan' nak zi cho'llo da ka' ni't yellen' te lla, le ganna' bill gale. ²⁶Na' vel za'k yel nbaraz da zjadé yeolol yell, ren yel bara'nn da zjadé ke be'nn wnebia' ka', we'e ake'n Diosen', ²⁷Yell na' kbat gak cho' be'nn llon da zban. Bi gak cho' be'nne llon biteze da llwie Dios, na' be'nne lloe' di'll wenra'lle. Zeraoze be'nne ka' nyoj ra ake'n le' vich ke Jesucriston', be'nnen' nak ka xhi'r da'o, na' nyoj ra ake' ga't yel nban ke ake' ke chnare, leakze'n gak cho! ake!.

Na'll broe' anglen' nada' yeo gan' yolle nis da lloe' be'nnachen' yel nban zejlikane. Nisen' naken ka yej kes le nyan kwis. Na' ll-llojen gan' llia Dios na', ren Jesucristo be'nnen' za'krebe' ka xhi'r da'o. ²Na' kllol nez xhen ke yellen', na' llop la'te lloa' yeon' zjazó yay da lloe' yel nban. Na' llbian daxhix chllinn (12) ras rao to iz, lloe'n daxhix tbe'o weje, na' be'nn yell ka' llonrén ake' xhla'yen' llin, nench wayonen be'nn lla'a yeolol yell ka' biteze da llak akre'. ³Na' billbi da xhinnj ga't da llwie Dios, na' yel llnebia' ke Diosen' ren ke Jesucristo, be'nnen' nak ka xhi'r da'o so ake' vellen'. Na' be'nn ka' bxenra'll Le'en we'rao ake' Le'e. ⁴Na' re'e akre' Xanllo Diosen', na' yoj re'en roxhga ake'. ⁵Na' billbi xchol gake. Na' be'nn ka' zjalla'a na', billbi beni' ke no da llseni', na' billbi will yalli akre', le beni'n nechi Xanllo Dios na'n, wseni'n ke ake'. Na' nnebia'rén ake' Le'e ke chnare.

Ba rez yed Jesucriston' da yobre

⁶Na'll goll anglen' nada':

—Yeolol di'll ki ba benro'n naken da li, gak kon kan' ba bneto' na'. Xanllo Dios na' llsenie' lo yichjra'llda'o be'nne lloe' ak xti'lle'n, na' llzejnie're' leake' akren' nne ake', Le'en bse'le' nada' zadzejnie'ra' be'nn llon xchin Dios, nench wroe' akre' da ka' ba za'a aken.

⁷Na'll bne Jesúsen':

—Le za'tia'. Nbaraz ke be'nn ka' byejle' ke xti'lla'n, nyojen le' yich ki.

⁸Nada', Juan, benra', na' bre'ra' da ki ba bzoja' ni. Na' bayoll benra', Apocalipsis 22 474

na' bre'ra' na', jazoa' xhiba' xhnia' anglen', be'nnen' broe' nada' da ki, na' gokra'lla' we'rawe'. ⁹Bixha anglen' bne'e:

—Bi gono' ka', nada' naka' to be'nn wen xchin Dios kan' nakso' rwe', na' kan' nake be'nn lwelljo' ka' ba brej Diosen' lloe' xti'lle'n, na' kan' nak yeolol be'nn ka' llejle' da ka' nyoj le' yich ni. Benxhen Dios na'.

¹⁰Leska' golle' nada':

—Bi wkwa'cho' di'll ka' ba bzojo'n, le da ba zo rez gaken. ¹¹Na' be'nn ka' llon da xhinnj, nnao aklle' yeso'ne'n, na' be'nn ka' llaso'n da nak zdo', yeso'nlle'n. Na' be'nn ka' llon da wen, nnao aklle' gon ake' da wen na' llon ake'n. Na' be'nnen' ba ben kwine' rallna'a Diosen', bit yelloje' lo na'a Diosen'.

¹²Jesúsen' bne'e:

—Le za'tia', na' wayoa' be'nnach kon ka ba ben totoe'. ¹³Nada' naka' ka ti'ch di'll nell, na' naktia' ka ti'ch di'll gan' llayollen, nada' naka' ka to be'nn bxe bi da bxie', na' wasyollte'n, na' naktia' ka to be'nn zej raote, na' ka be'nn zej xhante.

¹⁴Nbaraz ke be'nn ka' ba bayib xhara'n ake'n. Leake'n gak gao ake' daxhix dan' llbia rao yay dan' nsa'a yel nban zejlikanen', na' gak cho' ake' yellen'. ¹⁵Zan ka nak be'nn ka' llon da zban, be'nn llon txhen yel walla'a, be'nn llon da nen ke xpe'r ake', na' be'nn wen xhia, na' be'nn llonlira'll lwa'a ake, na' yeolol be'nn lloe' di'll wenra'lle, na' llawé

akre' wzenay ake' di'll wenra'lle, yeolol be'nn ka' bi gak cho' ake' lo yell kia'n.

16—Nada' Jesús ba bse'la' angl kia'n, nench badzenre' rwe' yeolol da ka' ba bzojo' na'. Na' llaya'l we'on be'nn ka' lldope ll-llay llonlira'll nada'. Nada' naka' xhi'nn dialla rey David, na' naka' ka berj rsire.

¹⁷Na' Spíritu ke Diosen', na' leska' lli'o nxenra'll-llo Jesúsen', llelloe':

-Le yobte yedo'.

Na' be'nnen' llenen', nne'e:

—Dachga.

Na' be'nnen' llbilra'lle', yedchgue', na' noteze be'nn lle'nre', ye'jchgue' nis dan' lloe' yel nban zejlikane, na' bibi sa'kren.

¹⁸Na' llasnisra' re' llzenay kan' ne yich ni, ke da ka' za gak, na' cha' no wzanlle ka dan' llia le' yich ni, Dios na'kze gonlle' yel zi' ke'e, ka dan' nyoj le' yich ni. ¹⁹Na' cha' re' yeka're dan' llia le' yich ni, Dios na' yelane' raren' le' yich ke'en, gan' llia ra be'nn ka' de yel nban zejlikane ke, na' bi gak yeyo're yell ke'en, na' bibi da wen gak keré dan' nyoj le' yich ni.

²⁰Na' Jesús, be'nnen' bzejnie' nada' yeolol da ka' bzoja' na', ne'e:

—Da likze le zaza'tia' da yobre. Ka'n gakchga. Le yobte yedo' Xanto', Jesús.

²¹Xanllo Jesucriston' gakrenchgue' yeololtere. Ka'n gakchga.